

史传三编

朱
轼

文硕阁

wenshuoge.com

目录

关于我们	4
提要	6
原序	7
凡例	9
卷一	10
卷二	18
卷三	26
卷四	38
卷五	48
卷六	59
卷七	67
卷八	77
卷九	85
卷十	93
卷十一	99
卷十二	109
卷十三	119
卷十四	131
卷十五	140
卷十六	149
卷十七	158
卷十八	168
卷十九	175
卷二十	183
卷二十一	191
卷二十二	200
卷二十三	209
卷二十四	218
卷二十五	229
卷二十六	238
卷二十七	248
卷二十八	258
卷二十九	267
卷三十	275
卷三十一	284
卷三十二	295

卷三十三		305
卷三十四		315
卷三十五		322
卷三十六		331
卷三十七		341
卷三十八		351
卷三十九		360
卷四十		368
卷四十一		372
卷四十二		379
卷四十三		386
卷四十四		395
卷四十五		402
卷四十六		411
卷四十七		425
卷四十八		433
卷四十九		444
卷五十		453
卷五十一		463
卷五十二		473
卷五十三		480
卷五十四		488
卷五十五		497
卷五十六		509

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案史传三编五十六卷

国朝朱轼撰轼有周易传义合订已别着録是编凡名儒传八卷名臣传三十五卷又续编五卷循吏传八卷成于雍正戊申时明史尚未成书故所録至元而止明以来传名儒者大抵宗宋而祧汉唐而宋又断自濂洛以下轼所为传上溯田何伏生申公高堂生不没其传经之功中及董仲舒韩愈诸人不汲其明道之功於宋则胡瑗孙复石介刘敞陈襄虽轨辙稍殊亦并见甄録絶不存门户之见可谓得圣贤之大公其以迁就利禄削扬雄马融以祖尚元虚削王弼何晏以假借经术削匡衡王安石亦特为平允惟胡寅修怨於生母王柏披猖恣肆至删改孔子之圣经咸预斯列似为少滥又据王福峙之虚词为薛收作赞亦未免失之不考耳名臣传所列凡一百八十人去取颇为矜慎续编所列又三十九人其凡例曰续编者何择其次焉者也或卷帙编次已定附之於後焉耳然见为稍亚而乙之与失於偶漏而补之其品第则有间矣混而无别亦稍疎也循吏传所列凡一百二十一人虽体例谨严而颇未赅备如何易于之类表表在人耳目者多见刊削其去取之例亦未明言殆不可解要其标举典型示人效法所附论断亦皆醇正固不失为有裨世教之书矣前有轼及蔡世远总序二篇考名儒传为李清植所纂名臣传为张江蓝鼎元李鍾侨所纂循吏传为张福昶所纂世远商榷之而轼则裁定之云乾隆四十六年十二月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

史传三编原序

史传三编者予与少宗伯蔡闻之先生所订历代名儒名臣循吏列传也自司马子长变编年为纪传後之作史者因之凡传一人必叙其人之所学所守所言所行所值之时所居之官原始要终无虚美无隐恶而後加之褒贬以为劝为惩犹用药之按病症折狱之比罪案舍此不能臆为论断也今考史记所载帝纪世家列传凡百有十二卷而儒林循吏以类为目其他名公巨卿或分或合其义例盖有取焉汉初儒者不概见所传惟文景间明经数人然等孟氏於荀卿列子贡於货殖其所谓儒盖可知矣汲黯与郑当时合传而王陵之戇直仅附见於陈平世家子产公仪休孔子孟子之所称述而与石奢李离同列之循吏毋恠後之人议其疎畧抵牾也夫以马迁良史之才父子相继勒成一家言犹不免疎畧抵牾之讥他无论矣闻之先生尝与子上下二千载中学术事功之真伪纯疵於圣人是非之义未敢自信为有当然如黄老之害道游侠之乱政必严加退斥断不敢附会史氏以疑误学者是则予两人之志也於是与同学诸子商榷纂辑録两汉至元以儒称以臣显以吏着者若干人各为一传事皆本诸旧史而词之游者删之义之疑者缺之其嘉言懿行见於他书者采而益之盖安溪李君世幽与其从子立侯南城张百川南靖张季长漳浦蓝玉霖为之草创而讨论折衷闻之先生实总其成予不揣固陋间出其一知半解与相参酌书成析为若干卷爰以质之当世或云蓄之为德行发之为事业论道经邦宣猷宰化莫非性分内事今区而别之为名儒为名臣为循吏使人疑儒术之迂疎而谓卓然树立者皆适逢其会非有所本而为之其可乎予曰天德王道原无二致然浅深同异视乎其人士元才绌于百里黄霸入相功名减於治郡申公辕固生以宿儒应辟卒无所建白而去此由气质之稟于天者不能无蔽是以优於此绌於彼见知见仁各随其性之所近欲其体备而用周也难矣我

皇上以天纵之资亶亶翼翼用行政一本於钦明缉熙之学又日进内外臣工教以省身克己存诚主敬之道而程能课绩虽有不逮苟其中无他必寬以自新之路是以人思感奋争相濯磨臣品官方彬彬日上顾日月渐摩者

圣主之所以立教也夙夜寅畏者臣子之所以自励也有不能者才之稟于气无不备者性之根于命也惟格物明理以启其端戒惧慎独以践其实扩而充之以化其气质之偏由是出其所学上而辅佐

圣君为万世开太平之治即効一官分一职亦必休养涵濡登风俗于醇古此一德泰交唐虞师济之盛也汉唐以下乌足道哉

雍正七年己酉岁长至日高安朱轼撰

学术之与事功孤卿之与庶尹殊途而同归百虑而一致者也民受天地之中以生五性粹然至善用内直之功敬修而不怠方外之功集义而无歉则元善之长充周而不可穷先圣传心

之学於是乎在上之为论道经邦之儒次亦为一民一物之所恃赖故曰同归而一致也譬之原泉广津发自崑仑放而为河海流而为百川润桑田而滙沼沚皆是物也顾人生而静而後质与学之所近或偏得其一体汉唐以来通经履道之贤匡君定国之彦亲民济物之选代不乏人就其合同而论之三者本一无事於分其本充者其末茂使董广川大用於汉文中子及遇兴唐功不过於萧曹房杜哉程朱大儒也明道劝神宗防未萌之欲以十事进君能尧舜其君者也及出令晋城扶沟化理昭彰非守令所当法乎朱子在朝四十六日进讲奏疏名臣风烈万代瞻仰及观其浙东南康潭州诸治蹟岂两汉循吏所易及乎且如司马公许鲁斋复何分於名儒名臣哉故曰无事於分也然使语魏丙姚宋以精一之学则粗矣抗召杜卓鲁於魏陆韩范之列则逊未逮矣况三者之中又各有等级次第则亦不必於合也方今

天子神圣道统治统萃於一身以至道醇修勗士类以臯夔稷契望诸臣以廉谨仁明飭吏治一道同风之盛于斯乎遇之高安可亭朱先生服儒体道负开济大畧入为卿士出为牧伯由冢宰陟台辅以襄

圣天子盛治与世远同事

禁廷一日语世远欲纂汉唐以来至於宋元名儒名臣循吏等传各为一集合为一书世远在鰲峰书院时故尝校刊先儒诸书又私纂历代名臣言行録实有素心顾以均服职事未遑手録属诸同志四五人分纂传论高安公定其领要重申讨论世远亦旁览广披细加参订再阅岁而书告成事蹟繁多年代久远或恐有纰漏舛错之讥要可为高山景行之藉士幸生

尧舜之世怀三代之英三者之中服膺砥砺备其全体固足以求志达道成旷代之人豪即得其一节亦足以寡一身之过淑躬而济物蔼蔼吉士维

天子使人材之盛比於成周风俗之美跻於陶唐是则编

辑是书者之惓惓也

雍正四年丙午十月朔日漳浦蔡世远撰

凡例

史传三编凡例

名儒名臣循吏俱始于汉终于元何也据二十一史以立传也

天德与王道大用与小用原无二致三者原不必分但依类以见耳如龚遂岂不是名臣而列在循吏虞诩岂不是循吏而列在名臣司马光岂不是名儒许衡岂不是名臣而姑以分属程朱在朝则为名臣牧民则为循吏而列之名儒读书论世但存是则是傲之心不必泥也

称名史例也周程张朱独称子者

圣祖仁皇帝所定也凡诏诰奏章俱然于以见我朝尊尚正学卓越前代焉

各传虽依据二十一史本传然多采传记及各家文集以成之凡大人物尤加意蒐罗如诸葛亮则兼采裴松之习凿齿诸史及诸葛丞相集魏徵及唐初名臣则采贞观政要陆?则采宣公奏议是也

名儒汉史有不立传者则旁采以成之宋名儒则采之伊洛渊源录及续录若本人语录文集等书宋名臣则采之名臣言行录及续集别集等书按其年月择其简要有三易稿而後成者

一人之事有散见于他传者则类聚之本传如周勃诛诸吕则取高后纪以入之张柬之复唐祚则采五王传以入之是也是故苟其无关体要虽原传所有必删繁以就简苟其事不得畧及言行可法者虽散见于他传亦必参考以成文期于词省而事备耳

奏疏不能详也有至要者则载之并采之历代名臣奏议与其详于大人子虚解嘲也毋宁详于奏疏论赞不必尽录也录其尤善者

续编者何择其次焉者也或卷帙编次已定附之于後焉耳

羊祜杜预曹彬昔之所谓名臣也但祜与预在魏朝皆有封爵彬亦为周之国戚不能无春秋责备之意故列之续编若周瑜鲁肃慕容恪王猛等亦降列之者蜀汉为正统非魏吴之比东晋为正统非南北朝之比也

卷一

钦定四库全书

史传三编卷一

大学士朱轼撰

名儒传一

汉

田何

田何字子庄齐淄川人自鲁商瞿子木受易孔子以授鲁桥庇子庸庇授江东馯臂子弓臂授燕周丑子家丑授东武孙虞子乘虞以授何当秦禁学易以筮卜之书独不禁故传受者不絶汉兴梁项生受易於何而雒阳丁宽为项生从者读易精敏材过项生遂事何学成何谢宽宽东归何谓门人曰易以东矣宽授碭田王孙王孙授施讐孟喜梁丘贺由是易有施孟梁丘之学其後讐授张禹禹授彭宣则施家又有张彭之学喜授白光翟牧则孟家又有白翟之学而士孙张邓彭祖衡咸三家皆为梁丘之学梁人焦延寿亦尝问易於喜以授京房於是又有京氏学至刘向校书考易说以为诸家皆祖田何惟京氏为异後东莱费直沛高相亦治易其学皆无章句然施孟梁丘经间脱惟费氏与古文同终西汉时费高二家未得立

论曰易之为书洁静精微虽圣人犹假年以学况其余乎汉兴诸儒互相付受然谈经义者徒啜其糟醢推象占者或淫於术数故王弼兴而诸家尽废夫弼不过剿袭庄老於所谓穷理尽性以至於命者曷尝有闻哉顾已驾其说而夺诸家之帜则诸家之未足以尽易明矣虽然易为五经之源其传授所自不可以无悉也故标田何而纪其源澜於篇

伏生

伏生济南人故为秦博士治尚书当秦禁学伏生独壁藏之汉兴求其书亡数十篇独得二十九篇以教齐鲁之间齐学者由此颇能言尚书孝文时求能治尚书者天下亡有惟伏生治之欲召伏生年已九十余老不能行乃诏太常使掌故朝错往受之伏生所授有济南张生及千乘欧阳生欧阳生字和伯以授儿宽宽复以授欧阳生之子世故尚书有欧阳氏学世父子相授至曾孙高高以授济南林尊尊授平陵平当梁陈翁生则欧阳氏又有平陈之学济南张生以授族子始昌始昌以授夏侯胜胜以授从兄子建故尚书有大小夏侯之学胜又别授孔霸及周堪堪授许商则大夏侯又有孔许之学建授郑宽中张无故秦恭假仓李寻则小夏侯又有郑张秦假李氏之学凡言今文尚书者皆本之伏生

论曰尚书今文多诂屈卫宏以为错受书时伏生老不能正言使女传言教错齐音与颍川异错所不知者十二三畧以意属读而已夫此二十九篇者伏生壁藏未亡之书也既尝以教於齐鲁矣则错衔命往受伏生何难出所藏以示之即不然亦可使它弟子传言何必以女哉卫宏之云不足信也

申公

申公鲁人少与楚元王俱受诗於齐浮丘伯吕太后时浮丘伯在长安元王复遣子郢与申公俱从卒学元王薨郢嗣使申公傅太子戊戊不好学病申公及戊立胥靡申公初申公与穆生白生皆见礼於元王穆生不耆酒元王每置酒常为设醴及戊即位常设後忘设穆生退曰可以逝矣不去楚人将钳我於市称疾卧申公白生强起之曰独不念先王之德与今王一旦失小礼何足至此穆生曰易称知几其神先王所以礼吾三人者为道存也今而忽之是忘道也忘道之人胡可与久处岂为区区之礼哉遂谢病去申公白生独留後戊淫暴与吴通谋二人諫不听卒被胥靡申公媿之归鲁教授终身不出门谢宾客独王命召乃往弟子自远方至受业者千余人申公为诗训故以教疑者则阙弗传兰陵王臧代赵绾皆受诗申公後臧为郎中令绾为御史大夫请立明堂不能就其事乃言师申公申公时已八十余上使束帛加璧安车蒲轮驾驷迎之弟子二人乘轺传从至见上上问治乱之事对曰为治者不在多言顾力行何如耳时上方好文词见申公对默然然已招致即以为大中大夫舍鲁邸议明堂事窦太后喜老子言不说儒术得绾臧之过以让上上因废明堂事下绾臧吏皆自杀申公亦病免归数年后卒弟子为博士者十余人至大夫郎掌故者以百数而所授鲁许生免中徐公以授王式式以授山阳张长安东平唐长宾沛褚少孙由是鲁诗有张唐褚氏之学而燕韩生齐辕固亦皆治诗为之传韩婴当孝文时为博士景帝时至常山太傅婴亦以易授燕赵间好诗故其易微惟韩氏自传之武帝时婴尝与董仲舒论於上前其人精悍处事分明仲舒不能难也婴授河内赵子赵子授蔡谊谊授食子公与王吉吉授长孙顺则韩诗又有王食长孙之学辕固孝景时为博士尝与黄生争论汤武受命於上前及窦太后好老子召问固固曰此家人言耳太后怒曰安得司空城旦书乎使入圜擊髡上知固直言无罪假以利兵髡应手倒乃免武帝初以贤良徵时固已九十余矣公孙弘亦徵仄目而事固固曰公孙子务正学以言毋曲学以阿世诸齐以诗显贵皆固弟子也惟夏侯始昌最明始昌授后苍苍授翼奉匡衡授师丹伏理则齐诗又有翼匡师伏之学齐鲁韩三家诗皆立於学宫或取春秋采杂说咸非其本义与不得已鲁最为近之论曰後儒论申公对武帝以力行当明言所行者何若以启发武帝之心又谓武帝不问故申公不言二者固皆有见窃谓申公之为人抱遗经而守宁静者也意其所谓力行大都清心寡欲息事宁人为先武帝以雄心大畧之主一望其词气固已枘凿而不相入矣故无容於再问再对也独惜所谓鲁诗竟与辕固之齐诗同湮没而不传使後代好古之士无所考稽刘歆有言与其过而废之宁过而存之谅哉

高堂生 后苍

高堂生字伯鲁人其先齐公族也齐卿高敬仲食采於高堂因氏焉生其裔也传仪礼昔帝王质文世有损益至周曲为之防事为之制故曰礼仪三百威仪三千及周之衰诸侯将踰法度

恶其害己皆灭去其籍自孔子时而不具至秦大坏汉兴生为博士传士礼十七篇即仪礼也至武帝时又有礼古经出於鲁淹中而河间献王好古爱学收集余烬得而献之合五十六篇竝威仪之事而又得司马穰苴兵法一百五十五篇及明堂陰阳之记并无敢传之者惟古文十七篇与生所传不殊而字多异生所传者今文也五十六篇字皆篆书古文也生授瑕丘萧奋奋以授东海孟卿卿以授后苍汉兴传礼者十三家惟高堂生所传历久愈明云

后苍字近君东海郯人自汉兴高堂生为博士传士礼十七篇迄孝宣世苍最明苍尝受诗于夏侯始昌又从东海孟卿受礼其说礼凡数言号曰后氏曲台记大抵皆推士礼而致於天子苍授梁戴德戴圣及沛庆普三家皆立於学官故礼有大戴小戴庆氏之学大戴授琅邪徐良小戴授梁桥仁及杨荣故大戴有徐氏小戴有桥杨氏之学皆渊源于苍云

论曰昔先王以礼化民成俗横渠张子每教学者以知礼成性变化气质礼顾不重欤经秦火後礼失其传传自高堂生历后苍而益着二先生之有功于礼也顾或谓生所传止士礼疑为未全之书不知朝庙邦国之典周官载之仪礼详于冠昏丧祭推士礼以达于天子固其所也周公之精意存焉後之学者每治礼记而缺仪礼夫仪礼经也礼记传也传宜分类以附于经之後乃舍此而取彼是犹习春秋之书舍孔子之经文而但习二传其可谓之通春秋哉

毛萇

毛萇赵人善说诗自谓子夏所传盖自孔子以诗授子夏子夏作诗序以授鲁人曾申申授魏人李克克授鲁人孟仲子孟仲子授根牟子根牟子授赵人荀卿荀卿授鲁人毛亨亨为训诂传於其家河间献王得而献之朝时萇受亨诗为献王博士每说诗献王悦之因复取诗传加毛字以别齐鲁韩三诗也故世谓亨为大毛公萇为小毛公亨诗传由萇盛行於汉萇所着有毛诗故训二十卷诗传十卷平帝时立於学官萇授同国贯长卿长卿授解延年延年为阿武令授徐敖敖授九江陈侠侠授同郡谢曼卿曼卿善毛诗又为之训东海卫敬仲受学於曼卿先儒相承谓诗序子夏所创毛公及敬仲又加润益郑衆贾逵马融并作毛诗传郑康成作毛诗笺齐诗魏代已亡鲁诗亡於西晋韩诗虽存无传之者惟毛诗郑笺至今独立

叶梦得曰诗有四家毛诗最後出而独传何也曰六经自秦火後独诗以讽诵相传韩诗既出於人之讽咏而齐鲁与燕语音不同训诂亦异故其学往往多乖独毛之出也自以源流得於子夏而其书贯穿先秦古书其释鸛鵒也与金縢合释北山烝民也与孟子合释昊天有成命与国语合释硕人清人黄鸟皇矣与左传合而序由庚等六章与仪礼合盖当毛氏时左氏未出孟子国语仪礼未甚行而学者亦未能信也惟河间献王博见异书深知其精迨至晋宋诸书盛行肄业者衆而人始翕然知其说近正且左氏等书汉初诸儒皆未见而毛说先与之合不谓之源流子夏可乎

论曰毛公所谓传自子夏者则今之大小序是也当西汉时三家得立惟毛独否及其後惟毛独着独行千数百年之间说诗者莫敢有异议至朱子始疑之自立传义然亦多采其说夫毛之序诗谓全无所本於子夏则不可谓全出於子夏之说而无所臆揣附会则非也要其传经

之功勤且伟矣

刘德

刘德者孝景帝子也前二年立为河间王修学好古实事求是从民得善书必为好写与之留其真加金帛赐以招之由是四方道术之人不远千里或有先祖旧书多奉以奏王者故得书多与汉朝等是时淮南王安亦好书所招致率多浮辩王所得书尽古文先秦旧书周官尚书礼记孟子老子之属皆经传说记七十子之徒所论其学举六艺立毛氏诗左氏春秋博士修礼乐被服儒术造次必於儒者山东诸儒者从而游武帝时来朝献雅乐对三雍宫及诏策所问三十余事其对推道术而言得事之中文约指明立二十六年薨中尉常丽以闻曰王身端行治温仁恭俭笃敬爱下明知深察惠於鰥寡大行令奏諡法聪明睿知曰献宜諡献王传五世至元国除建始元年复立元弟良为河间王良修献王之行母太后薨服丧三年如礼哀帝下诏褒扬益封万户薨諡曰惠传子尚至王莽时絶

论曰周衰礼坏乐崩及经秦火书籍亡失汉儒修补每限於端门惟献王藉屏藩之力多士景从故蒐辑独备艺文志所载儒家书目有河间周制十八篇意献王述礼之作又记献王与毛生等共采周官及诸子言乐事者以作乐记然则礼乐之事其存什一於千百犹传於今不废者献王之劳尤不可诬班固曰夫惟大雅卓尔不羣岂不谅夫

董仲舒

董仲舒广川人少治春秋孝景时为博士下帷讲诵弟子传以久次相授业或莫见其面盖三年不窥园其精如此进退容止非礼不行学士皆师尊之武帝即位举贤良文学之士前後百数而仲舒以贤良对策其策有曰天道之大者在陰阳阳为德陰为刑刑主杀而德主生是故阳常居大夏而以生育养长为事陰常居大冬而积於空虚不用之处以此见天之任德不任刑也天使阳出布施於上而主岁功使陰入伏於下而时出佐阳阳不得陰之助亦不能独成岁终阳以成岁为名此天意也王者承天意以从事故任德教而不任刑刑者不可任以治世犹陰之不可任以成岁也又曰夫不素养士而欲求贤譬犹不琢玉而求文采也养士之大者莫大乎太学今以一郡一国之衆对亡应书者是王道往往而絶也臣愿陛下兴太学置明师以养天下之士数考问以尽其材则英俊宜可得矣又曰天令之为命命非圣人不行质朴之谓性性非教化不成人欲之谓情情非度制不节是故王者上谨於承天意以顺命也下务明教化民以成性也正法度之宜别上下之序以防欲也修此三者而大本举矣又曰孔子曰天地之性人为贵明於天性知自贵於物知自贵於物然後知仁谊知仁谊然後重礼节重礼节然後安处善安处善然後乐循理乐循理然後谓之君子故曰不知命无以为君子又曰今师异道人异论百家殊方指意不同是以上无以持一统法制数变下不知所守臣愚以为诸不在六艺之科孔子之术者皆絶其道勿使竝进邪辟之说灭息然後统纪可一而法度可明民知所从矣对既毕天子以为江都相事易王易王帝兄素骄好勇仲舒以礼义匡正王敬重之问曰粤王句践与大夫泄庸种蠡谋伐吴遂灭之孔子称殷有三仁寡人亦以为粤有三仁仲舒曰昔者鲁君问柳下惠吾欲伐齐何如柳下惠曰不可归而有忧色曰吾闻伐国不问仁人

此言何为至於我哉徒见问耳犹且羞之况设诈以伐吴乎由此言之粵本无一仁夫仁人者正其谊不谋其利明其道不计其功是以仲尼之门五尺之童羞称五伯为其先诈力而後仁义也五伯比於他诸侯为贤其比三王犹武夫之於美玉也王曰善仲舒治国以春秋灾异之变推陰阳所以错行故求雨闭诸阳纵诸陰其止雨反是行之一国未尝不得所欲中废为大大夫先是辽东高庙长陵高园殿灾仲舒居家推说其意草藁未上主父偃候仲舒私见嫉之窃其书而奏焉上召视诸儒仲舒弟子吕步舒不知其师书以为大愚於是下仲舒吏当死诏赦之仲舒自是不敢复言灾异仲舒为人廉直是时方外攘四夷公孙弘治春秋不如仲舒而希世用事位至公卿仲舒以弘为从諛弘嫉之胶西王亦上兄也尤纵恣数害吏二千石弘乃言於上曰独董仲舒可使相胶西王胶西王闻仲舒大儒善待之仲舒恐久获罪病免凡相两国辄事骄王正身以率下数上疏諫争教令国中所居而治及去位归居终不问家产业以修学着书为事朝廷如有大事使使者及廷尉张汤就其家问之其对皆有明法自武帝初立魏其武安侯为相而隆儒矣及仲舒对策推明孔氏抑黜百家立学校之官州郡举茂材孝廉皆自仲舒发之年老以寿终於家子及孙皆以学至大官仲舒所着皆明经术之意及上疏条教凡百二十三篇而说春秋事得失闻举玉杯蕃露清明竹林之属复数十篇十余万言皆传於後世前汉书赞曰刘向称董仲舒有王佐之材虽伊吕亡以加管晏之属伯者之佐殆不及也至向子歆以为伊吕乃圣人之耦王者不得则不兴故顔渊死孔子曰噫天丧予惟此一人为能当之自宰我子贡子游子夏不与焉仲舒遭汉承秦灭学之後六经离析下帷发愤潜心大业令後学者有所统壹为羣儒首然考其师友渊源所渐犹未及乎游夏而曰管晏弗及伊吕不加过矣至向曾孙龚笃论君子也以歆之言为然

论曰孔子作春秋始於春亦終於春所以明千秋必还之运而开太平於无穷也当秦酷烈之余陰惨极矣於是惓惓以教化为言是阳春之德也夫欲兴教化必先崇学校欲崇学校必先一道术道术既一学校既崇而後贤者循理处善以成其君子不贤者亦节情防欲以别於羣生此实王道之正非管晏以下卑卑伯业之所得托也向惟粗知王伯之分故尊仲舒而黜管晏歆不知然遂乃过其父论夫仲舒之於伊吕虽若不逮然以视管晏固已分轨而殊涂岂复与较优劣哉向使武帝深加向用以董仲舒为丞相以汲黯为御史大夫汉治其几於三代乎

孔安国

孔安国孔子後也武帝时鲁共王好治宫室坏孔子宅欲以广其宫於壁中得古文尚书及礼论语孝经凡数十篇皆科斗文字王又升孔子堂闻琴瑟钟磬之音於是惧乃止不坏而悉以书还孔氏科斗书废已久时人无能知者安国乃以所闻伏生之书比校考论定其可知者为隸古更以竹简写之增多伏生二十五篇其析出者又五篇并伏生二十九篇都为五十九篇其余错乱磨灭弗可复知者悉上送官藏之书府安国又承诏为五十九篇作传既成遭巫蛊事不复以闻故未立於学官安国为諫大夫以授都尉朝司马迁亦尝从安国问其後又有百辆篇者出东莱张霸文意浅陋以中书校之非是霸自言受於父父有弟子尉氏樊竝平当等劝存其学及後樊竝谋反乃黜其书

论曰诸儒疑古文者非一至朱子亲注二典禹谟而囑其余篇於蔡沈後世犹有显肆诋如

吴澄之论者盖是经之为诸儒裂也久矣推其致疑之由则以今文诘屈而古文从顺也先儒云记录之实语难工润色之雅词易好文之参杂难易它经传皆有之何独疑於书乎至伏生口授之书偏得其难而安国比较之书反得其易则又有说凡书之难读者诵数必多诵数多者着心必牢安知伏生之偏得其难者之非困难而得乎当秦火後羣经散亡而尚书尤甚百篇之义既莫得闻仅有存者又复指为贗作则是杜塞余道絶灭微学也程子云伊训说命诸篇非圣人不能作可以为古文之定论

夏侯胜

夏侯胜字长公鲁东平人少孤好学从张始昌受尚书及洪范五行传後又事简卿为学精熟所问非一师也善说礼服徵为博士光禄大夫会昭帝崩昌邑王嗣数出胜当乘輿前諫曰天久陰而不雨臣下有谋上者陛下出欲何之王怒谓为妖言缚以属吏吏白大将军霍光光不举法是时光与车骑将军张安世谋废昌邑王光让安世以为泄语安世实不言乃召问胜胜对在洪范传曰皇之不极厥罰常陰时则下人有伐上者恶察察言故曰臣下有谋光安世大惊以此益重经术士後十余日光卒与安世共白太后废昌邑王尊立宣帝光以为羣臣奏事东宫太后省政宜知经术白令胜用尚书授太后迁长信少府赐爵关内侯以与谋废立定策安宗庙益千户宣帝初即位欲褒孝武帝诏羣臣大议廷中皆曰宜如诏书胜独曰武帝虽有广土斥境之功然多杀士衆竭民财力奢泰无度天下虚耗百姓流离物故者过半畜积至今未复亡德泽於民不宜为立庙乐公卿共难胜曰此诏书也胜曰诏书不可用也人臣之义宜直言正论非苟阿意顺指议已出口虽死不悔於是丞相等劾胜非议诏书毁先帝不道及丞相长史黄霸阿纵胜不举劾俱下狱有司遂请尊孝武庙为世宗奏盛德文始五行之舞胜霸既久系霸欲从胜受经胜辞以罪死霸曰朝闻道夕死可矣胜贤其言遂授之繫再经冬讲论不怠至四年夏关东四十九郡同日地动或山崩上乃素服避正殿遣使者吊问吏民因大赦胜出为諫大夫给事中霸为扬州刺史胜为人质朴守正简易亡威仪见时谓上为君误相字於前上亦以是亲信之尝见出道上语上闻而让胜胜曰陛下所言善臣故扬之尧言布於天下至今见诵臣以为可传故传耳朝廷每有大议上知胜素直谓曰先生通正言无愆前事胜复为长信少府迁太子太傅受诰撰尚书论语说赐黄金百斤年九十卒官赐冢莹葬平陵太后赐钱二百万为胜素服五日以报师傅之恩儒者以为荣始胜每讲授常谓诸生曰士病不明经术经术苟明取青紫如俛拾地芥耳学经不明不如归耕

论曰书曰大哉王言谟训誓诰皆言也而载诸简策垂於万世以为治法何恶於传之者哉夫雷者天之号令也言者王之号令也雷声震於百里王言播於四方胜之置对其义确而笃矣唐魏徵佐太宗尝以事宣付史馆太宗让之徵所对大旨亦畧同云

刘向

刘向字子政本名更生楚元王交之四世孙也年十二以父德任为辇郎既冠行修饬擢諫大夫是时宣帝招选名儒俊材置左右更生以通达能属文词与王褒张子侨等竝进对献赋颂凡数十篇初淮南有枕中鸿宝苑祕书言神仙使鬼物为金之术世人莫见更生父德治淮南

狱时得其书更生幼而读诵以为奇至是上复兴神仙方术之事更生献之言黄金可成上令典尚方铸作费多不验乃下更生吏系当死其兄阳城侯安民上书入国户半赎更生罪上亦奇其材得躡冬减死论会初立谷梁春秋徵更生受谷梁讲论五经於石渠复拜郎中给事黄门迁散骑谏大夫给事中元帝即位太傅萧望之少傅周堪皆受遗领尚书事甚见尊重更生年少於望之堪然二人重之荐更生宗室忠直明经有行擢散骑宗正给事中与侍中金敞拾遗左右四人同心谋议劝道上以古制多所欲匡正患苦外戚许史在位放纵而宦官弘恭石显弄权议罢退之未白而语泄遂为许史及恭显所譖愬堪更生下狱及望之皆免官其春地震夏客星见昴卷舌间上感悟赐望之爵关内侯奉朝请秋徵堪向欲以为谏大夫恭显沮之皆为中郎冬地震时恭显许史子弟皆侧目於望之等更生惧焉乃使其外亲上变事请退恭显进望之等书奏恭显疑更生所为请考词服遂逮更生繫狱免为庶人而望之亦坐使子上书白冤前事恭显白令诣狱置对望之自杀天子甚悼恨之乃擢堪为光禄勳堪弟子张猛为光禄大夫给事中大见信任恭显惮之更生见堪猛在位几已得复进惧其倾危又见灾异竝起天地失常念以骨肉备九卿虽在畺亩犹不忘君乃上封事推春秋灾异以救今事一条其所以有曰执狐疑之心者来谗贼之口持不断之意者开羣枉之门谗邪进则衆贤退羣枉盛则正士消故易有否泰小人道长君子道消则政日乱故为否否者闭而乱也君子道长小人道消则政日治故为泰泰者通而治也恭显见其书愈与许史比而怨更生等堪性公方自见孤立遂直道而不曲是岁夏寒日青无光恭显及许史皆言堪猛用事之咎上内重堪患衆口之寢润无所取信时长安令杨兴常称誉堪乃见问兴兴者倾巧士谓上疑堪因毁之上於是疑会城门校尉诸葛丰亦言堪猛短上发怒免丰亦左迁堪为河东太守猛为槐里令显等专权日甚後三岁孝宣庙阙灾其晦日有食之於是上召前言日变在堪猛者责问皆稽首谢乃下诏徵堪为光禄大夫猛为太中大夫给事中是时显干尚书尚书五人皆其党也堪希得见常因显白事事决显口会堪疾瘖不能言而卒显遂诬譖猛令自杀於公车更生伤之乃着嫉谗撻要救危及世颂凡八篇依兴古事悼己及同类也遂废十余年成帝即位显等伏辜更生乃复进用更名向向以故九卿召拜中郎使领护三辅都水数奏封事迁光禄大夫是时帝元舅阳平侯王凤为大将军倚太后专国权兄弟七人皆封列侯适数有大异而上方精於诗书观古文诏向领校中五经秘书向乃集合上古以来历春秋六国至秦汉符瑞灾异之记推迹行事连传祸福着其占验比类相从各有条目凡十一篇号曰洪范五行传论奏之天子心知向忠精故为凤兄弟起此论也然终不能夺王氏权久之营起昌陵数年不成复还归延陵制度泰奢向上疏谏词旨极切上虽感其言而不能从向睹俗弥奢淫而赵卫之属起微贱躡礼制向以为王教由内及外自近者始故采诗书所载贤妃贞妇兴国显家可法则及孽嬖乱亡者序次为列女传凡八篇以戒天子及采传记行事着新序说苑凡五十篇奏之屡言得失陈法戒书数十上以助观览补遗阙上虽不能尽用然内嘉其言常嗟叹之时上无继嗣政由王氏出灾异浸甚向雅奇陈汤智谋与相亲友独谓汤曰灾异如此而外家日甚其渐必危刘氏吾幸得同姓末属累世蒙汉厚恩身为宗室遗老历事三主上以我先帝旧臣每进见常加优礼吾而不言孰当言者遂上封事极谏至曰事势不两大王氏与刘氏亦且不竝立如下有泰山之安则上有累卵之危陛下为人子孙守持宗庙而令国祚移於外亲降为皂隶纵不为身奈宗庙何妇人内夫家外父母家此亦非皇太后之福也书奏天子召见向叹息悲伤其意谓曰君且休矣吾将思之以向为中垒校尉向为人简易无威仪廉靖乐道不交接世俗专积思於经术昼诵书传夜观星宿或不寐达旦元延中星孛东井蜀郡岷山崩雍江向恶此

异怀不能已复上奏有曰方今同姓疏远母党专政禄去公室权在外家非所以强汉宗卑私门保守社稷安固後嗣也向自见得信於上故常显讼宗室讥刺王氏及在位大臣其言多痛切发於至诚上数欲用为九卿辄为王氏居位者及丞相御史所持故终不迁居列大夫官前後三十余年年七十二卒卒後十三岁而王氏遂代汉

论曰孝宣以甘露三年始立谷梁博士是岁向年三十其铸作黄金事前於此则向固未及壮也且其失在於过信父书考向之诚谅忠謇庶几社稷之臣其学之醇西汉儒者未之或先也顾以年少一眚为世疵议夫仲舒繁露颇杂襍祥横渠蚤岁亦喜谈兵至若逃禅以归儒变?而求真者往往有之苟其能以晚盖则始术曾不足以相累何独於向而必过为核论哉

戴圣

戴圣字次君梁人与戴德同受礼於后苍德号大戴圣号小戴汉兴以来迄於刘向所校定礼传凡二百五十篇至德删其繁重为八十五篇圣又删为四十六篇世传大戴礼篇第自三十九而下止於八十一前阙三十八篇末阙四篇中又阙第七十二意其阙者即圣所删耶德仕至信都王太傅圣尝以博士论石渠仕至九江太守行治多不法前刺史以其大儒优容之及何武为刺史行部録囚徒有所举以属郡圣曰後进生何知乃欲乱人治皆无所决武使从事廉得其罪圣惧自免论曰大学中庸先圣设教传道之书也而皆出於圣则圣之为功岂独传礼一家学已哉史谓其行治多不法意圣迂阔慕古不尽循用汉法故武所举囚徒圣无所决而姗侮之曰後进生何知乃欲乱人治言己所以治者非武所知也是即行治不法之一事也夫儒家者流於法律刑名多糝糠弃之郑樵因此遂讥圣为礼家之宗而身为赃吏樵安从知武所廉得者之为赃罪耶圣行事少所表见独见於何武传者如此因嘉其传经之功而疑於其罪迹故録之若马融为梁冀草诏而杀李固则情罪彰灼君子不能为之辩矣

史传三编卷一

卷二

钦定四库全书

史传三编卷二

大学士朱轼撰

名儒传二

汉

杜子春

杜子春河南缑氏人通周官先是秦始皇深恶周官之书禁絶不传汉武帝时有李氏得之上於河间献王独阙冬官一篇献王购以千金不得遂取考工记补成一篇奏之至成帝时黄门郎刘歆表而出之周礼始得列序着於录畧子春受业於歆能通其读家於南山因以教授乡里永明初年已九十犹能诵识郑兴郑衆马融贾徽贾逵皆受业焉衆逵为发明其说着周礼解後融作周官传以授郑康成康成作周官注皆祖子春云子春又明易夏曰连山殷曰归藏子春曰连山伏羲归藏黄帝当必有所指云

论曰周官一书规模宏阔节目明备使後世得考见三代辨方正位体国经野设官分职之大端拘儒小生犹或疑之不犹疑尚书之古文乎是书始得自河间献王表自刘歆而子春能习其句读通其义类以授羣弟子共为注解而其传益着迄今三礼并垂非子春之功哉

孔僖

孔僖字仲和鲁国鲁人自安国以下世传古文尚书毛诗曾祖子建游长安与崔篆善及篆仕王莽亦劝子建子建曰吾有布衣之心子有衮冕之志各从所好请从此辞遂归终於家僖与篆孙駟复相友同游太学春秋因读吴王夫差事僖叹曰所谓画虎不成反为狗者駟曰然昔孝武始为天子崇信圣道师则先王五六年间号胜文景及後恣已忘其前之为善僖曰书传如此多矣邻房生梁郁儻和之曰若然者武帝亦是狗耶遂阴上书告駟僖诽谤先帝事下有司駟诣吏僖恐诛乃自讼曰凡言诽谤者谓无此事而虚加之也孝武政之美恶显在汉史是谓直说书传实事非虚谤也夫帝者为善则天下之善归焉其不善天下之恶亦萃焉斯皆有以致之不可以诛於人也陛下不深自为计徒肆私忿以快其意臣等受戮死即死耳顾天下必以此闕陛下心自今以後苟见不可之事终莫复言者矣齐桓公亲扬先君之恶以唱管仲陛下乃欲为十世之武帝远讳实事岂不与桓公异哉帝始本无罪僖等意及书奏立诏勿问拜僖兰台令史元和二年春帝东巡狩还过鲁幸阙里以太牢祠孔子及七十二弟子作六

代之乐命儒者讲论帝问僖曰今日之会宁於卿宗有光荣乎对曰臣闻明王圣主莫不尊师贵道陛下亲屈万乘辱临敝里此乃崇礼先师增辉圣德至於光荣非所敢承帝大笑曰非圣者子孙焉有斯言遂拜郎中从还京师校书东观冬拜临晋令崔駰以家林箠之不吉止僖曰子盍辞乎僖曰学不为人仕不择官吉凶由己而由卜乎在县三年果卒遗令即葬二子长彦季彦才十余岁或劝令反鲁对曰令载丧归则违父命舍墓而去心所不忍遂留华阴

论曰汉兴高祖以太牢祠孔子自是经术寢以萌蘖至孝武表章六经当时中外相应以理义之文然犹未及光武明章之盛也夫孔子者百王之师也帝自师其师而以为私家荣可乎僖之持论侃侃不憚批鳞盖自其谈史大学时已不复有嗫嚅之态矣若子建之不仕伪朝长彦季彦之不违父命奕世忠孝大节炳然何圣裔之多贤也

贾逵

贾逵字景伯扶风平陵人谊九世孙也父徽从刘歆受左氏兼习国语周官又受古文尚书於涂恽学毛诗於谢曼卿逵既悉传其父业复能兼通大夏侯尚书及五家谷梁之说自儿童时常在太学不通人间事性恺悌多智思倜傥有大节身長八尺二寸诸儒为之语曰问事不休贾长头永平中为左氏国语解诂凡五十一篇上之帝重其书写藏秘馆拜为郎与班固并校秘书应对左右肃宗立降意儒术特好古文尚书左氏传诏逵入讲北宫白虎观南宫云台帝善逵说使出左氏传大义长於二传者逵摘尤着明者三十事具条奏之帝深嘉悦令逵自选公羊严颜诸生高才者二十人教以左氏逵母常有疾帝以钱二十万使颍阳侯马防赐之谓防曰逵无人事於外屢空则从孤竹之子於首阳矣逵数为帝言古文尚书与经传尔雅训诂相应诏撰欧阳大小夏侯与古文同异逵集为三卷帝善之复令撰齐鲁韩诗与毛诗同异并作周官解故迁为卫士令建初八年乃诏诸儒各选高才生受左氏谷梁春秋古文尚书毛诗由是四经遂行於世尽拜逵所选弟子及门生为千乘王国郎朝夕受业黄门署学者欣欣羡慕焉永元三年以为左中郎将八年拜侍中领骑都尉内备帷幄兼领秘书甚见信用所着经传义诂及论难百余万言号为通儒年七十二三年卒初郑兴明左氏自杜林桓谭卫宏之属莫不斟酌焉及逵传父业自是左氏有郑贾之学

论曰周官乃经世大典程子所谓天理烂熟之书也当西汉时惟刘歆颇知诵讲而歆反毗王莽助成乱亡之政故後儒业是者益稀逵於诸经鲜不涉其流四经之学实赖以传然窃独怪其数言古文尚书於帝而不及周官也夫诸经出自圣笔者易之外惟周官春秋而已千载而下叙五经者舍三传而列春秋独言礼则弃周官而任戴记岂非汉氏学宫所立舛谬相沿而致然与

郑衆

郑衆字仲师河南开封人年十二从父兴受左氏春秋作春秋难记条例兼通易诗建武中皇太子及山阳王荆因梁松以缣帛聘衆曰太子无外交之义汉旧防藩王不宜私通宾客松风以意不可逆衆曰犯禁触罪不如守正而死太子及荆闻而奇之亦不强也及梁氏败宾客多

坐之惟衆不染於词永平初辟司空府以明经给事中再迁越骑司马复留给事中八年北匈奴遣使求和亲遣衆报之衆至单于欲令拜衆不为屈单于怒围守闭之欲以胁服衆衆拔刀自誓单于恐而止乃更发使随衆还京师朝议将复遣使衆諫曰北单于所以要致汉使者欲以离南单于之衆坚三十六国之心又令西域归化者局促狐疑絶望中国耳南单于居汉久具知形势万分离析旋为边害今有度辽之衆扬威北垂虽勿报答不敢为患帝不从复遣衆衆言臣前奉使不为匈奴拜单于恚恨遣兵围臣今复衔命必见陵折臣诚不忍持节拜如令匈奴遂能服臣将有损大汉之强帝不听衆不得已遂行於道犹连上书固争之诏切责衆追系廷尉会赦归家後帝见匈奴来者闻衆与单于争礼意气壮勇虽苏武不过乃复召为军司马与马廖击车师至敦煌拜中郎将使护西域会匈奴胁车师围戊巳校尉衆发兵救之迁武威太守谨修边备匈奴不敢犯召为左冯翊建初六年拜大司农是时肃宗议复盐铁官衆諫以为不可数被责劾执议不移帝竟不从其後受诏作春秋删十九篇八年卒官

论曰仗节死义之臣必於犯顔敢諫中求之诚哉是言也衆之谔谔在廷用能奋节北陲不为国耻唐殷侑使回鹘韩愈序之曰士不通经果不足用若衆者其诚得於经者多耶衆父兴与光武论郊祀事光武将断以讖兴曰臣不为讖光武怒兴遂惶恐逊词以免衆之抗直過於兴矣

卢植

卢植字子干涿郡涿人身长八尺二寸音声如钟少事马融能通古今学好研精而不守章句融外戚豪家多列女娼歌舞於前植侍讲积年未尝转眄融以是敬之既归闔门教授性刚毅有大节常怀济世志及窦武援立灵帝乘机政朝议欲加封爵植虽布衣以武素有名誉乃献书规武劝辞大赏以全身名且请依古礼置诸子官徵宗室贤才训道爵用以强干弱枝武不能用州郡数命皆不就建宁中徵为博士乃起熹平四年九江蛮反四府选植才兼文武拜九江太守蛮寇宾服以疾去官作尚书章句三礼解诂时始立太学石经以正五经文字植上书请立毛诗周礼左氏博士会南夷叛以植尝在九江有恩信拜庐江太守植深达政宜务存清静弘大体岁余徵拜议郎与马日磾蔡邕杨彪韩说等并在东观校中书五经记传补续汉记帝以非急务转为侍中迁尚书光和元年日有食之植陈八事一曰用良二曰原禁三曰御疔四曰备寇五曰修礼六曰遵尧七曰御下八曰散利用良者谓宜使州郡核举贤良随方委用原禁者诸党锢多非其罪可加赦恕御疔者宋后为王甫所构忧死家属被诛宜听收葬备寇者王侯之家赋税减削愁穷思乱宜使给足以防未然修礼者应徵有道之人陈明洪范禳服灾咎遵尧者郡守刺史一月数迁宜依黜陟以章能否纵不九载可满三岁御下者请谒希爵一宜禁塞迁举之事责成主者散利者天子之体理无私积宜弘大务蠲畧细微帝不省中平元年黄巾贼起四府举植拜北郎中持节征之连战破贼帅张角角走保广宗植筑围凿塹造云梯将攻之垂拔帝遣小黄门左丰诣军观贼形势或劝植赂丰植不可丰还谗之帝怒遂槛车徵植减死罪一等及皇甫嵩平黄巾盛称植方畧嵩皆资之以济成功乃复尚书帝崩何进谋诛中官召董卓以惧太后植知卓凶悍难制固止之进不从及进为张让段珪等所害袁绍将兵入宫让等劫太后天子及陈留王从复道走北宫植执戈於阁道窻下仰数珪珪等惧乃释太后太后投阁得免绍又进兵排宫攻省内让珪等遂将帝与陈留王步出谷门奔小平

津公卿无得从者惟植夜驰河上王允遣闵贡随植後追之贡至手劒斩数人余皆投河死明日公卿百官乃奉迎天子还宫董卓既至果陵虐朝廷大会百官议废立羣僚无敢言植独抗议曰昔太甲既立不明昌邑罪过千余故有废立之事今上富於春秋行无失德非前事之比卓怒罢会将诛植议郎彭伯諫曰卢尚书海内大儒今先害之天下震怖卓乃止但免植官植以老病求归惧不免诡道从轘辕出卓果使人追之不及遂隐于上谷不交人事初平三年卒临困?其子俭葬土穴不用椁附体单帛而已

後汉书论曰风霜以别草木之性危乱而见贞良之节夫蠱蜚起怀雷霆骇耳虽贲育荆诸之伦未有不允豫夺常者也当植抽白刃严阁之下追帝河津之间排戈刃赴戕折岂先计哉君子之於忠义造次必於是颠沛必於是也论曰进之召卓曹操亦笑其失谋卓之废主袁绍亦折其逆志事计虽同而乃心实异惟植忠於帝室而智足察奸勇足厉气其常怀济世岂虚哉夫直养者刚之本也当植之在讲筵目不转眄所养固已刚矣让珪逃死何敢滥加横戮蔚宗论植大节乃舍抗卓而述其追帝不已未乎

郑康成

郑康成北海高密人少为乡嗇夫常诣学宫不乐为吏父虽怒之不能禁後游太学事京兆第五元先始通京氏易公羊春秋三统历又善九章算术复从东郡张恭祖受周官礼记左氏春秋韩诗古文尚书以山东无足问者乃西入关事扶风马融融素骄贵门徒四百余人升堂者仅五十余生康成在门下从高业弟子传受日夜寻诵三年不得见融及融考论图纬闻康成善算召见康成因从质疑义问毕辞归融喟然曰郑生去吾道东矣康成自游学十余年乃归家贫客耕东莱学徒已数百十人及党事起被禁锢遂隐修经业杜门不出时何休好公羊学着公羊墨守左氏膏肓谷梁废疾康成乃发墨守鍼膏肓起废疾休见而叹曰康成入吾室操吾矛以伐我乎初中兴後范升陈元李育贾逵之徒争论古今学及康成答休义据通深由是古学遂明灵帝末党禁解何进辟之州郡迫胁不得已诣进进为设几杖礼待甚优康成不受朝服以幅巾见一宿逃去时年六十弟子益进自远方至者以千数後袁隗表为侍中以父丧不行国相孔融深敬之屣履造门勅县曰昔齐置士乡越有君子军皆异贤意也郑君乡宜曰郑公乡可广开门衢令容高车号通德门董卓迁都公卿举康成为赵相道断不至会黄巾寇青部避地徐州州牧陶谦接以师友之礼建安元年始还高密道遇黄巾数万人黄巾知为康成皆拜约不敢入县境康成尝疾笃自虑以书戒子曰吾念述先圣之元意整百家之不齐庶几以竭吾才入此岁来已七十矣案之典礼便合传家今我告尔以老归尔以事将闲居以安性覃思以终业尔其勗求君子之道研鑽勿替敬慎威仪以近有德显誉成於僚友德行立於己志可不深念耶可不深念耶时袁绍总兵冀州尝大会宾客康成最後至绍乃延之上坐康成身長八尺饮酒一斛秀眉明目容貌温伟绍客多豪俊见康成儒者竞设异端百家互起康成依方辩对咸出问表皆得所未闻莫不嗟服汝南应劭前自赞曰故泰山太守应仲远北面称弟子何如康成笑曰仲尼之门考以四科回赐之徒不称官阀劭有慙色绍乃举康成茂才表为左中郎将不就公车徵为大司农给安车一乘以病乞还五年春寝疾时绍与曹操相距於官渡令子谭迫康成从军不得已行至元城疾笃不进其年六月卒年七十四遗令薄葬自郡守以下尝受业者纔經赴会千余人所注周易尚书毛诗周礼仪礼礼记论语孝经及诸杂

着凡百余万言其答诸弟子问五经义者门人又相与依论语撰为郑志八篇

後汉书论曰自秦焚六经圣文埃灭汉兴诸儒颇修艺文及东京学者亦各名家而守文之徒滞固所稟异端纷纭互相诡激遂令经有数家家有数说章句多者或乃百余万言学徒劳而少功後生疑而莫正康成括囊大典网罗衆家删裁繁芜刊改漏失自是学者畧知所归王父豫章君每考先儒经训而长於康成常以为仲尼之门不能过也及传授生徒专以郑氏家法云论曰礼始於太乙非圣者莫能得其精自夫子不敢轻言夏殷之礼况其下者乎至於经曲繁多条贯详密则又不独神明其精者之难即欲比而栴之疏而理之使数度井然亦复匪易康成三礼之学所微疵者习熟濡染不能不间杂於讖纬耳要其旁稽曲证使三代质文於今犹与有存者则非夫人之烈不及此舍翼卫之勤而索瘢?以为指摘岂笃论哉

何休

何休字邵公任城樊人少府豹之子也为人质朴讷口而雅有心思精研六经尤善公羊春秋世儒无及者以列卿子拜郎中非其好也辞病去不仕州郡进退必以礼太傅陈蕃辟之与参政事蕃被害坐废锢初公羊之学自齐胡毋子都作条例以授东平嬴公嬴公授东海孟卿孟卿授鲁人眭孟眭孟授东海严彭祖鲁人顔安乐公羊遂有严顔二家博士至休乃畧依胡母生条例隐括使就绳墨作公羊解诂覃思不闕门者十有七年又以春秋駁汉事六百余条妙得公羊本意先是扶风李育亦治公羊作难左氏义四十一事及论五经白虎观育以公羊意难贾逵往返皆有理证最为通儒休既善公羊兼通历算乃与师博士羊弼追述育意以难二传作公羊墨守左氏膏肓谷梁废疾又注孝经论语风角七分经纬典谟不与守文同说党禁解辟司徒羣公表休道术深明宜侍帷幄幸臣嫉之乃拜议郎屡陈忠言再迁谏议大夫年五十四光和五年卒

论曰公羊之学韩愈谓何氏注外不见他书要渺之义无自而寻则休之解诂未为尽得公羊本旨也况三传互有短长休直诋为膏肓为废疾意所谓党同门妬道真者休盖未能免此坎虽然残经之不亡实诸专家是赖自休以来几二千年其书列於学宫不可废也

赵岐

赵岐字邠卿京兆长陵人初名嘉字台卿後因避难不忘本土故自改其名字岐少明经有才艺娶马融兄女鄙融不持士节耻与相见仕州郡以廉直疾恶见憚年三十余有重疾卧蓐七年自虑奄忽乃?兄子曰丈夫生世遯无箕山之操仕无伊吕之勲天不我与复何言哉可立石墓前刻曰汉有逸人姓赵名嘉有志无时命也奈何後疾瘳辟司空掾议二千石得去官为亲行服朝廷从之寻为梁冀所辟陈损益求贤之策冀不纳举理剧为皮氏长中常侍左悺兄胜为河东太守岐耻疾宦官即日西归京兆尹延笃复以为功曹先是中常侍唐衡兄玠为京兆虎牙都尉郡人轻之岐尤数为贬议玠深毒恨延熹元年玠为京兆尹岐惧避之玠果收岐家属陷以重法尽杀之岐遂逃难四方匿姓名卖饼北海市中道遇安丘孙嵩嵩察岐非常人呼与共载岐失色嵩乃下帷屏行人密问岐曰视子非卖饼者又相问而色动不有重怨即亡命

乎我北海孙宾石势能相济岐素闻嵩名以实告嵩与俱归入白母曰出行乃得死友迎入上堂飧之极欢藏岐复壁中後诸唐死灭因赦乃出三府闻之同时并辟九年应司徒胡广之命会南匈奴乌桓鲜卑反公卿举岐擢并州刺史坐党事免灵帝初复遭党锢中平元年四方兵起诏选故刺史二千石有文武才用者徵岐拜议郎张温西征请补长史别屯安定何进举为敦煌太守行至襄武为贼边章所执诡词得免展转还长安献帝西迁复拜议郎稍迁太仆及李傕专政关东扰乱袁绍与公孙瓒争冀州乃以岐副太傅马日磾抚慰天下日磾行至洛阳表别遣岐宣扬国命所到百姓皆喜曰今日乃复见使者车骑是时袁绍曹操皆自将兵数百里迎岐岐深陈天子恩德又移书公孙瓒为言利害绍等各罢兵与岐期会洛阳奉迎车驾岐南到陈留得笃疾经涉二年绍等遂不至兴平元年徵岐时帝当还洛阳董承奉诏先修宫室岐谓承曰海内分崩惟荆州境广地胜年谷岁登岐虽迫大命犹志报国家欲南说刘表使身将兵来卫与将军并心同力以獎王室承即表遣岐岐至表果遣兵助修洛阳宫室军资委输前後不絕岐以老病留荆州而孙嵩亦寓於表岐乃称嵩素行笃烈与表共上为青州刺史俄而桓典孔融皆荐岐就拜太常年九十余建安六年卒初孝文广游学之路论语孝经孟子尔雅皆置博士後罢传记博士独立五经孟子博士遂废岐以为周衰异端竝起孟子悼尧舜汤文周孔之业将遂湮灭着书七篇包罗天地揆叙万类命世亚圣之大才也乃述所闻证以经传为章句十四卷

论曰当秦火时以孟子下牖诸子故得不毁汉兴司马迁始称其述唐虞三代之德以竝孔子然犹与荀卿合传惟岐值时衰乱经籍道息独能抽博士所不讲者潜心毕业且断而置之以为命世亚圣何其明也

晋

范宣

范宣字宣子陈留人也年十岁能诵诗书尝以刀伤手捧手改容人问痛耶答曰不足为痛但受全之体而致毁伤不可处尔家人以其年幼而异焉少尚隐遁加以好学手不释卷以夜继日遂博综衆书尤善三礼家至贫俭躬耕供养亲没负土成坟庐於墓侧太尉郗鉴命为主簿诏徵太学博士散骑郎并不就家於豫章太守殷羡见宣茅茨不完欲为改宅宣固辞之庾爰之以宣素贫加年荒疾疫厚饷给之宣又不受爰之问宣曰君博学通综何以大儒宣曰汉兴贵经术至於石渠之论实以儒为弊正始以来世尚老庄逮晋之初竞以裸裎为高仆诚大儒然立不与易宣言谈未尝及老庄客有问人生与忧俱生不知此语何出宣云出庄子至乐篇客曰君言不读老庄何由识此宣笑曰小时尝一览时人莫之测也宣洁行廉约韩康伯遗绢百疋不受减五十疋复不受如是减半遂至一疋既终不受康伯後与宣同载就车中裂二丈与宣云人宁可使妇无耶宣笑而受之宣虽闲居屡空尝以读诵为业譙国戴逵等皆闻风宗仰自远而至讽诵之声有若齐鲁太元中顺阳范甯为豫章太守甯亦通儒在郡立学校教授恒数百人由是江州人士并好经学化二范之风也年五十四岁卒着礼易论难皆行於世

论曰自魏晋以清虚相尚放蕩为高弃礼法如弁髦国势人心举坏於此当其时在朝者乃有

卞壺壺之言曰諸君子皆以風流相尚執鄙吝者非壺而誰卒能仗節死義為時名臣宣仕不顯潔行窮經獨為於舉世不為之日卒使江州人士化於二范之風其可謂儒之拔出者矣

范甯

范甯字武子自父汪渡江僑於新野汪博學善談名理甯亦自少多所通覽簡文帝為相將辟之為桓溫所諷而止初溫欲以汪為長史及江州刺史汪皆不就溫意恨故終溫之世甯兄弟無在列位者時方以浮虛相扇儒雅日替甯謂其源出於王弼何晏二人之罪深於桀紂乃著論以排之畧曰王何?棄典文不遵禮度游詞浮說波蕩後生洙泗之風緬焉將墜遂令禮壞樂崩中原傾覆昔夫子斬少正太公戮華士豈非曠世而同誅乎桀紂暴虐正足以滅身覆國為後鑒戒豈能回百姓之視聽哉吾固以為一世之禍輕歷代之罪重自喪之衅小迷眾之愆大也甯崇儒抑俗率皆如此溫死之後始解褐為余杭令興學校養生徒潔已修禮志行之士莫不宗之期年風化大行自中興來崇學敦教未有如甯者也遷臨淮太守封陽遂鄉侯徵拜中書侍郎時更營新廟博求辟雍明堂之制甯據經傳奏上皆有典證孝武帝雅好文學甚被親愛朝廷疑義輒咨訪之甯指斥朝士直言無諱王國寶甯甥也諂事會稽王道子懼甯不見容疎隔之甯求出為豫章太守前豫章守多不利帝曰甯何以身試死耶甯不為意固請行臨發猶疏言調役勞擾之弊尋詔公卿牧守普議得失甯復陳時政數事帝善之甯在郡大設庠序采磬石於交州以佐學用改革舊制不拘常憲遠近至者千余人并拔郡四姓子弟皆充學生課讀五經資給眾費一出私錄又起學台功用弥廣以專輒任心為王凝之所劾抵罪子泰棄官稱訴會赦免始家於丹陽猶勤經學終年不輟年六十三卒初甯以釋谷梁者近十家皆肤淺不經師匠遂沈思積年著為集解其言曰左氏以鬻拳兵諫為愛君是人主可得而脅也以文公納幣為用禮是居喪可得而婚也谷梁以衛輒拒父為尊祖是為子可得而叛也以不納子糾為內惡是仇讐可得而容也公羊以祭仲廢君為行權是神器可得而闕也以妾母稱夫人为合正是嫡庶可得而齊也又曰左氏艷而富其失也誣谷梁清而婉其失也短公羊辯而裁其失也俗若能富而不誣清而不短裁而不俗則深於其道者也故甯所著義最精審為世所重

論曰六朝曠達之弊其源出於庄老甯尋究標枝歸罪王何當已而未敢誦言以攻庄老則犹眯乎其源者也三傳得失自向歆父子已為異同之論至白虎分爭益加破裂甯獨依經詁傳據理詮經可謂通方君子矣

韓伯

韓伯字康伯潁川長社人為人清和有思理殷浩稱之曰康伯能自標置居然出羣之器同郡庾敳名重一時少所推服獨稱伯及王坦之曰思理倫和我敬韓康伯志力强正吾媿王文度舉秀才徵佐著作郎并不就簡文帝居藩引為談客自司徒佐西屬轉抚軍掾中書郎散騎常侍豫章太守入為侍中陳郡周勰為謝安主簿崇尚庄老脫落名教居喪廢禮伯斥非之時人憚焉嘗作辯謙論有曰孤寡不谷眾人之所惡而侯王以自稱降其貴者也執御執射眾人之所賤而君子以自目降其賢者也夫處貴非矜而矜己者常有其貴言善非伐而伐善者驟稱

其能故愆忿窒欲着於损象卑以自牧实系谦爻皆所以存其所不足拂其所有余也後转丹阳尹吏部尚书领军将军既疾病改授太常未拜卒年四十九初王弼注易於系辞说卦序卦三传犹未毕业伯实续为之注云

论曰程邵未兴治易者皆宗王韩之注王淫於庄老所注不足以翊卫名教固其所也伯当放浪波靡之时斥俗崇礼而亦未能发挥四圣之微指读其所着辩谦论诚有味乎其言之在易小过象传曰行过乎恭丧过乎哀盖崇本以维其衰则过而非过伯殆有得於斯义者耶

梁

皇侃

皇侃吴郡人青州刺史皇象九世孙也少好学师事贺瑒精力专门尽通其业尤明三礼孝经论语为国子助教在学讲说听者常数百人撰礼记讲疏五十卷书成奏上诏付秘阁顷之命入壽光殿说礼记义梁武帝善之加员外散骑侍郎侃性至孝常日限诵孝经二十遍丁母忧还乡里平西邵陵王钦其学厚礼迎之及至因感心疾卒所撰论语义礼记义见重於世学者传焉论曰南北朝之际俗尚波靡异教纷挐经学微而士习不可问矣侃独精力专门以明经为业听者尝数百人时亦有重之者此以见士贵有志而修德者不孤信夫故特存之以备一綫焉

史传三编卷二

卷三

<史部,传记类,总录之属,史传三编

钦定四库全书

史传三编卷三

大学士朱轼撰

名儒传三

隋

王通

王通字仲淹先为祁人九世祖?当怀愍时东迁三传至元则究道德考经籍卒为鸿儒江左号王先生先生孙虬值萧氏禅耻食齐粟北事魏仕至并州刺史家河汾是为通高祖及通父隆传业教授门徒千余人开皇初以国子博士待诏云龙门文帝从容问曰朕何如主隆曰陛下聪明神武得之於天发号施令不尽稽古虽负尧舜之资终以不学为累帝默然久曰先生朕之陆贾也隆乃着兴衰要论七篇奏之帝称善四年通始生隆筮之遇坤之师大父安康献公占之曰是子必能通天下之志遂名曰通通六岁而江东平隆叹曰王道无叙天下何为而一乎通侍侧有忧色曰通闻古之为邦有长久之策故夏殷以下四海常一统也後之为邦行苟且之政故魏晋以下九州无定主也夫子之叹盖忧皇纲不振生人劳於聚斂而天下将乱乎隆异之遂告以元经之事通再拜受之十八年隆宴居歌伐木而召通谓曰自天子至庶人未有不资友以成者在三之义师居一焉小子勉旃翔而後集通於是四方之志盖受书於东海李育学诗於会稽夏璜问礼於河东关朗正乐於北平霍汲考易於族父仲华不解衣者六岁其精志如此仁壽三年通既冠慨然有济苍生之心西游长安帝召见太极殿奏太平十有二策遵王道推霸略稽古验今恢恢乎运天下於指掌帝大悦曰得生几晚下其议於公卿公卿不悦杨素苏夔李德林见通与之言终日归而有忧色门人问通曰素言政而不及化是天下无礼也夔言声而不及雅是天下无乐也德林言文而不及理是天下无文也王道从何而兴乎时将萧墙之衅通知谋之不用作东征之歌而归帝闻再徵之不至大业二年徵又不至乃曰吾视千载已上未有若周公焉其道则一而经制大备後之为政者有所持循吾视千载而下未有若仲尼焉其道则一而述作大明後之修文者有所折衷矣遂续诗书正礼乐修元经赞易道九年而六经大就门人自远而至其教兴於河汾雍雍如也通闲居俨然其动也徐若有所虑其行也方若有所畏其接长者恭恭然如不足接幼者温温然如有就其使人虽童仆必敛容乡人有丧通必先往反必後有水土之役则具畚鍤以往曰吾非从大夫也其言应而不唱唱必有大端或问人善曰子知其善则称之不善则曰未尝与久也其族婚嫁必具

六礼曰斯道也今亡矣三纲之首不可废吾从古尝曰冠礼废天下无成人矣昏礼废天下无家道矣丧礼费天下遗其亲矣祭礼废天下忘其祖矣门人有问姚义孔庭之法曰诗曰礼不及四经何也义曰尝闻诸夫子矣春秋断物志定而後及也乐以和德全而後及也书以制法从事而後及也易以穷理知命而後及也故不学春秋无以主断不学乐无以知和不学书无以议制不学易无以通理四者非具体不能及故圣人後之然则诗礼何为而先也曰教之以诗则出辞气斯远暴慢矣约之以礼则动容貌斯立威严矣度其言察其志考其行辨其德志定则发之以春秋於是乎断而能变德全则导之以乐於是乎和而知节可从事则达之以书於是乎可以立制知命则申之以易於是乎可以尽性若骤而语春秋则荡志轻义骤而语乐则喧德败度骤而语书则狎法骤而语易则玩神通闻之曰姚子得之矣魏徵问圣人有忧乎曰天下皆忧吾独得不忧乎问疑曰天下皆疑吾独得不疑乎徵退通谓董常曰乐天知命吾何忧穷理尽性吾何疑贾琼问何以息谤曰无辩何以止怨曰不争问事人之道曰远而无介就而无谄泛乎利以讽之无鬪其捷问君子之道曰必先恕乎为人子者以父之心为心为人弟者以兄之心为心推而达之天下斯可矣李密问英雄曰自知者英自胜者雄问勇曰必也义乎问王霸之略曰不以天下易一民之命房玄龄问事君之道曰无私问使人之道曰无偏问化人之道曰先正其心尝曰不以伊尹周公之道康其国非大臣也不以霍光诸葛亮之心事其君皆具臣也又曰人不里居地不井授终苟道也封禅之费非古也其秦汉之侈心乎又曰无赦之国其刑必平多敛之国其财必削又曰政猛宁若恩法速宁若缓狱繁宁若简臣主之际其猜也宁信通见牧守屡易曰尧舜三载考绩仲尼三年有成三代之兴邦家有社稷焉两汉之盛牧守有子孙焉不若是之亟也无定主而责之以忠无定民而责之以化虽欲从之末由也已其嘉言懿论门人相与集而记之号曰中说十年召署蜀司户不就十一年以著作郎国子博士徵并不至十三年江都难作通寝疾泫然兴曰生民厌乱久矣天其或者将啓尧舜之运而吾不与焉命也遂卒门人諡之曰文中所续礼论二十五篇列为十卷乐论二十篇列为十卷书一百五十篇列为二十五卷诗三百六十篇列为十卷元经五十篇列为十五卷赞易七十篇列为十卷竝未及行二子长曰福郊少曰福畴

论曰通名迹不见於隋史故司马光以为疑所引弟子多唐初名臣朱子以为福郊福畴之所为非通雅意然亦其平日好高自大之心有以啓之又议其续经之僭至等之吴楚虽然当隋之时道术之裂也已久通独鋭然修周孔之业倡教河汾成就後进其学其识诚大有以过人者故朱子又称其学有可用之实荀扬韩氏皆不及也岂不谅哉康节邵子亦尝为之赞曰录其所是弃其所非君子有归斯实平恕之论

唐

薛收

薛收字伯褒蒲州汾阴人道衡之子也年十二能属文以父不得死於隋不肯仕郡举秀才不应事王通与董常仇璋程元备闻六经之义为高第通称之曰孝哉薛收行不负於神明收问仁通曰五常之始也问性曰五常之本也问道曰五常一也收问政於仲长子光子光曰举一纲衆目张弛一机万事隳不知其政也收以告通通曰子光得之矣及唐高祖兴收遁入首阳

山将应义举尧君素觉之迎置其母城中收不得去後君素东连王世充收遂挺身归唐房玄龄亟言之秦王王召见问方略合旨授府主簿判陕西大行台金部郎中是时方讨世充军事繁综收为书檄露布或马上占词该敏如素构初不审定窦建德来援世充诸将争请敛军以避其锋收独曰不然世充据东都府库盈衍所将兵皆江淮精锐但苦乏食为我所持今建德总衆以来若纵之至必转河北之粟以馈洛阳则战争方始偃兵无日混一之期殊未有涯也不若分兵守洛阳深沟高垒慎勿与战大王亲督骁锐先据成臯厉兵按甲截建德路以逸待劳决可克也建德既破世充自下不过二旬两主就缚矣秦王曰善遂禽建德降世充一如收策王入观隋宫室夸侈无度收进曰峻宇雕墙殷辛以亡土阶茅茨唐尧以昌始皇兴阿房而秦祸速文帝罢露台而汉祚永後主曾不是察奢虐是矜卒死一夫之手为後世笑何此之能保哉王重其言俄授天策府记室参军从平刘黑闥封汾阴县男尝上书谏王畋猎王答之曰成我者卿也明珠兼乘未若一言赐黄金四十铤武德七年寝疾王遣使临问相望於道又命輿至府举袂抚之论叙平生感激涕泗卒时年三十三王哭之恻及王即位语房玄龄曰收若在者当以中书令处之

论曰以嵇绍之忠而事晋後世犹有遗议收之不仕隋高於绍矣当唐之初其登瀛洲者多隋之遗臣也惟收起布衣以佐兴朝其出身为独正及决机东都下料敌审胜虽良平之智何以加兹王福峙又记太宗欲兴礼乐房玄龄魏徵等苦无素业卒不能定太宗临朝而叹玄龄退乃谓徵曰使董薛在适不至此董谓董常薛即收也

孔颖达

孔颖达字仲达冀州衡水人自少诵记日千余言能闇记三礼义宗及长明服氏春秋传郑氏尚书诗礼记王氏易善属文通步历尝造同郡刘焯焯名重海内初不之礼及与质难焯大畏服大业初举明经高第仕隋至太学助教隋乱避地虎牢唐太宗平洛授文学馆学士迁国子博士太宗身囊鞬风纚露沐然锐情经术即秦王府开文学馆召名儒十八人为学士与议天下事既即位殿左置弘文馆悉引纳学士番宿更休听朝之间则与讨古今道前王所以成败或日昃夜艾未尝少怠於是封颖达曲阜县男转给事中颖达亦数数以忠言进帝问以能问於不能以多问於寡有若无实若虚何谓也对曰此教人谦耳非特匹夫君德亦然故易称蒙以养正若据尊极之位衒聪耀明恃才以肆则上下不通君臣道乖自古灭亡莫不由此帝称善除国子司业岁余以太子右庶子兼司业与诸儒议历及明堂事多从其说以论撰劳加散骑常侍爵为子皇太子令颖达撰孝经章句因文以尽箴讽又数争太子失帝闻之劳以金帛久之拜祭酒侍讲东宫帝幸太学观释菜命颖达讲经太子既长稍不法颖达争不已至面折之或以过颖达颖达曰蒙国恩厚虽死不恨剴切愈至後致仕卒陪葬昭陵諡曰宪初颖达与顔师古司马才章王恭王琰受诏撰诸经义训包贯异家为详博号义赞诏改为正义及永徽间诏于志宁张行成高季辅等就加增损遂布下其书行於世

论曰唐儒治经不如汉析理不如宋故三百年中以诗文名家者至衆而儒之醇者则寥寥难以数觐贞观之初号多老儒然瀛洲之选能有功於经史者惟颖达与顔籀为最故时人以籀为班固功臣而颖达诸经正义程朱尚资之以明训诂迄於今学宫传诵犹未废也籀才余於

德颇为清议所薄若颖达之执义陈善有謇謇之节其性行优於籀矣

褚无量

褚无量字弘度杭州盐官人少刻意坟典家濒临平湖龙出衆皆走观无量读书若不闻人异之尤精礼及司马史记擢明经第累除国子博士迁司业兼修文馆学士中宗将南郊定仪典时议皇后为亚献无量固争以为郊祀国大事折衷莫如周礼周礼冬至祭天圜丘不以地配惟始祖为主亦不以妣配故后不得与又巾车内司服掌后六服与五路无后祭天之服与路是后不助祭天也其议不行遂以母老解官明皇为太子复拜国子司业兼侍读撰翼善记以进优被礼答太子释奠国学令讲经建端树义博敏而辨进银青光禄大夫及即位迁左散骑常侍兼国子祭酒封舒国公母丧解官庐墓左鹿犯所植松柏无量号曰山林不乏忍犯吾莹树耶自是羣鹿驯扰无量为终身不御鹿肉丧除复故官以耆老随仗听徐行又为设腰舆许乘入殿中频上书陈得失开元五年帝将幸东都而太庙坏姚崇以庙本苻坚故殿久腐故坏不必罢行无量鄙其言以为不足听乃上疏曰王者阴盛阳微则先祖见变今後宫非御幸者宜悉出之举俊良擢奢靡轻赋慎刑纳谏争察谄谀继絶世则天人和会灾异訖息帝卒从崇言车驾遂东无量又上言昔虞舜之狩秩山川徧羣神愿陛下所过名山大川古帝王贤臣在祀典者竝诏致祭自古受命必兴灭继絶崇德报功故存人之国大於救人之灾立人之後重於封人之墓愿到东都收叙唐初逮今功臣世絶者虽在支庶咸得承袭帝纳用其言即诏无量祠尧平阳宋璟祠舜蒲坂苏頌祠禹安邑又求武德以来勲臣苗裔绍续其封初内府旧书自高宗时甲乙丛倒无量请缮录补第以广秘籍诏於东都乾元殿东厢彙之而以无量为之使又求天下遗书以补阙文不数年四库完治帝西迁徙书丽正殿复诏无量就丽正纂续前功皇太子及四王未就学无量以孝经论语五通献帝曰朕知之矣乃选儒臣为太子诸王侍读七年太子齿胄于学诏无量升坐讲劝百官观礼年七十五卒所撰述百有余篇卒後有於书殿得其讲史记至言十二篇上之帝为叹息始无量与马怀素为侍读厚见宠待其後秘书少监康子原国子博士侯行果继之虽赏赉亟加而礼遇稍衰矣

论曰迹无量平生抗直以劾上致孝以事亲至於拂牝鸡感麋鹿其行谊殆远过於瀛洲诸学士顾以着述不彰为後儒所鲜称表而扬之是史氏之责也且四库遗编非无量则零落谬失者不知凡几矣其为功於艺文又曷可没乎哉

啖助

啖助字叔佐赵州人後徙关中淹该经术天宝末调临海尉丹阳主簿秩满屏居甘足疏糗善为春秋考三家短长缝绽漏缺号集传凡十年乃成复撮其纲条为例统助爱公谷二家以左氏解义多谬其书乃出於孔氏门人论语所引左丘明盖史佚迟任之比後人即以左氏为丘明非也年四十七卒门人河东赵匡吴郡陆质其高第也匡字伯循仕至洋州刺史质字元冲本名淳避宪宗讳赐今名仕历尚书郎国子博士给事中皇太子侍读助卒後质与其子异裒录助所为春秋集传例统请匡损益而质纂会之为春秋集注十篇辨疑七篇微指二篇号纂例柳宗元称其明章大中发露公器谓其道以圣人为主以尧舜为的苞罗旁魄胶轕下上而

不出於正其法以文武为首以周公为翼揖让升降好恶喜怒而不过乎物云

论曰左氏所蒐载訖於三国分晋其人盖与公谷同时而自汉儒谓左丘失明厥有国语後世遂相沿以左氏为丘明助独驳之是已质之所纂见行於今宗元誉之容有过者要其经学大有裨於春秋盖汉晋以来解春秋者多信传以测经啖赵陆三家出始据经以核传颇得孔氏之微旨至宋诸家各出而伊川程子及刘敞胡安国为最善

韩愈

韩愈字退之河内南阳人自知读书日记数千百言比长尽能通六经百家学年二十五擢进士第董晋节度宣武表署观察推官晋卒愈从丧出不四日汴军乱乃依武宁节度张建封建封辟为府推官操行坚正鯁言无所忌调四门博士迁监察御史论旱饥及宫市事是时王叔文等用事排之贬阳山令有爱在民民生子多以其姓字之顺宗即位改江陵法曹参军元和初权知国子博士分司东都改都官员外郎即拜河南令河南旧有魏郛幽镇留邸皆贮潜卒以橐罪士官莫敢问愈将撻其禁以壮朝廷留守尹大恐遽止之或以闻於宪宗宪宗悦曰韩愈助我迁职方员外郎华阴令柳涧有罪前刺史劾之未报而刺史罢涧讽百姓遮刺史索军顿役直後刺史恶之按其狱贬涧房州司马愈过华以为刺史阴相党劾治之既御史覆问得涧赃再贬涧封溪尉愈坐是复为博士愈既才高数黜乃作进学解以自谕执政奇其才改比部郎中史馆修撰转考工知制诰进中书舍人初宪宗将平蔡命御史中丞裴度按视诸军及还具言贼可灭愈亦言淮西败可立待兵不可息宰相不悦以他事改愈右庶子及度以宰相宣慰淮西奏愈为行军司马愈请乘遽先入汴说韩弘协力弘果用命愈又白度蔡精卒聚界上守城必虚请间道以入度未及行而李愬果自文城提卒夜至蔡缚元济如愈策蔡州平布衣柏耆以计干愈愈奇之白度曰淮西灭王承宗胆破若遣辩士为明祸福可不劳衆而服度然之愈口占为书使柏耆賈以往承宗果大恐献德棣二州遣子入侍以功迁刑部侍郎宪宗迎佛骨入禁中三日乃送僧寺王公士庶奔走膜呗至灼体肤委珍贝腾沓系路愈恶之上表极谏帝大怒将抵以死裴度崔羣救之曰愈言诚讦悟然非内怀至忠安能及此帝意犹未解於是中外皆为愈惧虽戚里诸贵亦为言乃贬潮州刺史至潮表谢帝颇感悟曰愈前所论是大爱我然不当言天子事佛乃年促耳将复召用皇甫湜沮之量予内移改袁州愈初至潮问民疾苦皆曰恶溪有鳄鱼食民畜产民以是穷愈亲往视投羊豕为文驱之是夕暴风震电数日溪水尽涸西徙六十里自是潮无鳄鱼患袁人以男女为隶过期不赎则没入之愈至令得计庸赎归因与约禁其为隶召拜国子祭酒转兵部侍郎镇州乱杀田弘正而立王庭凑诏愈往宣抚衆皆危之既行元稹言愈可惜穆宗亦悔诏度事从宜无必入愈曰止君之仁死臣之义遂疾驱入廷奏严兵见之廷奏曰所以纷纷者乃此士卒也愈大声曰天子以公为有将帅材故赐以节岂意同贼反耶语未终甲士前奋曰先太师为国击朱滔血衣犹在此军何负朝廷乃以为贼乎愈曰以尔为不记先太师也若犹记之固善且为逆与顺利害不能远引古事自天宝来安禄山史思明李希烈梁崇义朱滔朱泚吴元济李师道有子若孙在者乎衆曰无愈曰田公以魏博六州归朝廷官中书令父子受旗节刘悟李佑皆大镇此尔军所共闻也衆曰弘正刻故军不安愈曰然尔曹害田公又残其家矣复何道衆乃譴曰侍郎语是廷奏恐衆心动遽麾使去泣谓愈曰今欲廷奏何若愈曰神策六军之将如牛元翼比者不少但朝廷顾

大体不可弃而不救公久围之何也廷湊曰即当出之会元翼溃围出廷湊不追愈归奏其语帝大悦转吏部侍郎时宰相李逢吉恶李绅欲逐之乃以愈为京兆尹兼御史大夫特诏不台参而除绅中丞愈不参绅绅遂劾愈愈以诏自解台府文刺纷然遂罢愈为兵部侍郎而出绅江西观察使绅见上得留愈亦复为吏部侍郎愈之尹京兆也六军将士私相诫曰是尝欲烧佛骨者安可忤故盗贼止息遇旱米价不敢踊长庆四年卒年五十七赠礼部尚书諡曰文愈性明銳不诡随与人交终始不少变成就後进士往往知名经愈指授皆称韩门弟子凡内外亲若交友无後者为嫁遣孤女而恤其家愈少孤鞠於嫂郑氏嫂没制期丧报之病革时遗命丧葬无不如礼凡浮图阴阳吉凶拘忌一无污我其守礼法排异教至死不变乃如此每言文章自汉司马相如太史迁刘向扬雄後作者不世出故深探本原卓然树立成一家言其至者奥衍闳深与孟子扬雄相表里而佐佑六经至它文造端置词要为不袭蹈前人者然惟愈为之沛然若有余至其徒李翱李汉皇甫湜从而效之遽不及远甚从愈游者若孟郊张籍亦皆自名於时

新唐书赞曰唐兴承五代剖分文弊质穷天下已定治荒剔蠹讨究儒术薰浓涵浸至贞元元和间愈遂以六经之文为诸儒倡愈之才自视司马迁扬雄至班固以下不论也当其所得粹然一出於正刊落陈言横骛别驱汪洋大肆要之无抵牾圣人者其道盖自比孟子以荀况扬雄为未淳宁不信然至进谏陈谋排难恤孤矫拂媮末皇皇於仁义可谓笃道君子矣自晋迄隋老佛显行圣道不断如带诸儒齟天下正义助为怪神愈独喟然引圣争四海之惑虽蒙汕笑踰而复奋始若未之信卒大显於时昔孟子距杨墨去孔子才二百年愈排二家乃去千余岁拨衰反正功与齐而力倍之所以过况雄为不少矣

程子曰韩愈近世豪杰之士也古之学者修德则言可不学而能愈乃以学文之故日求所未至故所见甚高其言曰孟子死不得其传此非有所袭於前也若无所见所谓传者果何事耶

论曰愈因文见道者也其克己力行虽不若宋儒之坚确然不可不谓强有立之士也读其所着杂文不免有求进愤激不平之词然始仕於朝则以谏官忤叔文而贬阳山矣蹶而复起不悔旋以谏佛骨批龙鳞濒死远斥复起又不悔更以使廷湊而折强藩此非有得於朝闻夕死舍生取义者能之乎至其经世谟猷畧见於淮西事宜云

宋

王昭素

王昭素开封酸枣人少笃学不仕有至行常聚徒教授以自给乡里争讼不诣官府多就昭素决之昭素博通九经尤精诗易以疏注或未尽乃着易论二十三篇开宝中李穆荐之召赴阙见於便殿时年七十七精神不衰太祖恨相见之晚赐坐讲易乾卦至五爻太祖曰此岂可令常人见昭素曰无伤也使臣等占值之则陛下为飞龙在天臣等为利见大人因问以治世养身之术对曰治世莫若爱民养身莫若寡欲太祖爱其言书於屏几又访以民间事昭素诚实无隐太祖嘉之以老求归拜国子博士致仕年八十九卒初李穆暨弟肃从昭素学昭素常语

人曰二子皆令器穆尤沈厚他日必致公辅後果参政每市物随所索与直未尝较高下市人至相戒毋复敢索王先生厚直者盗夜挟其门门有横椽盗未即得入昭素觉之潜掷其椽盗慙而去由是里中无盗家畜一驴常以假人每出必问曰无假驴者乎僮曰无有然後出其纯质如此

论曰易之为书不可典要其占法亦稽实以待虚存体而应用自诸家好为博稽事迹指实於卦爻之下而占法几窒不行必如昭素所云乃可迭为贞悔以毕天下之能事故朱子采焦氏之法以穷易变因昭素之意以神易占後圣复起不能易已

孙奭

孙奭字宗古博州博平人後徙须城以九经及第除莒县主簿迁大理评事为国子监直讲太宗幸学召奭讲尚书说命三篇音读详润上称善赐绯咸平间为诸王府侍读会诏百官转对奭上十事判太常礼院国子监司农寺累迁工部郎中擢龙图阁待制奭以经术进守道自处即有所言未尝阿附取悦大中祥符初上将奉迎天书宰相王旦以下皆再拜称万岁奭独言曰臣愚所闻天何言哉安有书也上既亲受符命遂议封禅作礼乐四年将祠汾阴后土奭上疏切谏陈十不可上遣宦者皇甫继明就问又疏对曰昔陈胜起於徭戍黄巢出於凶饥隋炀帝勤远略而唐高祖兴於晋阳晋少主惑小人而耶律德光长驱中国陛下俯从奸佞远弃京师涉仍岁荐饥之墟修违经久废之祠不念民疲不恤边患安知今日戍卒无陈胜饥民无黄巢英雄将无窥伺於肘腋外敌将无观衅於边陲乎六年将祠太清宫奭又疏谏引明皇天宝之乱为鉴戒上作辨疑论以解之然知奭朴忠虽言至切直犹遣中使慰谕焉久之以父老丐归不许出知密州居二年迁左谏议大夫罢待制还纠察在京刑狱於是初置天庆天祺天颺先天降圣诸节天下设斋醮张宴费甚广奭请裁省浮用不报复出知河阳求解官就养迁给事中徙兖州天禧中朱能献乾佑天书奭疏谏语尤加切未几能败上尝令陈时政得失奭以纳谏恕直轻徭薄敛四事为言颇施行焉仁宗即位宰相请择名儒侍讲读乃召奭为翰林侍讲学士知审官院判国子监修真宗实录丁父忧起复兼判太常寺及礼院三迁兵部侍郎龙图阁学士奭劝讲禁中二十余年每至前世乱君亡国必反覆申绎未尝忌讳因以规讽仁宗意或不在书奭辄拱默以俟上为悚然改听又掇五经中切治道者为五十篇号经典徽言及画无逸图并上之上施图於讲读阁皇太后尤重之每进见未尝不加礼年踰七十固请致仕至於泣下帝惻然犹敦留之乃求近郡优拜工部尚书复知兖州寻改礼部尚书累表乞归遂以太子少傅致仕尝语客曰白傅有言多少朱门鎖空宅主人到老不曾归今老夫归矣喜动於色疾革徙正寝屏婢妾谓子瑜曰无令我死妇人之手奏至上嗟惜罢朝一日赠左仆射謚曰宣奭性方重事亲孝立朝正言諫争有古风采晚节勇退优游里社始终全德先是郊庙礼乐尚多讹阙奭援古奏正辄着於礼又撰崇祀录乐记图五经节解五服制度所奉诏校定者又数种

论曰宋初尊獎儒臣而奭与邢昺最着昺之选儒依阿萦怀禄利其志固已卑矣奭独正直行事君以义进退有礼可谓儒者之高节搢绅之楷模以王旦一时名相当之犹有愧色况於昺乎若其劝讲禁中不惟问学之益而时有以斂人主之逸志此则圣敬所以日跻实为天德

之本仁宗之为有宋令主也宜哉

周子

周子名敦颐字茂叔道州营道县之莲溪人本名敦实避英宗讳改焉年十八以舅郑向任为将作监主簿康定元年调分宁县主簿县有疑狱周子一讯立辨为政精密严恕务尽道理士民交称庆历五年迁南安司理参军有囚法不死转运使王逵欲深治之逵酷悍吏也周子争不能得则委手版将弃官去曰此尚可仕乎杀人以媚人吾不为也逵悟囚得免死当是时程珦假倅南安视周子气貌非常人与语以为深於道因与结友使二子师之皇佑二年移郴桂阳令郴守李初平贤之荐诸朝且语曰吾欲读书何如周子曰公老无及矣请为公言之初平日听其语二年果有得未几初平卒子幼周子曰吾事也为护其丧归葬经纪其家始终不懈周子为人砥名节既仕奉己甚约禄入尽以周宗族奉宾友家或无百钱之储至和元年改大理丞知南昌南昌人皆曰是能辨分宁狱者吾属得所诉矣於是豪家黠吏更相告语惧得罪且以秽污善政为耻也嘉佑元年改太子中舍判合州至则民心服悦事不经手吏不敢决虽下之民亦不从部使者赵拚惑於潜临之甚威周子处之超然六年转国子博士判?州而拚复守?熟视所为大寤执其手曰吾几失君矣今而後乃知周茂叔也顷之移永州又权知邵州熙宁初用吕公着及拚荐为广东转运判官三年迁虞部郎中提点广东刑狱尽心其职务在矜恕虽荒崖絶岛皆缓视徐按不憚瘴疠之侵以洗冤泽物为己任俄得疾又闻水啮其母墓乞知南康军改葬毕曰强疾而来者为葬耳今犹欲以病污麾绂耶遂谢事居庐山莲花峰下前有溪合於湓江乃取营道所居濂溪以名之自是之後新法大行士夫沸腾黎民骚动赵拚再镇蜀复奏起之朝命及门而周子卒六年六月七日也年五十七周子玉色金声从容和毅窗前草常不除寓怀尘埃之外仕宦所至如春风和气被饰万物黄庭坚称其人品甚高胸怀洒落如光风霁月廉於取名而鋭於求志薄於徼福而厚於得民菲於奉身而燕及?嫠陋於希世而尚友千古二程既受业周子每令寻孔顔乐处所乐何事程伯子称曰自再见周茂叔吟风弄月以归有吾与点也之意侯师圣学於程叔子未悟谒周子周子留与对榻二日乃还叔子惊异曰非从茂叔来耶其善开发人类此所着有太极图说易通易说易说失传宁宗时追謚曰元理宗幸学封汝南伯

真德秀曰自荀扬以恶与混为性而不知天命之本然老庄以虚无为道而不知天理之至实佛氏以剗灭彝伦为教而不知天叙之不可易周子生乎絶学之後独探本源发奥秘二程见而知之朱子又闻而知之述作相承本末具备自是人知性不外乎仁义礼智而恶与混非性也道不离乎日用事物而虚无非道也教必本乎君臣父子夫妇昆弟而剗灭彝伦非教也辟圣学之户庭祛世人之蒙瞶千载相传之正统其不在兹乎论曰周子之学莫知其渊源所自而太极图说易通二书实为六经以後仅有之编故朱子推本於集奎之祥以为不由师传默契道体也虽然书不尽言言不尽意以陆九渊之高明犹疑於其说况余子乎二程不以图授人然平生发挥明阐不离其宗至朱子表章尊信二书遂胪於经唐韩愈尝言南条之南郁积旁魄以穷於郴其下必产异人越数百年而周子出焉呜呼星精兆瑞岳镇效灵天祚斯文可不谓生知之亚者乎

胡瑗

胡瑗字翼之泰州海陵人布衣时读书泰山攻苦食澹十年不归得家问见平安即投涧下不复视其专如此年四十余未尝求仕景佑初更定雅乐以知音用范仲淹荐召对既至例先就合门习仪瑗辞曰平生所读书即事君之礼也何以习为及对上嘉悦谓左右曰瑗进退周旋动合古礼命与阮逸同较钟律其法以大黍累尺小黍实龠与逸各造钟磬一簠丁度以为非古制皆罢之而授瑗试秘书省校书郎范仲淹经畧陕西辟丹州军事推官改密州观察推官丁父忧阙以保宁节度推官教授湖州瑗尝患隋唐以来学尚文词遗经业乃具科条以身先之虽盛暑必公服坐堂上严师弟子之礼讲解经旨恳恳为诸生言所以治己而後治乎人者其视诸生如子弟诸生亦信爱瑗如父兄置经义斋以处疏通有器局而好尚经术者又置治事斋俾人治一事各兼一事凡农田水利边防算数之类无所不讲既使类聚羣居互相磨礱间又使自论所学或出一义使各以意对而瑗亲为可否之以故人皆乐从而才适世用庆历四年春天子开天章阁与大臣讲求治道慨然诏州县悉立学於是建太学於京师而下湖州取瑗科条以为太学法着为令寻召为诸王宫教授以疾免已而以太子中舍致仕迁殿内丞於家皇佑二年更铸太常钟磬复召瑗及逸置局秘阁议之以瑗为大理评事兼太常主簿辞岁余授光禄寺丞四年为国子监直讲瑗既居太学从者益衆庠序至不能容拓旁官舍以广之是时伊川亦游太学作好学论瑗遽延见处以学职每讲罢或引当世事证明其义尝讲易小畜曰畜止也臣止君也已乃言赵中令补所碎劄子复呈艺祖之事诸生才业各异要皆淳厚修饰衣服容止往往相类人遇之不问可知为瑗弟子也每礼部所得士瑗弟子十常居四五有番禺人遣子重賫就学其子儂宕尽靡所賫病几殆适父至携以谒瑗言其故瑗曰是宜先警其心乃授以一帙其子视之则素问也读未及竟惴惴然痛自悔责瑗乃召而教之曰知爱身则可以修身自今以始其洗心向道圣人不贵无过而贵改过无怀昔悔第勉新业其人既穎脱感奋益自力竟登上第乐成迁大理寺丞嘉佑初擢太子中允充天章阁侍讲仍主太学尝於上前讲元亨利贞不避讳左右皆失色上亦愕然瑗徐曰临文不讳上意遂解既而疾不能朝以太常博士致仕归朝士及诸生祖饯之时以为荣瑗治家严尤谨内外子妇非节朔毋得归宁尝曰嫁女须胜吾家娶妇须不及吾家问其故曰胜吾家则女事人必钦必戒不及吾家则妇事舅姑必执妇道及卒诏赙其家初师法久废及瑗与孙复石介三人者出然後学者有师而瑗之徒最盛福唐刘彝者瑗高第也瑗尝言彝善水利後彝试政所至皆兴水利有功熙宁初彝得召对上问瑗文章孰与王安石愈彝曰圣人之道有体有用有文国家取士不以体用为本而尚声律浮华之文是以风俗媮薄臣师瑗尝病其失遂明体用之学以授诸生出其门者无虑千人今学者渐知明体适用以为政教之本瑗之功也上悦瑗在太学时所讲五经异论弟子记之目为胡氏口义行於世

论曰六经皆圣人经世之书也舍经以言事其弊也杂离事以谈经其弊也迂圣人之教德行道艺精粗具举岂其时之士尽为全材哉教举其全而学犹或失则偏苟徒以偏教则士之有始有卒者益鲜矣瑗分立二斋判治经治事为两途与圣人之意虽若稍异然者然黜浮华崇实用成就人才之功良不可诬史称有宋师道之立实自瑗始不已卓乎

孙复

孙复字明复晋州平阳人举进士不第已而退居泰山学春秋着尊王发微十二篇鲁多学者而石介最知名自介以下皆以师礼事复孔道辅闻而造复介执杖屨侍左右升降则扶之及复往谢道辅所介又然鲁人由是始识师弟子之礼故相李迪知复贤将妻以弟女时复年已四十矣意犹豫介与诸弟子请曰公卿不下士久矣今丞相不以先生贫欲托以子宜因以成丞相之贤复乃听及介为学官语人曰孙先生非隐者也於是范仲淹富弼交荐之召为秘书省校书郎国子监直讲初仲淹掌学睢阳有孙秀才者索游上谒仲淹馈以千钱明年又至馈又如之因问曰何仆仆至此生蹙然曰母老无以养若日得百钱则甘旨足矣仲淹曰观子词气非乞客也补以学职月饷钱三千而授之春秋生遂笃学不舍昼夜明年仲淹去睢阳生亦辞归後十年闻泰山下有孙明复先生以春秋教授学者道德高迈比召至则昔日索游孙秀才也久之车驾幸太学赐绯衣银鱼命为还英阁祇候说书未几罢孔直温常以诗遗复直温之败复坐贬?州监税徙泗州历知长水县签书应天府判官事通判陵州未上用赵槩等言留为直讲稍迁殿中丞卒赐钱十万复与胡瑗不合在太学常相避复教养诸生不如瑗而治经过之复既病韩琦言於仁宗选书吏给笔札命其门人祖无择就复家録其书凡十余万言藏於秘阁

论曰复与胡瑗石介朱子所谓宋初三先生者也而介实事复当宋之盛名臣辈出至獎掖人才必以范仲淹为称首复之成学由於仲淹其後又与瑗介及李覲竝为仲淹招致与子纯仁共学故北宋臣轨尤最仲淹而师道之抗从三子始自是而後大儒踵兴圣学遂明师道立则善人多岂不信夫

石介

石介字守道兗州奉符人为举子时寓南都固穷苦学王漬遗以盘餐介谢曰甘脆亦介之愿但明日何以为继夫朝餐膏粱暮厌粗粝人之常情也介不敢当赐漬咨重之既成进士及第历郢州南京推官乐善疾恶喜声名遇事奋然敢为御史台辟主簿未至会赦书中求五代及诸伪国後介疏论之罢不召秩满迁镇南军掌书记代父丙远官为嘉州军事判官丁父母忧耕徂徕山下葬五世之未葬者七十丧以易教授於家鲁人不称其官而称其德以为徂徕鲁之望而介鲁人之所尊故因所居山以配其有德之称号曰徂徕先生介貌厚而气完学笃而志大虽在畎亩不忘天下之忧尝患扬刘害文释老害道着怪说中国论以排之又着唐监以戒奸臣宦官宫女凡所发愤为文章皆极陈古今治乱成败以指切当世贤愚善恶是是非非无所讳忌由是谤议喧然而小人尤嫉恶之介不惑不变曰吾道固如是吾勇过孟子矣服除召入国子监直讲以师道自居弟子从之者甚衆岁余用杜衍韩琦荐擢太子中允直集贤院庆历三年天子以兵讨元昊久无功海内重困奋然思欲振起威德而进退二三大臣增置諫官御史於是罢宰相吕夷简枢使夏竦而杜衍韩琦及章得象晏殊贾昌朝范仲淹富弼等同时执政欧阳修余靖王素蔡襄竝为諫官介喜曰此盛事也歌颂吾职其可已乎乃作庆历圣德诗诗所称多一时名臣其言大奸盖斥竦也诗既出孙复见之曰子祸始於此矣久之介不自安求出通判濮州未赴五年七月卒于家会徐狂人孔直温谋反搜其家得介书竦衔介甚因言介不死北走契丹矣诏编管介妻子於江淮出中使将斲棺以验赖杜衍吕居简等全之乃免斲棺久之妻子亦放还介家故贫妻子不免冻馁富弼韩琦共分俸买田以贍之有徂徕

集行於世

论曰仁宗浑厚之主也於时朝多君子宋业最盛而介以一诗几罹身後之祸何欤昔吴张温得罪诸葛亮闻之思其故久之乃曰我得之矣善恶太明夫明诚君子所尚然甄核流品絕之已甚至使小人自甘於弃物则未有不激而成变者也易之姤以阳制阴而其爻繇乃曰苞有鱼曰以杞苞瓜惟能苞之故能制之贵勿激也

刘敞

刘敞字原父临江新喻人庆历中举进士甲科通判蔡州入直集贤院时方议大乐上使中贵人赵谈参其事敞谏以为王事莫重於乐今儒学滿朝而参以谈臣惧为袁盎笑也俄判考功而夏竦卒赐諡文正敞以竦行不应法三疏言之卒改文庄权度支判官徙三司使会秦州与羌争古渭地上以问敞敞曰若新城可蔽秦州或地形险利争之可也今何所重轻而殫财困民损士卒之命以规小利使曲在中国非计也时议者多不同卒守之秦州坐是多事以同修起居注未一月擢知制诰宰相陈执中沮之上不听宦者石全彬领观察居三日为真敞封还除书不草制於是吴充冯京皆以非罪去官敞因对论之上曰充能振职京亦无它中书恶其太直不相容耳敞曰主上好谏而中书乃逐言者是蔽君之明止君之善臣恐感动阴阳有日食地震风霾之异居五日镇戎军地震都下累日阴霾太阳色昏畧如敞言敞问学渊博自佛老卜筮天文方药山经地志皆究知大畧为文贍敏尝将下直适封王主九人需九制立马却坐成之欧阳修每折简问所疑敞对使挥答不停手修深服之後使契丹於道里山川故所习知而契丹导者故回曲千余里以示其国险远敞问译曰自松亭趋柳河甚直而近何不道彼而道此译惊顾骇愧顺州山中有异兽如马食虎豹契丹不识以问敞敞曰此駮也为言其形状音声契丹益叹服使还求知扬州以寬简安拊民用大和徙郢州决狱讼明赏罚境内政清道不拾遗蝗皆出境召纠察在京刑狱时近例凡上旨及中书枢密所鞫狱皆不覆问辄弃市敞奏革之着为令值上当祫享宰相欲加上尊号敞止之曰上持盈好谦不受尊号且二十年今加数字不足尽圣德而前美尽弃诚可惜也宰相不听敞退即上疏谏且曰今百姓多困仓廩不实风俗未清贤不肖混淆狱讼繁多盗贼迭起水旱继有四夷虽粗定亦本以重赂厚利羁縻之非畏威慕义也愿陛下永执至道以当天心必有一谦四益之报上遂不受蜀人龙昌期着书传经诡僻惑衆文彦博荐之赐五品服敞曰昌期学非而博未即少正卯之刑已幸矣又何赏焉昌期闻之不敢受赐其识论与衆忤类此顷之丐外拜翰林侍读学士知永兴军召还判三班院英宗初敞尝侍讲时两官方有间言敞指事据经因以讽谏读史记至尧授舜以天下拱而言曰舜至侧微尧禅以位天地享之百姓戴之非有它道惟孝友之德光於上下耳上知其意改容竦听皇太后闻之亦大喜以苦眩予告上重其人每燕见它学士必问敞安否疾少间复丐外知汝州旋改集贤书院学士判南京御史台熙宁元年卒年五十敞明於礼学尝谓仪礼有士冠礼士昏礼戴记则有冠义昏义以至乡饮酒乡射燕聘皆然独士相见食大夫礼无其义因采古经以补之又定为兄後之义以弟继兄後兄当为昭弟当为穆以承国与天下为重而引春秋讥闵僖逆祀以正汉朝惠文昭宣不相为後之失又有奔丧议且谓臣僚以丧去位当量给禄俸以明朝廷笃於礼而厚於教尤粹於春秋为书四十卷行於世

论曰今之治春秋者宗胡氏传以安国所着实采程子邵子张子及孙觉诸人之说词严义正确乎可以范世也然读敝所着春秋贯穿经传其旨远其词文多得圣人之意与附会穿凿者大别方之胡传无不及也至居官以风节自励上之则谏止尊号以正其君下之则考核謚法以正其臣尤得春秋谨严之旨昔刘向治谷梁春秋常考灾异冀以警悟上心敝亦因事推眚以揅时弊二刘之意岂异哉

陈襄

陈襄字述古福州侯官人少孤事继母孝教弟妹有义方时学者皆溺於词章襄独与陈烈周希孟郑穆为友气古行高磨礲镌切相期以天下之重闻者笑为迂阔已乃信而从之号为四先生四先生之名传於四方及举进士调浦城簿浦城多世族以请托胁持为常令不能制襄摄令欲革其俗每听讼必使数吏环立於前私谒者不得发老奸缩手适诏郡邑兴学襄遂缮学舍招邑子弟教之民畏且爱争图像奉之如神明改知河阳富弼为守一见即加礼遇始教民种稻复留意教化弼荐为秘阁校理判祠部遇权贵人有丐寺观名额及度僧人道士者襄皆抑不行出知常州运渠横遏震泽积水为常苏二府害襄度渠丈尺对民田步亩分授以浚深广有制遂削望亭古堰水不复积民害以除郡庠下窄襄更为经始晨入其中坐授诸生经义旁决郡事由是毘陵学者盛於二浙襄薄於奉已及将召还公帑赢钱至数百万乃召积年官逋未偿情可矜而力不足者悉以输之入为开封推官盐铁判官神宗立奉使契丹还出知明州明年同修起居注知谏院改侍御史知杂事论青苗法不便乞斥王安石吕惠卿以谢天下不听召试知制诰襄以言不行辞不愿试至曰义之所在知无不言臣岂知铁锁在前而宠禄居後哉一有顾利避害之心则依违姑息无所不至身且不正焉能正人遂乞补外帝惜之留修起居注逾年乃知制诰安石屡欲出之帝不许寻直学士院安石愈忌之吹求小失出知陈州徙杭州复入为枢密直学士知通进银台司兼侍读判尚书都省病革索纸笔书先圣先师四字付其子而絶年六十四襄莅官所至务兴学校每过社稷孔子庙必下而趋人士知所矜式平居急於讲求利病既没友人寻其故篋得手书累数十幅盈纸细楷大抵皆民间事也在经筵上顾遇甚厚访以人材举司马光等三十三人以对谓司马光韩维吕公着苏颂范纯仁皆股肱心膂之臣不当久在外苏轼郑侠愚直敢言发於忠义投窜瘴疠朝不谋夕愿使生还帝不能用

论曰四先生兴而滨海有邹鲁之号儒者之风固如此矣及襄所至兴学为士民师临革犹惓惓於先圣先师盖终其身无时不结神於两楹之间也吕氏家塾记又载襄为富弼上客所以告弼者尽仁义也有异於弼者造为五鬼之目而襄处其一夫世羣奉之以先生而夫已氏者乃反指之曰鬼名号顿殊小人之无忌惮抑亦何所不至哉

史传三编卷三

卷四

钦定四库全书

史传三编卷四

大学士朱轼撰

名儒传四

宋

邵子

邵子名雍字尧夫先为范阳人曾祖令进徙衡漳父古又徙共城邵子少时自雄其才既学力慕高远後丧母庐於苏门山百源之上坚苦刻厉冬不炉夏不扇夜不就席者数年於是北海李之才以获嘉主簿权共城令闻之造其庐谓曰子亦闻物理性命之学乎对曰未也幸受教乃事之才受易之才之传远有端绪而邵子探赜索隐妙悟神契多所自得大名王豫者瑰伟博达士也号精於易造邵子与语惊服遂舍所学而学焉邵子乃慨然曰昔人尚友於古吾独未及四方於是走吴适楚过齐鲁客梁晋久之归曰道在是矣年三十余游河南葬亲伊水上遂定居焉始至蓬荜环堵平居屡空而怡然有所甚乐岁时耕稼仅给衣食名其居曰安乐窝因自号安乐先生旦则焚香燕坐及晡酌酒三四瓯微醺即止不及醉兴至辄哦诗春秋时出游城中风雨常不出出乘小车一人挽之惟意所适士大夫家识其车音争相迎候童孺厮隶皆驩相谓曰吾家先生至也不复称其姓字或留信宿乃去好事者别筑屋如所居以候其至名曰行窝与司马光皆以纯德尤为乡里所慕向每相饬毋为不善恐司马端明邵先生知之士之道洛者有不之公府必之邵子邵子德气粹然望而知其贤不事表襮不设防畛羣居宴笑终日不为甚异与人言必依仁义忠信乐道人之善而隐其恶有就问则答之未尝强以语人人无贵贱少长一接以诚故贤者悦其德不贤者服其化嘉佑中富弼入相将用之乃因明堂祫享诏举遗逸意河南必以邵子应诏而文彦博以使相判河南用两府礼召见邵子不能屈遂舍邵子举黄景弼不乐诏再举留守王拱辰始以邵子荐而弼已忧去位矣除将作监主簿不起熙宁二年复举遗逸用吕海等荐除秘书省校书郎颍州团练推官又不起三年王安石初行新法天下骚然富弼司马光及吕公着等皆退居洛雅重邵子恒相从游为市园宅於是故旧门人仕宦者多欲投劾去以访邵子邵子曰新法虽严正贤者尽力之时能寬一分则民受一分赐矣投劾何益及安石罢相吕惠卿参政富弼有忧色邵子谓曰公无忧是二人者本以势利合势利相敌将自为仇不暇害他人也未几惠卿果叛安石十年夏感微疾谓司马光曰雍与观化一巡光曰何至此邵子笑曰死生常事耳张子来问疾因曰先生盍一论命邵子曰若天命则已知之世俗所谓命固不知也张子曰先生知天命矣及病革二程子张子司马光晨夕视之外庭议丧葬事邵子皆能闻召子伯温曰诸君欲葬我近城地当从先莹耳卒

时年六十七赠秘书省著作郎明道程子志其墓初明道从父见邵子退而叹曰尧夫内圣外王之学也其心虚明遇事能前知学者用是辄谓邵子能因声气之动以推其应如管郭之术其实邵子未必然也所着书曰皇极经世观物内外篇诗曰擊壤集元佑中追諡康节先是章惇尝事邵子後执政欲用伯温伯温不往会赴部铨先谒部而後见惇惇论及康节之学曰嗟乎吾於先生不能卒业也伯温曰先公先天之学论天地万物未有不尽者其信也则人之仇怨反覆者可忘矣於是惇方兴党狱故以是动之惇悚然犹荐诸朝而伯温愿补外惇不悦遂监永兴军铸钱监时元佑诸贤南迁莫敢过访独伯温见范祖禹於咸平见范纯仁於颍昌或为之恐不顾也秩满以避惇故义不至京师从外辟徽宗初上书请复祖宗法度辨宣仁诬谤解元佑党锢及戒劳民用兵尝论元佑绍圣之政曰公卿当知国体以蔡确奸邪死何足惜然既为宰相当以宰相待之其立论忠厚如此初邵子尝曰世行乱蜀安可避及宣和末伯温载家使蜀卒免於乱

论曰夫子传说卦惟後天方位至明汉儒用相付受至先天八卦以及圆横诸图皆出邵子邵子尝曰先天图心法也吾终日言未尝离乎是然则图之义精矣横图则明道程子所谓加一倍法者是也易以道阴阳故数起於两范以叙三才故数起於三圣人之倚数立法各有取尔扬雄作玄拟易而数乃用三其法固已舛矣然邵子平生乐道扬雄岂其倍累层生之致有以发其妙悟耶子朱子言易理则尊程数惟宗邵有以也

张子

张子名载字子厚世大梁人父迪知涪州卒於官子幼不克归侨於凤翔郿县横渠镇之南因徙家焉张子少喜谈兵至欲结客取洮西地年二十一以书谒范仲淹仲淹知为远器谓曰儒者自有名教可乐何事於兵授以中庸张子读之犹以为未足又求诸释老累年究其说知无所得反而求诸六经尝拥虎皮讲易京师听从者甚衆一夕二程至与论易遂撤坐辍讲语人曰是深明易道吾所弗及因与二程论道学之要涣然自信曰吾道自足何乃旁求於是尽弃异学淳如也嘉佑二年成进士授祁州司法参军迁云岩令为政以敦本善俗为先每月吉具酒食召高年亲为劝酬使人知养老事长之义因问民疾苦及告以训戒子弟之意尝谓学者曰孰能少置意科举相从於尧舜之域者乎学者闻法语多有从之者渭帅蔡子正特加尊礼军府之政大小咨之所赞助尤多神宗立方新百度思得才哲士吕公着言张子学有本原召见问治道对曰为政不法三代者终苟道也上悦以为崇文院校书王安石问以新政对曰公与人为善则人以善归公如教玉人琢玉则宜有不受命者矣安石默然寢不悦明州苗振狱起命往治之明道言载以经术德义进不宜使治狱安石曰淑问如臯陶犹献囚此何伤是时张子弟戡与明道同为御史里行极论安石乱法陈升之等依违徇从章既上又诣中书争之安石举扇掩面而笑戡曰戡之狂直宜为公笑然天下之笑公者不少矣升之从旁解之戡曰公亦不得为无罪升之有愧色遂与明道同时补外张子按狱还明道等已出遂移疾去屏居终南山下敝衣疏食危坐一室俯而读仰而思有得则识之或中夜起取烛以书其志道精思未尝须臾息也尝以定性之学问於明道明道荅之有曰天地之常以其心普万物而无心圣人之常以其情顺万事而无情故君子之学莫若廓然而大公物来而顺应张子大悦其後学成德尊每患学者虽复多闻不务畜德徒善口耳而已以故犹秘其学不多为人言讲明道谓

之曰道之不明久矣人善其所习自谓至足必如孔门不愤不启不悱不发则师资势隔而先王之道或几熄矣趣今之时且当随其资而诱之虽识有明暗志有浅深亦将各有得焉张子用其言每告学者以知礼成性变化气质之道以为知人而不知天求为贤人而不求为圣人此秦汉以来学者大蔽也故关中学士躬行之多与洛人竝张子气质刚毅德盛貌严然与人居久而日亲其治家接物正己以感人人未之信反躬自治不以语人闻人之善喜见颜色答问学者虽多不勸其家冠昏丧祭率用先王之意而傳以今礼初治期功之服行四时之荐闻者或疑笑之卒乃信从一变而从古者甚衆皆自张子倡之又尝病戍卒往来不可用不如省数以募土人以及井田宅里发斂学校之法皆欲条理成书使可举而措诸事业十年吕大防荐之诏知太常礼院议不合复以疾归过洛见明道曰吾病已革将不起尚可及长安也其冬十一月至临潼沐浴更衣而寝比旦视之则卒矣贫无以斂门人买棺奉其丧归一用古礼以终其志既而门人欲諡为明诚中子质诸明道明道以问司马光光曰子厚用心欲复三代之礼礼曰生无爵死无諡又曰贱不谏贵少不谏长诸侯相谏犹为非礼况弟子而谏其师乎孔子没哀公谏之不闻弟子复为之諡也今欲諡子厚恐不合於古非子厚之意乃止学者称为横渠先生张子之学以易为宗以中庸为体黜怪妄辨鬼神所着正蒙行於世尝谓门人曰此予历年致思所得其言殆与前圣合大要发端示人至触类广之则有待於学者正如老木一株枝干自在所少者润泽华叶耳最後二篇其两牖铭也一曰砭愚一曰订顽砭愚者东铭订顽则西铭也伊川尝言西铭吾得其意但无子厚笔力又曰西铭明理一而分殊扩前圣所未发与性善养气之论同功自孟子後盖未之见孝宗时追封郕伯宁宗时赐諡曰明

论曰井田之法非独授恒产也有封畛以别公私而上下之分定有沟洫以资潴泄而旱潦之患消以之成赋而赋治以之起役而役均以之寓兵而兵强井法既废历代之议田制者纷如即使兼采衆策限民名田而禁其卖买又兴水利以苴之犹不如井法之善也故虽三十税一而豪家收大半之租一有事役则差役雇役利病相半伍有常设之兵而兵骄国有常廩之饷而财匱其弊皆起於井法不行故也然井法与封建实相表里自郡县置而民无定主吏无定民徒以朝廷之神明疆理方内而欲为之分田易田授田归田一切如周召时立法之密势将不行惟师其意权其变随其风土民俗而经界之庶几渐以复古张子之所论定自期不刑一人而数年可复条理未及成书可胜惜哉

程伯子

程伯子名颢字伯淳世居中山後从开封徙河南太宗朝高祖羽为三司使仁宗錄旧臣後以父珣为黄陂尉历知龚磁汉等州致仕累转大中大夫珣为人慈恕而刚断平居与幼贱处惟恐有伤至犯义理不少假左右臧获无日不察其饥饱寒燠前後五得任子以均诸父之子孙所得禄分贍亲戚之贫者从女兄寡迎以归抚教其子均於诸子伯子以明道元年生年二十三居庠序如老成人比十五以父命偕弟颐稟学於濂溪周子慨然有求道之志泛滥於诸家出入於老释者几十年反求诸六经而後得之嘉佑二年举进士除鄆主簿多异政府境被水仓卒兴役诸邑皆狼狽独伯子所部不劳而事集已谓人曰吾之董役乃军法也当路将荐之问所欲伯子曰荐士当问才之所堪不当问所欲调江宁上元主簿值令缺摄邑事画法均税富人初多不便爲浮言既而莫敢不服盛夏堤决法由府稟漕乃後调役伯子曰必需命则苗

稿矣輒发民塞之岁则大熟邑当水运之冲旧为小营以处漕卒之病者然必请府始给食以故多死伯子白漕司预贮米以饲病卒全者大半尝言曰一命之士苟存心爱物於人必有所济迁晋城令民以事造县者必告以孝弟忠信度村乡远近为伍保使患难相恤而奸伪无所容孤茆残废者责之亲党使无失所行旅疾病皆有所养乡必有校暇则亲至召父老与语儿童所读书为正句读教者不善为易置乡民社会为立科条旌别善恶使有功有耻辨诉者或不持牒径至庭陈状从容告语率感服去河东义勇农隙演武多应文伯子至晋城之民遂为精兵常书视民如伤於座右曰吾常媿此熙宁二年八月吕公着荐为太子中允权监察御史里行神宗素知其名屡召见每退必曰频求对欲常相见一日从容咨访报正午始趋出中官曰御史不知上未食耶所进说甚多不饰词辨务以诚意感悟上心时王安石益向用伯子每见必言君道以至诚仁爱爲本未尝及功利尝极陈治道上曰此尧舜事朕何敢当伯子愀然曰陛下此言非苍生之福也上使推择人才荐数十人以父表弟张载及弟颐为首尝劝上防未萌之欲及勿轻天下士上俯躬曰当为卿戒之章疏屡上皆系教化之本论君道畧曰君道之大在於稽古正学君志先定而天下之治成矣所谓定志者一心诚意择善而固执之以圣人之训为必当从先王之治为必可法不为後世驳杂之政所牵制不为流俗因循之论所迁惑必期致世如三代之隆而後已也然患常生於忽微志亦惑乎渐习愿陛下礼命老成贤儒不必劳以职事俾日亲便座讲论道义又择贤俊使陪侍朝夕开陈善道则王猷允塞矣论修学校尊师儒取士畧曰古者一道德以同俗方今人执私见家为异说支离经训无复统一宜先礼命近侍贤儒及方岳之吏悉心推访凡有明先王之道德业充备者其次笃志好学材良行修者皆以名闻高蹈之士厚礼延聘余命州县敦遣萃於京师馆之寛闲之宇丰其廩饩恤其家之有无以大臣之贤典领其事俾羣儒朝夕讲明正学其道必本於人伦明乎物理其教自洒扫应对以往修其孝弟忠信周旋礼乐所以诱掖激励渐摩成就之道皆有节序其要在於择善修身至於化成天下自乡人而可至於圣人之道稍久则择其学业大明德义可尊者为太学之师次以分教天下之学始自藩府至於列郡择民之俊秀者入学皆优其廩给而蠲其身役大不率教者斥之渐又择其道业之成者使教於县之学异日则十室之乡皆当修其庠序为之立师县令岁与学之师推经明行修材能可任之士升於州学郡守又岁与学之师宾兴其士於太学太岁岁论其贤者能者於朝朝廷问之经以考其言试之职以观其材然後辨其等差而命之秩既一以仁义道德教养之又专以行实材学升进去其声律小碎糊名誉录一切无义理之弊不数年间靡然丕变岂惟得士浸广天下风俗将日入醇正王化之本也论十事畧曰古者自天子达於庶人必须师友今师傅之职不修友臣之义未着所以尊德乐道之风未成於天下天地四时之职历二帝三王未之或改今官秩淆乱职业废弛太平之治所以未至天生蒸民立之司牧必制其恒产今富者跨州县贫者流离饿殍生齿益繁而不为之制则衣食日蹙古者政教起於比闾族党州县鄴遂以相联属统治故民用亲睦刑法鲜犯此人情之自然行之则效者也庠序之教所以化成天下今师学废而道德不一乡射亡而礼义不兴贡士不本於乡里而行实不修秀民不养於学校而人材多废古者府史胥徒受禄公上而兵民未始判也今骄兵耗匱禁卫之外不渐归之农则将貽深虑府史胥徒之役毒遍天下不更其制则未免大患古者民有九年之食今耕者少食者衆地力不尽人功不勤虽富室强宗鲜有余积宜渐从古制均田务农公私交为储粟以为之备古者四民各有常职而农十居八九今京师浮民百万穷蹙辛苦日益岁滋久将若何此在酌古变今均多恤寡渐为之业以救之山虞泽衡古有常禁今用之无节取之不时惟修虞衡之职则有变通长久之势古者

冠婚丧祭车服器用等差分别莫敢僭踰今礼制未修奢靡相尚既无定分则奸诈攘夺求厌而後已此争乱之道也是时王安石执政纷更法令中外莫以为便伯子既屡言不用遂丐去被旨赴中书议安石厉色待之伯子徐曰天下事非一家私愿平气以聽安石为之媿屈先是安石改法言者多肆诋伯子独以至诚开纳故安石虽数逐不附已而心服伯子至是犹敬其忠信但出提点京西刑狱伯子疏辞有曰臣每论列惟知以忧国爱君为心不敢以扬已矜衆为事知人主不当自圣则未尝为谄谀之言知人臣义无私交则不忍为阿党之计明则陛下幽则鬼神臣之微诚实仰临照然徒有捧日之心曾微回天之力投诸荒陬实所甘分乃改金书镇宁军节度判官入辞上问所欲言伯子曰愿陛下勿轻用兵而已时鎮宁守疑伯子自台出必轻已不任事而伯子礼之恭事无大小罔敢不勤守乃大懼屢平反重狱赖以脱死者甚衆於是河决澶州曹村伯子驰告州帅刘涣曰曹村决京师可虞臣子之分身可塞亦为之盡以厢兵见付涣付之立走决所激谕士卒命善泅者衔细?渡决口因引大索以济衆两岸竝进数日而合五年父珣以抗议新法非便致仕归又值郊祀霈恩伯子曰吾罪涤矣遂求监局以养亲得监西京竹木务与弟颐从容趋庭读书讲学士大夫多从游者旋改太常丞六年置经义局修诗书周礼上欲召伯子安石不可八年冬十月乙未彗出轸伯子应诏论时政极切差知扶沟县事民之滨居蔡河者多不逞黠胁取行舟货岁必焚舟十数伯子捕一人使引其类皆贯宿恶不治分地处之令以挽繹为业且察为奸者自是焚剽遂絶常权谷价不使甚贵甚贱会旱教民掘井每一井可溉数亩邑人赖焉尝捕一盜聽自新已复为盗事发盜语妻曰吾与令约不复盜今何面目见之遂自縊也元丰二年召判武学为李定何正臣所劾犹以新法之初首为异议故也寻除奉议郎仍宰扶沟扶沟地卑方经画沟洫之法未及兴工坐盜逸狱罢伯子叹曰以扶沟之地尽为沟洫必数年乃成吾为经画十里之间开其端後人知其利必有继之者矣夫为令必使境内之民凶年饥岁免於死亡饱食逸居有礼义之训然後为尽故吾於扶沟兴设学校聚子弟教之亦几成而废岂非命哉去之日老稚攀号遣之不去遇赦以亲老复求监局得监汝州酒税改承议郎平居菽粟仅足而老幼各尽其懽中外孤弱无托者皆收养之嫁娶则先遗孤而後及己子当是时四方学者不远千里而至八年神宗崩伯子赴府成服韩宗师问朝廷事将如何曰司马君实吕晦叔作相矣宗师曰作相当如何曰当与元丰大臣同之若先分党与他日可忧宗师曰何忧曰元丰大臣皆嗜利者使自变其害民已甚之法则善矣不然衣冠之祸未艾也司马光吕公着果竝相召伯子为宗正寺丞以疾不行其年六月丁丑卒年五十四伯子德性充完外和内刚胷怀洞然终日乐易见善如出诸已不欲勿施於人接物辨而不间感而能通教人而人易从怒人而人不怨贤愚善恶咸得其心狡伪者献其诚暴慢者致其恭闻风者诚服覲德者心醉为政治恶以寬处烦而裕当法令繁密之际人皆病於拘碍而处之绰然虽在仓卒不动声色比葬文彦博题其墓曰明道先生盖自孟子之後一人而已宁宗时追諡曰纯理宗时封河南伯

吕大临曰先生负特立之才知大学之要躬行力究察伦明物涣然心释洞见道体遇事优为诚心恳恻其自任之重寧学圣人而未至不欲以一善成名寧以一物不被泽为己病不欲以一时之利为己功其自信之笃也吾志可行不苟洁其去就吾义可安虽小官有所不屑也

论曰昔龐士元蔣公琰临县不治论者谓非百里才逮观周程二子大用则可大效小用之辄亦小效以知委吏乘田莫非经济而龐蔣之学为已疏矣伯子居諫垣仅九閱月所上章疏引

义陈善酌古变今天德王道灿然明备有能举而措之者则周公其人也神庙既不行其道而纂经之命亦卒沮於安石遂使赞述之功不施於後然声教遗言粹然与六籍相表里其裨助道术亦孔彰已范祖禹云不迁怒不贰过惟伯淳能之岂不信哉

程叔子

程叔子名颐字正叔少伯子一岁年十八诣阙上书劝仁宗以王道为心生灵为念黜世俗之论期非常之功且乞召对不报因游太学见胡瑗瑗试诸生以顔子所好何学得叔子论大奇之处以学职嘉佑四年试进士报罢遂归不复试英宗朝尝代父珦上书陈治道一曰立志二曰责任三曰求贤恳切敷畅可举而行性疏通简易而庄重有体衣虽紬素冠襟必整食虽蔬俭蔬饭必洁父珦年老左右致养无违家事悉力营办细務必亲贍给内外亲族八十余口吕公着判太学雅知叔子延为太学正不至近臣屡荐自以学不足不愿仕也及哲宗立司马光及公着等荐之叔子曰将累人矣使韩富当国吾犹可以有行也有旨授西京国子监教授辞召为秘书省校书郎又辞论经筵三事且曰若言可行敢不就职如不可用愿聽其辞於是除通直郎充崇政殿说书再辞乃受既拜命即上言习与智长化与心成陛下春秋方富愿选名儒入侍讲讲罢入分直以备访问或有小失随事献规又言辅养主德非徒涉书史览古今已也要使跬步不离正人乃可涵育薰陶成就圣德今间日一讲解释数行为益既少又自四月罢讲直至中秋非古人旦夕承弼之意又言立讲之仪始於明肃太后昔王昭素讲易崔颐正讲尚书邢昺讲春秋皆於殿上坐讲此祖宗尊德重道之美万世所当法也方是时潞公文彦博年几九十矣每侍立终日上命之休不敢退或以谓叔子曰潞公甚恭而君至严何也叔子曰潞公三朝元老事幼主不可不恭颐起布衣为师傳敢不自重然彦博每叹叔子以为真侍讲也叔子尝言天下重任惟宰相与经筵天下治乱系宰相君德成就责经筵每当进讲必宿斋豫戒潜思存诚冀以感动上意所为说常於文义之外反覆推陈归於人主一日讲顔子不改其乐讲毕复言曰陋巷之士仁义在躬人主崇高苟不知学安能不为富贵所移且顔子王佐之才也而簞食瓢饮季氏鲁国之蠹也而富於周公鲁君用舍如此非後世之监乎闻者叹服五月差看详国子监条制请改试为课不复考定高下以销争竞成礼让建尊贤堂以延道德之士镌解额以去利诱省繁文以专委任励行检以厚风教凡十数事司马光大变熙丰之法叔子谓曰役法当讨论未可轻改也光不聽既而数年纷纷不能定先是讲官以禄薄例兼他职八月差判登闻鼓院叔子曰古以蒲芦喻教谓当以诚化也若营营於职事则临时进讲徒善词说而已辞不受在职累月不请俸诸公知之乃使户曹持给及冬至郊祀霈恩不为妻求封或问之曰颐起草莱被召再辞不获命顾为妻求封耶於是百官将表贺叔子以亮阴未除节序迁流思慕弥切请改贺为慰从之比除丧有司请张乐置宴叔子谓通丧虽阙犹当因事用乐今特置宴是喜之也乃辍乐叔子进讲色甚庄继以讽教闻上宫中漱而避蚁问有是乎上曰然诚恐伤之耳叔子曰此惻隐之心也推之可以及四海尝讲罢上起折柳进曰方春发生不可无故摧折所讲书有容字上藩邸嫌名也中人以黄覆之讲毕因曰人主之势不患不尊惟患臣下尊之过甚而骄心生耳请自今旧名嫌名勿复避其随事献益多此类於时人士从学者益衆而苏轼在翰林亦多附之者遂有洛党蜀党之论吕公着既相遇叔子厚多所咨访轼及弟辙疑叔子於人材有所进退益忌之会朝议以游酢为右正言辙乃沮之毁及叔子值上病疹累日不御迺英而宰相未之知也叔子身诣省质责之且曰上不御殿太后不当

独坐於是大臣入问疾而心亦不悦轼既恶叔子贾易朱光庭不能平合攻轼而胡宗愈顾临亦弹叔子谏议孔文仲素有伉直称然蠢不晓事为轼所给上疏极诋叔子叔子遂罢说书差同管勾西京国子监再辞以父忧归终丧三省奏除馆职辙又沮之乃除直秘阁仍判西监又再辞董敦逸摭其有怨望语改左通直郎管勾嵩山崇福宫未拜绍圣元年申秘阁西监之命又再辞四年党祸起放归顷之哲宗为辅臣言颐在经筵多不逊言者承风论之遂削籍窜涪州河南尹李清臣即日迫遣欲入别叔母不聽既行谢良佐曰是行也良佐知之乃族子公孙与邢恕之为耳叔子曰族子至愚不足责邢恕故人情厚不敢疑孟氏既知天安用尤臧氏道出汉江中流遭一船几覆同舟尽惊号叔子正襟危坐无怖色有父老问曰独无怖何也叔子曰心存诚敬耳父老曰心存诚敬曷若无心叔子欲与语不顾而去徽宗即位移峡州被赦复宣德郎任便居住叔子在涪州讲学不辍至归气貌髭髮皆胜平昔门人问之叔子曰学之力也夫学者学处患难耳富贵荣达不须学也复以通直郎权判西监受命即谒告既而供职尹焞疑之叔子曰上初即位首被大恩不可以虚德意吾之不能仕亦已决矣受俸一月乃行吾志耳建中靖国二年追所复官依旧致仕崇宁二年蔡京执政诏追出身以来文字及所着书范致虚又请逐其学徒叔子乃迁居龙门之南止四方学者曰尊所闻行所知可矣不必及吾门也叔子受气甚薄三十浸盛四五十而後完至是年七十余筋骨无损尝自述以告张绎绎曰先生岂以受气薄而厚为保生耶叔子曰吾以忘生徇欲为深耻五年正月彗出西方太白昼见始弛党禁复宣议郎致仕大观元年九月卒年七十五叔子之学要本於诚以四子为标的而达於六经动止语默一以圣人为师卒得孔孟不传之统为诸儒宗出其门者最多归自涪时易传已成犹逐旋修改未尝以示人或以为请曰自揣精力未衰尚觐有少进耳有问难及之则取篋身自发示又着春秋未成中庸成而失传初偕兄伯子稟学於周子周子手太极图授之二程子之讲学论道渊源盖出於此伯子尝言正叔平生不读庄列非礼弗动弗视出於天与又曰异日能使人尊严师道者吾弟也至接引後学随才而成就之则予不得而让焉学者称为伊川先生理宗朝赐諡曰正追封伊阳伯

胡安国曰程氏之文於易则因理以明象而知体用之一源於春秋则见诸行事而知圣人之大用於诸经语孟则发其微指而知求仁之方入德之序其行已接物则忠诚动於州里事亲从兄则孝弟显於家庭辞受取舍非其道义则一介不以取与诸人虽禄之千锺不顾也

论曰二程之道中正明粹若合符节使及孔氏之门则顔孟之侣冉闵而下殆不及也父珣知汉州时二子同入僧寺伯子入而右羣从皆右叔子入而左返顾无後从者至堂曰此某不及家兄处也故朱子曰明道德性寬大规模广濶伊川气质刚方文理密察其道虽同而造德各异呜呼先哲深微之致非知德者孰能识之昔顔孟潜见不同横渠论之至当当元丰以前叔子不仕岂以伯子在朝有顔潜之意耶

吕大临

吕大临字与叔其先汲郡人自祖以下葬蓝田故为京兆人始与兄大钧同事横渠张子大钧字和叔为横渠同年友心悦其学遂宾宾执弟子礼横渠之学以诚明为本以礼乐为行他弟子徒诵其言独大钧若蹈大路日用朝夕依以为轨辙治父丧自始死至葬祭一仿古仪所得

为者已复推之冠昏饮酒相见庆吊之事节文彬彬关中化之又尝讲井田兵制撰为图籍若可施行其尊信横渠如此大临亦宗横渠之学横渠卒乃东见二程其学博涉羣书妙达义理而如不出诸口其行以圣贤为法爱民利物而若无能者其文如万马千兵饱满伉壮几於古人而薄而不为虽盛暑燕闲必俨然危坐每欲掇拾三代遗文旧制令可行不为空言以门廕入仕不应举或问其故曰不敢掩祖宗之德元佑中除太学博士祕书省正字尝论选举曰古之育才以多为乐今之选举以多为患古以礼聘士常恐其不至今以法待士常恐其竞进夫为国之要不过得人以治事如为治必欲得人惟恐才之不足何患於多如治事皆任其责惟恐士之不至何患於竞今取人而用不择所任任人以事不问所堪故入流之路不胜其多而为官择士则常患乏才待次之吏历岁不调而考其职事则常患不治惟立士规以养德厉行更学制以量才进艺定试法以甄贤别否修辟法以兴能备用严举法以核实得人制考法以责任考功庶几渐可复古及富弼致政居家颇好佛学大临与书曰古者三公无职事内则论道於朝外则主教於乡必将以斯道觉斯民岂以爵位进退体力盛衰为之变哉今大道未明人趋异学此老成大人惻隐存心之时若移精变气务求长年乃山谷避世者所好非所望於公也弼谢之其後范祖禹以大临修身力学宜备讲官荐之未及用卒初大钧为人刚正於所灼信身遂行之不复疑畏识者方之季路而大临婿於张戢戢喜曰吾得顔回为婿矣二人涵养之浅深畧可想见故伊川称曰和叔任道风力甚劲至深潜缜密则不如与叔其见重如此

论曰铨法之弊久矣旋用而旋退当其用时未尝为官择才量才授官则其退也必有以用违其才而横受其辜者已昔臯陶安於理官后稷自谓便人彼皆圣贤之侣用犹各有所宜况中材乎故知资格年劳之循乃汉晋之弊法爲政之道育才要矣审官急焉若用大临之论以与明道学校取士之制相备庶几作人之化兴而唐虞官人之盛可复覩矣

朱光庭

朱光庭字公掞河南偃师人嘉佑二年登进士第调万年主簿数假邑事人称明镜文彦博举应制科会仁宗登遐罢试丁内外艰服除为修武令邑有牧地民久侵冒为税籍朝廷遣使按亩加程总四万余石光庭争之得减万余石改垣曲令他邑敛青苗钱类以严取办光庭不答一人而输以时足枢臣荐对神宗问中外何所闻对曰陛下即位以来更张法度臣下行之或非圣意故有不便诚能去其不便则天下均被福矣吕大防守长安辟金书判官朝廷伐西夏五路出师雍为都会事多倚以办调发有非朝廷意而急於期会者光庭执不从神宗崩命勾当山陵事洛人不知有大役司马光荐召为左正言首以辨大臣忠邪为言又请天子燕闲与儒臣讲习罢提举常平官不散青苗钱广储蓄备水旱太学置明师以养人才论奏无虚日多所荐达人无知者迁左司谏论急务十事河北饥遣往賑济多所全活拜右谏议大夫请召讲官便殿访以治道是岁旱论救灾十事迁给事中有诏幸後苑赏花燕羣臣会春寒请罢燕以祗天戒其夏日食上疏论修德应变乞戒诸州讞狱毋得为疑似之言以论事求外补除集贤殿修撰知亳州数月复召为给事中刘摯罢相守郛光庭封还麻制坐落职复知亳州改知潞州迁集贤院学士绍圣元年以疾卒年五十八光庭天性纯孝居父丧庐墓侧三年修身治家居官立朝一以至诚守毫及潞賑饥恤灾民怀其德尝从孙复授春秋受学於胡瑗告以忠信为学之本光庭终身力行之後又从二程子游知大学为入德之方服膺践行造次不忘初见

明道於汝州踰月归语人曰光庭在春风中坐一月矣伊川称其笃学力行至於没齿志不渝于金石行可质于神明蹇蹇王臣之节凛凛循吏之风着见事为皆可记述云

论曰程门称游杨谢吕四先生顾自绍圣以前半采议论炳着朝端者则光庭为最着方其坐春风中恂恂然粥粥然涵养克治惟恐有未遑也及其立朝涖官直节劲气抚民育物卓卓表见如此非有得于学而能然乎

吕希哲

吕希哲字原明申公公着之长子也公着简重寡默而申国夫人性严有法度希哲甫十岁每侍立终日不命之坐不敢坐日必冠带以见长者虽盛暑毋得辄去巾幘缚袴市井之语郑卫之音未尝一经於耳不正之书非礼之色未尝一接於目又延焦千之以教之千之方正严毅诸生少有过辄端坐召与相对终日竟夕不与语既悔乃畧降词色以故希哲德器成就迥絶恒流希哲尝言人生内无贤父兄外无贤师友而能有成者寡矣比长以恩补官事胡瑗於太学因遍从孙复石介王安石游安石谓之曰士事科举者为贫也有官矣而犹事科举是侥幸利达学者不由也希哲遽弃科举之业及伊川至太学与隣斋希哲少伊川仅一二岁然察伊川学问渊源非常人比首以师礼事之由是复得游於明道横渠诸贤间知见益广希哲之学大抵以知言为先自得为本躬行为实不尚虚言不为异行其读书平直简要不主一门及安石纷更庶政愎谏自信动失衆心希哲虽与有旧不为苟同安石欲用子雱侍讲殿中以希哲亦大臣子欲先引之以为例希哲固辞至元佑中乃除兵部员外郎充崇政殿说书日夕劝上以修身为本久之迁谏官方抗辞而苏轼戏谓曰法筵龙象当观第一义希哲笑不荅已谓范祖禹曰若辞不获命必以杨畏为首时畏在言路方以险诈厚於轼故希哲及之由是始听其辞绍圣初出知太平州坐党谪居和州徽宗立复官知单州召为光禄少卿直秘阁又出知曹州寻夺职又知相州邢州奉祠希哲性至乐易然未尝假人顔色悦人以私宦京师时不谒台谏遇迁转即一见执政外此不见也每述其从父舜徒事云从父守会稽或咎以不求知者荅云勤於职事其他不敢不慎乃所以求知也晚居宿州真扬间十余年静坐一室不问家计衣食不给或至数日絶粮而处之宴如尝言孝子於父母事必躬亲不可委诸臧获谷梁云天子亲耕以供粢盛王后亲蚕以供祭服国非无良农工女也以为人之所尽事其祖祢不如以已所自亲此说最尽事亲之道又言初学当理会气象词令容止轻重疾徐之间不惟君子小人於此分亦贵贱寿夭所由定又言攻其恶无攻人恶日夜点检丝毫不尽即不慊於心矣何暇点检他人耶日必读易一爻遍考诸儒之说默坐沈思随事解释夜则与子孙评论古今商榷得失久之方罢与仙源为夫妇六十年未尝一日有面赤自少至老虽衽席之上未尝戏笑政和中卒年七十八

论曰自小学废士之失其德基也久矣希哲平生不欺闇室推厥成就则自少小时德性固已坚定而复观摩於有道师友间故所学所守一出於正人亦孰不爱其子而或狃於岁月之富则教常不豫或挠於姑息之私则教复不严其在贵胄患又倍之根之不培枝於何达人材衰息职此之由若公着者岂独有家之法为政者推此以誉髦斯士可也

史传三编卷四

卷五

<史部,传记类,总录之属,史传三编

钦定四库全书

史传三编卷五

大学士朱轼撰

名儒传五

宋

谢良佐

谢良佐字显道寿春上蔡人始务记问为该博及见明道举史书不遗一字明道警之曰可谓玩物丧志良佐闻语汗浹背面发赤明道乃曰即此是惻隐之心一日复谓之曰君辈相从祇学颡言语故心口不相应盍行诸请问焉曰且静坐良佐质虽少鲁然志学极笃事有未彻其顙有泚愤悱如此既成进士又事伊川尝别一年复至伊川问所进曰但去得一矜字尔伊川喜适朱光庭来谒伊川指谓光庭曰此人为切问近思之学及归尹焞送之问曰何以教我良佐曰吾徒朝夕从先生见行则学闻言则识譬人有服乌头者方其服也顔色悦泽筋力强盛一旦乌头力去将如之何焞归以告伊川伊川曰可谓良友矣良佐之学强力不倦旧苦多惧即习於危阶日作课簿记其言动视聽得礼与非礼者以自程督与游酢吕大临杨时同在程门号四先生而良佐所见最为超越初授秦州教授其帅吕大忠每枉车骑过之良佐为讲论语大忠必正襟肃容曰圣人言行在焉吾不敢不肃迁应城令立信以示之始至事烦信既立其事顿简是时胡安国以典学使者过之不敢问以职事顾因介绍以弟子礼见入门见吏士植立庭中如木偶人肃然起敬遂稟学焉建中间除书局官不谒执政或劝之对曰彼安能陶铸我自有命在初良佐未及第时梦入内庭不见上惟太子涕泣及释褐神宗晏驾哲宗嗣立每举以告学者曰万事有命非人力所计较必能信命方能养气不复挫折故良佐平生未尝干人其後召对忤旨出监西京竹木塲坐口语系诏狱废为民在西京时朱震自太学往谒坐定震请益良佐曰当为君讲一部论语震私念日晷几何何由得具讲说酒五行良佐掀髯曰聽讲论语乃举子见齐衰及师冕见二章曰圣人之道无微显无内外由洒扫应对进退而上达天德本末一以贯之一部论语皆以此意求及褫职归谓学者曰学既透得名利关尚当穷理方可望入圣域否则万难见道吾蚤亲有道复为克己之学遂於世味若存若亡比经忧患仕意益薄矣良佐为人高迈卓絶言论宏肆善开发人所着有论语说及门人所记语録其以生意论仁以实理论诚以常惺惺论敬以求是论穷理命意皆极精当至直指穷理居敬为入德之门则尤得明道教人纲领其语録则朱子少时为学实赖是编以发其趣故尝手为厘订

云

论曰良佐之没游酢实志其墓当朱子时其文蚤已失之故事蹟不具夫矜者气盈阳盈则愆阴盈则伏虽天地犹病之而况於人乎是故矜财贿者为市道矜禄位者为鄙夫矜功名者为伯术矜学识者为华儒至若顔子之视有若无唐虞之浮云太虚则何矜之与有伊川以良佐为近思而明道谓其足任展拓者以此

游酢

游酢字定夫建阳人与兄醇俱以文行知名所交皆天下士伊川遇之京师谓其资可适道及明道知扶沟方以倡兴道学为己任设庠序聚邑人子教之乃召酢俾职学事酢欣然从之得其微言遂尽弃其学而学焉元丰六年第进士调越州萧山尉县有疑狱十余年莫能决酢摄邑事一问得其情释之虽明习吏事者不能逮也用侍臣荐召为太学録除博士以奉亲不便就拟知河清县范纯仁判河清待以国士纯仁移守颍昌辟为府教授纯仁再相除为太学博士纯仁罢酢亦丐外授齐州判官丁父忧阙调泉州签判徽宗立召为监察御史出知和州岁余管勾南京鸿庆宫久之知汉阳军以母老丐祠提点成都府长生观丁母忧阙知舒州移濠州罢归侨历阳因家焉酢自幼不羣读书一过辄成诵比壮益自力心专目到仪容词令粲然有文望而知为成德君子也其事亲无违交友有信莅官遇僚吏有恩人乐自尽时新法方行编民困於征歛所在骚然酢历知州军处之裕如即有兴建民若不知而事集故戴之若父母去则见思伊川尝谓杨时曰游君德器粹然问学日进政事亦絶人远甚其见重如此宣和五年卒年七十一謚文肃学者称广平先生所着有易说诗二南义论语孟子杂解中庸义及文集十卷

论曰游杨皆始事明道继事伊川独能得其宗其立雪事学士尤所艶称盖事之之严如此纯仁为一时善类宗主而尤惓惓於酢岂虚哉纯仁既不卒於用酢犹浮沈州县之间有若不屑去者夫存心爱物补苴时弊以为民赐是程邵之教也及後朱子兴论酢清德重望皎如日星流风余韵足以师世范俗云

杨时

杨时字中立先弘农人五世祖避地入闽始家将乐时资稟甚异八岁能文丁母艰哀毁如成人继母尤谨熙宁九年第进士调汀州司户参军不赴以师礼见程明道於颍昌明道称之其归也目送之曰吾道南矣明道卒时设位哭寝门年四十事伊川一日伊川瞑坐时与游酢侍立不去伊川觉则门外雪深一尺矣归杜门种学淳涵浸尝曰六经之义验之於心而然施之行事而顺然後为得若工无用之文徼幸科第果何益哉初明道为人温然纯粹无疾言遽色时遽似之故及二程之门者明道最爱时伊川最爱酢其气象实相类云调徐州司法丁继母忧阙改虔州谿疑立断议事守正不阿丁外艰阙迁瀛州防御推官知浏阳县厚见宾礼於安抚张舜民漕使胡师文恶之诬以他事坐冲替舜民入长谏垣荐之除荆南教授知余杭县转南京宗子博士出知萧山县所至有惠政既去而民思之不求闻达而德望日重四方之

士不远千里从之游号曰龟山先生久之提点均州明道观成都国宁观例罢差监常州市易务而时年已七十矣是时蔡京当国天下多故京知事必败稍欲引用老成会路允迪使高丽还言国主问龟山先生安在乃召为秘书郎到阙迁著作郎入对首言自熙丰元佑分为二党缙绅之祸至今未艾愿诏有司条具祖宗之法有宜於今者举而行之当损益者损益之元佑熙丰姑置勿问又乞警戒无虞为宣和会计録以周知天下财物出入之数徽宗首肯之除迓英殿说书於是方图燕云虚内事外时乃陈时弊十余事且言燕云之师宜退守内地以省转输募边民为弓弩手以杀常胜军之势虑都城四达无高山巨浸为阻卫士人怀异心缓急不可倚仗执政不能用其为国远虑类此及金兵南下时益謦謦输忠上言今日事势如积薪已然当奋励以竦观聽若示以怯懦则事去矣请罢免夫之役及京城聚斂东南花?之害以收人心已而钦宗受禅金人日迫勤王之师四集大臣方以推恩晋秩争议行幸莫念军计时请立帅以统援师引唐九节度之败以为鉴又言上皇禅位而宰执叙迁此何理也主辱臣死而争为窜亡之计陛下何赖焉童贯为三路总帅弃军不问故梁方平何灌皆相继遁宜以军法从事贯以阉悞国今防城犹用阉人覆车之辙不可复蹈钦宗大悦擢右谏议大夫至金人约和邀割三鎮以去时复言河朔为国家重地三鎮为河朔要藩一旦弃之是敌以二十州之地贯吾腹中非经远之谋且使勤王之师无功而去厚赐之则无名不与则生怨闻三鎮之民以死拒守若遣兵蹙之使腹背受敌宜有功乞召种师道问方畧疏上钦宗下诏出师时又疏曰金人尚驻磁相破大名又挟肃王以往誓墨未乾背不旋踵吾欲专守和议岂可得乎夫越数千里造人国都危道也彼见援兵四集亦惧而归初非爱我而割与三鎮是助寇自攻也臣谓宜以肃王为问责其败盟李纲之罢太学生伏阙上书军民集者数万钦宗患之召问时时言诸生忠於朝廷尔非有他意但择老成有行谊者为之长即定矣钦宗曰无以逾卿即命兼祭酒於是雪王珪被诬之冤以直宣仁皇后之谤推蔡京蠹国之祸以摘王安石学术之非有旨改修宣仁谤史而黜安石从祀初时浮沈於州县者四十七年及老居谏垣仅九十日其所论列皆切於世道如此谏官冯澥素守王氏学乃劾时罢祭酒时求去除给事中请益力遂以徽猷阁直学士提举嵩山崇福宫又辞职名改待制高宗即位除工部侍郎兼侍讲召赴行在至则劝上典学纳谏及修建炎会计録加恤勤王之兵连章丐外以龙图阁直学士提举洞霄宫未几告老绍兴五年卒年八十三諡文靖时仁厚寛大能容物蔬粝脆甘皆可於口未尝有所嗜狐貉縕袍皆适於体未尝有所择闲居和乐可亲临事不动声气在东郡时先达陈瓘邹浩皆以师礼事之凡绍兴初崇尚元佑学术而朱子张栻之学得程氏之正其源皆出於时子迪力学通经亦尝事伊川云论曰名贤之泽岂不远哉闽僻在峤外道术之兴自龟山始当南宋时河洛关陇之间学者寥寥而闽士相踵起推其流派之所自洪固知朱子之为功大然後海先河则龟山之泽也方今朱子传注立於学宫家习户诵凡天下人心之所以正风俗之所以醇悉由於是以是知明道道南之指其於斯文运数昭昭乎其先见之矣

尹焞

尹焞字彦明一字德充世为洛人初仲宣七子而二子有名源字子渐是谓河内先生洙字师鲁是谓河南先生源生林林生焞焞少孤奉母陈氏以居年二十事伊川尝应举发策有洙元佑诸臣议焞不对而去告伊川曰焞不复应进士举矣伊川曰子有母在焞归告其母母曰吾知汝以善养不知汝以禄养伊川闻之曰贤哉母也自是终身不就举焞性钝其从伊川与张

绎同时绎高识而焯笃行伊川问焯度与绎孰愈焯曰绎颖悟疏通往往造妙至他时持守恐不及焯伊川然之大观中党祸方兴焯遂不欲仕而德益成同门之士尊畏之伊川尝喜晚得二子谓焯绎也又曰我死而不失其正者尹氏子也伊川没焯聚徒洛中非吊丧问疾不出户靖康初种师道荐之召至京师不欲留赐号和靖处士遣归吕好问胡安国等言焯学穷根本德备中和请加识擢不报次年金人入洛焯阖门被害焯死复苏门人舁致山谷中以免刘豫僭伪位聘之不从以兵恐之乃自商州走蜀至阆得伊川易传拜而受之止於涪涪伊川读易处也辟三畏六有二斋居之涪人罕识其面焯为人端正仁实不过於心不欺室其於六经玩味以索之践履以身之涵养以成之至於下学上达无赘无外所读书耳顺心得如诵已言天下知道者宗之绍兴四年侍读范冲举焯自代授左宣教郎充崇正殿说书辞是时高宗渡江弛元佑学术之禁始召杨时寅从班胡安国居给舍范冲朱震在讲席诸公荐焯甚力六年给焯行资遣漕臣奉诏迎之焯始就道至九江闻陈公辅攻毁程学上奏曰臣事颐垂二十年学之既专自信甚笃使臣滥列经筵所敷绎不过闻於师者舍其所学是欺君父遂留不进有诏守臣津送至国门复辞上曰焯可谓恬退矣以秘书郎兼说书趣起之入见又辞上曰朕渴卿久矣知卿之从伊川也当从卿讲学不敢以有他乃就职八年迁少监未几求去上曰焯老成人所学渊源足为矜式除直徽猷阁仍说书资善堂翊善朱震疾亟举焯自代上以焯微瞶艰於教胄乃转太常少卿仍说书顷之以疾在告除权礼部侍郎兼侍讲时秦桧当国主和金使来焯疏谏曰前年徽宗皇帝宁德皇后崩问遽来莫究不豫之状天下之人痛心疾首礼曰父母之讐不共戴天兄弟之讐不反兵陛下信讐敌之谗诈觐其肯和以纾目前之急岂不共戴不反兵之义乎又书抵桧曰和议若成彼日益张我日益怠侵寻腴削天下有改革之忧且主上降志辱身有年矣未闻金人悔祸还二帝於沙漠继以梓宫崩问不详金人笼络之计不言可见今之上策莫如自治自治之要内则进君子而退小人外则赏当功而罚当罪使主上孝弟通於神明道德成於安疆勿以小智子义而量大功不胜幸甚疏及书皆不报於是固辞新命九年转徽猷阁待制又辞且奏臣有五当去无一可留乞放归田里先是桧见焯书疏不乐至是遂不复留以焯提举江州太平观十年请老转一官致仕初伊川教人以敬为本焯请益伊川曰主一则是敬焯受教持守深纯尝问於伊川曰焯谓动静一理伊川使喻之适闻钟声曰譬如钟未撞时声固在也伊川喜比老犹手录圣贤治气养心之要揭之壁间以自警十二年卒年七十二尝言经以诵说而传亦以讲解而陋训经而务新奇则无所不至矣有论语解及门人问答传於世

论曰圣门之闻一贯者赐以敏参以鲁而赐终不及参然则鲁固胜乎易大畜曰刚健笃实辉光日新其德匪畜不崇匪实不畜鲁之质近实故古之为学修德者尚之焯之笃守师法进礼退义所造虽未及曾子要亦以鲁得之张绎不幸早世使天假之年庶几与闻性道之要然而尹子渊确矣

张绎

张绎字思叔河南寿安人家微贱年长未知读书为人佣作一日见县官出入传呼道路颇羡慕之问人何以得如此曰读书所致耳绎始发愤从人受学执劳苦之役遂能文入县府学被荐而自悟科举之学不足为也见僧道楷悦其道有祝髮从之之意时周行己官雒中谓之曰

子它日程先生归可从之学无为空祝髮也及伊川归自涪陵绎始得见年已三十矣时从学者甚衆绎颖悟疏通伊川甚许可以族女妻之尝曰吾晚得二士盖指绎与尹焞也绎读孟子志士不忘在沟壑二句有自得处时请问或太高伊川不荅良久曰累高必自下又言邹浩以极谏得罪世疑其卖直也伊川曰君子之於人也当于有过中求无过不可于无过中求有过尝诟仆夫伊川曰何不动心忍性绎惭谢初以文闻于乡曲後作文字甚少伊川每云张绎朴茂其作座右铭曰凡语必忠信凡行必笃敬饮食必慎节字画必楷正容貌必端庄衣冠必肃整步履必安详居处必正静作事必谋始出言必顾行常德必固持然诺必重应见善如己出见恶如己病凡此十四者我皆未深省书此当座隅朝夕视为警其笃志自励如此伊川没未几绎亦没尹焞被召尝曰思叔若在自当召用必能有为于世也

论曰绎初见传呼者而羡慕是志在富贵也见禅门而愿从是未能不惑于异学也乃一见伊川之後穷理造微遂为程门高弟考其生平得力在孟子志士不忘在沟壑之语感而发奋则立志之功大矣

马伸

马伸字时中东平人也自弱冠登第不乐驰骛以阶进晦迹州县人无知者崇宁初元佑学有禁伊川为奸人所攻朝廷下河南府尽逐学徒伸方自吏部求为西京司法曹事至则因张绎以求见初以非其时恐貽累辞之伸执贄凡十反愈恭欲先弃官而来且曰使伸得闻道虽死无憾自尔出入凡三年公暇虽风雨必日一造焉同僚相忌至以飞语中伤之不顾也靖康初枢密孙傅以卓行荐于朝召至中丞秦桧素高其节即迎辟为监察御史令人取其状伸曰中丞取台官但问堪不堪无问愿不愿靖康之变金人立张邦昌为帝敌去滋久邦昌恬无退避意时人皆意邦昌实预邪谋畏祸无敢言者伸首具书请邦昌迎元帅康王书成率同院签与俱往相顾无一首肯伸遂以书自抵银台司进之吏视书不称臣辞不受伸投袂叱曰逆类吾今日不爱一死正为此耳出即以缴申尚书省邦昌见书气沮恐败诛乃议迎隆佑皇后为垂帘计高宗即位伸屡拜章以城陷不能救主迁不能死请从窜削帝知其忠且有功于国遂擢为殿中侍御史荆湖广南抚谕以诛邦昌及其党王时雍还台言执政黄潜善汪伯彦不法十七事不报复上章以臣言可采即乞施行非是臣合坐诬罔大臣之罪移病待命旬日贬濮州监酒税时用事者恚甚以濮迫金境必欲寘之死地伸襆被就道无忧惧色卒陷于死绍兴初追赠谏议大夫居常晨兴必整衣冠端坐读中庸一过然後出视事自言曰吾志在行道使吾以富贵为心则为富贵所累使吾以妻子为念则为妻子所累又曰志士不忘在沟壑勇士不忘丧其元今日何时沟壑乃吾死所也故其临事每奋不顾身云论曰伸之受学程门乃在崇宁禁学之後执贄十反稟学三年非其志素定中大有得者能之乎及为御史以正论忤邦昌而宗室返正劾汪黄不法十七事而公论以伸惜其竟以此而获祸也夫南渡以後宋室转移之机全在汪黄之斥与用使汪黄果斥则内相李纲外任宗泽宋之兴也决焉伸以朝闻夕死而无恨道义所发抗节输忠陷九死而不悔所由与孔光张禹异矣

胡安国

胡安国字康侯崇安人始游太学同舍靳裁之得程氏学安国从之讲论既又与杨时游酢谢良佐诸贤游以故闻伊洛之正绍圣四年成进士试策第一宰臣降其等是时章惇柄政发策欲崇熙丰而安国所对无诋元佑语故黜及哲宗谛聽称善乃亲擢第三调常州判官改江宁推官未赴荆门帅奏为荆门教授迁太学録丐外除提举湖北学事改湖南所至访求人材咨询利病刺举必由公论会举遗逸安国以王绘邓璋应诏或言二人范纯仁客而邹浩所请托也蔡京故恶安国异已不为用闻之大喜遂命湖南北提刑置狱推治卒无验而安国竟坐除名安国之使湖北杨时方为府教授谢良佐为应城宰安国於此二人者质疑访道礼之甚恭每二人来谒辞去安国必端笏正立目送之及罢官杨时为具朝饌蔬炙萧然引觴徐酌清坐讲论不知日之既暮顷之台臣为直前事复其官政和元年除提举成都学事以亲老辞丁内艰阍召至京以疾丐归宣和元年除提举江东学事未受命而父卒终丧怆然谓子弟曰今虽有禄万鍾将何以为遂称疾挂冠筑室莹旁勤耕取给泊如也宣和末除屯田郎靖康元年除太常少卿起居郎皆不就有旨趣至京以疾在告一日召见奏曰明君以务学为急圣学以正心为要愿擢名儒明於治平之本者虚怀访问又言纪纲尚紊风俗益衰大臣争竞而朋党生百执窥觐而浸润作用人失当而名器愈轻出令数更而士民不信若不扫除更张大势一倾不可复正上纳之中丞许翰登对上问识安国否翰曰自蔡京得政士大夫超然远迹不为所污者惟安国一人上为之叹息除中书舍人赐三品服时耿南仲倚攀附恩方用事闻安国语恶之谗於上不聽则讽台谏论之疏又不下於是安国始就职中书侍郎何栗议分天下为四道各置都总管以卫王室扞强敌安国以为内外之势适平则安偏重则危今州郡太轻固宜通变然遽以数百州分为四道则权复太重万一抗衡跋扈号召不至何以待之是时栗方得上心又於安国有推挽之力见异议骇曰人言山林之士不可用信然然犹分四道如初策惟稍割其旁县而已是冬金人大入北道赵野遁去为盜所杀及围京师西道王襄拥衆不救卒败国如安国言李纲之罢刘珣行词谓纲勇於报国冯澥劾之珣坐贬安国封还词头且言陛下欲复祖宗善政而澥言祖宗未必全是熙宁未必全非陰崇王氏之学再挟绍述之议於是南仲大怒栗从而挤之安国遂出知通州安国在省甫一月多在告每出必有所论列或劝以事小姑置之安国曰事莫不起於细微今以小事不必言至大事又不敢言是无时可言也安国既去逾旬金人薄都城上亟召还不及从子寅在围城中或以为言安国愀然曰主上至此人臣効忠无路敢念子乎高宗即位召为给事中为黄潜善所沮罢去建炎三年张浚言安国可大用再除给事中安国将行先移书宰相曰朝廷欲理兵以强国而官吏不知恤民以养兵是欲稼之长而涸其水欲木之茂而去其根也行次池州闻上走吴越引疾还绍兴元年除中书舍人兼侍讲再辞不许入见献时政论二十一篇复除给事中上知安国深於春秋出左氏传命点正音读安国言春秋经世大典陛下必欲削平僭叛使乱贼不得作莫若储心圣经左氏繁碎不宜虚费光陰上称善除兼侍读专以春秋进讲初秦桧为密州教授游酢过密奇其才尝以语安国及京城破金人欲立张邦昌桧独抗议安国闻益义之後桧归与闻国政安国与之善是时吕颐浩自都督江上还欲倾桧未知所出或曰目为朋党可矣党魁在锁闥当先去之适朝议以朱胜非代颐浩为都督安国以为不可乃改胜非侍读安国又言朝廷以胜非处苗刘之变为能调护圣躬昔公羊氏以祭仲废君为行权先儒力排其说盖权宜废置非所施於君父臣以春秋入侍不能与为列遂卧不出颐浩从而排之安国遂落职是夕彗出东南桧三上章乞留安国不报諫官江跻等亦以为言颐浩尽去跻等二十余人以应天变而桧亦解印去台省一空安国天资杰出恬静简默见善必为为必要其成知恶必去去必絶其根

辞受取舍必度於义燕闲独处未尝释卷每晨昏子弟定省必问所业与意合则曰士当志於圣人勿临深以为高或怠慢必蹙额曰流光可惜毋为小人之归既去国乃渡南江休于衡岳买地结庐为终焉计平居食无兼味而奉先必丰家虽困不以告人尝诫子弟曰对人言贫意将何求有来学者随资性而接之大抵以立志为先忠信为本每日君子爱人不以姑息故未尝以词色假借於人四年春秋传成自王安石诋春秋为断烂朝报废不列於学宫崇宁间防禁益甚安国谓六籍惟此篇出自圣手乃厉学湛思采拾辨正準之以语孟衡之以五经证之以历代之史研玩沈酣者三十年及得伊川所作传其间精义若合符节者十余事益用自信至是书就叹曰此传心要典也盖於克己修德之方尊君父讨乱贼存天理正人心之术未尝不屡书而致详焉书奏御上嘉之五年除知永州辞有顷除兼侍读未行闻陈公辅乞禁程颐学上奏曰孔孟之道不传久矣自颐兄弟始发明之今使学者师孔孟而禁不得从颐学是入室而不由户也自嘉佑来邵雍张载程颢及颐皆以道德名世值王安石蔡京等曲加排抑其道不行望下礼官议加封爵载在祀典仍哀其遗书校正颁行使邪说者不得作奏入公辅等交章论之复除知永州辞久之上念训经纳谏之忠进宝文阁直学士八年卒年八十五謚文定安国性本刚急比老风度凝远气貌雍穆即在疾病必饬於礼每慕诸葛亮韩琦之为人遭中原沦没遗黎涂炭常若痛切於其身虽数以罪去其爱君忧国之心远而弥笃闻有君命即通夕不寐思所以告君者入仕四十年实历不及六载朱震被召问出处之宜安国曰讲学论政则当谏究至於行已大致去就语默之几如人饮食饥饱寒温必自斟酌不可决於人亦非人所决也故渡江以来儒者出处合义必以尹焞及安国为称首侯仲良言称二程他无所许可及见安国叹曰始吾以视不义富贵真如浮云者二程先生而已不意复有斯人也谢良佐亦语人曰康侯如大冬严雪百草萎死而松柏苍然独秀所着尚有通监举要补遗及文集行於世

论曰仲尼作春秋於人心冥昧之时二程绍统绪於正学灭息之後皆斯道絕续之大机也王安石自负为名世臯夔而不知二程欲行周礼而反废春秋宜其兆乱当时貽诟後代安国独慨然味人之所不味表章春秋上资啓沃又能抗正议为二程扶卫其功甚伟昔夫子称刚毅近仁若安国近之矣

罗从彦

罗从彦字仲素先世自豫章徙劔浦从彦自幼即不为言语文字之学及长严毅清苦刻志求道闻杨时得程氏之传慨然慕之及时令萧山徒步往从焉初见三日惊汗浹背曰不至是几枉此生时亦喜谓可与言道於是日益亲他弟子无及从彦者尝讲易至某爻时曰伊川说甚善从彦即鬻田走洛见伊川问之归复事时时告之曰读书之法以身体之以心验之从容默会於幽闲静一之中超然自得於书言象意之表又曰学而不闻道犹不学也从彦受命益自力凡事时二十余载时壻陈渊每造从彦必竟日乃返谓人曰自交仲素日闻所未闻奥学清节南州冠冕也既而筑室山中絕意仕进终日端坐充然自得朱松李侗尽执弟子礼从之游尝采祖宗故事为遵尧録靖康中将献阙下会国难不果从彦之论治曰祖宗法度不可废德泽不可恃废法度则变乱之事起恃德泽则骄佚之心生又曰君子在朝则治小人在朝则乱盖君子常有乱世之言使人主多忧忧则善心生故治小人常有治世之言使人主多乐乐则

怠心生故乱又曰天下之乱不起四方而起朝廷譬人伤气则寒暑易侵木伤心则风雨易折其论士行曰周孔之心使人明道道苟明则周孔之心深自得之三代人材得周孔之心而明道故视死生去就如寒暑昼夜之移而行忠义也易汉唐以後失周孔之心不能明道故视死生去就如万钧九鼎之重而行忠义也难又曰士之立朝以忠厚正直为本正直则朝无过失忠厚则人无怨嗟一於正直而不忠厚则渐入於刻一於忠厚而不正直则流入於懦其议论淳正类此朱子称自龟山倡道东南游其门者至衆潜思力行任重诣极如仲素一人而已晚就特科授博罗主簿年六十四卒於官学者称豫章先生淳佑问諡文质

论曰从彦之为河洛正传朱子之论定矣今观其推言治忽之故何其明以达也当靖康时废法度而恃德泽退君子而进小人朝廷不正而边陲是亟及都城陷殉义者仅李若水一人耳推厥乱兆则由元佑之与熙丰彼此相激而不存忠厚之意也从彦所言炳若龟监庶几天民先觉之亚乃竟不为世用即其书亦不及以闻於朝惜哉

李郁

李郁字光祖光泽人元佑党人深之子以深命为叔父庭後幼不好弄坐立必庄从舅陈莹中学踰冠谒杨时於余杭而请业焉时奇之谓曰学者当知古人之学何所用心学之将以何用若言孔门求仁则何为而谓之仁若言仁人心也则何者而谓之人心郁受言退求其说以进愈投而愈不合乃取论孟读之早夜不懈龟山深许之因妻以女盖十有八年然後涣然有得尝曰治经读之又读於无味处益致思焉以至羣疑并兴寝食不置乃当骤进耳郁涵养有方平居无懈容诲人无勸色於世务人情官政文法以及行阵农圃之事靡不究知绍兴中以遗逸召对高宗改容倾聽补迪功郎除勅令所删定官以忧去服阕值秦桧用事遂筑室於邑西山阖户读书家计屡空旷然不为意久之辟福建帅府机宜文字日访民间利病以告其长兴除之後帅欲毁民居为列肆争未能得遂辞去帅慙谢留之卒於官年六十五所着有易传论孟遗藁学者称西山先生朱子为表其墓云

论曰晋杜预有言优而游之使自求之厌而饫之使自得之朱子最善其言盖读书之方莫过於是也观郁之所肆力其於甘苦生熟之候用功亦已勤矣俗儒涉猎不耐心於温故无居安乐玩之休而欲沛然於行也岂可得乎

刘勉之

刘勉之字致中崇安人自幼强学日诵数千言为文滂沛凌厉比长妇家富而无子谋归赘於女勉之谢不受为择其宗属之贤者畀之使奉先祀以乡举诣太学时元佑之禁方严有挟其书者师生连坐罪至流窜勉之独阴访伊洛之书藏之夜深乃发篋燃膏默诵涪陵譙定尝从二程游遂於易至京师勉之即往叩尽得其学本末遂揖诸生去道谒刘敞杨时皆从请业敞尤奇之与语无所不倾尽勉之受其言归结庐於建阳之萧屯读书力穡无求於世平居严敬自持而接物恂恂色笑可亲临事财处不动声气学子造门随其材品示以圣贤教学门户终日娓娓无倦色当世贤士大夫咸高仰之与朱松胡宪刘子翬尤相友善中书舍人吕居仁等

荐之诏诣阙既至秦桧方主和议恶山林之士不顾利害辄尽言虑有所梗乃不使见天子第令试策後省勉之知道不行即日谢归杜门十余载朱松病革时属以後事勉之为经理其家教爱朱子如己子以女妻之绍兴十九年卒年五十九所居有白水学者称白水先生论曰朱子从游三贤及访李侗而学乃大成侗於龟山为再传勉之身及见之而所造於侗顾若微有轩轾何欤勉之平生仅一诣阙未尝出仕其淡泊宁静之概盖君子之所养可知矣

刘子翬

刘子翬字彦冲忠显公鞬之仲子也未冠游太学以父任授承务郎辟眞定府幕僚鞬死靖康之难子翬痛愤哀毁致羸疾庐墓三年服除通判兴化军寇杨就犯境与郡将画计备御就不敢犯以疾丐祠归自号病翁独居一室危坐或竟日夜嗒然无一言至闻人有片言之善则从容咨扣必竭两端後生来问学则随其器识告语成就无倦色妻死不再娶事继母吕氏及兄子羽尽孝友间日辄一走忠显墓下瞻望呜咽或累日而後反子羽之子珙开爽嗜学子翬教之卒有立籍溪胡宪白水刘勉之与子翬交至相得也每见讲学外无一杂言朱子父松将没嘱朱子於此三人朱子见子翬子翬告之曰吾於易得入道之门所谓不远复者吾之三字符也初子翬喜佛学既而读易涣然有得以为学易当自复始尝辟二斋以复名其东斋又为之铭以见志至是以告朱子焉尝作圣传论有曰乐善如贪契理如函闻非如获利舍过如遗蜕彼以日就月将爲初学以眞积力久爲钝才是自诬也一日微疾即谒家庙别母氏以书诀亲朋付珙家事自指所葬处中外孤遗人人为计久远已乃与学徒论修身求道之要作训诫数百言二日而卒年四十七世居屏山学者称屏山先生

论曰刘勉之胡宪皆受易於譙定独子翬於易以自得闻昔之善学圣人者莫如顔子而翼传以复之初爻当之则子翬之三字符固即顔子之学也子翬既字朱子而为之说曰凜乎惴惴惟顔曾是畏盖其志高其见卓矣

胡宪

胡宪字原仲崇安人少学於从父安国以乡贡入太学时方禁伊洛之学宪独与刘勉之陰诵窃讲已又学易於涪陵譙定定谓曰心爲物渍则不能有见惟学乃可明耳宪喟然曰所谓学者非克己工夫耶自是一意下学不求人知一旦揖诸生归力田以养亲非其道义一毫不取从游者日衆近臣林彦质等荐之被召以母老辞彦质入西府又言之辄召授左迪功郎差建州教授日进诸生训以为己之学诸生始而笑继而疑既而视其所以修身事亲接人无一如其所言遂乃悦服复延笃行程元廉节龚何俾参学政学者大化秩满复留者再盖七年不徙官以母老求监南岳以归久之起爲福建安抚司属与帅不合复请祠去会秦桧用事泊然无当世念者二十年桧死乃以大理司直召未行改秘书省正字宪每论事极意显言至於慷慨洒涕未几金人治汴宫室宪辄言金人必败盟请亟用张浚刘錡时二人伤於积毁未有敢颂言用之者宪疏入即求去上感其言以为左宣教郎主管崇道观卒召浚錡以退金师宪性恬淡培养深固平居危坐植立时然後言望之槁然若槁木之枝即之温然虽仓卒无疾言遽色人或犯之未尝与较读书不务自爲训说所纂论语会义行於世三十二年卒年七十七初

朱子奉父命稟学於三君子独从宪为最久而吕祖谦林之奇魏掞之等皆宪门人也世称为籍溪先生

论曰宪始喟然於克己其既训人以为己克己者所以为己也无为己之志则克之不勇无克己之功则为之不实基之以子思尚絅之心继之以顔子请事之力终之以孟子笃实辉光之盛是鲁邹之学的也

李侗

李侗字愿中延平人年二十四弃举子业以书谒罗从彦从彦实得程杨之传然清介絶俗人鲜知者见侗受业颇非笑侗若不闻从之累年受春秋中庸语孟之说从彦好静坐侗退亦静坐从彦令静中看喜怒哀乐未发前气象而求所谓中者久之於天下之理该摄洞贯各有条序从彦少然可亟称许焉侗为人劲特豪迈至充养完粹无复圭角色温言厉神定气和自然之中若有成法其事亲孝仲兄性多忤独能得其懽闺门肃穆若无人声而衆事自理平居恂恂若无可否而遇事一断以义截然不可犯生产素薄然亲隣或贫不能婚嫁辄节衣食振助之与乡人处长者事之尽礼少者贱者遇之以道言笑终日油油如也荅问後学随深浅施教而必自反身自得始故其言曰学问不在多言但默坐澄心体认天理虽一毫私意之发亦退聽矣又曰读书者知其所言莫非吾事而即吾身以求之则凡圣贤所至皆可勉而进矣若直求之文字以资诵说其不为玩物丧志者几希又曰讲学切要渊潜缜密然後气味深长蹊径不差尝诵黄庭坚称濂溪所谓胸中洒落如光风霁月者以为常存此意庶几遇事廓然其指示深切类此侗既闲居若无意当世而忧时论事感激动人语治道必以明天理正人心崇节义厉廉耻为先本末备具可举而行朱子父松与侗同事从彦雅重侗邓迪谓松曰愿中如冰壶秋月莹彻无瑕松以为知言後朱子师侗每去复来所闻必益超絶上进不已乃如此经术通明而未尝着书其论春秋曰春秋一事各是发明一例如观山水徒步而形势不同每举中庸未发之中谓必体此於身实见是理若顔子之叹卓尔然後扩充而往无所不通所居在水竹间谢絶世故余四十年食饮或不继怡然自适晚二子友直信甫皆成进士试吏旁郡更相迎养隆兴元年十月闽帅汪应辰以书币聘往见之至之日疾作遂卒年七十一謚文靖学者称延平先生所传有朱子所记延平问答行於世

论曰主静之旨标自濂溪非偏於静也定之以中正仁义则动静该备矣然必以静者为主是本原之学也中庸所谓未发偏言之与已发对而专言之则天下之大本也故曰主也主於静以行乎动则义与正固静而仁与中亦不害其为静也故曰定也罗李之学深会乎此用能大本卓然独得程氏之宗紫阳绍绪其传益彰然罗犹有絶俗之嫌李乃无复圭角岂天稟异哉抑亦所养使然耳

胡寅

胡寅字明仲安国弟淳之子也少桀黠难制淳闭之阁阁中有杂木寅尽刻为人形安国曰是宜有以移其心乃置书数千卷其上岁余寅诵閱尽遍稍长从侯师圣游宣和三年成进士除

校书郎於是杨时为祭酒寅复稟学焉顷之迁司门员外郎金人入京师议立异姓寅与张浚赵鼎逃太学中不书状寅之初擢第也张邦昌欲妻以女寅固却之至是邦昌伪立寅遂弃官归高宗驻金陵张浚荐为驾部郎擢起居郎金人南牧诏议移蹕寅上书有曰自古中兴之主克复旧物莫不本於愤耻恨怒不能报怨终不苟已今陛下既不为迎二圣之策又不为守中原之谋若不更辙则永负孝弟之愆常有父兄之责人心一去虽欲羁栖山海恐非自全之计也吕颐浩恶其切直除主管江州太平观未几复应诏上十事曰修政事备边陲治军旅用人材除盗贼信赏罚理财用核名实屏谀佞去奸慝不报命知永州复召为起居郎迁中书舍人赐三品服又迁给事中时议遣使讲和寅纳疏切谏上深然之加獎諭焉使定不行矣适张浚自江上还以遣使乃兵家机权竟遣之寅复言今日大计惟宜明复讐之义用贤修德息兵训民以图北向倘或未可则坚守待时若二三其德必不能有所立寅既与浚异遂乞便郡就养除知邵州辞改严州寻改永州徽宗讎至朝议欲用故事以日易月寅言礼讐不复则服不除愿服丧三年衣墨临戎以化天下俄除礼部侍郎兼侍讲直学士院丁父艰去初秦桧与安国有旧及桧当国倡和作威福寅恶之与之絶桧怒乃除寅徽猷阁直学士奉祠致仕桧憾未已复坐与李光书讥讪落职责授果州团练副使新州安置闻命即日就道於谪所着读史管见数十万言及桧死始聽自便复其官绍兴二十一年卒年五十九諡文忠所着尚有论语详说崇正辨及斐然集三十卷学者称致堂先生论曰张浚负一时望为国重轻然劾李纲沮岳飞其僨事也大矣吾尤惜胡寅一疏几定国是而卒挠於浚也至桧当国又能以公义割私交失所不自悔易名曰忠岂虚哉

胡宏

胡宏字仁仲安国之子也始事杨时侯仲良而卒传其父业优游衡山下余二十年玩心神明不舍昼夜四方从学者甚衆张栻实师事之绍兴间上书论复讐大义累数千言至曰二帝远适穷荒辛苦垫隘其愿陛下加兵敌国心目睽睽庶几一得生还而陛下反欲以天子之尊北面讐敌是祖宗之灵终天暴露无与复存也父兄之身终天困辱而求归之望絶也中原士民没身涂炭无所赴愬也陛下念亦及此乎是後上益偷安羣臣承旨争为弥文国子司业高阅请幸太学宏移书切责之闻者叹服初秦桧与安国有旧既当国欲用宏及宏弟宁怪二人不通问貽兄寅书讽之宁乃予书但叙契好而宏书词气尤厉或过之宏曰恐其见召耳宁果被召试馆职除敕令所删定官而卒不召宏及秦熺知枢密院事桧问宁曰熺近除外议云何宁曰外议以为相公必不为蔡京之所为也迁太常丞祠部郎官既而寅与桧忤宁亦出为夔州参议及桧死侍臣交荐宏朝命下而宏已病竟不克造朝而卒所着知言有曰性立天下之有情效天下之动心妙性情之德又曰立志以端其本居敬以持其志志立於万物之表敬行於事物之内而後义可精张栻称其言约义精实道学之枢要制治之蓍龟尚有诗文五卷皇王大记八十卷学者称五峯先生

论曰自安国以春秋专家诸子皆潜心励学负志节恢廓深远建崇论宏议以消庸靡之习是有得於春秋之旨者也宏在诸子中伟抱卓识自许尤为不偶较其学术亦最优也

史传三编卷五

卷六

<史部,传记类,总录之属,史传三编

钦定四库全书

史传三编卷六

大学士朱轼撰

名儒传六

宋

朱子

朱子名熹字元晦後改仲晦世婺源人居紫阳山下父松尉尤溪以建炎四年九月十五日午时生朱子於溪南寓舍松既游宦入闽晚居建州故朱子为建人少时松指天示之问曰天之上何物松异之从羣儿戏独端坐以指画沙视之八卦也始授孝经一阅题其上曰不若是非人也年十四松以不主和议忤秦桧归病革嘱曰籍溪胡原仲白水刘致中屏山刘彦冲三人者吾友也学有渊源吾即死汝往事之朱子既孤依父友刘子羽侨於崇安遂稟学於三君子白水妻之以女十八贡於乡十九成进士绍兴二十一年以佐廸功郎主同安簿二十三年之任始徒步谒李侗於延平初杨时倡道东南实传罗从彦以及於侗故朱子师之至同安职兼学事乃选秀民为讲说士尊其教二十七年四考罢归请祠明年复谒侗由是往来从之者累年精思实体所造益深明年召赴阙不至孝宗即位应诏上封事首言记诵词藻非所以探渊源而出治道虚无寂灭非所以贯本末而立大中帝王之学必先格物致知以极事物之变自然意诚心正而可以应天下之务次言修攘之计不时定者讲和之说误之也愿闭关絶约任贤使能立纪纲厉风俗数年之後视吾力之强弱观彼衅之浅深徐起而图之三言斯民休戚系守令贤否监司者守令之纲朝廷者监司之本今之监司无非宰相台諫之亲旧顾陛下无从知之耳明年召对辞不许遂入见复陈三劄大抵不出封事之意而加剴切焉是时上颇留意老释而宰相汤思退申和议近习曾觌龙大渊招权故朱子以为言思退闻之不悦授武学博士待次乾道元年促就职值洪适相复主和不合丐祠去三年除枢密院编修待次明年崇安大饥民夺食几挺变朱子乃假官粟六百石贷之人赖以济其後岁一敛散贷者出息什二小歉弛半息甚则尽蠲之行之十有四年赢益多遂归元粟於官而用所赢为贷资每石止收耗粟三升不复取息以故数十年邑无饥馑患所谓社仓者也五年三促就职会魏掞之以论曾觌去力辞寻丁内艰自始死至祥禫皆酌古制行之用成丧祭礼因推之冠昏作家礼六年复召以未终丧辞七年复召以禄不逮养辞九年上嘉其廉退改宣教郎主祠四辞逾年始拜命淳熙二年除秘书郎再辞五年差知南康军四辞逾年始拜命朱子归自同安家居几二十

年涵养充积理明义精既至郡恳恻爱民兴利除弊惟恐不及会旱讲求荒政以请於朝言无不尽或三四上得请乃已严隣路遏余之禁阅境内蓄积之实通商劝分全活至衆郡滨江舟舫岸遇多沈溺乃募饥民筑堤护之民得济饥而舟患亦息视民如伤至奸豪挠法惩之不少贷数诣学引士子讲论已乃建周子祠以二程配又复白鹿书院每休沐辄一至诸生质所疑诲诱不倦立学规俾守之明年有旨监司郡守条具利病朱子上言郡县赋重由於供军请核兵籍广屯田练民兵以省坐食之军使郡县事力稍纾然後可禁其苛敛责以宽恤卒复极论近习窃柄援引交通之弊疏入上不悦乃乞罢黜又以人户逃移自劾者再以疾请祠者五皆不报除提举江西常平茶盐事待次寻录球荒劳晋直秘阁以南康所募纳粟人未受赏义不独被恩命三辞不拜会浙东大饥调为提举浙东常平茶盐事即日就道且乞奏事之任及至阙纳粟赏行乃受直秘阁入对延和殿所奏七事辞皆剴切其一二事言灾异之由与近习之弊则手缮以防宣泄因乞推行社仓上为下其法於诸路方拜命时即檄旁郡募米商为蠲其征及至部客米已大集乃单车屏从按行存恤钩访拊问所至人不及知官吏惮其风采至自引去所部肃然凡丁钱和买榷酤役法有不便民者悉厘革之於球荒之余随事经画为经久计犹以前後所请多见抑幸而从者率稽时後事发愤抗疏言之且移书政府曰朝廷爱民不如惜费明公忧国不如爱身然财散犹可复聚民心一失不可复收身危犹可复安国势一倾不可复振九年以赈济劳晋直徽猷阁辞知台州唐仲友者宰相王淮之戚也迁江西提刑未及去朱子行部至台按得其奸赃劾之时久旱疏出而天雨淮匿不以闻朱子申章益力前後六上淮不得已夺仲友新命以授朱子不拜请祠去淮大憾乃用陈贾郑丙协力以攻朱子遂肇伪学之祸於是朱子作武夷精舍奉祠不出者七年当是时海内学者尊信益衆十四年除提点江西刑狱辞不许明年促奏事辞又不许值淮罢相遂力疾入奏首言刑狱轻重失宜甚至干涉人伦亦从流宥则天理民彝几何不至於泯灭卒乃极言陛下天理未纯人欲未尽故便嬖得被腹心之寄柔邪得窃廊庙之权公议有时而不容谗说有时而误听欲报讐耻而不免苟安欲养生灵而未免愁怨愿於一念之顷谨而察之果天理耶则敬以充之而不使少有壅阂苟人欲耶则敬以克之而不使少有凝滯是行也有要於路谓正心诚意上所厌闻戒勿言者朱子曰吾平生所学惟此四字安敢回互以欺吾君乎及奏上未尝不称善时会觐已死王拚已去独内侍甘昇颇预政朱子力以为言上曰为其有才耳对曰小人无才安能动人主翌日除兵部郎未供职林栗劾之命改它部而宰相竟授以江西前命再辞除直宝文阁奉祠未踰月复召初入奏时迫於疾作口陈未尽乞具封事以闻未及上至是再辞遂并封事投匭以进凡数千言大要言天下大本在陛下一心而其急务则辅翼太子选任大臣振举纲维变化风俗爱养民力修明军政六者是已疏入夜漏下七刻上已就寝亟起秉烛读之终篇明日除主管太乙宫兼崇政殿说书时上已有倦勤意为燕翼谋益加向用会执政有诋道学者遂力辞除秘阁修撰奉外祠光宗立三辞职名仍直宝文阁居数月除江东转运副使再辞改知漳州又再辞不许既之任即奏除无名之赋七百万减经总制钱四百万加意学校教诱诸生又揭示丧葬嫁娶之仪严禁男女传经之会俗为一变适朝议欲行漳泉汀三州经界朱子常病经界不行闻命即访事宜择人物及弓量之法上之且言必可行之说三将必至於不能行之说一既而寓公豪右果竞沮之朱子乃以地震自劾其冬有旨先行漳州经界以届农期暂寢明岁遭嗣子丧丐祠除秘阁修撰予祠去而漳州经界竟报罢矣顷之除荆湖南路转运使四辞三年差知静江府广南西路经畧安抚辞四年使者自金还言金人问朱先生安在乃差知潭州荆湖南路安抚辞不许会长沙有峒獠之扰遂拜命至则遣人晓以祸福皆降之申教

令严武备戢奸吏抑豪民湖湘士子故知学为之崇獎教厉四方人士毕至孝宗升遐朱子恸不自胜又闻上不任执丧中外汹汹益忧惧乞归田里未几赵汝愚以太皇太后诏尊上为太上皇而奉嘉王即位主丧於是汝愚相荐朱子先是彭龟年为嘉王直讲因讲鲁庄公不能制其母云母不可制当制其侍御仆从王称善问为谁说对曰朱熹也自後每讲王必问朱子说云何而翊善黄裳亦尝言於光宗曰欲嘉王进德修业追踪古先哲王当求天下第一流人光宗问为谁以朱子对故王之知朱子也久至是遂首召奏事除焕章阁待制侍讲朱子行且辞於道闻南内朝礼尚阙近臣已有用事者遂因辞章微辞以讽諫疏再上不许乃乞带元官奏事首言天运艰难国有大咎然有可诿者陛下前日未尝有求位之心今日未尝忘思亲之怀而已夫充未尝求位之心可以尽负罪引慝之诚充未尝忘亲之怀可以致温清定省之礼次言为学莫先於穷理穷理必在於读书读书之法莫贵於循序而致精致精之本又在於居敬而持志既对面辞职名不许翌日又辞待制乞改说书上报以手札乃拜命每进讲务积诚意以平日所论着者敷陈开绎既数次讲则复编次所讲成帙以进上亦开怀容纳又请不以寒暑双只日月并令早晚进讲及瑞庆节免称贺皆从之时太上意未释然上未即还大内将葺东宫居之朱子具四事以谏不报又议承重之礼以为子为父嫡孙承重为祖礼皆斩衰自汉文短丧天子遂无三年之服为父且然则承重可知寿皇至性自天独执通丧宜着方册为世法程间者陛下以世嫡承大统一时仓卒遂服漆纱浅黄使寿皇已行之礼举而复坠臣窃痛之请将来啓殡发引仍用初丧之服及孝宗将祔诏集议迭毁之次初太祖尊僖顺翼宣四祖之庙实奉僖祖为始祖治平间议者以僖祖无功德世数寝远迁於夹室未数年王安石复之是时赵汝愚雅不以熙宁中复祖僖祖为然复议祧之而奉太祖为始祖朱子乃上议状条其不可者四且拟为庙制又援伊川程子之说以为物岂有无本而生者今日基本啓自僖祖安得谓无功德状上宰相持不以闻径创别庙以奉四祖上颇闻朱子有状召问内殿朱子具剖及图以进上然之命即榻前撰内批直罢其事时策免留正擢用谢深甫等皆以内批行之朱子惩其弊乞再令集议於是朱子议竟不行当汝愚之谋立上也知合门事韩侂胄用姻戚得见太皇太后汝愚实使入白其谋事既定侂胄以为己功居中用事汝愚方收召四方知名之士中外引领望治朱子独惕然以侂胄为虑既屡言於上又数白汝愚宜酬以厚赏勿使预政汝愚性疏以侂胄为易制不为意朱子乃因讲筵复留身极言之甫退即降内批罢侍讲予宫观汝愚?还内批且拜且谏而内侍王德谦径以内批付朱子朱子遂行台谏给舍争疏留之不听乃除宝文阁待制知江陵府朱子辞且乞追还新旧职名诏仍焕章阁待制予祠朱子既去明年侂胄遂罢汝愚至诬以不轨谪永州朱子自以身事四朝虽退闲犹带侍从义难苟默乃草疏万言极论奸邪蔽主因以明汝愚之冤词旨痛切诸生交谏不从蔡元定请以箴决之遇遯之同人朱子嘿然退焚谏草自号遯翁因六辞职名诏仍秘阁修撰是时侂胄势益张大兴伪学之禁台谏争承风旨排诋万端至欲挤之於死二年遂落职予祠报至朱子方为诸生讲论畧起视复坐讲论如初於是绳趋尺步从游之士皆屏伏丘壑依阿选懦者更名他师甚至变易衣冠以自别非党而朱子方讲学不休或劝以谢遣生徒者笑而不答是冬竹林精舍成率诸生行舍菜礼於先圣先师以周程张邵司马延平七先生配五年以年届悬车致仕六年三月寢疾犹日为诸生讲太极西铭及为学之要辛酉订大学诚意章句甲子移寢中堂诸生入问疾曰夫子之疾革矣万有不讳当用书仪乎不允用仪礼乎亦不允然则参用之乎乃颔之遂正坐整衣冠挥妇女勿近就枕而逝是日大风拔木洪流崩崖时年七十一朱子为人色庄言厉其行舒而恭其坐端而直闲居未明而起深衣幅巾方履拜於家庙以及先圣退就一

室几案必正书籍器用必整倦而休肃躬瞑息休而起端步徐行饮食羹菜匙箸各有定列中夜而寝既寝而寤拥衾默坐或至达旦闺庭之间内外斩斩恩义之笃怡怡如也祭祀必诚必敬少不如仪则终日不乐已祭无违礼则油然而喜死丧之威哀戚备至饮食衰絰各副其情延遇宾客称家有无常尽其欢於亲故必致其爱於乡间必致其恭平居惓惓无一念不在於国闻时政阙失辄戚然不豫语及国势未振常感慨以至泣下然谨难进易退之节则一官之拜必抗章力辞一语不合即奉身亟去故登第五十年仕於外仅九考立朝才四十六日道之难行也如此其後侂冑诛嘉定二年始追諡曰文所着书有易本义啓蒙蓍卦考误诗集传大学中庸章句论语孟子集注或问太极通书西铭解楚辞集注辨证韩文考异及文集一百卷所编次有语孟精义中庸辑畧孟子指要小学通监纲目本朝名臣言行録家礼近思录程氏遗书外书伊洛渊源录谢上蔡语录晚复编次礼书未及成至若天文地志律历兵机无不洞究渊微词章字画未尝用意亦动中规矩可为世法着述虽多於四子尤所殫意以大学论语孟子中庸为入道之序而後及诸经所着书一字未安必反覆达旦甚至累日要求其当而後已诸生务学笃则喜见於言进道难则忧形於色讲论率至夜半虽疾病支离至诸生问难脱然沈痾之去体一日不讲学则怵然以为忧抠衣而来远自川蜀文字之传流及海表至於异域亦知慕其道窃问其起居穷乡晚出家蓄其书私淑诸人者不可胜数宝庆三年赠太师追封信国公绍定三年改徽国公淳佑元年上幸学诏以周子二程子张子及朱子从祀孔子庙李方子曰夫子设教洙泗以博文约礼授学者顔曾思孟相与守之自後正学失传士各以意为学其骛於该洽者既以闻见自矜而流於泛滥驳杂之归其溺於径约也又谓不立文字可以识心见性而陷於旷荡空虚之域先生身任道统广览载籍取其所同而削其不合稽其实用而剪其烦芜参伍辨证以扶经训而诤其舛差大本大根固已上达究其所穷条分派别经纬万端无所遗漏盖其包涵淳蓄溥博渊泉故出之若是其无穷也

论曰夫子以赞述六经而贤过尧舜诚以万世之君君臣臣父父子子皆夫子之力也自道学失传周子倡之二程子从而光大之张子邵子又裨助而引伸之而後斯道复明於世然数子於六经自伊川易传外鲜有成书盖至朱子而六经之学乃揭於中天即数子之所口授心承亦皆赖其寻绎表章而後学者足与有明也平生所历诸郡政教聿张尤惓惓为其百姓请命是伊尹内沟之心也及後登朝引道格非风节岳岳是臯陶陈谏之义也使当时克究其用则拨乱致治兴礼明乐骤帝驰王勲施烂焉何至寢微寢灭而终以不振哉不幸小人间之遂兴伪学之祸此与孔子不遇於春秋横遭伐檀削迹者何异然数百年来学校所以教政俗所以理无不折中於朱子其为万世烈岂直不在禹下已哉

张栻

张栻字敬夫丞相浚子也以廕补官孝宗立銳志兴复浚起谪籍开府治兵乃辟栻书写机宜文字除直秘阁时僚佐尽一时选栻以年少内赞密谋外参庶务所综画诸人皆自以为不及也间以军事入奏因劝上稽古亲贤以自辅帝异之及李显忠兵败汤思退申和议而卢仲贤使金於是栻复入奏帝引见上皇栻辄策金人必败宋室必兴上皇曰何哉栻曰太上仁孝上格於天又传位圣子虽唐虞无以过而金人篡夺相仍无复君臣父子臣以知其然也上皇曰苟仲贤使归事当若何栻曰臣父浚职在边隅战守是务此事惟庙堂审处之勿貽後悔仲贤

归辱命棧劾之夺三官未几浚去国遂罢兵金人乘间入淮甸中外大震思退衮秦桧遗策至敕诸将毋得辄纵兵已而浚没棧治葬毕即上言国家与金有不共戴天之讐愿继今以往誓不言和专务自强虽折不挠不报乾道三年用刘珙荐除知抚州未上改严州入对言欲复中原之地必先得中原之心欲得中原之心必先得吾民之心所以得之者无他不尽其力不伤其财而已矣今日之事固以明大义为本然所施有先後则缓急不可以不详所务有名实则取舍不可以不审五年召为吏部员外郎是时敌势新弱朝议将往责陵寝有忧召兵者辄斥之棧见上上曰知敌国事乎棧曰未知也上曰金人饥馑连年盗贼四起棧曰敌人之事臣虽不知境内之事则知之矣上曰何也棧曰比年诸道多水旱民贫日甚国家兵弱财匱官吏欺诞不足倚辅正使彼实可图臣恐我之未足以图彼也上默然棧因出所奏疏读曰陵寝隔絕誠臣子之至痛今未能正名仗义以伸天讨而卑辞厚礼以求之其屈甚矣而或犹以召兵为忧者亦见我未有必胜之形故也夫必胜之形在素定之日不在决机之时上悚听改容棧复读曰今日且当下哀痛之诏明复讐之义显絕金人然後修德立政用贤养民选将帅练甲兵通修攘战守为一事且必治其实而不为虚文则必胜之形隐然可见矣上深纳之将除为讲官会发运使史正志行均输法尽夺州县财赋远近骚然棧以为言上曰正志取诸郡非取诸民也棧曰州县财赋大抵无余取之不已而经费有阙不过巧为名色以取诸民耳上矍然即诏罢之乃以棧为左司员外郎兼侍讲尝讲诗葛覃进说曰治生於敬畏乱起於骄淫使为国者念稼穡之劳而后妃不忘织紵之事则心不存者寡矣因陈祖宗自家刑国之美斥今日兴利扰民之害上喟然曰此王安石所以为误国也棧在朝末期岁召对至六七劝上修身务学畏天恤民抑侥幸屏谗谀宰相憚之而近习尤不悦知合门事张说者太上皇后嫔戚也骤擢枢府外廷譁然莫敢言棧夜草疏极谏旦诣朝堂质责虞允文且曰宦官执政自京黼始近习执政自相公始允文慙愤不堪退则再疏又谏事乃寝然棧亦坐是逾年遂出知袁州棧为人表里洞然勇於从义无纖毫滞吝每进对不以人主意为随顺上尝叹伏节死义之臣难得棧曰当於犯顏敢谏中求之又尝难办事之臣棧曰晓事者难耳若但求办事之臣他日败陛下事者未必非此人也一日肩輿出遇曾觌举手欲揖棧遽掩其袂觌慙手不得下其峻如此淳熙元年帝念棧除旧职知静江府经畧安抚广南西路始至所部荒残乃简州兵补缺籍日习月按申严保伍法饬巉峒酋豪弭怨睦邻毋相贼杀奏革横山买马之弊六十余事诸蛮感服善马争至以治行进秩直宝文阁再任五年除秘阁修撰湖北转运副使即知江陵帅本路一日去贪吏十四人礼过诸将加恤卒伍咸勉以忠义功赏必信又劾黜纵贼大吏募贼党相捕告缉斩奸民之为逋藪者湖北故多盗至是尽遁尝捕盗数人其一北中亡奴也棧曰国家既未能正名讨贼毋使疆场之事其曲在我乃缚奴归之北而戮其余以徇北人叹曰南朝有人七年二月丐祠未报而疾革有友求教谓曰蝉蜕人欲之私春融天理之妙因手疏劝上亲君子远小人信任防一己之偏好恶公天下之理投笔遂絕时年四十八已而诏下除右文殿修撰提举武夷冲佑观不及拜棧初事胡宏宏一见喜曰圣门有人矣告以洙泗论仁之旨棧益奋作希顏錄以自策後与朱子交善讲习愈精所造愈纯尝谓学莫先於义利之辨其言曰圣学无所为而然也无所为而然者命之所以不已性之所以不偏而教之所以无穷也凡有所为而然者皆人欲之私而非天理之所存此义利之分也学者当立志以为先持敬以为本而精察於动静之间毫厘之差审其为霄壤之判则有以用吾力矣学然後知不足平时未觉吾利欲之多也灼然有见於义利之辨将以救过不暇由是而不舍则趣益深理益明而不可已岂特治己之所当先施之天下国家一也王者所以建立邦本垂裕无疆以义故也霸者所

以陷溺人心貽毒後世以利故也朱子每言己之学乃铢积寸累而成若敬夫则大本卓然学者称为南轩先生

论曰朱子平生所交友最着者敬夫东莱象山三先生而已象山既同门而异户而东莱之教先列史而後六经於博约之归亦似不无异旨其始终若符者惟宣公一人夫友所以讲学所以辅仁汉之王贡唐之元白情厚矣然所取不过意气文艺之间即进乎此者亦仅以政事节谊相鼓励惟朱子与宣公出则欲同行所学举明主於三代之隆处则阐道传心思树亿万人伦之极後之交友者可以奋矣

吕祖谦

吕祖谦字伯恭右丞好问之孙也先为河东人自好问始居婺祖谦之学本诸家庭有中原文献之传长从林之奇胡宪游既又友朱子及张栻以故学益精初廕将仕郎隆兴元年成进士复中博学宏词科调南外宗学教授丁母艰居明招山四方之士争就之阙除太学博士待次例补严州教授复召为博士兼国史院编修官实录院检讨官轮对首勉孝宗留意圣学且言恢复大事乞广揽英豪使确陈经画先後之实然後与大臣定成算而次第行之召试馆职祖谦常喜陆九渊之为文而未识其人至是考试礼部得一卷曰此必江西小陆也揭示果然人服其精鉴丁父艰阙主管台州崇道观召为秘书郎重修徽宗实录书成进对言曰治道体统内外上下不相侵夺而後安今陛下兼行大臣之事大臣亦行有司之事外至监司守令职任率为其上所侵而不能令其下故豪猾玩官府郡县忽省部掾属凌长吏贱臣轻柄臣愿陛下虚心以求天下之士执要以总万事之机勿以图任或误而谓人多可疑勿以聪明独高而谓智足徧察勿详於小而忘远大之计勿忽於近而忘壅蔽之萌又言国家以宽大忠厚立规模以礼逊节义成风俗此根本之深也然文治可观而武绩未振名胜相望而干畧未优是以事功不竞今日治体固当激励其事功尤当爱护其根本迂着作佐郎寻兼礼部以末疾丐祠除直秘阁主管冲佑观以归祖谦孝友絶人恬淡寡欲尽言以纳忠而羞为诤秉义以饬躬而耻为介既归乃建丽泽书院以会友讲学病中犹为日记於气候暄凉草木荣瘁无不谨书其察物内省不以一日懈如此病既间除着作郎兼国史院编修官不就添差浙东帅议亦不就淳熙八年七月卒年四十五諡曰成祖谦之学以关洛为宗而旁稽载籍不见涯涘尝言道理无穷学者先不得有自足意又曰静多於动践履多於发用涵养多於讲说读经多於读史工夫至此然後可久可大其论史以为论一时事纪传不如编年论一人终始则编年不如纪传二者皆不可废至观史之法於事之利害时之祸患必掩卷思所以处之乃为有益少卞急後读论语至躬自厚而薄责於人猛然有省一时意气皆平自是终身无暴怒朱子每称学如伯恭方为变化气质所讲画将以开物成务居家之政皆可为後世法尝就访朱子及归朱子送之於道祖谦欲编近思录因与朱子同止寒泉精舍分类抉微一月而成又尝修读诗记大事记未及成考定古周易书说阙范官箴辨志录欧阳公本末皆行於世学者称东莱先生其弟祖俭字子约赵汝愚得罪祖俭辄上书陈冤坐窜韶州在谪所读书穷理卖药自给芒屨徒步为踰岭计每言人因世变摧折失其素履者固不足言若意气反有所加亦私心也其後量移高安卒从弟祖泰性疏达尚气谊论世事无忌讳祖俭既贬祖泰尝欲以言报国惧累祖俭及祖俭卒祖泰乃击登闻鼓上书请诛韩侂胄坐杖一百配钦州祖泰了无惧色至府庭尹诱之曰谁教

汝共为章者言之且贯汝祖泰笑曰何问之愚也吾固自期必死而可受教於人耶尹曰汝病风丧心耶祖泰曰以我观之今之附韩氏得美官者乃病风丧心耳尹宗室据案作色杖加毒祖泰呼曰公天族同国休戚祖泰为谁家计安危而受此毒也尹慙趣杖讫使去侂冑怒未已使人迹祖泰所在祖泰乃匿襄邓间及侂冑诛诏雪其冤补上州文学至都卒

论曰学欲博不欲杂又曰博学而详说之将以反说约也祖谦之学不可谓杂而终不得与朱子并称大醇者不以反约之意求之则博即为病是故陆九渊之学非禅也而径约之弊多祖谦之学非霸也而骛博之心胜惟求约於博反博归约斯孔顏敦学之宗也

陆九渊

陆九渊字子静抚州金谿人四岁时问父贺天地何所穷际贺笑不答九渊穷思至忘寝食及卅角闻人诵伊川语辄恍然深省曰自觉若伤我者与兄九龄相踵成进士互为师友追琢讲贯和而不同九龄字子寿当秦桧时无道程氏学者而九龄独尊其说与九渊同为当时所尊号江西二陆二陆之学务穷本原不为章句训诂惟孔孟是崇是信久之九龄调桂阳军教授以亲老道远改兴国未上会湖南茶寇剽卢陵乡衆欲奉九龄主义社以备寇门人不悦九龄曰古者征伐公卿即为将帅文事武备一也遂领其事调度屯御皆有法及至兴国不以职闲自佚益严规矩肃衣冠如临大衆绥劝引翼士类兴起是时九渊亦调靖安主簿以继母忧兄弟俱归既阋九龄除全州教授未上得疾卒年四十九諡文达而九渊除为崇安主簿以史浩荐召审察不赴侍从复荐之除国子正转敕令所删定官九渊少闻靖康间事慨然有感於复讐之义至是乃访求智勇之士与议大畧益知武事利病形势要害人物短长未几因轮对陈五论词旨甚美上皆称善除将作监丞为给事中王信所驳主管台州崇道观以归贵溪有山形如象九渊登而乐之结茅其上自号象山翁四方学徒大进每开讲席户外屢满耆老扶杖观听尝谓学者曰平时虽号为士人其实何曾笃志於圣贤事业往往从俗浮沈与时俯仰徇情纵欲汨没而不能自振日月逾迈而有泯然与草木俱腐之耻於此能有媿惧大决其志乃求涵养磨砺之方见善则迁有过则改无不有益者又曰汝耳自聪目自明事父自能孝事兄自能弟本无欠缺不必他求要在自立而已或劝以着书曰六经注我我注六经於是朱子方知南康军修复白鹿书院聚学徒教育其中九渊过之朱子率僚友延登讲席九渊乃讲喻义之旨恳到敷畅听者莫不竦然动心朱子为之避席称谢以为切中隐微深痼之病焉其畧曰学者当辨其志人之所喻由其所习所习由其所志志乎义则所习者必在於义所习在义斯喻於义矣志乎利则所习者必在於利所习在利斯喻於利矣故志不可不辨也科举取士久矣为士者以此相尚汨没而不能自拔则其志之所乡有与圣贤背而驰者矣推而上之则又惟官资崇卑禄廩厚薄是计岂能悉心力於国事民隐以无负於任使之者哉诚能深思是身不可使之为人之归其於利欲之习怛焉为之痛心疾首专志乎义而日勉焉博学审问慎思明辨而笃行之由是而进於场屋必皆道其平日之学而不诡於圣由是而仕必皆供其职勤其事心乎国心乎民而不为身计得不谓之君子乎光宗立差知荆门军荆门在江汉间南扞江陵北援襄阳东护随郢西当光化夷陵之冲旧无城壁九渊请於朝而城之召集义勇优给庸直躬自劝督役者乐趋力竭工倍二旬讫筑自是边防益固因罢关吏讥察而减其税商贾毕集税入日增其为政凡讼诉无蚤暮皆直造庭下令自持状以追被诉者无不应期至其

有干涉人伦辄使自毁状以厚风俗於境内官吏贪廉人民善恶靡不周知有诉盗窃而不知其主名者九渊出二人名捕讯之即伏尽得所窃还诉者因语吏某所某人为暴翌日有诉遇掠者即其人也乃加追治吏大惊以为神申严保伍法盗发即禽未尝逸一人羣盗屏息每早出祷辄雨郡人异之期年政行令修民俗为变诸司交荐一日语所亲曰先教授兄有志天下竟不得施而歿今吾亦将死矣又语僚吏曰某将告终然犹出祷雪翌日雪乃沐浴更衣端坐後二日日中而卒年五十四諡文安初九渊与九龄尝与朱子会於鵞湖辩论所学其後九龄深知旧见之非幡然求益惟九渊终始自信持论不移於太极无极之说与朱子往复频数而卒不合学者称为象山先生

论曰朱陆之异同五百年来儒者以为口实然考鵞湖之争朱子年四十六而陆子乃三十七耳其未即为终身定论也岂特陆哉鵞湖所讲其言不传然陈傅良以为刻画深而伤易简矜持过而涉吝骄则意皆有未概於学徒之心者故朱子和章特交勗於邃密深沈之旨良有以也逮後朱子年弥高学弥进卓然为百世之师遂令儒术有所统壹向使陆子克跻上寿探蹟研精去罅归醇又恶知不卒於合耶以陆子高明之资持守之笃学者不知所以服膺而诵法之而徒执其一时之抵牾纷纷置喙於异同之间是岂善自得师者乎

史传三编卷六

卷七

钦定四库全书

史传三编卷七

大学士朱轼撰

名儒传六

宋

蔡元定

蔡元定字季通建阳人在娠时父牧堂老人发设圣贤遗像於别室使妻詹氏日往瞻仰而生元定少穎异十岁日记千百言牧堂授以二程张邵之书曰此孔孟正脉也元定深涵其义比长辨析益精闻朱子倡学往师之朱子叩所学惊曰吾老友也凡性道之要他弟子不得闻者必以语元定诸经奥义多先令考究而後折衷之每对榻讲论或至通夕不暇假寐尝语人曰造化微妙惟深於理者识之吾与季通言而不厌也因自辑所与元定问答者号翁季录元定之事朱子也久义理本原心通意解尤长於天文地理乐律历数兵阵之说凡书盘错肯?不可以句者元定剖析爬梳无不畅达朱子称曰人读易书难季通读难书易诸从朱子游者过建阳必谒元定听其言论不忍去淳熙十五年尤袤杨万里荐诸朝召之以疾辞筑室西山将老焉後韩侂胄擅政设伪学之禁台谏承风排击元定自知不免及沈继祖刘三杰连疏诋朱子遂逮元定谪舂陵元定闻逮不辞家而行朱子偕从游数百人饥之萧寺元定至寒暄外无嗟劳语论参同疑义意象洒然酒既行坐者咸感叹唏噓或至泣下朱子微视元定不异平时喟然曰友朋相爱之情季通不挫之志可谓两得矣元定於坐作诗曰握手笑相别无为儿女悲遂与子沈徒步三千里赴谪所踵尽流血既至父子相对以义理自怡浩然无湘累楚囚之状远近来学者日衆有一生素挟才简傲亦心服执弟子礼人为语曰初不敬今纳命或劝以谢遣生徒者元定曰彼以学来何忍拒之苟有祸患非闭户所能避也一日谓沈曰可谢客吾将安静以还造化旧物阅九日移寝正室牖间有声若坠石者再顷之而逝庆元四年八月九日也年六十四沈护丧归比葬朱子诔之称为亡友西山先生云元定以孝弟忠信仪刑於家在舂陵时移书诫子曰独寝不媿衾独行不媿影每言朱子立教先训诂文义下学而上达然世衰道微邪说交作学者非知本原未必不惑於异端故其教人以性与天道为先自本而支自原而流闻者莫不兴起侂胄既诛赠迪功郎謚文节所着书十余种律吕阵图之书尤为朱子所叹重朱子之注四书及易本义诗传通监纲目皆与参订啓蒙之编则元定所起橐也论曰伪学之祸间有更名他师自别非党者独蔡元定吕祖俭蹈难如饴烈已元定之在谪仅期年耳使选懦濡忍以脱於祸亦不过期年便安孰与名光天壤配食无穷哉夫百年之间一出入息而志士仁人不少概见者不知吾生有涯而妄縈情於其所顾恋也故曰不知命无以为君

子

黄干

黄干字直卿福州闽县人父瑀以笃行直道高宗时为监察御史瑀没干往见临江刘清之清之奇之命受业朱子时方大雪干白母即行遂从学焉干夜不设榻不解带厉学达曙朱子叹其坚苦以女妻之宁宗即位朱子奏授干将仕郎而铨中授为迪功郎监台州酒务丁母忧庐於墓从之讲学者甚衆及朱子编礼书丧祭二编独以属干朱子病革书与诀遗以深衣及所着书曰吾道之托在此吾无憾矣干执心丧三年毕调监嘉兴府石门酒库吴猎出帅湖北敬干名德辟为安抚司激赏酒库迁知临川县岁旱劝衆捕蝗极尽心力调新淦县吏民习知临川之政不令而行差判安丰军淮西帅司檄鞫和州疑狱干释囚饮食之委曲审问未得其情一夜感梦乃旦呼囚诘曰汝杀人投诸井耶何得欺我囚惊服寻知汉阳军重庠序先教养即郡治後建祠以祀周程游朱四先生别为屋以馆四方士值岁饥荒政具举旁郡饥民襁至惠抚均一民大感悦以病丐祠主管武夷冲佑观寻起知安庆府至则金人破光山民情震恐干为战守备请城安庆不俟朝报即日兴工分城为十二科先自筑一科然後使官吏寓公士人分科主之悉准其一科之费计田出役力均费省番休递代整有成法每五鼓坐堂上先授濠砦官以一日成算然後治府事理民讼阅士卒会宾佐已则巡视城役比晚犹至书院为学者讲论经史後二年金人破黄州沙窝诸关淮东西皆震独安庆屹然按堵继而霖潦余月大水暴至城卒无虞士民喜相谓曰不残於寇不淹於水生我者黄父也制置李珣辟参议再辞既而朝命改知和州令先赴珣禀议干诣珣珣方视师维扬即与偕行干为画御敌计珣不能用其时珣幕多轻儗士将裨离心而珣张宴无虚日干复谏珣且请整旅以固蕲黄为江南障不听遂力丐去其後蕲黄失守果如干言再命知安庆不就入庐山访李燔陈宥相与盘旋玉渊三峡间俛仰朱子旧迹讲乾坤二卦於白鹿书院山南北之士皆集未几召赴行在奏事除大理丞不拜初干入荆湖幕府奔走诸关豪杰往往愿依干後倅安丰守汉阳安庆声闻益着长淮军民翕然心向在位者多忌之比入见又虑直言边事悟上心於是羣起挤之遂罢归干涵养既久自得益深一时出朱门号高第者至衆独干强毅有立足任负荷既归弟子益进往来质疑请益如朱子时俄命知潮州辞主管亳州明道宫踰月致仕没後数年赠朝奉郎与一子下州文学諡文肃学者称勉斋先生有书说论语通释论语意原及文集行於世论曰自古名儒之兴必有名臣为之佐佑扬显传绪而表微者则及门也程张之时名臣荐达有吕公着司马光诸人及门游杨尹谢其最着也朱子同朝名臣如彭龟年赵汝愚皆广为扬誉及门黄陈李蔡其最着也程门尚有朱光庭等着声台谏登高而呼朱门则鲜位於朝者时使然也干之学历金华四子而其绪有光盖其根深而源远矣

李燔

李燔字敬子南康建昌人绍熙元年成进士授岳州教授未上往谒朱子朱子告以曾子弘毅之指曰致远固以毅任重贵乎弘也燔退以弘名其斋至岳州教士不因时尚且曰古之通材文武兼焉乃辟射圃使习射廩老将善射者以教之以承重解官归既阕改襄阳教授复谒朱子朱子称之曰燔进学可畏而直谅朴实处事不苟它日任斯道者必燔也凡诸生未达者令

先访燔侯有所发乃为折衷诸生畏服朱子没将葬学禁方厉鲜敢会葬者燔独往视封窆不少忧及诏访遗逸九江守以燔名闻召赴都堂再辞郡守聘为白鹿书院院长诸生云集讲学之盛无与比除大理司直辞寻添差江西运司干办公事会洞寇乱帅漕议平之燔曰寇非吾民耶岂必皆恶然而为寇则有司贪刻将校邀功者激之耳反是而行则皆民矣帅漕然之问谁可行者燔自请往乃驻兵万安易置近洞隅保之尤无良者驰辨士谕以逆顺祸福寇皆帖服洪州地下异时赣江涨而堤坏久雨辄涝燔白漕帅葺之自是田皆沃壤改潭州通判辞不许真德秀帅长沙府事悉以咨燔未数月宁宗崩史弥远以拥立功益当国柄用燔慨然告归遂不复出德秀及魏了翁荐之差权通判隆兴府辞江西帅魏大有辟充参议官又辞乃以直秘阁予祠燔居闲念无以报国乃荐德秀了翁及崔与之洪咨夔陈宓等於朝绍定五年上论当世高士李心传以燔对曰燔朱熹高第经术行义亚黄干当今海内一人而已陛下诚强起之以真讲筵必能裨助圣学上虽然之而终不召也年七十卒諡文定燔尝言凡人功业不必仕宦随分及物即功业矣又言仕宦至卿相不可失寒素体君子无入不自得正以磨挫骄奢不至居移气养移体因诵古语曰分之所在一毫攀跻不上善处者退一步耳故燔处贫贱患难若平常不为动被服素布虽贵不易蔡念成称燔心事有如秋月入仕四十二年在官不过七考居家讲道学者宗之与黄干齐名称曰黄李

论曰朱子之帅长沙降其洞獠燔在江西治蹟相类洞獠犹可以逆顺祸福服况於身为赤子乃祖乃父累世宅尔宅而畋尔田者哉虽?张奸宄之徒世不絶有然使司牧者有陰雨之膏析符者有保障之固则稂莠且化为嘉苗而衆志坚於城郭矣燔之言实治忽之名论也燔与光泽李方子同为朱门高第燔以弘名其斋生平克充弘毅之旨方子以果名其斋善体寬大中要果决之训服行以造於成甚矣古人之嗜学也

李方子

李方子字公晦邵武人少博学能文为人端谨纯笃初见朱子谓曰观公为人自是寡过但寬大中要规矩和缓中要果决遂以果名斋长游太学学官李道传折官位辈行具刺就谒嘉定七年廷对擢第三调泉州观察推官适真德秀来为守以师友礼之德秀尝谓人曰公晦学邃而气平本经术明世用事之大者余必咨而後行暇则辩论经史至夜分不倦故事秩满必先通书庙堂乃除方子曰通书是求也丞相史弥远闻之怒踰年始除国子録无何将选入宫僚而方子不少贬以求合或告弥远曰此真德秀党也使台臣劾罢之方子既归学者毕集危坐竟日未始倾侧对宾客一语不妄发虽奴隶亦不加诟詈然尝严憚之尝语人曰吾於学问虽未能周尽然幸於大本有见处此心常觉泰然不为物欲所渍尔其所编禹贡集解朱子尝称许之

论曰为陆学者每妄讥朱门舍德性而专事问学考朱子教人大端在主敬穷理主敬所以尊德性也岂尝放於支离以为学哉方子於大本有见处是主敬之效也至以学问周尽为歉则又以见理道之无穷而大居敬者尤必以穷理为贵也真德秀称其本经术明世务固非若冥目兀坐以求大本而遗弃事物者比矣

陈淳

陈淳字安卿漳州龙溪人少习举子业林宗臣见而奇之谓曰此非圣贤之学也授以近思录淳由是尽弃所业益求濂洛遗书读之慨然曰此实洙泗之传而吾乃未身其奥吾心慙焉闻朱子讲道武夷欲往从而无资及朱子守漳进谒得闻本原之学益自力朱子亟称之曰南来吾道得一安卿朱子自漳归且十年淳复至自述所得朱子曰已见本原矣所阙者下学之功尔自是所闻皆要切语凡三月而朱子卒淳服膺师训日月积累义理贯通洞见条绪其居乡不沽名不徇俗恬然退守而化及乡人声播天下世虽不用而忧时论事感慨动人郡守以下皆礼重之嘉定九年以特试赴都归过严陵郡守郑之悌率僚属延登讲座淳乃为四章以示学者其论道学体统畧曰道原於天命而实行乎日用尧舜与涂人同一禀孔子与十室同一赋谓其君不能贼其君者也谓其民不能贼其民者也自谓其身不能自贼者也操则存舍则亡迪之吉悖之凶易知易行岂有离於日用之外哉其论师友渊源畧曰濂溪不由师传提纲起钥二程亲授其旨朱子又益明之上以达羣圣之心下以统百家而会於一学者必以是为迷涂之指南庶有所取正而不差矣论工夫节目畧曰道之浩浩何处下手大要不过致知力行而已致其知者所以明万理於心而使之无所疑力其行者所以复万善於已而使之无不备也知不致则行将何适行不力则所知徒为空言竟何有於我哉然二者亦非截然判为二事犹之行行者目视足履动辄相应盖交进而互发也其所以为致知力行之地者必以敬为主敬者提撕警省此心使之惺惺圣学所以贯动静彻终始之功也能敬则中有涵养大本清明由是而致知力行不复有扞格之病矣虽然人性皆善而鲜有能从事於斯者一则病於安常习故而不能奋然立志以求自拔二则病於偏执私主而不能豁然虚心以求实见也必如孟子以舜为法於天下我犹未免为乡人者为忧然後为能立志必如顔子以能问於不能以多问於寡有若无实若虚然後为能虚心既能立志而不肯自弃又能虚心而不敢自是然後循序而进日有维新之益矣论读书次序畧曰不先诸大学则无以提挈其纲领而尽论孟之精微不参诸论孟则无以发挥其蕴奥而极中庸之归趣然不会其极於中庸又何以立大本而经大经哉读四书之法毋过求毋曲引平心以玩其旨归切己以察其实用乃由以进於诸经莫不冰融而冻释矣既归人士师事者益进淳与讲解率至夜分无倦色门人随所口授笔之於是有四书口义字义详解及筠谷所闻诸编明年以特奏恩授迪功郎主安溪簿未上卒年六十五所著有诗礼女学传於世学者称北溪先生淳同邑有王遇者字子合号东湖亦事朱子又尝及游张栻吕祖谦之门精思力行朱子称其淳笃及历官中外皆有声绩不附韩侂胄多风节其後漳人祠祀朱子以淳及遇配焉

论曰蔡元定之明悟黄干之笃实皆为朱门所推重逮观淳之讲义何其粹也朱子之守漳未及二年比淳再至仅三月耳非尝朝夕熟承其声誉也而於奥旨微言探之能深阐之能扬简而括详而有要於师门学的曾无毫芒之谬可谓颖异之姿与闻性道之秘者已

蔡沈

蔡沈字仲默元定季子也与伯兄渊次兄沆皆及事朱子沈年三十尽屏举子业一以圣贤为师及元定坐谪舂陵茧足走三千里惟沈独从元定卒护丧归於道有遗金义不可受者固却

之曰吾宁随所止而殓不以累吾亲也初元定使渊绍其易学沆绍其春秋学沈绍其书学及朱子为书传未及成病革亦卒以属沈沈受父师之命竟踵成之其序略曰二帝三王之治本於道二帝三王之道本於心得其心则道与治可得而言矣後世人主有志於二帝三王之治不可不求其道有志於二帝三王之道不可不求其心求心之要舍是书何以哉卜居九峯虽当世名卿物色访求不屑就也凡元定着书十余种其律吕阵图诸书学者尤难卒晓间以叩沈无不毫析缕解者又尝叙洪范数亦元定所命也卒諡文正学者称九峯先生蔡氏自牧堂老人发生西山先生元定元定生节斋先生渊复斋先生沆及沈渊又生素轩先生格沈生觉轩先生模久轩先生杭静轩先生权皆洁行绩学詮经卫道世称蔡氏九贤云

论曰建州当南宋时名贤挺生而胡刘与蔡三家尤盛马班列传之作父子祖孙类相从附至陈寿传董和董允始厘为各编若沈守道着述不负父师之命其书传与朱子易诗诸经并立学宫迄於今五百余年业尚书者宗之故从和允之例析而不附然沈讥洞极潜虚为牵合至所叙范数或未免然何欤

刘燾

刘燾字晦伯建阳人与弟炳受学於朱子亦尝及吕祖谦之门乾道八年举进士调山阳主簿转饶州録事擢知连城县改闽县所至讲求利弊而兴革之俄差判潭州未上丁父忧值伪学禁兴燾从朱子於武夷讲道读书怡然自适筑云庄山房为终老计後差知德庆府修学校纠武勇条上便民五事及入奏因言今虽从和议愿益恐惧修省开言路以广忠益振公道以进人才飭边备以防敌患擢提举广东常平令每岁春末以其半出货至冬而偿常存其半以备缓急又出公使公用二库赢钱以补积欠凡十五万入为尚左郎官因转对首言愿於经筵特派大臣奏对反复问难以求义理之当否政事之得失又乞收拾人才修明军政及节内外冗费出为浙江提点刑狱多所平反入为国子司业是时伪学之禁未弛燾乃言於丞相请以朱子所着大学论语中庸孟子之说劝讲复奏庆元以来权佞当国恶人议已指道为伪屏其人禁其书义利不明趋向污下人欲横流廉耻日丧乞罢伪学之禁又请以朱子白鹿洞规颁示太学取四书集注刊行之其所以扶卫正道以立国是者忠欵惓惓未尝少释又言浙西根本之地宜诏长吏监司务储积禁科敛戢强暴抚善良未几以接伴外使至吁?军还言两淮藩蔽江南干戈盗贼之後宜招集流散为足食足兵之计规画明备帝嘉纳之进国子祭酒兼工部侍郎试刑部侍郎时廷臣争务容默燾首请獎忠说以作士气戒谀佞以肃具僚又因冬雷请遴选监司以考察贪吏访求民瘼又请择沿边诸将城沿边州郡使边民各以什伍教閱於乡隐然寓军政於田里至如罢遣贺正使及絶金人岁币侃侃正言无所回隐两请致仕不允会夏旱复应诏上封事曰言语壅而导之使言人心郁而疏之使通上开不讳之门下必有尽言之士或者指为好名要誉而陛下信之则苦言之药至言之实陛下弃之而不恤矣擢权工部尚书兼太子右庶子左谕德每至经史所陈声色嗜欲之戒辄恳切敷陈之卒赠光禄大夫諡文简所着有奏议史藁经筵故事东宫诗解礼记解讲堂故事云庄外藁弟炳字韬仲朱子均称其嗜学可教居官不苟云论曰朱子四书章句集注功在万世燾当道学屏蔽之时毅然请以劝讲刊行天下伟哉而奋忠陈谋自学术人心吏治民瘼以暨军政边务言切虑周罔非经济弘谟其斯为有体有用之儒欤

真德秀

真德秀字景元後改景希浦城人年十五而孤母吴氏教之自韩侂胄设伪学之名以锢善类近世大儒之书皆所禁絶德秀晚出独慨然以斯文自任讲习而服行之庆元五年成进士复中博学宏词科入闽帅幕召为太学正嘉定元年迁博士入对时侂胄既诛德秀首言今日改弦更张当褒崇名节明示好尚自是党禁弛正学复明於天下试学士院改秘书省正字兼检讨玉牒寻兼沂王府教授权直学士院三年迁秘书郎乞开公道室旁蹊以抑小人道长之渐选良牧励战士以扼羣盗方张之鋭四年迁著作佐郎寻兼礼部郎时蒙古深侵金人屡败德秀言金有必亡之势然金亡则上下恬嬉忧不在敌而在我多事之端恐自此始五年迁军器少监六年迁起居舍人寻兼太常少卿充金国贺登位使至盱眙闻金内变还乃牒举边防要事且言曰臣自扬之楚自楚至盱眙沃壤无际陂湖相连民俗强悍强忍足为大江屏障若大修垦田之政领以专官数年之後积储充实边民父子相保因其什伍勒以兵法不待馈饷皆成精兵矣时史弥远方以爵禄縻天下士德秀慨然谓刘燾曰吾徒急当引去使知世有不苟为从官之人遂力丐外出为江东转运副使江东方伤旱蝗乃讲荒政与同僚分赈所部而自领其最甚者全活至衆又平斗斛劾赃滥拔贤俊政誉日闻改知泉州蠲苛政以招海舶民输租令自槩有讼者揭示名姓人自诣理海贼乱设方畧禽之因徧行滨海审形势增屯以备不虞十二年改知隆兴府以母丧归十五年除知漳州以廉仁公勤励僚属以周朱之学教士子罢榷酤除斛面免和籴立义阡社仓及惠民慈幼等仓以苏其民捐诸军回易之利及官田租而月试之射凡营中病者死未葬者孕者嫁娶者贍给有差理宗立召为中书舍人擢礼部侍郎直学士院首言济王霅川之变非本意愿讨论追封秦邸故事兴灭继絶上曰朝廷之待济王亦已至矣对曰人主当以二帝三王为法观舜所以处象则陛下不及明甚因劝上讲学进德及言货赂公行薰染成俗朝廷所用敏鋭之士多於老成其忠亮如此尝入侍清暑殿进曰此高孝二祖储神之地也仰瞻楹桷二祖实临其上陛下一心而受衆攻未有不浸淫蠹蚀者夫惟学可以明此心惟敬可以存此心惟亲君子可以维持此心因极陈古者居丧之礼与先帝视朝之勤及宁宗小祥有诏羣臣易吉德秀争之曰自汉文率情变古至我孝宗方衰服三年朝衣朝冠皆以大布惜当时不遂定臣下执丧之礼实千载无穷之憾然孝宗崩易月之後羣臣犹未释衰朝会用黑带公服大祥始除侂胄柄政乃以小祥从吉夫带不以金鞶不以红佩不以鱼鞍轿不以文绣此於羣臣何损朝议何伤议遂格德秀屡进鲠言上皆虚心开纳而弥远益严惮之谋所以相撼畏公议未敢发及王暨盛章驳德秀所主济王赠典事莫泽朱端常梁成大等遂相继劾之至请窜殛上不可乃落职罢祠归绍定四年改职予祠五年进徽猷阁待制复知泉州迎者塞路弥远死乃改显谟阁待制知福州有顷召为翰林学士是时金亡朝议进取德秀以为忧上封事谏进户部尚书德秀长身广额容貌如玉望而知为公辅器立朝不满十年章疏所奏将数十万言皆切当时要务四方人士诵其文想见其风采及宦游所至惠政深洽由是中外交颂都城人时惊传湏洞奔拥出关曰真直院至矣果至则又填塞聚观弥远益以此忌之久摈不用至是归朝而德秀衰矣入见上迎劳之德秀谢乃进大学衍义德秀尝言天下之理惟中为至正惟诚为至极然敬所以中不敬则无中也敬而後能诚非敬则无以为诚也气之决骤轶於奔骝敬则其衔轡也情之横放甚於溃川敬则其堤防也及是遂为上陈祈天永命之道以为敬者德之聚仪狄之酒南威之色盘游射弋之娱禽兽狗马之玩有一於此皆足害敬上欣然嘉纳踰年知贡举已得疾拜参知政事三丐祠上不得已进资

政殿学士提举万寿观兼侍读辞疾革冠带起坐神爽不乱卒諡文忠学者称西山先生所着读书録尝谓门人曰此为治之门如有用我者执此以往与大学衍义及甲乙集等书皆行於世论曰德秀未尝及朱子之门而能私淑以有成考其学行之正风节之着有体立用行之效朱子以後莫有能尚之者也衍义一书学术治术引据剖辨诚明毕周尤为修身之极则理世之蓍龟自天子以至於庶人乌可不三复体玩哉至其立政建议无一不审乎国势察乎人伦昔羊祜欲复谅陰之礼而卒疑於有父子无君臣议格不行使理宗能因德秀之言遂定臣下执丧之制庶几彝伦攸叙乃竟因循未及着令惜哉

魏了翁

魏了翁字华父印州蒲江人英悟絶伦尝从辅广李燔游庆元五年成进士时方讳言道学了翁策独及之累官武学博士召试博士韩侂胄方谋开边中外忧骇莫敢言了翁独以急於内修姑遣外攘为对且曰举天下试於一擲宗社存亡不可忽也策出衆大惊改秘书省正字迁校书郎以亲老丐外知嘉兴府侂胄坐诛朝廷收用诸贤了翁被召适史弥远入相专国事了翁心不能善固辞丁生父忧解官心丧筑室白鹤山下开门授徒士争负笈由是蜀人知义理之学差知汉州坐微罪降秩起知眉州眉俗习法令持吏短长称难治了翁乃礼耆耆拔俊秀朔望诣学宫讲说诱掖行乡饮酒礼以兴教化增贡士员以振文风利民之事知无不为士论大服俗为之变擢潼川提刑改转运判官初周程等倡兴道学阙无爵諡绍兴乾道间胡安国魏掞之尝以为请未及施行了翁上疏曰周惇颐程颢程颐张载嗣往圣开来哲发天理正人心使孔孟絶学复明於世朱熹张栻学实宗之今熹栻已赐易名而惇颐等阙如是録其後遗其先也朝论黜之卒如其请迁直秘阁知泸州丁母忧阙差知潼州嘉定十五年被召於是了翁去国十七年矣上迎劳所奏悉嘉纳进兵部郎中改司封郎中建议分江淮襄蜀为四重镇择人任之而假以事权资以才用为聯絡守御计事下中书不果行累迁太常少卿秘书监起居舍人了翁正学危行其入也弥远欲引以自助了翁不可至是因极言事变倚伏人心向背疆场安危邻敌动静以至士大夫风俗之弊剴切无所讳忌弥远愈不乐及理宗即位弥远以拥立功益柄用了翁积忧成疾三请闲不许迁起居郎属济王黜死有司治葬不如礼了翁每见上辄请厚伦纪以弭人言输忠引义弥远心益恶之了翁亦求去遂出知常德府越二日降三官靖州居住湖湘江淞之士不远千里造门受业绍定四年复职与祠起知遂宁府不拜进宝章阁待制潼川路安抚使知泸州泸大藩控制边面二千里了翁葺楼堞增器械练牌手申军律兴学黜逋建社仓义塚及养济院未数月百废具举弥远死进华文阁待制了翁负孤忠鯁言侃侃初扼於侂胄继忤於弥远念国家权奸嗣兴公正不容法度隳弛风俗偷蠹不可涤濯乃抗章论十弊疏列万言先引故实次陈时弊分别利害皎若白黑上读之感动是时臣庶封章多乞召还了翁及真德秀者上因民望并招之以了翁权礼部尚书直学士院先是弥远之排真魏也梁成大为之鹰犬成大遗所亲书曰真德秀乃真小人魏了翁乃伪君子及是了翁入对首乞明君子小人之辨以为进退人物之本以杜奸邪窥伺之端他所陈列又十余事昼漏下四十刻始退俄兼侍读又兼吏部尚书了翁还朝六阅月前後二十余奏皆当时急务每进读上必为之改容既而边警至上心焦劳将引与共政而忌者倾之出督视京湖江淮军马五辞不获上勉劳赐便宜如张浚故事了翁乃酌上下流之中开府江州申徹将帅调遣援师列死事之臣黜退懦之将又奏边防十事甫二旬召为金书枢密院事盖朝臣特假建督以

出了翁既出即以为非计复遽召还进退牵掣了翁遂力辞不拜改资政殿学士湖南安抚使知潭州又辞改浙东安抚使知绍兴府又改福建安抚使知福州累章乞骸骨嘉熙元年卒謚文靖了翁之学深密明粹尝曰仁义中诚性命天道此致知格物之要也今往往善柔为仁果敢为义依违以为中钝鲁以为诚气质以为性六物以为命元虚以为天道甚则以察为知以荡为情以反经为权以捷给为才师异指殊流弊乃尔又曰学者根本不立而异端得以乘之利禄得以移之文词得以溺之则有口道六经而心是佛老或心是圣学而辑为文词随世以就功名者矣其言切中学者之病如此所著有九经要义易举隅井田图说古今考经史杂抄师友雅言等书

论曰小人之摈君子无所不用其极苟无瑕可摘必从而指之曰伪至以伪为罪则凡言教法无非罪也宋南渡後国势弱矣所赖诸贤相与维持故人人知有君父乃侂冑方以禁伪学败而了翁又以伪君子久斥不用呜呼彼所指为伪者皆廉介慈惠忠诚许国之人也天地之元气国家之命脉也就令强为修饰以袭君子之名不犹愈於眚顔恣睢而蠹国虐下者乎诗曰谗人罔极交乱四国盖自古伤之矣

李道传

李道传字贯之隆州井研人少庄重稍长读程氏书湛精玩索至忘寝食虽处暗室整襟危坐肃如也庆元三年成进士调利州司户参军改蓬州教授吴曦叛抗节不挠弃官去以书间报安抚杨辅论曦非雄才犯顺首乱人心离怨请亟诛而缚之曦平进官二等嘉定初召为太学博士迁太常博士兼沂府小学教授值沂王有母丧府僚例进秩道传曰有襄事者推恩可也吾属何与同侪然之皆辞不受迁着作佐郎即上言人才盛衰系学术明晦愿下明诏宣索朱熹论语孟子集注大学中庸章句或问颁之太学仍请以周程张邵从祀先师执政不悦语侵之道传不为动兼权考功郎迁着作郎时胡榘等新进用事贿赂成风道传曰刻剥倾危之人进矣遂丐外出知真州擢提举江东常平茶盐公事下车即按贪纵十余人胥吏为民害者大黥小逐百余人释狱之冤系者二百余人弛负钱十余万缗会大旱应诏论楮币钞法之弊及赋敛加增军将椎剥皆切中时病与真德秀分赈所部穷冬行风雪中虽峻谷深村必至久之胡榘为吏部侍郎举道传自代道传耻之引疾求去不许召奏事再辞又不许既对上自宫掖次及朝廷尽言无所讳上不以为忤除兵部郎中又辞不就御史李楠觐当路意请授以节镇蜀遂出知果州行至九江卒年四十八謚文节初道传自蜀来不及登朱子之门乃访所尝从学者与游尽得遗书读之笃於践履气节伟然於经史未有论着曰学未至不敢於诗文未尝苟作曰学未至不暇尝以疾在告真德秀省之卧榻屏间大书唤起截断四字其用功如此

论曰唤起是惺惺法截断则战胜法也易後天卦乾战於西北战而克则陰道屏而德性尊巽齐於东南齐而顺则阳道伸而官骸正程朱所以继絕学者大义曷以加兹道传起自西陲由私淑而闻大道之要至表章朱子传注立诸学宫以觉来裔其功伟已

陈宓

陈宓字师复丞相俊卿之孙也及事朱子朱子器异之其後复从黄干以父任历知安溪县立安养院以粥穷民病予医药死则棺葬之安溪士民不名为令而称复斋先生嘉定七年入监因大旱上言宴饮无节赐予非时大臣私其亲故贪吏得志廉士招尤奏入史弥远不乐调军器监簿转对言人主之德贵明大臣之心贵公台谏之言贵直指陈时弊视前疏尤剴切黄干见而叹曰使臣子尽如此国安有不兴乎寻丐归擢大理丞不拜出知南康军岁大稔奏蠲田赋募流民筑江堤而给其食既而谒白鹿洞亲为诸生讲解作兴之实踵朱子之蹟改知南剑州又值旱疫为蠲逋赋十数万弛新输三之一身率僚吏持钱粟药饵户给之复仿白鹿洞规创延平书院以教其士改知漳州未行会宁宗崩时事忽异宓呜咽累日无何致仕去宝庆二年除提点广东刑狱三辞不就以直秘阁予祠拜祠命而辞职名久之三学诸生请起宓而宓没矣宓性刚毅信道尤笃每言居官必如顔真卿居家必如陶潜而深慕诸葛亮身死家无余财库无余帛庶乎能蹈其语者所著有论语注义问答春秋三传抄读通监纲目唐史赘疣及文藁数十卷

论曰定公初年孔子不仕宝庆嗣立李燔陈宓亦屏迹丘樊不磷不缁昔诸葛亮不为苟出一出而鞠躬尽瘁陶潜不为苟处一处而泥闭渊蟠顔真卿终始蹇蹇殉节从容此於出处死生之义备矣三代以返宓独企此三人其进退合道也宜哉

何基

何基字子恭金华人父伯翥为临州丞时黄干适知县事基遂事干干告以为学必有真实心地刻苦工夫基悚然受命於是随事研精卒闻渊源之懿凡微辞奥旨平心覃思未尝参以己意於书辄加标点悉中关会窃微读者醒发不待讲解而自见其义尝言立志贵坚规模贵大充践服行死而後已论治经之法曰读易当尽去胶固支离之见洁净其心以玩精微之理沈潜涵泳得其根源乃可渐观爻象读诗须扫荡胸次然後吟哦上下讽咏从容使人感发方为有功於朱子绪言一经明阐则旨趣益新郡守延聘或荐之皆不就景定间被旨添差婺州教授兼丽泽书院山长辞咸淳初授史馆校勘兼崇政院说书又辞改承务郎主管西岳庙终不受年八十一卒国子祭酒杨文仲请於朝諡文定凡学庸大传通书易啓蒙近思录皆有论着名曰发挥其确述师训如此

论曰易蔽於九师诗凿於序说而经义之窒不通者多矣朱子兴雅自信於易卜筮诗雅郑之说盖明象以待变而易之用神逆志以诤辞而诗之味永基领此意笃信不疑又从而发挥之遂啓金华之派以衍正学之传其为功於朱门岂浅哉

王柏

王柏字会之金华人大父师金从杨时学父瀚又及朱子之门柏少时慕诸葛亮为人自号长啸踰三十始知家学之源捐去俗学勇於求道与其友汪开之着论语通旨至居处恭执事敬恍然曰长啸非圣门持敬之道也更自号为鲁斋闻何基尝从黄干得朱子之传即往事之基授以立志居敬之旨为作鲁斋箴以勉之柏高明絶识弘论英辨每质问或一事至十往返於

大学中庸论语孟子通监纲目诸编标注考校尤为精密其居家夙兴见庙飭庀诸务肃然严整当暑阖阁静坐子弟白事非衣冠不见少孤事兄恭季弟早世抚其孤义以慈收合宗族周恤之汪开之没家贫为敛且葬两为丽泽上蔡书院山长其教必以大学为先虽乡之耆德皆执弟子礼理宗升遐率诸生制服临於郡及病革整衣冠端坐挥妇女勿近卒国子祭酒杨文仲请於朝謚文宪所着书凡数十种

论曰诸葛亮之学淡泊宁静以为体开诚布公以为用淡泊则物莫能胜故公宁静则心不外驰故诚体与用合以是卓然为天民之亚至史称其抱膝长啸则充然内足之符而浅者乃目为睥睨一切之意误矣当其负屣涖政所自信者亦曰谨慎而已此与圣门持敬之说曷尝有二旨哉柏之始而慕亮既而若有微辞殆未究观其本末者耳然柏之翻然黜俗一变至道可谓豪杰之士矣

熊禾

熊禾字去非号勿轩又号退斋建阳人自幼有志於学师事朱子高第辅氏讲贯圣经贤传沈潜天人道德之蘊登度宗咸淳进士授宁武州司户参军时四方绎骚道梗不赴宋亡退修初服束书入山筑洪源书室聚徒讲习四方来学者云集粝食涧饮日以孔孟之道相磨礲於朱子之书是信是行阅十二年归故山复创鳌峯书院益肆其力於六经谓朱子平生精力在易四书诗仅完藁书开端而未及竟三礼惟有通解缺尚多春秋仅发大义而已又谓周官六典原不缺当复其旧仪礼十七篇当附以礼记传义春秋倣纲目例以左氏书实其事以公谷程胡诸家之说足其义乃於易诗书春秋皆为之集疏每经取一家之说为主而裒衆说以疏之复着小学四书集疏以为之阶梯其他农礼兵刑皆有撰还感世俗葬祭者多为异端所蛊一正以圣道勒成一帙解其惑晚年更修三礼通解将脱藁以疾卒着述多厄兵火独四书诗易小学数种有传於世其论孔庙祀典後世多行其言当宋社之既屋也叠山谢枋得闻禾名远涉访之相抱痛哭不忍卒别相与讲学者数月新安胡一桂挟其道诣武夷访禾及退自知不及频年就之讲论而一桂之学益以明禾尝修考亭书院而为之记及後有求考亭书院记於翰林学士吴澄者澄负一时重望闻禾所作遂拱手阁笔云

论曰禾与许衡出处不同一则抱采薇之孤志一则际从龙之盛遇然禾谓衡倡明文公之学启沃君心栽培相业以开治平之原而衡序禾遗集有立纲常关世教绍统绪之称盖其心同其道同易地则皆然也殆孟子所谓其趋一者是耶

史传三编卷七

卷八

钦定四库全书

史传三编卷八

大学士朱轼撰

名儒传六

元

赵复

赵复字仁甫德安人嗜周程张朱之学元太宗时太子库春破德安以德安尝逆战残之复赖姚枢得脱复念九族俱丧与其北去不如死乃夜走水际仰天大号将自投枢追及之力为宽譬乃强与枢俱北先是南北道绝载籍不相通至是复尽录所记程朱诸经传注以付枢比至燕弟子从者百有余人世祖在潜邸召见问曰我欲取宋卿能导我乎对曰宋父母之国引它族以伐父母非义也世祖悦因不强之仕时杨惟中亦宗复学与枢同建太极书院祠周子以二程张杨游朱六君子配而延复讲授其中复以周程而後其书广博学者未能贯通乃原羲农尧舜所以继天立极孔子颜孟所以垂世立教周程张朱所以发明绍续者作传道图而以书目条於後别着伊洛发挥以标其宗至朱子门人则以见於登载得诸传闻者作师友图以寓私淑之志又辑伊尹颜渊言行为希贤录使学者知所向慕及枢退隐乃即复传其学由是许衡刘因郝经皆得其书而尊信之北方知有程朱之学自复始复为人乐易而耿介虽居燕不忘故土与人交尤笃分谊元好问文名擅一时其南归也复赠之言以博溺心末丧本为戒其教人之旨如此以家在江汉之上自号江汉故学者称江汉先生

论曰赵岐之族几殄於宦竖之党犹岐有以激之也复以被兵厥族亦殄其祸益加亟矣当其以子身孤游於蒙难艰贞之余而能卓然为阐明扶树之绩使北方人士皆知学程朱而师孔孟可谓儒者夫儒者兴衰激极导迎善气而二赵皆罹酷祸哀哉

姚枢

姚枢字公茂柳城人後迁洛阳杨惟中与覲太宗及惟中南伐诏枢即其军中求儒道释医卜者德安拔枢脱名儒赵复於死始得程朱之书後为燕京行台郎中行台黷货时以分枢枢一切拒绝因弃官去携家辉州作家庙别为室以奉孔子及宋儒周子等像刊诸经惠学者读书鸣琴若将终身许衡在魏闻之乃诣枢录程朱书以归已复尽室依枢论者谓程朱之学自南而北始於复盛於衡然非枢则复无所与传衡无所从受故北方正学之兴枢功为多世祖在

潜邸召问治道待以客礼枢为书数千言首陈帝王之道治平之经彙为八目曰修身力学尊贤亲亲畏天爱民好善远佞大抵不谬於程朱之意次又条三十事其请立省部举逸遗班俸禄定律设监司简驿传修学校重农桑肃军政布屯田通漕运复常平杜告讐尤切於时弊世祖奇其才动必咨之枢为人含弘而仁恕恭敏而俭勤未尝疑人欺已有负其德亦不留怨忧患之来不见顔色然智虑沈深每出意表宪宗诏军民在齐默衮山南者世祖总之世祖既奉诏置酒羣下皆贺枢独默然及罢酒世祖问枢曰汉地军民吾尽有之异时间言易入不若维持兵权供亿取之有司於理为顺世祖曰虑所不及遂以闻宪宗从之及大封同姓勅世祖於南京关中自择其一枢曰南京河徙无常土薄水浅舄鹵生之不若关中厥田上上古名天府陆海於是世祖愿有关中世祖征大理枢於道陈宋曹彬取南唐不杀一人事世祖据鞍呼曰吾能为之枢即马上贺明年师至大理裂帛为旗书止杀之令由是民得完聚後世祖以得中土心被谗宪宗命就关中置局鈎考世祖不乐枢曰帝君也兄也大王为皇弟臣也莫若尽王邸妃主自归朝廷为久居谋疑将自释及世祖见宪宗皆泣下竟不令有所白而罢鈎考局其随事规画类此世祖即位首立十道宣抚使以枢使东平二年拜太子太师辞改大司农是时礼乐崩坏枢以王鏐链习故实请令提举礼乐又举杨庸教孔顔孟三族诸孙之俊秀者皆从之枢尝为帝言王文统学术不纯以游说干诸侯他日必反及李璫谋叛文统果坐璫诛四年拜中书左丞请睦亲族以固本建储副以重祚定大臣以当国开经筵以格心修边备以防虞蓄粮饷以待歉立学校以育材劝农桑以厚生帝嘉纳之十年拜昭文馆大学士详定礼仪事明年师复南下先是世祖降不杀人之诏巴延济江兵不踰时降城三十户逾百万及是役军官利财剽杀自夏徂秋一城不拔枢乃请除宋诸滥刑仍申止杀之今使赏罚必行以故所向有功十三年拜翰林学士承旨枢自少力学宋九嘉见之即许为王佐畧其後卒佐世祖定天下十七年卒年七十八諡文献

论曰民心者天命之寄也故曰天视自我民视天听自我民听後世用兵徒计功利於是有假屠掠以立威者矣夫屠掠则民心去之欲邀天眷不亦难乎枢之献说姑以利害筹之冀使其言易入耳计枢之所全活前後不可胜数元之卒济大业枢实为首庸矣

许衡

许衡字仲平怀之河内人甫授章句辄能诂其义旨尝问曰读书何为师曰取科第耳曰如斯而已乎师大奇之已乃辞去曰是儿颖悟非凡吾非其师也留之不能止比长嗜学如饥渴遭乱家贫无书於日者家见书疏义即请寓录之以归及逃难岨嶠山始得王弼易说夜思昼诵身体而力践之当暑过河阳渴甚道有梨衆争取啖衡独危坐曰非其有而取之不可人曰世乱此无主衡曰吾心独无主乎转鲁留魏人见其有德稍稍从之居三年闻乱且定乃还怀往来河洛间从姚枢得程朱书益有得寻躬耕苏门与枢及窦默相讲习粟熟则食不熟则食糠核财有余即斥以资族人及诸生之贫者非义所遗一毫不受於经传子史礼乐名物兵刑食货水利无所不讲而慨然以道为己任世祖出王秦中思所以化秦人乃召衡为京兆提学秦人闻衡至莫不喜幸来学由是郡县皆建学校民大化之世祖南行乃还怀世祖即位召至京师时王文统以言利进为平章政事衡及枢入侍言治乱休戚必以义为宗窦默亦屡攻文统文统患之奏枢为太子太师默为太子太傅衡为太子太保阳为尊用实不使数侍上也默枢

拜命将入谢衡曰此不安於义也且礼师傅与太子位东西乡师傅坐太子乃坐公等度能复此乎不能是师道自我废也枢等以为然凡五辞乃改命枢大司农默翰林侍讲学士衡国子祭酒未几衡谢病归至元二年以安图为丞相帝欲衡辅之复召使议事中书省衡乃上疏陈五事一言立国规模必行汉法乃可长久二言仕者当给俸以养其廉未仕者当宽立条格俾就叙用外设监司以察污滥内专吏部以定资历三言上天眷命作之君师盖以至难任之非予以可安也知其为难而以难处则难或可为不知为难而以易处则他日之难有不可为者矣四言国家徒知敛财之巧不知生财之由徒知防人之欺不欲养人之善诚优重农民敲游惰而归之南亩自都邑至州县皆设学校使皇子以下至庶人之子弟皆入於学十年以後必非今日之比矣五言天下所以定者民志定也夫民不安於白屋仕不安於卑位辐辏并进各怀无厌无耻之心士人可不为寒心哉书奏帝嘉纳之衡每见帝多所陈奏退辄削草故其言常秘帝以衡多病命五日一至省四年乃听归怀逾年复召六年命定朝仪仪成又诏定官制衡考古今分并之序凡省部院台郡县与后妃储藩百司所联属统制定为图奏上之及阿哈玛特入中书势倾朝野衡与之议正言不少让帝又以阿哈玛特子金枢密院衡执议曰国家事权兵民财三者而已今其父典民与财子又典兵不可帝曰卿虑其反耶对曰彼虽不反此反道也阿哈玛特由是衔之亟荐衡宜在中书欲中以事俄除左丞固辞不获後从幸上京论哈玛特专权罔上蠹政害民不报因谢病帝惻然命自举代衡曰用人天子之大柄臣下论其贤否则可若授以位则当断自宸衷不可使臣下有市恩之渐乃止帝久欲开太学会衡请益力乃以为集贤大学士兼国子祭酒亲择蒙古子弟俾教之衡闻命喜曰此吾事也请徵其弟子耶律有尚刘季伟等十二人分处各斋为斋长时所选子弟皆幼稚衡待之如成人爱之如子出入进退严若君臣其教因觉以明善因明以开蔽相其动息以为张弛课诵少假即习礼或习书算其尤少者则习拜跪揖让洒扫应对或射或投壶负者罚读书若干遍久之诸生人人自得尊师敬业虽童子亦知三纲五常为生人之道十年权臣屡毁汉法诸生廩食或不继衡丐还帝以问王磐磐曰衡教人有法诸生行可从政此国之大体宜勿听去窆默为衡固恳乃听用刘秉忠言以耶律有尚等为助教守衡规矩十三年复以原官召领太史院事初元得中原循用金大明历气朔渐差至是诏王恂更定恂以历家知历数不知历理请得衡领之衡乃与太史令郭守敬新制仪象圭表一本天道自然之数可以施之永久十七年历成赐名授时颁之天下六月以疾丐还帝以其子师可为怀孟路总管以养之明年病革家有祭礼犹扶而起奠献如仪曰一日未死不可不有事於祖考既彻家人餽怡怡如也已而卒年七十三是日大雷电风拔木怀人无贵贱少长皆哭於门四方学士闻讣皆聚哭或数千里来哭墓下衡善教其言煦煦虽与童子语如恐伤之随其才皆有所成就故所至人尽乐从所去人不忍舍服其教如金科玉条听其言即武人俗士无不感悟大德二年諡文正至大二年封魏国公皇庆二年从祀孔子庙庭衡自署其斋曰鲁故学者称鲁斋先生

论曰朱子而後正学大明然及门诸子已有失其微旨者矣惟宋之真元之许其最醇乎自汉以下醇儒如董仲舒之伦少得柄用者衡虽未能久立於位然与世祖建国之规模责难陈善以诚格君秉礼守义以道教国大儒之泽固如此矣至劾阿哈玛特不肯一日苟容於朝学术既定志节亦伸诚非匡衡张禹辈章句之儒所得拟似而妄托也

窆默

竇默字子声广平肥乡人少有立志族祖旺为郡功曹令习吏事不肯未几见俘於元及脱归则家已破惟母独存因惊怖母子俱病母竟亡扶病藁葬而元兵复至遂南走渡河依母党吴氏转客蔡州及金主迁蔡默恐兵且至又走德安始从谢宪子得伊洛之书是时杨惟中衔元主命招集默乃北归大名与姚枢许衡朝暮讲习至忘寝食俄还肥乡以经术教授由是知名世祖在潜邸召问治道默首以三纲五常对又言帝王之道在诚意正心心既正则朝廷远近莫敢不一於正一日凡三召对敬待加礼世祖尝访以能明治道者默荐姚枢久之丐还世祖即位复召问曰我欲求如唐魏徵者今有之乎默曰犯顔谏诤刚毅不屈许衡其人也世祖以默为翰林侍讲学士时中书王文统专政默上书曰平治天下必用正人端士唇吻小人一切功利之说不能定国家基本为久远计又於上前斥文统学术不正居相位久必祸天下上曰然则谁可相者对曰无如许衡帝不悦文统深忌之请以默为太子太傅默以太子位号未正不当先受太傅之名固辞有顷谢病归及文统诛帝思默言召还赐第京师月给廩禄有大政辄以访之默言三代风俗淳厚皆设学养士所致请建学立师选贵族子弟教之帝深嘉纳尝侍上言君有过举臣当直言今君曰可臣亦曰可君曰否臣亦曰否非善政也默为人温然平易平居未尝评隲人物至论国家大计面折廷诤人谓汲黯无以过之至元十二年默年八十老不视事帝数加存问十七年加昭文馆大学士卒年八十五諡文正

论曰汲黯之折公孙弘与默之斥王文统其事诚类然当汉武表章六经黯不能恢弘至道以绍三代之业则以不学为累故也默之直似黯而学术过之黯遭秦政焚坑之余而默际程朱讲明之後故知先觉觉民之功明德远矣

刘因

刘因字梦吉保定容城人父述刻意问学尤邃於性理年四十始生因其夕梦神人马载一儿与之故名駟字梦骥其後改焉因天资絶人才器超迈甫弱冠慨然思得如古人者友之作希圣解初为经学寻览训诂疏释之说叹曰圣人精义殆不止此及得周程张邵朱吕之书一见能发其微曰吾固谓当有是也其後乃评其学之所长曰邵至大也周至精也程至正也朱子极大尽其精而贯之以正也其识解渊纯率类此因蚤丧父事继母孝性不苟合不妄交家虽贫非其义一介不取居家教授师道尊严弟子造其门者随材器教皆有成就公卿过保定者闻因名往往修谒多逊避不与相见或怪其傲弗恤也尝爱诸葛亮静以修身之语表所居曰静修至元十九年以布呼密荐徵授承德郎左赞善大夫教近侍子弟未几以母疾辞归明年丁内艰二十八年复徵为集贤学士嘉议大夫固辞帝曰古所谓不召之臣其斯人之徒与遂不强致三十年卒年四十五无子闻者嗟悼諡文靖所著有四书精要及易系辞说门人所记有小学四书语録学者称静修先生

论曰朱子有言先天之图大而详太极之图精而约邵子之学本於先天周子之緼涵於太极程子师周又返求於六经以发明之虽邵学曾不屑屑焉至朱子而後兼综道数集数子之成因之论可谓确矣因天资杰出蚤闻乎道应聘而起以母老寻归所谓志乎道德者功名不足以累其心欤

金履祥

金履祥字吉父婺之兰谿人先本刘氏以避钱武肃王嫌名改金氏天资睿敏於天文地形礼乐田乘兵谋陰阳律历之书靡不毕究及壮乃慕濂洛之学事同郡王柏闻立志端本之说又从柏登何基之门由是讲贯益邃时宋事已非履祥遂絶意仕进然常怀其经济畧及襄樊围急宋不能救履祥乃献策请以重兵由海道趋燕则襄樊不攻自解所叙海舶经由郡邑以及巨洋别岛难易远近了然可据至元行海运所由海道以较履祥所上书无咫尺异德佑初徵为迪功郎史馆编校不至宋亡屏居金华山中嘯咏云月视世故泊如也平居终日俨然至接物则盎然而恻训迪学者谆切无倦尤笃於分义何基王柏之丧履祥皆以义制服尝倾貲赎其故人子其子後贵履祥与相见劳问而已卒不自言其德所着通监前编断自唐尧以下接於司马光资治之作其历用邵子皇极经世其例依胡氏皇王大纪既成以授门人许谦又着有大学章句疏义论孟集注考证书表注诸编皆传於学者大德中卒至正间追謚文安当时论者以为何基清介纯实似尹和靖王柏高明刚正似谢良佐而履祥实兼之所居仁山之下学者称仁山先生

论曰履祥守洁怀贞有汉管宁晋陶潜之操撰述诸书皆可为学的而通监前编最行於世夫书始尧典而易大传乃称庖羲神农黄帝故司马迁作史记首立三皇本纪然其事多茫昧文无足徵况於循蜚四纪益荒唐不可考信者乎履祥之作前编断自陶唐者是也所考禹贡山川尤多蔡传之所未逮云陈栎

陈栎字寿翁徽之休宁人自少涉猎经史十五为乡人师宋亡科举废栎慨然发愤致力於圣人之学尝以为有功圣门者莫若朱子自朱子没诸家之说往往乱其本真乃着四书发明书传纂疏礼记集义诸编亡虑数十万言凡诸家说有畔於朱子者刊而去之其微辞隐义则引而伸之吴澄尝谓朱子之道不坠者栎功为多延佑初诏以科举取士为有司所强举於乡遂不复赴礼部教授於家不出门户者数十年性孝友尤刚正日用间动中礼法与人交不以势合不以利迁善诱学者谆谆不倦所居堂曰定宇学者由是称定宇先生元统二年卒年八十三揭傒斯志其墓与澄并称曰澄居通都数登用学者四面归之故其道远而章尊而明栎居万山间与木石俱故必待其书之行天下乃能知之及其行也亦莫之御诚可谓豪杰之士矣世以为知言论曰栎因科举废发愤於圣人之道可谓伟矣然程子有云科举不患妨功惟患夺志志苟立则科举之学固即所以体究经籍之蘊以养其立身用世之具宋世大儒曷尝不由此进哉若乃华繁本拨剗袭浮靡以取世资此则无志者之所为而非科举取士之本意也

吴澄

吴澄字幼清抚州崇仁人少颖悟随口辄成诵夜读书往往达曙母窃忧之节与膏火澄潜伺母寝复燃火默诵既长於经传无不通习知用力圣贤之学尝举进士不第至元十三年江西初附所在盗贼犹多乐安郑松招澄居布水谷乃着孝经章句校定易书诗春秋仪礼及大小戴记侍御史程钜夫奉诏求贤江南起澄至京师未几以母老辞去朝廷命有司即澄家録所着书置国子监以资学者元贞初游龙兴按察司经历郝文延至郡学讲论日记其问答凡数

千言行省掾元明善素以文学自负尝问澄易诗书春秋奥义叹曰与吴先生言如探渊海遂执弟子礼左丞董士选亦尝延澄於家亲执馈食曰吴先生天下士也及士选入朝荐澄有道擢应奉翰林文字有司敦劝久之乃至而代者已到官澄即日南归寻除江西儒学副提举居三月以疾去至大元年召为国子监丞先是许衡为祭酒始以朱子小学诸书授弟子衡去渐失其旧及澄至旦则燃烛堂上诸生以次受业日昃乃退就燕居之室执经问难者接踵澄各因其材质反覆训诱每至夜分虽寒暑不勸皇庆元年迁司业用程明道学校奏疏胡安定六学教法及朱子学校贡举私议约为教法四条未及行一夕谢去诸生有不谒告而从之南者俄拜集贤直学士特授奉议大夫行次真州疾作不进英宗即位迁翰林学士进阶大中大夫尝诏为浮屠藏经序澄辞不为会帝崩而止泰定立初开经筵首命澄为讲官有诏集议太庙昭穆之次澄议曰古者天子七庙庙各有宫太祖居中左三庙为昭右三庙为穆昭穆神主各以次迁然有司习见同堂异室之制竟如旧次云时澄已有去志适修英宗实录命澄总之居数月实录成未上即移疾去中书追之不及乃言於帝曰吴澄国之名儒朝之旧德今请老归宜有褒异诏加资善大夫泰定四年卒年八十五諡文正澄身若不胜衣正坐拱手气融神迈答问亹亹闻者涣若冰释故郡邑所经由士大夫皆迎致执业四方之士不憚数千里蹶躅来学常不下数千百人少暇即着书至没身而後已於易书春秋礼记各有纂言又作学基学统二篇以明学之本与为学之序程钜夫题其所居曰草庐学者称为草庐先生

论曰古者大夫七十而致政当澄之为司业年已七十矣曾不早引悬车之义自是而後立於朝者犹十有余年是何濡滞也读其纂言诸编天聪廓开异颖独发时足以赅续前人之所未至推其妙悟殆方驾许衡而上之又何其有劳於经耶

胡炳文

胡炳文字仲虎徽州婺源人父斗元从朱子从孙得书易之传炳文尤潜心朱子之学上溯伊洛以达洙泗渊源靡不推究仁宗延佑中以荐署信州道一书院山长再调兰溪州学正尝作周易本义通释十二卷其序曰宇宙间皆自然之易易皆自然之天天不能画假伏羲以画天不能言假文王周孔以言易言於象数而天具焉易作於卜筮而天寓焉解易凡几百家支离文义者无足道附会取象者尤失之惟邵子於先天而明其画程子於後天而演其辞朱子本义又合邵程而一之是於羲文周孔之易而会其天者也予此书融诸家之格言释本义之奥旨後之学易者或由是而有得於本义则亦将有得於羲文周孔之天矣其於朱子所着四书用力尤深作四书通三十四卷其序曰六经天地也四书行天之日月也子朱子平生精力之所萃而尧舜禹汤文武周孔顔曾思孟之心之所寄也推之极天地万物之奥而本之皆彝伦日用之懿言若至近而涵至永之味事皆至实而该至妙之理余老矣潜心於此余五十年谓之通矣乎未也独惜乎疏其下者或泛或舛不得不会其同而辨其异也又着春秋集解礼书纂述大学指掌图五经会义尔雅韵语等书武宗正大间其族子浚为建明经书院以处四方来学者儒风之盛甲东南世号云峯先生

论曰易与四书自朱子集大成而阐定之如日月经天江河行地矣後之着述者或且支离附会不足与朱子相发明道不足而强言之无当也炳文沈潜玩索以老其身澹然於世味之外

而悠然浹洽於二书之中故自程朱後解易数十家独云峰最为精切其四书亦比诸家为善虽未得措之经国大业而羽翼正道确遵朱子用后後学功岂小哉

许谦

许谦字益之婺之金华人少孤甫能言世母陶氏口授以孝经论语入耳辄不忘稍长肆力於学立程自课虽疾恙不废既乃受业於金履祥履祥语之曰士之为学若五味在和醯酱既加则酸咸顿异今子来三日矣而犹夫人岂吾学无以发子耶谦闻之惕然居数年尽传其奥谦之为学穷探渺微虽残文美语皆不敢忽遇不可通不为强解至旧说有未安则亦未尝苟同也读四书章句集注则着有丛说读诗集传有名物钞读书集传亦有丛说其观史有治忽几微他若天文地理典章制度食货刑法字学音韵医经术数之说靡不该贯又尝句读仪礼及春秋三传别以朱墨於其宏纲要领意有所明则表而见之其勤如此性不喜矜露所为诗文非扶翼经义张维世教未尝下笔昼之所为夜必书之号自省编其不可书则不为也延佑初居东阳八华山开门讲学学者翕然从之幽冀齐鲁之士皆至其教人至诚淳悉内外殫尽尝曰已有知使人亦知之不亦快乎或问难而辞不能达则为理所欲言而解其惑讨论讲贯终日不厌撮其粗疎入於密微惰者作之銳者抑之拘者开之放者约之及门着録者千有余人随其材分咸有所得谦笃於孝友有絶人之行而处世不流於俗亦不胶於古不出闾里四十年四方荐绅过其乡邦者必就其门存问或访以典礼政事谦观会通以折其衷无不厌服大德中荧惑入南斗勾已而行谦以为灾在吴楚其岁果大祲谦貌为加?或问之曰公私匱竭道殣相望吾能独饱耶中外名臣论荐其行谊者前後章数十上皆不就至元三年卒年六十八赐諡文懿尝自号白云山人故世称白云先生先是何基王柏金履祥之学未能大显至谦而後益着江澗行省为请於朝建四贤书院以祠基柏履祥及谦云

论曰宋元之间授受各有渊源金华四子之学出自黄干故世以为薪火之正传考其遗书各有所至要皆力务私淑以维朱子之绪者也谦之高第有宋濂濂之高第有方孝孺及孝孺殉义而一綫始絶

吴海

吴海字朝宗闽县人隐居不仕学周程张朱之学一时名人如贡师泰林泉生蓝晦王翰皆雅重之初承父命欲徙居东鲁逡巡二十余年而道路不通乃自号鲁生或讥曰子自拟两生乎海曰非也吾将居鲁取其名也质鲁取其义也且吾学仲尼之道谓之鲁生不亦可乎明初部使者欲荐於朝力辞不赴居家采摭古今孝子顺孙节妇烈女与兄弟相友娣姒和睦者附以格言至论以教乡里又着书言杨墨佛老为六经之贼管商申韩为治道之贼遗事外传为史氏之贼荒词荒说为文章之贼皆足惑人欲上之人悉取其书而禁絶之使天下晓然知正道慕邹鲁之风为文雅奥严整而归诸理自顔所居为闻过斋而为之箴曰过而人告之者幸也过而不闻不幸也告之而不受受之而不悔悔之而不改是自弃也海虽不敏忍自弃乎着闻过斋集学者称闻过先生

论曰海学周程张朱以上溯仲尼之道自号鲁生所志岂卑哉当明之初海已年老又见刑法过峻凡所延致大都皆绳束驰骤未尽展布一有絀误而罪谴及之海之不仕或以此乎以海之奥学粹品使用於时以其教於乡里者放之天下则子臣弟友之庸推而致之即可通於神明而光於四海乃竟鬱而不施惜哉

史传三编卷八

儒有儒术有儒行有儒效术诡於经虽有笺注如魏之何晏晋之王弼不可以为儒行诡於圣虽有物望如汉之杨雄马融不可以为儒效诡於王虽有敷陈创建如汉之匡衡宋之王安石不可以为儒是故必能穷经而後其儒也正能由圣而後其儒也醇能崇王而後其儒也大循是三者以求儒於三代以下独周程张朱数子为能充其道而无愧耳虽然先王祭川之义先河後海数子之於儒譬则海也汉唐诸儒则其川也何者数子之道皆求诸遗经而得之而经之存实汉唐诸儒是赖况其间如董仲舒刘向郑康成王通韩愈氏之伦皆彬彬然升堂之选哉逮乎洛闽之兴既盛渊源所渐有若亲承授受者有若私淑艾者有若闻风而兴起者其於詮经闲圣尊王黜霸皆与有劳西山鲁斋尤其继起之杰出者也吾师高安公笃嗜正学勤勤至治而又适值

圣天子亲承道统稽古右文之会凡诸文武之政唐虞

之传既躬行神契於

九重之上穆清之中复

特命斟酌从祀之典自汉迄明诸儒多所升配天下用

是憬然知

上志所向而吾师见知之遇实与臯夔等烈也吾师论道之暇与梁村蔡先生念欲辑历代名儒传一书以惠学者而以属之清植顾植凡下岂足发先哲之精微以副吾师之雅志姑稟承指授用究厥业吾师又与梁村先生增删而是正之凡閱一岁而书始成昔朱子编言行録渊源録又与东莱合成近思録皆足以明学术正人心厚风俗於无穷吾师与梁村先生之为是书也欲使羣儒之衣冠声警恍若遇诸一堂其嘉言懿行累累然如贝之编而珠之贯学者苟缘是以端其术正其行则经学之津梁圣道之阶梯当不外是而推之以为世用凡所以佐

圣天子而成勲华之盛者亦将由此其选矣受业安溪

李清植敬跋

卷九

<史部,传记类,总录之属,史传三编

钦定四库全书

史传三编卷九

大学士朱轼撰

名臣传一

汉

张良

张良字子房韩人也大父开地父平俱相韩历五主秦灭韩时良年少未宦家僮三百人弟死不葬悉以家财求客刺秦王为韩报仇东见仓海君得力士为铁椎重百二十筋秦皇帝东游至博浪沙中良与客狙击秦皇帝误中副车秦皇帝大怒大索天下甚急良乃更名姓亡匿下邳尝闲步游下邳圯上有一老父衣褐至良所直堕其履圯下顾谓良曰孺子下取履良愕然欲殴之为其老强忍下取履父曰履我良业为取履因长跪履之父以足受笑而去去里所复还曰孺子可教矣後五日平明与我会此至期良往父已先在怒曰与老人期後何也去後五日早会五日鸡鸣良往父又先在复怒曰後何也去後五日复早来五日良夜未半往有顷父亦来喜曰当如是出一编书曰读此则为王者师矣旦日视其书乃太公兵法也良因异之常习诵後十年陈涉等起良亦聚少年百余人景驹自立为楚假王在陈留良欲往从之道遇沛公遂属焉沛公拜良为廐将良数以太公兵法说沛公沛公喜常用其策良为他人言皆不省乃曰沛公殆天授遂从之不去沛公之薛见项梁共立楚怀王良乃说项梁曰君已立楚後而韩诸公子横阳君成贤可立为王益树党项梁使良求韩成立为韩王以良为韩司徒与韩王将千余人西畧韩地得数城秦辄复取之沛公之从雒阳南出轘辕良引兵从沛公下韩十余城沛公乃令韩王成留守阳翟与良俱南攻下宛西入武关沛公欲以二万人击秦嶢下军良曰秦兵尚强未可轻臣闻其将屠者子贾竖易动以利愿沛公且留壁使人先行为五万人具食益张旗帜诸山上为疑兵令酈食其持重宝啗秦将秦将果欲连和俱西袭咸阳沛公欲听之良曰此独其将欲叛耳恐士卒不从不从必危不如因其解击之沛公乃引兵击秦军大破之再战皆胜遂至咸阳秦王子婴降沛公入秦宫宫狗马重宝妇女以千数欲留居之樊哙谏不听良曰秦为无道故沛公得至此夫为天下除残贼宜缟素为资今始入秦即安其乐此所谓助桀为虐且毒药苦口利於病忠言逆耳利於行愿沛公听樊哙言沛公乃还军霸上项羽至鸿门欲击沛公羽季父项伯素与良相善良居下邳时伯尝杀人从良匿至是夜驰入沛公军私见良欲与俱去良曰臣为韩王送沛公今事有急亡去不义良因固要项伯见沛公沛公

与伯饮为寿结婚令伯具言沛公不敢背项王旦日良从沛公以百余骑至鸿门谢项王项王留与饮项氏臣范增令项庄拔剑起舞欲击沛公项伯亦拔剑起舞常以身翼蔽沛公庄不得击於是良至军门召樊哙俱入哙入请让羽且为沛公解稍定沛公起如厕因招哙出令良留谢谓曰度我至吾军中公乃入沛公已去间至军中良入谢曰沛公不胜桮杓不能辞谨使臣良奉白璧一双再拜献大王足下玉斗一双再拜奉大将军足下大将军者范增也项王曰沛公安在良曰闻大王有意督过之脱身独去已至军矣汉元年沛公为汉王赐良金百镒珠二斗良具以献项伯汉王亦因令良厚遗项伯使请汉中地项王许之遂得汉中地汉王之国良送至褒中遣良归韩良因说汉王烧绝栈道示天下无还心以固项王意乃使良还行烧绝栈道良至韩韩王成已为项羽所杀时汉王方定三秦良乃遗项王书曰汉王失职欲得关中如约即止不敢复东又以齐反书遗羽曰齐欲与赵共灭楚项羽以故未西兵而北击齐良间行归汉汉王以为成信侯从击楚汉兵败还至下邑汉王下马踞鞍而问曰吾欲捐关以东等弃之谁可与共功者良曰九江王布楚泉将与项王有隙彭越与齐王田荣反梁地此两人可急使而汉王之将独韩信可属大事当一面即欲捐之捐之此三人则楚可破也汉王乃遣隋何说布而使人连彭越令韩信将兵举燕代齐赵卒破楚者此三人力也良多病未尝特将也常为画策臣时时从汉王汉三年项羽急围汉王於荥阳汉王患之与酈食其谋挠楚权食其请复立六国後汉王曰善趣刻印良从外来汉王以酈生计告之良曰谁为陛下画此计者陛下事去矣昔汤武伐桀纣封其後者度能制其死命也武王入殷表商容间封比干墓释箕子之囚发粟散财以赐贫穷倒载干戈放牛休马示不复用数者陛下皆未能也且天下游士离亲戚弃坟墓去故旧从陛下者徒欲日夜望咫尺之地今复立六国後游士各归事其主从其亲戚故旧陛下谁与取天下乎且夫楚惟无强六国立者复挠而从之陛下安得而臣之诚用客之谋陛下事去矣汉王辍食吐哺骂曰竖孺几败乃公事令趣销印汉四年韩信破齐请自立为假王是时楚方急围汉王於荥阳信使者至汉王大怒良因附耳语曰汉方不利宁能禁信之王乎不如因而立善遇之使自为守不然变生汉王悟遣良往立信为齐王徵其兵击楚及项王与汉约中分天下以鸿沟为界项王引兵东归汉王欲西归良与陈平说曰汉有天下大半诸侯皆附楚兵罢食尽此天亡楚之时也不如因其机而遂取之令释不击此所谓养虎自遗患也汉王从之五年追项王至阳夏南止军与韩信彭越期而信越不至固陵为楚兵所破汉王入壁自守良曰楚兵且破信越未有分地其不至固宜君王能自陈以东傅海尽与韩信睢阳以北至谷城以与彭越使各自为战则楚易破也汉王从其计发使告信越信越兵尽会共破楚兵垓下遂灭楚汉六年封功臣良未尝有战功高帝曰运筹策帷幄中决胜千里外子房功也自择齐三万户良曰始臣起下邳与上会留此天以臣授陛下陛下用臣计幸而时中臣愿封留足矣不敢当三万户乃封良为留侯帝已封大功臣二十余人其余日夜争功不决未得行封帝在雒阳南宫从复道望见诸将坐沙中偶语问曰此何语良曰陛下起布衣以此属取天下今为天子而所封皆萧曹故人所亲爱所诛者皆平生所仇怨今军吏计功天下不足以徧封此属畏陛下不能尽封又恐见疑过失及诛故相聚谋反耳帝曰为之奈何良曰上平生所憎羣臣所共知谁最甚者帝曰雍齿良曰今急先封雍齿以示羣臣则人人自坚矣帝从之羣臣皆喜曰雍齿且侯吾属无患矣刘敬说帝都关中左右大臣皆山东人多劝帝都雒阳良曰雒阳小不过数百里田地薄四面受敌非用武之国也夫关中左殽函右陇蜀沃野千里阻三面而守独以一面东制诸侯诸侯安定河渭漕挽天下西给京师诸侯有变顺流而下足以委输此所谓金城千里天府之国也刘敬说是也於是帝即日驾西都关中良从入关

良性多疾即道引不食谷闭门不出岁余帝欲废太子而立戚夫人子赵王如意吕后恐不知所为或谓吕后曰留侯善画计上信用之吕后乃使建成侯吕泽强要良画计良曰此难以口舌争也顾上有不能致者四人公诚能母爱金玉璧帛令太子为书卑辞安车因使辨士固请宜来来以为客时从入朝令上见之则一助也于是吕后令吕泽使人奉太子书卑辞厚礼迎此四人四人至客吕泽所十一年黥布反帝自将而东羣臣送至霸上良疾强起至曲邮见帝曰臣宜从病甚楚人剽疾愿上毋与楚人争锋因说帝令太子为将军监关中兵帝谓子房虽疾强卧傅太子是时叔孙通为太傅良行少傅事十二年帝破布军归疾甚愈欲易太子良谏不听因疾不视事叔孙太傅称说引古今以死争太子帝阳许之犹欲易之及宴置酒太子侍四人者从太子年皆八十有余须眉皓白衣冠甚伟帝怪问曰彼何为者四人前对各言姓名曰东园公角里先生绮里季夏黄公帝大惊曰吾求公等数岁公避逃我今何自从吾儿游乎四人曰陛下轻士善骂臣等义不辱故恐而亡匿今闻太子仁孝恭敬爱士天下莫不延颈愿为太子死者故臣等来耳帝曰烦公幸卒调护太子四人为壽已毕趋去帝目送之竟不易太子者良本招此四人之力也良乃称曰家世相韩及韩灭不爱万金之资为韩报仇强秦天下震动今以三寸舌为帝者师封万户位列侯此布衣之极于良足矣愿弃人间事欲从赤松子游耳乃学辟谷道引轻身惠帝六年卒谥文成侯初良从帝击代出奇计马邑下及立萧何相国所与帝从容言天下事甚衆非天下所以存亡故不着

论曰君亲之义本于天经发于至性不以盛衰常变贰其心良之一生终始乎韩其说项梁立韩後从沛公卒谋所以破楚皆此志也夫节槩立而後功名生运筹决策为帝者师固老人教之亦素所树立者厚耳宋儒论旷代殊絶人物首屈指张良岂徒以智谋勇畧较哉若夫谷城黄石具载史汉然怪神之事君子阙焉

萧何 曹参

萧何沛人也为沛主吏掾高祖为布衣时何数以吏事护高祖高祖为亭长常左右之高祖以吏繇咸阳吏皆送奉钱三何独以五及高祖起为沛公何为丞督事沛公至咸阳诸将皆争走金帛财物之府分之何独先入收秦丞相御史律令图书藏之沛公所以具知天下阨塞户口多少强弱之处民所疾苦者以何具得秦图书也初诸侯相与约先入关者王其地沛公既先定秦项羽背约乃立沛公为汉王王巴蜀而三分关中地王秦降将欲以距汉汉王怒谋攻羽絃灌等皆劝之何独谏止且曰愿大王养民以致贤收用巴蜀还定三秦天下可图也汉王乃就国何荐韩信为大将军说汉王引兵东定三秦何以丞相留守巴蜀镇抚谕告使给军食汉二年王与诸侯击楚何守关中为令约束立宗庙社稷宫室县邑辄奏上可即不及奏趣以便宜施行上来以闻计户口转漕给军汉王数失军遁去何常兴关中卒辄补缺王以此专属任何关中事汉三年与项羽相距京索间王数使使劳苦丞相鲍生谓何曰今王暴衣露盖数劳苦君者有疑君心为君计莫若遣君子孙昆弟能胜兵者悉诣军所王益信君於是何从其计汉王大说汉五年既灭项羽即皇帝位论功行封羣臣争功不决帝以何功最盛封酈侯所食邑多功臣皆曰臣等身被坚执锐攻城畧地大小各有差今何徒持文墨议论不战顾居臣等上何也帝曰诸君知猎乎夫猎追杀兽兔者狗也而发纵指示兽处者人也今诸君徒能得走兽耳功狗也至如萧何发纵指示功人也羣臣皆莫敢言列侯毕已受封奏位次皆曰平阳侯

曹参身被七十创功最多宜第一帝已饶功臣多封何至位次未有以复难之然心欲何第一关内侯鄂千秋进曰羣臣议皆误夫曹参虽有野战畧地之功此特一时之事夫上与楚相距五岁失军亡衆跳身遯者数矣然何常从关中遣军补其处非上所诏令召而数万衆会上乏絶者数矣汉与楚相守荥阳数年军无见粮何转漕关中给食不乏陛下虽数亡山东何常全关中以待陛下此万世功也今虽亡曹参等百数奚缺於汉奈何欲以一时之功而加万世之功哉萧何第一曹参次之帝曰善乃赐何带剑履上殿入朝不趋益封二千户十一年帝自将讨陈豨有告淮阴侯信谋反者吕后用何计诛信帝已闻信诛使使拜丞相何为相国益封五千户令卒五百人一都尉为相国卫诸君皆贺召平独吊曰上有疑君心故置卫卫君非宠君也愿君让封勿受悉以家私财佐军何从其计帝说其秋黥布反帝自将击之数使使问相国何为相国为上在军拊循勉百姓悉所有佐军如陈豨时客又说何曰君灭族不久矣君初入关中得百姓心十余年矣皆附君尚复孳孳得民和上所为数问君者畏君倾动关中今君胡不多买田地贱贳贷以自污上心必安於是何从其计帝复大说後何为民请上林中空地帝怒械系何数日王卫尉侍前问曰相国胡大罪陛下系之暴也帝曰吾闻李斯相秦皇帝有善归主有恶自予今相国多受贾竖金为请吾苑以自媚於民故系治之王卫尉曰夫职事苟有便於民而请之真宰相事且陛下距楚数岁陈豨黥布反陛下自将而往当是时相国守关中关中摇足则关以西非陛下有也相国不以此时为利今乃利贾人之金乎且秦以不闻已过亡天下李斯之分过又何足法哉帝不怪是日使使持节赦出何何年老素恭谨徒跣入谢上曰相国休矣相国为民请吾苑不许我不过为桀纣主而相国为贤相吾故系相国令百姓闻吾过高祖崩何事惠帝何素不与曹参相能及何病孝惠自临视何疾因问曰君即百岁後谁可代君对曰知臣莫若主帝曰曹参何如何顿首曰帝得之矣何买田宅必居穷僻处为家不治垣屋曰令後世贤师吾俭不贤母为势家所夺孝惠二年卒谥曰文终侯

曹参沛人也秦时为沛狱掾而萧何为主吏高祖起为沛公参以中涓从所至攻城畧地皆有功初赐爵七大夫再迁五大夫章邯破项梁沛公与项羽引兵而东楚怀王以沛公为碭郡长乃封参为执帛号曰建成君迁为威公其後项羽以沛公为汉王汉王封参为建成侯从至汉中迁为将军从还定三秦赐食邑於宁秦汉二年拜为假左丞相以破魏功赐食邑平阳及高祖即帝位徙韩信为楚王参归相印焉高祖封长子肥於齐以参为齐相国六年赐爵列侯食邑平阳万六百三十户世世勿絶参功凡下二国县百二十二得王二人相三人将军六人大莫敖郡守司马候御史各一人身被七十创野战畧地为诸将最孝惠元年除诸侯相国法更以参为齐丞相参之相齐天下初定悼惠王富於春秋参尽召长老诸先生问所以安集百姓而齐故诸儒以百数言人人殊参未知所定闻胶西有盖公善治黄老言厚币请之既至为言治道贵清静而民自定参乃避正堂舍盖公焉其治要用黄老术故相齐九年齐国安集大称贤相惠帝二年萧何卒参闻之告舍人趣治行吾且入相居无何使者果召参参去属其後相曰以齐狱市为寄慎勿扰也後相曰治无大於此者乎参曰不然夫狱市者所以并容也今君扰之奸人安所容也吾是以先之始参微时与萧何善及为宰相有隙至何且死所推贤唯参参代何举事无所变更壹遵何约束择郡国吏木拙於文辞重厚长者即召除为丞相史吏之言文刻深欲务声名者辄斥去日夜饮酒卿大夫已下吏及宾客见参不事事来者皆欲有言参辄饮以醇酒醉而後去终莫得开说以为常参见人有细过掩匿覆盖之府中无事参子窋为中大夫惠帝怪相国不治事廼语窋试从容问而父窋洗沐归间侍自从其所谏参参怒答

二百曰趣入侍天下事非乃所当言也至朝时帝让参曰与寇胡治乎乃者我使谏君也参免冠谢曰陛下自察圣武孰与高皇帝帝曰朕乃安敢望先帝参曰陛下观参孰与萧何贤帝曰君似不及也参曰陛下言之是也且高皇帝与萧何定天下法令既明具陛下垂拱参等守职遵而勿失不亦可乎惠帝曰善君休矣参为相国三年卒谥曰懿侯百姓歌之曰萧何为法讲若画一曹参代之守而勿失载其清静民以宁壹寇嗣侯高后时至御史大夫

论曰世言萧何初进韩信於高帝後复献计诛之为德不卒夫君臣朋友惟其道尔使信果有逆萌何安得顾朋友之私而忘君臣之大哉何与参始相善也既而有隙及何死荐参代相参遵何旧章至尊如君亲如己子官吏宾客衆多具为言卒恪守不变易曰君子以同而异又曰涣其羣元吉涣有丘匪夷所思若何与参可谓羣而不党者矣此与宋韩琦范仲淹上殿争论下殿不失和气者易地皆然彼彬彬号士君子而推贤让能多有未逮亦独何哉

周勃

周勃其先卷人也徙沛织薄曲为生常以吹箫给丧事材官引强高祖起为沛公勃以中涓从所至攻城畧地皆有功赐爵五大夫楚怀王封沛公号武安侯为碭郡长沛公拜勃为襄贲令及为汉王赐勃爵威武侯从入汉中拜为将军还定三秦赐食邑怀德王即皇帝位赐爵列侯剖符世世勿絶食绂八千二百八十户从帝攻韩王信有功又击斩陈豨破卢绾尽定其地勃自从高帝攻战凡得相国一人丞相二人将军二千石各三人别破军二下城三定郡五县七十九得丞相大将各一人勃为人木强敦厚高帝以为可属大事然不好文学每召诸生说事东乡坐而责之趣为我语其椎少文如此初高帝临终谓吕后曰陈平知有余然难独任周勃重厚少文然安刘氏者必勃也及惠帝六年曹参卒以王陵陈平为左右相而以勃为太尉七年惠帝崩吕太后称制八年威权自恣杀三赵王立吕氏三王废少帝复立它人之子为帝诸大臣力不能制恐祸及己陈平尝燕居深念陆贾往说之曰天下安注意相天下危注意将将相和调则士豫附天下虽有变权不分陈平用其谋与勃深相结及太后病令吕禄以赵王为上将军居北军吕产以吕王居南军诫之曰吕氏之王大臣弗平我即崩帝年少大臣恐为变必据兵卫宫慎毋送丧为人所制及崩以产为相国以吕禄女为帝后诸吕欲为乱畏大臣绂灌等未敢发朱虚侯章以吕禄女为妇知其谋乃阴令人告其兄齐王襄令发兵西已与平阳侯窋为内应以诛诸吕相国吕产等闻之乃遣颍阴侯灌婴将兵御之婴留屯荥阳使使谕齐王及诸侯与连和以待吕氏变共诛之产禄欲作乱内惮勃章等外畏齐楚兵又恐灌婴叛之故未发列侯羣臣莫自坚其命太尉勃不得主兵曲周侯酈商之子寄与吕禄善勃与陈平谋使人劫酈商令其子寄往给吕禄曰高帝与吕后共定天下刘氏所立九王吕氏所立三王皆大臣之议事已布告诸侯诸侯皆以为宜今太后崩帝少而足下佩赵王印不急之国守藩乃为上将将兵留此为大臣诸侯所疑足下何不归将印以兵属太尉请梁王归相国印与大臣盟而之国齐兵必罢大臣得安足下高枕而王千里此万世之利也禄然其计诸吕老人或以为不便犹豫未决九月平阳侯窋见产会郎中贾寿使从齐来具以灌婴与齐楚合从告产且趣产急入宫窋闻其语驰告平勃勃欲入北军不得襄平侯纪通尚符节乃令持节矫内太尉北军勃复令酈寄与典客刘揭先说禄曰帝使太尉守北军欲足下之国急解将印辞去不然祸且起禄以为不欺已遂解印属典客而以兵授勃勃入军行令军中曰为吕氏右袒为刘氏

左袒军中皆左袒勃遂将北军然尚有南军丞相平乃召朱虚侯章佐勃勃令章监军门令平阳侯窋告卫尉毋入相国产殿门产不知禄已去北军乃入未央宫欲为乱至殿门弗得入徘徊往来窋恐弗胜驰语勃勃尚恐不胜诸吕未敢讼言诛之乃谓章急入宫卫帝予卒千余人入宫门见产廷中遂击杀之帝遣谒者持节劳章章欲夺其节不得则从与载因节信驰斩长乐卫尉吕更始还报勃勃起拜贺章曰所患独吕产今已诛天下定矣辛酉斩吕禄答杀吕嬖遣人分捕诸吕男女无少长皆斩之遣章告齐王罢兵於是阴谋谓少帝及济川淮阳恒山王皆非惠帝子吕太后以计诈名它人子杀其母养之後宫令孝惠子之立以为後用强吕氏今已灭诸吕少帝即长用事吾属无类矣不如视诸侯贤者立之遂迎立代王是为孝文皇帝东牟侯兴居朱虚侯章弟也请与太仆汝阴滕公除宫滕公前谓少帝曰足下非刘氏不当立召乘舆车载少帝出少帝曰欲持我安之乎滕公曰就舍少府廼奉天子法驾迎皇帝代邸报曰宫谨除皇帝入未央宫有谒者十人持戟卫端门曰天子在也足下何为者不得入太尉往喻廼引兵去皇帝遂入是夜有司分部杀济川淮阳常山王及少帝於邸文帝既立以勃为右丞相赐金五千筋食邑万户人或说勃曰君既诛诸吕立代王威震天下而君受厚赏处尊位久之即祸及身矣勃惧请归相印帝许之岁余丞相平卒复以勃为丞相凡十月余免就国每河东守尉行县至绛勃自畏恐诛常被甲令家人持兵以见其後人有上书告勃欲反下廷尉逮捕勃治之勃恐不知置辞吏稍侵辱之勃以千金予狱吏吏乃书牒背示之曰以公主为证公主者孝文帝女也勃子胜之尚之故教引为证初勃之益封尽以予太后弟薄昭昭为言太后文帝朝太后以冒絮提文帝曰绛侯绾皇帝玺将兵於北军不以此时反今居一小县顾欲反耶帝既见勃狱辞乃谢曰吏方验而出之勃既出曰吾尝将百万军然安知狱吏之贵也乃复就国孝文十一年卒谥曰武侯论曰寛仁如孝文不鉄钺不朝之王不桎梏受赅之吏丞相勃平定内难加以迎立大功顾屡遭策免又诏狱焉其故何也勃天资厚重而苦不好学当其上符玺时愿请间有言非以市德即以营私明主猜疑之端固已伏於此矣一生鄙朴椎鲁少文袁丝谓其有骄主色盖功则高而所以居功者未善乎方高后擅王诸吕面折廷谏不如王陵沉几观变不如陈平而高帝独曰安刘氏者必勃卒之国势累卵不动声色转移於呼吸间可不谓社稷臣哉

周昌

周昌者沛人也其从兄苛秦时皆为泗水卒史及高祖起沛击破泗水守监乃皆从沛公沛公为汉王以苛为御史大夫昌为中尉汉三年楚围汉王荥阳急汉王遁去而使苛守城楚破城欲令苛将苛骂曰若趣降汉王不然今为虏矣项羽怒亨苛汉王於是拜昌为御史大夫封汾阴侯苛子成以父死事封为高景侯昌为人强力敢直言自萧曹等皆卑下之高帝亦素憚昌及欲废太子而立戚姬子如意为太子大臣固争莫能得帝以留侯策止而昌廷争之强帝问其说昌为人吃又盛怒曰臣口不能言然臣心知其不可陛下欲废太子臣期期不奉诏帝欣然而笑即罢吕后侧耳於东厢听见昌为跪谢曰微君太子几废是岁戚姬子如意为赵王年十岁高祖忧万岁之後不全也赵尧为符玺御史赵人方与公谓周昌曰君之史赵尧年虽少然奇士行且代君昌笑曰何至是居顷之尧侍高祖见高祖心独不乐悲歌问曰陛下非以赵王年少而戚夫人与吕后有隙惧万岁後赵王不能自全乎高祖曰然尧曰陛下独为赵王置贵强相及吕后太子羣臣素所敬憚者乃可高祖曰然羣臣谁可者尧曰御史大夫昌其人坚

忍伉直自吕后太子及大臣皆素敬惮之独昌可高祖曰善於是召昌谓曰吾固欲烦公公强为相赵昌泣曰臣初起从陛下陛下独奈何中道而弃之於诸侯乎高祖曰吾极知其左迁然吾私忧赵念非公无可者於是徙昌为赵相而拜尧为御史大夫高祖崩吕太后使使召赵王昌令王称疾不行使者三反昌固不遣赵王太后怒迺使使召昌昌至太后骂曰尔不知我之怨戚氏乎而不遣赵王昌既被徵高后使使召赵王王果来至长安月余见鸩杀昌谢病不朝见三岁而卒谥曰悼侯

论曰高帝濶达大度然以马上得天下自酈陆叔孙诸人待之不少加礼昌以木强无文立於朝独见严惮其丰采岳岳可想见也汉初豪杰竞起智名勇功无虑数什伯而伉直强忍不顾犯主之顔色使公卿贵戚近幸咸頽首降心不敢以非礼犯者独昌一人如申屠嘉於孝文汲黯於孝武又其闻风兴起者也君子之立身事君也惟义所在而不以盛衰荣败易其心方戚姬宠幸昌持大义廷争不少假及其母子茕茕毕命旦夕乃再四扞御至於事势穷蹙且賁志衔恨以殉前後若两人而终始原一节在朝廷则朝廷重在侯国则侯国重岂不屹然骨鯁大臣哉

申屠嘉

申屠嘉梁人也初以材官蹶张从高帝击项籍迁为队率从击黥布为都尉孝惠时为淮阳守孝文元年举故以二千石从高祖者悉为关内侯食邑三十四人而嘉食邑五百户十六年迁御史大夫张苍免相文帝以皇后弟窦广国贤有行欲相之曰恐天下以吾私广国久念不可而高帝时大臣余见无可者乃以御史大夫嘉为丞相封故安侯嘉为人廉直门不受私谒是时太中大夫邓通方爱幸赏赐累钅万文帝常燕饮通家其见宠如是嘉入朝通居上旁有怠慢之礼嘉奏事毕因言曰陛下爱幸臣则富贵之至於朝廷之礼不可以不肃罢朝坐府中嘉为檄召通诣丞相府不来且斩通通恐入言文帝帝曰汝第往吾今使人召若通诣府免冠徒跣顿首谢嘉坐自如责曰夫朝廷者高皇帝之朝廷也通小臣戏殿上大不敬当斩吏今行斩之通顿首首尽出血不解帝度丞相已困通使使持节召通而谢丞相曰此吾弄臣君其释之通既至为帝泣曰丞相几杀臣嘉为丞相五岁文帝崩孝景即位二年鼂错为内史贵幸用事诸法令多所请变更议以适罚侵削诸侯而丞相嘉自绌所言不用疾错错为内史门东出不便更穿一门南出南出者太上皇庙堧垣也嘉闻之欲奏请诛错客有语错错恐夜入宫上谒自归景帝至朝嘉请诛错帝曰错所穿非眞庙垣乃外堧垣故冗官居其中且又我使为之错无罪罢朝嘉谓长史曰吾悔不先斩错乃请之为错所卖至舍因欧血而死谥曰节侯自嘉死後陶青刘舍及武帝时许昌薛泽辈皆以列侯继踵 廉谨为丞相备员而已无所能发明功名着於世者论曰周官冢宰统百官均四海周礼天子??攜仆及後宫奄尹女奴之属皆领之太宰盖所以大出入起居之坊而裁抑其恩幸杜闭其谗褒使无有淫媾戏嫚之渐以荡上心清官府正朝廷於是乎在惟圣帝明王敬信其大臣诸巧言便辟侧媚之人不得以间之故唐虞三代之隆无宦官宫妾乱政之祸此道得也是以君子不难申屠嘉而难孝文皇帝夫割肉心之私爱以伸明法自敌以下犹或不堪况天子乎嘉正色立朝前後执法不少回互然卒有所梗而不行者非特鼂错机深不如邓通之驯谨易制亦由景帝偏听私人逆忠直远耆德之故也司马迁班固乃谓嘉刚毅守节而无术学夫萧曹陈平守功以谦亦保身之一道然古

大臣不以宠利居成功惟复政厥辟可也既已在其位而持禄养交阿谀顺旨是孔光张禹辈
皆得托於学问深谨之气象以盖其庸恶陋劣而长富贵於子孙也

史传三编卷九

卷十

钦定四库全书

史传三编卷十

大学士朱轼撰

名臣传二

汉

贾谊

贾谊雒阳人年十八以能诵诗书属文称於郡中河南守吴公闻其秀材召置门下文帝初立以吴公治行第一徵为廷尉廷尉言谊年少颇通诸子百家书乃召为博士是时谊年二十余最少每诏令议下诸老先生不能言谊尽为对人人各如其意所欲出诸生自顾不逮远甚帝说之超迁一岁中至大中大夫谊以汉兴至孝文二十余年天下和洽当改正朔易服色制度定官名兴礼乐乃悉草具其事文帝谦让未遑也然诸法令所更定及列侯就国其说皆自谊发之二年谊上疏请广积贮曰管子曰仓廩实而知礼节民不足而可治者自古及今未之前闻今背本而趋末食者甚衆淫侈之俗日以长生之甚少而靡之甚多天下财产何得不蹙夫积贮者天下之大命也苟粟多而财有余何为而不成今殴民而归之农皆着於本使天下各食其力末技游食之民转而缘南亩则畜积多而人乐其所矣帝感谊言亲耕籍田赐天下今年田租之半天子思大用谊绌灌东阳侯冯敬之属尽害之廼毁谊曰雒阳之人年少初学专欲擅权纷乱诸事廼渐疎不用以为长沙王太傅时帝更造四铢钱除盗铸令谊上疏请收铜而禁盗铸以为事有召祸而法有起奸今令细民人操造币之势各隐屏而铸作因欲禁其厚利微奸虽黥罪日报其势不止法钱不立吏急而壹之乎则大为烦苛而力不能胜纵而弗呵乎则市肆异用钱文大乱苟非其术何乡而可哉今农事弃捐而采铜者日蕃释其耒耨冶熔炊炭奸数不胜而法禁数溃铜使之然也请收铜勿令布使民不得铸钱贾山亦言之帝皆不听谊适长沙行次湘水为赋吊屈原亦自伤也居三年有鵬止其舍谊既惧长沙地卑湿寿不得长鵬又不祥鸟也更为赋以自广後岁余徵谊入见文帝方受厘坐宣室因感鬼神事而问鬼神之本谊具道其所以然至夜半文帝前席既罢曰吾久不见贾生自谓过之今不及也乃拜谊为梁怀王胜太傅胜文帝少子爱而好书故令傅之是时单于数侵犯边塞天下初定制制度疎濶诸侯王僭拟过当往往以逆诛谊数上疏言事多所欲匡建大畧谓事势可为痛哭者一可为流涕者二可为长太息者六其策当世诸侯王则曰莫若衆建诸侯而少其力其於播德威移风俗定经制先礼後法教太子礼貌大臣诸事皆反覆引喻切当治体自谓稽之天地验之古今日夜念此至熟非虚也是时丞相绌侯周勃免就国有告勃谋反逮系长安狱治卒无事复爵邑故谊以建言及之帝深纳其言养臣下有节是後大臣有罪皆自杀不受刑至

武帝时稍复入狱自甯成始帝复封淮南厉王四子为列侯谊再上疏谏又请帝增淮阳王武代王参封地以备齐赵吴楚二王文帝子景帝亲弟也帝从谊计徙武为梁王得大县四十余城其後卒赖其力破七国怀王胜坠马死谊自伤为傅无状哭泣岁余亦死年三十三文帝後思谊言分齐为六国尽立悼惠王子六人为王又迁淮南王喜於阳城而分淮南为三国尽立厉王子以王之武帝时主父偃因谊策请推恩使诸侯王得自分子弟国邑诸侯始弱武帝又举贾谊之孙二人至郡守而贾嘉好学世其家

论曰西汉诸臣好谋议通权术者称贾鼂鼂之削七国与贾策诸侯王畧同而为袁盎所中亦其天性刻深动与祸会也贾之学术论议较正於鼂而醇深不及董广川踔厉风发无寛居之度优柔夷愉之致诸葛武侯有言宁静可以致远斯洛阳南阳所由以异欤

张释之

张释之字季南阳堵阳人也以货为骑郎事汉文帝十年不得调欲免归中郎将爰盎知其贤乃请徙释之补谒者释之既朝毕因前言便宜事文帝曰卑之母甚高论令今可行也於是释之言秦汉间事秦所以失汉所以兴者文帝称善拜为谒者仆射从行帝登虎圈问上林尉禽兽簿十余问尉左右视尽不能对虎圈啬夫从旁代尉对甚悉文帝曰吏不当如此邪诏拜啬夫为上林令释之前曰陛下以绹侯周勃何如人也帝曰长者又复问东阳侯张敖何如人也帝复曰长者释之曰夫绹侯东阳侯称为长者此两人言事曾不能出口岂效此啬夫喋喋利口捷给哉且秦以任刀笔吏争以亟疾苛察相高然其敝徒文具耳亡惻隐之实以故不闻其过陵夷至二世而亡今陛下以啬夫口辩而超迁之臣恐天下随风靡争口辩亡其实且下之化上疾於景向举错不可不察也文帝曰善迺止不拜啬夫就车召释之驂乘徐行问释之秦之敝具以质言至宫拜为公车令太子与梁王共车入朝不下司马门释之追止太子梁王毋入殿门遂劾不下公门不敬奏之薄太后闻之文帝免冠谢曰教儿子不谨薄太后使使承诏赦太子梁王乃得入文帝繇是奇释之拜为中大夫顷之至中郎将从行至霸陵时慎夫人从帝指视慎夫人新丰道曰此走邯鄲道也使慎夫人鼓瑟帝自倚瑟而歌意凄怆悲怀顾谓羣臣曰嗟乎以北山石为椁用紵絮斲陈漆其间岂可动哉释之前曰使其中有可欲者虽锢南山犹有隙使其中亡可欲者虽亡石椁何戚焉文帝称善其後拜释之为廷尉帝行出中渭桥有一人从下走出乘舆马惊使骑捕属之廷尉释之奏言此人犯蹕当罚金帝怒曰此人亲惊吾马马赖和柔令它马固不败伤我乎而廷尉迺当之罚金释之曰法者天子所与天下公共也今法如是更重之是法不信於民也且廷尉天下之平也一倾天下用法皆为之轻重民安所错其手足帝良久曰廷尉当是也其後人有盗高庙座前玉环得下廷尉治案盗宗庙服御物者为奏当弃市帝大怒曰人亡道迺盗先帝器吾欲致之族而君以法奏之非吾所以共承宗庙意也释之免冠顿首谢曰法如是足也且罪等然以逆顺为基今盗宗庙器而族之有如万分一假令愚民取长陵一抔土陛下何以加其法乎文帝与太后言之乃许廷尉当是时中尉条侯周亚夫与梁相山都侯王恬咸见释之持议平迺结为亲友张廷尉繇此天下称之後景帝立释之称疾欲免去惧大诛至用王生计卒见谢景帝不过也王生者善为黄老言处士也尝召居廷中公卿尽会立王生鞶解顾谓张廷尉为我结鞶释之跪而结之人或以此让王生生曰吾老且贱自度终亡益於张廷尉廷尉天下名臣吾故使结鞶欲以重之诸公闻之

贤王生而重释之释之事景帝岁余为淮南相犹尚以前过也年老病卒其子挚字长公官至大夫免以不能取容当世故终身不仕论曰自周公弘吐哺握髮之诚延见天下士後世贤公卿因之虚已侧席有加礼焉迄於汉初流风未衰曹参之於盖公王生之为张释之是也释之终以劾奏太子得罪然尊朝廷敬官守乃人臣盛节其不奉诏拜嗇夫尤见大体汉世称贤廷尉二人张释之于定国定国迎师学春秋北面备弟子礼为人谦恭重经术考其生平释之风节尤着汉朝哉

周亚夫

周亚夫绦侯勃庶子也初为河内守兄绦侯胜之有罪文帝择勃子贤者皆推亚夫乃封为条侯文帝後六年匈奴大入边以宗正刘礼军霸上祝兹侯徐厉军棘门河内守亚夫军细柳皆授将军号帝自劳军至霸上棘门军直驰入将以下骑出入送迎已而之细柳军军士吏被甲锐兵刃彀弓弩持满天子先驱至不得入先驱曰天子且至军门都尉曰军中闻将军之令不闻天子之诏有顷帝至又不得入於是使使持节诏将军曰吾欲入劳军亚夫乃传言开壁门壁门士请车骑曰将军约军中不得驱驰於是天子乃按辔徐行至中营将军亚夫持兵揖曰介胄之士不拜请以军礼见天子为动改容式车使人称谢皇帝敬劳将军成礼而去既出军门羣臣皆惊文帝曰嗟乎此真将军矣曩者霸上棘门军若儿戏耳其将固可袭而虏也至於亚夫可得而犯耶称善者久之月余三军皆罢拜亚夫为中尉文帝且崩戒太子曰即有缓急周亚夫真可任将兵景帝以亚夫为车骑将军三年吴楚反亚夫以中尉为太尉东击吴楚因自请上曰楚兵剽轻难与争锋愿以梁委之絶其食道乃可制也上许之亚夫至霸上赵涉遮说曰吴王素富怀辑死士久矣此知将军且行必置间人於彀罟阨阨之间且兵事尚神密将军何不从此右去走蓝田出武关抵雒阳间不过差一二日直入武库击鸣鼓诸侯闻之以为将军从天而下也亚夫从其计至雒阳使吏搜彀罟间果得吴伏兵乃请涉为护军亚夫父客邓都尉说亚夫曰吴楚兵锐甚难与争锋楚兵轻不能久方今为将军计莫若引兵东北壁昌邑以梁委吴吴必尽锐攻之将军深沟高垒使轻兵絶淮泗口塞吴粮道使吴梁相敝而粮食竭乃以全制其极破吴必矣亚夫从其计引兵东北走昌邑深壁而守吴方攻梁梁王使使请亚夫亚夫守便宜不往梁上书言景帝景帝诏使救梁亚夫不奉诏坚壁不出而使轻骑兵弓高侯等絶吴楚兵後食道吴楚兵饥欲退数挑战终不出夜军中惊内相攻击扰乱至於帐下亚夫坚卧不起顷之复定吴奔壁东南陬亚夫使备西北已而其精兵果奔西北不得入吴楚既饥乃引而去亚夫出精兵追击大破之凡相攻守三月而吴楚平由是梁孝王与亚夫有隙五岁迁为丞相帝甚重之栗太子废亚夫固争之不能得帝由此疏之而梁孝王每朝常与太后言条侯之短太后欲封皇后兄王信为侯帝问亚夫亚夫曰高帝约非刘氏不得王非有功不得侯不如约者天下共击之今信虽后兄无功侯之非约也帝默然而止其後匈奴王徐卢等五人降汉帝欲侯之以劝後亚夫曰彼背其主降陛下陛下侯之即何以责人臣不守节者乎帝曰丞相议不可用悉封之亚夫因谢病免相顷之帝召亚夫赐食独置大胾无切肉又不置箸亚夫顾尚席取箸帝视而笑曰此非不足君所乎亚夫免冠谢帝曰起亚夫趋出帝目送之曰此鞅鞅非少主臣也居无何亚夫子为父买葬器不时与钱为人所告事连亚夫召诣廷尉不食五日欧血卒

论曰高祖功臣虽保全终始如萧曹张陈及其再传或婴罪戾被削夺者多矣兼资文武备位将相独亚夫一人与其父後先辉映可不谓贤欤文帝法古贤君推轂之义属之景帝委以重权此与高祖以周勃属之孝惠同岂非深计远虑明畧之主哉亚夫刚以取祸司马迁讥其足已不学然用兵能任赵涉听邓都尉推贤下士有儒将风至争太子以固国本不侯王信以存祖制绌降人之封激厉忠节明於大体虽诗书之所称训何以加焉

汲黯

汲黯字长孺濮阳人也十世为卿大夫以父任孝景时为太子洗马以庄见憚武帝即位黯为谒者东粤相攻帝使黯往视之至吴而还报曰粤人相攻固其俗然不足以辱天子之使河内失火延烧十余家又使黯往视之还报曰家人失火屋比延烧不足忧也臣过河南河南贫人伤水旱万余家或父子相食臣谨以便宜持节发河南仓粟以振贫民请归节伏矫制之罪帝贤而释之迁荥阳令黯耻为令称疾归田里帝闻乃召为中大夫以数切谏不得久留内迁为东海太守黯学黄老言治官理民好清静择丞史任之责大指而已不细苛黯多病卧阁内不出岁余东海大治称之召为主爵都尉列於九卿治务在无为而已引大体不拘文法黯为人性倨少礼面折不能容人之过合己者善待之不合己者不能忍见士亦以此不附焉然好游侠任气节内行修洁好直谏数犯主之颜色常慕傅伯爰盎之为人也善灌夫郑当时及宗正刘弃疾亦以数直谏不得久居位是时太后弟武安侯田蚡为丞相中二千石拜谒蚡弗为礼黯见蚡未尝拜常揖之帝方招文学儒者谓曰吾欲云云黯对曰陛下内多欲而外施仁义奈何欲效唐虞之治乎帝怒变色而罢朝公卿皆为黯惧帝退谓左右曰甚矣汲黯之戆也羣臣或数黯黯曰天子置公卿辅弼之臣宁令从谏承意陷主於不义乎且已在其位纵爱身奈辱朝廷何黯多病病且满三月常赐告者数终不愈最後庄助为请告帝曰汲黯何如人也助曰使黯任职居官无以踰人然至其辅少主守城深坚招之不来麾之不去虽自谓贲育不能夺之矣帝曰然古有社稷之臣至如黯近之矣大将军青侍中帝踞厕而视之丞相弘燕见帝或时不冠至如黯见不冠不见也帝常坐武帐中黯前奏事帝不冠望见黯避帐中使人可其奏其见敬礼如此张汤方以更定律令为廷尉黯数质责汤於帝前曰公为正卿上不能褒先帝之功业下不能抑天下之邪心安国富民使囹圄空虚二者无一焉何空取高皇帝约束纷更之为公以此无种矣黯时与汤论议汤辩常在深文小苛黯伉厉守高不能屈忿发骂曰天下谓刀笔吏不可以为公卿果然必汤也令天下重足而立侧目而视矣是时汉方征匈奴招怀四夷黯务少事乘间常言与匈奴和亲无起兵帝方尊重公孙弘而张汤用文法数奏决讞以幸黯常面触弘等怀诈饰智以阿人主取容而刀笔吏专深文巧诋陷人於罪使不得反其真以胜为功帝愈益贵弘汤弘汤深心疾黯欲诛之以事弘为丞相乃上言曰右内史界部中多贵人宗室难治非素重臣不能任请徙黯为右内史数岁官事不废大将军青益尊姊为皇后然黯与亢礼人或说黯曰自天子欲羣臣下大将军君不可以不拜黯曰夫以大将军有揖客反不重耶大将军闻愈贤黯数请问国家朝廷所疑遇黯过於平生淮南王谋反憚黯曰好直谏守节死义难惑以非至如说丞相弘如发蒙振落耳匈奴浑邪王率衆来降汉发车二万乘县官无钱从民贖马民或匿马马不具帝怒欲斩长安令黯曰长安令无罪独斩黯民乃肯出马且匈奴畔其主而降汉汉徐以县次传之何至令天下骚动罢弊中国以事匈奴乎帝默然及浑邪至贾人与市者坐当死者五百余人黯请间见高门曰夫匈奴攻当路塞絶和亲中国

兴兵诛之死伤者不可胜计而费以巨万数臣愚以为陛下得彼人皆以赐从军死事者家所掠获因予之以谢天下之苦塞百姓之心今纵不能又以微文杀无知者五百余人此所谓庇其叶而伤其枝臣窃为陛下不取也帝默然不许曰吾久不闻汲黯之言今又复妄发矣後数月黯坐小法会赦免官於是黯隐於田园居数年会更五铢钱民多盗铸楚地尤甚帝以为淮阳楚地之郊乃召拜黯为淮阳太守黯伏谢不受印诏数强予然後奉诏召见黯黯泣曰臣自以为填沟壑不复见陛下不意陛下复收用之臣常有狗马病力不能任郡事臣愿为中郎出入禁闥补过拾遗臣之愿也帝曰君薄淮阳耶吾今召君矣顾淮阳吏民不相得吾徒得君之重卧而治之黯既辞行过大行李息曰黯弃居郡不得与朝廷议也然御史大夫张汤智足以拒谏诈足以饰非务巧佞之语辩数之辞好兴事舞文法内怀诈以御主心外挟贼吏以为威重公列九卿不早言之公与之俱受其戮矣息畏汤终不敢言黯居郡如故治淮阳政清後张汤果败帝闻黯与息言抵息罪令黯以诸侯相秩居淮阳七岁而卒卒後帝以黯故官其弟汲仁至九卿子汲偃至诸侯相初黯为主爵都尉时太后弟武安侯田蚡以杯酒争忿欲杀将军灌夫而魏其侯窦婴救之廷辩东朝公卿以下畏田蚡莫敢言惟黯以魏其言为是始终不变同时陈人郑当时以善推毂贤士内行洁廉与黯并名然当时在朝常趋和承意不敢甚引当否以此不及黯卫人仕者皆严惮黯出其下论曰自古圣帝明王所求乎格其非心养其德性者不遗於侍御之人况所得贤士大夫哉汲黯立朝天子严敬比於师保自王公戚属近幸莫敢以非礼干及赈救穷黎开释无辜汲黯然惟恐後诗曰衮职有阙惟仲山甫补之又曰不侮鰥寡不畏强御汲黯有焉

苏武

苏武字子卿杜陵人也父建从大将军卫青击匈奴有功封平陵侯武少以父任与兄嘉弟贤并为郎稍迁至栒中厩监时汉连伐胡数通使相窥观匈奴留汉使郭吉路充国等前後十余辈匈奴使来汉亦留之以相当天汉元年且鞮侯单于初立恐汉袭之乃曰汉天子我丈人行也尽归汉使武帝嘉其义乃遣武以中郎将使持节送匈奴使留在汉者因厚赂单于答其善意武与副中郎将张胜及假吏常惠等募士斥侯百余人俱既至匈奴置币遗单于单于益骄非汉所望也方欲发使送武等会长水虞常等谋反匈奴中虞常在汉时素与副张胜相知私候胜曰闻汉天子甚怨卫律请为汉伏弩射杀之吾母弟在汉幸蒙其赏赐卫律者汉使使匈奴还闻李延年得罪律素善延年惧并诛复亡归匈奴单于立为丁灵王未尝一日离左右也胜闻常言许之以货物与常後月余事败其党多战死而生得虞常单于乃使卫律治其事张胜闻之恐前语发以状语武武曰事如此此必及我见犯乃死重负国欲自杀胜惠共止之虞常果引张胜单于怒议欲杀汉使者左伊秩訾曰即谋单于何以复加宜皆降之单于使卫律召武受词武谓惠等屈节辱命虽生何面目以归汉引佩刀自刺卫律惊自抱持武驰召馱凿地为坎置燧火覆武其上蹈其背以出血武气絶半日复息惠等哭舆归营单于壮其节朝夕遣人候问武而收系张胜武益愈单于使使晓武会论虞常欲因此时降武剑斩虞常已律曰汉使张胜谋杀单于近臣当死单于募降者赦罪举剑欲击之胜请降律谓武曰副有罪当相坐武曰本无谋又非亲属何谓相坐复举剑拟之武不动律曰苏君律前负汉归匈奴幸蒙大恩赐号称王拥衆数万马畜弥山富贵如此苏君今日降明日复然空以身膏草野谁复知之武不应律曰君因我降与君为兄弟今不听吾计後虽欲复见我尚可得乎武骂律曰汝为人

臣子不顾恩义畔主背亲为降虏於蛮夷何以汝为见且单于信汝使决人死生不平心持正反欲鬪两主观祸败前南越宛朝鲜三国杀汉使者皆立取屠灭独匈奴未耳若知我不降明欲令两国相攻匈奴之祸从我始矣律知武终不可胁白单于单于愈益欲降之乃幽武置大窖中绝不饮食天雨雪武卧啮雪与旃毛并咽之数日不死匈奴以为神乃徙武北海无人处使牧羝羝乳乃得归别其官属常惠等各置他所武既至海上廩食不至掘野鼠去实而食之杖汉节牧羊卧起操持节旄尽落积五六年单于弟於靬王弋猎海上武能网纺缴檠弓弩於靬王爱之给其衣食三岁余王病赐武马畜服匿穹庐王死後人衆徙去其冬丁令盗武牛羊武复穷厄初武与李陵俱为侍中武使匈奴明年陵将兵五千出居延为单于所遮降以女妻之立为右校王陵愧负汉不敢求武久之单于乃使陵至海上为武置酒设乐因谓武曰单于闻陵与子卿素厚故使陵来说足下虚心欲相待终不得归汉空自苦亡人之地信义安所见乎贤兄弟俱冒罪死来时太夫人已不幸陵送葬至阳陵子卿妇年少闻已更嫁矣独有女弟二人两女一男今复十余年存亡不可知人生如朝露何久自苦如此陵始降时忽忽如狂自痛负汉加以老母系保官子卿不欲降何以过陵且陛下春秋高法令亡常大臣亡罪夷灭者数十家安危不可知子卿尚复谁为乎愿听陵计勿复有云武曰武父子无功德皆为陛下所成就位列将爵通侯兄弟亲近常愿肝脑涂地今得杀身自效虽蒙斧钺汤镬诚甘乐之臣事君犹子事父也子为父死无所恨愿勿复再言陵与武饮数日复曰子卿壹听陵言武曰自分已死久矣王必欲降武请毕今日之欢效死於前陵见其至诚喟然叹曰嗟乎义士陵与卫律之罪上通於天因泣下沾衿与武决去陵恶自赐武使其妻赐武牛羊数十头後陵复至北海上语武区脱捕得云中生口言太守以下吏民皆白服曰上崩武闻之南乡号哭欧血旦夕临数月昭帝即位数年匈奴与汉和亲汉求武等匈奴诡言武死後汉使复至匈奴常惠请其守者与俱得夜见汉使具自陈道教使者谓单于言天子射上林中得雁足有系帛书言武等在某泽中使者大喜如惠语以让单于单于视左右而惊谢汉使曰武等实在於是李陵置酒贺武曰今足下还归扬名於匈奴功显於汉室虽古竹帛所载丹青所画何以过子卿陵乃独为异域人一别长絶陵起舞且歌歌罢泣数行下因与武决单于召会武官属前以降及物故凡随武还者九人武以始元六年春至京师拜为典属国赐赆有差常惠等三人皆拜郎中余六人以老赐钱归家复终身武留匈奴凡十九岁始以强壮出及还须髮尽白宣帝既立以武着节老臣甚优宠之又以武弟子为右曹武所得赏赐尽以施予昆弟故人家不余财皇后父平恩侯帝舅平昌侯乐昌侯丞相魏相御史大夫丙吉皆敬重武年八十余病卒甘露三年单于始入朝帝思股肱之美乃图画其人於麒麟阁凡十一人而武在其列

论曰苏武陷身絶域濒死者数矣或慷慨而赴或从容而就卒全身名为汉室光固知三军可夺帅而匹夫必不可夺志也东汉时耿恭以单兵困守孤城至於凿山得井煮弩为粮连月踰年万死一生其後遇救引归惟余十三人衣屨穿敝形容枯槁与武事絶相类丹心苦节历九死而不移而其精诚所格鬼神亦若阴为护持者忠孝之所以能动天也

史传三编卷十

卷十一

钦定四库全书

史传三编卷十一

大学士朱轼撰

名臣传三

汉

霍光

霍光字子孟票骑将军去病异母弟也父中孺河东平阳人以县吏给事平阳侯家生去病去病母乃侯家侍者卫少儿也吏毕归家复娶妇生光因絶不相闻久之少儿女弟子夫得幸於武帝立为皇后去病以皇后姊子贵幸既壮大乃自知父为霍中孺会击匈奴道出河东遣吏迎霍中孺为买田宅而去还复过焉乃将光西至长安时年十余岁任光为郎稍迁诸曹侍中去病死後光为奉车都尉出则奉车入侍左右出入禁闕二十余年小心谨慎未尝有过甚见亲信自卫太子为江充所败而燕王旦广陵王胥皆多过失是时武帝年老宠姬钩弋赵婕妤有男心欲以为嗣命大臣辅之察羣臣惟光可属社稷乃使黄门画者画周公辅成王朝诸侯以赐光及帝病笃光涕泣问曰如有不讳谁当嗣者帝曰君未谕前画意耶立少子君行周公之事光顿首让曰臣不如金日磾日磾亦曰臣外国人不如光乃拜光为大司马大将军日磾为车骑将军及上官桀为左将军桑弘羊为御史大夫竝受遗诏辅少主明日武帝崩太子即位为孝昭皇帝帝年八岁政事壹决於光时武帝遗诏复追録光前与日磾上官桀等讨莽何罗功封光博陆侯桀安阳侯日磾柰侯光为人沈静详审长财七尺三寸白皙疏眉目美须髯每出入下殿门止进有常处郎仆射窃识视之不失尺寸其资性端正如此初辅幼主政自己出天下想闻其风采殿中常有怪一夜羣臣相惊光召尚符玺郎郎不肯授光光欲夺之郎按剑曰臣头可得玺不可得也光甚谊之明日诏增此郎秩二等衆庶莫不多光光与左将军桀结婚相亲光长女为桀子安妻有女年与帝相配桀因帝姊鄂邑盖主纳安女後宫为婕妤数月立为皇后父安为票骑将军封桑乐侯光时休沐出桀辄入代光决事桀父子既尊盛而德长公主公主内行不修近幸河间丁外人桀安欲为外人求封幸依国家故事以列侯尚公主者光不许又为外人求光禄大夫欲令得召见光又不许长公主以是怨光而桀安数为外人求官爵弗能得亦惭自先帝时桀已为九卿位在光右及父子竝为将军皇后亲安女光乃其外祖而顾专制朝事由是与光争权燕王旦自以昭帝兄常怀怨望及御史大夫桑弘羊建造酒榷盐铁为国兴利伐其功欲为子弟得官亦怨恨光於是盖主上官桀安及弘羊皆与燕王旦通谋诈令人为燕王上书言光出都肄郎羽林道上称?又擅调益幕府校尉光专权自恣疑有非常臣旦愿归符玺入宿卫察奸臣变候伺光出沐日奏之桀欲从中下其事桑弘羊当与

诸大臣共执退光书奏帝不肯下明旦光闻之止画室中不入帝问大将军安在桀对曰以燕王告其罪故不敢入有诏召入光免冠顿首谢帝曰将军冠朕知是书诈也将军亡罪光曰陛下何以知之帝曰将军之广明都郎属耳调校尉以来未能十日燕王何以得知之且将军为非不须校尉是时帝年十四尚书左右皆惊而上书者果亡捕之甚急桀等惧白上小事不足遂帝不听後桀党与有谮光者帝辄怒曰大将军忠臣先帝所属以辅朕身敢有毁者坐之自是桀等不敢复言乃谋令长公主置酒请光伏兵击杀之因废帝迎立燕王为天子事发觉光尽诛桀安弘羊外人宗族燕王盖主皆自杀光威震海内昭帝既冠遂委任光讫十三年光知时务之要诏问贤良文学民间疾苦罢榷酤官轻徭薄赋匈奴和亲百姓充实复文景之业焉及昭帝崩亡嗣即日承皇太后诏遣官迎昌邑王贺贺者武帝孙昌邑哀王子也既至即位淫戏无度昌邑官属皆徵至长安超拜擢官夏侯胜傅嘉等进谏皆系狱光忧懣独以问所亲故吏大司农田延年延年语以宜建白太后更选贤而立之光曰於古尝有此否延数以伊尹放太甲对光乃引延年给事中阴与车骑将军张安世图计遂召丞相御史将军列侯中二千石大夫博士会议未央宫光曰昌邑王行淫乱恐危社稷如何羣臣皆惊愕莫敢言但唯唯而已延年前离席按剑曰先帝属将军以幼孤以将军忠贤能安刘氏也今社稷将倾如令汉家絶祀将军虽死何面目见先帝於地下乎今日之事不得旋踵羣臣後应者臣请剑斩之光谢曰九卿责光是也天下匈匈不安光当受难於是议者皆叩头曰惟大将军令光即与羣臣俱见白太后具陈昌邑王不可以承宗庙状太后乃幸未央承明殿诏诸禁门毋纳昌邑羣臣安世将羽林骑收缚二百余人皆送廷尉诏狱光敕左右谨宿卫卒有物故自裁令我负天下有杀主名太后盛服坐武帐中侍御数百人皆持兵期门武士陛戟陈列殿下羣臣以次上殿召昌邑王伏前听诏尚书令读奏曰丞相臣敞等昧死言孝昭皇帝早弃天下遣使徵昌邑王典丧服斩衰无悲哀之心废礼谊居道上不素食使从官略女子载衣车内所居传舍受玺大行前就次发玺不封从官更持节引内昌邑驹宰官奴与居禁闥内敖戏发乐府乐器击鼓歌吹作俳倡召内泰壹乐人悉奏衆乐与孝昭皇帝宫人蒙等淫乱太后曰止为人臣子当悖乱如是耶王离席伏尚书令复读曰祖宗庙祀未举为玺书使使者持节以三太牢祠昌邑哀王园庙称嗣子皇帝受玺以来二十七日使者旁午持节诏诸官署徵发凡一千一百二十七事荒淫迷惑失帝王礼谊乱汉制度臣敞等数进谏不变更日以益甚恐危社稷天下不安臣敞等谨与博士议皆曰五辟之属莫大不孝宗庙重于君王不可以承天序奉祖宗庙子万姓当废臣请有司以一太牢具告祠高庙皇太后诏曰可光令王起拜受诏脱其玺组奉上太后扶王下殿出金马门就乘舆副车光送至邸谢曰王行自絶于天臣宁负王不敢负社稷愿王自爱臣长不复见左右涕泣而去羣臣奏请徙王贺房陵诏归贺昌邑赐汤沐邑二千户国除为山阳郡昌邑羣臣坐无辅导之谊陷王于恶诛贬有差光与丞相等会议奏皇太后迎立卫太子孙病已号皇曾孙是为孝宣皇帝明年下诏益封光万七千户前後赏赐不赀自昭帝时光子禹及兄孙云云弟山光两女婿昆弟诸婿外孙皆已贵显党亲连体根据于朝廷光自後元时秉持万几及宣帝即位乃归政帝谦让不受诸事皆先关白之每朝见帝虚已敛容礼下之已甚及光病笃车骑自临问为涕泣光卒帝及皇太后亲临其丧遣官治家赙葬皆如乘舆制度謚曰宣成子禹嗣封先光未死时拜右将军兄孙山封平乐侯奉骠骑将军去病祀云封冠阳侯而光妻太夫人显恣行奢淫寡居时与光嬖奴冯子都乱禹山竝缮治第宅舆马多从宾客围猎使苍头奴上朝谒莫敢谴者冯子都数犯法于是上始病之初宣帝立其微时许妃为皇后显爱小女成君欲贵之私使乳医淳于衍毒杀许后后暴崩吏捕劾衍侍疾亡状下狱簿责急

显恐事败即具以实语光光大惊欲自发举不忍犹与会奏上因署衍勿论显因劝光内成君代立为后光卒後语稍泄帝颇闻之乃罢禹右将军尽徙其亲党在宿卫及屯兵者以所亲信许史子弟代之禹山等自见失势密以毒后事探显显恐急吐实禹山等大惊于是谋令显为太后言先诛丞相魏相及平恩侯许广汉而废天子会有告之者事下廷尉诏止勿捕禹山等愈急显屡梦不祥而第中数见怪变谋愈益急乃欲使太后为帝外祖母博平君置酒召丞相平恩侯以下承太后制斩之因废帝立禹事发觉云山皆自杀禹要斩显及诸女昆弟皆弃市废霍后处昭台宫其相连坐诛灭者数千家至成帝时为光置守塚百家吏卒奉祠焉元始二年封光从父昆弟曾孙阳为博陆侯千户

前汉书赞曰霍光以结髮内侍起于阶闕之间确然秉志谊形于主受襁褓之托任汉室之寄当庙堂拥幼君摧燕王仆上官因权制敌以成其忠处废置之际临大节而不可夺遂匡国家安社稷拥昭立宣光为师保虽周公阿衡何以加此然光不学无术闇于大礼阴妻邪谋立女为后沉溺盈溢之欲以增颠覆之祸死财三年宗族诛夷哀哉

论曰光明达慎厚为汉宗臣其拥昭也承天下虚耗之後行政施化与民休息十三年如一日其立宣也出于至公行所无事开汉室中兴之治可不谓社稷臣乎然因是遂有伊霍之称此儼之不以其伦也其他无论即罔以宠利居成功一语岂光所能见及哉史称光骖乘于宣帝帝内憚之若有芒刺在背又任宣追述光柄国时中廷尉李种王平等皆坐逆意下狱死乐成小家子得幸至封侯百官以下但事冯子都王子方辈视丞相亡如也虽所语或有过当然自拥立二君专国既久恐未能不变其二十余年谨慎小心之初度也岂诚位不期骄禄不期侈抑精神衰则骄生传所谓老将至而耄及之也夫治天下观于家治家观于身是以圣贤兢兢于房帟衽席之地情欲无感而燕私不形光身为弼亮数世之元臣朝野中外倚若太山而牵制于女子小人之手岂非发乎情莫能止乎义哉易之家人曰反身之谓端本乃可以善则也孟子之论伊尹曰圣人之行归洁其身无欲乃可言王佐也汉唐诸臣能讲求斯道者或寡矣于不学之霍光何尤

金日殚

金日殚字翁叔本匈奴休屠王太子也元狩中昆邪休屠王居西方多为汉所破单于诏欲诛之昆邪休屠恐谋降汉休屠王後悔昆邪王杀之并将其衆降汉封昆邪为列侯日殚以父不降见杀与母闾氏弟伦俱没入官输黄门养马时年十四矣久之武帝游宴见马後宫满侧日殚等数十人牵马过殿下莫不窃视至日殚独不敢日殚长八尺二寸容貌甚严马又肥好武帝异而问之具以本状对帝奇焉即日赐汤沐衣冠拜为马监迁侍中驸马都尉光禄大夫日殚既亲近未尝有过失帝甚信爱之赏赐累千金出则骖乘日侍左右贵戚多窃怨以帝之贵重之也帝闻愈厚焉日殚母教训两子甚有法度帝闻而嘉之病死诏图画于甘泉宫署曰休屠王闾氏日殚每见画常拜乡之涕泣然後迺去日殚子二人皆爱为帝弄儿常在旁侧弄儿或自後拥上项日殚在前见而目之弄儿走且啼曰翁怒帝谓日殚何怒吾儿为其後弄儿壮大不谨自殿下与宫人戏日殚适见之恶其淫乱遂杀弄儿弄儿即日殚长子也帝大怒日殚顿首谢具言所以杀弄儿状帝甚哀为之泣已而心敬日殚初莽何罗与江充相善及充败卫

太子何罗弟通用诛太子时力战得封後帝知太子冤迺夷灭充宗族党与何罗兄弟惧及遂谋为逆日殫视其志意有非常心疑之陰独察其动静与俱上下何罗亦觉日殫意以故久不得发是时武帝行幸林光宫日殫小疾卧庐何罗与通及小弟安成矫制夜出共杀使者发兵明旦帝未起何罗从外入日殫奏厕心动立入坐内户下须臾何罗裒白刃从东厢上见日殫色变走趋卧内欲入行触宝瑟僵日殫得抱何罗因传曰莽何罗反帝惊起左右拔刀欲格之帝恐并中日殫止勿格日殫捽颈投何罗殿下得禽缚之穷治皆伏辜繇是着忠孝节日殫自在左右目不忤视者数十年赐出宫女不敢近帝欲纳其女後宫不肯其笃慎如此帝尤异之及帝病属霍光以辅少主光让日殫日殫曰臣外国人且使匈奴轻汉於是遂为光副光以女妻日殫嗣子赏赏在宣帝时为太仆霍氏有事萌芽上书去妻得不坐初武帝遗诏以讨莽何罗功封日殫为柁侯日殫以帝少不受封辅政岁余病困大将军光白封日殫卧受印绶一日卒赐葬具冢地送以轻车介士军陈至茂陵諡曰敬侯论曰日殫以降臣事汉卓卓着大节立贤无方武帝知人哉夫小不忍则乱大谋霍光闻妻显毒后之事而犹与不发卒以灭族视日殫之杀弄儿不奉诏内女後宫者识量相去何等也日殫之父以不降见杀其母教训子有法度其子为霍氏壻而早自远祸闲门之严有自来矣功名令终施及後嗣岂偶然哉

张安世

张安世字子孺其父汤故酷吏也安世以父任为郎用善书给事尚书精力於职休沐未尝出武帝行幸河东尝亡书三篋诏问莫能知唯安世识之後购求得书以相校无所遗失帝奇其材擢为尚书令迁光禄大夫昭帝即位大将军霍光秉政以安世笃行亲重之会左将军上官桀父子及御史大夫桑弘羊皆与燕王盖主谋反诛光以朝无旧臣白用为右将军光禄勳以自副焉久之诏封富平侯昭帝崩光白太后徙安世为车骑将军与共徵立昌邑王王行淫乱光复与安世谋废王尊立宣帝帝初即位褒赏大臣诏益封安世万六百户功次大将军光子三人皆中郎将侍中光卒後数月御史大夫魏相上封事曰车骑将军安世事孝武皇帝三十余年忠信谨厚勤劳政事夙夜不怠与大将军定策天下受其福国家重臣也宜尊其位以为大将军令毋领光禄勳事使专精神忧念天下思惟得失安世子延壽重厚可以为光禄勳领宿卫臣宣帝亦欲用之安世闻旨惧不敢当请问求见免冠顿首辞曰老臣耳妄闻言之为先事不言情不達诚自量不足以居大位继大将军後惟天子哀怜以全老臣之命帝不可固辞弗能得竟拜为大司马车骑将军领尚书事数月更为卫将军两宫卫尉城门北军兵属焉时霍光子禹谋反夷宗族安世素小心畏忌已内忧矣其女孙敬为霍氏外属妇当相坐安世忧惧形於顔色帝怪而怜之以问左右乃赦敬以慰其意安世寢恐职典枢机以谨慎周密自着外内无间每定大政已决辄移病出闻有诏令乃惊使吏之丞相府问焉自朝廷大臣莫知其参与议也尝有所荐其人来谢安世大恨以为举贤进能岂有私谢邪絶弗复为通有郎功高不调自言安世应曰君之功高明主所知人臣执事何长短而自言乎絶不许已而郎果迁莫府长史迁辞去之官安世问以过失长史曰将军为明主股肱而士无所进论者以为讥安世曰明主在上贤不肖较然臣下自修而已何知士而荐之其欲匿名迹远权势如此为光禄勳郎有醉小便殿上主事白行法安世曰何以知其不反水浆邪如何以小过成罪郎淫官婢婢兄自言安世曰奴以恚怒诬污衣冠自署谪奴其隐人过失皆此类也安世自见父子尊显怀不自安为子延壽求出补吏帝以为北地太守岁余闵安世年老复徵延壽为左曹太仆初安世

兄贺幸于卫太子太子败宾客皆诛安世为贺上书得下蚕室复为掖庭令而宣帝以皇曾孙收养掖庭贺内伤太子无辜而曾孙孤幼所以视养拊循恩甚密焉及曾孙壮大贺教书令受诗为取许妃以家财聘之曾孙素有徵怪贺闻知为安世道之安世辄絶止以为少主在上不宜称述曾孙及宣帝即位而贺已死帝追思贺贤欲封其冢为恩德侯置守冢二百家贺一子蚤死子安世小男彭祖彭祖又小时与上同席研书指欲封之安世深辞贺封又求损守冢户数稍减至三十户帝曰吾自为掖庭令非为将军也安世乃止不敢复言遂下诏为故掖庭令张贺置守冢三十家明年复下诏封贺弟子彭祖为阳都侯安世以父子封侯在位太盛乃辞禄诏都内别藏张氏无名钱以百万数安世尊为公侯食邑万户然身衣弋绋夫人自纺绩家僮七百人皆有手技作事内治产业累积纖微是以能殖其货富于大将军光天子甚尊惮大将军然内亲安世心密于光焉元康四年春安世病上疏归侯乞骸骨天子报曰将军年老被病朕甚悯之虽不能视事折冲万里君先帝大臣明于治乱朕所不及得数问焉何感而上书归卫将军富平侯印薄朕忘故非所望也愿将军强餐食近医药专精神以辅天年安世复强起视事至秋卒天子赠印绶送以轻车介士諡曰敬侯子孙世嗣侯不絶

论曰传称安世父汤儿时为磔鼠文辞如老狱吏其明有絶过人者顾舞智弄文遂以恶终安世独改父之德一之乎正非素常学问识义理能如是哉初安世长子千秋与霍光子禹俱将兵随度辽将军范明友擊乌桓还谒光光问千秋战鬪方畧山川形势千秋口对兵事画地成图无所亡失复问禹禹不能记又以见是父是子而安世之平日训敕为有素也观其制节谨度化及妻孥或以为鉴於霍氏不知彼皆心仪古大臣之风烈而训行之君陈曰尔有嘉谟嘉猷则入告尔后於内尔乃顺之于外曰斯谟斯猷惟我后之德儒行曰程功积事推贤而进達之不望其报中庸曰隐恶而扬善安世盖兼有之方霍光驂乘天子背若芒刺安世代之乃从容肆体甚安近焉彼其积学深醇容貌词气之间固已穆然远矣迈前迹貽後昆以世有禄位盖诗书之流泽长也

赵充国

赵充国字翁孙陇西上邽人也後徙金城令居以善骑射补羽林为人沈勇有大略少好将帅之节而学兵法通知四夷事武帝时以假司马从贰师将军擊匈奴大为匈奴所围充国乃与壮士百余人溃围陷陈贰师引兵随之遂得解身被二十余创事闻徵诣行在武帝亲视其创嗟叹之拜为中郎迁车骑将军长史昭帝时武都氐人反充国将兵击定之迁中郎将旋以擊匈奴功擢为後将军与霍光册立宣帝封营平侯本始中为蒲类将军征匈奴斩数百级还为後将军少府时光禄大夫义渠安国使行诸羌先零豪言愿时渡湟水北逐民所不田处畜牧安国以闻充国劾安国奉使不敬其後羌人旁缘前言抵冒渡湟水郡县不能禁元康三年先零遂与羌种豪解仇交质盟诅帝闻之以问充国对曰羌人所以易制者以其种自有豪数相攻撃势不一也臣观匈奴欲与羌合盖非一世矣间者匈奴困于西方闻乌桓来保塞恐兵复从东方起数使使尉黎危须诸国设以子女貂裘欲沮解之其计不合疑匈奴更遣使至羌中道从沙陰地出盐泽过长阬入穷水塞南抵属国与先零相直臣恐羌变未止此且复结聯他种宜及未然为之备後月余羌侯狼何果遣使至匈奴籍兵欲擊鄯善炖煌以絶汉道充国以为狼何小月氏种在阳关西南势不能独造此计疑匈奴使已至羌中先零?开乃解仇作约到

秋马肥变必起矣宜遣使者行边兵预为备敕视诸羌毋令解仇以发觉其谋於是两府复白遣义渠安国行视诸羌分别善恶安国至召先零诸豪三十余人以尤桀黠皆斩之纵兵擊其种人斩首千余级於是诸降羌及归义羌侯杨玉等遂刼略小种背畔犯塞攻城邑杀长吏安国将骑三千屯备羌至浩亶为所擊死亡车仗甚衆引还至令居以闻是岁神爵元年春也时充国年七十余上老之使御史大夫丙吉问谁可将者充国曰亡踰於老臣者矣上遣问焉曰将军度羌何如当用几人充国曰百闻不如一见兵难预度臣愿驰至金城图上方略愿陛下以属老臣勿以为忧上笑曰诺充国至金城须兵满万骑欲渡河恐为羌所遮即夜遣三校衔枚先渡渡辄营阵会明毕遂以次尽渡羌数十百骑来出入军傍充国曰吾士马新倦不可驰逐此皆骁骑难制又恐其为诱兵也擊羌以殄?为期小利不足贪令军勿擊遣骑候四望陜中亡贼夜引兵上至落都召诸校司马谓曰吾知羌不能为兵矣使羌发数千人守杜四望陜中兵岂得入哉充国常以远斥堠为务行必为战备止必坚营壁尤能持重爱士卒先计而後战遂西至西部都尉府日飧军士士皆欲为用羌数挑战充国坚守捕得生口言羌豪数相责曰语汝亡反今天子遣赵将军来年八九十矣善为兵今请欲一鬪而死可得耶充国子右曹中郎将卬将兵至令居羌竝出絶转道卬以闻有诏将八校尉与骁骑都尉金城太守合疏捕山间寇通转道津渡初?开豪靡当儿使弟雕库来告都尉曰先零欲反後数日果反雕库种人颇在先零中都尉即留雕库为质充国以为亡罪乃遣归告种豪大兵诛有罪者明白自别毋取并?天子告诸羌人犯法者能相捕斩除罪视所斩之大小老少男女赐钱有差又以其所捕妻子财物尽与之充国计欲以威信招降?开及刼畧者解散羌谋徼极乃擊之时上已发三辅太常徒弛刑及缘边诸郡材官骑士羌骑与武威张掖酒泉太守各屯其郡者合六万人矣酒泉太守辛武贤奏言郡兵皆屯备南山北边空虚势不可久或曰至秋冬乃进兵此贼在境外之策今羌朝夕为寇土地寒苦汉马不耐冬屯兵在武威张掖酒泉万骑以上皆多羸瘦可益马食以七月上旬齎三十日粮分兵并出张掖酒泉合擊?开在鲜水上者羌以畜产为命令皆离散兵即分出虽不能尽诛但夺其畜产掳其妻子复引兵还冬复擊之大兵仍出羌必震坏天子下其书充国令与校尉以下吏士知羌事者博议充国及长史董通年以为武贤欲轻引万骑分为两道出张掖回远千里以一马自随负三十日食为米二斛四斗麦八斛又有衣装兵器难以追逐勤劳而至羌必商军进退稍引去逐水草入山林随而深入羌即据前险守後陜以絶粮道必有伤危之忧而武贤以为可夺其畜产掳其妻子此殆空言非至计也又武威县张掖日勒皆当北塞有通谷水草臣恐匈奴与羌有谋且欲大入幸能要杜张掖酒泉以絶西域其郡兵尤不可发先零首为畔逆它种刼畧故臣愚策欲捐?开闇昧之过隐而勿彰先行先零之诛以震动之宜悔过反善因赦其罪选择良吏知其俗者拊循和辑此全师保胜安边之策天子下其书公卿议者咸以为先零兵盛而负?开之助不先破?开则先零未可图也帝乃拜乐成侯许延壽为强弩将军即拜酒泉太守辛武贤为破羌将军以书敕让充国曰将军计欲至正月乃擊?羌羌人当获麦已远其妻子精兵万人欲为酒泉炖煌寇边兵少民守保不得田作今张掖以东刍粟腾贵转输并起百姓烦扰将军不早及秋共水草之利争其畜食欲至冬羌皆当蓄聚多藏匿山中依险阻将军士寒手足皸?寧有利哉已敕别将各将兵士齎粮尅日擊?羌入鲜水北句廉上去将军可千二百里将军其引兵便道西北进使羌闻之分散其心意离其党与虽不能殄灭当有瓦解者将军急装勿复有疑充国既得让以为将任兵在外便宜有守以安国家乃上书谢罪因陈兵利害曰臣闻兵法攻不足者守有余又曰善战者致人不致於人令卑羌欲为炖煌酒泉寇宜飭兵马练战士以须其至坐得致敌之术以逸擊劳取

胜之道也今恐二郡兵少不足以守而发之行攻释致人之术而从为人所致之道臣愚以为不便先零羌欲为背畔故与?开解仇结约然其私心犹恐汉兵至而?开背之也将必谋先赴?开之急以坚其约先擊?开先零必助之今羌马肥粮食方饶擊之恐不能伤害适使先零得施德於?羌如是约愈坚党愈合羌兵寢多诛之用力数倍臣恐国家忧累不二三岁已也惟陛下裁察奏入玺书报从充国计焉充国引兵至先零在所羌久屯聚解弛望见大军弃车重欲渡湟水道阨狭充国徐行驱之或病其迟充国曰此穷寇不可迫也缓之则走不顾急之则还致死诸校皆曰善羌赴水溺死者数百降及斩首五百余人掳获无算兵至?地令军毋燔聚落刍牧田中?羌闻之喜曰汉果不擊我矣豪靡忘使人来言愿得还复故地充国以闻未报靡忘来自归充国赐饮食遣还谕种人护军以下皆争之曰此反贼不可擅遣充国曰诸君但欲便文自营非为公家忠计也语未卒玺书报令靡忘以赎论後?竟不烦兵而下其秋充国病帝虑其年老加病一朝不讳诏破羌将军武贤诣屯所为副且赐充国书宜急因吏士銳气以十二月擊先零羌时羌降者万余人矣充国度其必坏欲罢骑兵屯田以待其敝作奏未上会得进兵玺书中郎将卬惧将有譴责使客諫止充国不听遂上屯田奏曰臣闻兵者所以明德除害也故举得於外则福生於内不可不慎臣所将吏士马牛食月用粮穀盐茭藁所费不貲难久不解徭役不息又恐他夷卒有不虞之变相因竝起为明主忧且羌易以计破难以兵碎也故臣愚以为擊之不便计度临羌东至浩亶羌故田及公田民所未垦可二千顷以上其间邮亭多坏败者臣前部士入山伐材木大小六万余枚皆在水次愿罢骑兵留弛刑应募及淮阳汝南步兵与吏士私从者合凡万二百余人用穀月二万余斛盐三百余斛分屯要害处水解漕下繕乡亭浚沟渠治湟陜以西道桥七十余所令可至鲜水左右田事出赋人二十晦至四月草生发郡骑及属国胡骑伉健各千倅马什二就草为田者游兵以充入金城郡益积蓄省大费今大司农所转穀至者足支万人一岁食谨上田处及器用簿惟陛下裁许帝报曰如将军言欲罢骑兵万人留田羌当何时伏诛兵当何时得决熟计其便复奏充国上状曰臣闻用兵先为不可胜以待敌之可胜蛮夷习俗虽殊其欲避害就利爱亲戚畏死亡一也今羌亡其美地荐草愁於寄托远遯骨肉离心人有畔志而明主般师罢兵万人留田顺天时因地利以待可胜羌虽未即伏辜兵决可期月而望臣谨条不出兵留田便宜十二事步兵九校吏士万人留屯以为武备因田致穀威德并行一也又因排折羌人令不得归肥饶之地贫破其衆以成羌人相畔之渐二也居民得并田作不失衆业三也军马一月之食度支田士一岁罢骑兵以省大费四也至春省甲士卒循河湟漕穀至临羌以眎羌人揚威武传世折冲之具五也以间暇时下所伐材繕治邮亭充入金城六也兵出乘危徼幸不出令反畔之羌窜於风寒之地离霜露疾疫?堕之患坐得必胜之道七也亡经阻远追死伤之害八也内不损威武之重外不令羌得乘间之势九也又亡惊动河南大开小开使生他变十也治湟陜中道桥令可至鲜水以制西域信威千里从枕席上过师十一也大费既省徭役豫息十二也留屯田得十二便出兵失十二利惟明诏博详公卿议臣采择帝复赐报曰将军言兵决可期月而望者谓今冬耶谓何时也将军独不计羌闻兵颇罢且丁壮相聚攻扰田者及道上屯兵复杀略人将何以止之又大开小开前言曰我告汉军先零所在兵不往擊久留得毋效前五年时不分别人而并擊我其意常恐出此将军熟计复奏充国奏曰臣伏观先零羌所余精兵亡几失地远客分散饥冻?开莫须又常暴略其羸弱畜产畔逆者不絶皆闻天子明令相捕斩之赏臣愚以为羌破坏可日月冀远在来春故曰兵决可期月而望又见北边自炖煌至辽东万余里乘塞列隧有吏卒数千人羌数大衆攻之而不能害今留步士万人屯田地势平易多高山远望之便部曲相保

为塹垒木樵校聯不絕便兵弩飭鬪具?火幸通势及并力以逸待劳兵之利也从今尽三月羌马羸瘦必不敢捐其妻子於他种远涉河山而来为寇又见屯田之士精兵万人终不敢复将其累重还归故地不久必将瓦解其处至於羌小寇盗时杀人民其原未可卒禁虽今出兵岂能即絕又校尉临衆幸得承威德奉厚币拊循衆羌諭以明诏宜皆乡风虽其前辞尝曰得毋效五年宜亡他心不足以故出兵也惟陛下省察充国奏每上辄下公卿议初是充国计者什三四中什五最後什八有诏诘前言不便者皆顿首服丞相魏相任其计可必用帝於是报充国曰将军计善其上留屯田及当罢者人马数上以破羌强弩两将军数言当擊又用充国屯田处离散恐羌犯之於是两从其计诏两将军与中郎将卬出擊所降斩者七八千而充国所降复得五千余人诏罢兵独充国留屯田明年五月充国奏言羌军本可五万人今率余四千人羌靡忘等自诡必得请罢屯兵奏可充国振旅而还所善浩星赐迎说充国曰将军即见宜归功於二将军出擊非愚臣所及充国曰吾年老矣爵位已极岂嫌伐一时事以欺明主哉兵势国之大事当为後法老臣不以余命壹为陛下明言兵之利害卒死谁当复言之者卒以其意对帝然其计罢遣辛武贤归酒泉太守官充国复为後将军卫尉及秋羌果兵斩先零大豪杨玉等首及诸豪皆帅煎巩黄羝之属四千余人降汉封其豪王侯君有差初置金城属国以处降羌诏举可护羌校尉者时充国病四府举辛武贤小弟汤充国遽起奏汤使酒不可典蛮夷不如汤兄临衆时汤已拜受节有诏更用临衆後临衆病免四府复举汤汤数醉?羌人羌人反畔卒如充国言初破羌将军武贤以充国还言兵事罢归故官深恨乃上书告中郎卬过失下吏自杀充国乞骸骨赐安车驷马黄金罢就第朝廷每有四夷大议常与参兵谋问筹策焉年八十六卒諡曰壮充国先以功德与霍光等列画未央宫成帝时西羌常有警上思将帅之臣追念充国乃召黄门郎扬雄即充国图画而颂之

论曰周官车甲卒徒之制即寓於井邑丘甸之中易称君子容民畜衆三代盛时平居无糜饷之兵有事亦无不可战之民管商虽变古法犹师其意而行之致国富强秦汉以来屯田倡自充国诸葛武侯实用以拒魏唐初府兵之制与租庸调竝行其法最善天宝以後骄兵悍卒遂杀主帅蔓延至五季不解亦缘不讲於屯田之策既无以驯柔其血气复无以系恋其身家夫是故可强不可弱可动不可静可聚不可散也充国料敌制胜如善奕者之先局无遗算终局可覆举横斜曲直後先左右虽回易再四而一着不差诗曰方叔元老克壮其犹充国可谓老谋壮事矣昔大禹惟顺水之性以治水故能建非常之原而万世永赖营平惟因羌之情以致羌故能操不战之胜而四夷来王而是时公卿不怙其前非朝廷不囿於衆议师中锡命阃外伸威尤中兴气象哉

王吉

王吉字子阳琅邪阜虞人也少好学明经举孝廉为郎补若卢右丞迁云阳令举贤为昌邑中尉而王好游猎驱驰国中动作亡节吉上疏諫曰今者大王幸方与曾不半日而驰二百里百姓颇废耕桑治道牵马臣愚以为民不可数变也大王不好书术而乐逸游数以奕脆之玉体犯勤劳之烦毒非所以全壽命之宗又非所以进仁义之隆也夫广厦之下细旃之上明师居前劝诵在後上论唐虞之际下及殷周之盛考仁圣之风习治国之道欣欣焉发愤忘食日新厥德其乐岂徒銜橛之间哉休则俛仰屈伸以利形专意积精以适神大王诚留意于此则心

有尧舜之志体有乔松之壽福祿臻而社稷安矣皇帝仁壽至今思慕未怠于宫馆囿池弋猎之乐未有所幸诸侯骨肉莫亲大王大王于属则子也於位则臣也一身而二任之责加焉恩爱行义矜介有不具者于以上闻非飨国之福也王贺虽不遵道然犹知敬礼吉使谒者赐賚有加其後复放纵自若吉辄諫争甚得辅弼之义虽不治民国中莫不敬重焉昭帝崩亡嗣大将军霍光迎立昌邑王吉即奏书戒王曰臣闻高宗谅陰三年不言今大王以丧徵宜日夜哭泣悲哀而已慎毋有所发大将军仁爱勇知忠信之德天下莫不闻愿大王事之敬之政事一聽之大王垂拱南面而已及王以行淫乱废昌邑羣臣皆坐诛惟吉与郎中令龚遂以忠直数諫正得减死髡为城旦起家复为益州刺史病去官复徵为博士諫大夫是时宣帝颇修武帝故事宫室车服盛于昭帝时外戚许史王氏贵宠而帝躬亲政事任用能吏吉上疏言得失曰陛下躬圣质总万方帝王图籍日陈于前维思世务将兴太平诏书每下民欣然若更生臣伏而思之可谓至恩未可谓本务也欲治之主不世出公卿幸得遭逢其时言听諫从然未有建万世之长策举明主于三代之隆者也其务在于期会簿书断狱听讼而已此非太平之基也臣闻圣主宣德流化必自近始朝廷不备难以言治左右不正难以化远民者弱而不可胜愚而不可欺也圣主独行于深宫得则天下称颂之失则天下咸言之行发于近必见于远故谨选左右审择所使左右所以正身也所使所以宣德也诗云济济多士文王以寧此其本也春秋所以大一统者六合同风九州共贯也今俗吏所以牧民者非有礼义科指可世通行者也独设刑法以守之其欲治者不知所由以意穿凿各取一切权譎自在故一变之後不可复修也是以百里不同风千里不同俗户异政人殊服诈伪萌生刑罚亡极质朴日销恩爱寢薄孔子曰安上治民莫善于礼非空言也王者未制礼之时引先王之礼宜于今者而用之愿陛下承天心发大业与公卿大臣延及儒生述旧礼明王制毆一世之民跻之仁壽之域则俗何以不若成康壽何以不若高宗窃见趋务不合于道者谨条奏惟陛下裁择焉吉意以为夫妇人伦大纲夭壽之萌也世俗嫁娶太早未知为人父母之道是以教化不明而民多夭聘妻送女亡节则贫人不及故不举子又汉家列侯尚公主诸侯则国人承翁主使男事女夫诎于妇逆陰阳之位故多女乱古者衣服车马贵贱有章以褒有德而别尊卑今上下僭差人人自制是以贪财趋利不畏死亡周之所以能致治刑措者以其禁邪于冥冥絕恶于未萌也又言舜汤不用三公九卿之世而举皐陶伊尹不仁者远今使俗吏得任子弟率多骄骜不通古今至于积功治人亡益于民此伐檀所为作也宜明选以求贤除任子之令外家及故人可厚以财不宜居位去角抵减乐府省尚方明示天下以俭古者工不造珎瑑商不通侈靡非工商之独贤政教使之然也民见俭则归本本立而未成其指如此帝以其言迂阔不甚宠异也吉遂谢病归琅邪始吉少时学问居长安东家有大枣树垂吉庭中吉妇取枣以啖吉吉後知之乃去妇东家闻而欲伐其树邻里共止之因固请吉令还妇里中为之语曰东家有树王阳妇去东家枣完去妇复还其厉志如此吉与贡禹为友世称王阳在位贡公弹冠言其取舍同也元帝初即位遣使者徵吉吉年老道病卒帝悼之後遣使者吊祠云初吉兼通五经能为驺氏春秋以诗论语教授好梁丘贺说易令子骏受焉骏以孝廉为郎由京兆尹位至丞相有能名所谓前有赵张後有三王者也论曰君子居其位则思諫诤将以献可替否纳君於道也然必自道而後能以道正君宣元成哀之间诸博古之士类援据圣籍指斥时政危言深论不遗余力然皆非笃志力行于圣贤之道者其为言多倚于术数之小抑亦流党援之私吉谨身厉行不欺其志故前後諫疏皆以忠诚发为说言其通達国体晓畅时事似贾谊其首重德教学术深醇似董仲舒西京名臣鲜有伦比其在贾董之间乎及言不用即翻然引去尤得以道事君不可

则止之遗规焉时人以王贡竝称贡虽厚德可风然年老浮沉取容至使华陰守丞上章欲以朱云代其位犹恬不之怪尚得为守道之士乎哉

史传三编卷十一

卷十二

<史部,传记类,总录之属,史传三编

钦定四库全书

史传三编卷十二

大学士朱轼撰

名臣传四

汉

魏相

魏相字弱翁济陰定陶人也徙平陵少学易以对策高第为茂陵令顷之御史大夫桑弘羊客诈称御史止传丞不以时谒客怒缚丞相疑客有奸捕案其罪茂陵大治後迁河南太守会故丞相车千秋子为雒阳武库令以相治郡严惧久获罪自免去相使掾追还终不肯相独恨曰大将军闻此令去官必以为我用丞相死不能遇其子使当世贵人非我殆矣後有人告相贼杀不辜事下有司河南卒戍中都官者二三千人遮大将军光自言愿复留作一年以赎太守罪河南老弱万余人守关欲入上书关吏以闻光卒用武库令事繫相狱会赦出复守茂陵令迁扬州刺史考案郡国守相多所贬退光禄大夫丙吉素善相与相书曰朝廷已深知弱翁治行方且大用矣愿少慎事自重藏器于身相心善其言为霁威严二岁徵为谏大夫复为河南太守宣帝即位徵为大司农迁御史大夫相上封事以为圣王褒有德以怀万方显有功以劝百僚今新失大将军宜显明功臣以镇藩国车骑将军安世忠信谨厚国家重臣也宜尊其位上亦欲用之乃拜大司马车骑将军领尚书事时霍光子禹复为大将军兄子山领尚书事诸壻并宿卫其夫人显及诸女皆通籍长信宫或夜诏门出入相因平恩侯许伯奏封事言春秋讥世卿今霍氏骄奢放纵寢不制宜有以损夺其权破散陰谋以固万世之基全功臣之世又故事诸上书者皆为二封署其一曰副领尚书者先发副封所言不善屏去不奏相复因许伯白去副封以防雍蔽帝从其议霍氏杀许后之谋始得上闻封相高平侯代韦贤为丞相其後霍氏谋矫太后诏先召斩相然後废天子事觉伏诛宣帝始亲万几厉精为治综核名实而相总领衆职甚称上意元康中匈奴遣兵撃汉屯田车师者不能下帝与後将军赵充国等议欲因匈奴衰弱撃之使不敢扰西域相上书谏曰臣闻之救乱诛暴谓之义兵兵义者王敌加于己不得已而起者谓之应兵兵应者胜争恨小故不忍愤怒者谓之忿兵兵忿者败利人土地宝货者谓之贪兵兵贪者破恃国家之大矜民人之衆欲见威于敌者谓之骄兵兵骄者灭此五者非但人事乃天道也间者匈奴尝有善意所得汉民辄归之未有犯于边境虽争屯田车师不足致意中今闻诸将军欲兴兵入其地臣愚不知此兵何名者也今边郡困乏不能自存

难以动兵军旅之後必有凶年言民以愁苦之气伤陰阳之和也出兵虽胜犹有後忧今郡国守相多不实选风俗犹薄水旱不时案今年计子弟杀父兄妻杀夫者凡二百二十二人臣愚以为此非小变也奈何不忧此而欲发兵报纖介之忿于远方愿陛下与平昌侯乐昌侯平恩侯及有识者详议乃可帝从相言而止相明易经有师法好观汉故事及便宜章奏以为古今异制方今务在奉行故事而已数条汉兴以来国家便宜行事及贤臣贾谊鼂错董仲舒等所言奏请施行之曰臣闻明主在上贤辅在下则君安娱而民和睦臣相幸得备位不能奉明法广教化理四方以宣圣德民多背本趋末或有饥寒之色为陛下之忧臣相罪当万死臣相智能浅薄不明国家大体时用之宜惟民终始未得所繇窃伏观先帝圣德仁恩之厚勤劳天下垂意黎庶忧水旱之灾为民贫穷发仓廩赈乏餒遣諫大夫博士巡行天下察风俗举贤良平冤狱省诸用寬租赋弛山泽波池禁秣马酤酒贮积所以周急继困慰安元元便利百姓之道甚备臣相不能悉陈昧死奏故事诏书凡二十三事惟陛下留神元元帅繇先帝盛德以抚海内上施行其策又数表采易陰阳及明堂月令奏之其略曰明王谨於尊天慎于养人故立羲和之官以乘四时节授民事君动静以道奉顺陰阳则日月光明风雨时节寒暑调和三者得叙则灾害不生五谷熟丝麻遂草木茂鸟兽蕃民不夭疾衣食有余若是则君尊民说上下亡怨政教不违礼让可兴是陰阳者王事之本羣生之命自古圣贤未有不繇者也天子之义必纯取法天地而观于先圣高皇帝孝文皇帝施恩惠于天下者伏念陛下恩泽甚厚然而灾气未息窃恐诏令有未合当时者愿陛下选明经通知陰阳者四人春夏秋冬各主一时时至明言所职以和陰阳天下幸甚相数陈便宜帝纳用焉相敕掾史案事郡国及休告从家还至府辄白四方异闻或有逆贼风雨灾变郡不上相辄奏言之时丙吉为御史大夫同心辅政帝皆重之相为人严毅不如吉寬视事九岁卒諡曰宪侯

论曰王者举事必求其端于天而敬天者必尊祖大雅曰文王陟降在帝左右又曰上天之载无声无臭仪刑文王万邦作孚于祖宗为继述志事于天地即为参贊化育非有二理也尧典言钦若昊天即继之曰敬授人时太誓曰天佑下民作之君作之师惟其克相上帝又以知自古帝王未有不勤民而能敬天者也魏相为中兴贤相谟谋经画自任不小裨益弘多为帝陈陰阳四时之道而终归于法祖又虑民以愁苦之气伤天地之和凡郡国逆贼风雨灾变不时奏闻盖所以作其朝乾夕惕于深宫庶几政无阙事民心悅而天意从其言最与诗书所载相表里岂独善道易理哉夫人君一日二日万几其大要不外敬天尊祖勤民三者而相倦倦上言此固公孤所为辅导人主以求乎寅亮天地變理陰阳之实效居是位必思无忝是职可谓大臣矣

丙吉

丙吉字少卿鲁国人也治律令为鲁狱史积劳迁廷尉右监坐法失官巫蛊事起吉以故廷尉监徵诏治巫蛊郡邸狱时宣帝生数月以皇曾孙坐卫太子事系吉心知太子无事实重哀曾孙无辜择谨厚女徒令保养之置闲燥处巫蛊事连岁不决望气者言长安狱中有天子气武帝遣使者郭穰往郡邸狱亡轻重一切皆杀之穰夜至吉闭门不纳曰皇曾孙在他人亡辜死者犹不可况亲曾孙乎相守至天明不得入穰还奏闻武帝亦寤曰天使之也因赦天下郡邸狱系者独赖吉得生恩及四海矣曾孙病几不全者数焉吉数敕保养乳母加致医药视遇甚

有恩惠以私财物给其衣食後吉迁大将军长史霍光甚重之光以昭帝亡嗣迎立昌邑王王行淫乱更废之与诸大臣议所立未定吉奏记光曰方今社稷宗庙羣生之命在将军之壹举窃伏听於衆庶察其所言诸侯宗室在位列者未有所闻於民间也而遗诏所养武帝曾孙名病已在掖庭外家者吉前使居郡邸时见其幼少至今十八九矣通经术有美材行安而节和愿将军详大议参以蓍龟先使入侍令天下昭然知之然後决定大策天下幸甚光遂与吉迎立曾孙於掖庭是为宣帝赐吉爵关内侯吉为人深厚不伐善自曾孙遭遇吉絶口不道前恩故朝廷莫能明其功也地节三年立皇太子吉为太子太傅数月迁御史大夫及霍氏诛帝躬亲政省尚书事是时掖庭宫婢则令民夫上书自陈尝有阿保之功章下掖庭令考问则词引使者丙吉知状吉时为御史大夫掖庭令将则诣御史府以视吉吉识谓则曰汝尝坐养皇曾孙不谨督答汝安得有功独渭城胡组淮阳郭徵卿有恩耳分别奏组等供养劳苦状帝亲见问然後知吉有旧恩而终不言大贤之封吉博阳侯邑千三百户临当封吉疾病帝忧吉不起将使人加绋而封之及其生存也太子太傅夏侯胜曰臣闻有陰德者必飨其乐以及子孙今吉未获报而疾甚非其死疾也後果瘞吉上书自陈不宜以空名受赏帝不许後五岁代魏相为丞相吉本起狱法小吏後学诗礼皆通大义及居相位尚寬大好礼让或谓吉曰君侯为汉相奸吏成其私然无所惩艾吉曰夫以三公之府有案吏之名吾窃陋焉後人代吉因以为故事公府不案吏自吉始掾史有罪臧不称职辄予长休告终无所案验于官属务掩过扬善吉驭吏耆酒尝从吉出醉欧丞相车上西曹主吏白欲斥之吉曰以醉饱之失去士使此人将复何所容西曹第忍之此不过污丞相车茵耳遂不去也此驭吏边郡人习知边塞发犇命警备事尝出适见驿骑持赤白囊边郡发犇命书驰来至因随驿骑至公车刺取知匈奴入云中代郡遽归府见吉白状因曰恐匈奴所入边郡二千石长吏有老病不任兵马者宜可豫视吉善其言召东曹案边长吏未已诏召丞相御史问以匈奴所入郡吏吉具对御史大夫卒遽不能详知以得谴让而吉见谓忧边思职驭吏力也吉又尝出逢清道羣鬪者死伤横道吉过之不问前行逢人逐牛牛喘吐舌吉止驻使骑吏问逐牛行几里矣掾史独谓丞相前後失问吉曰民鬪相杀伤长安令京兆尹职所当禁备逐捕岁竟丞相课其殿最奏行赏罚而已宰相不亲小事非所当于道路问也方春少阳用事未可太热恐牛近行用暑故喘此时气失节恐有所伤害也三公典调和陰阳职所当忧是以问之掾史乃服以吉知大体吉病笃帝自临问谁可代君者吉顿首曰西河太守杜延年明於法度晓国家故事前为九卿十余年今在郡治有能名廷尉于定国执宪详平天下自以不冤太仆陈万年事後母孝敦厚备於行止此三人能皆在臣右惟上察之上以吉言皆是而许焉後三人居位皆称职帝称吉为知人卒諡曰定侯前汉书赞曰古之制名必繇象类远取诸物近取诸身故经谓君为元首臣为股肱明其一体相待而成也是故君臣相配古今常道自然之势也近观汉相高祖开基萧曹为冠孝宣中兴丙魏有声是时黜陟有序衆职修理公卿多称其位海内兴於礼让览其行事岂虚乎哉

论曰自来陰阳愆伏之患虽曰天道实人事为之三公典调和陰阳非如太史司天日月星辰之行使之宿离不忒经纪有常而已必将上佐天子敬修其貌言视听於上而慎用其礼乐刑政於下使德化下究民无怨争海内刑措然後为能致中和弘位育也夫人事之乖戾莫大於讐杀者填道惟政教阙遗是以其民乘於血气心知之险而鬪捷恃强凌弱暴寡上干天和时气失节或此之由吉前後正坐失问当时顾谬以知大体许之何哉吉起家狱史而寬仁恭让荐贤为国有大臣器昌言远犹不及魏相而厚德过之其保护曾孙恩礼并茂至於闭门拒使

虽抗违明诏不恤卒寤主意活及万人後复奏记迎立为汉中兴主安国家定社稷利民人功不在霍光张安世下此其卓卓不磨者世乃竞称其问牛喘一事遗朴节而録巧言不亦舛夫

萧望之

萧望之字长倩东海兰陵人也徙杜陵望之好学治齐诗事同县后仓且十年又事博士白奇从夏侯胜问论语礼服京师诸儒称述焉是时霍光秉政丙吉荐儒生王仲翁与望之等数人皆召见先是上官桀与盖主谋杀光光既诛桀等後出入自备吏民当见者露索去刀兵两吏挟持望之独不肯听自引出阁曰不愿见吏牵持匆匆光闻之告吏勿持望之既至前说光曰将军以功德辅幼主天下之士争愿自効以辅高明今士见者露索挟持恐非周公相成王躬吐握之礼致白屋之意于是光独不除用望之而仲翁等皆补大将军史三岁间仲翁至光禄大夫给事中望之以射策甲科为郎署小苑东门候仲翁从苍头庐儿下车趋门传呼甚宠顾谓望之曰不肯録録反抱关为望之曰各从其志数年免归为郡吏及御史大夫魏相除望之为属察廉为大行治礼丞时大将军光卒子禹复为大司马亲属皆宿卫地节三年京师雨雹望之上疏愿赐清闲之宴口陈灾异之意宣帝自在民间闻望之名曰此东海萧生耶下少府宋畸问状无有所讳望之对以为春秋昭公三年大雨雹是时季氏专权卒逐昭公今陛下以圣德居位然善祥未臻陰阳不和是大臣任政一姓擅势之所致也惟明主躬万几选同姓举贤才以为心腹与参政谋令公卿大臣朝见奏事明陈其职以考功能如是则庶事理公道立奸邪塞私权废矣对奏天子拜望之为谒者时帝初即位思进贤良多上书言便宜辄下望之问状高者请丞相御史次者中二千石试事满岁以状闻下者报闻或罢归田里所白处奏皆可累迁谏大夫丞相司直岁中三迁官至二千石其後霍氏竟谋反诛望之寢益任用是时选博士谏大夫通政事者补郡国守相以望之为平原太守望之雅意在本朝远为郡守内不自得乃上疏曰朝无争臣则不知过国无達士则不闻善陛下宜选明经术通谋虑之士以为内臣与参政事今悉出谏官以补郡吏所谓忧其末而忘其本者也书闻徵入守少府宣帝察望之经明持重论议有余材任宰相欲详试其政事复以为左冯翊望之恐有不合意欲移病帝闻之使侍中金安上谕意望之即视事是岁西羌反汉遣後将军征之京兆尹张敞建议以粟不足欲令民入粟赎罪事下有司望之与少府李强以为如此则富者得生贫者独死是贫富异刑而法不一也人情困穷父兄囚执闻出财得以生活为人子弟者将不顾死亡之患败乱之行以赴财利求救亲戚一人得生十人以丧如此则伯夷之行坏公绰之名?政教一倾虽有周召之佐恐不能复臣窃痛之张敞复执前议望之复与相难而丞相魏相等以为羌且破败转输略足相给遂不从敞议望之为左冯翊三年京师称之迁大鸿臚先是乌孙昆弥翁归靡因长罗侯常惠上书愿以汉外孙元贵靡为嗣得复尚少主结婚内附畔去匈奴诏下公卿议望之以为乌孙絶域信其美言万里结婚非长策也天子不听神爵二年遣常惠送公主配元贵靡未出塞翁归靡死其兄子狂王背约自立惠从塞下上书请留少主敦煌郡惠至乌孙责以负约因立元贵靡还迎少主诏下公卿议望之复以为不可乌孙持两端亡坚约其效可见前少主在乌孙四十余年恩爱不亲密边境未以安此已事之验也今少主以元贵靡不得立而还信无负於四裔此中国之大福也少主不止繇役将兴其原起此天子从其议徵少主还乌孙国亦分汉遂不与结婚三年代丙吉为御史大夫五凤中匈奴大乱议者多曰匈奴为害日久可因其坏乱举兵灭之望之以为春秋晋士匄帅师侵齐闻齐侯卒引师而还君子大其

不伐丧前单于慕化向善请求和亲未终奉约不幸为贼臣所杀今而伐之是乘乱而幸灾也彼必奔走远遁不以义动兵恐劳而无功宜遣使吊问辅其微弱救其灾患如遂蒙恩得复其位必称臣服从此德之盛也帝从其议及匈奴呼韩邪来朝诏公卿议其仪丞相霸等议宜如诸侯王位次在下望之以为单于非正朔所加故称敌国宜待以不臣之礼位在诸侯王上外夷稽首称藩中国让而不臣此则羈縻之谊谦亨之福也如使匈奴後嗣卒有鸟窜鼠伏阙於朝享不为畔臣信让行乎蛮貊福祚流於无穷万世之长策也天子采其议用之後丞相司直鯨延壽劾奏望之左迁太子太傅以论语礼服授皇太子及宣帝寝疾选大臣可属者乃拜望之前将军与车骑将军史高光禄大夫周堪同受遗诏辅政领尚书事太子即位是为孝元帝望之堪本以师傅见尊重帝数宴见言治乱陈王事望之选白宗室明经达学散骑谏大夫刘更生给事中与侍中金敞并拾遗左右四人同心谋议劝道上以古制多所欲匡正帝甚乡纳之初宣帝不甚从儒术任用法律而中书宦官用事中书令弘恭石显久典枢机明习文法亦与车骑将军高为表里论议常独持故事不从望之等恭显又时倾仄见绌望之以为中书政本宜以贤明之选自武帝游宴後庭故用宦者非国旧制又违古不近刑人之义白欲更置士人由是大与高恭显忤显等乃陰结楚人郑朋令告望之等谋欲罢车骑将军疏退许史状事下弘恭恭显请将堪更生等召致廷尉于是诏收望之前将军印绶及堪更生皆免为庶人後数月复赐望之爵关内侯食邑六百户给事中朝朔望坐次将军天子方倚欲以为丞相会望之子散骑中郎汲上书讼望之前事事下有司复奏望之前所坐明白无譖诉者而教子上书失大臣体不敬请逮捕恭显等知望之素高节不辱乃固请於帝谓宜稍诘之於狱以塞其怏怏心帝不得已可其奏及使者召望之其门下生朱云劝望之自裁于是望之仰天叹曰臣备位将相年踰六十矣老入牢狱苟求生活不亦鄙乎字谓云曰游趣和药来竟饮鸩自杀望之八子至大官者三人育咸由

论曰望之处恭显之间衆陰翩翩不富以邻苟能内积忠诚外密机事纳约自牖使主意明见然後发其奸而锄去之如见晷之消雨雪力少而功倍也计不出此而汲汲乎獎气类标门户急与之角固其过涉灭顶而自贻之戚也然士以学行遇主知进则成功退则完节固其分耳自武帝尊崇儒术士之服儒衣冠称先王者继踵登朝其间持禄保位者时有之至於卓卓自树立如望之与朱云师生两人者虽过刚则折终罹患害亦庶几乎中行独复不以吉凶祸福撓其心者所由与张禹孔光诸人远矣

朱云

朱云字游鲁人也徙平陵少以轻侠闻年四十乃变节从博士白子友受易又事前将军萧望之受论语皆能传其业好倜傥大节当世以是高之元帝时华陰守丞嘉上封事言治道在于得贤平陵朱云兼资文武忠正有智略可使以六百石秩试守御史大夫以尽其能帝乃下其事问公卿太子少傅匡衡对以为嘉从守丞而图大臣之位欲以匹夫徒步之人而超九卿之右非所以重国家而尊社稷也云素好勇其行义未有以异而嘉妄相称举疑有奸心渐不可长宜下有司案验以明好恶嘉竟坐之是时少府五鹿充宗贵幸为梁丘易自宣帝时善其说元帝好之欲考其异同令充宗与诸易家论充宗乘贵辩口莫能与抗会有荐云者召入掇登堂抗首而请音动左右既论难连挂五鹿君故诸儒为之语曰五鹿岳岳朱云折其角鯨是

为博士迁杜陵令坐故纵亡命会赦举方正为槐里令时中书令石显用事与充宗为党百僚畏之惟御史中丞陈咸年少抗节不附显等而与云相结云数上疏言丞相韦玄成容身保位亡能往来而咸数毁石显久之有司考云疑风吏杀人羣臣朝见帝问丞相以云治行丞相玄成言云暴虐亡状并劾咸交通云於是下咸云狱减死为城旦废锢终元帝世至成帝时丞相故安昌侯张禹以帝师位特进甚尊重云上书求见公卿在前云曰今朝廷大臣上不能匡主下亡以益民皆尸位素餐孔子所谓鄙夫不可与事君苟患失之亡所不至者也臣愿赐尚方斩马劒断佞臣一人以厉其余帝问谁也对曰安昌侯张禹帝大怒曰小臣居下讪上廷辱师傅罪死不赦御史将云下云攀殿槛折云呼曰臣得从龙逢比干游于地下足矣未知圣朝何如耳於是左将军辛庆忌免冠解印绶叩头流血以死争帝意解然後得已及後当治槛帝曰勿易因而辑之以旌直臣云自是不复仕常居鄠田时乘牛车从诸生所过皆敬事焉薛宣为丞相云往见宣备宾主礼因留云宿从容谓云曰在田野亡事且留我东阁可以观四方奇士云曰小生乃欲相吏耶宣不敢复言其教授择诸生然後为弟子年七十余卒於家病不呼医饮药遗言以身服斂棺周於身土周於椁为丈五坟葬平陵东郭外

论曰自古圣贤豪杰由匹夫崛起在卿相者伊傅之徒指不胜屈周官三公不必备惟其人孔子曰所谓大臣者以道事君不可则止今由与求也可谓具臣矣言其人实无大臣事君之道非以陪隶故黜之也自孝元以来诸大臣多外崇经术之望优游养交妨贤者路如匡衡贡禹韦玄成辈未免乎此衡畏惮石显不敢斥其奸邪奏疏敷陈经术斐亹可观宋儒讥其泛而不切骤使风节如朱云与之并立彼此互形必不能腴然一日安於朝廷之上所由亟挤而去之韦玄成容身保位实与衡等云复显言攻之又何怪其加之重罪至禁锢使终身哉在易坤之初六曰履霜坚冰至方灾异数兴吏民皆指为王氏专政所致成帝内颇然之特命驾就决於禹禹自以年老子孙弱惧结怨王氏遂诡对上由此不疑权德輿谓西汉之亡亡於张禹职此之故向使成帝感悟云言戮张禹之罪黜王氏之权一举而正朝廷定国家皆在於是云虽不公卿可谓非以安社稷为悦之大臣哉五鹿充宗之挫辩於云非独理拙也彼望见云丰采凜凜已先慑於心如孟子氏与淳于诸辩士往复亦其泰山岩岩气象有以夺之耳故尝自曰我善养吾浩然之气永始元延之间公卿在位者皆谨密小心奉令恐後无所为深识大力以一身负天下之安危者其气固繭然馁矣谓之具臣则可谓之大臣则不可

王章

王章字仲卿泰山钜平人也少以文学为官稍迁至谏大夫在朝廷名敢直臣元帝初擢为左曹中郎将与御史中丞陈咸相善共毁中书令石显为显所陷咸减死髡章免官成帝立徵章为谏大夫迁司隶校尉大臣贵戚敬惮之王尊免後代者不称职章以选为京兆尹时帝舅大将军王凤辅政帝即位数年未有继嗣体常不平定陶共王来朝帝遇之甚厚因留国邸旦夕入侍大将军凤心不便共王在京师会日蚀凤因言定陶王虽亲於礼当奉藩在国今留侍京师诡正非常故天见戒宜遣王之国帝不得已於凤而许之与共王涕泣而决章乃奏封事言凤建遣共王之国非是日蚀之咎在凤天子召见章延问以事章对曰天道聪明佑善灾恶今陛下引近定陶王所以承宗庙重社稷此正议善事何故致灾异灾异之发为大臣颺政者也今凤归咎定陶王欲使天子孤立於上颺擅朝事非忠臣也且日食陰侵阳臣颺君之咎今政

事大小皆自凤出天子曾不一举手凤不内省责反归咎善人推远定陶王且凤诬罔不忠非一事也前丞相乐昌侯商本以先帝外属内行笃有威重位历将相国家柱石臣也其人守正不肯诘节随凤委曲卒用闺门之事为凤所罢身以忧死衆庶愍之又凤知其小妇弟张美人已尝适人不宜配御至尊托以为宜子纳之後宫此三者皆大事陛下所自见足以知其余及他所不见者凤不可令久典事宜退使就第选忠贤以代之天子闻章言大感悟纳之谓章曰微京兆尹直言吾不闻社稷计且惟贤知贤君试为朕求可以自辅者於是章奏封事荐中山孝王舅琅琊太守冯野王先帝时历二卿忠信质直智谋有余帝自为太子时数闻野王先帝名卿声誉出凤远甚方倚欲以代凤凤闻之称病上疏乞骸骨词指甚哀太后闻之垂涕不御食上少而亲倚凤弗忍废使尚书劾奏章下章于吏死狱中初章为诸生学长安独与妻居章疾病无被卧牛衣中与妻决涕泣其妻呵怒之曰仲卿京师尊贵在朝廷人谁踰仲卿者今疾病困厄不自激昂乃涕泣何鄙也及章为京兆欲上封事妻又止之曰人当知足独不念牛衣中涕泣时耶章曰非女子所知也书遂上果下廷尉狱妻子皆收繫章小女年可十二夜起号哭曰平日狱上呼囚数常至九今八而止我君素刚先死者必君明日问之章果死妻子皆徙合浦王凤死後弟成都侯商复为大将军白上还原章妻子故郡其家属皆完具采珠致产时萧育为泰山太守皆令赎还故田宅章为京兆二岁死不以其罪衆庶冤纪之与王尊王骏并称三王

论曰是时王氏欲代汉无愚智皆知之然汉道衰守节守义之臣少而王氏有太后为之宗主言者知不免故莫敢言宰辅如孔光张禹文学之士如杜钦谷永方且饰虚词运计策为王氏後先之不暇况敢撓其锋乎言王氏者宗室惟刘向外臣惟王章而章言帝几用岂不伟哉

王嘉

王嘉字公仲平陵人也以明经射策甲科为郎坐事免鸿嘉中举敦朴能直言召见宣室对政事得失遂由长陵尉超迁大中大夫出为九江河南太守治甚有声徵入为大鸿胪徙京兆尹迁御史大夫建平三年拜丞相封新甫侯嘉为人刚直严毅有威重上甚敬之哀帝初立欲匡成帝之政多所变动嘉上疏曰臣闻古者诸侯继世虽不能尽贤天子为择臣立命卿以辅之居是国也累世尊重然後士民之衆附焉是以教化行而治功立今之郡守重於古诸侯也孝文时吏居官者或长子孙以官为氏其二千石长吏亦安官乐职然後上下相望莫有苟且之意其後稍稍变易公卿以下转相促急又数改更政事司隶部刺史察过悉劾发扬陰私吏或居官数月而退送故迎新交错道路中材苟容取全下材怀危内顾壹切营私者多二千石益轻贱吏民慢易之或持其微过增加成罪言於刺史司隶或至上书章下衆庶知其易危小失意则有离畔之心前山阳亡徒苏令等从横吏士临难莫肯仗节死义以守相威权素夺也国家有急取办於二千石二千石尊重难危乃能使下惟陛下留神於择贤记善忘过容忍臣子勿责以备人情不能不有过差宜可阔略令尽力者有所劝此方今急务国家之利也前苏令发欲遣大夫使逐问状时见大夫无可使者召盩厔令尹逢拜为谏大夫遣之今诸大夫有材能者甚少宜预养可成就者则士赴难不爱其死临事仓卒乃求非所以明朝廷也嘉因荐儒者公孙光满昌及能吏萧咸薛修等皆故二千石有名称天子纳而用之会息夫躬孙宠等因中常侍宋弘上书告东平王云祝诅又与后舅伍宏谋弑上为逆云等伏诛躬宠擢为吏二千

石是时董贤爱幸於上上欲侯之而未有所缘傅嘉劝上因东平事以封贤上於是定躬宠告东平本章掇去宋弘更言因董贤以闻欲以其功侯之皆先赐爵关内侯顷之欲封贤等上心惮嘉乃先使皇后父孔乡侯傅宴持诏书视丞相御史於是嘉与御史大夫贾延上封事言董贤等三人始赐爵时衆庶匈匈至今流言未解陛下仁恩於贤等不已宜暴贤等本奏语言延问公卿大夫博士议郎考合古今明正其义然後乃加爵土不然恐大失衆心上感其言止数月卒下诏封贤高安侯宠方阳侯躬宜陵侯其後日食举直言嘉复奏封事极言上宠贤太过致贤奢僭放纵变乱陰阳灾异衆多臣嘉幸得备位不能通愚忠之信惟陛下慎己之所独向察衆人之所共疑往者宠臣邓通韩嫣骄贵逸豫卒陷罪辜不终其禄所谓爱之适足以害之也宜深览前世以节贤宠安全其命於是上寢不说而愈爱贤不能自胜会祖母傅太后薨上因托傅太后遗诏令成帝母王太后下丞相御史益封贤二千户嘉封还诏书因奏封事諫曰臣闻爵禄土地天之有也书曰天命有德五服五章哉王者代天爵人尤宜慎之不得其宜则衆庶不服感动陰阳其害疾自深高安侯贤佞幸之臣陛下倾爵位以贵之单货财以富之损至尊以宠之流闻四方皆同怨疾里谚曰千人所指无病而死臣常为之寒心臣骄侵罔陰阳失节气感相动害及身体陛下寝疾久不平继嗣未立宜思正万事顺天之心以求福佑奈何轻身肆意不念高祖之勤苦垂立制度欲传之於无穷哉初廷尉梁相治东平王云狱心疑云冤狱有饰词奏欲传之长安更下公卿覆治尚书令鞫谭仆射宗伯凤以为可许天子以相等操持两心无讨贼疾恶主讎之意诏皆免为庶人後数月大赦嘉奏封事荐相等明习治狱相计谋深沈谭颇知雅文凤经明行修圣王有计功除过臣窃为朝廷惜此三人书奏上不能平後二十余日嘉封还益董贤户事上乃发怒召嘉诣尚书责问以相等罪恶着闻乃更称誉对状嘉免冠谢罪事下将军中朝者光禄大夫孔光等劾嘉迷国罔上请与廷尉上可光奏有诏召嘉诣狱使者既到府掾吏涕泣共和药进嘉嘉引药杯以击地谓官属曰丞相幸得备位三公奉职负国当伏刑都市以示万衆丞相岂儿女子耶何为咀药而死遂出拜受诏乘小车自诣廷尉上闻愈大怒使将军以下与五二千石杂治吏诘问嘉稍侵辱之嘉仰天叹曰幸备宰相不能进贤退不肖以是负国死有余责吏问贤不肖主名嘉曰贤故丞相孔光故大司空何武不能进恶高安侯董贤父子佞邪乱朝而不能退罪当死死无所恨嘉系狱二十余日不食欧血死後上览其对而思嘉言复以孔光为丞相徵用何武为御史大夫元始四年诏书追录忠臣封嘉子崇为新甫侯追諡嘉曰忠

论曰孝宣以太守为吏民之本数变易则下不安民知其将久不可欺罔乃服从教化故二千石有治效辄以玺书勉励增秩赐金或爵至关内侯公卿缺则选诸所表以次用之嘉所言正与宣帝表里诚有以握治化之原不愧贤宰相其刚直严毅不阿佞幸又申屠嘉之後兴也顾彼能使之服辜此遂因以贾祸岂非遭逢时会有不同乎案嘉之狱孔光实成之嘉不以私害公对吏首举光贤盖光前居相位守正不阿而罢天下贤之宜嘉之有斯举也孰知光再用之後已判若两人矣借嘉之命陰以结贤之心逆忠直比顽童恶莫大焉而嘉重为所欺迄死不悟於此见光之希世苟合信所称无往而不为愿人者欤

鲍宣

鲍宣字子都渤海高城人也好学明经举孝廉为郎辄病去哀帝初大司空何武除宣为西曹

掾甚敬重焉荐为谏大夫迁豫州牧岁余免归数月复徵为谏大夫宣每居位常上书谏争其言少文多实是时帝祖母傅太后欲与帝母俱称尊号封爵亲属丞相孔光大司空师丹何武大司马傅喜始执正议失傅太后指皆免官丁傅子弟并进董贤贵幸宣以谏大夫从其後上书谏曰窃见孝成皇帝时外亲持权人人牵引所私以充塞朝廷妨贤人路浊乱天下奢泰亡度穷困百姓是以日食且十彗星四起危亡之徵陛下所亲见也今奈何反覆剧於前乎朝臣亡有大儒骨鯁白首耆艾魁垒之士议论通古今喟然动衆心忧国如饥渴者臣未见也敦外亲小童及幸臣董贤等在公门省户下陛下欲与此共承天地安海内甚难今世俗谓不智者为能谓智者不能请寄为奸羣小日进国家空虚用度不足民流亡去城郭盗贼并起此非公卿守相贪残成化之所致耶羣臣幸得居尊官食重禄岂有肯加惻隐於细民助陛下流教化者耶志但在营私家称宾客为奸利而已以苟容曲从为贤以拱默尸禄为智谓如臣宣等为愚陛下擢臣岩穴诚冀有益毫毛岂徒欲使臣美食大官重高门之地哉天下乃皇天之天下也陛下上为皇天子下为黎庶父母为天牧养元元视之当如一合尸鸠之诗今贫民菜食不厌衣又穿空父子夫妇不能相保诚可为酸鼻陛下奈何独私养外亲与幸臣董贤多赏赐以大万数使奴从宾客浆酒霍肉苍头庐儿皆用致富及汝昌侯傅商亡功而封取非其官官非其人而望天说民服岂不难哉方阳侯孙宠宜陵侯息夫躬辩足以移衆强可用独立奸人之雄惑世尤剧者也宜以时罢退及外亲幼童未通经术者皆宜令休就师傅急徵故大司马傅喜使领外亲故大司空何武师丹故丞相孔光故左将军彭宣经皆更博士位皆历三公智谋威信可与建教化图安危龚胜为司直郡国皆慎选举三辅委输官不敢为奸可大委任也陛下前以小不忍退武等海内失望陛下尚能容亡功德者甚衆曾不能忍武等耶臣诚迫大义官以谏争为职不敢不竭愚惟陛下少留神明览五经之文原圣人之至意深思天地之戒帝以宣名儒优容之是时郡国地震民讹言行筹明年正月朔日蚀帝乃徵孔光免孙宠息夫躬罢侍中诸曹黄门郎数十人宣复上书言陛下父事天母事地子养黎民即位以来父亏明母震动子讹言相惊恐今日蚀於三始诚可畏惧陛下深内自责避正殿举直言求过失罢退外亲及旁仄素餐之人徵拜孔光为光禄大夫发觉孙宠息夫躬过失免官遣就国衆庶歛然莫不说喜天人同心人心说则天意解矣乃二月丙戌白虹蜺日连陰不雨此天有忧结民有怨望未塞者也侍中驸马都尉董贤本无葭莩之亲但以令色谀言自进赏赐亡度竭尽府藏并合三第尚以为小复坏暴室贤父子坐使天子使者将作治第行夜吏卒皆得赏赐上冢有会辄太官为供海内贡献当养一君今反尽之贤家岂天意与民意邪天不可久负厚之如此反所以害之也诚欲哀贤宜为谢过天地解讐海内免遣就国收乘舆器物还之县官如此可以父子终其性命不者海内之所仇未有得久安者也孙宠息夫躬不宜居国可皆免以示天下复徵何武师丹彭宣傅喜旷然使民易视以应天心建立大政以兴太平之端帝感大异纳宣言徵何武彭宣旬月皆复为三公拜宣为司隶丞相孔光四时行园陵官属以令行驰道中宣出逢之使吏鉤止丞相掾没入其车马事下御史中丞又下廷尉博士弟子济南王咸举幡太学下曰欲救鲍司隶者会此下诸生会者千余人朝日遮丞相孔光自言丞相车不得行又守阙上书帝遂抵宣罪减死一等髡钳平帝即位王莽秉政陰有篡国之心乃风州郡以罪法案诛诸豪杰及汉忠直臣不附己者宣及何武等皆死时名捕陇西辛兴兴与宣女壻许绀俱过宣一饭去宣不知情坐系狱自杀

论曰所谓明经者非徒剽窃六籍之言穿凿傅会以为美谈而已必将笃意力行兢兢求无罪

於圣人之名教是故与其谈有余而谅不足也母宁讷于言而敏于行也自夏侯胜谏昌邑微行所言终验汉廷始大重经术之士士亦好为穿穴经传以发明陰阳五行之说执古证今言足听闻如杜钦谷永杜邺诸章奏网罗疏通引伸触类尤可谓湛深经术晓畅时事者然推厥至隐率皆内挟党私外市忠直君子之所深恶也鲍宣进谏之言少文多实罔所忌讳虽过激切然宣之忠固不能自禁也夫薰莸不同器兰艾不同植季友归而庆父无所逃其罪孔父殪而华督乃得逞其奸宣与何武俱为王莽所惮至遭诛杀然大节凛凛至今犹有生气岂惟党於王氏如钦永者当愧死地下孔光为国元老知莽桀恶徒观望周章苟延残喘视宣之死特少缓须臾而身名长与草木同腐悲夫君子之学所以贵乎返躬而克己也

史传三编卷十二

卷十三

钦定四库全书

史传三编卷十三

大学士朱轼撰

名臣传五

汉

邓禹

邓禹字仲华南阳新野人也年十二能诵诗受业长安时光武亦游学京师禹年虽幼而见光武知非常人遂相亲附数年归家及汉兵起更始立豪杰多荐举禹禹不肯从及闻光武安集河北即杖策北渡追及于邳光武见之甚欢谓曰我得专封拜生远来宁欲仕乎禹曰不愿也光武曰即如是欲何为禹曰但愿明公威德加四海禹得效其尺寸垂勋名于竹帛耳因留宿闲语乃进说曰更始虽都关西今山东未安赤眉青犢之属动以万数三辅假号往往羣聚更始既未有所挫而不自听断诸将皆庸人崛起志在财币争用威力朝夕自快而已非有忠良明智深虑远图欲尊主安民者也四方分崩离析形势可见明公虽建藩辅之功犹恐无所成立于今之计莫如延揽英雄务悦民心立高祖之业救万民之命以公而虑天下不足定也光武大悦因令左右号禹曰邓将军常宿止于中与定计议及王郎起兵光武自蓟至信都使禹自将数千人别攻拔乐阳从至广阿光武舍城楼上披輿地图指示禹曰天下郡国如是今始得其一子前言以吾虑天下不足定何也禹曰海内殽乱人思明君犹赤子之慕慈母古之兴者在德厚薄不以小大光武悦时任使诸将多访于禹禹每有所举皆当其才荐寇恂守河内委以萧何之任卒成大功光武以为知人使与盖延等击铜马于清阳破之从光武追贼至满阳连大克获北州略定及赤眉大举入关更始使王匡等分兵拒之皆莫能敌光武筹赤眉必破长安欲乘衅并关中而方自事山东未知所寄以禹沈深有度故授以西讨之略乃拜为前将军持节中分麾下精兵二万人得自选偏裨以下于是韩歆冯愔宗歆等皆属焉与俱而西建武元年禹自箕关将入河东河东都尉守关不开禹攻十日破之获輜重千余乘进围安邑未下更始大将军樊参将数万人攻禹禹遣诸将击斩之于是王匡等合军十余万复共击禹禹军不利诸将皆劝禹遁去禹不听明日癸亥匡等以六甲穷日不出禹因得更理兵勒衆及旦匡悉军出攻禹禹令军中毋妄动既至营下因发鼓并进大破之匡等皆弃军亡走禹率轻骑追斩数将收得节六印绶五百兵器不可胜数遂定河东承制更置守长镇抚之是月光武即位于鄴使持节拜禹为大司徒封酈侯时年二十四遂渡汾陰河入夏阳更始中郎将公乘歙引衆十万拒禹于衙禹复破走之而赤眉遂入长安是时三辅连覆败赤眉所过残贼百姓不知所归闻禹乘胜独克而师行有纪皆望风迎降日以千数衆号百万禹辄停车住节以

劳来之父老童耨垂髮戴白滿其车下莫不感悦于是名震关西帝数赐书褒美诸将皆劝禹径攻长安禹念赤眉新胜又财富充实锋未可乘欲且休兵北道就粮养士以观其弊于是引军北至枸邑禹所到击破赤眉别将诸营保郡邑皆开门归附西河太守宗育遣子奉檄降禹遣诣京师帝以关中未定勅禹宜以时进讨禹犹执前意会禹部将冯愔宗歆争权相攻愔遂杀歆反击禹禹遣使以闻帝问使人愔所亲爱为谁对曰护军黄防帝度愔防不能久和因报禹曰缚冯愔者必黄防也月余防果执愔归罪二年春遣使者更封禹为梁侯时赤眉西走扶风禹乃南至长安大飧士卒率诸将斋戒择吉日修礼谒祠高庙收十一帝神主遣使奉诣洛阳因循行园陵为置吏士奉守焉然自冯愔反後禹威稍损又乏食归附者离散而赤眉复还入长安禹与战败走至高陵军士饥饿皆食枣菜帝乃徵禹还禹慙于受任而功不遂数以饥卒徼战辄不利三年春与车骑将军邓弘击赤眉遂为所诱败衆皆死散独与二十四骑还诣宜阳谢上大司徒梁侯印绶有诏归侯印绶十三年天下平定诸功臣皆增户邑定封禹为高密侯食四县帝以禹功高封弟寬为明亲侯禹以特进奉朝请禹内文明笃行淳备事母至孝天下既定常欲远名势有子十三人各使守一艺修整闺门教养子孙皆可以为後世法资用国邑不修产利帝益重之中元元年复行司徒事显宗即位以禹先帝元功拜为太傅甚见尊宠居岁余寝疾帝数自临问以子男二人为郎永平元年卒年五十七諡曰元侯帝分禹封为三国长子震及弟袭珍各侯一县其第六子训字平叔前後两为校尉善抚士卒得羌心卒之日皆奔走道路至空城郭或以刀自割不欲生家为立祠有疾辄祷焉

後汉书论曰夫变通之世君臣相择斯最作事谋始之几也邓公赢粮徒步触纷乱而赴光武可谓识所从会矣于是中分麾下之军以临山西之隙至使关河响动怀赴如归功虽不遂而道亦弘矣及其威损枸邑兵散宜阳褫龙章于终朝就侯服以卒岁荣悴交而下无二色进退用而上无猜情使君臣之美後世莫闕其间不亦君子之致为乎

论曰语有之尺有所短寸有所长禹以弱冠之年攀鳞附翼致位公侯考其斩将搴旗徇城略地之功岂足与耿吴辈度长而絜大哉惟知人善任遂合羣策羣力佐成中兴垂休竹帛以发纵指示之说求之亦世祖之萧何也夫帝王之兴以德厚薄公辅之望以度大小禹沈深有局其规模早见于仗策数言而卒成其信名震而朝不加疑师丧而主不致罪而诸抱奇怀异树勋着劳者咸帖然俛出其下终无有纖介谗隙之生岂非其度固胜哉夫停车劳来视陈汉威德而不受牛酒者非有加也在军旅不忘俎豆与奉祠庙行园陵者亦不甚悬殊也然而比事则惟均揆道则絶远凤凰之于凡鸟不以翔千仞故瑞骐驎之于羣马不以驾千里故良固未易与皮相者语耳位冠百司年历两朝子孙蕃衍宠贵与东京始终其贤能有闻者自训而外如大将军鹭之忠劳在国侍中康之方正立朝类皆卓卓可纪盖非独度量之胜其福祚亦厚焉所谓有一代之君必有一代之臣者君奭曰天壽平格微子之命曰与国咸休禹诚其人与

冯异

冯异字公孙颍川父城人也好读书通左氏春秋孙子兵法光武略地颍川攻父城屯兵巾车乡异时以郡掾监五县与父城长苗萌共城守间出为汉兵所执得召见对曰异有老母在城中愿归据五城以効功报德光武曰善异乃归谓苗萌曰今诸将多暴横独刘将军所到不掇

掠观其言语举止非庸人也可以归身萌从其约更始遣将十余辈攻父城共坚守不下及光武为司隶校尉道经父城异等乃开门奉牛酒迎因署异为主簿苗萌为从事异因荐邑子钭期叔寿段建左隆等光武皆以为掾史从至洛阳更始数欲遣光武徇河北诸将皆不可是时左丞相曹竟子诩为尚书用事异劝光武厚结之及度河北诩有力焉自伯升之败光武不敢显其悲戚每独居辄不御酒肉枕席有涕泣处异独叩头宽譬哀情光武止之曰卿勿妄言异复因间进说曰天下同苦王氏思汉久矣更始诸将暴虐百姓失望今公专命方面施行恩德夫有桀纣之乱乃见汤武之功人久饥渴易为充饱公宜分命官属循行郡县宣布惠泽光武纳之至邯郸遣异与钭期乘传所至録囚徒存鰥寡亡命自诣者除其罪陰条二千石长吏同心及不附者上之及王郎起光武自蓟东南驰晨夜草舍至饶阳无蒺亭时天寒衆饥异上豆粥明旦光武谓诸将曰昨得公孙豆粥饥寒俱解及至南宫遇大风雨光武引车入道傍空舍异抱薪邓禹爇火光武对竈燎衣异复进麦饭菟肩因得度虓沱河至信都拜异偏将军从破王郎封应侯异为人谦退不伐行遇诸将辄避道进止皆有表识军中号为整齐每诸将并坐论功异独屏树下军中号为大树将军及破邯郸乃更部分诸将各有配隶军士皆言愿属大树将军光武以此多之因从平河北时更始遣舞陰王李轶大司马朱鲋等将兵号三十万与河南太守武勃共守洛阳光武将北徇燕赵乃留寇恂为河内太守异为孟津将军使统二郡军河上合势以拒朱鲋等初李轶与光武首结谋约及更始立反共陷伯升虽知长安已危欲降然不自安异乃为书晓譬之轶即报异惟深達萧王愿进愚策以佐国安人自後不复与异争锋异因此得北攻天井关拔上党两城又南下河南成臯以东十三县及诸屯聚皆平之降者十余万武勃来攻诸畔者异引军与战大破斩之轶又闭门不救异见其信效具以奏闻光武故宣露轶书令朱鲋知之鲋怒使人刺杀轶由是城中乖离多有降者鲋乃遣其将苏茂攻温而自将兵攻平陰以缀异异遣校尉护军将军与寇恂合击茂破之异因渡河击鲋鲋走异追至洛阳环城一币而归移檄上状诸将皆入贺并劝光武即帝位光武乃召异诣鄙问四方动静异曰三王反畔更始败亡天下无主宗庙之忧在于大王宜从衆议上为社稷下为百姓遂与诸将上尊号建武二年封异阳夏侯引军击阳翟贼破之时赤眉延岑诸贼暴乱三辅大司徒邓禹不能定乃遣异代之车驾送至河南赐以乘輿七尺贝剑勅异曰三辅遭王莽更始之乱重以赤眉延岑之酷元元涂炭无所依诉今之征伐非必略地屠城要在平定安集之耳诸将非不健鬪然好掳掠卿本能御史士念自修敕毋为郡县所苦异顿首受命引而西所至皆布威信弘农羣盗尽率衆来降异与赤眉遇于华陰相拒六十余日战数十合降其将刘始等五千余人三年春遣使者拜异征西大将军会邓禹率车骑将军邓弘等引归与异相遇要异共攻赤眉异以贼衆尚多可以恩信倾诱难卒用兵破上今使诸将屯龟池要其东而异击其西一举取之此万成计也禹弘不从弘遂大战为所诱败异与禹合兵救之赤眉小却异以士卒饥倦可且休禹不听复战大为所败死伤三千余人禹得脱归宜阳异弃马步走上回谿阪与麾下数人归营复坚壁收其散卒招集诸营保与贼期战使壮士变服与贼同伏于道侧贼使万人攻异前部异裁出兵以救之贼见势弱遂悉衆攻异异乃纵兵大战日昃贼气衰伏兵卒起衣服相乱不复识别贼遂惊溃追击大破于崤底降男女八万余衆尚十余万东走宜阳玺书劳异曰赤眉破平士吏劳苦始虽垂翅回谿终能奋翼龟池可谓失之东隅收之桑榆时赤眉虽降衆寇犹盛延岑吕鲋等各拥兵据郡转相攻击异且战且行屯军上林苑中延岑自称武安王欲据关中引其党张邯任良攻异异连击破之诸附岑者皆降岑走攻析异复遣将击破之降其将苏臣等八千余人岑遂自武关走南阳先是百姓苦饥黄金一筋易豆五

升道路断隔委输不至军士悉以果实为粮有诏拜南阳赵匡为右扶风将兵助异并送缣谷异兵食渐盛乃稍诛击豪杰不从令者褒赏降附有功劳者悉遣其渠帅诣京师其衆散归本业威行关中惟吕鲔张邯等降蜀余党悉平明年公孙述遣将程焉将数万人就吕鲔出屯陈仓异与赵匡迎击屡破其营保降者甚多其後蜀复数遣将间出异辄摧挫之怀来百姓申理枉结出入三岁上林成都异自以久在外不自安上书思慕阙廷愿亲帷幄帝不许後人有章言异专制关中百姓号为咸阳王帝使以章示异异惶惧上书谢诏报曰将军於国家义为君臣恩犹父子何嫌何疑而有惧意六年春异朝京师引见帝谓公卿曰是我起兵时主簿也为吾披荆棘定关中既罢使中黄门赐以珍宝钱帛诏曰仓卒无菱亭豆粥虀沱河麦饭厚意久不报异稽首谢曰臣闻管仲谓桓公曰愿君无忘射钩臣无忘檻车齐国赖之臣今亦愿国家无忘河北之难小臣不敢忘巾车之恩後数引讜见定议图蜀夏遣诸将上陇为隗嚣所败乃诏异军栒邑未及至隗嚣使其将王元行巡将二万人下陇因分遣巡取栒邑异即驰兵欲先据之诸将皆谓贼新胜不可争锋宜止军便地异曰若贼得栒邑三辅动摇是吾忧也夫攻者不足守者有余今先据城以逸待劳非所以争也潜往闭城偃旗鼓行巡不知驰赴之异乘其不意卒击鼓建旗而出巡军惊走追击数十里大破之祭遵亦破王元于汧于是北地诸豪长悉畔隗嚣降异上书言状帝恐诸将或欲分其功乃下玺书独以功归异且褒其不伐又遣太中大夫赐征西吏士死伤者医药棺殮大司马已下皆令亲吊死问疾以崇谦让于是使异进军义渠并领北地太守事青山胡率万余人降异异又击卢芳将贾览匈奴薁鞬日逐王破之上郡安定皆降复领安定太守事及隗嚣死其将立嚣子纯总兵据冀公孙述遣将赵匡等救之帝复令异行天水太守事攻匡等且一年皆斩之时诸将共攻冀不能拔欲且还休兵异固持不动常为衆军锋明年夏与诸将攻落门病发卒于军諡曰节侯

论曰人臣之义有敬以立事毋贪以徼功盖忠敬者功名所从生也异谦让有儒将风世祖尝以比孟之反然其大者乃在每念不忘乎君国之务观其私独寛譬哀情及上言宜急拊循百姓所谓事君如其亲视王事直如家事者非徒麦饭豆粥之拳拳而已夫敬其君者乃能敬君之事他日帝独遣异代邓禹重以平定安集为托且曰卿本能驭吏士美哉岂非君臣相知之雅哉易称敬慎不败中兴诸将唯冯公有之同时若吴汉勇于受任又数立大功然临阵或违勅而失纪战胜至积忿以杀降至如贾复之不伐其能与异等而敢为深入辄被重创要皆果断有余深沈不足者方之公孙瞠乎後矣

寇恂

寇恂字子翼上谷昌平人也初为郡功曹太守耿况甚重之更始立使使者徇郡国曰先降者复爵位恂从耿况迎使者于界上印绶使者纳之一宿无还意恂勒兵入见使者就请之使者不与曰天王使者功曹欲胁之耶恂曰非敢胁使君窃伤计之不详也今天下初定国信未宣使君建节衔命以临四方郡国莫不延颈倾耳望风归命今始至上谷而先堕大信沮向化之心生离畔之隙将复何以号令他郡乎且耿府君在上谷久为吏人所亲今易之得贤则造次未安不贤则祗生乱为使君计莫若复之以安百姓使者不应恂叱左右以使者命召况况至恂进取印绶带况使者不得已乃承制诏之况受而归及王郎起遣将徇上谷急恂与门下掾闵业共说况曰邯鄲拔起难可信向闻故大司马刘公伯升母弟尊贤下士士多归之且上谷

完实控弦万骑可以详择去就请东约渔阳齐心合衆邯鄲不足图也况乃遣恂到渔阳结谋彭宠恂还至昌平袭击邯鄲使者杀之夺其军遂与况子弇等俱南及光武于广阿拜恂偏将军号承义侯从破羣贼数与邓禹谋议禹奇之奉牛酒交欢时光武南定河内而更始大司马朱鲔等盛兵据洛阳又并州未安难其守者以问禹禹曰昔高祖任萧何于关中无复西顾之忧所以得专精山东终成大业今河内带河为固户口殷实北通上党南迫洛阳寇恂文武备足有牧人御衆之才非此子莫可使也乃拜恂河内太守行大将军事且谓恂曰昔高祖留萧何镇关中吾今委公以河内坚守转运给足军粮率厉士马防遏它兵勿令北度而已光武于是复北征燕代恂移书属县讲兵肄射伐淇园之竹为矢百余万养马二千匹收租肆百万斛转以给军朱鲔闻光武北而河内孤使其将苏茂等将兵三万余人度巩河攻温檄书至恂即勒军驰出并移告属县发兵会于温下军吏皆谏恂曰温郡之藩蔽失温则郡不可守遂驰赴之旦日合战而偏将军冯异遣救及诸县兵适至士马四集恂乃令人乘城鼓噪大呼曰刘公兵到茂军闻之陈动恂因奔击大破之追至洛阳斩其副将茂兵投河死者数千生获无数自是洛阳城门昼闭时光武传闻河内已破有顷恂檄至大喜曰吾知寇子翼可任也诸将军贺因上尊号于是即位时军食急乏恂转输前後不絶尚书升斗以禀百官帝数策书劳问恂同门生董崇说恂当如萧何守关中故事急遣子弟诣军恂因称疾不视事值帝将攻洛阳先至河内恂求从军帝不听乃遣兄子寇张等将突骑愿为军锋帝善之皆拜偏将军建武二年恂坐系考上书者免数月复为颍川太守与破奸将军侯进斩击郡寇贾期等境内悉平定封雍奴侯邑万户执金吾贾复在汝南其部将杀人于颍川恂捕得系狱戮于市复以为耻还过颍川谓左右曰吾与寇恂并立将帅而今为其所陷今见恂必手剑之恂知其谋不欲与相见姊子谷崇曰崇将也得带剑侍侧卒有变足以相当恂曰不然昔蔺相如不畏秦王而屈于廉颇者为国也区区之赵尚有此义吾安可以忘之乎乃勅属县盛供具储酒醪执金吾军入界一人皆兼二人之饌乃自出迎于道称疾而还复勒兵欲追之而吏士皆醉遂过去帝闻乃徵恂恂至引见时复先在坐欲起相避帝曰天下未定两虎安得私鬪今日朕分之于是并坐极欢遂共车同出结友而去恂归颍川三年遣使者即拜汝南太守又使骠骑将军杜茂将兵助恂讨平盗贼郡遂以清恂素好学乃修乡校教生徒聘能为左氏春秋者亲受学焉七年代朱浮为执金吾明年从车驾击隗嚣而颍川盗贼羣起帝属恂平之恂对曰颍川剽轻以陛下远踰陇蜀故狂狡乘间相诖误耳如闻乘輿南向必惶怖归死臣愿执锐前驱即日车驾南征恂从至颍川盗贼悉降而竟不拜郡百姓遮道曰愿从陛下复借寇君一年乃留恂镇抚吏人受纳余降初隗嚣将安定高峻拥雄兵据高平第一帝使马援招降之後复亡归故营助嚣拒陇阨及嚣死峻畏诛坚守耿弇等围之一岁不拔帝将自征之恂力谏不从进军及汧峻犹不下乃议遣使降之谓恂曰卿前止吾此举今为吾行也恂奉玺书至第一峻遣军师皇甫文出谒词礼不屈恂怒将诛文诸将皆谏恂竟斩之遣其副归告峻曰军师无礼已戮之矣欲降急降不欲固守峻惶恐即日开城门降诸将皆贺因曰敢问杀其使而降其城何也恂曰皇甫文峻之腹心其所取计者也今来词意不屈必无降心全之则文得其计杀之则峻亡其胆是以降耳诸将皆曰非所及也遂传峻还洛阳恂经明行修名重朝廷所得秩奉厚施朋友故人及从吏士常曰吾因士大夫以致此其可独享之乎时人归其长者以为有宰相器十二年卒諡曰威侯子损嗣恂同产弟及兄子姊子以军功封列侯者凡八人初所与谋闵业者恂数为帝言其忠赐爵关内侯官至辽西太守

论曰邓仲华言子翼文武备足有牧人御衆之才岂虚誉哉守颍川使民遮道以请文足附衆矣追洛阳使敌闭门而遁武足威民矣若夫转饷给军萧相国镇关之勤也夺印还守蔺大夫怀璧之壮也且夫任天下事者在器识之远到而已知忿争之害义也是故忍以下贾不为匹夫之勇知优柔之长奸也是故敢以戮文不为妇人之仁识定故力生其有宰相器者正在此岂区区通财为侠足以尽之乎世祖号知人末年参国议者自高密外称固始东而雍奴侯以先卒不与惜哉

来歙

来歙字君叔南阳新野人也父仲哀帝时为谏大夫娶光武祖姑生歙光武甚亲敬之数共往来长安更始即位以歙为吏从入关数言事不用以病去歙女弟为汉中王刘嘉妻因迎歙入汉中更始败歙劝嘉归光武遂与俱诣洛阳帝见歙大欢即解衣以衣之拜为太中大夫是时帝以陇蜀为忧而诸将方务关东思西州方略未知所任歙因自请曰臣尝与隗嚣相遇长安其人始起以汉为名今圣德隆兴臣愿得奉威命开以丹青之信嚣必束手东归则述自亡之势不足图也帝然之建武三年歙始使隗嚣五年复持节送马援因奉玺书于嚣既还复往说嚣嚣遂遣子恂随歙入质拜歙为中郎将时山东略定帝谋西收嚣兵与俱伐蜀复使歙喻旨嚣听王元计犹豫不决歙素刚毅遂发愤质责嚣曰国家以君知臧否晓废兴故以手书畅意足下推忠诚既以伯春委质而反欲用佞惑之言为族灭计耶因欲前刺嚣嚣起入部勒兵将杀歙歙徐杖节就车而去嚣使牛邯将兵围守之嚣将王遵谏曰杀之无损于汉而随以族灭独不为伯春计哉歙为人有信义言行不违及往来游说皆可按覆西州士大夫咸信重之多为其言故得免归八年春歙将精兵二千余人伐山开道从番须回中径袭略阳斩嚣守将金梁因保其城嚣大惊曰何其神也乃悉兵数万人围略阳斩山筑堤激水灌城歙与将士固死坚守矢尽乃发屋断木以为兵器尽锐攻之累月不能下帝乃自将关东兵征上陇嚣衆溃走围解于是置酒高会劳赐歙班坐绝席在诸将之右赐歙妻缣千匹诏使留屯长安悉监护诸军歙因上书曰公孙述以陇西天水为藩蔽故得延命假息今二郡平荡则述智计穷矣宜益选兵马储积资粮昔赵之将帅多贾人高祖悬之以重赏今西州新破兵人疲饷若招以财谷其衆可集臣知国家所给非一用度不足然有不得已也帝然之于是大转粮运诏歙率征西大将军冯异建威大将军耿弇虎牙大将军盖延扬武将军马成武威将军刘尚入天水击破述将田弇赵匡明年攻拔落门嚣党周宗赵恢及天水属县皆降初王莽世诸羌多背叛而隗嚣招怀其酋豪遂得为用嚣亡後诸种数为寇掠皆营塹自守州郡不能讨至是歙大修攻具率诸将等击羌于金城大破之斩获无算时陇西虽平而人饥流者相望歙乃倾仓廩转运诸县以赈赡之於是陇右遂安而凉州流通焉十一年歙与盖延等进攻述将王元环安于河池大破之乘胜遂进蜀人大惧使刺客刺歙未殊驰召盖延延见歙因伏悲哀不能仰视歙叱延曰虎牙何敢然今使者中刺客无以报国故呼巨卿欲相属以军事而反效儿女子涕泣乎刃虽在身不能勒兵斩公邪延收泪强起受所诫歙自书表曰臣夜人定後为何人所贼伤中臣要害臣不敢自惜诚恨奉职不称以为朝廷羞夫理国以得贤为本太中大夫段襄骨鲠可任愿陛下裁察又臣兄弟不肖终恐被罪陛下哀怜数赐教督投笔抽刃而绝帝闻大惊省书揽涕策赠印绶諡曰节丧还洛阳乘輿缟素临吊送葬以歙有平羌陇功故改汝南之当乡县为征羌国焉歙曾孙历安帝朝官太仆时帝听江京樊丰谗言废太子为济阴王历与桓焉张皓

等强谏帝不从历乃要结朝臣十余人俱诣鸿都门证太子无过帝使中常侍奉诏胁羣臣曰历等若怀迷不反当显明刑书谏者莫不失色乃各自引起历独守阙连日不肯去帝大怒乃免历官黜其母长公主不得会见时人为之震栗顺帝既立朝廷咸称社稷臣官至大鸿胪卒

论曰来歙岑彭并奉命讨蜀功垂成而身死彭持军整齐所过秋毫无犯宣汉威德不受牛酒有古吊伐遗意至於饮刃从容陈言慷慨先国议後私恩歙尤壮烈哉中兴诸将自邓冯马寇外卓卓皆可纪若耿弇岑彭吴汉壮猷伟烈累立战功尚矣臧宫锯断城门限令车声回转出入及矫制取岑彭马匹多张旗帜呼声动山任光多作檄文侈陈兵势至堂阳使骑各持炬火弥满泽中光焰烛天要皆不恃勇而恃谋者也陈俊手接短兵所向必破马武为诸将军锋力战无前挑期先登陷阵被创中额犹摄愤复战坚饘每急辄先当矢石引军攻宛选敢死士夜自登城斩关而入之数子者并勇鸷絶人岂独吴子顔隐若一敌国哉他如王霸善拊士卒冯公孙之俦也耿纯去郡见思寇子翼之匹也朱佑所至受降不存首级功邓仲华之亚也李忠邳彤亲属陷贼不二其心其国而忘家者乎若乃忧国奉公小心廉约唯祭遵最着晚年与高密固始参议国政人称其有宰相才贾复有焉盖自世祖奋龙虎之姿拨乱反正一时羣策羣力际会风云或运筹帷幄或决胜疆场摧陷廓清之烈同符高祖诸臣而文雅过之继此者惟唐武德贞观间乎抑云台二十八人姓氏不见来歙或以不得其死軼之岑彭独何以得列乎当时必自有说然不可考矣

马援

马援字文渊赵将马服君奢後也武帝时自邯郸徙居扶风茂陵焉援年十二而孤即负大志其三兄况余员并奇其才尝受齐诗意不能守章句欲就边郡田牧况曰汝大才当晚成良工不示人以朴且从所好会况卒援行服期年不离墓所敬事寡嫂不冠不入庐後为郡督邮以纵囚故亡命北地因留畜牧宾客多归者遂役属数百家转游陇汉间尝谓客曰丈夫为志穷当益坚老当益壮其後有畜数千头谷数万斛叹曰凡殖财产贵能施赈也不则守钱虏耳乃尽散于亲旧王莽末避地凉州闻隗嚣好士往从之嚣甚敬重与决策是时公孙述称帝于蜀嚣使往观之援素与述同里閭相善以为既至当握手欢如平生而述盛陈陛卫以延援入交拜礼毕使出就馆更为援制都布单衣交让冠会百官于宗庙中立旧交之位述鸾旗旄骑警蹕就车轡折而入礼飨官属甚盛欲授援以封侯大将军位宾客皆乐留援晓之曰天下雄雌未定公孙不吐哺走迎国士与图成败反修饰边幅如偶人形此子何足久稽天下士乎因辞归谓嚣曰子阳井底蛙耳而妄自尊大不如专意东方建武四年嚣使援奉书洛阳援至引见于宣德殿世祖迎笑谓援曰卿遨游二帝间今见卿使人大慙援顿首辞谢因曰当今之世非独君择臣也臣亦择君矣臣与公孙述同县少相善臣前至蜀述陛戟而後进臣今远来陛下何知非刺客奸人而简易若是帝复笑曰卿非刺客顾说客耳援曰天下反覆盗名字者不可胜数今见陛下恢廓大度同符高祖乃知帝王自有真也帝甚壮之使太中大夫来歙持节送援西归陇右嚣与援同卧起问以东方流言及京师得失援说嚣曰前到朝廷上引见数十每接讌语自夕至旦才名勇略非人敌也且开心见诚无所隐伏濶达多大节略与高帝同经学博览政事文辩前世无比嚣曰卿谓何如高帝援曰不如也高帝无可无不可今上好吏事动如节度又不喜饮酒嚣意不怿曰如卿言反复胜耶然雅信援故遂遣长子恂入质援因

将家属随恂归洛阳居数月无它职任援以三辅地旷土沃而所将宾客猥多乃上书求屯田上林苑中帝许之会隗嚣用王元计意更狐疑援数以书记责譬于嚣嚣得书增怒後遂发兵拒汉援乃上疏曰臣与隗嚣本实交友初嚣遣臣东谓臣曰本欲为汉愿足下往观之于汝意可即专心矣及臣还反报以赤心实欲导之于善非敢谲以非义而嚣自挟奸心盗憎主人怨毒之情遂归于臣臣欲不言则无以上闻愿听诣行在所得极陈灭嚣之术死无所恨帝乃召援计事援具言谋画因使将突骑五千往来游说嚣将下及羌豪为陈祸福以离嚣支党又与嚣将杨广书使晓劝嚣词极恳诚冀幸嚣之一悟也广竟不答八年帝自西征嚣至漆诸将多犹豫未决会援至帝具以羣议质之援因说隗嚣将帅有土崩之势兵进有必破之状又于帝前聚米为山谷指画形势开示衆军所从道径往来分析曲折昭然可晓帝曰贼在吾目中矣明日遂进军至第一嚣衆大溃九年拜援太中大夫十一年夏拜陇西太守发步骑三千人击破先零于临洮斩获无算守塞诸羌悉诣降又以计袭击诸种屯聚寇钞者羌遂大溃凡斩首千余级援以兵少不得穷追收其谷粮畜产而还援中矢贯胫帝玺书劳问赐牛羊数千头援尽班诸宾客是时朝臣以金城破羌之西涂远多寇议欲弃之援上言其地城完土肥灌溉流通如令羌在湟中则为害不休不可弃也帝乃诏武威太守令悉还金城客民使各反旧邑援奏为置长吏缮城郭起坞堠开导水田劝以耕牧郡中乐业又招抚塞外氏羌皆来降附武都氏人背公孙述来降者援奏复其侯王君长赐印绶帝悉从之十三年武都参狼羌与塞外诸种为寇援将兵击之羌豪皆亡出塞诸种悉降于是陇右清静援务开恩信寛以待下任吏以职但总大体而已宾客故人日满其门诸曹时白外事援辄曰此丞掾之任何足相烦颇哀老子使得遨游若大姓侵小民黠羌欲旅距此乃太守事耳傍县常有报仇者吏民惊言羌反奔入城郭或请闭城发兵援时与宾客饮大笑曰烧羌何敢复犯我後稍定郡中服之视事六年徵入为虎贲中郎将初援在陇西上书言宜如旧铸五铢钱以三府奏为未可遂寝及还从公府求得前奏难十余条乃随牒解释更具表言帝从之天下赖其便援自还京师数被进见为人美须髮眉目如画闲于进对尤善述前世行事每言及三辅长者下至闾里少年皆可观听自皇太子诸王侍闻者莫不属耳忘倦又善兵策每有所谋帝未尝不用妖人李广聚徒攻刦遣援发诸郡兵击斩之又交址女子徵侧及女弟徵贰反攻没其郡九真日南诸蛮皆应之乃拜援伏波将军将楼?兵沿海而进随山刊道千余里军至浪泊上与贼战大破之斩徵侧徵贰封援为新息侯食邑三千户援乃击牛酺酒劳飨军士从容谓官属曰吾从弟少游常哀吾慷慨多大志曰士生一世但取衣食裁足乘下泽车御款段马为郡掾吏守坟墓乡里称善人斯可矣致求盈余但自苦耳当吾在浪泊西里间贼未灭时下潦上雾毒气熏蒸仰视飞鸢跼跼堕水中卧念少游平生时语何可得也今赖士大夫之力被蒙大恩猥先诸君纁佩金紫且喜且慙吏士皆伏称万岁援将楼?大小二千余艘战士二万余人击九真贼徵侧余党峽南悉平奏言西于县户有三万二千请分为封溪望海二县许之援所过辄为郡县治城穿渠条奏越律与汉律驳者为申明旧制以约束之自後骆越奉行马将军故事二十年秋振旅还京师赐兵车一乘朝见位次九卿援好骑善别名马于交址得骆越铜鼓乃铸马式还表上之有诏置宣德殿下初援军还将至故人多迎劳之平陵人孟冀名有计谋于坐贺援援谓之曰吾望子有善言反同衆人耶自念微劳飨大县功薄赏厚何道以能长久冀曰愚不及援曰方今匈奴乌桓尚扰北边欲自请击之男儿当死边野以马革裹屍还葬耳何能卧床上在儿女子手中邪冀曰谅为烈士当如此矣还月余会匈奴乌桓寇扶风援请行许之乃出屯襄国诏百官祖道援谓黄门郎梁松窦固曰凡人为贵当使可贱如卿等欲不可复贱居高坚自持勉思鄙言

松後果以贵满致灾固亦几不免明年秋援乃将三千骑出高柳行鴈门代郡上谷障塞乌桓候者见汉军至遂散去援无所得而还援尝有疾梁松来候之独拜床下援不答松去後诸子问曰伯孙帝婿公卿以下莫不憚之奈何独不为礼援曰我乃松父友也虽贵何得失其序乎松由是恨之二十四年武陵五溪蛮反援因复请行帝愍其老未许援自请曰臣尚能被甲上马帝令试之援据鞍顾眄以示可用帝笑曰矍铄哉是翁也遂遣援率中郎将马武耿舒等前往援夜与送者诀谓友人谒者杜愔曰吾受厚恩年迫日索常恐不得死国事今获所愿甘心瞑目但畏长者家儿或在左右或与从事殊难得调介介独恶是耳明年春军至临乡遇贼迎击破之初军次下隲有两道可入从壶头则路近而水嶮从充则路夷而运远耿舒欲从充道援以为弃日费粮不如进壶头搃其咽喉充贼自破以事上之帝从援策三月进营壶头贼乘高守隘水疾船不得上会暑甚士卒多疫死援亦中病遂困乃穿堦为室以避炎气贼每升险鼓噪援辄曳足观之左右哀其壮意莫不为之流涕耿舒与兄好时侯弇书言状且曰伏波类西域贾竖到一处辄止以是失利弇得书奏之帝乃使虎贲中郎将梁松乘驿责问援因代监军会援病卒松宿怀不平遂因事陷之帝怒追收援新息侯印绶又前在交址常饵薏苡实用能轻身胜瘴气军还载之一车後有上书譖之者以为所载皆明珠文犀帝益怒援妻孥惶惧不敢以丧还旧茔裁买城西数亩地藁葬而已宾客故人莫敢吊会严与援妻子草索相连诣阙请罪帝乃出松书以示之方知所坐上书诉冤章凡六上词甚哀切然後得葬前云阳令同郡朱勃诣阙上书曰臣闻王德圣政不忘人之功采其一美不求备于衆大将在外谗言在内微过辄记大功不计诚为国之所慎也窃思故伏波将军新息侯马援拔自西州钦慕圣义间关险难触冒万死孤立羣贵之间旁无一言之佐驰深渊入虎口岂顾计哉寧自知当要七郡之使徼封侯之福耶八年车驾西讨隗嚣国计狐疑衆营未集援建宜进之策卒破西州及吴汉下陇冀路断隔惟独狄道为国坚守寄命漏刻援奉诏西使镇慰边衆遂解倒悬之急存几亡之城兵动有功师进辄克诛锄先零入山谷猛怒力战飞矢贯胫出征交址土多瘴气斩灭徵侧克平一州间复南讨立陷临乡师已有业未竟而死吏士虽疫援不独存夫战或以久而立功或以速而致败深入未必为得不进未必为非人情岂乐久屯絶地不生归哉惟援得事朝廷二十二年北出塞漠南渡江海触冒害气僵死军事名灭爵絶国土不传家属杜门葬不归墓怨隙并兴宗亲怖栗死者不能自列生者莫为之讼臣窃伤之夫明主醲于用赏约于用刑高祖尝与陈平金四万筋以间楚军不问出入所为岂复疑以钱谷间哉夫操孔父之忠而不能自免于谗此邹阳之所悲也臣闻春秋之义罪以功除圣王之祀臣有五义若援所谓以死勤事者也愿下公卿平援功罪以厌海内之望书奏帝意稍解勃字叔阳年十二能诵诗书与援有旧及援遇谗惟勃能终焉肃宗即位追赐勃子谷二千斛初援兄子严敦并喜讥议援自交址还书诫之曰吾欲汝曹闻人过失如闻父母之名耳可得闻口不可得言也好论议人长短妄是非正法此吾所大恶也寧死不愿闻子孙有此行也龙伯高敦厚周慎口无择言谦约节俭廉公有威吾爱之重之愿汝曹效之杜季良豪侠好义忧人之忧乐人之乐清浊无所失父丧致客数郡毕至吾爱之重之不愿汝曹效也效伯高不得犹为谨勅之士所谓刻鹄不成尚类鶩者也效季良不得陷为天下轻薄子所谓画虎不成反类狗者也伯高者山都长龙述也季良者越骑司马杜保也会保仇人上书讼保浮薄惑衆伏波将军万里还书以诫兄子而梁松窦固与之交结将扇乱诸夏书奏帝召责松固以讼书及援诫书示之松固叩头流血而得不罪诏免保官而述由此擢拜零陵太守援兄子壻王磐子石莽从兄子也莽败磐拥富货为游侠有名江淮间後游京师与诸贵戚友善援谓姊子曹训曰王氏废姓也子石当屏居自

守而反游京师长者用气自行多所陵折其败必也岁余磐果坐事死而磐子肃复出入王侯邸第援谓司马吕种曰国家诸子并壮而旧防未立若多通宾客大狱起矣卿曹戒慎之及郭后薨有上书者以为肃等受诛之家交通诸王虑因事生乱帝乃下郡县收捕遂更相牵引死者千数吕种亦豫其祸临命叹曰马将军神人也永平初援女立为皇后显宗图画建武中名臣列将于云台以椒房故独不及援东平王苍观图请其故帝笑而不言至十七年援夫人卒乃更修封树起祠堂建初三年肃宗使五官中郎将持节追策諡援曰忠成侯四子廖防光客卿

论曰臣主之交难矣哉以光武伏波之相得恨晚而不保其卒况其余乎事君者惟既厥心其他成败利钝不敢逆覩若夫毁誉则听之天下功罪则听之朝廷必一一预为之防是使国家终无任事之人也史称其为人明而自为闇岂足以服援心乎独怪援血气就衰犹沾沾喜事夫功不必皆已出名不必皆已成明俊民而让後人正老臣所以忠君报国之大者非独戒盛满已也方建武之末天下一家蠢尔蛮荆未有肘腋腹心之患且同官健者皆能办此七十老翁何所求而乃急功名之图此固已生明主之疑矣何待梁伯孙潜行乃始得罪哉虽然援烈士也才识节操中兴诸臣鲜有伦比自少即喜边郡畜牧後遂往往树勋羌陇间卒之藁葬城西距马革之裹几何殆不幸而重为其弟少游所哀即援亦自哀之而终莫自禁所谓平生志在斯者非耶诵老骥伏枥之歌为三叹息

耿弇

耿弇字伯昭扶风茂陵人也其先武帝时以吏二千石自钜鹿徙焉父况字侠游以明经为郎後为朔调连帅弇少好学习父业常见郡尉试骑士建旗鼓隶驰射由是好将帅之事及王莽败更始立诸将略地者前後多擅威权辄改易守令况自以莽之所置惧不自安时弇年二十一乃辞况奉奏诣更始因齎贡献以求自固之宜行至宋子会王郎诈称成帝子子舆起兵邯鄲弇从吏孙仓卫包谋曰刘子舆成帝正统舍此不归远行安之弇按剑曰子舆弊贼卒为降虏耳我至长安与国家陈上谷渔阳兵马之用归发突骑以犄乌合之衆如摧枯折腐耳观公等不识去就族灭不久也仓包遂亡降王郎弇闻光武在卢奴乃驰北上谒光武留署门下吏弇因说护军朱佑求归发兵以定邯鄲光武笑曰小儿曹乃有大意哉因数召见加恩慰弇因从光武北至蓟闻邯鄲兵方到光武将欲南归召官属计之弇曰今兵从南来不可南行渔阳太守彭宠公之邑人上谷太守即弇父也发此两郡控弦万骑邯鄲不足虑也光武官属腹心皆不肯曰死尚南首奈何北行入囊中光武指弇曰是我北道主人也会蓟中乱光武遂南驰官属各分散弇走昌平就况因说况使寇恂东约彭宠各发突骑二千匹步兵千人弇与景丹寇恂及渔阳兵合而南所过击斩王郎大将九卿校尉以下四百余级得印绶百二十五节二斩首三万级定涿郡中山钜鹿清河河间凡二十二县遂及光武於广阿是时光武方攻王郎传言二郡兵为邯鄲来衆皆恐既而悉诣营上谒光武见弇等笑曰邯鄲将帅数言我发渔阳上谷兵吾聊应言我亦发之何意二郡良为吾来方与士大夫共此功名耳乃皆以为偏将军使还领其兵弇等遂从拔邯鄲更始见光武威声日盛君臣疑虑乃遣使立光武为萧王令罢兵与诸将有功者还长安时光武居邯鄲宫昼卧温明殿弇入造床下请间因说曰吏士死伤者多请归上谷益兵光武曰王郎已破河北略平复用兵何为弇曰王郎虽破天下兵革乃始

耳今使者从西方来欲罢兵不可听也铜马赤眉之属数十辈数十百万人所向无前圣公不能办也败必不久光武起坐曰卿失言我斩卿弇曰大王哀厚弇父子故敢披赤心光武曰我戏卿耳何以言之弇曰百姓患苦王莽复思刘氏闻汉兵起莫不欣喜如去虎口而归慈母今更始为天子而诸将擅命於山东贵戚纵横於都内虏掠自恣元元叩心更思莽朝是以知其必败也公功名已着以义征伐天下可传檄而定也天下至重公可自取毋令他姓得之光武大悦乃拜弇为大将军与吴汉北发幽州十郡兵弇到上谷收更始所置大守韦顺蔡充斩之於是悉发幽州兵引而南从光武击破铜马高湖赤眉青犢又追尤来大枪五幡於元氏弇常将精骑为军锋辄破走之光武乘胜战慎水上贼危急殊死战时军士疲敝遂大败奔还壁范阳数日乃振贼亦退去弇从追至容城小广阳安次连战破之光武还蓟复遣弇与吴汉景丹等十三将军追贼至潞东及平谷再战斩首万三千余级遂穷追於右北平无终土垠之间至浚靡而还贼遂散败光武即位拜弇为建威大将军与景丹陈俊攻厌新贼於敖仓皆破降之建武二年更封好畤侯食好畤美阳二县三年延岑自武关出攻南阳下数城穰人杜弘率其衆以从岑弇与岑等战於穰大破之斩首三千余级生获其将士五千余人得印绶三百杜弘降岑与数骑遁走东阳弇从幸舂陵因见自请北收上谷兵未发者定彭宠於渔阳取张丰於涿郡还收富平获索东攻张步以平齐地帝壮其意许之四年诏弇进攻渔阳弇以父据上谷本与彭宠同功又兄弟无在京师者自疑不敢独进上书求诣洛阳诏报曰将军出身举宗为国所向陷敌功效尤着何嫌何疑而欲求徵且与王常共屯涿郡勉思方略乃命弇与朱佑王常等击望都故安西山贼十余营皆破之五年遣弇与吴汉击富平获索贼於西原大破之降者四万余人因诏弇进讨张步弇悉收集降卒结部曲置将吏率骑都尉刘歆太山太守陈俊引兵而东从朝阳桥济河以渡张步闻之乃使其大将军费邑军历下又分兵屯祝阿别於太山锺城列营数十以待弇弇渡河先击祝阿自旦攻城日未中而拔之故开围一角令其衆得奔归锺城锺城人闻祝阿已溃大惧遂空壁亡去费邑分遣弟敢守巨里弇进兵先胁巨里使多伐树木扬言以填塞阨塹数日有降者言邑闻弇欲攻巨里谋来救之弇乃严令军中趣修攻具宣敕诸部後三日当悉力攻巨里城陰缓生口令得亡归归者以弇期告邑邑至日果自将精兵三万余人来救之弇喜谓诸将曰吾所以修攻具者欲诱致邑耳今来适其所求也即分三千人守巨里自引精兵上冈阪乘高合战大破之临陈斩邑既而收首级以示巨里城中城中汹惧费敢悉衆亡归张步弇复收其积聚纵兵击诸未下者平四十余营遂定济南时张步都剧使其弟蓝将精兵二万守西安诸郡太守合万余人守临淄相去四十里弇进军画居二城之间弇视西安城小而坚且蓝兵又精临淄名虽大而实易攻乃敕诸校後五日会攻西安蓝闻之晨夜警守至期夜半弇敕诸将皆蓐食会明至临淄城护军荀梁等争之以为攻临淄西安必救之攻西安临淄不能救不如攻西安弇曰不然西安闻吾欲攻之日夜为备方自忧何暇救人临淄出不意而至必惊扰吾攻之一日必拔临淄即西安孤张蓝与剧隔绝必复亡去所谓击一而得二者也若先攻西安不能卒下顿兵坚城死伤必多纵能拔之蓝引军还奔临淄并兵合势观人虚实吾深入敌地後无转输旬月之间不战而困矣遂攻临淄半日拔之入据其城张蓝闻之大惧遂将其衆亡归剧弇乃令军中无得妄掠剧下须张步至乃取之以激怒步步闻大笑曰以尤来大枪十余万衆吾皆即其营而破之今大耿兵少於彼又皆疲劳不足摧也乃与三弟蓝弘壽及故大枪渠帅重异等兵号二十万至临淄大城东将攻弇弇上书曰臣据临淄深塹高垒张步从剧县东攻疲劳饥渴欲进诱而攻之欲去随而击之臣依营而战精锐百倍以逸待劳以实击虚旬日之间步首可获於是弇先出淄水上与重

异遇突骑欲纵弇恐挫其锋令步不敢进故示弱以盛其气乃引归小城陈兵於内使都尉刘歆泰山太守陈俊分陈於城下步气盛直攻弇营与刘歆等合战弇升王宫坏台望之视歆等锋交乃自引精兵以横突步陈於东城下大破之飞矢中弇股以佩刀截之左右无知者至暮罢弇明旦复勒兵出是时帝在鲁闻弇为步所攻自往救之未至陈俊谓弇曰剧兵甚盛可且闭营休士以须上来弇曰乘舆且到臣子当击牛酺酒以待百官反欲以贼遗君父耶乃出兵大战自旦及昏复大破之杀伤无算城中沟堑皆满弇知步困将退豫置左右翼为伏以待之人定时步果引去伏兵起纵击追至钜昧水上八九十里僵尸相属收得辎重二千余两步还剧兄弟各分兵散去後数日车驾至临淄自劳军羣臣大会帝谓弇曰昔韩信破历下以开基今将军攻祝阿以发迹此皆齐之西界功足相方而韩信袭击已降将军独拔勅敌功又难於信也又田横烹酈生及田横降高祖诏卫尉不听为仇张步前亦杀伏隆若步来归命吾当诏大司徒释其怨又事相类也将军前在南阳建此大策常以为落落难合有志者事竟成也弇因复追步步奔平寿乃肉袒负斧鑕於军门弇传步诣行在所而勒兵入据其城树十二郡旗鼓令步兵各以郡人诣旗下衆尚十余万辎重七千余两皆罢遣归乡里弇复引兵至城阳降五校余党齐地悉平振旅还京师六年西拒隗嚣屯兵於漆八年从上陇明年与中郎将来歙分部徇安定北地诸营保皆下之弇为将凡平郡四十六下城三百未尝挫折焉十二年弇父况病乘舆亲临幸弇兄弟六人皆垂青紫省侍医药当代以为荣十三年增弇户邑上大将军印绶以列侯奉朝请每有四方异议辄召入问筹策年五十六永平元年卒諡曰愍侯子忠嗣传数世为梁冀所废论曰方光武昼卧邯郸宫计画未定欲束手归更始於斯时也岌乎汉家之社稷殆哉弇独决计叩头牀闼之间首创大谋成汉家之中兴帷幄之烈於斯为盛弇既与诸将出入无役不从又独规取全齐方面之勲烂焉迹其所以亦由沈机善断谋成樽俎之间是以费少而功多日近而效远也斯岂摧锋一将之任耶传国久远名将辈出宜矣

卷十四

<史部,传记类,总录之属,史传三编

钦定四库全书

史传三编卷十四

大学士朱轼撰

名臣传六

汉

刘苍

东平宪王苍显宗同母弟也建武十五年封东平公十七年进爵为王少好经书雅有智思为人美须髯要带十围显宗甚爱重之及即位拜为骠骑将军置长史掾史员四十位三公上是时中兴三十余年四方无虞苍以天下化平宜修礼乐乃与公卿共议定南北郊冠冕车服制度及光武庙登歌八佾舞数帝每巡狩苍常留镇侍卫皇太后四年春车驾近出观览城第寻闻当遂校猎河内苍即上书谏曰臣闻时令盛春农事不聚众兴功臣知车驾今出事从约省所过吏人讽诵甘棠之德然动不以礼非所以示四方也惟陛下因行田家循视稼穡逍遥仿佯弭节而旋至秋冬乃振威灵整法驾备周卫设羽旄臣不胜大愿帝览奏即还宫苍在朝数载多所隆益而自以至亲辅政声望日重意不自安上疏归职曰臣苍疲弩陛下慈恩覆护在家被教导之仁升朝蒙爵命之首举负薪之才升君子之器凡匹夫一介尚不忘簞食之惠况臣身居宰相之位同气之亲哉宜当暴骸膏野为百僚先而愚顽之质诚羞负乘之位将被赤绂之刺昔象封有鼻不任以政诚由爱深不忍扬其过恶前事之不忘後事之师也自汉兴以来宗室子弟无得在公卿位者惟陛下审览虞帝遵承旧典乞上骠骑将军印绶退就藩国愿蒙哀怜帝优诏不听後数陈乞辞甚恳切五年乃许还国而不听上将军印绶六年冬帝幸鲁徵苍还京师明年皇太后崩既葬苍乃归国十一年苍与诸王朝京师月余还国帝临送归宫凄然怀思乃遣使手诏国中傅曰辞别之後独坐不乐因就东归伏轼而吟瞻望永怀实劳我心诵及采菽以增叹息日者问东平王处家何等最乐王言为善最乐其言甚大副是要腹矣今送列侯印十九枚诸王子年五岁以上能趋拜者皆令带之十五年春行幸东平赐苍钱布有加帝以所作光武本纪示苍苍因上光武受命中兴颂帝甚善之以其文典雅特令校书郎贾逵为之训诂肃宗即位尊礼踰于前世诸王莫与为比建初元年地震苍上便宜其事留中帝报书曰丙寅所上便宜三事朕亲自览读反覆数周旷然发矇间吏人奏事亦有此言但明智浅短或谓倘是复虑为非何者大异之降缘政而见今改元之後年饥人流此朕之不德所致得王深策快然意解诗不云乎既见君子我心则降思惟嘉谋以次奉行冀蒙福应特赐王

钱五百万後帝欲为原陵显节陵起县邑苍闻之遽上疏谏曰臣伏见光武皇帝躬履俭约之行营建陵地具称古典诏曰无为山陵陂池裁令流水而已孝明皇帝大孝无违自所营创尤为俭省臣愚以园邑之兴始自强秦古者邱陇且不欲其着明岂况筑郭邑建都郭哉上违先帝圣心下造无益之功虚费国用动摇百姓非所以致和气祈丰年也又以吉凶俗数言之亦不欲无故缮修邱墓有所兴起考之古法则不合稽之时宜则违人求之吉凶复未见其福陛下履有虞之至性追祖祢之深思然惧左右过议以累圣心臣苍诚伤二帝纯德之美不畅于无穷也惟蒙哀览帝从而止自是朝廷每有疑政辄驿使谘问苍悉心以对皆见纳用六年冬苍上疏求朝明年正月帝许之特赐装钱千五百万帝以苍冒涉寒露遣谒者赐貂裘及大官食物珍果使大鸿胪窦固持节郊迎帝乃亲自循行邸第豫设帷床其钱帛器物无不充备下诏曰礼云伯父归宁乃国诗云叔父建尔元子敬之至也若萧相国加以不名优忠贤也况兼亲尊者乎其沛济南东平中山四王赞皆勿名苍既至升殿乃拜天子亲答之每讌见辄兴席改容中宫亲拜苍以受恩过礼情不自宁上疏恳辞帝省奏叹息愈褒贵焉三月大鸿胪奏遣归国帝特留苍至八月饮酎毕有司复奏遣苍乃许之车驾祖送流涕而诀复赐乘舆服御珍宝舆马钱布以亿万计苍还国疾病帝驰遣名医小黄门侍疾使者冠盖不绝于道又置驿马千里传问起居明年正月薨诏告中傅封上苍自建武以来章奏及所作书记赋颂七言别字歌诗并集览焉令四姓小诸侯国王主悉会诣东平奔丧赙赠有加礼谥曰宪王子孙世王与汉终始初苍归国骠骑时吏丁牧周栩以苍敬贤下士不忍去之遂为王家大夫数十年事祖及孙及帝东巡幸苍陵引见二人既愍其淹滞且欲扬苍德美即皆擢拜议郎

论曰苍知为善最乐以立身处家尚矣所谓善者笃伦理敦礼让靖共正直克闲邪私之谓也观苍引经议礼因事纳诲以无负于君亲而共有休戚卓卓大节表着如此其居家之为善更可知矣两汉贤宗室首推河间献王德东平宪王苍河间为名儒东平为名臣後先辉映伟哉

第五伦

第五伦字伯鱼京兆长陵人也少有义行王莽末盗贼起族党争往附之伦乃依险筑营有贼辄奋厉其衆引强持满以拒之前後数十辈皆不能下初以营长诣郡尹鲜于褒褒大异之署为吏後褒坐事去握伦臂诀曰恨相知晚伦後为乡啬夫平徭赋理怨结得人欢心自谓久宦不达遂将家属客河东变名姓亲故莫知其处数年鲜于褒荐之于京兆尹阎兴召为主簿时长安铸钱多奸巧乃署伦督铸钱掾领长安市市无阿枉百姓悦服每读诏书叹曰此圣主也一见决矣等辈笑之曰尔说郡将尚不下安能动万乘乎伦曰未遇知己道不同故耳建武二十七年举孝廉补淮阳国医工长从王朝京师随官属得会见帝问以政事伦因酬对帝大悦明日复特召入与语至夕帝戏谓伦曰闻卿为吏筹妇公不过从兄饭宁有之耶伦对曰臣三娶妻皆无父少遭饥乱实不敢妄过人食帝大笑以为扶夷长未到官追拜会稽太守虽为二千石躬自斩刍养马妻执炊受俸裁留一月粮余皆贱资与民之贫羸者会稽俗喜淫祀率用牛祭神财产以诘且云不尔则病且死先为牛鸣前後郡将莫敢禁伦到官移书属县晓告百姓其巫祝有依托鬼神诈怖愚民皆案论之有妄屠牛者吏辄行罚民初或祝诅妄言伦案之愈急後遂断絶百姓以安永平五年坐法徵老少攀车叩马嗟呼相随日裁行数里不得前伦乃伪止亭舍陰乘船去衆知复追之及诣狱吏民上书守阙者千余人会显宗幸廷尉録囚得

免归田身自耕种不交通人物数岁拜为宕渠令显拔乡佐元贺贺後为郡守以清洁称所在化行终于大司农伦在职四年迁蜀郡太守蜀地饶人富掾吏皆鲜车怒马以财货自达伦悉简其丰赡者遣还之更选孤贫志行之人以处曹任於是争赇抑絶文职修理所举吏多至九乡二千石时以为知人视事七岁肃宗初立擢自远郡代牟融为司空帝以明德太后故尊崇舅氏马廖兄弟等倾身交结士争赴之伦以后族过盛欲令朝廷抑损其权上疏极陈廖等交通宾客奢侈无度且言陛下情欲厚之亦宜思所以安之及马防出征西羌伦又疏言国戚不当任以职事?以法则伤恩私以亲则违宪闻马防西征请杜笃为从事中郎笃为乡里所废在所县令若其不法收系论之今来防所重见委用将恐议及朝廷有损事望疏入并不省伦虽峭直然常疾俗吏苛刻及为三公值帝长者屡有善政乃上疏褒称盛美因以劝成风德其畧曰陛下即位以来诏书每下寛和而政急不解务存节俭而奢侈不止者咎在俗敝羣下不称故也郡国所举类多辨职俗吏未有寛博之选以应上求者也陈留令刘豫冠军令驷協并以刻薄之姿务为严苦吏民愁怨而今之议者反以为能违天心失经义非徒应坐豫協亦宜譴举者务进仁贤以任时政不过数人则风俗自化矣又闻诸王主贵戚骄奢踰制京师尚然何以示远故曰其身不正虽令不从以身教者从以言教者讼夫陰阳和岁乃丰君臣同心化乃成也其刺史太守以下拜除京师及道出洛阳者宜皆召见可因博问四方兼以观其人诸上书言事有不合者但报归田里不宜过加喜怒以明在寛其後诸马得罪归国而窦氏始贵伦复上疏曰伏见虎贲中郎将窦宪椒房之亲典司禁兵出入省闈年盛志美卑谦乐善此诚其好士交结之方然诸出入贵戚者类多瑕衅禁锢之人尤少守约安贫之节士大夫无志之徒更相贩卖云集其门盖骄佚所从生也諛险趋势之徒诚不可亲近愿陛下中宫严勅宪等闭门自守无妄交通士大夫防其未萌令得永保福祿伦奉公尽节言事无所依违诸子或时諫止辄叱遣之吏人奏记及便宜者亦并封上其无私若此或问伦曰公有私乎对曰昔人有与我千里马者吾虽不受每三公有所选举心不能忘而亦终不用也吾兄子常病一夜十往退而安寝吾子有疾虽不省视而竟夕不眠若是者岂可谓无私乎以老病乞罢後数年卒时年八十余少子頡嗣历桂阳庐江南阳太守所在见称顺帝之为太子废也頡为太中大夫与太仆来历等共守阙固争帝即位擢为将作大匠卒官曾孙种亦贤不附宦官官至兖州刺史论曰人品之清浊致有不同在判其诚伪而已伦与妻躬执厮养之役虽少亏大体然行过乎俭而心发于诚非公孙弘诈以立名唐尊矫以厉俗者比也东京当明章二帝如日方中位至三公优游化里遇事匡正马窦宠贵不憚危言百官顺序万民乐业奏议諄諄尤惩苛切而归寛厚可谓盛世之名臣矣

袁安

袁安字邵公汝南汝阳人也祖父良习孟氏易安少传良学为人严重有威见敬于州里初为县功曹奉?诣从事从事因安致书于令安曰公事自有邮驿私请则非功曹所持从事懼然而止洛阳大雪积地丈余令自出案行见人家皆除雪出有乞食者至安门无有行路谓安已死使人除雪入户见安僵卧问何以不出安曰大雪不宜干人令贤之遂举为孝廉除陰平长任城令所在吏人畏而爱之永平中楚王英谋逆事下郡覆考三府举安能理剧拜楚郡太守是时英辞所连及系者数千显宗怒甚吏案之急迫人多痛自诬死安到郡先往案狱理其无明验者条上出之丞掾皆叩头争以为阿附反逆法与同罪安曰如有不合太守自当坐之不以

相及也遂分别具奏帝感悟即报许得出者四百余家岁余徵为河南尹政号严明然未曾以臧罪鞠人尝称曰凡学仕者高则望宰相下则希牧守锢人于圣世尹所不忍为也闻之者皆感激自厉在职十年京邸肃然名重朝廷迁太仆元和二年武威太守孟云上书北单于既已和亲而南部复往钞掠宜还其生口以安慰之诏百官议朝堂公卿皆言不可开许安独曰北部遣使奉献和亲有得边生口者辄以归汉此明其畏威而非先违约也云以大臣典边不宜负信于戎狄还之足示中国优贷而使边人得安诚便帝竟从安议明年代第五伦为司空章和元年进司徒和帝即位窦太后临朝后兄车骑将军宪北击匈奴安与太尉宋由司空任隗及九卿诣朝堂上书谏以为匈奴不犯边塞而无故劳师远涉损费国用徼功万里非社稷之计书连上辄寝宋由惧遂不敢复署议而诸卿稍自引止唯安独与任隗守正不移至免冠朝堂固争者十上太后不听衆皆为之危惧安正色自若窦宪既出而弟卫尉笃执金吾景各专威权公于京师使客遮道夺人财物景又擅使乘驿施檄缘边诸郡发突骑及善骑射有力者渔阳鴈门上谷三郡各遣吏将送诣景第有司畏惮莫敢言者安廼劾景擅发边兵惊惑吏人二千石不待符信而辄承景?当伏显诛又奏司隶校尉河南尹阿附贵戚无尽节之义请免官案罪并寝不报宪景等日益横尽树其亲党宾客于名都大郡皆赋歛吏人更相赂遣其余州郡亦复望风从之安与任隗举奏诸二千石又他所连及贬爵免官四十余人窦氏大恨但安隗素行高亦未有以害之时宪日矜已功欲结恩北匈奴乃上立降者左鹿蠡王阿修为北单于置中郎将领护如南单于故事事下公卿议太尉宋由太常丁鸿光禄勋耿秉等十人议可许安与任隗奏以为光武招怀南部非谓可永安内地正以权时之算可得扞御北部故也今朔漠既定宜令南单于反其北庭并领降衆无缘复更立阿修以增国费宗正刘方大司农尹睦同安议事奏未以时定安惧宪计遂行乃独上封事曰伏惟光武皇帝所以立南单于者欲安南定北之策也恩德甚备故匈奴遂分边境无患伏念南单于屯先父举衆归德自蒙恩以来四十余年三帝积累以遗陛下陛下深宜遵述先志成就其业况屯首倡大谋空尽北部辍而弗图更立新降以一朝之计违三世之规失信于所养建立于无功则百蛮不敢复保誓矣且汉故事供给南单于费直岁一亿九十余万西域岁七千四百八十万今北庭弥远其费过倍是乃空尽天下也诏下其议安又与宪更相难折宪险急负势言辞骄讪至诋毁安称光武诛韩歆戴涉故事安终不移宪竟立匈奴降者右鹿蠡王为单于後卒反叛如安策及宪杀諫臣乐恢举朝震懼安以天子幼弱外戚擅权每朝会进见及与公卿言国家事未尝不噫呜流涕自天子及大臣皆恃赖之安所辟司徒府士有庐江周荣者素负忠节凡安所举奏窦景及争立北单于事皆荣所具草窦氏客脇荣曰窦氏悍士刺客满城中谨备之矣荣曰荣江淮孤生得备宰士纵为所害诚所甘心因敕妻子若卒遇飞祸无得殯殮冀以区区腐身觉悟朝廷安之忠义能知人得士心如此永元四年春卒朝廷痛惜焉後数月窦氏败帝始亲万几追思前议者邪正之节乃除安子赏为郎子敞孙汤汤子逢隗并为三公汤父京生彭及汤彭生贺贺生闾京习孟氏易作难记三十万言历官蜀郡太守彭历广汉南阳太守行至清为吏麤袍粝食时以比第五伦终议郎贺彭城相闾少厉操行苦身修节往彭城省谒变姓名徒行无旅既至府门连日吏不为通会阿母出见闾惊入白夫人乃密呼见已而辞去反郡界无知者及贺卒郡闾兄弟迎丧不受赙赠纓紼扶柩冒犯寒露体貌枯毁手足血流见者莫不伤之服阕累却徵聘居处侧陋以畊学为业逢隗虽数馈之一无所受党事将作欲投迹深林以母老不忍远遁乃筑土室四周不为户自牖纳饮食母思门时往就视去便自掩闭兄弟妻子莫得见也黄巾之乱贼相约不入其间乡人就闾避难皆得全活年五十七卒于土室二弟忠弘节操

皆亚于閔忠子秘为郡门下议生从太守赵谦击黄巾军败秘与功曹封观等七人以身扞刃皆死于陈谦以得免诏秘等门闾号曰七贤逢子术汤孙绍初安父没出求葬地道逢三书生指一处云葬此当世为上公须臾不见安异之遂葬其处故累世隆盛焉

後汉书论曰陈平多陰謀而知其後必废邴吉有陰德夏侯胜识其当封及子孙终陈掌不侯而邴昌绍国虽有不类未可致诘其大致归然矣袁公窦氏之间乃情帝室引义雅正可谓王臣之烈及其理楚狱未尝鞫人于臧罪其仁心足以覃乎後昆子孙之盛不亦宜乎论曰袁安经学未知视杨震何如其清介正复相埒及建议庙堂据典要悉情形经方致远之畧正多表见东京以来袁杨并号名族然袁氏车马衣服致为奢僭不如杨氏能守其清白华峤所称殆非虚也考安子唯京敞知名敞为三公廉劲不阿权贵颇有父风自汤以下碌碌鲜所树立迄乎绍术家声坠焉若袁閔之埋身土室与乃祖雪中僵卧时何异灵帝谓杨奇诚杨震子孙窃于袁閔亦然

何敞

何敞字文高扶风平陵人也性公正自趣舍不合时务每请召常称疾不应元和中辟太尉宋由府由待殊礼敞论议高常引大体多所匡正司徒袁安深敬重之是时京师及四方累有奇异鸟兽草木言事者为祥瑞敞通经传意甚恶之乃言于二公曰夫瑞应依德而至灾异缘政而生故鸛鹄来巢昭公有乾侯之戾西狩获麟孔子有两楹之殡海鸟避风臧文祀之君子讥焉今异鸟翔于殿屋怪草生于庭际不可不察由安惧然不敢答居无何而肃宗崩时窦氏专政外戚奢侈赏赐过制仓帑为虚敞奏记由曰敞闻事君之义进思尽忠退思补过明公视事出入再期宜当克己齎四海之心礼一谷不升则便服彻膳天下不足若已使然比年水旱人不收获凉州缘边家被凶害男子疲于战陈妻女劳于转运老幼孤寡叹息相依又中州内郡公私屈竭此实损膳节用之时国恩覆载赏賚过度寻公家之用皆百姓之力明君赐賚宜有品制忠臣受赏亦应有度明公宜先正己率羣下还所得赐因陈得失奏王侯就国除苑囿之禁节省浮费賑恤穷孤则恩泽下畅黎庶悦豫由不能用时齐炀王子都乡侯畅奔吊国忧上书未报侍中窦宪遂令人刺杀畅于城门屯卫之中而主名不立敞又说由曰刘畅宗室肺腑茅土藩臣来吊大忧上书须报亲在武卫致此残酷奉宪之吏莫适讨捕踪迹不显主名不立敞备数股肱职典贼曹故欲亲至发所纠其变而二府为故事三公不与盗贼昔陈平生于战征之世犹知宰相之分云外镇四夷内抚诸侯使卿大夫各得其宜今二府执事不深惟大义惑于所闻公纵奸慝莫为咎惟明公运独见之明昭然勿疑敞不胜所见请独奏案由乃许之二府闻敞行皆遣主者随之于是推举具得事实京师称其正高第拜侍御史时遂宪为车骑将军大发军击匈奴而诏使者为宪弟笃景竝起邸第兴造劳役百姓愁苦敞上疏諫曰臣闻匈奴之为桀逆久矣平城之围嫚书之耻此二辱者臣子所为捐躯而必死高祖吕后忍怒还忿舍而不诛伏惟皇太后秉文母之操陛下履晏晏之姿匈奴无逆节之罪汉朝无可慙之耻而盛春东作兴动大役元元怨恨咸怀不悦而猥复为卫尉笃奉车都尉景繕修馆第弥街絕里臣虽斗筭之人诚窃怀怪为笃景亲近贵臣当为百僚表仪今衆军在道朝廷焦唇百姓愁苦县官无用而遽起大第崇饰玩好非所垂令德示无穷也宜且罢工匠专忧北边恤人之困书奏不省後拜为尚书复上封事曰昔郑武姜之幸叔段卫庄公之宠州吁爱而不教

终至凶戾由是观之爱子若此犹饥而食之以毒适所以害之也伏见大将军窦宪始遭大忧公卿比奏欲令典干国事宪深报谦退固辞盛位恳恳勤勤言之深至天下闻之莫不悦喜今踰年无几大礼未终卒然中改兄弟专朝宪秉三军之重笃景总宫卫之权而虐用百姓奢侈僭倖诛戮无罪肆心自快今者议论汹汹咸谓叔段州吁复生于汉臣观公卿怀持两端不肯极言者?为宪等若有匪懈之志则已受吉甫褒申伯之功如宪等陷于辜辜则自取陈平周勃顺吕后之权终不?宪等吉凶为忧也臣敞区区诚欲计策两安絶其绵绵塞其涓涓上不欲令皇太后损文母之号陛下有誓泉之讥下使宪等得长保其福佑诚宗庙至计窦氏之福宪尝使门生齎书诣尚书仆射郅寿有所请托寿送诏狱上书陈宪骄恣引王莽以诫国家宪诬以诽谤下吏当诛敞上疏曰寿机密近臣匡救为职若怀默不言其罪当诛今寿违衆正义以安宗庙岂其私也忠臣尽节以死为归臣诚不欲圣朝行诽谤之诛以杜塞忠直垂讥无穷寿得减死徙合浦未行自杀时敞数切谏言诸窦罪过宪等深怨之济南王康尊贵骄甚宪乃白出敞为济南太傅敞至国辅康?道义数引法度谏正之康敬礼焉岁余迁汝南太守敞疾文俗吏?苛刻求当时名誉故在职?寛和为政立春日常召督邮还府分遣儒术大吏按行属县显孝悌有义行者及举冤狱?春秋义断之是?郡中无怨声百姓化其恩礼其出居者皆归养其父母迢行丧服推财相让者二百许人置立礼官不任文吏又修理鰲阳旧渠百姓赖其利垦田增三万余顷吏人共刻石颂敞功德及窦氏败有司奏敞子与夏阳侯坏厚善坐免官永元十二年三迁五官中郎将常忿疾中常侍蔡伦伦深憾之为所陷抵罪卒于家

论曰东汉多节义抗直之士盖光武明章之所培养者深也以窦宪之威太尉郑弘陈其权盛奏其党与则以收印绶而卒矣郅寿乐恢劾其罪状则皆迫胁使自杀矣始终不挠而幸免于祸矣独敞为然敞忠爱之忱根于至性累抗权威而不失其度治郡有善政以礼化民其可谓古之遗直民之父母矣

杨震 秉 赐

杨震字伯起弘农华陰人安平侯丞相敞之後父宝习欧阳尚书隐居教授王莽居摄与两龚蒋诩俱徵遂遁逃不知所处震少好学受欧阳尚书于太常桓郁明经博览无不穷究诸儒语曰关西孔子杨伯起常客居于湖不答州郡礼命数十年衆人谓之晚暮而震志愈笃後有冠雀衔三鱣鱼飞集讲堂前都讲取鱼进曰蛇鱣者卿大夫服之象也数三者法三台也先生自此升矣年五十始仕州郡大将军邓隲贤而辟之举茂才四迁荆州刺史东莱太守当之郡道经昌邑故所举荆州茂才王密为昌邑令谒见至夜怀金十筋以遗震震曰故人知君君不知故人何也密曰暮夜无知者震曰天知神知我知子知何谓无知密愧而出後转涿州太守性公廉不受私谒子孙常蔬食步行故旧长者或欲令为开产业震不肯曰使後世称为清白吏子孙以此遗之不亦厚乎元初四年徵入为太仆迁太常先是博士选举多不以实震举荐明经名士陈留杨伦等显传学业诸儒称之永宁元年拜司徒明年邓太后崩内宠始横安帝乳母王圣缘恩放恣圣子女伯荣出入宫掖传通奸赂震疏曰臣闻政以得贤为本治以去秽为务方今九德未事嬖幸充庭王圣出自贱微得奉圣躬虽有推燥居湿之勤前後赏赐过报劳苦而无厌之心不知纪极外交属托扰乱天下宜敕圣居外断絶伯荣往来令恩德两隆上下俱美帝以章示阿母等内幸皆怀忿恚而伯荣骄淫尤甚与故朝阳侯刘护从兄瓌交通瓌遂

以为妻得袭护爵位至侍中震复疏言瓌无他功行但以配阿母女滥受封爵不依祖制不合经义书奏不省延光二年进太尉帝舅大鸿胪耿宝荐中常侍李闰兄于震震不从宝乃自往候震且矫称上意震曰如朝廷欲令三府辟召故宜有尚书勅遂拒不许宝大恨而去皇后兄执金吾阎显亦荐所亲厚于震震又不从司空刘授闻之即辟此二人旬日中皆见拔擢由是震益见怨时诏遣使者大为阿母修第中常侍樊丰及侍中周广谢惲等更相扇动倾摇朝廷震复上书曰方令灾害滋甚百姓空虚三边震扰帑藏匱乏而为阿母起第为费巨亿广惲兄弟依倚近幸与之分威属托州郡倾动大臣招徕海内贪污之人受其货赂复得显用白黑溷淆天下謏譁臣闻师言上之所取财尽则怨力尽则叛怨叛之人不可复使惟陛下度之上不省丰惲等自是益无顾忌遂诈作诏书调发司农钱谷大匠见徒材木各起家舍园池庐观役费无数震因地震复上疏曰臣蒙恩备台辅不能奉宣政化调和陰阳伏见去年十一月四日京师地动臣闻师言地者陰精当安静承阳而今动摇者陰道盛也其日戊辰三者皆土位在中宫此中臣近官持权用事之象陛下以边境未宁宫殿垣屋无所兴造而近幸骄溢踰法多请徒士盛修第舍卖弄威福道路謏譁衆所闻见地动之变近在城郭殆为此发又冬无雪春节未雨百僚焦心而缮修不止诚致旱之徵也惟陛下奋乾刚之德弃骄奢之臣以掩詖言之口无令威福久移于下震前後所上转有切至帝既不平之而樊丰等皆侧目愤怨但以其名儒未敢加害寻有河间男子赵腾诣阙上书指陈得失帝怒收考诏狱震上疏救之曰臣闻尧舜之世諫鼓谤木立之于朝殷周哲王小人怨詈则还自敬德乞为亏除全腾之命以诱刍蕘輿人之言帝不省竟杀腾会三年春东巡岱宗樊丰等因乘輿在外竞修第宅震部掾高舒召大匠令吏考校之得丰等所诈下诏书具奏须行还上之丰等闻惶怖遂因星变共譖震以赵腾死後深用怨怼且邓氏故吏有恚恨心及车驾行还夜遣使收震太尉印绶于是柴门絶宾客丰等复恶之乃请大将军耿宝奏震大臣不服罪怀恚望有诏遣归本郡震行至城西夕阳亭乃慷慨谓其诸子门人曰死者士之常分吾蒙恩居上司疾奸臣狡而不能诛恶嬖女倾乱而不能禁何面目复见日月身死之日以杂木为棺布单被裁足盖形勿归冢次勿设祭祠因饮酖而卒时年七十余弘农太守移良承樊丰等旨遣吏于陕县留停震丧露棺道侧道路皆为隕涕顺帝即位丰等诛死震门生虞放陈翼诣阙追讼震事乃下诏除二子为郎赠钱百万以礼改葬于华陰潼亭远近毕至先葬十余日有大鸟集震丧前悲鸣泪下葬毕乃去郡以状上复诏太守丞具中牢祠之时人为立石鸟象于其墓所震五子中子秉尤知名

秉字叔节少传父业兼明京氏易博通书传尝隐居教授年四十余乃应司空辟拜侍御史频出为豫荆徐兗四州刺史迁任城相自为刺史二千石计日受俸余禄不入私门故吏齎钱百万遗之闭门不受以廉洁称桓帝即位以明尚书徵入劝讲累迁侍中尚书帝时微行私过幸河南尹梁孕府舍是日大风拔树昼昏秉因上疏諫言天不言语以灾异譴告王者至尊出入有常警蹕而行静室而止自非郊庙之事则鸾旗不驾诸侯如臣之家春秋尚列其诚况以先王法服而私出盘游降乱尊卑等威无序侍卫守空宫?玺委女妾设有非常之变任章之谋上负先帝下悔靡及帝不纳秉以病乞退出为右扶风黄琼惜其去朝廷请留拜光禄大夫梁冀用权秉称病六年冀诛乃拜太仆迁太常延熹三年白马令李云以諫受罪秉争之不能得坐免官归其年冬复徵拜河南尹先是中常侍单超弟匡为济陰太守以赃罪为刺史第五种所劾匡窘赂客任方刺兗州从事卫羽及捕得方囚系洛阳匡虑秉当穷竟其事密令方越狱亡走秉乞檻车徵匡考核其事竟坐秉输作左校以久旱赦出会日食泰山太守皇甫规讼秉忠

直不宜久抑不用诏徵秉及处士韦着二人各称疾不至有司劾秉着大不敬将加罪尚书令周璟等议奏秉儒学侍讲常在谦虚着隐居行义以退让为节俱徵不至诚违侧席之望然逶迤退食足抑苟进之风夫明王之世必有不召之臣圣朝弘养宜用优游之礼可告所属喻以朝廷恩意如遂不至详议其罚于是重徵乃至拜太常五年冬代刘矩为太尉是时宦官方炽任人及子弟为官布满天下秉与司空周璟上言内外吏职多非其人旧典中臣子弟不得居位秉势而今枝叶宾客布列职署或年少庸人典据守宰上下忿患四方愁毒可遵用旧章退贪残塞灾谤请下司隶校尉中二千石城门五营校尉北军中候各实核所部应当斥罢自以状言三府廉察有遗漏续上帝从之于是秉条奏牧守以下五十余人或死或免天下莫不肃然时郡国计吏多留拜为郎秉上言三署见郎七百余入帑藏空虚宜絶横拜以塞覬觎自此桓帝世计吏无复留拜者七年南巡园陵特诏秉从至南阳左右并通奸利诏书多所除拜秉上书谓宜割不忍之恩以断求欲之路于是诏除乃止时中常侍侯览弟参为益州刺史贪赃暴虐秉劾奏参槛车徵诣廷尉参惶恐道自杀秉因奏览及中常侍贝瑗曰臣按国旧典宦竖之官本在给使省闕司昏守夜而今猥受过宠执政操权其阿谀取容者则因公褒举以报私惠有忤逆于心者必求事中伤肆其横忿居法王公富拟国家饮食极肴膳仆妾盈纨素虽季氏专鲁穰侯擅秦何以尚兹案中常侍侯览弟参贪残元恶自取祸灭览固知衅重必有自疑之意臣愚以为不宜复见亲近昔懿公刑邴歆之父夺閭职之妻而使二人参乘卒有竹中之难春秋书之以至戒览宜急屏斥投畀有北若斯之人非恩所有请免官送归本郡书奏尚书召对秉掾属曰公府外职而奏劾近官经典汉制有故事乎秉使对曰春秋赵鞅以晋阳之甲逐君侧之恶传曰除君之恶惟力是视邓通懈慢申屠嘉召通诘责文帝从而请之汉世故事三公之职无所不统尚书不能诘帝不得已竟免览官而削瑗国每朝廷有过失辄尽忠规谏多见纳用秉性不饮酒又早丧夫人不复娶所在以淳白称尝自言曰我有三不惑酒色财也卒年七十四赐茔陪陵子赐

赐字伯献少传家学笃志博闻常退居隐约教授门徒不答州郡礼命後辟大将军梁冀府非其好也出除陈仓令因病不行公车徵不至连辞三公之命後以司空高第再迁侍中越骑校尉建宁初灵帝当受学诏太傅三公选通尚书桓君章句有重名者三公举赐乃侍讲华光殿迁少府光禄勳熹平元年青蛇见御座赐上封事曰臣闻和气致祥乖气致灾皇极不建则有蛇龙之孽诗云惟虺惟蛇女子之祥故春秋两蛇鬪于郑门昭公殆以女败夫女谒行则谗夫昌苞苴通故成汤以之自戒终济亢旱之灾惟陛下思乾刚之道别内外之宜崇帝乙之制受元吉之祉抑皇甫之权割妻之爱则蛇变可消嘉祥立应二年拜司空五年拜司徒时帝好微行游幸外苑赐上疏諫曰臣闻唐虞兢兢业业周文日昃不暇明慎庶官俊乂在职今所序用有形势者旬日累迁守真之徒历载不转又闻数微行出幸苑囿政事日堕大化凌迟宜絶慢游之戏念官人之重割用板之恩慎贯鱼之序谨手书密上後坐辟党人免复拜光禄大夫光和元年有虹蜺昼降于嘉德殿前帝恶之引赐及议郎蔡邕等入金商门崇德署使曹节王甫问以祥异祸福所在赐仰天而叹谓节等曰吾每读张禹传未尝不愤恚叹息不能竭忠尽情而反留意少子乞还女壻朱云欲得上方斩马剑以理之固其宜也吾以微薄之学充师之末累世见宠无以报国猥当大问死而後已乃以书对言殿前之气应为虹蜺皆妖邪所生不正之象按春秋曰天投蜺天下怨海内乱加四百之期亦复垂及昔虹贯牛山管仲諫桓公无近妃宫今妾媵嬖人閹尹之徒共专国朝欺罔日月又鸿都门下招会羣小如驩兜共工更相荐

说旬月之间并各拔擢乐松处常伯任芝居纳言郗俭梁鹄俱以便辟之性佞辩之心各收丰爵不次之宠而令搢绅之徒委伏畎口诵尧舜之言身蹈绝俗之行弃捐沟壑不见逮及冠履倒易陵谷代处从小人之邪意顺无知之私欲不念板荡之作虺蜴之诚殆哉之危莫过于今幸赖皇天垂象谴责周书曰天子见怪则修德诸侯见怪则修政惟陛下斥远佞巧之臣速徵鹤鸣之士内亲张仲外任山甫断绝尺一抑止盘游留思庶政冀上天还威众变可弭老臣过受师傅之任数蒙宠异之恩岂敢爱惜垂没之年而不尽其悽悽之心哉书上大忤曹节等蔡邕坐直对抵罪徙朔方赐以师傅之恩得免咎冬行辟雍礼引赐为三老复拜少府光禄勳代刘合为司徒帝欲造毕圭灵琨苑赐复上疏谏以为坏沃衍废田园驱居人畜禽兽非若保赤子之义今城外之苑已有五六可逞情意宜帷夏禹卑宫太宗露台之意书奏帝欲止以问任芝乐松松等曰文王之囿百里人以为小今与百姓共无害于政也帝悦遂筑之四年赐以病罢居无何拜太常五年冬复拜太尉中平元年黄巾贼起赐被召会议诣省合切谏忤旨因以寇贼免先是黄巾张角等执左道以诳耀百姓天下襁负归之赐召掾刘陶告曰张角等遭赦不悔而稍益滋蔓今若下州郡捕讨恐更骚扰速成其患且欲切敕刺史二千石简别流人各护归本郡以孤弱其党然後诛其渠帅可不劳而定矣陶对曰此不战而屈人之兵庙胜之术也赐遂上书言之会去位事留中後帝徙南宫閱録故事得赐所上张角奏及前侍讲注籍乃感悟封赐临晋侯邑千五百户赐以刘寛张济并侍讲不宜独受封赏请分户邑帝嘉叹复封寛及济子拜赐尚书令数日出为廷尉赐自以代非法家言曰三后成功惟殷于民臯陶不与焉盖吝之也遂固辞以特进就第二年九月复为司空其月卒帝素服辍朝三日赠东园梓器襚服赐钱赠丧葬甚厚谥文烈子彪嗣彪字文先少传家学中平六年拜司徒遭董卓曹操之乱多所持正蔚为朝望然不能早自引去几及於难彪子修字德祖为操主簿有俊才操忌而杀之初震长子牧为富波相有孙曰奇为灵帝侍中帝尝问曰朕何如桓帝对曰陛下之于桓帝亦犹虞舜比德唐尧帝不悦曰卿强项真杨震子孙死後必复至大鸟矣彪以魏黄初六年卒于家自震至彪四世太尉德业相继与袁氏俱为东京名族云

後汉书论曰孔子称危而不持颠而不扶则将焉用彼相矣诚以负荷之寄不可以虚冒崇高之位忧重责深也延光之间震为上相抗直方以临权枉先公道而後身名可谓怀王臣之节识所任之体矣遂累叶载德继踵宰相信哉积善之家必有余庆先世韦平方之蔑矣论曰杨氏四世三公然自震迄赐并以晚达古人先道德後功名于此可见考震之学盖能用其力于慎独者非如马融诸儒习章句通训诂以为明经已也传曰不为威惕不为利疚孟子曰有诸已之谓信震殆有得乎此是以苟得苟免之事有所不为其直言显谏乃所谓勿欺而犯者卒之一死报君犹以尸谏中孚应天至诚动物大鸟之集岂偶然哉夫学至宋儒始明而汉人笃意力行往往闇合如伯起之立志较然即司马君实生平无不可对人言赵闚道旦昼所为必夜焚香以告帝皆闻风兴起者耳秉之三不惑为能恪守四知之畏赐危言不讳有祖父风数传至彪笃厚有余刚义不足矣要不失为清白吏子孙云

卷十五

钦定四库全书

史传三编卷十五

大学士朱轼撰

名臣传七

汉

李固 杜乔

李固字子坚汉中南郑人司徒合之子也固貌状有奇表鼎角匿犀足履龟文少好学常步行寻师不远千里遂究览坟籍结交英贤四方有志之士多慕其风而来学京师咸叹曰是复为李公矣司隶益州竝命郡举孝廉辟司空掾皆不就阳嘉二年有地动山崩大灾之异公卿举固对策诏又特问当世之敝为政所宜固对曰臣闻化以职成官由能理伏睹诏书务求宽博疾恶严暴而今长吏多杀伐致声名者必加迁赏其存宽和无党援者辄见斥逐是以淳风不宣薄俗未革前孝安皇帝变乱旧典封爵阿母使樊丰之徒乘权纵恣改乱嫡嗣至今圣躬狼狽亲遇其艰既拔自困殆龙兴即位天下喁喁属望风政诚当沛然思惟善道而论者犹云方今之事复同于前臣伏从山草痛心伤臆实以汉兴以来贤圣相继十有八主岂无阿乳之恩岂忘爵赏之宠然上畏天威俯案经典知义不可故不封也今宋阿母虽有功勤但加赏赐足酬其劳至於裂土开国寔乖旧典闻阿母体性谦虚必有逊让陛下宜许其辞国之高使成万安之福夫妃后之家所以少完全者岂天性当然但以爵位尊显专总权柄天道恶盈不知自损故至颠仆今梁氏子弟羣从荣显兼加永平建初故事殆不如此宜令还居黄门之官使权去外戚政归国家又诏书所以禁侍中尚书中臣子弟不得为吏察孝廉者以其秉威权容请托故也而中常侍在日月之侧声势振天下子弟禄仕曾无限极谄谀望风进举今可为设常禁同之中臣长水司马武宣开阳城门候羊廋等无他功德初拜便真此虽小失而渐坏旧章先圣法度所宜坚守政教一跌百年不复陛下之有尚书犹天之有北斗斗为天喉舌尚书亦为陛下喉舌斗斟酌元气运乎四时尚书出纳王命赋政四海权尊势重责之所归宜审择其人以毗圣政陛下宜招会羣儒引问得失指擿变象以求天意又宜罢退宦官去其权重裁置常侍二人方直有德者省事左右小黄门五人才智闲雅者给事殿中如此则论者厌塞升平可致也顺帝览其对即出阿母还舍诸常侍悉叩头谢罪朝廷肃然以固为议郎而阿母宦者疾固言直因诈飞章以陷其罪事从中下大司农黄尚仆射黄琼救之久乃得释出为雒令弃官居汉中杜门不交人事岁中梁商请为从事中郎商以后父辅政而柔和自守不能有所整裁灾异数见下权日重固乃奏记于商欲令先正风化退辞高满又以圣嗣未立羣下继望宜令中宫博简嫔媵兼采微贱宜子之人进御至尊若有皇子母自乳养无委保妾医巫致飞燕

之祸商不能用永和中荆州盗贼起弥年不定乃以固为荆州刺史固到遣吏劳问境内赦寇盗前衅与之更始于是贼帅夏密等自缚归首固皆遣还使自相招集开示威法半岁间余类悉降州内清平上奏南阳太守高赐等臧秽赐等惧罪因共重赂大将军梁冀冀为千里移檄而固持之愈急遂徙固为泰山太守时泰山盗贼屯聚历年莫制固到悉罢遣郡兵归农以恩信招诱之未岁贼皆弭散迁将作大匠上疏陈事曰陛下初登大位聘南阳樊英江夏黄琼广汉杨厚会稽贺纯待以大夫之位厚等在职虽无奇卓然夕惕慈慈志在忧国臣前在荆州闻厚纯等以病免归诚怅然为时惜之今诸侍中并皆年少无一?儒大人可顾问者宜徵还厚等以副羣望琼久处议郎已且十年衆人皆怪始隆崇今更滞也光禄大夫周举才谟高正宜在常伯访以言议侍中杜乔学深行直当世良臣久托疾病可勅令起又荐陈留扬伦清河房植等数人是日有诏徵用伦厚等而迁琼举以固为大司农先是周举等八使案察天下多所劾奏其中竝是宦者亲属辄为请乞诏遂令勿考又旧任三府选令史光禄试尚书郎时皆特拜不复选试固乃与廷尉吴雄上疏以为八使所纠宜急诛罚选举署置可归有司帝乃更下免八使所举刺史二千石自是希复特拜切责三公明加考察朝廷称善乃复与光禄勳刘宣上言自顷选举牧守多非其人至侵害百姓又宜止盘游专心庶政帝纳其言于是下诏诸州劾奏守令以下政有乖枉遇人无惠者免所居官其奸秽重罪收付诏狱及冲帝即位以固为太尉録尚书事明年帝崩梁太后以扬徐盗贼方盛使中常侍诏固等欲须所徵诸王侯到乃发丧固对曰帝虽幼少犹天下之父今日崩亡人神感动岂有臣子反共掩匿乎秦皇沙邱之谋近日北乡之事皆天下大忌不可之甚者也太后从之即暮发丧固以清河王蒜年长有德欲立之谓梁冀曰今当立帝宜择年长高明有德任亲政事者愿将军审详大计察周霍之立文宣或邓阎之利幼弱冀不从乃立乐安王子缵年八岁是为质帝将卜冲帝山陵固曰今处处寇贼军兴费广新荆宪陵赋发非一帝尚幼小可起陵于宪陵茔内依康陵制度役费三分减一乃从固议时太后以比遭不造委任宰辅固所匡正每辄从用其黄门宦者一皆斥遣天下咸望遂平而梁冀每相猜忌初顺帝时除官多不以次固奏免百余人此等遂作飞章诬固离间近戚自隆更党表举荐达例皆门徒山陵未成违矫旧制子罪莫大于累父臣恶莫深于毁君事合诛辟冀以白太后太后不听冀忌帝聪慧恐为後患遂令左右进鸩帝苦烦甚使促召固固入问帝尚能言曰食煮饼腹闷得水尚可活时冀亦在侧曰恐吐不可饮水语未絶而崩固伏屍号哭推举侍医冀虑其事泄大恶之因议立嗣固引司徒胡广司空赵戒先与冀书曰天下不幸仍遭大忧皇太后圣德当朝摄统万机明将军体履忠孝忧存社稷而频年之间国祚三絶今当立帝天下重器远寻先世废立旧仪近见国家践阼前事未尝不询访公卿广求羣议令上应天心下合衆望传曰以天下与人易为天下得人难昔昌邑之立昏乱日滋霍光忧愧发愤悔之折骨自非博陆忠勇延年奋发大汉之阼几将倾矣国之兴衰在此一举冀得书乃召百官入议固广戒及大鸿胪杜乔皆以为清河王蒜明德着闻又属最尊亲宜立为嗣先是蠡吾侯志尝取冀妹时在京师冀欲立之衆论既异未有以相夺中常侍曹腾等闻而夜往说冀曰将军累世国戚秉摄万机宾客纵横多有过差清河王严明若果立则将军受祸矣不如立蠡吾侯富贵可长保也冀然其言明日重会公卿冀意气凶凶广戒慑惮皆曰惟大将军令独固与乔守本议冀厉声曰罢会固意既不从犹望衆心可立复以书劝冀冀愈怒乃说太后策免固竟立蠡吾侯是为桓帝岁余甘陵刘文等谋共立蒜为天子冀因诬固与文交通下固狱门生王调贯械上书赵承等数十人亦要鈇鑕诣阙通诉太后乃赦焉及出狱京师市里皆称万岁冀闻大惊畏固终为己害乃更据奏前事遂诛之时年五十四临命与胡广赵

戒书曰固受国厚恩是以竭其股肱不顾死亡志欲扶持王室比隆文宣何图一朝梁氏迷谬公等曲从以吉为凶成事为败乎汉家衰微从此始矣公等受主厚禄颠而不扶後之良史岂有所私固身已矣于义得矣夫复何言广戒得书悲慚皆长叹流涕冀暴固尸于衢令有敢临者加其罪固弟子汝南郭亮年始成童游学洛阳乃左提章钺右秉鉄鑕诣阙上书乞收固尸不许因往临哭陈辞于前遂守丧不去夏门亭长呵之曰李杜二公为大臣不能安上纳忠而兴造无端卿曹何等腐生公犯诏书干试有司乎亮曰亮含陰阳以生载乾履坤义之所动岂知性命何为以死相惧亭长叹曰居非命之世天高不敢不局地厚不敢不踏耳目适宜视听口不可以妄言也太后闻而不诛南阳董班亦往哭固屍而殉尸不肯去太后怜之乃听得襚歛二人由此显名三公并辟班遂隐身莫知所归固所着章表奏议教令对策记铭凡十一篇弟子赵承杜访等乃共论固言迹为德行一篇固二子皆死偃城狱中少子燮先固未娶祸时其姊文姬豫谋藏匿以托固门生王成得脱亡变姓名为酒家佣冀诛後乃徵议郎历官河南尹在位廉方端正有父风时人称焉

杜乔字叔荣河内林虑人也少为诸生举孝廉辟司徒杨震府稍迁南郡太守转东海相入拜侍中汉安元年以乔守光禄大夫使徇察兗州表奏泰山太守李固政为天下第一陈留太守梁让济陰太守泛宫济北相崔瑗等臧罪千里以上让即大将军梁冀季父宫瑗皆冀所善还拜太子太傅迁大司农时梁冀子弟五人及中常侍等以无功并封乔上书諫曰陛下龙飞即位天人属心万邦攸赖不急忠贤之礼而先左右之封伤善害德兴长佞谀臣闻古之明君褒罚必以功过今梁氏一门宦者微孽竝带无功之绂裂劳臣之土其为乖滥胡可胜言夫有功不赏为善失其望奸回不诘为恶肆其凶苟遂斯道岂伊伤政为乱而已丧身亡国可不慎哉书奏不省益州刺史种暠举劾永昌太守刘君世以金蛇遗梁冀事发觉以蛇输司农冀从乔借观之乔不肯与冀始为恨累迁大鸿臚时冀小女死令公卿会丧乔独不往冀又衔之迁光禄勳建和元年代胡广为太尉桓帝将纳梁冀妹冀欲令以厚礼迎之乔据执旧典不听又冀属乔举泛宫为尚书乔以宫臧罪明着遂不肯用因此日忤于冀先是李固见废内外丧气羣臣侧足而立唯乔正色无所回挠由是朝野皆倚望焉在位数月以地震免宦者唐衡等因共譖于帝曰陛下前当即位乔与李固抗议言上不当奉汉宗祀帝亦怨之及清河王蒜事起冀遂讽有司劾乔及李固与刘文等交通请逮案罪而梁太后素知乔忠但策免而已冀愈怒使人胁乔曰早从宜妻子可得全乔不肯冀遂白执系之死狱中妻子归故郡与李固俱暴尸城北家属故人莫敢视者乔故掾陈留杨匡闻之号泣星行到洛阳乃着故赤帻托为夏门亭吏守卫尸丧积十二日太后闻而不罪匡于是带鉄鑕诣阙上书并乞李杜二公骸骨太后许之成礼殓殮送乔丧还家送葬行服隐匿不仕匡一名章字叔康常为平原令时国相徐曾中常侍璜之兄也匡耻与接事托疾牧豕云

後汉书论曰夫称仁者其道弘矣立言践行岂徒徇名安己而已哉将以定去就之槩正天下之风使生以理全死与义合也夫专为义则伤生专为生则害义专为物则害智专为己则损仁若义重于生舍生可也生重于义全生可也上以残闇失君道下以笃固尽臣节臣节尽而死之则为杀身以成仁去之不为求生以害仁也顺桓之间国统三絶太后称制贼臣虎视李固据位持重以争大义确乎而不可夺岂不知守节之触祸耻夫覆折之伤任也观其发正辞及所遗梁冀书虽机失谋乖犹恋恋而不能已至矣哉社稷之心乎其视胡广赵戒犹粪土也

论曰李杜二公当母后强臣擅命之日正色折奸危言悟主朝野咸倚为重志虽未遂而以身死之百世而下犹足兴起顽懦不独当时门生故吏之从义如归也或乃以冀负弑逆大恶固乔不克声罪致讨故纲目卒夺其官然其事暖微又旋已去位清河之祸随之其身之莫保况能案未成之狱以加之罪而制其死命乎夫立君美事也又凭议于衆弑君恶蹟也又假手于私王蒜长且贤中外属望二公当此时深心毅力迭用柔刚非惟不能夺邪谋而归正议终且以获罪焉而顾欲推鞠其私人证成大狱帝后制于中羣凶党于外将谁谋之而谁信之夫机事不密则害成冀依倚城社构连羽翼他日桓帝尚不敢显行其天诛况臣下乎或谓二公陰图机会为国殄此大憝若王允之于董卓温峤之于王敦可也不知事势不同蠡吾之立汉祚兴衰所系立与不立定于俄【阙】义固争庶几可为若复依违隐忍托为事【阙】

卒之国事已非而已之身名亦丧先儒有言曰大

臣当以李固杜乔为正此不易之论也延熹二年李云杜衆以直諫得罪九年李膺杜密以钩党见收终桓之朝称李杜者三并怀忠抗节不得其死而汉之亡决矣

朱穆

朱穆字公叔南阳宛人也祖暉少有气节年十三与外氏宗属避王莽乱道遇羣贼白刃劫诸妇女畧夺衣物衆皆惶迫伏地暉拔剑前曰财物皆可取耳诸母衣不可得今日朱暉死日也贼壮而舍之历仕临淮太守吏人畏爱章帝时拜尚书仆射时尚书张林议复武帝均输法帝然林言暉屡执不可帝怒切责诸尚书暉自系狱三日诏勅出之暉因称疾笃不肯署议尚书令以下皆为惶怖暉曰行年八十蒙恩得备机密当以死报奈何心知不可而顺旨雷同耶遂闭口不复言诸尚书乃共劾奏暉帝意解卒寢其事父颉修儒术安帝时至陈相穆年五岁便有孝称父母疾辄不饮食差乃复常及壮耽学鋭意讲诵或时思至不自知亡失衣冠颠坠阡岸其父常以为颡愚几不知数马足穆愈更精笃初举孝廉顺帝末江淮盗贼羣起州郡不能禁或说大将军梁冀曰朱公叔兼资文武若以为谋主贼不足平也冀亦素闻穆名乃辟之使典兵事及桓帝即位梁太后临朝穆以冀地亲势重望有以扶持王室因推灾异奏记以劝戒冀曰愿将军少察愚言申纳诸儒亲其忠直絶其姑息专心公朝割除私欲广求贤能斥远佞恶人君不可不学当以天地顺道渐渍其心宜为皇帝选置师傅及侍讲者得小心忠笃敦礼之士将军与之俱入参劝讲授师贤法古急诛奸臣为天下所怨毒者以塞灾咎议郎大夫之位多非其人九卿亦有乖其任者惟将军察焉又荐种暡栾巴等冀虽不能从其言而擢用暡巴举穆高第为侍御史时桓帝临雍礼毕公卿出虎贲置弓阶上公卿下阶皆避弓穆过呵虎贲曰执天子器何故投于地即劾奏抵罪公卿皆惭曰朱御史可谓临事不惑者也时同郡赵康叔盛者隐于武当山以经传教授穆时年五十乃奉书称弟子及康没丧之如师常感时浇薄莫尚惇笃作崇厚论其畧曰道者以天下为一在彼犹在己也故行违于道则愧生于心非畏义也事违于理则负结于意非惮礼也中世之所敦已为上世之所薄况又薄于此乎故夫天不崇大则覆帔不广地不深厚则载物不博人不敦龐则道数不远昔在仲尼不失旧于原壤楚严不忍章于絶纓而时俗或异风化不敦尚相诽谤记短则兼折其长贬恶则兼伐其善务进者趋前而不顾後荣贵者矜已而不待人智不接愚富不赈贫虚华盛而忠信微刻薄稠

而纯笃稀斯盖谷风有弃予之叹伐木有鸟鸣之悲矣穆又着絶交论亦矫时之作时梁冀骄暴不悛朝野嗟毒穆以故吏惧其衅积招祸复奏记谏曰明将军地有申伯之尊位为羣公之首一日行善天下归仁终朝为恶四海倾覆顷者官人俱匱诏书发调或至十倍公赋既重私歛又深牧守长吏多非德选聚歛无厌掠夺百姓皆托之尊府遂令将军结怨天下吏人酸毒道路叹嗟夫将相大臣均体元首共輿而驰同舟而济輿倾舟覆患实共之岂可坐视主孤时困而莫之恤乎宜时易宰守非其人者减省第宅园池之费拒絶郡国诸所奉送内以自明外解人惑使挟奸之吏无所依托司察之臣得尽耳目宪度既张远迹清一则将军身尊事显德耀无穷冀不纳而纵放日滋遂复赂遗左右交通宦者任其子弟宾客以为要职欲以自固穆又奏记极谏冀终不悟报书曰如此仆遂无一可耶穆言虽切然亦不甚罪也永兴元年河溢漂害人庶数十万户饥馑流移冀州盗贼尤多故擢穆为冀州刺史州人有宦者三人为中常侍并以檄谒穆穆疾之辞不相见冀部令长闻穆济河解印绶去者四十余人及到奏劾诸部贪污吏至有自杀者以威署权宜尽诛贼渠帅举劾权贵或死狱中有宦者赵忠丧父归葬僭为璵璠玉匣偶人穆下郡案验吏畏其严明发墓割棺出之帝闻大怒徵穆诣廷尉输作左校太学生刘陶等数千人诣阙上书讼穆处公忧国志清奸恶横遭谤讟遂罹刑谴愿黥首系趾代穆校作帝览奏乃赦之穆居家数年以朝臣荐徵拜尚书延熹五年冯緄以车骑将军将兵讨武陵蛮时所遣将帅宦官辄陷以折费军资抵罪緄性烈直不行贿赂惧为所中乃奏请中常侍一人监军财费穆即奏緄以财自嫌失大臣之节穆既深疾宦官及在台阁旦夕共事志欲除之上疏曰案汉故事中常侍参选士人建武以後乃悉用宦者延平以来浸益贵盛假貂璫之饰处常伯之任权倾海内子弟亲戚泛滥骄溢凶狡无行之徒媚以求官恃势怙宠之輩渔食百姓臣愚以为可悉罢省率由旧章更选海内清淳之士明达国体者以补其处即陛下可为尧舜之君衆僚皆为稷之臣兆庶黎民蒙被圣化矣帝不纳穆因进见口复陈曰臣闻汉家旧典置侍中中常侍各一人省尚书事黄门侍郎一人传发书奏皆用姓族自和熹太后以女主称制不接公卿乃以阉人为常侍小黄门通命两宫自此以来权倾人主穷困天下宜皆罢遣博选耆儒宿德与参政事帝怒穆伏不肯起左右传出良久乃趋而去自此中官数因事称诏诋毁之穆素刚不得意居无几愤懣发疽延熹六年卒时年六十四穆禄仕数十年蔬食布衣家无余财公卿共表穆立节清忠恭机密守死善道宜蒙旌宠策诏褒述追赠益州太守所着书凡二十篇蔡邕尝至其家自写之穆卒邕与门人共述其体行諡曰文忠先生穆前在冀州所辟用皆清德长者多至公卿州郡子弟少有名节仕至河南尹

论曰君臣朋友之义虽以人合盖有天焉穆气节刚决与乃祖同而文学过之然考晖初从东平入朝夺壁少府大为宪王苍敬重其後上便宜之策抗均输之议章帝卒皆听从君臣之令终如此晖与张堪陈揖交生死不肯负司徒桓虞叹其义烈朋友之合好又如彼及穆之身奏记于梁冀既有违言忠谏于桓帝且以获戾又不幸遇刘伯宗輩薄于仁义着论絶交迹其生平忧国忘身死而後已刚目特书其卒其所以予之者深矣抑考寔宪之时若乐恢之抗疏殉身何敞之始终忠恳韩棱之正色立朝东京多节义之臣此犹其比肩而起者梁冀之积威过于寔宪穆能以刚正终焉最後又力陈宦官一疏其贤不可及矣

虞诩

虞诩字升卿陈国人祖父经为郡狱吏案法平允尝曰东海于公高为里门而其子定国卒至丞相吾决狱六十年虽不及于公子孙何必不为九卿邪故字诩曰升卿诩早孤孝养祖母县举顺孙欲以为吏辞以养不赴祖母终服阕辟太尉李修府拜郎中永初四年西羌作乱残破并凉大将军邓骘以军役方费事不相赡欲弃凉州并力北边乃会公卿集议咸以为然诩闻而说李修曰窃闻公卿定策当弃凉州求之愚心未见其便先帝开拓土宇劬劳後定而今憚小费举而弃之凉州既弃即以三辅为塞三辅为塞则园陵单外此不可之甚者也谚曰关西出将关东出相观其习兵壮勇实过余州今羌人所以不敢入据三辅为心腹之害者以凉州在後故也其土人所以推锋执锐无反顾之心者为臣属于汉故也若弃其境域徙其人庶安土重迁必生异念如使豪雄相聚席卷而东虽赍育为卒太公为将犹恐不足当御议者喻以补衣犹有所完诩恐其疽食侵淫而无限极弃之非计修曰吾意不及此微子之言几败国事然则计当安出诩曰今凉土扰动人情不安窃忧卒然有非常之变诚宜令四府九卿各辟彼州数人其牧守令长子弟皆除为冗官外以劝厉答其功勤内以拘致防其邪计修善其言更集四府皆从诩议于是辟西州豪杰为掾属拜牧守长吏子弟为郎以安尉之邓骘兄弟以诩异其议因此不平欲以吏法中伤之朝歌贼甯季等数千人攻杀长吏屯聚连年州郡不能禁乃以诩为朝歌长故旧皆吊诩曰得朝歌何吊也志不求易事不避难臣之职也不遇盘根错节何以别利器乎始到谒河内太守马棱棱勉之曰君儒者当谋谟庙堂反在朝歌邪诩曰初除之日士大夫皆见吊勉以诩譟之知其无能为也朝歌者韩魏之郊背太行临黄河去敖仓百里而青冀之民流亡万数贼不知开仓招衆劫库兵守成臯断天下右臂此不足忧也今其衆新盛难与争锋兵不厌权愿寛假譬策勿令有所拘阂而已及到官设令三科以募求壮士自掾史以下各举所知其攻劫者为上伤人偷盗者次之带丧服而不事家业为下收得百余人诩为飧会悉贯其罪使入贼中诱令劫掠乃伏兵以杀之又潜遣贫人能缝者佣作贼衣以采纆缝其裾为识有出市里者吏辄禽之贼由是骇散咸称神明迁怀令後羌寇武都邓太后以诩有将帅之畧迁为武都太守羌乃率衆数千遮诩于陈仓崱谷诩即停车不进而宣言上书请兵须到当发羌闻之乃分钞傍县诩因其兵散日夜进道兼行百余里令吏士各作两竈日增倍之羌不敢逼或问曰孙臆减竈而君增之兵法日行不过三十里以戒不虞而今日且二百里何也诩曰羌衆甚吾兵少徐行则易为所及速进则彼所不测彼见吾竈日增必谓郡兵来迎衆多行速必憚追我孙臆见弱吾今示强势有不同故也既到郡兵不满三千而羌衆万余攻围赤亭数十日诩乃令军中使强弩勿发而潜发小弩羌以为矢力弱不能至并兵急攻诩于是使二十强弩共射一人发无不中羌大震退诩因出城奋击多所伤杀明日悉陈其衆令从东郭门出北郭门入贸易衣服回转数周羌不知其数更相恐动诩计贼当退乃潜遣五百余人于浅水设伏候其走路羌果大奔因掩击大破之斩获甚衆贼由是败散南入益州诩乃占相地势筑营垒二百八十所招还流亡假赈贫人郡遂以安先是运道艰难舟车不通驴马负载僦五致一诩乃自将吏士案行川谷由沮至下辩数十里皆烧石翦木开漕船道以人僦直雇借佣者于是水运通利岁省四千万诩始到郡户裁盈万及绥聚荒余招还流散二三年间遂增至四万余户盐米丰贱十倍于前坐法免永建元年为司隶校尉数月间奏太傅冯石太尉刘熹中常侍程璜陈秉孟生李闰等百官侧目号为苛刻三公劾奏诩盛夏多拘系无辜为吏人患诩上书自讼曰法禁者俗之堤防刑罚者人之衔轡今州曰任郡郡曰任县更相委远百姓怨穷以苟容为贤尽节为愚臣所发举臧罪非一二府恐为臣所奏遂加诬罪臣将从史鱼死即以尸谏耳顺帝省其章乃为免司空陶敦时中常侍张防特用权势每请托

受取诤辄案之而屡寢不报诤不胜其愤乃自系廷尉奏言曰昔孝安皇帝任用樊丰几亡社稷今张防复弄威柄国家之祸将重至矣臣不忍与防同朝谨自系以闻无令臣袭杨震之迹书奏防流涕诉帝诤几罹不测宦者孙程张贤等知诤以忠获罪乃相率陈奏再三始坐防徙边黜防党尚书贾朗等而赦出诤程复上书陈诤有大功语甚切激帝感悟复徵拜议郎数日迁尚书仆射是时长吏二千石听百姓譴罚者输赎号为义钱托为贫人储而守令因以聚斂诤奏除之诸所议多见从用诤好刺举无所回容数以此忤权戚遂九见谴考三遭刑罚而刚正之性终老不屈永和初迁尚书令以公事去官朝廷思其忠复徵之会卒临终谓其子恭曰吾事君直道行已无愧所悔者为朝歌长时杀贼数百人其中何能不有冤者自此二十余年家门不增一口其获罪于天已可知也恭亦有俊才官至上党太守

论曰诤多智谋有文武才畧沮弃凉州三辅安危所系不特保全疆土而已其在朝歌武都之间则循吏而兼名将者也诤性刚而执法严在朝廷权多惮之九见谴考三遭刑罚然以博击权阉之人而能使宦者亦知其忠至于相率论救则忠信可行而直道之不泯也

张纲

张纲字文纪犍为武阳人留侯良之裔也父皓初为廷尉留心刑断数与尚书辩正疑狱多以详当见从安帝废皇太子为济陰王皓与太常桓焉太仆来历廷争之不能得顺帝即位拜司空在事多所荐达纲少时经学虽为公子而厉布衣之节举孝廉不就司徒辟高第为御史时顺帝委纵宦官有识危心纲常感激慨然叹曰秽恶满朝不能奋身出命扫国家之难虽生吾不愿也退而上书言文明恭俭守节约身尚德中常侍不过两人近幸赏赐裁满数金惜费重人故家给人足奸谋自消和气感应顷者无功小人皆有官爵富之骄之而复害之非爱人重器承天顺道者也愿陛下割损左右以奉天心书奏不省汉安元年遣八使徇行风俗皆耆儒知名多历显位唯纲年少官次最微余人受命之部而纲独埋其车轮于洛阳都亭曰豺狼当路安问狐狸遂奏白大将军冀河南尹不疑蒙外戚之援荷国厚恩以刍蕘之资居阿衡之任不能敷扬五教翼赞日月而专为封豕长蛇肆其贪叨甘心好货纵恣无底多树谄谀以害忠良诚天威所不赦大辟所宜加也谨条其无君之心十五事皆臣子所切齿者也书御京师震悚时冀妹为皇后姻族满朝帝虽知纲言直终不忍用先是广陵贼张婴等聚衆数万杀刺史二千石寇乱扬州徐间积岁不能讨冀乃讽尚书以纲为广陵太守因欲以事之前遣郡守率多求兵马纲独请单车之职既到乃将吏卒十余人径造婴垒以慰安之求得与长老相见申示国恩婴初大惊既见纲诚信乃出拜谒纲延置上坐问所疾苦乃譬之曰前後二千石多肆贪暴故致公等怀愤相聚二千石信有罪矣然为之者又非义也今主上仁圣欲以文德服叛故遣太守思以爵禄相荣不愿以刑罚相加诚转祸为福之时若闻义不服天子赫然震怒荆扬兖豫大兵云合岂不危乎夫不料强弱非明也弃善取恶非智也去顺效逆非忠也身絶血嗣非孝也背正从邪非直也见义不为非勇也六者成败之几利害所从公其深计之婴闻泣下曰荒裔愚人不能自通朝廷不堪侵枉遂复聚党偷生若鱼游釜中喘息须臾间耳今闻明府言乃婴等更生之辰也既陷不义实恐投兵之日不免孥戮纲约之以天地誓之以日月婴深感悟乃辞还营明日将所部万余人与妻子面缚归降纲乃单车入婴垒大会置酒为乐散遣部将任从所之亲为卜居宅相田畴子弟欲为吏者皆引召之人情悦服南州晏然论功当

封为梁冀遏絕天子嘉美徵欲擢用纲而婴等上书乞留乃许之纲在郡一年年三十六卒百姓老幼相携诣府赴哀者不可胜数纲自被疾吏人咸为祠祀祈福皆言千秋万岁何时复见此君张婴等五百余人制服行丧送到犍为负土成坟有诏褒恤拜其子续为郎中赐钱百万

论曰张纲正色立朝不阿权贵惠心孚衆不罔下民可谓柔不茹刚不吐矣然能化千万愚夫愚妇之心而不能救一二贵戚强臣之祸何哉孟子言箪豆噉蹴乞人不屑而受万锺者徒以宫室妻妾之不可已遂弃礼义不顾婴等虽寇贼然皆有激而成其廉耻固未尽漸灭也若梁冀者晏安酖毒失其本心不至于杀身覆宗不止岂非所谓死于安乐乎夫小惩大诫小人之福章帝知窦宪之奸顺帝嫉梁冀之擅而卒濡忍弗决遂令恶极罪大不复可贯诵富骄为害之言又叹君子之欲保全小人如此其至而彼昏不知反以德为讎也

刘陶

刘陶字子奇一名伟颍川颍陰人济北王勃之後陶为人居简不修小节所与交友非同志虽富贵不苟合也同宗刘恺以雅德知人独深器陶时朱穆刺史冀州以案验宦官触桓帝怒徵下狱输作左校陶时游太学率数千人诣阙上书曰伏见弛刑徒朱穆处公忧国志清奸恶诚以常侍贵宠父子兄弟布在州郡竞为虎狼穆张理天纲补缀漏目内官患疾谤讟烦兴天下有识皆以穆同禹稷而被共鯀之戾若死者有知则唐帝怒于崇山重华忿于苍墓矣当今中宦近习窃持国柄手握王爵口含天宪运赏则使饿隶富于季孙呼噏则令伊顔化为桀跖而穆独亢然不顾身害感王纲之不摄惧天网之久失竭心怀忧为上深计臣愿鯨首系趾代穆校作帝览其奏赦之陶见梁冀当朝连岁灾荒复上疏陈事曰天之与帝帝之与民犹头与足相须而行也陛下目不视鸣条之事耳不闻檀车之声天灾不有痛于肌肤震食不即损于圣体故蔑三光之谬轻上天之怒使羣丑刑隶芟刈小民死者悲于窀穸生者戚于朝野是愚臣所为咨嗟长怀叹息者也臣闻危非仁不扶乱非智不救窃见故冀州刺史朱穆前乌桓校尉李膺皆履正清平贞高絶俗穆前在冀州摧破奸党扫清万里膺历典牧守正身率下威扬朔北实中兴良佐宜还本朝夹辅王室以上齐七曜下镇万国书奏不省时有上书言民以货轻钱薄故致贫困宜改铸大钱事下四府羣僚及太学能言之士陶上议曰当今之忧不在于货而在于民饥比年已来良苗尽于蝗螟杼柚空于公私而议者不达农殖之本争言铸冶之便或欲因缘行诈以贾国利利尽争竞造铸之端于是乎生一人铸之万人夺之虽以陰阳为炭万物为铜犹不足无厌之求也臣尝诵诗至鸿雁于野之劳每喟尔长怀中篇而叹近听征夫饥劳之声甚于斯歌今地广不得畊民衆无所食羣小秉国吞噬无厌诚恐卒有役夫穷匠攘臂远呼使愁怨之民响应云合虽方尺之钱何能有救诗人所以眷然顾之潜焉出涕者也帝遂不改铸後陶举孝廉除顺阳长县多奸滑陶到官募吏民有勇力者不拘亡命奸赃陶责其先过要以後效使各结所厚少兵皆严兵待命于是覆案奸轨所发若神後以病免吏民思而歌之曰邑然不乐思我刘君何时复来安此下民陶明尚书春秋为之训诂推夏侯建夏侯胜欧阳和伯三家尚书及古文是正文字二百余事名曰中文尚书顷之拜侍御史灵帝宿闻其名数引纳之时张角伪托大道妖惑小民陶上言曰圣王以天下耳目为视听故能无不闻见今张角夫党不可胜计虽会赦令而谋不散四方私言角等窃入京师觐视朝政而州郡忌讳更相告语莫肯公文宜下明诏重募角等赏以国土有敢回避与之同罪帝殊不悟明年角反

乃思陶言封中陵乡侯三迁尚书令拜侍中以数切谏为权臣所惮徒为京兆尹到职当出修宫钱直千万陶既清贫而耻以钱买职称疾不听政帝宿重陶才原其罪徵拜谏议大夫是时天下寇贼方炽陶忧致崩乱复上疏曰臣闻事之急者不能安言心之痛者不能缓声窃见天下前遇张角之乱後遭边章之寇今西羌逆类私署将帅皆多段熲时吏习战陈知山川臣尝惧其轻出河东冯翊钞西军之後东之函谷据阨高望今果已攻河东恐遂转更豕突上京臣前驿马上便宜乞絶河东诸郡赋调冀尚可安事付主者流连至今莫肯求问今三郡之民皆已奔亡其存者尚十三四悲愁相守有百走退死之心而无一前鬪生之计西寇浸前去营咫尺将军张温天性精勇而主者旦夕迫促军无後殿假令失利其败不救臣自知言数见厌而言不自裁者以为国安则臣蒙其庆国危则臣亦先亡也谨复陈急要八事乞深垂纳者其八事大较言天下大乱皆由宦官宦官事急共谗陶曰今四方已静而陶疾害圣政专言妖孽州郡不上陶何缘知疑陶与贼通情于是收陶下黄门北寺狱掠按日急陶自知必死对使者曰朝廷前封臣云何今反受邪譖恨不与伊吕同俦而以三仁为辈遂闭气而死天下莫不痛之陶着书数十万言又作七曜论匡老子反韩非复孟轲及上书言当世便事条教赋奏书记辩疑凡百余篇时司徒东海陈耽亦以非罪与陶同死耽素以忠正称光和五年诏公卿以谣言举刺史二千石为民害者时太尉许馡司空张济承望内官受取货赂其宦官子弟宾客贪秽皆不敢问而虚举边远小郡清修有惠化者二十六人吏民诣阙陈诉耽上言公卿所举率党其私所谓放鸱鸢而囚鸾凤帝以让馡济诸坐徵者悉拜议郎宦官怨之遂诬陷耽死狱中

论曰汉末母后外戚盗贼强臣之祸皆成于宦官邓后称制则用小黄门通命两宫梁冀擅国则任中官子弟以求自固董卓入朝废立则以起兵诛宦官为名至于盗贼之兴由百姓饥寒饥寒之源由牧守贪浊牧守之横由中常侍私人典据州郡傳燮所谓衅起萧墙而祸延四海与陶言正相发明也夫患常积于忽微苟及时补救犹可转祸为福而亡国之君臣安危利菑如燕雀处堂苟延日夕虽有忠臣直士痛哭流涕于其前不厌为迂濶则斥为诽谤秦隋之季羣盜蠭起赵高虞世基故为大言慰藉两主皆深信不疑宁独一汉灵哉陶所陈西羌事势本末深切着明而宦官且曰州郡不上陶何缘知前此张角正坐州郡讳言遂酿其祸覆车不远莫之省忧下则巧言如流上则辟言不信颂雨无正七章未尝不太息于败亡之相寻千古一轍也抑考陶之言曰国安则臣蒙庆国危则臣亦先亡盖系心宗室不忍同谈笑于越人是以危言深论至于再三以冀幸君之一悟而谗谄蔽明忠信得罪本实拨而枝叶亦因以害矣

卷十六

<史部,传记类,总录之属,史传三编

钦定四库全书

史传三编卷十六

大学士朱轼撰

名臣传八

汉

陈蕃 竇武

陈蕃字仲举汝南平舆人也祖河东太守蕃年十五尝闲处一室而庭宇芜秽父友同郡薛勤来候之谓蕃曰孺子何不洒扫以待宾客蕃曰大丈夫处世当扫除天下安事一室乎勤知其有清世志甚奇之初仕郡举孝廉除郎中遭母忧弃官行丧服阕刺史周景辟别驾从事以谏争不合投传而去後公府辟举方正皆不就太尉李固表荐徵拜议郎再迁为乐安太守时李膺为青州刺史名有威政属城闻风皆自引去蕃独以清绩留郡人周璆高洁之士前後郡守招命莫肯至唯蕃能致焉字而不名特为置一榻去则悬之民有赵宣葬亲而不闭埏隧因居其中行服二十余年鄉邑称孝州郡数礼请之郡内以荐蕃蕃与相见问及妻子而宣五子皆服中所生蕃大怒曰圣人制礼贤者俯就不肖企及且祭不欲数以其易黷故也况乃寝宿塚藏而孕育其中诳时惑衆诬污鬼神乎遂致其罪大将军梁冀威震天下时遣书诣蕃有所请托不得通使者诈求谒蕃怒答杀之坐左迁修武令稍迁拜尚书时零陵桂阳山贼为害公卿议遣讨之又诏下州郡一切皆得举孝廉茂才蕃上疏驳之曰良民为寇皆所在贪虐使然宜严勅三府隐核牧守令长其有在政失和侵暴百姓者即便举奏更选清贤奉公之人能班宣法令情在爱惠者可不劳王师而羣贼弭息矣又三署郎吏二千余人三府掾属过限未除但当择善而授之简恶而去之岂烦一切之诏以长请属之路乎以此忤左右故出为豫章太守性方峻不接宾客吏民亦畏其高徵为尚书令送者不出郭门迁大鸿胪会白马令李云抗疏諫桓帝怒当伏重诛蕃上书救云坐免归田里复徵拜议郎数日迁光禄勋时封赏踰制内宠猥盛蕃乃上疏諫曰臣闻有事社稷者社稷是为有事君人者容悦是为今臣蒙恩备位九列见非不谏则容悦也夫诸侯上象四七下应分土高祖之约非功臣不侯今追录河南尹邓万世父遵之微功更爵尚书令黄儁先人之絶封近习以非义授邑左右以无功传赏至乃一门之内侯者数人故纬象失度陰阳谬序稼用不成民用不康臣知封事已行言之无及诚欲陛下从是而止又比年收敛十伤五六万人饥寒而采女数千食肉衣绮脂油粉黛不可货计鄙谚云盗不过五女门今後宫之女岂不贫国乎且聚而不御必生悲感以致并隔水旱之困夫

狱以禁止奸违官以称才理物若法亏于平官失其人则王道有缺而令天下皆谓狱由怨起爵以贿成陛下宜采求得失择从忠善尺一选举委尚书三公使褒责诛赏各有所归岂不幸甚帝颇纳其言为出宫女五百余人但赐僇爵关内侯而万世南乡侯延熹六年车驾幸广城校猎蕃上疏极谏不纳自蕃为光禄勋与五官中郎将黄琬共典选举不偏权富而为势家郎所譖诉坐免归顷之徵为尚书仆射转太中大夫八年代杨秉为太尉蕃让曰不愆不忘率由旧章臣不如太常胡广齐七政训五典臣不如议郎王畅聪明亮达文武兼资臣不如弛刑徒李膺帝不许中常侍苏康管霸等复被任用排忠良大司农刘佑廷尉冯緄河南尹李膺皆以忤旨抵罪蕃因朝会固理膺等请加原宥升之爵任言及反覆诚词恳切帝不听因流涕而起时小黄门赵津南阳大猾张泛等奉事中官乘势犯法二郡太守刘瓚成瑨考案其罪虽经赦令而并竟考杀之宦官怨恚有司承旨遂奏瓚瑨罪当弃市又山阳太守翟超没入中常侍侯览财产东海相黄浮诛杀下邳令徐宣超浮并坐髡钳输作左校蕃与司徒刘矩司空刘茂共谏请瓚瑨超浮等帝不悦有司劾奏之矩茂不敢复言蕃乃独上疏曰臣闻寇贼在外四支之疾内政不理心腹之患陛下超从列侯继承天位诚不爱己独不念先帝得之勤苦耶前梁氏五侯毒徧海内天启圣意收而戮之而近习之权复相扇结小黄门赵津大猾张汜等肆行贪虐奸媚左右前太原太守刘瓚南阳太守成瑨纠而戮之虽言赦後不当诛杀原其诚心在乎去恶至于陛下有何愾愾而小人道长营惑圣听遂使天威为之发怒过谪已甚况乃重罚令伏欧刃乎又前山阳太守翟超东海相黄浮奉公不挠疾恶如讐超没侯览财物浮诛徐宣之罪并蒙刑坐昔丞相申屠嘉召责邓通洛阳令董宣折辱公主而文帝从而请之光武加以重赏未闻二臣有专命之诛陛下深宜割近习豫政之源引纳尚书朝省之事简练清高斥黜佞邪如是天和于上地洽于下休徵符瑞岂远乎哉帝得奏愈怒竟无所纳瓚瑨竟死狱中朝廷衆庶莫不怨之宦官由此疾蕃弥甚选举奏议辄以中诏譴郤长吏以下多至抵罪犹以蕃名臣不敢加害九年李膺等以党事下狱考实蕃因上疏极谏曰臣闻贤明之君委心辅佐亡国之主讳闻直词伏见前司隶校尉李膺太仆杜密太尉掾范滂等正身无玷死心社稷以忠忤旨横加考案或禁锢闭隔或死徙非所杜塞天下之口聋盲一世之人与秦焚书阬儒何异人君者举动不可以违法进退不可以离道谬言出口乱及八方何况髡无罪于狱杀无辜于市乎又青徐炎旱民物流迁而国用尽于纨罗外戚私门贪财受赂所谓禄去公室政在大夫昔春秋之末周室衰微数十年间无复灾眚者天所弃也天之于汉恨恨无已故殷勤示变以悟陛下除妖去孽实在修德臣位列台司忧深责重不敢尸禄惜生坐观成败如蒙采录使身首分裂所不恨也帝讳其言切托以辟召非人策免之永康元年窦后临朝以蕃为太傅录尚书事时新遭大丧国嗣未立诸尚书畏惧权官托病不朝蕃以书责之曰古人立节事亡如存今帝祚未立政事日蹙诸君奈何委荼蓼之苦息偃在床于义不足焉得仁乎诸尚书惶怖皆起视事灵帝即位窦太后复诏封蕃高阳侯蕃上疏辞太后不许蕃复固让章前後十上竟不受封初桓帝欲立所幸田贵人为皇后蕃以田氏卑微窦族良家争之甚固帝不得已乃立窦后及后临朝故委用于蕃蕃与后父大将军窦武同心尽力徵用名贤共参政事天下之士莫不延颈想望太平而帝乳母赵娆旦夕在太后侧中常侍曹节王甫等与共交构谄事太后太后信之数出诏命有所封拜及其支类多行贪虐蕃常疾之志诛中官会窦武亦有谋蕃自以既从人望而德于太后必谓其志可申乃先上疏言侯览曹节公乘听王甫郑?等与赵夫人诸女尚书并乱天下附从者升进忤逆者中伤陛下前始摄位顺天行诛苏康管霸并伏其辜奈何数月复纵左右元恶大奸莫此之甚今不急诛必生变乱倾危社稷其祸难量愿出臣章宣示

左右并令天下诸奸知臣疾之太后不纳朝廷闻者莫不震恐蕃因与窦武谋之武不即以时收杀而须考竟其词事遂泄曹节等因矫诏诛武蕃时年七十余闻难作将官属诸生八十余入并拔刃突入承明门攘臂呼曰大将军忠以卫国黄门反逆何云窦氏不道耶王甫使剑士收蕃蕃拔劔叱甫兵不敢近乃益人围之数重遂执蕃送黄门北寺狱黄门从官骆蹋蹴蕃曰复能损我曹员数夺我曹禀假不即日害之徙其家属于比景宗族门生故吏皆斥免禁锢蕃友人陈留朱震时为铨令闻而弃官哭之收葬蕃尸匿其子逸于甘陵界中事觉系狱合门桎梏震受拷掠誓死不言故逸得免後大赦党人乃追还逸官至鲁相

窦武字游平扶风平陵人少以经行著称教授大泽中不交时贵名显关西延熹八年长女选入掖庭桓帝以为贵人拜武郎中冬立为皇后封武槐里侯明年拜城门校尉在位多辟名士清身疾恶礼赂不通妻子衣食裁充足而已得两宫赏赐悉散与太学诸生及载肴粮于道施贫民时宦官专宠李膺杜密等为党事考逮武上疏切谏其畧曰陛下即位以来未闻善政常侍黄门续为祸虐欺罔譎诈妄爵非人朝政日衰奸臣日强臣恐二世之难必将复及赵高之变不朝则夕近者牢修造设党议遂收前司隶校尉李膺太仆杜密御史中丞陈翔太尉掾范滂等逮考连及数百人旷年拘录事无効验臣惟膺等建忠抗节志经王室此诚陛下稷契伊吕之佐而虚为奸臣贼子之所诬枉天下寒心海内失望惟陛下留神澄省时见理出以厌人鬼喁喁之心臣闻古之明君必须贤佐以成政道今台阁近臣陈蕃胡广朱?荀琨刘佑魏朗刘矩尹勲等皆国之贞士朝之良佐尚书郎张陵劬皓苑康杨乔边韶戴恢等明达国典羣才并列而陛下委任近习专树鬻鬻外典州郡内干心膺宜以次贬黜案罪纠罚抑夺宦官欺国之封按其无状诬罔之罪信任忠良平决臧否使邪正毁誉各得其所咎徵可消天应可待间者有嘉禾芝草黄龙之见夫瑞生必于嘉士福至实由善人在德为瑞无德为灾陛下所行不合天意不宜称庆书奏因以病上还城门校尉槐里侯印绶帝不许有诏原李膺杜密等自黄门北寺若卢都内诸狱系囚罪轻者皆出之其冬帝崩无嗣武召侍御史刘儵参问王子侯贤者入白太后徵立解渎亭侯宏是为灵帝拜武大将军常居禁中更封闻喜侯子机兄子绍靖皆为侯武既辅朝政常有诛翦宦官之意太傅陈蕃亦素有谋时共会朝堂蕃私谓武曰中常侍曹节王甫等自先帝时操弄国柄浊乱海内今不诛後必难图武深然之于是引同志尹勲为尚书令刘瑜为侍中冯述为屯骑校尉又徵天下名士废黜者李膺杜密刘猛朱?等列于朝廷请前越隲太守荀昱为从事中郎辟颍川陈寔为属共定计策于是天下雄俊知其风旨莫不延颈企踵思奋其智力会五月日食蕃说武曰昔萧望之困一石显近者李杜诸公祸及妻子况今石显数十辈乎今可且因日食斥罢宦官以塞天变又赵夫人及女尚书旦夕乱太后急宜退絶惟将军虑焉武乃白太后欲尽诛废宦官等太后曰汉家故事世有但当诛其有罪岂可尽废邪时中常侍管霸颇有才畧专制省内武先白诛霸及苏康等竟死复数白诛曹节等太后犹豫未忍至八月太白出西方刘瑜上书太后言占应宫门当闭将相不利奸人在主傍愿急防之又与武蕃书以星辰错缪不利大臣宜速断大计武乃奏免黄门令魏彪以山水代之使水奏数狡猾无状者郑?送北寺狱蕃谓武曰此曹子便当收杀何复考为武不从令水与尹勲祝璫杂考?词连节甫乃奏收节等使刘瑜内奏时武出宿归府典中书者先以告长乐五官史朱瑀瑀盗发武奏骂曰中官放纵者自可诛耳我曹何罪而当尽见族灭因大呼曰陈蕃窦武奏白太后废帝为大逆乃夜召所亲壮健者十七人唾血共盟诛武等曹节白帝曰外间切切请出御德阳前殿令帝拔剑踊跃使乳母赵娆拥卫左右取槃信闭诸禁门召尚书官属

胁以白刃使作诏板拜王甫为黄门令持节至北寺狱收尹勲山冰冰疑不受诏驰击杀之遂害勲出郑?还共劫太后夺玺书收捕武等武不受诏驰入步兵营与兄子绍共射杀使者召会北军五校士数千人屯都亭下令军士曰黄门常侍反尽力者封侯重赏诏周靖张奂讨武等王甫将虎贲羽林军千余人与奂等合明旦悉军阙下与武对阵至食时武绍败走诸军追围之皆自杀收武宗亲宾客姻属悉诛之及刘裕冯述皆夷其族徙武家属日南迁太后于云台武府掾胡腾独殡斂行丧坐以禁锢武孙辅年二岁逃窜腾及令史张敞脱之得全

後汉书论曰桓灵之世若陈蕃之徒咸能树立风声抗论愾俗而驱驰嶮厄之中与刑人腐夫同朝争衡终取灭亡之祸者非彼不能絜情志违埃雾也愍夫世士以离俗为高而人伦莫相恤也以遯世为非义故屡退而不去以仁心为己任虽道远而弥厉及遭际会協策竇武自谓万世一遇也凛凛乎伊望之业矣功虽不终然其信义足以攜持民心汉世乱而不亡百余年间数公之力也

论曰东汉之末宦竖窃弄神器敢行暴虐天下莫不痛心疾首蕃以耆德硕望武以后父且贤思扫除君侧以还清明而机事一泄重遭其毒岂谋之不臧乎太白入犯太微大臣不利天变告于上矣张奂新至不知本谋至为节甫所卖人事舛于下矣固知四百年之运将终而炎精已灰不可复燃也厥後何进踵之卒以其身与宦竖同尽而汉鼎旋移语曰痈疽既溃大命随之不其信哉

李膺

李膺字元礼颍川襄城人也祖父修太尉父益赵国相膺性简亢无所交接唯以同郡荀淑陈寔为师友举孝廉为司徒胡广所辟举高第再迁青州刺史守令畏威明多望风弃官再迁渔阳太守寻转蜀郡太守修庠序设条教明法令威恩并行珍玩不入於门朝廷举能理剧转乌桓校尉鲜卑数犯塞膺常蒙矢石身被创痍拭血进战每破走之贼甚惮慑以公事免官迁居纶氏教授常千人南阳樊陵求为门徒膺谢不受陵後以阿附宦官致位太尉为节志者所羞荀爽常就谒膺因为其御既还喜曰今日乃得御李君矣其见慕如此永壽二年鲜卑寇云中桓帝闻膺能乃复徵为度辽将军先是羌衆及疏勒龟兹数出攻钞张掖酒泉诸郡屡被其害膺到皆望风惧服先所掠男女悉送还塞下自是声振远域徵拜河南尹时宛陵大姓羊元羣罢北海郡臧罪狼籍膺表欲按其罪元羣行赂宦?膺反坐输作左校初膺与廷尉冯緄大司农刘佑等共同心志纠罚奸幸緄佑时亦得罪输作司隶校尉应奉抗疏表其忠节録其功勲乃悉免其刑再迁复拜司隶校尉时张让弟朔为野王令贪残无道畏膺威严逃还京师匿於让第舍合柱中膺率吏卒破柱取朔付狱受词毕即杀之让诉冤帝召膺诘以不先请便加诛辟之意膺对曰昔仲尼为鲁司寇七日而诛少正卯今臣到官已积旬私虑以稽留为愆不意获速疾之罪诚自知衅责死不旋踵乞留五日克殄元恶退就鼎鑊始生之愿也帝乃顾让曰此汝弟之罪司隶何愆自此诸宦官皆鞠躬屏气休沐不敢出宫省帝问其故并叩头泣曰畏李校尉时朝廷日乱纲纪颓弛膺独持风裁以声名自高士有被容接者名为登龙门及遭党事当考实膺等案经三府太尉陈蕃却之曰今所考案皆海内人誉忧国公忠之臣此等犹将十世宥也岂有罪名不彰而致收掠者乎不肯平署帝愈怒遂下膺等於黄门北寺狱膺等颇

引宦官子弟宦官多惧请帝以天时宜赦膺得免归居阳城山中天下士大夫皆高尚其道而污秽朝廷及陈蕃免太尉朝野属意於膺荀爽恐其名高致祸欲令屈节以全乱世为书贻曰久废过庭不闻善诱知以直道不容於世悦山乐水家於阳城道近路夷当即聘问不谓夷之初旦明而未融虹蜺扬辉弃和取同方今天地气闭大人休否智者见险投以远害虽匱人望内合私愿愿怡神无事偃息衡门与时俯仰顷之帝崩陈蕃为太傅与窦武谋诛宦官故引用天下名士乃以膺为长乐少府及陈蕃之败膺等复废後张俭事起收捕鉤党乡人谓膺曰可去矣对曰事不辞难罪不逃刑臣之节也吾年已六十死生有命去将安之乃诣诏狱考死阳城杜密素与李膺名行相次先为代郡泰山太守及北海相宦官子弟为令长有奸恶者辄捕案之後官至太仆党事作亦同死焉时人谓之李杜初河内张成善说风角推占当赦遂教子杀人膺时为河南尹督促收捕既而逢宥获免膺竟案杀之成以方伎交通宦官帝亦颇谄其占成弟子牢修因上书诬告膺等共为部党诽讪朝廷疑乱风俗词所连及二百余人党祸实始此云

论曰东汉延熹永康间大往小来阳外陰内易曰君子以俭德辟难不可荣以禄垂戒至深远矣当此之时即括囊肥遯犹惧不免顾不处於南山之南北山之北以弢光隐曜而互相标榜敢行幸直立的於此使人得以弯弓相向君子高其节不得不哀其志也至夫孔融弟争兄死范滂母欢子义景毅以子为膺门徒自表免归皇甫规以西州豪杰耻不与党上书自言宜坐虽义声感慨足以立懦廉顽然揆诸守死善道之常经母乃已激乎读元礼孟博诸传乃益服郭有道陈太丘二公之弘识雅量为不可及也

傅燮

傅燮字南容北地灵州人也本字幼起慕南容三复白圭乃易字焉身長八尺有威容少师事太尉刘寛再举孝廉闻所举郡将丧乃弃官行服後为护军司马与左中郎将皇甫嵩俱讨张角燮素疾中官既行因上疏曰臣闻天下之乱不由於外皆兴於内今张角起於赵魏黄巾乱於六州皆由衅发萧墙而祸延四海者也臣受戎任始到颍川战无不克黄巾虽盛不足为庙堂忧惟陛下仁德寛容致阹弄权忠臣不进诚使张角梟夷黄巾变服臣之所忧甫益深耳夫邪正不宜共国犹冰炭不可同器彼知正人之功显皆将巧词饰说共长虚伪若不详察忠臣必复有杜邰之戮陛下宜速诛谗佞善人思进奸凶自息国之福也书奏宦者赵忠见而忿恶及破张角燮功多当封忠诉譖之灵帝犹识燮言得不加罪竟亦不封以为安定都尉以疾免後拜议郎会西羌反边章韩遂作乱徵发天下赋役无已司徒崔烈以为宜弃凉州诏会公卿百官议烈坚执前言燮厉言曰斩司徒天下乃安尚书劾奏帝召问状燮对曰昔冒顿至逆也樊哙为上将愿得十万衆横行匈奴愤激思奋未失人臣之节季布犹曰哙可斩也凉州天下要冲国家藩卫高祖定陇右世祖置四郡议者以为断匈奴右臂今牧御失和使一州叛逆海内骚动烈为宰相不思所以弭之之策乃欲割弃一方万里之土此社稷深忧也帝从燮议由是朝廷重其方格每公卿有缺为衆议所归顷之赵忠为车骑将军诏忠讨论黄巾之功执金吾甄举谓忠曰傅南容前在东军有功不侯天下失望将军宜进贤理屈以副衆心忠乃遣其弟延致殷勤於燮曰南容少答我常侍万户侯不足得也燮正色拒之曰遇不遇命也有功不论时也傅燮岂求私赏哉忠愈怀恨然憚其名不敢害权贵亦多疾之竟出为汉阳太守初郡

将范津名知人举燮孝廉及津为汉阳与燮交代合符而去乡人荣之燮善恤人畔羌怀其恩化并来降附乃广开屯田列置四十余营时凉州刺史耿鄙委任治中程球球通奸利士民怨之中平四年鄙率六郡兵讨金城贼王国韩遂等燮知鄙必败谓曰使君统政日浅民未知教贼闻大军将至必万人一心其锋难当不若息军养德明赏必罚贼得宽挺必谓我怯羣恶争势其离可必然後率已教之人讨已离之贼功可坐而待也鄙不从行至狄道别驾反应贼杀球及鄙贼遂进围汉阳城中兵少粮尽燮犹固守时北骑数千随贼攻郡皆夙怀燮恩共於城外叩头求送燮归乡里燮子干年十三从在官知燮素刚不能屈进谏曰国家昏乱遂令大人不容於朝今天下已叛而兵不足以自守宜听其送归乡里徐俟有道而辅之言未终燮慨然而叹呼干小字曰别成汝知吾必死耶盖圣达节次守节吾遭世乱不能养浩然之志又欲食禄而避其难乎吾行何之汝有才智勉之勉之主簿杨会吾之程婴也干哽咽不复言左右皆泣下王国使故酒泉太守黄?说燮曰天下非复汉有府君宁有意为吾属师乎燮按剑叱?曰若剖符之臣反为贼说耶遂麾左右进兵临阵战歿諡曰壮节干知名仕至扶风太守

论曰汉廷公卿两议弃凉州而傅燮指陈利害暗与虞诩合伟哉英雄所见固略同也考後汉书燮与诩合传盖勲臧洪亦并列焉洪首建攻董卓之议登坛号衆词色激昂勲亦屡盛气陵卓且密劝皇甫嵩勒兵讨之然卒与嵩受徵入朝若乃勲弃左昌之怨闻檄赴援洪感张超之恩徒跣求救则勲又难於洪也方羣阉当国勲尝谋与刘虞袁绍共诛嬖幸及为京兆杨党恃父以贪赂则违贵戚之请而案其赃高望属子为孝廉终抗副主之命而黜其选其严气正性虽傅燮之於赵忠岂有过焉然当兵败见执听其送还何遂与前时木表之誓言相刺谬也臧洪临命慷慨庶几复见田横遗烈向使敌盟酸枣之日即劝超先进扫除贼卓以其死郡将者死国家不更义声凛凛哉比事观之傅南容加於人一等矣

皇甫规

皇甫规字威明安定朝那人与敦煌张奂然明武威段熲纪明并山西名将称凉州三明焉祖父梭度辽将军父旗扶风都尉永和六年西羌大寇三辅围安定征西将军马贤将兵击之不能克规虽在布衣见贤不恤军士审其必败寻而贤果为羌所没郡将知规有兵略乃命为功曹使率甲士八百与羌战有举起规上计掾其後羌衆大合攻烧陇西朝廷患之规乃上疏求自効曰羌戎溃叛皆因边将失於绥御乘常守安则加侵暴苟竞小利则致大害微胜则虚张首级军败则隐匿不言军士劳怨困於猾吏进不得快战以邀功退不得温饱以全命酋豪泣血惊惧生变是以安不能久叛则经年愿假臣屯列坐食之兵五千出其不意与护羌校尉赵冲共相首尾高可涤患下可纳降若谓臣年少官轻不足用凡诸败将非官爵之不高年齿之不迈也帝不能用冲帝立梁太后临朝规举贤良方正对策曰陛下摄政之初拔用忠贞远近翕然望见太平而地震之後日月不光旱魃为虐大贼纵横殆以奸臣权重之所致也其常侍尤无状者宜亟黜遣以答天戒大将军冀河南尹不疑宜增修谦节辅以儒术省去游娱不急之务割减庐第无益之饰夫德不称禄犹凿墉之址以益其高岂量力审功安固之道哉凡诸宿猾酒徒戏客亦宜贬斥以惩不轨令冀等深思得贤之福失人之累又在位素餐尚书怠职有司依违使陛下专受谄谀之言不闻户牖之外臣岂敢隐心以避诛责书奏梁冀忿其规已以为下第拜郎中托疾免归州郡承冀旨几陷死者再三遂以诗易教授门徒三百人後梁冀

诛旬月之间礼命五至皆不就时太山贼侵乱郡县特拜规太山太守规到官广设方畧寇盗悉平延熹四年秋叛羌零吾等与先零别种寇钞关中护羌校尉段熲坐徵规素悉羌事志自奋効乃上疏曰臣生长邠岐昔为郡吏再更叛羌预筹其事有误中之言愿乞冗官备单车一介之使劳来三辅宣国威泽以所悉地形兵势佐助诸军臣穷居孤危之中坐观郡将已数十年矣力求猛敌不如清平勤明孙吴未若奉法前变未远臣诚戚之是以越职尽其区区至冬羌遂大合三公举规为中郎将持节监关西兵讨零吾等击斩之先零诸种羌慕规威信相继降者十余万明年规因发其骑共讨陇右而道路隔絶军中大疫死者十三四规亲入庵庐巡视将士三军感悦东羌遂遣使乞降凉州复通先是凉之诸牧守皆倚恃权贵不遵法度规到州悉条奏其贪暴杀降与老弱不任职者或免或诛羌人闻之翕然反善沈氏大豪等十余万口复诣规降规出身数年拥衆立功还督乡里既无它私惠而多所举奏又恶絶宦官不与交通於是遂共诬规货赂羣羌令其文降璽书诮让规惧不免上疏自讼曰四年之秋戎车西侵旧都惧骇明诏不以臣愚弩急使军就道幸蒙威灵遂振国命所省之费一亿以上以为忠臣之义不敢告劳故耻以片言自及微效前践州界奏郡守孙儁等五人支党半国其余墨绶小吏所连及者复有百余吏托报将之怨子思复父之耻交构豪门竞流谤讟云臣私报诸羌售以钱货若臣以私财则家无担石如物出於官则文簿易考就臣愚惑信如言者前世尚遗匈奴以宫姬镇乌孙以公主今臣但费千万以怀畔羌何罪之有自永初以来将出不少覆军有五动资巨亿有旋车完封写之权门而名成功立厚加爵封今臣还督本土紕举诸郡衆谤陰害固其宜也传称鹿死不择音谨冒昧畧上帝乃徵规还拜议郎论功当封而中常侍徐璜左悺数从求货规不答遂陷以前事下吏官属欲赋敛请谢规誓而不听遂以余寇不絶论输左校诸公及太学生张凤等三百余人诣阙讼之会赦归家徵拜度辽将军至营数月上书荐中郎将张奂才畧兼优宜正元帅以从衆望愚臣愿乞冗官以为奂副朝廷从之及奂迁大司农规复代为度辽将军规自以连在大位欲退身避第数上病不见听会友人上郡太守王旻丧还规缟素越界至下亭迎之因令客密告并州刺史胡芳言规违禁擅远军营当即举奏芳曰威明欲避第仕途故激发我耳吾当为朝廷爱才何能申此子计耶及党事起名贤多见染逮规自以西州豪杰耻不得与乃先自上言臣前荐大司农张奂是附党也太学生张凤等上书讼臣是为党人所附也臣宜坐朝廷卒不问时人以规为贤在事数岁北边威服永康元年徵为尚书会日食诏公卿举贤良方正下问得失规对曰陛下八年之中三断大狱一除内嬖再诛外臣而灾异数见人情未安者殆贤愚进退威刑所加有非其理也前太尉陈蕃刘矩忠谋高世废在里巷刘佑冯緄赵典尹勲正直多怨流放家门李膺王暢孔翊洁身守礼终无宰相之阶至起鈎党之衅虐贤伤善哀及无辜而羣臣鉴畏前害莫肯正言愿陛下容受謇直则前责可弭後福必降对奏不省迁规弘农太守封壽成亭侯让不受转护羌校尉熹平三年以疾召还卒年七十一初规以度辽将军解官归安定乡人有以货得鴈门太守者亦去职还家书刺谒规规卧不迎既入而问卿前在郡食鴈美乎有顷又白王符在门规遽起衣不及带屣履而迎援符手还入同坐极欢时人语曰徒见二千石不如一缝掖又为太守时汉阳赵壹道经弘农过候规门者不即通遂遁去门吏以白规闻壹名大惊乃遣主簿追书谢曰蹉跎不面企德怀风虚心委质为日久矣侧闻仁者愍其区区冀承清诲以释遥怀今旦外白有一尉两计吏不道屈尊门下更啓乃知已去如印绶可投夜岂待旦惟君明献平其夙心事在悖惑不足具责倘可原察何福如之壹答书不顾而去其好善下贤如此规所着赋铭碑赞书檄牋记等文凡二十七篇

论曰凉州三明并树功边境威信徧於羌陇之间免规文学极博颀武功又显然陈寔之举免为阉竖所欺致使忠烈殒命虽辞爵谢咎噬脐何及颀党附宦官又以输货致台辅独规保全身名无瑕衅可摘虽曰福命亦其智意足以自卫也其後规兄子嵩与会稽朱儁皆以忠勇之略荡平羣寇勲在王室无有二心然嵩拒梁?之说不讨董卓而就徵至遭董卓窘辱儁违陶谦之议不讨催汜而就徵遂为郭汜所留守常有余而定变不足范史谓其舍格天之大业蹈匹夫之小谅卒狼狽虎口为智士笑岂过论哉

王允

王允字子师太原祁人也同郡郭林宗尝见而奇之曰王生一日千里王佐才也遂与定交年十九为郡吏时小黄门晋阳赵津贪横放恣为一县巨患允讨捕杀之而津兄弟谄事宦官因缘潜诉桓帝震怒徵太守刘瓚下狱死允送丧还平原终毕三年然後归家复还仕郡人有路佛者少无名行而太守王球召以补吏允犯顔固争球怒收允欲杀之刺史邓盛闻而驰传辟为别驾从事允由是知名而路佛以之废弃允少好大节有志于立功常习诵经传朝夕试驰射三公竝辟以司徒高第为侍御史中平元年拜豫州刺史辟荀爽孔融等为从事上除禁党讨击黄巾别帅大破之受降数十万于贼中得中常侍张让宾客书疏与黄巾交通允具发其奸以状闻灵帝责怒让让叩头陈谢竟不能罪之让因挟忿以事中允徵下狱会赦还复刺史旬日间复以他罪被捕司徒杨赐以允素高不欲使更楚辱遣客使自为计又诸从事好气决者共流涕奉药进之允厉声曰吾为人臣获罪于君当伏大辟以谢天下岂有乳药求死乎投杯而起出就檻车既至廷尉左右皆促其事大将军何进太尉袁隗司徒杨赐共疏请之曰夫内视反聪则忠臣竭诚寛贤矜能则义士厉节是以孝文纳冯唐之说晋悼宥魏绛之罪允受命诛逆曾未期月州境肃清方欲列其庸勲请赏而以奉事不当当肆大戮责轻罚重有亏衆望书奏得以减死论是冬大赦而允独在不宥三公咸复为言至明年乃得解释是时宦者横暴睚眦触死允惧不免乃变易名姓转侧河内陈留间及帝崩乃奔丧京师时何进谋诛宦官召允共事请为从事中郎转河南尹献帝初平元年拜司徒及董卓迁都关中允悉收敛兰台石室图书秘纬要者以从既至长安皆分别条上又集汉朝旧事所当施用者一皆奏之经籍具存允有力焉时董卓尚留洛阳朝政悉以委允允矫情屈意每相承附卓亦推心不生乖疑故得扶持王室于危乱之中臣主内外莫不倚恃焉允见卓篡逆已兆密与司隶校尉黄琬尚书郑公业等谋共诛之乃上护羌校尉杨瓚行左将军事执金吾士孙瑞为南阳太守并将兵出武关道以讨袁术为名实欲分路征卓而後迎天子还洛阳卓疑而留之允乃引内瑞为仆射瓚为尚书三年春连雨六十余日允与士孙瑞杨瓚登台请霁复结前谋瑞言星变甚亟内发者胜几不可缓公其图之允然其言乃潜结卓将吕布使为内应时卓加太师位在诸侯王上弟旻兄子璜皆为将军典兵事宗族内外并居列位其子孙虽在髫髻男皆封侯女为邑君结垒于长安城东筑坞于郿高厚七丈号曰万岁坞积谷为三十年储自云事成据雄天下不成守此足以毕老数与百官宴会淫乐诛杀断斩自由以天变杀卫尉张温校尉伍孚刺卓不就为所杀三年四月帝病新愈大会未央殿卓朝服升车陈兵夹道自垒及宫左步右骑屯卫周币令吕布等扞卫前後允乃与士孙瑞密表其事使瑞自书诏以授布令骑都尉李肃与布同心勇士十余人伪着卫士服于北掖门内以待卓卓将至马惊不行怪惧欲还吕布劝令进遂入门肃以戟刺之卓衷甲不入伤臂坠车顾大呼曰吕布何在布曰有诏讨贼臣卓大骂布

应声持矛刺卓趣兵斩之驰齎赦书以令宫陛内外士卒皆称万岁百姓歌舞于道市酒肉相庆者填满街肆使皇甫嵩攻卓弟旻于郿坞杀其母妻男女尽灭其族尸卓于市然火置脐中光明达曙诸袁门生又聚董氏之尸焚灰扬之于路坞中珍藏有金二三万筋银八九万筋锦绮纨素珍玩积如丘山允初议赦卓部曲吕布亦数劝之既而疑曰此辈名为恶逆而特赦之适足使其自疑非所以安之也布欲以卓财物班赐公卿将校允又不从而素轻布以剑客遇之布亦负其功劳多自夸伐既失意望渐不相平允性刚疾恶初惧董卓故折节图之卓既灭自谓无复患难及在际会每乏温润之色仗正持重不循权宜之计是以羣下不甚附之董卓将校及在位者多凉州人允议罢其军百姓讹言当悉诛之遂转相恐动其在关中者皆拥兵自守更相谓曰丁彦思蔡伯喈但以董公亲厚并尚从坐今既不赦我曹而欲解兵今日解兵明日当复为鱼肉矣卓部曲将李傕郭汜等先将兵在关东因不自安遂合谋为乱攻围长安城陷吕布招允去之允曰若蒙社稷之灵上安国家吾之愿也如其不获则奉身以死之朝廷幼少恃我而已临难苟免吾不忍也努力谢关东诸公勤以国家为念初允以同郡宋翼为左冯翊王宏为右扶风是时三辅民庶炽盛兵谷富实李傕等欲即杀允惧二郡为患乃先徵翼宏下廷尉并允杀之允时年五十六长子侍中盖次子景定及宗族十余人皆见诛害天子感恻百姓丧气莫敢收允尸者唯故吏平陵令赵戩弃官营丧其後帝思允忠节使改殡葬之遣官吊祭送还本郡封其孙黑为安乐亭侯後汉书论曰士虽以正立亦以谋济若王允之推董卓而引其权伺其间而敝其罪当此之时天下悬解矣而终不以猜忤为衅者知其本于忠义之诚也故推卓不为失正分权不为苟冒伺间不为狙诈及其谋济意从则归成于正也

论曰太史公赞季布曰贤者诚重其死至栾布则曰不自重其死虽往古烈士何以加一篇之中先後互异何欤自古皆有死或轻于鸿毛或重于泰山在得其所而已当宦?诬害之时诸君子咸劝允自裁而宁甘楚辱至转侧逃亡仅得以免及催汜称兵犯阙意气凶凶虽吕布之勇犹先时遁去独允毅然不回以死殉国其始不为婢妾贱人感慨无复之之态其後复不为庸夫懦子全躯保妻子之行可谓得死所矣贤者固不可测曩之委曲周全者乃爱其死以有待也

卷十七

钦定四库全书

史传三编卷十七

大学士朱轼撰

名臣传九

汉

诸葛亮

诸葛亮字孔明琅邪阳都人也汉司隶校尉诸葛丰之後父珪字君贡汉末为太山郡丞亮早孤与弟均随其从父依刘表荆州从父卒家于南阳之邓县号曰隆中躬耕陇亩建安初与颍川石广元徐元直汝南孟公威等游学三人务精熟而亮独观大畧每晨夜从容抱膝长啸而谓三人曰卿三人仕进可至刺史郡守也三人问其所至亮笑而不言好为梁父吟身長八尺常自比管仲乐毅时人莫之许也惟崔州平徐庶谓为信然时昭烈屯新野见徐庶甚器之庶因谓昭烈曰诸葛孔明者卧龙也将军岂愿见之乎昭烈曰君与俱来庶曰此人可就见不可屈致也将军宜枉驾见之昭烈由是诣亮三往乃见因屏人曰汉室倾颓奸臣窃命孤不度德量力欲信大义于天下而智术浅短遂用猖獗至于今日然志犹未已君谓计将安出亮答曰今曹操已拥百万之衆挟天子以令诸侯此诚不可与争锋孙权据有江东已历三世国险而民富贤能为之用此可与为援而不可图也荆州北据汉沔利尽南海东连吴会西通巴蜀此用武之国而其主不能守殆天所以资将军也益州险塞沃野千里天府之土刘璋闇弱张鲁在北民殷国富而不知存恤智能之士思得明君将军既帝室之胄信义着于四海若跨有荆益保其岩阻西和诸戎南抚夷越外结孙权内修政理天下有变则命一上将将荆州之军以向宛洛将军身帅益州之衆出于秦川百姓孰敢不箪食壶浆以迎将军者乎诚如是则霸业可成汉室可兴矣昭烈曰善于是与亮情好日密关公与飞等不悦昭烈解之曰孤之有孔明犹鱼之有水也愿诸君勿复言关张乃止刘表长子琦亦深器亮表受後妻之言爱少子琮不悦于琦琦与亮谋自安之术亮辄不对後乃将亮上高楼去梯谓曰今日可以言未亮答曰君不见申生在内而危重耳在外而安乎琦感悟会黄祖死遂自求代得出为江夏太守俄而表卒琮闻曹操来伐遣使以州降昭烈在樊因率衆南奔为操所追破进至夏口亮曰事急矣请奉命求救于孙将军时权拥军在柴桑观望成败亮说权曰海内大乱将军起兵江东刘豫州收衆汉南与曹操并争天下今操芟夷大难畧已平矣遂破荆州威震四海英雄无用武之地故豫州遁逃至此愿将军量力而处之若能以吴越之衆与中国抗衡不如早与之絶如果不能何不按兵束甲北面而事之今将军外托服从之名内怀犹豫之计事急而不断祸至无日矣权曰苟如君言刘豫州何不遂事之乎亮曰田横齐之壮士耳犹守义不辱况豫州王室之胄

英才盖世衆士慕仰如水归海若事之不济此乃天也安能复为之下权勃然曰吾不能举全吴之地十万之衆受制于人吾计决矣非刘豫州莫可以当曹操者然豫州新败安能抗此难乎亮曰豫州兵虽败于长坂今战士还者及关羽水军精甲万人刘琦合江夏战士亦不下万人操衆远来疲敝闻追豫州轻骑一日一夜行三百里此所谓强弩之末不能穿鲁缟者也故兵法忌之曰必蹶上将军且北方之人不习水战又荆民附操者偪兵势耳非心服也将军诚能命猛将统兵数万与豫州协规同力破操军必矣操军破必北还如此则荆吴之势强鼎足之形成矣成败之机在于今日权大悦即遣周瑜等水军三万随亮诣昭烈并力拒操败之于赤壁操引军归邳昭烈遂收江南以亮为军师中郎将使督零陵桂阳长沙三郡调其赋税以充军实建安十六年益州牧刘璋遣法正迎昭烈使击张鲁亮与关公镇荆州昭烈自葭萌还攻璋亮与张飞赵云等率衆泝江分定郡县与昭烈共围成都事平进亮军师将军署左将军府事昭烈外出亮常镇守成都足食足兵昭烈之攻张合于汉中也急书发益州兵亮以问从事杨洪洪曰汉中益州咽喉无汉中即无蜀矣发兵何疑时法正从昭烈北行亮即表洪领蜀郡太守衆事皆办初犍为太守李严辟洪为功曹严未去犍为而洪已为蜀郡洪举门下书佐何祗有才策洪尚在蜀郡而祗已为广汉太守是以西土咸服亮能尽时人之器用也建安二十六年昭烈即帝位以亮为丞相录尚书事领司隶校尉亮治蜀号严明法正劝缓刑弛禁以慰人望亮曰此州自刘璋以来德政不举威刑不肃宠之以位位极则贱顺之以恩恩竭则慢所以致敝实由于此今吾使法行则知恩爵加则知荣荣恩并济上下有节为治之要着矣章武三年春昭烈在永安病笃召亮于成都属以後事谓亮曰君才十倍曹丕必能安国终定大事若嗣子可辅辅之如其不才君可自取亮涕泣曰臣敢不竭股肱之力效忠贞之节继之以死昭烈又为诏勅後帝曰勿以恶小而为之勿以善小而不为惟贤惟德可以服人汝父德薄不足效也汝与丞相从事事之如父建兴元年进封亮武乡侯事无巨细咸取决焉亮乃约官职修法制整戎旅工械伎巧物究其极科条严明赏罚必信作教与羣下曰夫参署者集衆思广忠益也若远小嫌难相违覆旷阙损矣违而得中犹弃敝屣而获珠玉然人心苦不能尽惟徐元直处兹不惑又董幼宰参署七年事有不至至于十反来相启告苟能慕元直之十一幼宰之殷勤则亮可少过矣又曰昔初交州平屡闻得失後交元直勤见启诲幼宰每言则尽伟度数有谏正虽资性鄙暗不能悉纳然与此数子终始好合亦足以明其不疑于直言也伟度者亮主簿胡济也亮尝自校簿书主簿杨顥亟谏以为为治有体上下不可相侵亮谢之及顥卒亮垂泣三日魏华歆王朗陈羣各有书与亮欲使举国称藩亮不答作正议曰昔在项羽起不由德虽处华夏秉帝者之势卒就汤镬为後永戒魏不审鉴今次之矣免身为幸戒在子孙而二三子各以耆艾之齿承伪旨而进书有若崇竦称莽之功亦将偪于元祸苟免者耶昔世祖创迹旧基奋羸卒数千摧莽强旅四十余万于昆阳之郊夫据道讨淫不在衆寡及至孟德以其譎胜之力举数十万之师救张合于阳平势穷虑悔仅能自脱辱其锋鋭之衆遂丧汉中之地深知神器不可妄获旋还未至感毒而死子桓淫逸继之以篡纵使二三子多逞苏张诡靡之说奉进驩兜滔天之词欲以诬毁唐帝讽解禹稷所谓徒丧文藻烦劳翰墨者矣夫大人君子之所不为也又军诫曰万人必死横行天下昔轩辕氏整卒数万制四方定海内况以数十万之衆据道而临有罪可得而干拟者哉遂遣使如吴约为与国二年领益州牧选用皆妙简旧德以秦宓为别驾杜微为主簿微已老耆而致之既至乞归亮以其重听于坐中与书曰曹丕称帝犹土龙刍狗之有名耳欲与诸贤因其邪伪以正道灭之君但当以德辅时不责君军旅何为汲汲求去拜微谏议大夫先是南中耆帅雍闓等以四郡叛亮以新遭大丧抚而不

讨务农殖谷闭门息民民安食足而後用之三年春乃率衆往讨时参军马谡送亮亮谓曰虽共谋之历年今可更惠良规谡曰南中恃其险远不服久矣虽今日破之明日复反耳今公方倾国北伐彼知官势内虚其叛亦速若殄尽遗类以除後患既非仁者之情且又不可仓卒也夫用兵之道攻心为上攻城为下愿公服其心而已亮纳其言至南中所在战捷斩雍闓及高定等有孟获者素为夷汉所服收余衆拒亮亮募生致之既得使观于营陈间获曰向者不知虚实故败今祇如此即易胜耳乃纵使更战七纵七禽而亮犹遣获获止不去曰公天威也南人不复反矣遂至滇池南中平皆即其渠率而用之或以谏亮亮曰若留外人即当留兵兵留则无所食一不易也加夷新伤破父兄死丧留外人而无兵必成祸患二不易也又夷素有废杀之罪自嫌衅重留外人终不相信三不易也今吾欲使不留兵不运粮而纲纪粗定夷汉粗安故耳于是悉收孟获等以为官属出其资财牛马器械供畊战之用国以富饶乃治戎讲武陰俟大举五年率诸军北驻汉中以图中原临发上疏曰先帝创业未半而中道崩殂今天下三分益州疲敝此诚危急存亡之秋也然侍卫之臣不懈于内忠志之士忘身于外者盖追先帝之殊遇欲报之于陛下也诚宜开张圣听以光先帝遗德恢弘志士之气不宜妄自菲薄引喻失义以塞忠谏之路也宫中府中俱为一体陟罚臧否不宜异同若有作奸犯科及为忠善者宜付有司论其刑赏以昭陛下平明之理不宜偏私使内外异法也侍中侍郎郭攸之费禕董允等此皆良实志虑忠纯是以先帝简拔以遗陛下愚以为宫中之事事无大小悉以咨之然後施行必能裨补阙漏有所广益将军向宠性行淑均晓畅军事试用于昔日先帝称之曰能是以衆议举宠为督愚以为营中之事事无大小悉以咨之必能使行阵和睦优劣得所亲贤臣远小人此先汉所以兴隆也亲小人远贤臣此後汉所以倾颓也先帝在时每与臣论此事未尝不叹息痛恨于桓灵也侍中尚书长史参军此悉忠良死节之臣愿陛下亲之信之则汉室之隆可计日而待也臣本布衣躬耕南阳苟全性命于乱世不求闻達于诸侯先帝不以臣卑鄙猥自枉屈三顾臣于草庐之中咨臣以当世之事由是感激遂许先帝以驱驰後值倾覆受任于败军之际奉命于危难之间尔来二十有一年矣先帝知臣谨慎故临崩寄臣以大任也受命以来夙夜忧惧恐托付不效以伤先帝之明故五月渡泸深入不毛今南方已定兵甲已足当獎率三军北定中原庶竭弩钝攘除奸凶兴复汉室还于旧都此臣所以报先帝而忠陛下之职分也至于斟酌损益进尽忠言则攸之禕允之任也愿陛下托臣以讨贼兴复之效不效则治臣之罪以告先帝之灵若无兴德之言则责攸之禕允等之慢以彰其咎陛下亦宜自谋以谕谏善道察纳雅言臣不胜受恩感激今当远离临表涕泣不知所言遂行屯于沔北阳平石马辟广汉太守姚伉为掾伉并进文武之士亮称之曰姚掾并存刚柔可谓博雅矣愿诸掾各希此事以属其望于是遣魏延诸军并兵东下仅留万人守城时魏司马懿率二十万衆拒亮与延军错道径至前当亮六十里所侦候来告举军失色亮意气自若敕军中皆卧旗息鼓不得妄出又令大开四城门扫地却洒懿常谓亮持重而猥见势弱疑有强伏遂引军北走及後知之深以为恨六年春亮伐魏亮司马魏延欲请兵五千与亮异道会于潼关如韩信故事亮以为此危计不如安从坦道可以平取陇右十全必克而无虞遂不用延计乃扬声由斜谷道取郿使赵云邓芝为疑军据箕谷魏使曹真率衆拒之亮身率诸军攻祁山戎陈整齐赏罚肃而号令明南安天水安定三郡叛魏应亮拔冀城获姜维关中响震曹叅如长安命张合拒亮亮使马谡督诸军在前与合战于街亭谡违亮节度举措失宜大为合所破亮拔西郡千余家还于汉中乃流涕收谡杀之谡临终与亮书曰明公视谡犹子谡视明公犹父愿深惟殛鯀兴禹之义使平生之交不亏于此谡虽死无恨于黄壤也于是十万之衆为之垂泣亮

亲为临祭抚其遗孤上疏请自贬三等于是以亮为右将军行丞相事有劝亮更发兵者亮曰大军在祁山箕谷皆多于贼反为贼所破此病不在兵少也在一人耳今欲减兵省将明罚思过校变通之道于将来若不能然者虽兵多何益自今以後诸有忠虑于国者但勤攻吾之阙则事可定贼可死功可躋足而待矣乃考微劳甄壮烈引咎责躬布所失于天下厉兵讲武以为後图戎士简练民忘其败冬十二月亮闻孙权破曹休魏兵东下关中虚弱欲出兵击魏羣臣多以为疑亮乃上言曰先帝虑汉贼不两立王业不偏安故托臣以讨贼以先帝之明量臣之才固知臣才弱敌强也然不伐贼王业亦亡惟坐而待亡孰与伐之是故托臣而弗疑也臣受命之日寝不安席食不甘味臣非不自惜也顾王业不可偏安于蜀都故冒危难以奉先帝之遗意也而议者谓为非计今贼适疲于西又务于东兵法乘劳此进趋之时也夫难平者事也昔先帝兵败于楚当此之时曹操拊手谓天下已定然後先帝东连吴越西取巴蜀举兵北征夏侯授首此操之失计而汉事将成也然後吴更违盟关羽毁败秭归蹉跌曹丕称帝凡事如是难可逆见臣鞠躬尽瘁死而後已至于成败利钝非臣之明所能逆覩也于是引兵出散关围陈仓曹真拒之亮粮尽而还魏将王双率骑追亮亮破斩之七年亮遣陈式攻武都陰平魏雍州刺史郭淮率衆欲击式亮自出至建威淮退还遂平二郡诏复亮丞相是岁孙权僭号使以并尊二帝来告衆谓宜显明正义以絶之亮曰权有僭逆之心久矣国家所以畧其衅情者求犄角之援也今若加显絶讎我必深便当移兵东戍与之角力彼贤才尚多将相辑睦未可一朝定也顿兵相持坐而须老使北贼得计非算之上者昔汉文卑词匈奴先帝优与吴盟皆应权通变弘思远益非匹夫之为分者也若大军北伐彼上当分裂其地以为後规下当略民广境示武于内非端坐者也就其不动而睦于我我之北伐无东顾之忧河南之衆不能尽西此之为利亦已深矣权僭之罪未宜明也乃遣卫尉陈震贺于吴再申盟约九年亮复出祁山以木牛运魏遣司马懿西屯长安督将军张合郭淮等御之懿自留精兵四千守上邽余衆悉救祁山亮分兵攻祁山自逆懿于上邽郭淮等以兵徼亮亮破之大芟其麦与懿遇于上邽之东懿敛军依险却避再三贾诩魏平数请战曰公畏蜀如虎奈天下笑何懿病之乃使张合攻南围自按中道向亮亮使魏延等逆战魏兵大败获甲首三千级元铠五千领角弩三千一百张懿还保营亮以粮尽退军懿遣合来追至木门亮伏弩射杀之时亮兵期直更番而懿衆大盛诸参佐咸请权停下兵一月以并声势亮曰行师以大信为本今去者束装以待期妻子鹤望而计日虽临征难义所不废皆遣令去由是去者感悦愿留一战住者愤踊思致死命相谓曰公恩死犹莫报也临战各拔刃争先一以当十遂大捷十二年亮悉大衆由斜谷出以流马运据武功五丈原与司马懿对于渭南亮每患粮不继使己志不伸遂分兵屯田为久住计畊者杂于渭滨居民之间而百姓安堵军无私焉亮数挑战懿不出亮乃遗以巾帼之服懿怒表叡请战叡遣辛毗仗节以制之亮谓姜维曰彼本无战情所以固请者以示武于衆耳将在军君命有所不受苟能制吾岂千里而请战耶相持百余日其年八月亮疾笃後主遣李福省视因谂大计亮以蒋琬对次及费禕遂卒于军年五十四时有星赤而芒角陨于中营长史杨仪整军而出百姓奔告懿懿追之姜维令仪反旗鸣鼓若将向懿者懿不敢偪仪结阵入谷然後发丧百姓为之谚曰死诸葛走生仲达及军退懿按行其营垒叹曰天下奇才也亮遗命葬汉中南定军山因山为坟塚足容棺斂以时服不须器物策赠印绶谥忠武亮尝表于後主曰臣成都有桑八百株薄田十五顷子弟衣食自有余饶臣身在外不别治生以长尺寸臣死之日不使内有余帛外有赢财以负陛下及卒如其言初长水校尉廖立自谓才名宜为亮副怏怏怨谤亮废立为民徙之汶山及亮薨立垂泣曰吾终为左衽矣中都护李严亮攻祁山时严督

运不继又反覆造说亮乃表其罪废徙梓潼复以其子丰为中郎将参军事出教敕之曰吾与君父子戮力以獎王室谓至心感动终始可保何图中乖乎愿寬慰都护勤追前阙否可复通逝可复还至是严闻亮薨亦发病死严常冀亮收己得自补复策後人不能故也长史张裔常称亮曰公赏不遗远罚不阿近爵不可以无功取刑不可以贵势免此贤愚所以金忘其身者也亮治蜀道不拾遗强不侵弱风化肃然尝有言亮惜赦者亮曰治世以大德不以小惠及薨後所在各求为立庙性长于巧思损益连弩木牛流马皆出其意又推演兵法作八阵图其言教书奏共为一集亮妻沔南名士黄承彦之女子瞻工书画强识念亮尝有书诫之曰君子之行静以修身俭以养德非澹泊无以明志非宁静无以致远夫学须静也才须学也非学无以广才非静无以成学慆慢则不能研精险躁则不能理性皆自道其所得也亮卒瞻嗣爵蜀人追思亮咸爱其才敏每朝廷有一善政佳事虽非瞻所建倡百姓皆传相告曰葛侯之所为也邓艾入成都以书诱瞻使降瞻怒斩其使临阵战死瞻长子尚叹曰父子荷国重恩不早斩黄皓以致倾败用生何为亦驰赴魏军而没次子京咸熙元年内移河东位至广州刺史亮弟均官亦至长水校尉

晋陈壽评曰诸葛亮之为相国也抚百姓示仪轨约官职从权制开诚心布公道尽忠益时者虽仇必赏犯法怠慢者虽亲必罚服罪输情者虽重必释游词巧饰者虽轻必戮善无微而不赏恶无纖而不贬庶事精练物理其本循名责实虚伪不齿终于邦域之内畏而爱之刑政虽峻而无怨者以其用心平而劝戒明也可谓识治之良才管萧之亚匹矣然连年动衆未能成功盖应变将畧非其所长与

吴张俨论曰孔明起巴蜀之地蹈一州之土方之大国其战士人民盖有九分之一也至使畊战有伍刑法整齐提步卒数万长驱祁山慨然有饮马河洛之志仲达据天下十倍之地仗兼并之衆据牢城拥精銳无禽敌之意务自保全而已使彼孔明自来自去若此人不亡终其志意连年运思刻日兴谋则凉雍不解甲中国不释鞍胜负之势亦已决矣

论曰传言昭烈访士于司马徽徽曰儒生俗士岂识时务识时务者在乎俊杰此间自有伏龙凤雏伏龙谓亮凤雏谓龐统也徽尝称统为南州士冠冕始统守耒阳不治鲁肃遗书昭烈曰士元非百里才亮亦尝言之由是昭烈深相器重亲待亚于亮後遂说昭烈取刘璋进围雒城县中流矢卒统好獎借人伦亦深自期许年既不永少所表见亮有王佐才气象一本于儒者孔子所谓求志达道曾子所谓托孤寄命临大节而不可夺庶几近之要其全体大用不外乎诫子一书出师二表文中子曰孔明无死礼乐可兴由是观之则富国强兵乃其囊底余智耳陈壽上亮遗集表至以周公子产相比慨然论赞中有将畧非长之言其後崔浩又从而傳会之沿及眉山苏氏父子皆各亮不取荊州而都梁益夫隆中一对先荊後益确有成算于胷中是以坐言起行不爽尺寸苏洵辈好以事後之成败论人强词悍气不衷事理恶足与窥古人之深哉亮自比管乐有过之无不及也伯仲之间见伊吕指挥若定失萧曹诵杜甫诗益信

关忠义 张飞

关忠义名羽字云长本字长生河东解人也侨寓涿郡少好左氏春秋讽诵畧皆上口昭烈於

涿合徒衆公与张飞为之御侮昭烈为平原相以关张为别部司马分统部曲昭烈与二人寝则同牀恩若兄弟而稠人广坐侍立终日随昭烈周旋不避艰险昭烈之袭杀徐州刺史车胄使公守下邳城而身还小沛建安五年曹操东下昭烈奔袁绍操尽收其衆掳昭烈夫人并公以归时仓卒行次公护视昭烈夫人每肃立其旁惟谨或至夜分秉烛达旦操拜为偏将军礼之甚厚时袁绍遣其大将顔良攻东郡太守刘延於白马操使张辽及公为先锋击之公望见良麾盖策马刺良於万衆之中斩其首还绍诸将无敢当者遂解白马围操即表封为汉壽亭侯初操壮公为人而察其心神无久留之意谓张辽曰卿试以情问之既而辽以问公公叹曰吾极知曹公待我厚然吾受刘将军厚恩誓以共死不可背之吾终不留要当立功以报曹公乃去辽以公言报操操义之及公杀顔良操知其必去重加赏赐公尽封其所赐拜书告辞而奔昭烈於袁军左右欲追之操曰彼各为其主勿追也遂从昭烈就刘表表卒操定荆州昭烈自樊将南渡江别遣公乘船数百艘会江陵操追至当阳长坂昭烈斜趋汉津适与公船相值共至夏口初昭烈在许与操共猎猎中衆散公劝昭烈杀操昭烈不从及在夏口飘颻江渚公怒曰往日猎中若从吾言可无今日之困昭烈曰是时亦为国家惜之耳若天道辅正安知此不为福耶时孙权遣兵佐昭烈拒操操引军退归昭烈遂收江南乃封拜元勋以公为襄阳太守荡寇将军驻江北昭烈西定益州拜公都督荆州事公闻马超来降寓书诸葛亮问超人才谁比亮知其护前乃答之曰孟起兼资文武雄烈过人当与益德并驱犹未及髯之絶伦也公美须髯故亮谓之髯公省书大悦以示宾客公尝为流矢所中贯其左臂後创虽愈每陰雨骨常疼痛医曰矢鏃有毒毒已入骨当破臂刮骨去毒患乃除耳公便伸臂令劈之时适燕诸将饮食相对臂血流离盈於盘器而公割炙引酒言笑自若二十年孙权以昭烈久假荆州不反遂遣吕蒙取长沙零陵桂阳三郡昭烈使公争之权使鲁肃屯益阳以拒公肃邀公相见因责数之公曰乌林之役左将军身在行间戮力破敌岂得徒劳无一块土而足下来欲收地耶会操攻汉中急昭烈乃与权和遂分荆州以湘水为界留公守江陵二十四年先主进号汉中王遣费诗拜公为前将军假节钺公闻黄忠为後将军怒曰大丈夫终不与老兵同列不肯受拜诗曰夫立王业者所用非一昔萧曹与高祖少小亲旧而陈韩亡命後至论其班列韩最居上未闻萧曹以此为怨且君侯与王譬犹一体祸福休戚共之不宜更计官号之高下爵禄之多少为意也仆一介衔命之人君侯不受拜於是便还但相与惜此举动恐有後悔耳公大感悟遽即受拜是岁公使其属糜芳守江陵傅士仁守公安而自率衆攻曹仁於樊仁使于禁龐德等屯樊北秋大霖雨汉水溢平地数丈禁与诸衆登高避水公乘大船就攻之禁穷迫遂降龐德力战不屈公禽斩之乃急攻樊城立围数重又遣别将围吕常於襄阳於是荆州刺史胡修南郡太守傅芳皆降陆浑民孙狼等亦杀其主簿南附受公印号自许以南往往遥应公公威震华夏曹操议徙许都以避其锐司马懿蒋济以为西蜀东吴外亲内疏今虽得志孙权必不愿也可遣人劝权蹶其後许割江南以封权则樊围自解操从之先是吕蒙代鲁肃镇陆口以公素骁雄白权宜急图之权又尝遣使为子求公女公骂辱其使不许婚权大怒至是用吕蒙计作牋与操请以讨公自効拜蒙大都督将兵袭公公初不设备而曹操遣徐晃南救曹仁自引兵屯於摩陂晃攻公破之公撤围退然舟船犹据沔水吕蒙至浔阳尽伏其精兵中使白衣摇櫓作商贾服昼夜兼行公所置江边屯候尽收缚之糜芳傅士仁素皆嫌公轻己公之出军芳仁供给军资不悉相及公言还当治之二人咸怀惧不安权使人诱之即迎降蒙入据江陵尽掳公士衆妻子公军遂解散才数十骑权先使别将潘璋断其径路获公及其子平於临沮害之函首送操操发视须髯如生命以侯礼葬时权以潘璋为益州牧驻秭归未几而死

吕蒙未及受封疾发亦死焉

张飞字益德昭烈同郡人以关公年长於己常兄事之当阳之败操追兵几及昭烈飞将二十骑拒後据水断桥瞋目横矛曰身是张益德也可来共决死敌皆无敢近者从攻刘璋所过战克生获巴郡太守严颜呵之曰何以不降颜曰我州但有斩头将军无降将军也飞壮而释之引为宾客飞雄猛亚关公魏谋臣程昱等咸称关张万人之敌关公善待卒伍而骄於士大夫飞爱敬君子而不恤小人昭烈常诫飞曰卿刑罚既过差又日鞭撻健儿而令在左右此取祸之道也飞犹不悛其後昭烈伐吴飞率兵自阆中会江州临发果为其帐下将范强张达所杀後帝时追谥曰桓

论曰自古志士仁人杀身致命至往往招魂以葬其不亡者惟区区血诚而已诚之所至贯金石而泣鬼神格豚鱼而孚草木关公忠义通於神明背曹向刘显铄今古遂使千秋万世钦厥声名奉若尊亲岂非诚为之动哉宣尼作春秋而乱贼惧忠义好春秋而汉贼明可谓能读书者矣飞忠勇亚於忠义关张并称炳如日星故并着之

赵云

赵云字子龙常山真定人也身长八尺姿颜雄伟为本郡所举将义从吏兵诣公孙瓒时袁绍称冀州牧瓒深忧州人之从绍也善云来附嘲云曰闻贵州人皆愿袁氏君何独迷而能反云答曰天下訥訥未知孰是民有倒悬之厄鄙州论议从仁政所在不为忽袁氏私明将军也时昭烈亦依瓒每接纳云云深自结托云以兄丧辞瓒暂归昭烈知其不返捉手而别云辞曰终不背德也及昭烈就袁绍云见於邳昭烈与云眠卧密遣云合募得数百人皆称刘左将军部曲绍不能知遂随昭烈至荆州为昭烈主骑建安十三年曹操追昭烈至当阳长坂昭烈弃妻子南走时有言云已北去者昭烈以手戟擿之曰子龙不弃我走也顷之云至身抱弱子即後帝也保护甘夫人即後帝母也皆得免难从平江南迁偏将军领桂阳太守代赵范范寡嫂樊氏有国色范欲以配云云以相与同姓固辞不许或劝纳之云曰范迫降耳心未可测天下女不少遂不取范果逃去云无纖芥先是云与夏侯惇战於博望生获夏侯兰兰与云同乡里少小相知云白昭烈活之荐兰明於法律以为军正云不用自近其慎虑类如此昭烈入益州云领留营司马时孙夫人以权妹骄豪多将吴吏兵纵横不法昭烈以云严重必能整齐特任掌内事十六年昭烈西征权乃遣船迎妹而夫人欲将後帝归吴云与张飞勒兵截江乃得後帝还及昭烈自葭萌还攻刘璋召诸葛亮亮率云与张飞等俱泝江西上平定郡县至江州分遣云从外水上江阳与亮会於成都益州既定以云为翊军将军时议欲以成都屋舍及园地桑田分赐诸将云驳之曰霍去病以匈奴未灭无用家为今国贼非但匈奴未可求安也须天下都定各反桑梓归耕本土乃其宜耳益州人民初罹兵革田宅皆可归还令安居复业然後可役调得其欢心昭烈即从之二十四年昭烈既遣黄忠斩夏侯渊曹操来争汉中地运米北山下黄忠谓可刳取并以云兵随往过期不还云将数十骑出营觐之猝与操遇为其前锋所击方战其大衆至势偪遂前突其阵且鬪且却魏兵散而复合云既还趋营而别将张着被创云复驰马迎着敌军追至营时沔阳张翼在云营内翼欲闭门拒守而云更大开门偃旗息鼓操军疑有伏引去云搥鼓震天以劲弩从後射之操军惊骇自相蹂践堕汉水死者甚多明旦昭

烈自至云营视昨战处曰子龙一身都是胆也军中号为虎威将军章武元年昭烈耻关公之没将击孙权云谏曰国贼是曹操非孙权也且先灭魏则吴自服操身虽毙子丕篡盗当因衆心早图关中居河渭上流以讨凶逆关东义士必裹粮策马以迎王师不应置魏先与吴战兵势一交难可卒解也昭烈不听遂东征留云督江州昭烈失利於秭归云进兵至永安而吴军已退後帝即位拜云中护军征南将军封永昌亭侯建兴五年随诸葛亮驻汉中明年亮出军扬声由斜谷道曹真遣大衆当之亮令云与邓芝往拒而身攻祁山云芝兵弱敌强失利於箕谷然敛衆固守不至大败军退亮问邓芝曰街亭军败兵将不复相录箕谷何独得保芝曰云身自断後故一切什物畧无所弃兵将无缘相失云有军资余绢亮使分赐将士云曰军事失利何以有赐请悉入赤?府库须十月为冬赐亮大善之又明年卒追谥曰顺平云次子广官牙门将随姜维临阵战死

论曰云与关张及马超黄忠号五虎将陈壽以其强摯壮猛比於灌滕此未足以尽云也云智深而量雅其应对公孙有寇恂答使者之词令焉其结托昭烈有邓禹游京师之先见焉当阳之保护过於麦饭豆粥之勤汉中之权畧捷於转车张帆之巧荐夏侯兰而不自近岑彭之言韩歆可用马武之不将旧部曲也却赵范之婚辞田园之赐祭遵之忧国奉公吴汉之怒妻子多买田宅也要其訐谏硕画尤在谏伐吴数言盖与武侯平生用兵大指相类使之尚在大将军之任不以属文伟伯约矣

蒋琬 费禕 董允

蒋琬字公琰零陵湘乡人也弱冠知名以州书佐随昭烈入蜀除广都长昭烈常因游观奄至广都见琬衆事不理时又沈醉遂大怒将加罪戮军师将军诸葛亮请曰蒋琬社稷之器非百里才也其为政以安民为本不以修饰为先愿重加察之昭烈雅敬亮乃不加罪仓卒但免官而已顷之为什邡令昭烈为汉中王琬入为尚书郎建兴元年丞相亮开府以琬为东曹掾琬固让刘邕等四人亮不听迁为参军八年代张裔为长史加抚军将军亮数外出琬常足食足兵以相供给亮每言公琰托志忠雅当与吾共赞王业者也密表後帝曰臣若不幸後事宜以付琬亮卒以琬为尚书令领益州刺史迁大将军录尚书事封安阳亭侯时新丧元帅远近危悚琬出类拔萃处羣寮之右既无戚容又无喜色神守举止有如平日由是衆望渐服延熙元年诏琬曰寇难未弭曹叡骄凶君其治严总帅诸军屯住汉中须吴举动东西掎角以乘其衅又命琬开府明年就加大司马四年琬以诸葛亮数窥秦川道险运艰不若乘水东下乃多作舟船欲由汉沔袭魏会疾动未行衆论咸谓如不克捷还路甚难非长策也於是遣尚书令费禕等谕指琬承命上疏曰芟秽弭难臣职是掌自臣奉辞汉中已经六年臣既闇弱加婴疾疚规方无成夙夜忧惨今魏跨带九州根蒂滋蔓若东西并力首尾掎角虽未能速得如志且当分裂?食先摧其枝党然吴期二三连不克果俯仰维艰实忘寝食辄与禕等议以凉州边塞之要进退有资且羌人乃心思汉如渴宜以姜维为凉州刺史若维征行衔制河右臣当率军为继今涪水陆四通惟急是应若东北有虞赴之不难请从屯涪後帝从之由是琬还住涪疾转增剧九年卒谥曰恭初琬辟犍为杨戏为东曹掾戏性素简畧琬与言论时不应答有构戏於琬者曰公与戏语而不见应戏之慢上不亦甚乎琬曰人心不同各如其面从後言古人所诫戏欲赞吾是耶则非其本心欲反吾言则显吾之非是以嘿然是戏之快也又督农杨敏曾

毀琬曰作事愷愷誠不及前人或以白琬主者請推治之琬曰吾實不如前人无可推也主者乞細按愷愷之狀琬曰苟其不如則事不當理事不當理則愷愷矣復何問耶後敏坐事衆猶懼其必死琬心無適莫得免重罪其好惡存道皆此类也

費禕字文偉江夏鄆人也少孤依族父伯仁仁將禕游学入蜀會昭烈定蜀禕遂留益土禕少與董允齊名時司徒許靖喪子允與禕欲共會葬所白父和請車和遣開後鹿車給之允有難載之色禕便从前先上及至喪所諸葛亮與諸貴人悉集車乘甚鮮允猶神色未泰而禕晏然自若持車人還和問知其如此乃謂允曰吾常疑汝於文禕優劣未別也而今而後吾意了矣先主立太子禕與允俱為舍人遷庶子後帝即位為黃門侍郎建興三年丞相亮南征還羣寮郊迎年位多在禕右而亮特命禕同載由是衆人莫不易觀亮既歸以禕使吳孙权性既滑稽嘲啁无方諸葛恪羊衝等才博果辯論難鋒至禕詞順義篤據理以答終不能屈又嘗別酌好酒飲禕視其已酣然後咨問國事及當世之務禕輒辭以醉退而撰次所問事事條答无有遺失權甚器之謂禕曰君天下淑德必當股肱蜀朝恐不數來也因以常所執寶刀贈之禕答曰臣不才何堪明命然刀所以討不庭禁暴亂者也愿大王勉建功業同獎漢室臣虽閹弱終不负東顧還遷為侍中後亮北住漢中禕為參軍以奉使稱旨頻煩至吳八年轉為中護軍後又為司馬時前軍師魏延善養士卒勇猛過人每陳計於亮欲出奇兵而亮不許延嘗私謂亮為怯恨己才用之不尽長史楊儀為人干敏亮每出軍儀常規畫分部籌度糧谷不稽思慮軍戎節度皆斯須取辦延性矜高而儀狷狹遂相憎惡如水火亮深凭二人之才勇而惜其不相能不忍有所偏廢每當并坐爭論延或舉刀拟儀儀涕泣橫集禕嘗入其坐間諷喻分別終亮之世各盡延儀之用者禕匡救之力也禕嘗再使吳孙权問禕曰楊儀魏延牧小人也虽嘗有鳴吠之益於時務然既已任之勢不得輕若一朝无諸葛亮必為禍亂矣諸君愷愷不知防慮豈所謂治厥孫謀乎禕對曰延儀之不協起於私忿耳而无黥彭難御之心也今方埽除強賊混一函夏功以才成業由才廣若舍此不任防其後患是猶懼有風波而逆廢舟楫非長計也權大笑亮聞之以為知言其後亮卒於軍延不聽遺令欲與禕共作行留部分強禕手書與已連名告下諸將禕給延得出馳去延尋悔追之不及遂作亂奔漢中馬岱擊斬之尋儀亦以不得秉政對禕恨望禕密表其言廢徙漢嘉自杀十三年禕代蔣琬為尚書令尋遷大將軍延熙七年魏曹爽入寇軍次興勢假禕節率衆御之光祿大夫來敏至禕許別求共圍碁於時羽檄交至人馬擐甲嚴駕已訖禕留意對戲色无厭倦敏曰向聊試君耳君信可人必能辦賊也及至爽引退禕乃進据三峽以截爽爭險苦戰仅乃得過失亡甚衆封禕成鄉侯九年秋大赦大司農孟光於衆中責禕曰夫赦非明世所宜有也必不得已乃可權而用之今有何危急而數施非常之恩以惠奸宄乎又鷹隼始击而更原宥有罪上干天時下违人理豈具瞻之高美所望於明德者哉禕蹶蹶謝之十一年禕出屯漢中自琬及禕虽自身在外庆賞刑威皆遙先谕斷然後乃行其推任如此時衛將軍姜維與禕共录尚書事维自以练西方風俗又負其才武謂隴以西可斷而有每欲興兵大舉禕嘗裁制不从謂曰丞相犹不能定中夏况吾等乎宜先保國治民敬守社稷无以希冀侥幸而決成敗於一舉与维兵常不过万人十五年命禕開府明年歲首大會魏降人郭循在坐禕歡飲沉醉為循手刃所害謚曰敬禕雅性謙素家不積財儿子皆布衣蔬食出入不从車騎其當國功名畧与琬比而识悟尤絕初禕為尚書令時軍國多事公務煩猥每省讀文书舉目究意其速數倍於人終更不忘常以朝晡听事其間接納賓客飲食博戏每尽人之歡而事无廢闕後董允代禕欲学之旬日之間事多愆滯允叹曰

人才力相远若此非吾所及也乃听事终日而犹有不暇焉

董允字休昭南郡枝江人也父和字幼宰刘璋时为牛鞞江原长成都令蜀土富俗奢货殖之家侯服玉食婚葬至倾家以办和躬率以俭又为之轨制所在皆移风变善会当迁吏民老弱相携乞留者数千人璋听留二年还迁益州太守其清约如前与蛮夷从事务推诚心南土爱而信之昭烈定蜀徵为掌军中郎将与诸葛亮并署左将军府事献可替否共为欢交自和居官食禄二十余年死之日家无儋石亮後为丞相每追思其忠勤不置允少随父西迁昭烈时与费禕并以选为太子舍人徙洗马後帝嗣立迁黄门侍郎建兴五年亮将北征出屯汉中虑後帝富於春秋朱紫难别以允秉心公亮欲任以宫省之事疏荐允与郭攸之费禕等皆忠亮死节之臣宫中之事事无大小请悉以咨之亮寻以禕为参军允迁为侍中虎贲中郎将统宿卫亲兵凡献纳之任允皆专之允处事为防制甚尽匡救之理後帝常欲采择以充後宫允以为古者后妃之数不过十二今嫔嬙已具不宜增益终执不听後帝益严惮之尚书令蒋琬领益州刺史上疏以让费禕及允又表允内侍历年翼赞王室宜赐爵土以褒勋劳允固辞不受後帝渐长大爱宦人黄皓皓便辟佞慧欲自容入允常上则正色匡主下则数责於皓皓畏允不敢为非终允之世皓位不过黄门丞尝与尚书令费禕中典军胡济等共期游宴严驾已办而郎中襄阳董恢诣允修敬恢年少官微见允停出逡巡求去允不许曰本所以出者欲与同好游谈也今君已自屈方展濶积舍此之谈就彼之宴非所谓也乃命解驂禕等亦罢驾不行其守正下士类如此延熙六年加辅国将军七年以侍中守尚书令为费禕副九年卒费禕以选曹郎陈只代允为侍中只多技艺挟智数与黄皓相表里皓始与政事姜维常恶皓擅恣后後帝欲杀之後帝曰皓趋走小臣耳往董允切齿吾常恨之君何足介意维惧失言逊辞而出後帝遣皓诣维陈谢皓遂操弄威柄终至覆国蜀人无不追思允者

论曰蜀人每称诸葛亮蒋琬费禕董允为四相一号四英案亮荐允掌宫省献纳而身後之事首付琬次及禕当时廖立李严并负宿望魏延杨仪尤惯军伍又尝称姜维存心汉室而才兼於人然至付托国事皆不之及何欤琬器量閎雅有宰相度允严正宜在幼主左右使有所惮禕识足定纷才能应猝当倾侧扰攘之间所以折冲而御侮者尤赖乎此此以见亮之小心虑国善始善终不独号称知人也惜琬允既不永年禕复泛爱蹈来歙岑彭之辙向使此三子者皆无恙允领宫府琬禕督兵戎则黄皓阉宇不得比周为奸汉中诸围不至撤兵他守加以樊建傅佗李球卫继张翼廖化罗宪诸人同心协力锺会岂能长驱而寇关口哉人之云亡邦国殄瘁於是乎汉祚终不复矣悲夫

史传三编卷十七

卷十八

<史部,传记类,总录之属,史传三编

钦定四库全书

史传三编卷十八

大学士朱轼撰

名臣传十

晋

刘弘

刘弘字和季沛国相人也祖馥魏扬州刺史父靖镇北将军弘少有干略张华甚重之与武帝同里又同年共研席以旧恩起家太子门大夫累迁寧朔将军领乌丸校尉甚有威惠为边境所称封宣城公张昌之乱转荆州刺史代王歆为镇南将军都督诸军事弘遣南蛮长史陶侃牙门将皮初等进据襄阳侃等累战破昌斩首数万级昌惧而逃于下雩山弘遣军斩之其衆悉降荆土以平时荆部守宰多阙弘请补选得许乃铨叙功德随才补授以陶侃为行司马而以皮初补襄阳太守表其姓名上之朝廷以初虽有功而襄阳名郡不可轻授人乃以前东平太守夏侯陟为之陟弘之壻也弘下教曰夫统天下者宜与天下一心统一国者宜与一国为任若必婣亲然後可任则荆州十郡安得十女壻哉乃表陟婣亲旧制不得相监皮初之勋宜先酬报诏听之弘劝课农桑寛刑省赋岁用有年荆人爱悦尝夜起闻城上持更叹声甚苦呼省之见其老病无襦乃譴罚主者而给其人衣帽旧制岷方二山泽中不许人捕鱼弘曰礼名山大泽不封与共其利今公私并兼百姓无复厝手地当何谓耶速改此法又自今酒醪之制不得分别优劣三品当与三军同其厚薄益州刺史罗尚为李特所败告急贷粮州僚以运道悬远不欲多给弘曰天下一家彼此无异吾今厚给于彼可无西顾之忧矣遂以零陵米三万斛给之尚赖以自固又以田种粮食分给流人十余万户之在荆州者使不因贫乏为寇更擢用其贤才以慰勉之时总章大乐伶人避乱于荆或劝可作乐弘曰昔刘景升以礼坏乐崩命杜夔为天子合乐乐成欲庭作之夔曰为天子合乐而庭作之恐非将军本意吾常为之叹息今主上蒙尘吾未能展效臣节虽有家伎犹不宜听况御乐哉乃下郡县使安辑之须乘舆反正送还本署进侍中鎮南大将军开府仪同三司时天下大乱弘专督江汉威行南服有干弘以纵横之事者弘大怒斩之惠帝之幸长安也河间王顓挟天子诏弘为刘乔继援弘以张方残暴知顓必败遂遣使受东海王越节度顺阳太守张光河间王顓所署也与陶侃皮初共破陈敏将钱端于长岐或说弘宜斩光以明向背弘又曰宰辅得失岂张光之罪危人自安君子弗为也乃表光勲乞加迁擢先是刘乔为豫州刺史东海王越承制以范阳王虓代之乔以非

天子命不受代发兵拒虓弘乃与乔晟以为疎不间亲且主上播越正忠义同心戮力之时愿解怨修好共戴盟主以康王室越将讨乔弘又与越书和解之又上表曰自顷兵戈纷乱构于羣王翩其反而互为戎首万一外寇乘虚为变此亦猛虎交鬬自効于卞庄者也宜速诏越等两释猜疑各保分局自今有擅兴兵马者天下共伐之时不能用会陈敏寇扬州引兵欲西敏与江夏太守陶侃同郡又同岁举吏有间侃于弘者弘更委侃讨敏侃遣其兄子为质弘曰贤叔征行君祖母年高便可归也匹夫之交尚不负心况大丈夫乎敏竟不敢闚境弘每有废兴手书守相丁宁款密人争感悦曰得刘公一纸书贤于十部从事及东海王越奉迎大驾弘遣将率诸军会之既还自以老病将解州事未及上卒于襄阳士女如丧私亲初成都王颖南奔欲之本国弘距之及弘卒弘司马郭劭欲推颖为主弘子璠追尊弘志遂墨經讨劭斩于浊水朝廷闻而嘉之追赠弘新城郡公諡曰元弘没以高密王畧代鎮多寇盗诏起璠为顺阳内史甚得江汉心山简忌之奏徵为越骑校尉被书便至洛阳然後迎家累然南夏卒以乱

论曰国家分崩离析之会非精勤无以虑变非果毅无以杀敌非公忠仁恕无以收智谋勇畧之用而成安上全下之功刘弘拊循士卒与同甘苦官人不昵私亲任贤不生疑贰是以惠泽入人心威望着隣境然其大者尤在乃心君国絶不敢乘衅树党以便其私图观其致书牧帅上表阙廷指事深切发言慷?使当日君臣听而行之内释猜疑外固屏翰其为功于国又不独在疆场折冲已也书曰協恭和衷弘有志焉方藩封树兵司马内乱一时张方李含周馥刘忱苟曦诸人又复各为左右谗闲蠱生兵戈蚁动坐使全晋山河四分五裂而其身命亦随之有朝位台司而暮具五刑者独弘父子终见保全天之报施忠义岂有爽哉弘干局功勲亚陶侃而忠君忧国胜之当与温峤同为典午一代之伟人矣

祖逖

祖逖字士雅范阳遵人也世为北州旧姓父武上谷太守逖少孤性豁朗年十四五犹未知书兄纳等并忧之然轻财好侠慷慨有节尚每至田舍辄称兄意散谷帛以周贫乏乡闾重之後益博览书史见者咸谓有佐世才年二十四辟察孝廉司隶再举秀才皆不行与刘琨俱为司州主簿情好最笃尝同寝夜闻鸡鸣蹴琨觉曰此非恶声也因起舞逖琨并有英气每语世事或中宵对坐相谓曰若四海鼎沸豪杰并起吾与足下当相避于中原耳累迁太子舍人豫章王从事中郎从惠帝北伐败于荡阴遂退还洛时车驾幸长安范阳王虓高密王畧平昌公模等竞召之皆不就东海王越以逖为典兵参军济阴太守母丧不之官及京师大乱逖率亲党避地淮泗以所乘车马载同行老疾躬自徒步药物衣粮与衆共之由是衆皆推逖为行主逖泗口元帝遥用为徐州刺史寻徵军諮祭酒居丹徒之京口逖以社稷倾覆常怀振复之志宾从皆桀勇逖遇之如子弟或有犯法为吏所绳者辄拥护救解之时帝方拓定江南未遑北伐逖进说曰晋室之乱非上无道而下怨畔也由藩王争权自相诛灭遂使羣寇乘隙流毒中原今遗黎既被残酷人有奋击之志大王诚能命将使若逖等为之统主则郡国豪杰必望风向赴沉溺之士欣于来苏庶几国耻可雪帝乃以逖为奋威将军豫州刺史给千人廩布三千匹不给铠仗使自招募仍将本流徙部曲百余家渡江中流击楫而誓曰祖逖不能清中原而复济者有如大江词色壮烈衆皆慨叹屯于江阴起冶铸兵器得二千余人而後进初北中郎将刘演之距于石勒也流人坞王张平樊雅等在谯演署平为豫州刺史雅为谯郡太守逖至乃

诱其部人谢浮斩平帝嘉逖勲使运粮给之而道远未至军大饥樊雅以其衆袭逖直趣逖幕督护董昭战走之而张平余衆助雅攻逖益急逖求救于蓬陂坞主陈川川命其将李头率衆援之头力战有勲遂克譙城逖时获雅骏马头甚欲之而不敢言逖知其意遂与之头感叹曰若得此人为主吾死无憾川闻而怒因杀头头亲党四百人皆奔于逖川益怒遣兵大掠豫州逖邀击于谷水尽获所掠者皆令归本主军无私焉川惧遂以衆附石勒逖率衆伐川石虎领兵五万救川逖设奇击虎虎大败收兵掠豫州而留其部将桃豹等守川故城住西台逖遣将韩潜等镇东台同一大城贼从南门放牧逖军开东门相守四旬逖乃以布囊盛土如米状使千余人运上台又令数人担米伪为疲极而息于道豹遣兵逐之即弃担走豹兵久饥既获米谓逖士衆丰饱大惧勒将刘夜堂以驴千头运粮馈豹逖遣韩潜冯铁等追击于汴水获之豹宵遁退据东燕城逖使潜进屯封丘以迫之冯铁据二台逖镇雍丘数遣军邀截石勒勒屯戍渐蹙候骑尝获濮阳人逖厚待遣归皆感恩率乡里五百家来降勒又遣精骑万人距逖复为逖所破勒镇戍归逖者日多时李矩郭默等各以诈力相攻逖驰使和解之遂皆受逖节度逖爱人下士虽疎贱皆遇以恩礼尤善招抚河上诸坞先有任子在贼者皆听两属时遣游军伪钞之明其未附诸坞感戴贼中有异谋辄密以闻由是多所克获自河以南尽为晋土其有微功赏不踰日躬自俭约劝督农桑子弟皆耕耘樵担又收葬枯骨为之祭醊百姓感悦尝置酒大会耆老坐中流涕曰吾等老矣更得父母死将何恨其得人心如此诏进逖镇西将军益练兵积谷为取河北之计石勒不敢窥兵河南使成臯县修逖母墓因与逖书求通使交市逖不报书而听互市收利十倍于是公私丰赡边境休息士马蕃滋大有越河扫清之意会朝廷将遣戴渊为都督逖以已翦荆棘收河南地而渊雍容一旦来统之意甚怏怏又闻王敦与刘隗等构隙虑有内难知大功不遂感激发病犹图进取不辍营缮虎牢城城北临黄河西接成臯四望甚远逖恐南无坚垒必为贼所袭乃使从子汝南太守济率汝阳太守张敞新蔡内史周闓率衆筑垒于城南未成而病笃初有妖星见于豫州之分逖叹曰为我矣方平河北而我死天不佑国也俄卒于雍丘年五十六豫州士女若丧父母譙梁间皆为立祠王敦久怀逆谋惟惮逖与梁州刺史周访二人不敢辄发及访与逖继歿敦乃肆志焉

论曰祖逖不矜小节而倜傥有大志忠君爱国之诚经方致远之畧其素所树立然也方其奉命北行军粮器械一无所恃又复值羣凶窃据日夕转战进寸退尺卒抚有河南使强敌不敢生边衅盖仗义执信德施既普威命自行未来而怀集有方既来而抚御无失是故能以寡胜衆弱敌强焉向使天假之年得与陶侃温峤诸公同心共济恢复中原岂有难哉闻鸡之舞渡江之誓至今犹想见其慷慨大节凛凛如生也夫士苟有志无不竟成患于志大才疎耳始逖被用时刻琨闻之与亲故书曰吾枕戈待旦常恐祖生先我着鞭其後琨竟为段匹磾所害而逖经畧有明效考琨末年忠义愈奋志气激发闻望远播江左凭依功虽不究君子不可以成败论人然善于怀抚短于控御又素奢豪嗜声色徐润以音律被宠令狐盛以亢直见杀较逖之克己务施爱人好士者相去盖远观其弱冠周旋于贾谧马伦之门与伦私亲为伦所用可知非独疎于才抑亦闇于识也祖刘并称刘实逊祖史讥逖初年散谷周贫目为贪乱可谓能知逖者乎

王导

王导字茂弘琅邪临沂人光禄大夫览之孙也父裁镇军司马导少有风鉴识量清远陈留高士张公一见许为将相之器初袭祖爵即丘子後参东海王越军事元帝为琅邪王时与导相亲善导知天下已乱潜有佐帝兴复之志帝亦雅重之在洛阳时导每劝令之国及出镇下邳请为安东司马军谋密策无不与知时帝颇以酒废事导深以为言帝命酌酒覆之由此遂絶及徙镇建康吴人不附值导从兄敦来朝敦时威望已着导因说敦宜共有以匡济时上已观禊帝乘肩舆具威仪导与敦皆骑从吴人士窃覩之乃相率拜道左导因进计曰古之王者莫不宾礼故老存问风俗虚已倾心以招俊乂况天下丧乱九州分裂大业草创急于得人者乎顾荣贺循此土之望引之以结人心二子既至则无不来者矣帝乃使导躬造循荣二人皆应命而至由是吴会归心焉洛京既破避乱江左者十六七导又说帝收其贤人君子与之图事时扬土饶富导为政务在清浄每劝帝克己厉节辅主庇民遂益见委重朝野倾心号为仲父帝每从容谓导曰卿吾之萧何也对曰自魏氏以来迄于太康之际公卿世族奢侈相高政教陵迟不遵法度遂使奸人乘衅有亏王道大王命世之英一匡九合管仲乐毅于是乎在岂区区所可拟议愿弘深神虑广择良能顾荣贺循纪瞻周玘皆南土之秀愿尽优礼则天下安矣帝纳焉永嘉末迁丹阳太守加辅国将军导以草创之初名位不可加恐无以劝有功塞非望上牋固让曰请自导始帝下令褒美愍帝即位徵吏部郎不拜晋国既建以为丞相军谿祭酒桓彝初过江虑朝廷寡弱不克有济比与导谈世事乃还谓周顗曰向见管夷吾无复忧矣过江人士每暇日饮宴新亭周顗中坐叹曰风景不殊举目有江山之异皆相视流涕导变色曰当共戮力王室尅复神州何至作楚囚相对泣耶拜右将军扬州刺史遣诸从事行郡国还见各言二千石官长得失时独顾和无言导问之和曰明公作辅寧使网漏吞舟何缘采听风闻以察察为政耶导咨嗟称善寻迁骠骑将军都督中外诸军录尚书事时军旅倥偬学校未修导上书曰夫风化之本在于正人伦人伦之正存乎设学校庠序设五教明德礼洽通彝伦攸叙父子兄弟夫妇长幼之序顺而君臣之义固矣易所谓正家而天下定者也故圣王蒙以养正少而教之行成德立然後裁之以位虽王之世子犹与国子齿使知道而後贵其取才用士咸先本之于学故周礼献贤能之书于王王拜受之所以尊道而贵士也人知士之贵由道存则退而修其身以及家正其家以及乡学于乡以登朝反本复始各求诸已敦朴之业着浮伪之竞息教使然也故以之事君则忠用之泄下则仁孟子所谓未有仁而遗其亲未有义而後其君者也自顷皇纲失统于今二纪先进忘揖让之容後生惟金鼓是闻先王之道弥远华伪之俗日滋非所以端本靖末之谓也殿下以命世之资属阳九之运礼乐征伐翼成中兴诚宜稽古明学渐之教义使文武之道坠而复兴方今国耻未雪忠臣义夫扼腕拊心苟礼仪胶固淳风渐着则化之所感者深而德之所被者大故有虞舞干戚而化三苗鲁僖作泮宫而服淮夷桓文之霸皆先教而後战今聿遵前典兴复道教择朝之子弟并入于学选明博修礼之士而为之师化成俗定莫尚于斯帝深纳焉及帝登尊号百官陪列命导升御床共坐导固辞再四曰若太阳下同万物苍生何由仰照帝乃止以讨华轶功封武冈侯进位侍中司空会太山太守徐龕反导荐羊鉴往镇抚既而鉴败抵罪导上疏乞自贬黜诏不许导以中兴草创啓立史官于是典籍始具时孝怀太子被害讞至有司奏天子三朝举哀羣臣一哭而已导以为皇太子副贰宸极普天有情宜同三朝之哀从之及刘隗用事王敦心怀怏怏导亦渐见疎外中书郎孔愉陈导忠贤有佐命之勋宜加委任帝出愉为长史导任真推分澹如也及敦反导每旦率羣从子弟诣台谢罪曰逆臣贼子何代无之岂意今者近出臣族帝跣而执其手曰茂弘方寄百里之命于卿是何言耶乃诏曰导以大义灭亲可以吾为安东时节假之初西都覆没

海内思主羣臣及四方俱劝进于帝时王氏强盛有专天下之心敦憚帝贤明欲更议所立导固争乃止至是敦谓导曰不从吾言几至覆族导犹执正议敦无以能夺时帝爱琅邪王裒将有夺嫡之议导曰立子以长且绍又贤帝犹不决导日夕陈谏储位乃定明帝立迁司徒敦又举兵内向乃加导大都督率诸军讨之导闻敦寝疾使率子弟发丧衆谓敦已死咸有奋志又遗其从兄含书曰导门户受国厚恩今日之事明日张胆为六军之首宁为忠臣而死不为无赖而生以平敦功进爵始兴公位太保帝崩与庾亮等受遗诏辅幼主是为成帝亮之徵苏峻也访于导导曰峻猜险必不奉诏且山藪藏疾宜包容之固争不从峻果称兵犯阙导入宫侍帝峻雅敬导不敢加害犹以本官居己之右及峻逼乘輿幸石头导争之不得因密令张闳以太后诏谕三吴使起兵于是虞潭蔡谟顾衆等皆以兵应又知峻党路永匡术并有贰心乃使参军袁耽讽永等谋奉帝出奔义军而峻卫御甚严事遂不果贼既平衆以宫阙灰烬温峤议迁都豫章三吴之豪请迁会稽导独曰建康王者之宅古之帝王不以丰俭移都苟弘卫文大帛之冠则无往不可若不绩其麻则乐土为墟矣且北寇游魂伺我之隙一旦示弱远窜求之望实惧非良计今特宜镇之以静羣情自安由是议不复行导善于因事虽无日用之益而岁计有余时府藏空竭惟有练数千端鬻之不售导乃与朝贤俱制练布单衣于是士人竞服练遂踊贵每端售得一金会大旱导上疏逊位下诏遣侍中敦谕再三然後视事性简素寡慾辅相三世仓无储谷衣不重帛帝赏赐甚渥于时庾亮以重兵镇外南蛮校尉陶称间导于亮将举兵内逼或劝导密为之备导曰吾与元规休戚是同悠悠之言宜絶智者之口即如君言吾便角巾还第复何惧哉又与称书以为庾公帝之元舅宜善事之谗间遂息亮虽在外而遥执朝权趋势者多归之导内不能平常遇西风尘起举扇自蔽曰元规尘汚人自汉魏以来赐諡多由封爵无爵者虽位通德重不得諡导始上疏正之导又以元帝睨同布衣每一崇进皆就拜山陵不胜哀戚汉魏百官不得拜山陵有之自导始也咸和五年卒年六十四帝举哀于朝堂三日諡曰文献褒赠之厚中兴名臣莫与为比

论曰易泰之九二曰包荒用冯河周官之训曰推贤让能而先之以惟克果断大臣当国诚贵乎休休有容及夫决疑定策又必有临大节不可夺之槩乃能取乱于内而弭患于外王导于晋可谓雅量镇俗矣惜乎沉静有余而奋发不足方苏峻刼迁乘輿则挈子远遁卞敦拥兵不赴则滥予官赏郭默矫杀方镇则擢授本州原其意虽主于含垢养晦以徐图其後卒之国威不振即国耻莫雪亦濡忍弗决之咎也若乃兄敦之始犯顺时导内愤刁刘之迫不但无垂涕泣之言且有内喜之意岂惟死负周顗亦且生愧王彬甚至以开门揖盗之周札犹抗议赠官其曲为札辨乃其深为敦讳也果可谓之大义灭亲乎然当王室不纲内外倥傯独能延揽人望息民勤学挽如綫之国脉以中兴一隅向使始基无导江南决不能立国其深心毅力有非寻常智勇所得与者後又卒能讨敦成功以补前过易曰需于血出自穴君陈曰必有忍其乃有济庶几近之矣

温峤

温峤字太真太原祁人司徒羨之从子也父愔河东太守峤性聪敏有识量博学能属文自少以孝悌称于宗族美丰仪善谈论初为司隶都官从事庾敦有重名而颇聚斂峤举奏之京都震肃平北大将军刘琨妻峤从母也琨雅敬峤请为从事中郎上党太守时并土凋敝羣盗四

起琨凭峤以为谋主从讨石勒屡立战功元帝镇江左琨谓峤曰昔班彪识刘氏之复兴马援知汉光之可辅吾欲立功河朔使卿延誉江南子其行乎使峤奉表劝进既至引见因陈琨忠诚效节词旨慷慨帝深器焉王导周顗庾亮桓彝等并与亲善屡求反命不许会琨为段匹磾所害乃除峤散骑侍郎初峤欲将命其母固止之峤絶裾而行其後母亡阻乱不获归葬由是固辞不拜苦请北归诏三司八座议其事皆曰昔伍员志复私雠东奔阖闾位为上将然後鞭平王之尸峤若以母未葬益当竭力朝廷使逆寇冰消反哀墓次讵可稍以乖嫌废其远图哉峤不得已乃受命累迁太子中庶子东宫与为布衣交数陈规讽又献侍臣箴时太子起西池楼观颇为劳费峤疏言宜俭约率下务农重兵以灭巨寇王敦反六军败绩太子将自出战峤执鞚谏曰奈何以万乘储副而身轻天下乃止明帝即位拜侍中参综机谋帝深倚重王敦忌之因请为左司马敦阻兵不朝多行陵纵峤再四极谏敦终不悟乃谬为敬干说密谋以附其欲深结钱凤为之声誉每曰钱世仪精神满腹峤素有知人称凤闻大说会丹阳尹缺峤说敦曰京尹輶轂喉舌公宜自选能者敦问谁可作峤以钱凤对凤亦推峤峤伪辞敦不听即表用峤峤恐既去凤于後间之因敦饒别起行酒至凤凤未及饮峤因伪醉以手版击凤帻坠作色曰钱凤何人温太真行酒而敢不饮敦以为醉两释之临别涕泗横流出合复入者再三峤去後凤说敦曰峤于朝廷甚密未必可信敦曰太真昨醉小加声色岂得便尔相谗由是峤得还都乃具奏敦逆谋请先为之备及敦构逆加峤中垒将军都督东安北部诸军事敦与王导书曰太真别来几日作如此事当募人生致之自拔其舌及王含钱凤奄至都下峤烧朱雀桁以挫其锋时帝欲亲将兵击含闻桥已絶大怒峤曰今宿卫寡弱若贼豕突危及社稷何惜一桥贼果不得渡峤自率衆与贼夹水战击王含败之复督刘遐追钱凤于江宁事平封建宁县开国公有诏敦参佐皆禁锢峤上疏曰敦敢行杀戮朝廷所不能抑骨肉所不能间处其朝者恒惧危亡原其私心岂遑晏处必其凶悖自可罪人斯得如枉入奸党谓宜施之以寛帝从之会诏公卿坐论时政所先峤因奏军国要务一请竭力资助淮泗都督又择一偏将益兵寿阳以保固徐豫援助司土二请州置田曹掾一人劝农察吏三请分军出屯缘江上下良田四请省冗员五请复立籍田廩犧二官六以罪不相及请除夷三族之制奏入帝多纳之寻与王导郗鉴庾亮卞壺等受顾命同辅幼主咸和初出为江州刺史平南将军镇武昌据上流为国家应援亦以防苏峻也峤甄异行能甚有惠政又陈豫章十郡之要宜选单车刺史抚之浔阳滨江都督应镇其地诏不许在镇见王敦画像曰敦大逆宜加斲棺之戮削去之初峤闻庾亮之徵苏峻也虑必有变求还朝以备不虞不听峻果连祖约同反峤闻屯浔阳即遣督护王愨期等率舟师赴难及京师不守峤号恸有候之者悲哭相对俄庾亮来奔宣太后诏进峤骠骑将军开府仪同三司峤曰今日当以殄寇为急未有功而先拜官何以示天下遂不受时亮虽奔败峤愈推崇更分兵给之遣使要陶侃同赴国难侃恨不预顾命峤屡说不同乃用其从弟充及参军毛宝言共推侃为盟主侃果遣督护龚登帅兵诣峤峤有衆七千于是列上尚书陈峻约罪状洒泣登舟移告四方征镇曰贼臣祖约苏峻同恶相济天夺其魄死期将至寇逼宫城残虐朝士劫辱子女承问悲惶精魂飞散峤闇弱不武不能殉难慚负先帝托寄之重义在毕力死而後已今躬率所统为士卒先催进诸军一时电击昔包胥楚国之微臣重趼致诚义感诸侯董卓劫迁献帝虐害忠良臧洪郡之小吏耳登坛插血涕泪慷慨实厉羣后况今居台鼎据方州拜受国恩者哉不期而会不亦宜乎征西陶公国之耆德忠肃义正勲庸弘着方镇州郡同禀规畧以雪国耻峤虽怯弱忝据一方赖忠贤之规文武之助士稟义风人感皇泽且护军庾公帝之元舅德望隆重与峤戮力得有资凭若朝廷之不泯也其各明率所统无後事机赏

募之信明如日月有能斩约峻者封五等侯夫忠为令德为仁由已万里一契义不在言也时侃虽许自下而未发复追龚登使还峤乃重移书激怒之曰军有进无退近已移檄远近言于盟府克後月大举南康建安晋安三郡并在路次惟须仁公所统至便齐进耳今召军还疑惑远近令此州不守荆楚将来之危乃当甚於今日以大义言之主辱臣死仁公进当为大晋之忠臣参桓文之义退当以慈父雪爱子之痛峻约凶逆无道人皆切齿今之进讨如石投卵出军既缓复召兵还是为败于几成也愿深察所陈以副三军之望书至侃深感悟率所统兼道而进与峤亮同趣建康戎卒六万旌旗七百里金鼓之声震天时祖约据历阳与峻为首尾见峤等军盛谓其党曰吾固知峤能为四公子之事今果然矣峻闻峤将至逼车驾幸石头峤与峻兵相持日久不决军食尽贷于陶侃侃怒又欲西归峤曰师克在和光武之济昆阳以寡敌衆仗义故也峻约小竖今挑之战可一鼓而擒奈何舍垂立之功成进退之计且天子幽逼社稷危殆正臣子肝脑涂地之日峤与公并受国恩事若克济则臣主同祚如其不捷虽灰身不足以谢先帝今之事势义无旋踵骑虎安可中下哉公若独还人心必阻阻衆败事义旗将回指于公矣侃无以对乃分米五万以饷峤军遂留不去峤于是建行庙设坛塲告皇天后土祖宗之灵亲读祝文声气激昂流泪覆面三军莫能仰视其日侃督水军向石头峤等率精勇一万从白石挑战峻因醉突阵为侃将所斩峻弟逸後嬰城自固峤乃立行台布告远近朝臣皆令赴台至者云集乃悉诸军齐攻榻杭大破逸军获逸及韩晃斩之于是奋威长史滕含抱帝奔峤船羣臣顿首号泣请罪时侃虽为盟主而处分规畧一出于峤及贼灭拜骠骑将军开府仪同三司封始安郡公初长史孔愉以峤母亡未葬颇不韪之及峤讨平苏峻愉往石头诣峤峤执愉手流涕曰自顷丧乱忠孝道废能持古人之节者惟君一人耳时咸重愉之守正而服峤虚公王导以峻党路永匡术中途以衆归顺将褒显之峤曰术辈首为乱阶晚虽改悟未足赎罪得全首领幸矣导无以夺时朝议欲留峤辅政峤以导先帝所任固辞又以京邑荒残留资蓄具器用而後还藩未旬日中风卒时年四十二江州士庶莫不相顾泣下册赠侍中大将军諡曰忠武论曰峤痛心于絶裾之行卒慷慨从王志安社稷虽以此稍挂物议然勇战敬官于以显亲扬名观其後可以谅其初矣其在东宫则教谕以正其德在朝廷则综理以成其务在藩镇则仗义约信以伸其威智足以御小人虽奸如王敦可使疑而成信有独行遇雨之深心焉义足以动君子虽褊如陶侃可使异而终同有先号後笑之毅力焉是以遭折挫而不回历艰难以有济固其精诚使然亦有忍有容乃终以成大事也夫其勤王之志之纯笃如此其御乱之才之机宜又如彼忠孝文武峤实兼之晋统後亡于是乎赖而当时论者仅指为过江第二流人物崇虚名堕实用风气之坏运祚随之盖天厌晋德而峤亦自是不永其年矣岂偶然哉

卷十九

钦定四库全书

史传三编卷十九

大学士朱轼撰

名臣传十一

晋

陶侃

陶侃字士行本鄱阳人也吴平徙家庐江之浔阳父丹扬武将军侃早孤贫为县吏鄱阳孝廉范逵常过侃时仓卒无以待宾其母乃截发得双髻以易酒肴乐饮极欢虽仆从亦过所望逵过庐江太守张夔称之夔召为督邮领枞阳令有能名迁主簿会州部从事之郡欲有所按侃闭门部勒诸吏谓从事曰若鄙郡有违自当明宪直绳詎宜遽以非礼相逼从事惭而退夔妻有疾将迎鑿数百里外时正寒雪诸纲纪皆难之侃独曰小君犹母也安有父母之疾而不尽心乎乃请行衆咸服其义长沙太守万嗣过庐江见而异之曰君终有大名命子结交而去察孝廉至洛阳数诣张华华初不甚接遇侃每往神无忤色华後与语大奇之除郎中时豫章国郎中令杨暉侃州里也为乡论所归侃诣之暉曰易称贞固足以干事陶士行是也与同车共诣顾荣遂由此知名寻为吏部令史黄庆所举补武昌令与太守吕岳有嫌弃官归会荆州刺史刘弘将之官辟为南蛮长史命先往襄阳讨贼张昌破之弘既至谓侃曰吾昔参羊公军谓吾後当居其处今观卿必继老夫矣以军功封东乡侯陈敏遣其弟恢来寇武昌弘以侃为江夏太守加督护使与诸军并力拒恢侃乃以运船为战舰或言不可侃曰用官物讨官贼但须列上有本末耳于是击恢所向必破侃戎政齐肃凡有所获皆分士卒身无私焉以母忧去职尝有二客来吊化双鹤冲天而去时人以为孝感服阕元帝拜为龙骧将军武昌太守时天下饥荒山夷皆断江刦掠侃令诸将诈作商船以诱之刦果至生获数人是西阳王羲左右侃即遣兵逼羲令出向贼侃整阵于钓台羲缚送其帐下二十人斩之自是水陆肃清流亡者归之盈路侃竭资振给焉又立夷市于郡东大收其利杜 之乱帝使侃督将军周访赵诱击破之先是周顗为荆州刺史屯于浔水为 所困侃使朱伺救之贼退保泠口侃谓诸将曰此贼必更步向武昌吾宜还城昼夜三日行可至卿等谁能忍饥鬪耶部将吴寄曰要欲十日忍饥昼当击贼夜分捕鱼足以相济侃曰卿健将也贼果增兵来攻侃遣朱伺等逆击大破之获其輜重遣使告捷于王敦敦曰若无陶侯便失荆州伯仁方入境便为贼所破即表拜侃荆州刺史移鎮沔江而 将王贡提精卒三千出武陵江诱五谿夷以舟师断官运径向武昌侃遣部将夜趣巴陵掩其不备大破之所斩降无算其後贡复挑战侃遥谓之曰杜 为益州吏盗用库钱父死不奔丧卿本佳人何为随之天下宁有白头贼乎贡初横脚马上闻侃言便收敛容色

侃知其可动复令谕之贡遂来降而 败走进克长沙获其将毛宝等而还王敦深忌侃功会侃还江陵诣敦作别朱伺等谏不听敦遂留不遣以其弟廙代之左转侃广州刺史荆州故吏咸诣敦留侃不许由是衆情愤惋遂西迎杜曾以距廙敦疑衆受侃意旨被甲持矛将杀侃出而复回者数四侃正色曰使君之雄当断裁天下何此不决乎因起如厕参军梅陶等言于敦曰周访与侃姻亲如左右手安有断人左手而右手不应者乎敦意解设盛饌饌之侃便夜发时王机盗据广州侃至始兴州人皆言宜观察形势侃长驱入境遣督护讨机斩之机党温邵犹拥衆不服诸将劝侃乘势讨之侃曰吾威名已着但用一函纸足耳邵果走广州遂平以功封柴桑侯在州无事辄朝运百甓于斋外暮运于斋内人问其故答曰吾方致力中原过尔优逸恐不堪事故习劳耳时梁硕陷交州侃又遣将击平之即诏侃领交州刺史封次子夏为都亭侯进征南大将军开府仪同三司王敦既平迁都督荆雍益梁州诸军事复移鎮荆州士女交庆侃性聪敏勤于吏职恭而近礼好獎人伦终日敛膝危坐军府政事检摄无遗远近书疏皆手答笔翰如流未尝壅滞引接疎远门无停客常语人曰大禹圣者乃惜寸阴至于衆人当惜分阴岂可逸游荒醉生无益于时死无闻于後是自弃也诸参佐或以谈戏废事者命取其酒器蒲博之具投于江将吏则加鞭扑曰擣蒲者牧猪奴戏耳老庄浮华非先王之法言不可行也君子当正其衣冠摄其威仪何有乱头养望自谓宏达耶有奉饌者必问其所由若力作所致虽微必喜慰赐参倍若非理得之则切厉诃辱还其所饌尝出游见人持一把未熟稻侃问用此何为人云行道所见聊取之耳侃大怒曰汝既不佃而戏贼人稻执而鞭之是以百姓劝于农作家给人足尝造船其木屑竹头皆令籍而掌之咸不解所以後正会积雪始晴听事前犹湿乃以木屑布地及桓温伐蜀又以侃所贮竹头作丁装船其综理微密皆此类也苏峻作逆侃子瞻为峻所害温峤要侃同赴国难侃初以不与明帝顾命为恨答曰吾疆場外将不敢赴局峤固请之因推为盟主又以峻杀其子重遣书以激怒之侃妻龚氏亦固劝自行于是即戎服登舟瞻丧至不临五月与庾亮温峤等俱会石头诸军即欲决战侃以贼盛不可争锋当用智计禽之部将李根请立白石垒侃不从曰若垒不成卿当坐之根曰查浦地下又在水南惟白石峻广可容数千人贼来攻不便灭贼之术也侃笑曰卿良将也乃筑垒于白石夜修晓讫贼见垒大惊及贼攻大业垒侃将救之长史殷羡曰吾军步战不如峻请急攻石头峻必救之则大业自解从之峻果解兵趣石头诸军与战侃部将斩之于阵峻弟逸复领其衆侃与诸军又击斩逸于石头初峻之乱由庾亮激成亮有高名又以后兄受顾命及是亮用温峤谋诣侃拜谢侃惊止之曰庾元规乃拜陶士行耶且君侯修石头城以拟老子今反见求司徒王导入石头令取故节侃笑曰苏武节似不如是导有惭色使人屏之侃还江陵寻进侍中太尉封长沙郡公都督交广七州诸军事移鎮巴陵遣参军张诞讨五谿夷降之属後将军郭默矫诏袭杀荆州刺史刘胤侃闻之曰此必诈也国家年小不出胸怀且刘江州为朝廷所礼虽方任非才何缘猥加极刑耶默虓勇所在暴掠以大难新除威网寬简欲因隙会以骋其从横耳即表讨默又与王导书曰郭默杀方州即用为方州害宰相便为宰相乎导答曰默据上流之势如船舰成资故包含隐忍以俟足下岂非遵养时晦以定大事乎侃省书笑曰是遵养时贼也侃兵至默将缚默以降斩之石勒素憚默骁勇闻侃讨之兵不血刃乃益畏侃侃子瞻为峻部将冯铁所杀奔於石勒侃告以故勒即杀之诏侃都督江州领刺史移鎮武昌遂擢用张夔范逵刘弘等子孙凡微时所荷一殮必报遣子斌与部将桓宣西伐樊城走石勒将郭敬使兄子臻竟陵太守李阳等共破新野遂平襄阳拜大将军剑履上殿入朝不趋赞拜不名上表固让曰臣非敢贪荣于畴昔而虚让于今日事有合于时宜臣岂敢与朝廷作异使臣仗国威灵

梟雄斬勒則又何以加咸和七年六月病篤又上表遜位曰臣少長孤寒始愿有限過蒙聖朝歷世殊恩陛下睿鑒寵靈彌泰臣垂八十位極人臣肩手肩足尚復何恨但以陛下春秋尚富余寇不除山陵未還所以憤忼兼懷不能已已臣父母旧葬今在潯陽奉迎窀穸乃告老下藩不圖所患遂爾綿篤臣間者猶謂犬馬之齒尚可少延欲為陛下西平李雄北吞石勒是以遣母丘奧于巴東授桓宣于襄陽良圖未叙于此長乖此方之任內外之要愿陛下速選臣代必得良材奉宣王猷遂臣成志則臣死之日猶生之年陛下虽天縱英奇方事之殷當賴羣儔司徒導鑒識經遠光輔三世司空鑒簡素貞正內外惟允平西將軍亮雅量詳明器用周時即陛下之周召也獻替疇咨敷融正道四海幸賴謹遣長史殷羨奉送所假節麾幢曲蓋侍中貂蟬太尉章荊江州刺史印傳檠戟仰戀天恩悲酸感結以後事付右司馬王愨期統領文武侃輿車出臨津就船明日卒時年七十六成帝下詔褒美贈大司馬諡曰桓祠以太牢侃在軍四十一載雄毅明斷自南陵迄于白帝數千里中路不拾遺蘇峻之役庾亮輕進失利亮司馬殷融詣侃謝曰將軍為此非融等所裁將軍王章至曰章自為之將軍不知也侃曰昔殷融為君子王章為小人今王章為君子殷融為小人侃性纖密好問頗類趙廣漢嘗課諸營種柳都尉夏施盜官柳植于已門侃一見知為武昌西門柳施怖謝時殷浩庾翼諸名士皆為佐吏侃每飲酒有定限浩等勸更少進侃淒懷良久曰年少曾有酒失亡親見約故不敢踰議者以武昌北岸有郗城宜分兵鎮之侃都不答而言者无已侃乃渡水獵引將佐語之曰我所以設險者正以長江耳郗城隔在江北内无所倚外接羣夷夷中利深晉人貪利夷不堪命必引寇致禍非御寇也後庾亮戍之果大敗季年懷止足之分不与朝權先卒之一一年即欲遜位歸國佐吏苦留之及疾篤將歸長沙軍資器械牛馬舟車皆有定簿封印仓库自加管钥以付王愨期然後登舟將出府門顧謂之曰老子婆娑正坐諸君輩尚書梅陶與親故書曰陶公机神明鑒似魏武忠順勤勞似孔明陸抗諸人不能及也謝安每言陶公虽用法而恒得法外意其為世所重如此

論曰晉自阮籍王衍輩弃禮任情崇虛黜有過江諸名士猶承其放誕風流之習往往以養望為弘雅以政事為俗人賴陶長沙精勤果毅内綜机事外靖寇烽遂使奄奄江左頓有生氣信可謂大厦之支中流之柱矣方庾亮當國憚侃得衆修石頭城以備之侃深用為恨蘇峻之亂其迟迟不赴難者以此非獨耻其不預顧命已也然君父在患臣子虽蹈湯赴火惟恐不速夫怒于室而色于市猶或讥之奈何以忿其同官之故上及朝廷乎王茂弘疾劉隗刁協之間謬指王敦初舉義同桓文陶士行惡庾亮之專托言疆場外將不敢越局彼皆挾其悁悁之私而闇于大義後之論者遂疑導黨其私親而史言侃据上流握強兵潛有窺竅之志固皆文致之詞抑亦其自貽口實也君子觀王彬之面數敦罪桓彝之耻通峻使導與侃固不能逃賢者之責矣

郗鑒

郗鑒字道徽高平金鄉人少孤貧躬畊力学以博雅著名趙王倫辟為掾見倫有不臣之迹称疾去及倫篡其黨皆至大官而鑒独不染逆節惠帝反正累官中書侍郎時東海王越與大將軍荀曦爭辟鑒皆不應鑒从兄旭曦之別駕也恐禍及勸使應召鑒終不回京師陷寇難蜂起鑒遂陷于陳午賊中邑人張實先求交于鑒鑒不许至是實來午營省鑒疾鑒謂曰相與邦壤

义不及通何可怙乱至此耶实大慙而退午以鉴有名德将逼为主乃逃归乡里时大饥州人士素被其恩义者相与资贍鉴复分所得以恤宗族及乡曲孤老全济甚多衆感激遂共依鉴举千余家避难于鲁之峯山元帝在江左承制假鉴龙骧将军兖州刺史镇邹山时荀藩刘琨各遣其部人并为兖州争相倾动州民莫知所适又徐龛石勒左右交侵外无救援百姓皆掘野鼠蛰鷺而食之终无叛者三年间衆至数万帝就加都督兖州诸军事永昌初徵拜尚书明帝初即位王敦专制内外危迫使鉴为外援由是拜都督扬州江西诸军事镇合肥王敦忌之表为尚书令徵还道经姑孰与敦相见敦谓曰乐彦辅短才耳考其实岂胜满武秋耶鉴曰彦辅道韵平淡在倾危之朝不可得而亲疎愍怀太子之废柔而能正奈何以武秋失节之士相擬敦曰愍怀废徙之际危机交急人何能以死守之以此相方其不减明矣鉴曰丈夫北面事人詎可偷生屈节腠颜天壤耶苟道数将极固存亡以之耳敦恶其言不复见拘留不遣敦党谗毁日至鉴举止自若初无惧心既还台鉴遂与帝谋讨敦既而敦反令王含等攻逼京师金议含衆百倍而城小不固宜及彼军势未成大驾自出距战鉴曰羣逆纵逸其势不可当可以算屈难以力竞贼无远图惟恃豕突一战今百姓惩敦往年之暴掠皆人自为守旷日持久必生义士之心令谋猷得展今以此弱力敌彼强寇决胜负于一朝虽有申胥之徒义存投袂何补于既往哉帝从之含等既平温峤疏请宥敦佐吏鉴以先王立君臣之教贵于仗节死义若辈虽遭逼迫然进不能止其逆谋退不能脱身远遁准之前训宜加义责又以钱凤母年八十宜蒙全宥乃从之封高平侯赐绢四千八百匹帝以其有器望万几动静皆参问之乃诏鉴特草上表疏以从简易时王导议欲追赠周札官鉴建议不合导不从鉴复驳之曰敦之逆谋履霜日久缘札开门故令王师不振若敦前者之举义同桓文则先帝可谓幽厉耶朝臣虽无以难而不能用迁车骑将军都督徐兖青三州军事假节镇广陵寻而帝崩与王导温峤庾亮等并受遗诏辅少主进车骑大将军开府仪同三司领徐州刺史及闻苏峻反便欲率所领东赴诏以北寇不许于是遣部将刘矩领三千人宿卫京师王师败绩庾亮宣太后诏进鉴司空鉴去贼密还城孤粮絶人无固志奉诏流涕设坛塲刑白马大誓三军曰贼臣祖约苏峻不恭天命不畏王诛汨乱五常侮弄神器遂制胁幽主残害忠良祸虐黎庶使天地神祇靡所依归昔荆楚泯周齐桓纠盟董卓陵汉羣后致讨义存君亲古今一也今主上幽危百姓倒悬忠臣正士志切报国凡我同盟戮力一心若二寇不梟义无偷安有渝此盟明神殛之鉴登塲慷慨三军争为用命乃遣将军夏侯长等间行谓温峤曰或闻贼欲挟天子东入会稽宜先立营垒屯据要害既防其越逸又断彼粮运然後清野坚壁以待贼贼攻城不拔野无所掠必自溃矣峤深以为然及陶侃为盟主遣鉴都督扬州八郡军事王舒虞潭皆受鉴节度率衆渡江与侃会于茄子浦筑白石垒而据之会舒等战不利鉴乃与郭默还据京口立大业曲阿虔亭三垒以拒贼贼攻大业城中乏水郭默窘迫遂突围而出参军曹纳以为大业京口之扞倘一旦不守则贼方轨而进请还广陵以俟後举鉴乃大会僚佐责纳曰吾荷先帝重托正复捐躯九泉不足以报今强寇在郊衆心危迫君腹心之佐而生长异端当何以率先义衆镇一三军耶将斩之久而乃释会峻死大业围解及峻弟逸走吴兴鉴遣参军李闓追斩之降男女万余口拜司空进侍中封南昌县公又以讨平贼帅刘徵功进太尉时王导辅政务存大纲不拘细目委任贾宁诸将多不奉法陶侃庾亮屡欲率兵废导皆以谄鉴鉴固执不许乃止鉴之守正不移厚德居心多此类也寻寝疾上表荐蔡謨自代兄子迈为兖州刺史卒年七十一帝哭于朝堂遣使册赠一依温峤故事諡曰文成论曰郗鉴雅量不如王导谢安才略不如温峤陶侃而怀方秉正卓然自树于乱朝浊俗之中进礼退义造次不违可谓东晋之重臣矣是以在乡党则怀

其德化在朝廷则惮其丰采观其每有驳议屹如山岳有导与峤所莫能跻攀者非独当时乱臣贼子闻之胆寒也

卞壺

卞壺字望之济阴冤句人祖统琅邪内史父粹以清鉴称兄弟六人并登宰府长沙王乂专权粹正色立朝乂忌而害之壺弱冠有名辟命皆不应元帝鎮建业召为从事中郎委以选举甚见亲重出为明帝东中郎长史遭继母忧既葬起复旧职累辞不就元帝遣中使敦迫壺陈词哀苦帝乃不夺其志服阙为世子师壺前後居师佐之任克尽辅导一府严惮焉中興建补太子中庶子侍讲东宫寻拜御史中丞弹劾不避权贵时淮南小中正王式继母式父歿後服丧讫还前夫家前家亦有继子奉养至终遂合葬于前夫式自云父临终母求去父许诺于是制出母齐衰期壺奏曰若其母犯七出之责父当于存日弃之无缘以絕义之妻留家制服若其父临困谬乱使去留自由者此为相要以非礼则存亡俱无所得从式母于夫亡制服又未尝更嫁夫没之後正其从子之日而使存无所容居歿无所托地此为母以子出也式为国土而违礼亏教不可居人伦诤正之任司徒组等不能率礼正违并当免官削爵下廷尉疏奏诏特原组等而式遂废黜终身王敦既平以功封建兴县公与王导等俱受明帝顾命辅幼主拜尚书令时帝初即位羣臣进玺司徒导以疾不至壺正色曰王公岂社稷之臣耶大行在殡嗣皇未立寧是人臣辞疾之时导闻乃輿疾而至时召乐谟为郡中正庾怡为廷尉评谟广之子怡珉族子也各称父命不就壺奏曰人非无父而生职非无事而立有父必有命居职必有悔若父各私其子此为王者不能官一人而君臣之道废矣广珉受宠圣世身非已有况後嗣哉谟怡乃就职时王导称疾不朝而私送徐州刺史郗鉴壺奏导亏法从私无大臣之节御史中丞鍾雅阿挠王典不加准绳并请免官虽事寝不行举朝震肃其刚直不畏强御皆此类也壺勤于职事当官干实明帝深器之而性不肯苟同时好故为诸名士所少阮孚谓曰卿尝无闲泰如含瓦石不亦劳乎壺曰诸君子以道德恢弘风流相尚执鄙吝者非壺而谁时贵游子弟多慕王澄谢鲲为达壺厉色于朝曰悖礼伤教罪莫斯甚中朝倾覆实由于此欲奏推之王导庾亮不从乃止然闻者莫不折节帝时以王导勲德每幸其第为其妻曹氏拜侍中孔恒密表以为非礼导闻之曰王茂弘弩疴耳若卞望之之岩岩刁玄亮之察察戴若思之峰岨当敢尔耶有沙门某者偃蹇不羈于大会中尝枕王丞相膝闻壺至便敛容起坐曰彼是礼法中人壺廉洁俭约息当婚诏特赐钱五十万固辞不受会庾亮以苏峻终必为乱及今徵之纵不受命为祸犹浅若复经年便滋蔓难制此是晁错劝景帝早削七国事也议者皆无以易壺固争曰峻拥强兵多藏无赖又逼近京邑一旦有变易为蹉跌宜深思远虑未可仓卒亮不纳壺与平南将军温峤书曰元规召峻意定怀此於邑温生足下奈此事何今所虑是国之大事且峻已出狂意而召之更速必纵其羣恶以向朝廷王公亦同此意争甚恳切不能如何若卿在内俱諫必能相从今内外戒严恐不能无伤如何或劝壺宜蓄良马以备不虞壺正色对曰以逆顺揆之理无不济万一不然岂须马哉峻果连祖约称兵诏以壺都督大桁东诸军事壺率郭默等与峻大战于陵西为峻所败壺与鍾雅退还与雅还节谢罪峻进攻青溪栅壺又拒击之峻因风纵火烧宫寺大军败绩壺背痈新愈创犹未合力疾而战率厉散衆及左右吏数百人攻贼麾下苦战而死时年四十八二子眊盱随之亦赴敌死其母拊屍哭曰父为忠臣子为孝子夫何恨乎峻平朝议赠壺稍轻尚书郎弘诌议曰夫事父莫大于孝事君莫大于忠惟孝故能尽

敬竭诚惟忠故能见危授命壺委质三朝尽规翼亮拥卫至尊则有保傅之恩正色在朝则有匪躬之节贼峻造逆戮力致讨再对贼锋父子并命可谓破家为国以死勤事于是改赠壺侍中骠骑将军开府仪同三司諡忠贞祀以太牢二子皆褒赠其後盗发壺墓尸僵鬓须苍白面如生两手悉拳爪甲穿达手背安帝诏给钱十万以修莹兆壺子孙多达官始峻举兵日宣城内史桓彝即日率所领赴难及京师不守峻分兵攻陷宣城长史裨惠劝彝宜暂通使于峻以纾交至之祸彝曰吾受国厚恩义在致死焉能忍耻与贼臣通问遣部将俞纵守兰石峻将韩晃急攻之左右请暂退纵曰吾之不负桓侯犹桓侯之不负国也遂与彝俱死时丹阳尹阳曼黄门侍郎周导庐江太守陶瞻皆以力战死右卫将军刘超侍中锺雅以谋奉太子出奔义军死而壺以父子彝以主臣同时致命为尤烈焉

论曰国于天地必有与立三纲五常礼之大体自五帝三王以来世世守之迄暴秦不变夫礼者国之维而衆之纪其起化也微其止邪也于未形所以辨上下定民志恒必由之故坏国丧家亡人必先自去其礼也晋承魏烬其君臣父子夫妇兄弟类多放废于礼法之外学宗老庄而黜六经谈尚虚无而薄名检行身以放浊为通进士以苟得为贵当官以养望为高及夫维弛而国亡纪散而衆乱流风余焰煽于江左王导庾亮诸人皆身堕其中莫能振拔传曰乱之生也惟礼可以已之其源不清其流逾浊势固然耳卞壺秉方正之德以名教为己任既以礼自处即以礼处人驳王式之短丧使知居丧饮酒食肉者为无亲弹王导之托疾使知藩镇拥兵不朝者为无上责贵游子弟之悖礼伤教使知诸名士相高以放达相尚以风流者为无法虽孤鸣寡和而言无罪闻足戒庶几逆党薄夫犹憬然于王章国宪天理民彝之未尽渐灭故以王敦苏峻桓温之奸相与睥睨神器至于犯宫阙逼乘輿擅废立宜不难挈而有之而人心不死公义莫逃不能不迟回观望以徐俟其後则虽谓东晋不絶如綫之祚重为郗卞诸公所延可也记曰言而履之礼也壺立朝谔谔卒乃父死忠子死孝不愧平生之言斯为得所履而安者哉

谢安

谢安字安石陈国阳夏人镇西将军尚之从弟也父裒太常卿安年四岁时桓彝见而叹曰此儿风神秀彻後当不减王东海兄奕为剡令有老人犯法罚以醇酒醉犹未已安时七八岁在奕边谏止之奕为改容遣去及总角神识沉敏风宇条畅善清言王蒙尝语子修曰此客亹亹为来逼人王导亦深器之由是少负重名前後累为徵辟皆不就寓居于会稽之东山与王羲之及许询支遁游处以山水文籍自娱扬州刺史庾冰以安有重名必欲致之安不得已赴召月余告归後除尚书郎琅琊王友并不起范汪举安为吏部郎安以书谢絶之有司奏安被召历年不至禁锢终身遂栖迟东土常往临安山中坐石室临濬谷悠然叹曰此亦伯夷也安虽在布衣人皆以公辅期之至相谓曰安石不出当如苍生何安每游东山常以伎乐自随会稽王昱闻之曰安石必出既与人同乐即不得与人同忧安妻丹阳尹刘惔妹也见家门贵盛而安独静退笑谓曰丈夫不如此也安捉鼻曰恐不免耳初弟万受任北征惟以啸咏自高未尝抚衆安深忧之自队将已下安皆代为慰勉且责万曰汝为元帅宜速接对诸将以悦其心岂有傲诞若斯而能济事者万败後安始有仕进之志时年已四十余桓温请为司马乃赴召温喜甚言笑竟日既出温问左右颇常见我有如此客否温後诣安值其理发安性迟缓久而

乃罢使取帟温见留之曰令司马着?进其见重如此会弟万病卒安投牋求归寻除吴兴太守在官无时誉去後令人思徵拜侍中温既废帝奕立简文安见温遥拜温惊曰安石卿何乃尔安对曰未有君拜于前臣立于後进吏部尚书简文帝疾笃温荐安宜受顾命时帝遗诏令温依周公居摄故事又曰少子可辅者辅之如不可君自取之侍中王坦之持诏入于帝前毁之曰天下宣元之天下陛下何得专之帝乃使改诏曰国家事一禀大司马如诸葛武侯王丞相故事温初望帝临终禅位不尔便当居摄及见遗诏既不副所望心疑安与坦之所为大衔之温入赴山陵百官迎于新亭时都下匈匈云欲诛王谢因移晋室坦之甚惧安神色不变曰晋祚存亡决于此行温大陈兵卫延见朝士坦之流汗沾衣倒执手版安从容就席坐定谓温曰安闻诸侯有道守在四隣明公何须壁後置人耶温笑曰正自不能不尔遂命撤之与安语笑移日郗超时卧温帐中听其言风动帐开安笑曰郗生可谓入幕之宾矣坦之初与安齐名至是方知优劣时温威振内外孝武又在幼冲安与坦之尽忠夹辅卒安王室温病笃讽朝廷加九锡屡使人趣之安与坦之故缓其事使袁宏具草草上安辄改之由是历旬不就温卒事竟寝寻进尚书仆射领中书令安不欲委任桓氏固请太后临政而坦之已出为徐州刺史安独力维持虽会稽王道子亦赖弭谐之益又当秦寇偏境边檄四至安每镇以和靖御以长算文武用命为政不存小察惟弘大纲人比之王导而谓文雅过之又以其余力缮修宫室体极崇闳而役无劳怨帝既亲政进安中书监骠骑将军录尚书事固让军号时悬象失度亢旱弥年安奏兴灭继絶求晋初佐命功臣後而封之加都督扬豫五州诸军事时朝廷方以苻坚为忧诏求可镇御北方者安以其兄子幼度应郗超素与谢氏不善闻而叹曰安之明乃能违衆举亲幼度之才足以不负所举衆咸谓不然超曰吾昔兴幼度俱在桓公府见其使才虽履屐间亦得其任是以知之幼度既镇广陵募骁勇之士得刘牢之等数人以牢之为参军常领精锐为前锋号曰北府兵所向克捷凡斩坚骁将数人于是进安卫将军开府仪同三司封建昌县公其後坚复大举入寇衆号百万阵于淮淝诏以安弟石为征讨大都督幼度为前锋都督与安子辅国将军琰西中郎将桓伊等督兵八万距之时都下震恐幼度入问计于安安夷然答曰已别有旨既而寂然安遂命驾出山墅亲朋毕集与幼度围棋赌别墅安棋常劣于幼度是日幼度惧便为敌手而又不胜安顾谓其甥羊昙曰以墅乞汝安遂游陟至夜乃还指授将帅各当其任时桓冲深以根本为忧遣精骑三千入援安固却之曰朝廷处分已定兵甲无阙宜留以防西藩冲叹曰安石有庙堂之量而不闲将略今大敌垂至方游谈不暇遣诸不经事少年拒之衆又寡弱天下事已可知矣及坚屯寿阳列阵临淝水幼度等衆不得渡幼度使谓苻融曰君远涉吾境而临水为阵是不欲速战诸君少却令将士得周旋仆与诸君缓轡而观之不亦乐乎坚衆皆曰宜阻淝水莫令得上坚曰但却军令得过而我以铁骑数十万向水逼而杀之融以为然遂麾使却衆乱不能止幼度与琰伊等以精锐八千涉水决战坚中流矢斩大将苻融于阵坚兵自相蹈藉而死者蔽野塞川余衆宵遁闻风声鹤唳皆疑为晋兵昼夜不敢息草行露宿重以饥冻死者十七八坚单骑逃去获坚所乘云母车及仪服器械不可胜算捷书至安方与客围棋看讫便掇置床上了无喜色棋如故客问之徐答曰小儿辈遂已破贼既罢还内过户限不觉屐齿之折其矫情镇物如此以总统功拜太保安欲乘胜混一海宇上疏求自北征进都督扬江等十五州军事时桓冲新卒朝议欲以幼度为荆州刺史安自以父子名位太盛又惧桓氏失职桓石?复有沔阳之功虑其骁勇在形胜之地难制乃以桓石民为荆州桓石?为豫州桓伊为江州其经远无竞类皆如此安尝疑刘牢之不可独任又知王味之不宜专城已而一以乱终一以贪败时咸服其知人安壻王国宝坦之之子也安恶其嗜利不行

检每抑而不用由是怨安国宝从妹为会稽王道子妃帝与道子皆嗜酒遂狎昵国宝安勋位既高国宝复从中构煽帝遂稍疎忌焉帝召桓伊饮讌安侍坐酒酣伊拊箏而歌怨诗曰为君既不易为臣良独难忠信事不显乃有见疑患周旦佐文武金縢功不刊推心辅王政二叔反流言声节慷慨安闻之泣下沾衿因越席而捋其须曰使君于此不凡帝甚有愧色会苻丕求援安乃请自将救之出镇广陵筑新城而居之安虽受朝寄然东山之志始末不渝至是尽室而行造泛海之装欲须经畧粗定自江道还东俄遇疾作乃请量移既还都遂表乞逊位寻卒时年六十六帝临于朝堂三日赠太傅諡曰文靖安素有雅量为士庶敬爱尝与孙绰等泛海风起水涌衆皆惧安吟啸自若舟人以安故犹去不止风转急安徐曰如此将何归舟人承言即回在京师乡人有罢县归者诣安问其归资有蒲葵扇五万安取其中者捉之由是竞买价增数倍安本能为洛下书生咏有鼻疾故其音浊名流爱而莫能及或手掩鼻以效之及至新城筑埭于城北後人追思之名为召伯埭幼度安兄奕子也少为安所器安尝戒约子侄因曰子弟亦何与人事而欲使其佳羣从皆莫能答幼度曰譬如芝兰玉树乐其生于阶庭耳安大悦及长有经国才以讨苻坚功封康乐县公都督徐兗等七州军事卒赠车骑将军开府仪同三司諡献武

论曰谢安与殷浩当韦布时并负苍生之望其应桓温之召也高崧尝戏之曰今日苍生将如卿何盖阴以浩之前车相讽厉而安独克弘远谟一雪处士虚声之谤固知体公识远则隐显同归而郝隆所谓处为远志出为小草者未为通论矣传言安性嗜音乐期功之丧不废丝竹王坦之尝书谕之曰天下之宝当为天下惜之安竟不从又尝以公暇与王羲之登冶城悠然有高世之想羲之以为夏禹胼胝文王旰食今四郊多垒宜思自效而虚谈废务恐非所宜安答曰秦任商鞅二世而亡岂清言致患耶安之放达类如此向使遇卞壺将毋与悖礼伤教者同讥欤淝水之役强敌压境国势孤危而安命驾游山围棋赌墅先圣所谓临事而惧者当不如是桓冲遣精骑三千入援安固却之曰朝廷处分已定吾不知其所谓已定者果能自信否耶以江左单弱之军当苻坚百万之衆晋祚不亡幸也户限屐齿之折安固自以为喜出望外哉或谓是时强臣跋扈于中猾敌寇攘于外人情汹汹日不暇给安殆故为游戏示有余闲耳其後宋寇准在澶渊饮酒酺睡掷骰子亦师此意是说也曲谅古人之心不失为恕道而未可为训也

卷二十

钦定四库全书

史传三编卷二十

大学士朱轼撰

名臣传十二

南朝宋

袁粲

袁粲字景倩陈郡阳夏人父濯早卒粲幼孤祖豹哀之名之曰愍孙伯叔并当世显荣而愍孙饥寒不免母王氏躬事纺绩以供朝夕愍孙少好学有清才随伯父洵为吴郡拥敝衣读书足不踰户从兄顗出游要愍孙称疾不动早以操行见知宋孝武即位稍迁尚书吏部郎累官吏部尚书皇太子冠孝武临宴东宫与颜师伯柳元景沈庆之等并携脯愍孙劝师伯酒师伯不饮愍孙因相裁辱曰不能与佞人周旋帝发怒将手刃之命引下席词色不变沈柳并起谢得释出为海陵太守废帝即位被徵管机密历吏部尚书侍中骁卫将军愍孙峻于仪废帝倮之迫使走雅步如常顾而言曰风雨如晦鸡鸣不已明帝泰始元年为司徒长史南东海太守愍孙清整有风操自遇甚高常着妙德先生传续稽康高士传後以自况又尝谓人曰昔有一国國中一水号曰狂泉国人饮此水无不狂惟国君穿井而汲独得无恙国人既并狂反谓国主之不狂为狂于是聚谋共执国主疗其狂疾火艾针灸莫不毕具国主不任其苦於是到泉所酌水饮之饮毕亦狂君臣大小其狂若一衆乃欢然我既不狂难以独立比亦欲试饮此水矣幼慕荀奉倩为人至是请改名为粲字景倩累迁尚书仆射五年加中书令领丹阳尹七年加尚书令初粲忤于孝武其母候乘舆出负墉叩头流血墉碎伤目後粲与人语有误道眇目者辄涕泣弥日既贵重常惧倾灭益自挹损明帝崩与褚渊等并受顾命废帝即位粲与褚渊秉政承明帝奢侈之後务弘节俭而阮佃夫王道隆等用事不能禁元徽元年丁母忧葬竟加卫将军不受性至孝居丧毁甚二年桂阳王休范为逆粲扶曳入殿诏加兵自随时兵难危急贼已至南掖门诸将意沮粲慷慨谓诸将帅曰寇贼已迫而衆情离阻孤子受先帝顾托本以死报今日当与诸护军同死社稷因命左右被马词色哀壮于是陈显达等感激出战贼即平殄事宁授中书监领司徒徙尚书令并固辞服终乃受命加侍中进爵为侯又不受废帝弑萧道成立顺帝使粲鎮石头粲素静退每有朝命逼切不得已方就至是得诏即行时道成将革命粲自以身受顾托不欲事二姓潜谋诛之而褚渊已自托于道成粲不知以谋告之故道成得为之备刘秉宋氏宗室王蕴太后兄子皆与粲结诸将帅黄回任候伯孙昙瓘卜伯兴等并与粲合昇明元年荆州刺史沈攸之兵起道成自诣粲粲称疾不见粲宗人袁达以为不宜树异同粲曰彼若劫我入台便无词以拒虽欲出庸可得乎时道成入屯朝堂秉从弟刘韞以领军

将军入直门下省卜伯兴为直阁黄回诸将皆率军出屯新亭粲克日谋矫太后令韞伯兴率宿卫攻道成于朝堂回等率所领为应刘秉任侯伯等并赴石头本期壬申夜发秉恇扰不知所为晡後即束装尽室奔石头粲惊曰何事速来今败矣先是褚渊以粲谋告道成道成即遣将薛渊等领兵戍石头云以助粲实御之也又令腹心王敬则为直阁与伯兴并总禁兵王蕴闻秉已奔乃狼狽率部曲向石头薛渊等据门射之蕴谓粲已败乃便散走道成以报敬则敬则杀韞及伯兴又遣戴僧静向石头助薛渊自仓门入时粲与秉等列兵登东门僧静分兵攻府西门秉与子踰城出粲还坐列烛自照谓其子最曰本知一木不能止大厦之崩但以名义至此耳僧静奋刀直前欲斩之子最大叫抱父乞先死兵士莫不陨涕粲曰我不失忠臣汝不失孝子仍求笔作启云臣义奉大宋策名两毕今便归魂坟壠永就山丘僧静并斩之任侯伯其夜赴石头皆被杀粲小儿数岁乳母携投粲门生狄灵庆灵庆曰吾闻出郎君者有厚赏遂抱以首乳母呼天曰公昔于汝有恩故冒难归汝奈何欲杀郎君以求小利天地鬼神有知行见汝灭门也此儿死後灵庆常见儿骑大狗戏如平生经年忽见一狗走入其家遇灵庆于庭噬杀之少顷妻子皆没粲负才尚气爱好虚远当其得意悠然忘反郡南一家颇有竹石率尔步往不通主人主人出语笑款然俄而车从至方知是袁公也又尝步履郊野道遇一士大夫便呼与饮明日此人谓被知顾到门求进粲不见曰昨饮酒无聊偶相要耳身居剧任不肯当事或高咏对之门无杂宾而物情不接及败时人为之语曰可怜石头城宁为袁粲死不作褚渊生父子死于忠孝尤不朽云

论曰袁粲简淡平素好饮酒吟讽少经世之才然忠孝之性始终不渝当魏晋六朝之间才臣名士代不乏人然廉耻道丧往往有身享高官厚禄潜托权奸求为佐命之勲者所在不免恬不知怪几忘其身之在本朝也以此律之数百年之间几无完士粲当桂阳之逆墨纁入侍獎勵忠义卒平急难及道成革命有徵粲独与刘秉王蕴诸人深相约结欲殲大憝事虽不济然粲以臣死忠最以子死孝在南北两朝之际尤可谓高冈之鸣凤也故特表之

北朝魏

高允

高允字伯恭渤海蓟人汉太傅裒之後也曾祖庆祖泰并仕慕容垂至显秩父韬归魏後官丞相参军早卒允少孤有奇度清河崔宏见而叹曰此子黄中内润文明外照必为一代伟器年十余奉祖父丧还本郡推财与二弟性好文学担簦就业博通经史天文术数尤好春秋公羊郡召功曹神?三年年四十余矣为阳平王征南大将军杜超从事中郎超时镇邺遣允与吕熙等分诣诸州决狱熙等并贪秽得罪允以清平独见赏还家教授生徒千余人四年徵拜中书博士迁侍郎以本官为乐安王范从事中郎范时镇邺允甚有匡益徵还参乐平王丕军事佐平凉州赐爵汶阳子领着作郎太武令与司徒崔浩修国史浩时集诸历家考校汉元以来日月薄蚀五星行度并讥前史之失别为魏历以示允允曰汉元年十月五星聚东井案星传金水二星常附日而行十月日在尾箕昏没于申南而东井方出于寅北二星何得背日而行此乃历术浅事而史家欲神其说不复推之于理今讥汉史而不觉此谬恐後之讥今犹今之讥古也浩时未以为然允曰此不可以空言争宜更审之後岁余谓允曰先所论者果如君言五

星乃以前三月聚东井非十月也衆皆叹服允虽明历初不推步论说惟东宫少傅游雅知其能数以灾异问允曰天道难知既知复恐漏泄不如不知也天下妙理至多何遽问此寻诏以经授景穆太子甚见礼待与游雅等共更定律令多所增损太武尝问允何政为先时多禁封良田又京师游食者衆允因言曰臣少也贱所知惟农请言农事古人云方一里则为田三顷七十亩百里则田三万七千顷若勤之则亩益三升不勤则亩损三升方百里损益之率为粟二百二十二万斛况以天下之广乎若公私有储虽遇饥年复何忧哉帝乃悉除田禁以赋百姓初浩以才略为帝宠任数从征伐有功颇制朝权尝荐冀定等五州士数十人皆起家为郡守太子曰先徵之人亦州郡选也在任已久勤劳未答宜先补郡县而以新徵者代为郎吏且守令治民宜得更事者浩固争而遣之允闻之曰崔公其不免乎苟遂其非而校胜于上将何以堪之时着作令史闵湛祁标性巧佞尝上疏言浩所注诗论语书易过于马郑王贾乞收境内诸书独颁浩所注令天下习业并求勅浩注礼传令後生得观正义浩遂信待之荐其有着述之才帝初命浩等撰记务从实录既成书湛标因劝浩刊于石以彰直笔允私谓着作郎宗钦曰湛标所营分寸之间恐为崔门万世之祸吾徒亦无噍类矣浩竟刊石列通衢北人无不忿恚相与譖浩以为暴扬国恶帝大怒诏收浩允等案罪先是辽东公翟黑子奉使并州受布千匹事觉谋于允曰主上问我为首为讳乎允曰公帷幄宠臣有罪首实庶或见原不可重为欺罔中书侍郎崔鉴等谓曰若首实罪不可测不如讳之黑子以鉴等为亲已而反怨允曰君奈何诱人入死地入见帝遂不以实对终获罪戮及浩被收太子召允谓曰入见至尊吾自导卿脱至尊有问但依吾语太子入言允小心慎密且微贱制由崔浩请赦其死帝问允曰国书皆浩所为乎允对曰臣与浩共为之然浩所领事多总裁而已至于着述臣多于浩帝怒曰允罪甚于浩何以得生太子惧曰天威严重允小臣迷乱失次耳臣向问皆云浩所为帝问允信如东宫所言否允曰臣以下材谬参着作逆犯天威罪当灭族不敢虚妄殿下哀臣侍讲日久欲勾其生耳实不问臣臣以实对不敢迷乱帝顾谓太子曰直哉此人情所难而允能为之临死不易词信也为臣不欺君贞也宜特赦其罪以旌之于是召浩临诘浩惶惑不能对允事事申明皆有条理帝命允为诏诛浩及僚属僮吏凡百二十八人皆夷五族允持疑不为帝频使催切允乞更一见诏引前允曰浩之所坐若更有余衅非臣敢知若直以触犯罪不至死帝复怒命武士执允太子为拜请帝意解乃曰无此人当更有数千口死矣浩竟族灭余止诛其身宗钦临刑叹曰高允其殆圣乎他日太子让允曰人当知机不知机学复何益吾欲为卿脱死而卿终不从乃激怒至尊如此每一念及使人心悸允曰臣东海凡生本无宦意属休明之会释褐凤池仍参麟阁妨贤已久夫史所以纪当时之善恶为将来之炯戒故人主慎焉浩孤负圣恩以私欲没其公廉爱憎蔽其直理诚不能无罪至于书朝廷起居言国家得失此乃史家本体未为多违臣与浩实同其事死生荣辱义无独殊诚荷殿下再造之慈违心苟免非臣所愿也太子动容称叹允退谓人曰我不奉东宫指导者恐负翟黑子故也太子末年颇信任左右营田园以收利允谏曰天地无私故能覆载王者无私故能包养昔之明王以至公宰物故藏金于山藏珠于渊示天下以无私训天下以至俭故美声盈溢今殿下国之储贰万方所则而营立私田畜养鸡犬乃至贩酤市廛与民争利议声流布不可追掩夫天下者殿下之天下富有四海何求而弗获何欲而弗从而与贩夫贩妇竞此尺寸昔虢之将亡神乃下降赐之土田卒丧其国汉之灵帝不修人君之重好与宫人列肆贩卖私立府藏以营小利卒有颠覆之祸夫为人君者必审于择人商书云无迓小人孔子云小人近之则不逊远之则怨武王爱周召齐毕所以王天下殷纣爱飞廉恶来所以丧其国古今存亡莫不由之今东宫诚乏人俊父

不少顷来侍御左右恐非朝廷之选愿殿下少察愚言斥出佞邪亲近忠良所在田园分给贫下畜产贩卖以时收散如此则休声日至谤议可除不纳及太子卒允见帝悲不能止允奉命集天文灾异使事类约而可观既成上表曰臣闻箕子陈谏而洪范作宣尼述史而春秋着皆随其得失而效以祸福天人诚远而报应如响甚可惧也自古帝王莫不尊崇其道而稽其法数以自修饬厥後史官并载其事以为鉴诫汉成帝时光禄大夫刘向见汉祚将危权归外戚屡陈妖眚而不见纳遂因洪范春秋灾异报应者而为其传觐以感悟人主终不听察卒以危亡伏惟陛下神武则天钦若稽古率由旧章前言往行靡不究鉴臣学不洽闻识见寡薄惧无以裨广圣聪仰酬明旨谨依洪范传天文志撮其事要畧其文词凡八篇帝览之曰高允之明天文岂减崔浩乎及文成之立允预其谋司徒陆丽等皆受赏而不及允允终不言时帝大起宫室允谏曰太祖始建都邑其所营立非农隙不兴今建国已久宫室已备永安前殿足以朝会万国西堂温室足以安御圣躬紫楼临望足以观望远近若欲修广异观宜渐致之不可仓卒今计砍材运土及诸杂役须二万人丁夫充作老弱供饷合四万人半年可讫古人有言一夫不耕或受其饥况四万之衆其所损费亦已多矣圣主宜思量帝纳之允以文成纂承平之业而风俗仍旧婚娶丧葬不依古式上礼教一疏其畧曰前朝屡发明诏禁诸婚娶不得作乐及葬送之日歌谣鼓舞烧葬一切禁断虽条旨久颁而俗不革变将由居上者未能悛改为下者习以成俗教化凌迟一至于斯为政者先自近始诗云尔之教矣民胥效矣人君举动不可不慎礼云娶妇之家三日不举乐今纳室皆乐部给役以为嬉戏而独禁细民此一异也古之婚者皆拣择德义之门妙选贞闲之女必先之以媒聘继之以礼物集寮友以重其别亲御轮以崇其敬婚姻之际如此其难今娶配者或长少差舛或罪入掖庭失礼纷纭而令小民必依礼限此二异也万物之生靡不有死古先哲王作为礼制所以养生送死折诸人情若毁生以奉死则圣人所禁也昔者尧葬谷林农不易亩舜葬苍梧市不改肆秦始皇作为地市下锢三泉金玉宝货不可胜计死不旋踵尸焚墓掘尧舜之俭始皇之奢是非可见今国家营葬费损巨亿一旦焚之以为灰烬苟靡费有益于亡者古之人何独不然今上为之不辍而禁下民之必止此三异也古者祭必立尸序其昭穆使亡者有凭致食飧之礼今已葬之魂求貌似者事之如父母燕好如夫妻损败风俗瀆乱情理上未禁之下不改絶此四异也夫飧者所以定礼仪训万国故圣王重之至乃爵盈而不饮肴乾而不食乐非雅乐不奏物非正色不列今之大会内外相混酒醉喧譊罔有仪式又俳優鄙亵污辱视听朝廷积习以为美而责风俗之清纯此五异也陛下当百王之末踵乱晋之弊而不矫然厘正以厉颓俗臣恐天下苍生永不闻礼教矣允言如此非一文成从容听之事有不便辄求见屏人极论或自朝至暮或连日不出至有痛切为帝所不忍闻者命左右扶出然终善遇之礼敬甚重时有上事为激讦者帝谓羣臣曰君父一也父有过子私室谏诤不欲彰于外至于事君独忍翹君之过以沽直名乎高允于朕过失常正言面论至朕所不乐闻者皆侃侃言说无所避就使朕得闻其过而天下不知乃真忠臣也允所与同徵者游雅等皆至大官封侯允部下吏百数十人亦至刺史二千石而允为郎二十七年不徙帝谓羣臣曰汝等在朕左右未尝有一言规正但伺朕喜时求官乞职汝等把弓刀侍左右但立劳耳皆至王公至如允执笔匡辅数十年不过为郎汝等不亦愧乎乃拜允中书令时魏百官无禄允尝使诸子樵采自给陆丽为言于帝帝曰何不早言即日至其第惟草屋数间布被縵袍厨中盐菜而已帝太息赐帛五百匹粟千斛拜其子忱为郡守允固辞不许转太常卿进爵梁城侯帝重允常呼为令公而不名游雅尝曰前史称卓子康刘文饶之为入褊心者或不之信余与高子游处数十年未尝见其喜愠之色乃知古人为不诬耳高子内

文明而外柔顺其言呐呐不能出口昔崔司徒浩尝谓高生丰才博学一代所推所乏者矫矫风节耳余始以为然及司徒得罪诏旨临责声嘶股栗殆不能言宗钦以下都无人色高子独敷陈事理词义清辨明主为之动容仁及僚友保兹元老此非所谓矫矫者乎宗爱威振朝廷王公以下趋庭望拜高子独升阶长揖此非所谓风节者乎人固未易知吾既失之于心崔又漏之于外管仲所以致恟于鲍叔也及文成崩乙弗浑以献文在谅闇遂擅权多杀冯太后诛之引允参决大政欲修明庠序立学郡国诏允与中秘二省参议以闻允表请大郡立博士二人助教四人学生一百人次郡立博士二人助教二人学生八十人中郡立博士一人助教二人学生六十人下郡立博士一人助教一人学生四十人其博士取博通经典世履忠清堪为人师者年限四十以上助教亦如之年限三十以上其学业夙成才任教职不拘年齿学生取郡中清望人行修谨堪循名教者先尽高门次及中第显祖从之郡国立学自此始後以老疾频乞骸骨诏不许乃着告老诗又以昔岁同徵零落将尽感旧怀人作徵士颂寻诏允至兖州祭孔子庙曰此简德而行卿勿辞也继从显祖北伐大捷作北伐颂献文後有遗世之志以孝文冲幼欲禅其叔京兆王子推召公卿会议皆莫敢言允进跪上前泣曰臣不敢多言以劳神听愿陛下上思祖宗付托之重追念周公抱成王之事帝感悟乃议传位孝文以羣公辅之自文成至献文军国书檄多允文也末年乃荐高间以自代进允中书监散骑常侍寻以定议勲进爵咸阳公持节征西将军怀州刺史允秋月巡境问民疾苦见召公庙毁新之时年将九十矣劝民学业风化颇行太和二年以疾告归诏以安车徵允扶引就内改定皇诰作酒颂寓规孝文说之置之座右诏允乘车入殿朝贺不拜明年诏议定律令允虽笃老志识不衰诏以允家贫养薄令乐部十日一诣以娱其志朝晡给膳朔望致牛酒月给衣服绵绢入见备几杖问以政治朝之大议皆咨访焉魏初法严朝士多见杖罚允凡历事五君出入三省五十余年未尝有谴在中书引经断狱内外皆称平允性仁恕简静兴壽称与允接事三年未尝见其忿色虽处贵重情同寒素执书吟览昼夜不去手诲人恂恂忘倦尤笃念亲故颁赐悉以分之贫困者无所弃遗初献文徙青徐望族于代其人士多允婚媾有流离饥寒者允辄倾家赈施使咸得其所又随其才行荐用于朝或以初附为疑允答曰任贤使能何有新旧时贵臣之门皆罗列显官允子皆无官爵其廉退若此孝文太和十一年正月卒年九十八赠司空諡曰文赙襚甚厚魏初以来存亡蒙赉皆莫及也所着诗文左氏公羊释毛诗拾遗何郑膏肓凡百余篇又有算法算术三卷

北史论曰高允践危祸之机抗雷电之气处死夷然忘身济难卒悟明主保己全名自非体隣知命鉴昭穷达亦何能若此宜光宠四世终享百龄有魏以来斯人而已

论曰孔子称才美如周公而骄吝犹不足观况其下乎崔浩谟谋军国灼有成算战胜攻取加以才智渊博定律令明历象譔国史皆详明切直足与高允颉颃顾其为人沾沾自喜始则挟长傲物既乃护短凌上至于听任邪谀欲沽一己之直笔忠诚薄而谗构兴固不当独咎太武之惨刻少恩也所谓小才未闻大道者非耶夫才以学成学以养定苟非其人宁能不撓心于死生呼吸之际而保其常度乎允忠不欺君信不背友学术内充忠醇如一而险躁既克休祥随之周诗曰自求多福盖善气所迎斯动已而天地应也北魏孝文为三代以下贤君允决策于前薰蒸于後用开不世出之主自晋魏以来如允之令德令名不可有二岂独冠絕北朝哉

苏绰

苏绰字令绰武功人魏侍中则之九世孙也累世二千石父协武功郡守绰少博学善算术从兄让为汾州刺史宇文泰饒之都门谓曰卿家子弟中谁可任者因荐绰召为行台郎中居岁余未之知也而台中皆称为能有疑事必就决之泰尝与仆射周惠达论事惠达请出议之以告绰绰为之区处惠达入白之泰称善曰谁与卿为此议者惠达以绰对且称其有王佐才会泰与公卿如昆明池观鱼行至汉故仓地顾问左右莫有知者或曰苏绰博物多通乃召绰具以状对泰大悦因问天地造化之始历代兴亡之迹绰应对如流泰益嘉之因与绰并马徐行至池竟不设网罟而还遂留至夜问以政事卧而听之绰指陈为治之要泰起整衣危坐不觉膝之前席语达曙不厌诘朝谓惠达曰苏绰真奇士吾方任之以政即拜左丞参典机密自是宠遇日隆绰始制文案程式朱出墨入及计帐户籍之法大统三年东魏高欢三道入伐诸将咸议分兵御之泰以为不如并力西拒窦泰惟绰意与合遂禽窦泰于潼关封绰美阳县伯授大行台度支尚书泰欲革时政为强国富民之法绰乃尽智能赞成其事于是减官员置二长并置屯田以资军国又为六条诏书其一先治心曰凡今之方伯守令并古诸侯也是以前世帝王每称共治天下者惟良守宰耳凡治民之体当先治心心者一身之主百行之本心不清净则思虑妄生思虑妄生则见理不明是非谬乱一身不能自治安能治民也夫所谓清心者非不贪货财之谓也乃欲使心气清和志意端静心和志静则邪僻之虑无因而作凡所思念无不皆得至公之理率至公之理以临其民下民孰不从化其次又在治身凡人君之身乃百姓之表表不正不可求影直君身不修而望治百姓是犹曲表而求直影也为人君者必心如清水形如白玉躬行仁义躬行孝悌躬行忠信躬行礼让躬行廉平躬行俭约然後继之以无倦加之以明察以训其民是使其民畏而爱之则而象之不待家教而自兴行矣其二敦教化曰天地之性人为贵明其有中和之心仁恕之行异於木石不同禽兽故贵之耳然性无常守随化而迁化于敦朴者则质直化于浇伪者则浮薄浮薄者衰弊之风质直者淳和之俗衰弊则祸乱交兴淳和则天下自治世道雕丧已数百年民不见德惟兵革是闻上无教化惟刑罚是用凡百草创率多权宜比年稍登稔衣食不切则教化可修凡诸牧守令长宜洗心革意上承朝旨下宣教化夫化者贵能扇之以淳风浸之以太和被之以道德示之以朴素使百姓亶亶日迁于善邪伪之心嗜慾之性潜以消化而不知其所以然此之谓化也然後教之以孝弟使民慈爱教之以仁顺使民和睦教之以礼义使民敬让慈爱则不遗其亲和睦则无怨于人敬让则不竞于物三者既备则王道成矣此之谓教也先王之所以移风易俗还淳返素由此要道也其三尽地利曰人生天地之间以衣食为命古之圣王先足其衣食然後教化随之夫衣食所以足者在于尽地利地利所以尽者由于劝课有方主此教者在乎牧守令长而已诸州郡县每至岁首必戒勅部民少长悉力男女并功若有游手游食不勤生业者则正长牒名守令随事加罚罪一劝百单劣之户及无生之家劝令有无相通使得兼济三农之隙及阴雨之暇又当教民种桑植果艺其菜蔬畜育鸡豚以备生生之资以供养老之具夫为政不欲过碎碎则民烦劝课亦不容太简简则民怠善为政者必消息时宜而适烦简之中故诗曰不刚不柔布政优优百禄是遒如不能尔则陷于刑辟矣其四推贤良曰天生蒸民不能自治立君以治之置臣以佐之上至帝王下及郡国置臣得贤则治失贤则乱今刺史守令悉有僚吏皆佐治之人也刺史府官则命于天朝其州吏以下并牧守自置自昔以来州郡大吏但取门资多不择贤良末曹小吏惟试刀笔并不问志行今之选举当不限资荫惟在得人凡所求材艺

者谓其可以治民若有材艺而以正直为本者必以其材而为治也若有材艺而以奸伪为本者将由其官而为乱也故将求材艺必先择志行其志行善者则举之其志行不善者则去之而今择人者多云邦国无贤莫知所举但求之不勤择之不审或用之不得其所任之不尽其材耳夫良玉未剖与瓦石相类名骥未驰与弩马相杂昔吕望百里奚管夷吾彼瓌伟之材不世之杰尚不能以未遇之时自异于凡品况降此者哉然善观人者必先省其官官省则善人易充易充则事无不理故语曰官省则事省事省则民清官烦则事烦事烦则民浊今吏员其数不少在下州郡尚有兼假扰乱细民悉宜罢黜无得习常非直州郡之官宜须善人爰至党族闾里正长之职皆当审择各得一乡之选以相监统夫正长者治民之基基不倾者上必安凡求贤之路非一任而试之考而察之起于居家至于乡党访其所以观其所由则人道明贤不肖别矣其五恤狱讼曰人受阴阳之气以生有情有性善恶既分而赏罚随焉赏罚得中则恶止而善劝赏罚不中则民无所措手足是以先王特加戒慎使治狱之官精心悉意推究事源先之以五听参之以证验如睹情状使奸无所容然後随事加刑轻重皆当赦过矜愚得情勿喜又能消息物理斟酌礼律无不曲尽人心先王之制曰与杀无辜宁失不经今之从政者则不然深文巧劾宁致善人于法不免有罪于刑所以然者非好杀人也但云为吏宁酷可免後患此则情存自便不念至公奉法如此皆奸人也夫人者天地之贵物一死不可复生凡伐木杀草田猎不顺尚违时令而亏帝道况刑罚不中伤天心犯和气而欲阴阳调适万物阜安不可得也凡百守宰可无慎乎若有深奸巨猾伤化败俗悖乱人伦故为悖道者杀一砺百以清王化重刑可也识此二途则刑政尽矣其六均赋役曰圣人之大宝曰位何以守位曰仁何以聚人曰财明先王必以财聚人以仁守位国而无财位不可守故三五以来皆有征税之法虽轻重不同而济用一也今寇未平军用资广虽未遑减省以恤民瘼然宜令平均使下无匮夫平均者不舍豪强而徵贫弱不纵奸巧而徵愚拙此之谓均也起于有渐必须勤课先时而备至时而输如不预劝戒临时迫切复恐稽缓以为已过捶扑交至富商贾缘兹射利输税之民于是弊矣租税虽有大式至于斟酌贫富差次先後皆事起于正长而系之于守令若斟酌得所则政和而民悦若检理无方则吏奸而民怨又左发徭役多不存意致令贫弱者或重徭而远戍富强者或轻使而近防守令不存恤民之心皆王政之罪人也泰置诸坐右令百官习诵之非通六条及计帐者不得居官先是泰以军旅未息吏民劳弊命所司斟酌古今可以便时适治者为二十四条新制行之至是又更权衡度量命绰损益新旧为三十六条总为五卷颁行之搜简贤才为牧令守长皆依新制而遣数年之间百姓便之自晋氏以来文章竞为浮华泰欲革其弊命绰作大诰宣示羣臣戒以政事仍令自後文笔皆依此体绰性俭素不事产业常以丧乱未平为己忧荐贤拔能纪纲庶政泰推心任之或出游尝预署空纸以授绰有须处分随事施行绰尝谓为国之道当爱人如慈父训人如严师每与公卿论议自昼达夜事无巨细若指诸掌积劳成疾而卒泰深痛惜之谓羣官曰苏尚书平生廉让吾欲全其素志则恐悠悠之徒有所未达如厚加赠諡又乖夙昔相知之心何为而可令史麻瑤越次进曰俭约所以彰其美也泰从之归葬武功载以布车一乘泰与羣公步送之酌酒言曰尔知吾心吾知尔志方欲共定天下遽舍吾去奈何因举声恸哭不觉扃落于手至葬日泰复自为文祭之其後宇文毓僭位以绰配享泰庙北史论曰周文提剑而起百度草创施约法之制于竞逐之辰修太平之礼于鼎峙之日终能斲雕为朴变奢从俭风化既被而下肃上尊疆场屡动而内安外附斯盖苏绰之力也

论曰宇文泰与高欢并因拓跋之丧乱名为各拥其君实乃共分其国当时虽互相诇让要之前者虎视後者狼贪裴侠之诚孝武以避汤入火固先见也然考其规为厝注泰似彼善于此盖非独其身之不同量为之臣者亦殊致焉苏绰谟谋于内其忠敬节俭非犹夫崔暹崔季舒等之倾邪也韦孝宽扞御于外其练达明敏非犹夫高敖曹窦泰等之麤豪也孝宽六旬之拒高欢三策之平高纬运筹决胜不愧将才若乃定经制立章程使国家焕然有更新气象绰贤且远矣

史传三编卷二十

卷二十一

<史部,传记类,总录之属,史传三编

钦定四库全书

史传三编卷二十一

大学士朱轼撰

名臣传十三

唐

房元龄

房元龄名乔以字行齐州临淄人也父彦谦仕隋为司隶刺史元龄幼警敏善属文工书开皇中天下混一介谓隋祚方永元龄密白父以隋无功德妄诛杀攘神器嫡庶混淆侈僭相倾亡可翘足待父惊曰无妄言年十八举进士吏部侍郎高孝基谓裴矩曰此郎国器终当耸壑昂霄恨我不及见耳补隰城尉寻坐汉王谅累徙上郡顾中原方乱慨然有忧天下志会父疾绵十旬不解衣及丧勺饮不入口五日太宗以炖煌公徇渭北杖策谒军门署行军记室参军公为秦王授府记室每从征伐众争取货珍元龄独收人物致幕府与诸将相申结人人愿尽死力王比之光武得邓禹云居府出入十年军符府檄或驻马即办文约理尽初不着稿高祖曰若人机识是宜委任每为吾儿陈事千里外犹面语也隐太子与王有隙元龄劝王行周公之事引杜如晦协判大计太子忌二人皆潜于帝斥之变将作王夜召二人以方士服入计事定擢右庶子及即位为中书令第功班赏第一封邢国公食邑千三百户淮安王神通曰臣举兵关西首应义旗今元龄等以刀笔居臣上窃所未服帝曰叔父虽首倡举兵盖亦自营脱祸建德之南全军覆没黑闼再合望风辄奔元龄等有决胜帷幄定社稷功此萧何所以先诸将也三年进尚书左仆射监修国史帝尝谓元龄与如晦曰公为仆射当助朕忧劳广开耳目比闻公等听受词讼日有数百此则读符牒不暇安能助朕求贤哉因敕尚书省细碎务皆付左右丞惟冤滞大事合闻奏者关于仆射论者以元龄等固属贤相然太宗委任责成得馭相之体帝尝问创业守成孰难元龄曰草昧之初羣雄竝起角力而後臣之创业难魏徵曰自古帝王莫不得之于艰难失之于安逸守成难帝曰元龄从我定天下冒百死获一生故知创业之难徵与我安天下常恐骄奢生于富贵祸乱伏于所忽故知守成之难然创业往矣守成之难方与公等慎之未几更封梁加太子少师居宰相积十五年女为王妃男尚主自以权宠隆极累表辞位不许顷之进司空仍总朝政又辞帝遣使谓曰让诚美德然国家眷赖久不可一日去左右改太子太傅知门下省事十八年帝伐辽留守京师诏曰公当萧何之任朕无西顾之忧矣凡粮械飞输军伍行留悉裁综之元龄数上书劝帝无轻敌久事外夷固辞太子太傅以多

病听卧治事许肩輿入殿帝对之流涕日遣人候问起居少间即喜形于色元龄谓诸子曰今天下无事惟讨高丽未止羣臣莫敢谏吾而不言抱愧歿地矣乃上疏曰上古所不臣者陛下皆臣之突厥可汗束手握刀分典禁卫延陀铁勒披置郡县高昌吐谷浑徧师扫除惟高丽逋命今自将六军不旬日拔辽东禽获数十万可谓功倍前世传曰知足不辱知止不殆陛下威名功烈既云足矣拓地开疆亦可止矣且陛下每决死罪必三覆五奏进疏食停音乐以人命重也今士无罪驱之行阵之间委之锋镝之下使肝脑涂地老父孤子慈母寡妻望樁车抱枯骨椎心掩泣变动陰阳伤害和气实天下之痛也使高丽违失臣节诛之可也侵扰百姓灭之可也能为後世患夷之可也今无是三者而坐敝中国为旧王雪耻新罗报仇非所存小所损大乎愿下沛然之诏许高丽自新焚凌波之船罢应募之衆则臣死骨不朽帝得疏谓高阳公主曰是已危笃尚能忧吾国事疾甚帝命凿苑垣以便候问亲握手与诀擢子遗爱右卫中郎将遗则朝散大夫令及见之卒年七十一时贞观二十二年也陪葬昭陵謚文昭元龄明达吏事夙夜尽心惟恐一物失所审定律令意在寛平闻人善若已有之取人不求备虽卑贱皆得尽所能或以事被让必稽顙请罪惕息无所容随材收叙无隔疎贱然亦慎许可贞观末以谴还第黄门侍郎褚遂良言于帝曰元龄事君自无所负不可以一眚便斥非天子任大臣意帝悟遽召于家後避位不出久之会帝幸芙蓉园元龄敕子弟扫庭除曰乘輿且临幸有顷帝果幸其第因载还宫帝在翠微宫以司农卿李纬为民部尚书有自京师来者帝曰元龄闻纬为尚书谓何曰惟称纬好须无他语帝遽改洛州刺史帝讨辽东元龄守京师有男子上变元龄诘状曰我乃告公元龄驿遣追帝帝视奏已斩男子下诏曰公何不自信其委任类如此治家有法度虑诸子骄侈席势凌人集古今家诫书为屏风令各取一具曰留意于此足以保躬汉袁氏累叶忠节吾心所尚汝等师之子遗直嗣

柳芳曰元龄佐太宗定天下及终相位凡三十二年天下号为贤相然无迹可?德亦至矣故太宗定祸乱而房杜不言功王魏善谏争而房杜让其直英卫善将兵而房杜行其道理致太平善归人主为唐宗臣固宜哉论曰元龄事迹与汉萧何相类顾何遭高帝猜刻书夜岌岌菹醢中元龄际太宗道协计从始终罔间萧处难而房处易其政治亦不大相远何哉无致君尧舜之学术但开国承家纪纲粗定称一代名相焉两人力量均之乎止此矣然何终未免刀笔吏而元龄济以文学稍为过之不矜不伐居然有儒者气象临歿高丽一疏不忘史鱼尸谏之忠君子哉

杜如晦

杜如晦字克明京兆杜陵人也少英爽喜书以风流自命负大节临机辄能断大业中赴吏部选亦为高孝基器重谓君有应变才当为栋梁之用愿保崇令德补滏阳尉未几弃官归唐兵入关任秦府兵曹参军後徙陕州总管府长史时府僚外迁者多房元龄谓王曰他人去无足惜惟如晦王佐才也大王若终守藩辅无所用之必欲经营四方非此人莫可王惊曰微公言我几失之因表留幕府从征伐常参帷幄预机秘方军国大事裁决如流莫能窥其涯际深为内外所推服累迁陕东道行台郎中封建平县男兼文学馆学士丹青画像十有八人以如晦为冠首隐太子之变与元龄定谋论功相等授左庶子迁兵部尚书封蔡国公贞观二年进侍中摄吏部选总监东宫兵马三年拜右仆射仍领选所引士贤否咸得其职太宗尝谓如晦曰

比见吏部择人惟取其言辞刀笔不悉其景行如何可获善人如晦对曰两汉取人皆行着乡闾州郡贡之然後入用故当时号为多士今每年选集数千人厚貌饰辞不可知悉选司但配其阶品而已铨简之理实所未精帝将依汉时法令本州辟召会功臣等将行世封事乃止时天下新定凡立国规模台阁制度典章文物悉与元龄裁定每议大政事元龄必曰非如晦莫能筹之及如晦至卒用元龄策盖元龄长于谋如晦长于断两人深相知故能同心协德以致太平谈良相者称房杜焉四年以疾请解职频使存问医药相望于道及疾笃帝与太子亲造其家抚之流涕超迁其子构为尚舍奉御卒年四十六帝辍朝三日哭之恻赠司空封莱国公諡曰成诏虞世南勒文于碑言一体痛悼之意他日食瓜而美辍其半奠焉帝以黄银带赐元龄谓曰如晦与公同辅朕今独见公不见如晦矣泫然下泪更取黄金带送灵所以後或见梦寐敕御饌往祭明年之祥遣内官慰问妻子国府官属并不罢始终恩礼无少衰

论曰如晦才高气爽遇事明决沛然无所滞碍诚开国臣也故能与元龄之周密相济有成并定天下称名相伟矣使天假之年得从容以报太平之知遇事业岂止此哉

魏徵

魏徵字玄成魏州人少孤落魄有大志不营货产以十策进李密不用从密来京师未知名自请安辑山东乃擢秘书丞驰驿至黎阳时李积尚为密守徵以书谕之积遂定计归唐後为隐太子洗马徵见秦王功高劝太子早为计太子败王切责徵答曰太子早从徵言不死今日之祸王器其直及即位拜谏议大夫时河北州县素事隐巢者不自安皆潜伏思乱徵白帝示至公解之命往慰谕道遇械送太子千牛李志安齐王护军李思行徵与其副谋曰受命敕宫府旧人今复执送志安等吾属虽往人将不信可先贷之而後以闻使还帝悦日益亲或引至卧内访天下事徵亦自以不世遇展尽底蘊无所回屈凡二百余奏无不剴切当帝心者拜尚书右丞仍兼谏议或毁徵阿私所亲帝使温彦博按无验责以不存形迹居数日帝问徵曰昨来在外闻有何不是事徵曰前日令彦博宣勅语臣云因何不存形迹此言大不是臣闻君臣同气义均一体未闻不存公道惟事形迹若君臣上下同遵此路则邦之兴丧或未可知帝矍然改容曰前发此语寻已悔之实大不是公亦不得遂怀隐避徵乃拜而言曰臣以身许国直道而行必不敢有所欺负但愿陛下使臣为良臣勿使臣为忠臣帝曰忠良有异乎徵曰良臣身获美名君受显号子孙传世福禄无疆皐皷稷契是也忠臣身受诛夷君?大恶家国并丧独有其名龙逢比干是也以此而言相去远矣帝曰君但莫违此言我必不忘社稷之计赐绢二百匹帝又问人君何道而明何失而暗对曰兼听则明偏信则暗尧舜辟四门明目达聪虽共驩苗鯀不能蔽也秦二世独信赵高梁武帝独信朱异侯景隋炀帝独信虞世基天下土崩瓦解而不知盗贼徧海内而不闻此其验也帝将聘郑仁基女为充华诏书已出册使未发徵闻其许嫁陆氏谏曰郑氏之女久已许人陛下取之不疑恐亏圣德帝闻之大惊自责停使令女还夫羣臣以女适陆氏无显状大礼既行不可中止又陆氏抗表自云初无婚姻帝于是颇为疑再问徵徵曰陆爽恐陛下今虽容之後陰加譴责所以反覆自陈不足为怪帝乃降敕自明停其册使将葬建成元吉徵与王珪请预陪送上表曰臣等昔受命太上委质东宫出入龙楼垂将一纪前宫结衅宗社得罪人神臣等不能死亡甘从夷戮负其罪戾録置周行徒竭生涯将何上报陛下德光四海道冠前王陟冈有感追怀棠棣明社稷之大义申骨肉之深恩卜葬

二王远期有日臣等永惟筹昔忝曰旧臣丧君有君虽展事居之礼宿草将列未申送往之哀瞻望九原义深凡百望于葬日送至墓所帝义之许之官府旧僚吏尽令送葬三年以秘书监参预朝政西域诸国闻高昌麴文泰朝悉遣使入献诏使人迎之徵谏曰王者不以蛮夷劳中国姑听其商贾往来与边民交市则可若宾客待之恐不胜其弊帝乃止右仆射封德彝等竝欲中男十八以上简点入军勅出徵执奏以为不可德彝重奏谓次男有壮大者帝降敕中男虽未十八然壮大亦可入军徵又不肯署勅帝召徵及王珪至作色而待之曰中男实小自不点入军实大亦可简取如此固执不解公意徵正色曰臣闻竭泽取鱼非不得鱼明年无鱼焚林而畋非不得兽明年无兽若次男以上尽点入军租赋杂徭将何取给且比年国家卫士不堪攻战岂为其少但为礼遇失所遂使人无鬪心若多点取人还充杂役虽衆无用若精简壮健遇之以礼何必在多陛下每云我之为君以诚信待物欲使官民并无矫伪之心自登极以来大事已数不信何以取信于人帝愕然曰所云不信是何等也徵因言即位之初有逋负宿债欠负官物并悉原免之诏又关中免二年租调关外给复一年後不能无失信者数事帝喜曰我见君执奏不已疑君蔽此事今论国家不信人情不通我不寻思过亦深矣乃停中男赐徵金瓮一口先是帝尝叹大乱之後疑其难治徵曰乱後易治譬饥者易食渴者易饮也封德彝曰三代以还人渐浇诡故秦任法律汉杂霸道皆欲治不能非能治不欲徵曰五帝三王不易民而治汤武皆承大乱之後身致太平若人渐浇漓不复返朴今当悉为鬼魅尚安得而化哉帝纳之及即位四年之後米斗三钱岁断死二十九几致刑措蛮夷君长袭衣冠带刀宿卫东薄海南踰岭户阖不闭行旅不賫粮帝语羣臣此魏徵劝我行仁义之效惜不令封德彝见之李靖败突厥颉利部落多来归降中书令温彦博议请于河南处之一则实空虚之地二则示无猜之心帝从之徵议以为宜遣发河北居其旧土且今降者几至十万数年之後滋息过倍密迓王畿心腹之疾将有後患彦博曰天子之于万物也天覆地载处之河南死而生之亡而存之怀我厚恩终无叛逆徵曰晋代有此分居近郡江统为言武帝不用後果覆车陛下必用彦博言所谓养虎自貽患也帝竟从彦博议後帝幸九成宫突厥陰结所部作乱事败皆捕斩之还其旧部于河北帝悔而自责曰初不纳魏徵言遂几失久安之道侍御史权万纪李仁发俱以告讐譖毁蒙引见任以弹射莫敢诤论徵奏曰权万纪李仁发并是小人不识大体以讐毁为是告讐为直凡所弹射皆非有罪多行无礼以取强直之名诬房元龄斥退张亮无所肃厉徒损圣明臣伏度圣心必不以为谋虑深长可委以栋梁之任将以其无所避忌欲以警厉羣臣羣臣素无矫伪空使臣下离心以元龄亮之徒犹不可得伸其枉直其余疎贱孰能免其欺罔伏愿陛下留意再思自驱使二人以来有一弘益臣即甘心斧钺受不忠之罪陛下纵未能举善以崇德岂可进奸而自损乎帝欣然纳之赐绢五百匹万纪仁发相继贬黜七年代王珪为侍中进爵郡公帝幸九成宫宫御憇漳川官舍李靖王珪至吏改馆宫御以舍靖珪帝怒命按之徵谏曰靖等陛下心膂大臣宫人扫除隶耳以此罪责恐骇天下耳目得释不问後宴丹霄楼帝从容语羣臣曰徵每谏我不从与言辄不应何哉徵曰臣以事有不可故谏若不从辄应恐遂行之帝曰第应之须别陈论何伤徵曰昔舜戒羣臣汝无面从退有後言若面已许可又别陈论非禹稷所以事君也帝曰人言魏徵举动疎慢我但见其妩媚耳徵撰定齐梁陈周隋五史多所损益进左光禄大夫以疾辞位拜特进知门下省事文德皇后葬昭陵帝于苑中作层观望之引徵同升徵熟视曰臣眊昏不能见帝指示之徵曰臣以为陛下望献陵耳若昭陵则臣固已见之矣帝泣为毁观帝又欲以巢刺王妃为后徵谏曰陛下方取法尧舜奈何以辰嬴自累乃止後幸洛阳多所谴责徵曰隋惟责供奉不精因此浪费以至于亡陛下当

兢惧戒约奈何海人为奢退又上疏言刑赏不可由喜怒及骄奢乱亡之故乞以隋为鉴十二年帝尝从容问比来所行得失政化何如徵对曰若恩威所加远方朝贡比于贞观之始不可等级而言若德义潜通民心悦服比于贞观之初相去又甚远帝曰远方来服应由德义所加往前功业何因益大徵曰昔者四方未定常以德义为心旋以四海无虞渐加骄溢所以功业虽盛终不如往初帝曰所行比前何无异徵曰贞观之初恐人不言导之使谏三年以後见人谏悦而从之一二年来不悦人谏虽龟勉听受而意终不平帝曰于何事如此徵曰即位之初处元律师以死罪孙伏伽谏曰法不至死无容滥加遂赐以兰陵公主园直钱百万人或曰所言乃常事而所赏太厚答曰我即位来未有谏者所以赏之此导之使言也徐州司户柳雄妄加阶级人有告之者陛下令其自首不首与罪雄固言是实大理推得其伪处雄死罪少卿戴胄奏法止合徙陛下不从胄曰既付臣法司罪不合死不可酷滥陛下作色遣杀胄执之不已然後赦之乃谓法司曰但能如此为我守法岂虑滥有诛夷此则悦以从谏也往年陕县丞皇甫德参上书大忤圣旨陛下以为讪谤臣奏称上书不激切不能起人主意激切即似讪谤于时虽从臣言赏德参物二十段意甚不平难于受谏也帝惊曰人苦不自觉非公无能道此帝又尝问徵曰羣臣上书可采及召对多失次何也对曰百司奏事尝数日思之及至上前三分不能道一况谏者拂意触忌非陛下借之辞色岂敢尽其情哉帝由是接见羣臣辞色愈温魏王泰有宠或言大臣多轻之帝怒召大臣议曰隋文帝时大臣皆为诸王所顿蹶我若纵之泰岂不能辱公辈耶房元龄等皆谢徵正色曰若纪纲大坏固所不论圣明在上魏王必无顿辱羣臣之理隋文帝骄其诸子卒皆夷灭又足法耶帝悦曰闻公言方知理屈先是帝作飞山宫徵上疏极谏後遇大雨谷洛溢毁宫寺漂居人徵因事极言尤为激切条陈十思畧曰臣闻求木之长者必固其根本欲流之远者必浚其泉源思国之安者必积其德义凡昔元首承天景命善始者实克终者益寡盖在殷忧必竭诚以待下既得志则纵情以傲物竭诚则胡越为一体傲物则骨肉为行路怨不在大可畏惟人载舟覆舟所宜深慎诚能见可欲则思知足以自戒将有作则思知止以安人念高危则思谦冲而自牧惧满盈则思江海下百川乐盘游则思三驱以为度忧懈怠则思慎始而敬终虑壅蔽则思虚心以纳下惧谗邪则思正身以黜恶恩所加则思无因喜而谬赏罚所及则思无以怒而滥刑总此十思弘兹九德简能而任之择善而从之文武并用垂拱而治何必劳神苦思代百司之职役哉手诏喜答之于是废明德宫元圃院赐被水者帝问羣臣徵与诸葛亮孰贤岑文本曰亮才兼将相非可比帝曰徵蹈履仁义欲致君尧舜亮亦不过是也帝厌上封者多不切事欲加譙黜徵曰古者立谤木欲闻已过言而是朝廷之益即非无损于政由是皆劳遣之时屡有阉宦充外使妄有论奏事发帝怒徵进曰阉宦虽微狎近左右时有言语轻而易信浸润之譖为患特深今日之明必无此虑为子孙教不可不杜絶其源帝悦充使永停徵因上言尚德好善之美术数刻深之害反覆至数千言帝手诏嘉叹赐绢三百匹十三年徵上疏言陛下顷年以来渐不克终非复贞观以初之盛因条陈不克终者十渐帝书为屏障兼付史官赏黄金十斤廐马二疋又尝问徵比来朝臣多不论事何也徵曰陛下虚心采纳诚宜有言者然古人云未信而谏则以为谤已信而不谏则谓之尸禄但才器不同懦弱之人怀忠直而不能言疎远之人恐不信而不得言怀禄之人虑不便身而不敢言所以相与緘默俛仰帝曰诚如卿言朕今开怀纳谏卿等无劳烦怖惧遂不极言侯君集平高昌帝欲以其地为州县徵谓不如抚其民而立其子所谓伐罪吊民威德被于遐方者也若以为州县常须千余人镇守数年一易往来交替十年之後陇右空虚散有用以事无用未见其可褚遂良亦极谏帝不从以其地置西州後西突厥欲攻西州帝悔谓侍臣曰

往年初平高昌魏徵褚遂良劝朕立其子弟依旧为国不用其计方自悔责宁得忘所言者乎徵尝侍宴两仪殿举齐桓公鲍叔牙管仲甯戚交傲事为戒帝嘉纳之时大臣并请封禅惟徵执不可帝曰岂功不高德未厚耶诸夏未治远方未服嘉瑞不至年谷不登耶何为而不可徵曰陛下功则高而民未怀惠德则厚而泽未旁流诸夏虽安未可驱之役远方慕义无以供其求符瑞虽臻爵罗犹密积岁丰稔仓廩尚虚譬如人有十年长患疗治方瘳便欲负重日行百里必不可得告成天地臣窃有疑兼以大事举行万国咸萃要荒之外奔走来庭今伊洛以东暨于海岱人烟断絶道路萧条徒令窥示虚弱又赏赐未厌衆望给复不偿民劳遇有灾眚难以追悔帝不能夺尝与房元龄高士廉遇少府少监窦德素于路问北门近何营缮德素奏之上怒让元龄等曰君但知南衙政事北门小营缮何与君事元龄等拜谢魏徵进曰元龄等为陛下股肱耳目中外事岂有不应知者使所营是当助成之非则当请罢之不知何罪而责何罪而谢也上甚愧之十七年有疾上手诏问之且言不见数日朕过多矣若有闻见可封状进来徵上言陛下临朝常以至公为言退而行之未免私僻或畏人知横加威怒欲盖弥彰竟有何益徵家初无正寝帝辍小殿材为营构赐素褥布被从其所尚数与太子临问拊之流涕许以衡山公主降其子叔玉卒年六十四帝临哭之恻罢朝五日太子举哀西华堂诏百官咸赴丧赠司空諡文贞给羽葆鼓吹班剑贖其妻裴氏辞曰徵素俭约今葬以羽仪非其志也乃更用素车白布檐帷陪葬昭陵帝登苑西楼望哭甚哀御制碑文手书之益封户九百临朝叹曰以铜为监可正衣冠以古为监可知兴替以人为监可明得失魏徵歿朕亡一监矣朕比使人至其家得书一纸始半藁其可识者曰天下之人有善有恶任善人则国安用恶人则国弊公卿之内情有爱憎憎者惟见其恶爱者止见其善爱憎之间所宜详慎若爱而知其恶憎而知其善去邪勿疑任贤勿猜可以兴矣其大畧如此朕顾思之恐不免斯过公卿侍臣可书之于笏知而必谏也徵状貌不逾中人每犯顔进谏虽逢盛怒神色不慑帝徐为霁威奏疏数万字皆本仁祖义劝诫昭然称引甚富尤好徵据刘向说苑帝尝谓徵曰卿罪重于中钩我任卿逾于管仲近代君臣相得宁有似我于卿者乎一日宴近臣于九成宫称徵每犯顔切谏不许我为非我所以重之徵再拜曰陛下导臣使言臣所以敢言陛下若不受臣言臣亦何敢犯龙鳞触忌讳也帝大悦赐钱十五万又尝谓侍臣曰贞观以前从我平定天下周旋艰险元龄之功贞观之後尽心于我献纳忠说安国利人成我今日功业惟魏徵而已解佩刀赐之帝尝得佳鹞自臂之望见徵来匿怀中徵奏事良久鹞竟死帝将有关南之行既办而止徵谒告还问故帝笑曰畏卿嗔故中辍耳徵以隋乱後典章湮散引诸儒校集秘书粲然复完又以小戴礼综彙不伦作类礼二十篇帝好武徵侍宴见舞破陈乐俛首不顾至庆善乐则谛玩无斁举有所讽切如此徵歿後毀者百出以尝荐杜正伦侯君集诬为阿党又诬録谏语示史官帝怒停叔玉婚而仆所为碑後征辽东还怅然曰魏徵若在朕无此行仍召其妻子慰劳以少牢祀其墓复立碑加礼焉五世孙暮仕至同平章事宣宗称其直谏有祖风

新唐书赞曰君臣之际顾不难哉以徵之忠而太宗之睿身歿未几猜譖遽行始徵之谏累数十余万言至君子小人未尝不反覆为帝言之以佞邪之乱忠也久犹不免故曰皓皓者易污嶢嶢者难全自古所叹云唐柳芳称徵死知与不知莫不恨惜以为三代遗直谅哉论曰徵务引其君以当道志仁批逆鳞无所讳倦倦忠贞学术通明浩气充塞古今诤臣鲜有过之太宗英睿从谏如转圜士君子有致君尧舜之心遇可为尧舜之主不披肝露胆罄底蕴以相告非人情矣徵之谏固不可及亦太宗成之也身歿未几媚毁遽行又似一日无徵衆寒杂至虽英

睿如太宗且不免为佞邪所播弄悲哉前此之转圜亦微有以佐之也明君良臣相需殷而相得彰亶其然乎

王珪

王珪字叔玠梁太尉僧辩孙也少孤性雅澹志量深沉能安贫履正交不苟合隋末亡命南山十余年母李氏谓曰汝他日必贵然未知所与游者何如人试与偕来乃约房杜等过其家李窥见大喜亟具酒食曰客皆公辅才汝贵不疑高祖入关李纲荐之授太子舍人迁中允太宗即位召为谏议大夫珪推诚纳善多所献替帝顾待良厚封永宁县男寻迁侍中帝尝问珪曰近世治不及古何也对曰汉世尚经术宰相多用儒士故风俗淳厚近世重文轻儒参以法律此治化之所以益衰也帝然之一日进见有美人侍侧帝指示珪此庐江王瑗姬也瑗不道贼其夫而纳之珪避席曰陛下以庐江为是耶非耶帝曰杀人而取妻乃问朕是非何也珪曰姬今在帝侧窃谓陛下是之审知其非何不屏去若更纳用此与郭公善善不能用恶恶不能去相去几何哉帝悦即出之帝使太常祖孝孙教乐律宫中以宫伎不进数被让珪与温彦博谏曰孝孙雅士今乃使教官人又责譙之天下其以士为轻乎帝怒曰卿皆朕腹心之臣乃附下罔上为人游说耶彦博惧谢罪珪不拜曰陛下责臣以忠直今臣所言岂私曲邪陛下疑臣以私是陛下负臣臣不负陛下帝默然而罢明日谓房元龄曰自古帝王纳谏诚难朕昨责珪等至今悔之公等勿因此不尽言也时珪与元龄李靖温彦博戴胄魏徵同辅政帝以珪善鉴人物因谓之曰卿标鉴通悟试为朕言元龄等且自谓孰与诸子贤珪对曰孜孜奉国知无不为臣不如元龄兼资文武出入将相臣不如靖敷奏详明出纳惟允臣不如彦博济治剧众务必举臣不如胄以谏诤为己任耻君不及尧舜臣不如徵至激浊扬清疾恶好善臣于数子有一日之长帝称善而元龄等亦以为确论进封郡公後为魏王泰师王见之辄先拜珪亦以师道自居教王忠孝王问何为忠孝珪曰至尊王之君事思尽忠亦王之父事思尽孝惟忠孝可以立身成名享天佑垂後裔王问所习珪曰汉东平王苍称为善最乐愿王志之帝闻喜曰儿可无过矣子敬直尚南平公主先是公主下嫁皆不以妇礼事舅姑珪曰主上钦明动循礼法吾当受公主谒见岂为身荣所以成国家之美耳乃与其妻就席坐令公主执笄行盥馈之礼是後公主下降咸备妇礼自此始也贞观十三年卒年六十九图形凌烟諡曰懿珪性不苟察临官务举纲维去太甚平居虽仆妾不见其喜愠奉寡嫂尽礼家事咨而後行教抚孤侄虽其子不过也微时人或赠遗初无让及贵厚报之虽已亡必酬贍其家宗姻匮乏周恤咸至薄于自奉未尝营构堂室有司劾其不立家庙四时祭于寝帝为立庙媿之不罪也世以为俭不中礼云论曰珪推诚纳善多所献替盛世良臣也先儒以事讐责之其论严矣尝考纲目发明王魏奉高祖之命而辅太子则高祖其君也太子其长也家无二主国无二上任是职者固当以一人为主不得以所事为主王魏所处与管召殊科此论固自有见非为王魏解说也珪之学术谏猷不及魏徵而刚直不挠善谏争与徵相似王魏并称有以哉

李靖

李靖字药师京兆三原人姿貌魁秀通书史尝曰丈夫当建功名宁作章句儒耶其舅韩擒虎与论兵辄以孙吴目之仕隋为殿内直长杨素牛弘皆曰王佐才也大业末为马邑丞高祖擊

突厥靖察有非常志自囚上急变传送江都至长安道梗高祖已定京师将斩之靖呼曰公起兵为天下除暴乱欲就大事以私怨杀士乎秦王为请得释从平王世充以功授开府萧铣据江陵靖陈图铣十策诏拜靖行军总管兼摄赵郡王孝行军长史武德四年八月大閱夔州时秋潦涛濊涨恶诸将请俟江平乃下靖曰兵机事以速为神今乘铣不备冒险疾趋是震雷不及塞耳可禽也孝从之九月拔荆门宜都抵夷陵铣将文士弘悉銳屯清江孝欲擊靖请驻南岸待其气衰孝弗听自往战败绩贼衆委舟散掠靖纵兵奋擊大破之乘胜直抵江陵入其外郭又攻水城拔之大获舟监命悉散之江中诸将皆諫曰奈何弃以资敌靖曰萧铣之地南出岭表东距洞庭吾悬军深入若攻城未拔援兵四集表里受敌进退不获虽有舟楫无所用之今弃使蔽江而下援兵见之必谓江陵已破未敢轻进往来规伺动淹旬月吾取之必矣铣援兵见舟舰果疑不进铣内外阻絶乃降靖入据其城号令严肃秋毫无所犯或请籍铣将拒战者家货以赏军靖曰王者之师宜使义声先路彼为其主死鬪岂可同叛逆之科若降而籍之恐自荆以南坚城剧屯毆之死守非计之善也于是江汉列城望风歛附以功封永康县公荆州刺史遂度岭至桂州分道招慰酋长冯盎等皆以子弟来谒南方悉定得郡九十六户六十余万诏书嘉劳授岭南抚慰大使桂州总管念岭海陋远非振威武示礼义无以移风率兵南巡所过问疾苦延见长老宣布天子恩意远近懽服辅公祐反诏召靖副孝讨之李世积等七总管皆受节度靖督诸军水陆并进鏖战杀伤万人破其将冯惠亮陈正通等遂率轻兵至丹阳禽公祐以归太宗即位历兵刑二部尚书实封四百户检校中书令帝图突厥以靖为代州道行军总管帅劲骑三千由马邑趋恶阳岭颉利可汗大惊曰兵非倾国来靖敢提孤军至此靖又纵间谍离其腹心夜袭定襄破之可汗遁碛口帝曰靖以三千骑直犁寇庭取定襄古无与比足洒吾渭水耻矣进封代国公颉利走保铁山遣使请举国内附诏以靖将兵往迎又遣唐俭安修仁慰抚之颉利外为卑辞内实犹豫欲俟草青马肥亡入漠北靖曰颉利虽败其衆犹盛若走度碛北保依九姓图之无及乃谓副将张公谨曰诏使至敌必自寛若疾驱万骑賫二十日粮自白道袭之必得所欲遂督兵疾进遇侯遼皆俘以从去其牙七里乃觉俘斩十余万禽其子叠罗施杀义成公主颉利乘千里马先奔大同道行军总管张宝相禽以献于是斥地自陰山北至大漠矣因大赦赐民酺五日御史大夫萧瑀劾靖纵军士掠散珍宝召让之靖不辯惟顿首谢帝进靖光禄大夫增户至五百谓曰向人譖公短朕今悟矣赐帛千匹迁尚书右仆射靖每参朝议恂恂似不能言以沉厚称寻为畿内道大使巡察风俗会足疾乞休授特进就第吐谷浑寇边复拜西海道行军大總管靖决策深入踰积石山大战数十多所杀获降其国人无算吐谷浑伏允穷蹙自经死靖更立大宁王慕容顺而还自是闔门称疾谢絶亲故改封卫国公开府仪同三司图像凌烟阁年七十九卒陪葬昭陵諡景武

论曰李靖才畧非常而恂恂如不及以沉厚称虽非章句儒亦书史之润矣唐书赞其闔门称疾畏远权逼虽古哲人无以尚又言靖善用兵特临机果料敌明根于忠智而已世俗言靖精风角鸟占云孤虚之术传着怪诡皆不足信有旨哉有旨哉

傅奕

傅奕相州邺人也开皇中徙扶风高祖为扶风太守礼之及即位拜太史丞会令庾俭以父质占候忤隋炀帝死恚其事荐奕自代遂为令时国制多仍隋旧奕上言黄帝唐虞三代不相沿

礼袭乐隋季违天害民专峻刑法天下兆庶同心叛之陛下拨乱反正安可不一新民之耳目改正朔易服色变律令革官名功成作乐治终制礼使天下知盛德之隆此其时也然官贵简约夏后官百不如虞氏五十周三百不如商之百又言夏有乱政而作禹刑商有乱政作汤刑周有乱政作九刑卫鞅为秦法增凿颠抽胁镬烹等六篇始皇为挟书律此失于烦不可不监复上疏极论浮屠谓西域之法无君臣父子以三途六道吓愚欺庸追既往之罪窥将来之福习其教者不惮科禁轻犯宪章至有身在狱中诵梵礼佛以祈解免且生死壽夭本诸自然刑德威福繫乎人主贫富贵贱功业所招而愚僧矫诈皆云由佛让天理窃主权其为害政良可悲矣五帝三王未有佛法君明臣忠年祚长久至汉明帝始立胡祠然惟桑门自传其教西晋以上不许中国髡为之徒石苻乱华乃弛厥禁主庸臣佞政虐祚短事佛致然梁武齐襄足为明戒今天下僧尼数盈十万请令匹配即成十万户十年之後滋产必多加之教训兵农两足利可胜既耶又上十二论言益痛切诏百官议之惟太仆卿张道源是奕言萧瑀曰佛圣人也而奕非之非圣人者无法当治罪奕曰人之大伦莫如君父佛以世嫡而叛其父以匹夫而抗天子萧瑀不生于空桑乃遵无父之教非孝者无亲瑀之谓矣瑀不能对帝亦恶沙门道士不守戒律诏有司沙汰僧道会传位未及行而止太宗既立召赐食问佛法玄妙可师卿何独不悟其理奕曰佛乃胡中桀黠欺西域以自神迷惑滋广而嬖儿幻夫摸庄老文饰之不忠不孝削髮而揖君亲游手游食易服以逃租赋有害国家无益于民臣非不悟鄙不学也帝颇然之他日谓侍臣曰梁武帝惟谈苦空侯景之乱百官不能乘马元帝为周师所围犹讲老子戎服以听此深足戒朕所学者尧舜周孔之道如鸟之有翼鱼之有水失之则死不可一日无也後有僧自西域来能呪人立死复呪即生帝试之验以告奕奕曰此邪术也臣闻邪不干正请呪臣必不能行帝命僧呪奕奕初无所觉须臾僧自僵仆遂不复苏又有婆罗门僧言得佛齿物莫能伤长安士女辐辏如市奕谓其子曰吾闻有金刚石性至坚惟羚羊角可破汝往试焉其子如言扣之应手而碎观者乃止奕虽善天文占候数术然训子习六经谓己学不可以传妖胡佛书慎勿寓目病不问医忽酣卧蹶然起曰吾死矣夫自书志曰傅奕青山白云人也以醉卒年八十五

论曰善哉傅奕之斥浮屠也浮屠之教浅之则论因果深之则谈玄妙夫作善降祥不善降殃天道自然之应岂佞佛所能免哉其所谓玄妙者掇拾儒者之唾余杂以老氏之浮诞稍变其说而归之于空夫儒者之学万念皆实由性分所固有以尽其职分所当为措则正而施则行释氏之学万念皆空托为明心见性之说而弃道遗伦终归于无何有之乡此奕之所以卓然不惑以正胜之与昌黎佛骨表後先并耀矣

史传三编卷二十一

卷二十二

钦定四库全书

史传三编卷二十二

大学士朱轼撰

名臣传十四

唐

马周

马周字宾王博州茌平人也少孤家贫嗜学善诗春秋然性旷迈乡人以无细谨薄之武德中补州助教以不屑治事去客密州赵仁本高其才资给使入关留汴爲浚仪令崔贤所辱遂激而西舍新丰逆旅主人不之顾周命酒一斗八升悠然独酌衆异焉至长安舍中郎将常何家贞观五年诏百官言得失周爲何条二十事太宗怪问何何曰此非臣所能家客马周爲之帝令召周末至使者数辈敦趣及见与语大悦诏直门下省明年拜监察御史奉使称职帝以何得人赐帛三百匹周上疏曰臣每观前史见贤者忠孝事未尝不掩卷长想思履其迹臣不幸蚤失父母犬马之养已无所施顾来事可爲者惟忠义而已陛下不以臣愚擢臣不次辄竭区区伏见大安宫在宫城右墙宇门阙方紫极爲卑小东宫皇太子居之而在内大安至尊居之反在外太上皇虽志清俭爱惜人力而蕃夷朝见四方观听有不足焉臣愿务从高显以称万方之望伏读明诏以二月幸九成宫窃惟太上皇春秋高陛下宜朝夕视膳今所幸宫去京三百里而远万一太上皇思感欲见陛下何以逮之今兹本爲避暑行也太上皇留热处陛下走凉处温清之道臣所未安伏见诏宗室功臣悉就藩国遂貽子孙世守其政与国无疆臣谓陛下宜思所以安存之富贵之何必使世官也且尧舜之父有朱均之子若令有不肖子袭封嗣职兆庶被殃正欲絶之则子文之治犹在也正欲存之则桀纣之恶已暴也必曰与其毒害于见存之人毋宁割爱于已亡之臣则向之所谓爱之重之者适所以伤之也臣谓宜赋以茅土畴以户邑必有材行随器而授虽干翮非强亦可以免累汉光武不任功臣以吏事所以终全其世愿陛下深思其事使得奉大恩而终全其福祿臣闻圣人之治天下莫不以孝为本故曰孝莫大于严父严父莫大于配天国之大事在祀与戎孔子亦曰吾不与祭如不祭自陛下践祚宗庙之享未尝亲事窃惟圣情以乘輿一出所费无艺故忍孝思以便百姓而一代史官不书皇帝入庙将何以貽厥孙谋示来叶耶臣知大孝诚不在俎豆之间然圣人训人必以己先之示不忘本也臣闻致化之道在求贤审官孔子曰惟名与器不可以假人是言慎举之爲重也伏见王长通白明達本乐工輿皂韦盘提斛斯正无他材独解调马虽术踰等夷可厚赐金帛今超授高爵与外廷朝会驺竖倡子鸣玉曳履臣窃耻之帝善其言除侍御史又言臣历观夏商周汉之有天下传祚相继多者八百余年少者犹四五百年皆积德累业恩结于人岂无

僻王赖先哲以免自魏晋逮周隋多者五六十年少者二三十年良由创业之君不务仁化当时仅能自守後无遗德可思故传嗣之主其政少衰一夫大呼天下土崩今陛下虽以大功定天下而积德日浅当隆禹汤文武之道使恩有余地爲子孙立万世之基自古明王虽因人设教大要节俭于身恩加于人故其下爱之如父母卜祚遐长今百姓承丧乱之後比于隋时才十分之一而徭役相望兄去弟还陛下虽诏减省而有司徒行文书役之如故四五年来百姓颇怨嗟以爲陛下不存养之汉文帝惜百金之费而罢露台集上书?以爲殿帷所幸慎夫人衣不曳地景帝亦以锦绣纂组妨害女工特诏除之所以百姓安乐至孝武帝虽穷奢极侈承文景遗德故人心不摇向使高祖之後即值武帝天下必不能全又益州及京师诸处营造供奉器物并诸王妃主服饰皆过靡丽臣闻昧旦丕显後世犹怠作法于治後世犹乱陛下少处人间知百姓疾苦前代成败目所亲见尚犹如此而况皇太子生长深宫不更外事即万岁後圣虑之所当忧也臣窃寻自古黎庶怨畔未有能重安者凡修政教当修之于可修之时故人主每见前代之亡则知其政教之所由丧而不知其身之失故纣笑桀之亡幽厉笑纣之亡隋炀帝又笑齐魏之失国也今之视炀帝犹炀帝之视齐魏也贞观初率土荒俭一匹绢才易斗米而天下帖然者百姓知陛下忧怜之故人自安无谤讟也五六年来频岁丰稔一匹绢易粟十余斛而百姓咸怨以爲陛下不忧怜之何则今营爲者多不急之务也自古以来国之兴亡不在蓄积多少而在百姓苦乐且以近事验之隋贮洛口仓而李密因之积布帛东都而王世充因之西京府库亦为国家之用积贮固有国之常要当人有余力而後收之岂人劳而强敛之以资寇耶夫俭以息人贞观初陛下已躬爲之若人劳而不息万一中国水旱而边方有警狂狡窃发非徒旰食晏寝而已古语云动人以行不以言应天以实不以文陛下诚欲励精为政不烦远采上古但及贞观初则天下幸甚昔贾谊谓汉文帝可痛哭者诸王年少傳相制之长大之後必生祸乱臣窃观今功臣诸王陛下之日必无他心万代之後不可不虑汉晋以来乱天下者皆由树置失宜不豫爲节制人主岂不知其然溺于私爱耳今诸王宠遇过厚臣愚虑之非特恃恩骄侈也昔魏武帝宠陈思王文帝即位防守禁闭先帝示恩太多故嗣主疑而畏之此武帝宠陈思适所以苦之也且帝子身食大国何患不富而优赐曾无限极语曰贫不学俭富不学奢言自然也今大圣创业岂惟处置见子弟当制长久之法使万代奉行臣闻天下以人爲本使百姓安乐在刺史县令耳县令既衆不可皆贤但州得贤刺史可矣古者郡守县令皆选贤德欲有所用必先试以临人或由二千石高第入爲宰相今独重内官县令刺史颇轻其选刺史多武夫勲人或京官不称职始出补外折冲果毅身力强者入爲中郎将其次乃补边州而以德行才术擢者十不得一所以百姓未安殆由于此疏奏帝称善谓侍臣曰刺史朕当自选县令宜诏京官五品以上各举一人拜周给事中转中书舍人周善于敷奏机辨明銳动中事会裁处周密帝每曰我暫不见周即思之岑文本谓所亲曰马君论事会文切理无一言可损益听之纒纒令人忘倦然鸛肩火色腾上必速恐不能久累迁中书侍郎兼右庶子十八年迁中书令帝征辽东留定州辅太子还摄吏部尚书进银青光禄大夫帝飞白书鸛凤冲霄必资羽翼股肱之寄诚在忠良十六字赐之周寝疾取所上章奏稿悉焚之曰毋彰君过取身後名也卒年四十八陪葬昭陵初帝遇周厚周颇自负尝遣人以图购宅衆以其素无货皆窃笑他日白有佳宅直二百万周遽以闻诏有司给直并赐奴婢杂物周领选时特黜浚仪令以其尝辱已也

论曰周微时落拓无所容何其急也及爲人陈事动主知相见恨晚又何遇之奇也草茅特達

慷慨而谈国家之务洋洋乎无所忌讳彼亦自以不世遭逢欲倾生平肺腑报知遇忠矣方之贾长沙魏郑国间实堪踵武唐书以不逮传说吕望惜之无乃责备太过乎

褚遂良

褚遂良字登善钱塘人亮子也贞观中爲起居郎太宗尝叹虞世南死无与论书者魏徵白见遂良帝令侍书时方博购王羲之故帖独遂良能辨质真僞备论所出帝将有事泰山至洛阳星孛太微犯郎位遂良谏曰陛下拨乱反正功超古初方告成岱宗而彗辄见此天意有所未合昔汉武帝行岱礼优柔者数年臣愚愿加详虑帝悟遂罢封禪迁谏议大夫知起居注帝欲观之对曰今之起居古左右史也善恶必记未闻天子自取而观帝曰朕有不善卿亦记耶对曰臣职载笔君举必书刘洎曰使遂良不记天下之人亦记之帝尝怪舜造漆器禹雕其俎谏者十余不止遂良曰雕琢害力农纂绣伤女红漆器不已必金玉为之故谏者求其源使不得开及夫横流则无复事矣帝咨美之时皇幼子皆外任都督刺史遂良固谏以爲刺史民之师师得人则安失人则劳皇子幼宜留京师教以经学畏仰天威不敢犯禁养成德器然後敦遣帝嘉纳之时太子承乾失德魏王泰有宠人物辐辏月给过于太子遂良上疏曰圣人制礼尊嫡卑庶庶子虽爱不得踰嫡所以塞嫌疑之渐除祸乱之源也昔汉窦太后宠梁孝王卒以忧死宣帝宠淮阳王亦几至于败今魏王新出合宜示以礼则训以谦俭乃爲良器此所谓圣人之教不肃而成者也一日帝问侍臣以国家急务遂良曰太子亲王宜有定分此爲最急帝是其言使魏徵傳太子然太子卒以罪废既废魏王泰间侍帝许立爲嗣谓大臣曰昨日泰投我怀言臣今始得爲陛下子臣有一子百年後当杀之传国晋王朕闻其语甚怜之遂良曰陛下失言安有爲天下主而杀其爱子授国他人者乎陛下昔以承乾爲嗣复宠爱泰故纷纷至此今若必立泰非别置晋王不可帝泣即定策立晋王爲太子授遂良太子宾客尝谏絶薛延陀失大信帝不纳帝欲自讨辽东遂良固劝无行谓一不胜师必再兴再兴爲忿兵兵忿者胜负不可必帝然之会李积诋其计帝意遂决遂良惧上言臣请譬之一身两京腹心也四境手足也殊裔絶域殆非支体所属高丽王陛下所立莫离支杀之讨其逆夷其地固不可失但遣一二慎将付锐兵十万翔旂云輶唾手可取昔侯君集李靖犹能擷高昌纓突厥陛下止发踪指示得归功圣朝臣闻涉辽而左水潦荒漫决非万乘六师所宜行是时帝锐意荡平不见省进黄门侍郎参综朝政谏却莫离支贡金引春秋纳郤鼎爲词帝以其使属吏及平高昌岁调兵千人往戍复论不可劝立麴文泰子弟亦不用突厥寇西州帝始悔之帝于寝宫侧别置院居太子遂良谏以父子不可滞爱滞爱者多愆宜许太子近师傅专学艺以广懿德帝从其言会父丧免起复拜中书令帝寝疾与长孙无忌并召入卧内以霍光诸葛亮委之令尽诚辅太子又语太子无忌遂良在而无忧国家事高宗即位封河南郡公累迁尚书右仆射与无忌同心辅政帝亦敬礼二人纳善勤民故永徽初政有贞观之风六年帝将立武昭仪召无忌李积与遂良入内殿遂良曰今日之召多爲中宫上意既决逆之必死太尉元舅司空功臣不可使上有杀元舅功臣之名遂良起于草茅无汗马之劳致位至此且受顾托不以死争之何以下见先帝积称疾无忌等入帝曰罪莫大于絶嗣皇后无子今欲立昭仪谓何遂良曰皇后名家子先帝爲陛下娶之临崩执陛下手语臣曰朕佳儿佳妇今以付卿玉音在耳非有大故不可废也帝不悦翌日复言对曰陛下必欲易皇后请更择令族何必武氏武氏经事先帝衆所共知万代之後谓陛下何如主帝羞默遂良因置笏殿阶叩头流血曰还陛下笏丐归田里帝大怒

命引出武氏在帘中大言曰何不扑杀此獠无忌曰遂良受先帝顾命有罪不可加刑于志宁不敢言侍中韩瑗因间奏事涕泣极谏上不纳明日又谏悲不自胜上命引出瑗又上疏谏曰姐已倾殷褒姒灭周每览前古常兴太息不谓今尘黷圣代陛下不用臣言臣恐宗庙不血食矣来济上表谏曰王者立后上法乾坤必择礼教名家幽间令淑副四海之望称神只之意孝成纵欲以婢爲后使皇统亡絶社稷倾沦惟陛下详察帝皆不纳他日李积入见帝问之曰朕欲立武昭仪爲后遂良固执不可遂良既顾命大臣事当且已乎对曰此陛下家事何必更问外人帝意遂决乃左迁遂良潭州都督寻转桂州韩瑗上疏言遂良体国忘家损身徇物风霜其操铁石其心社稷之旧臣陛下之贤佐无罪斥去内外咸嗟愿鉴无辜以慰衆望不聽瑗复言曰昔微子去殷国随以亡张华不死晋不及乱陛下无故弃逐旧臣恐非国家之福帝终不纳显庆二年再贬遂良爱州刺史上疏自陈顾命定策情事冀感悟上意卒不省而韩瑗来济并以忠谏坐遂良党贬死逾年遂良卒年六十三瑗字伯玉京兆三原人来济江都人

论曰褚遂良忠谏名臣也或疑其潜死刘洎唐书亦病之李贽藏书至列于艺学之流悲夫高宗昏庸牝晨穿鼻彼佞如积固不足道虽以无忌之贤亦且弗能强谏遂良激切廷争窜死荒徼知有国而不知有身魏文贞宋广平之俦匹也而谓有潜人于死之事固未可信

裴行俭

裴行俭字守约绛州闻喜人也以父仁基爲王世充所害?补弘文生贞观中举明经调左屯卫仓曹参军大将军苏定方授以用兵奇术显庆二年迁长安令坐私论立武昭仪事贬官麟德二年擢安西都护西域诸国多慕义归附召爲司文少卿迁吏部侍郎典选十余载甚有能名始设长名榜铨注等法又定州县升降资拟高下爲故事上元三年吐蕃叛出爲洮州道左二军总管又改秦州右军调露元年十姓可汗阿史那都支及李遮旬诱蕃落以动安西与吐蕃连和朝廷欲讨之行俭议曰吐蕃叛涣方炽敬元失律审礼丧元安可更爲西方生事今波斯王死其子质京师宜遣使立之道过二蕃以便宜制事可不劳而成也帝即诏行俭册送波斯王且爲安抚大食使经莫贺延碛风砂昼冥导引者迷路将士不胜饥渴行俭止营致祭下令曰水泉非远衆乃少安俄而云彻风恬行数百步果得善水草至西州诸蕃郊迎行俭召豪杰千余人自随扬言大热未可进驻军须秋都支觐知之不设备徐召四鎮酋长以畋猎爲名陰勒部伍倍道而进去都支帐十余里遣所亲问都支安否召与相见都支本与遮旬计及秋来拒忽闻使至仓卒不知所出率子弟五百余人诣营谒遂禽之传其?箭召诸部酋长悉来请命并执送碎叶城简精骑约齎裘遮旬道获遮旬使者释之俾前往谕其主言都支已禽状于是遮旬亦降悉俘至京师迁礼部尚书兼右卫大将军冬十月突厥阿史德温傅奉职二部俱反立泥熟旬爲可汗二十四州酋长皆叛应都护萧嗣业战死诏行俭爲定襄道行军大总管讨之行俭诈爲粮车三百乘伏壮士陌刀劲弩于中用羸兵挽进潜以精兵踵其後赋果来掠羸兵弃而走贼方解鞍牧马取粮车中而壮士突出伏兵又至杀获几尽自是粮车无敢近者大军次单于北暮立营塹濠既周行俭命徙营高冈吏白土已安堵不可动弗听促徙之比夜风雨暴至前营所水深丈余衆惊骇问何以知行俭曰自今第如我节制不必问所以知也贼拒战黑山数败杀僞可汗泥熟旬持首来降行俭又计禽奉职乃还明年阿史那伏念复与温傅合行俭总诸军屯陁口纵反间说伏念与温傅相贰伏念惧密送款请缚温傅自効行俭秘之

而密以闻後数日望见烟尘涨天而南斥候皆惶骇行俭曰此伏念执温傳來降非他也顾受降如受敌勅严备遣单使往劳既而果然于是突厥余党悉平帝大悦封闻喜县公侍中裴炎害其功譖斩伏念及温傳于市行俭叹曰浑濬之事古今耻之但恐杀降则後无复来矣遂称疾不出永淳元年卒年六十四生平以草隶名家高宗用绢素令书文选一部甚秘爱之尝言褚遂良非精笔佳墨不书惟余与虞世南不择笔墨书更妍捷有文集二十卷选谱十卷草字杂体数万言行于世又爲营阵部伍四十六诀武后诏武承嗣就第取去不复传陰阳历术无所不通尤好取人善甄拔贤俊有人伦之鉴在吏部时见苏味道王勳许以皆掌铨衡李敬元盛称王勃杨炯卢照隣骆宾王之才行俭曰士之致远先器识而後文艺勃等虽有文才而浮躁浅露岂享爵禄之器耶炯沉静可至令长余得令终爲幸後咸如所料所引偏裨若程务挺王方翼张?最刘敬同李多?黑齿常之类皆爲名将平都支出玛瑙盘示将士广二尺文彩灿然军吏趋跌碎之惶怖叩头流血行俭笑曰尔非故也何至是所赐都支资产金器三千及橐驼马牛皆分给亲故泊麾下数日辄尽

论曰行俭才兼文武有人伦之鉴其器量亦不可及令长秉铨衡和钧石岂不爲有唐名相乃仅仅以知兵显而史氏遂以将帅目之惜夫士君子无所不学经文纬武非有两途可爲知道耳内则佐天子作舟霖于苍生外则爲国家扬皇威于万里此之谓读书人岂必如邓弼所云一服儒衣遂奄奄欲絶哉行俭用兵以谋畧见奇不以血刃着绩儒将风期尤其可传者也

狄仁杰

狄仁杰字怀英并州太原人也爲儿时同館生有被害者吏就诘衆争辨仁杰诵读不置吏让之答曰黄卷中方与圣贤对何暇偶俗吏语耶举明经调汴州参军爲吏诬诉黜陟使阎立本异其才谢曰观过知仁君可谓沧海遗珠矣荐授并州法曹亲任河阳仁杰登太行山反顾见白云孤飞谓左右曰吾亲舍其下瞻怅久之云移乃去同僚郑崇质母老疾当使絶域仁杰谓曰若可贻亲万里忧乎诣长史蔺仁基请代行仁基叹曰北斗以南一人而已时方与司马李孝廉不平相谓曰吾等可少愧矣遂相待如初迁大理丞岁中断久狱万七千人称平恕左威卫大将军权善才右监门中郎将范怀义坐误斧昭陵柏高宗诏诛之仁杰奏不应死帝怒曰是使我爲不孝子必杀之仁杰引张释之对文帝盗玉环事争之得免授侍御史左司郎中王本立怙宠自肆仁杰劾奏其恶有诏原之仁杰曰朝廷借乏贤如本立者不少陛下惜有罪亏成法奈何臣愿先斥爲羣臣戒本立抵罪由是朝廷肃然使岐州有亡卒数百剽行人道不通官捕繫之余党纷纷不能制仁杰患其穷且乱乃明开首原格出繫者使相晓皆自缚归帝叹其達权迁度支郎中高宗幸汾阳宫爲知顿使輦道出妬女祠相传盛服过者致风雷之变并州长史李冲元发卒开别道仁杰曰天子之行风伯清尘雨师洒道何妬女避耶止其役帝壮之俄爲宁州刺史抚和戎落郡人立碑以颂徵拜冬官侍郎充江南巡抚使奏毁淫祠千七百所只留夏禹吴泰伯季札伍员四祠而已转文昌右丞复出爲豫州刺史时越王贞支党二千人皆论死仁杰释其械密疏曰臣欲有所陈似爲逆人申理不言且累陛下钦恤意表成复毁不能自定然此皆非本恶诬误至此诏悉戍边囚出宁州父老迎劳曰狄使君活汝耶相与哭碑下斋三日乃去天授二年入爲地官侍郎同凤阁鸾台平章事后谓曰卿在汝南有善政然有譖卿者欲知乎谢曰不愿知诚有过臣当改后叹爲长者未几来俊臣诬以谋反与平章事

任知古等七人同入制狱先是俊臣请降敕一问即承反者待减死仁杰等下狱俊臣以此诱之仁杰曰有周革命万物维新唐室旧臣甘从诛戮反固实俊臣使王德寿示意令引平章事杨执柔爲党叹曰皇天后土使仁杰爲此乎以首触柱血流沫面德寿惧而谢之仁杰裂衾帛书冤状置绵衣中谓德寿曰天时方热请授家人去其绵衣德寿许之仁杰子得书称变以闻时俊臣已诈爲仁杰作谢死表矣书上得召见后问曰卿承反何耶对曰不承则已死于考掠矣后曰何爲作谢死表对曰无之出表示之乃知其诈于是与同诬任知古魏元忠等七人悉免死皆贬县令?丹?冀州河北震动召爲魏州刺史时驱民保城修守具仁杰至曰贼尚远何事疲民悉就田作来则吾自拒之敌闻其名引去俄转幽州都督后自制金字十二于紫袍并赐龟带以旌其忠复同平章事时发兵戍疏勒四鎮百姓怨苦仁杰痛切极諫不见纳张易之尝从容问自安计仁杰曰惟劝迎庐陵王可以免祸时武承嗣三思营求爲太子仁杰从容言于后曰太宗栲风沐雨亲冒锋鏑以定天下传之子孙大帝以二子托陛下陛下今欲移之他族无乃非天意乎且姑侄之与母子孰亲陛下立子则千秋万岁後配食太庙立侄则未闻侄爲天子而祔姑于庙者也后曰此朕家事卿勿与知仁杰曰王者以四海爲家四海之内何者不爲陛下家事况元首股肱义同一体臣备位宰相岂得有所不预知乎因劝后召还庐陵王曰臣观天人未厌唐德比匈奴犯边陛下使三思募士踰月不及千人庐陵王代之不浹日輒五万今欲继统非庐陵王不可后怒罢议久之谓仁杰曰朕夜梦大鸛鵒两翼皆折对曰武者陛下姓两翼二子也陛下起二子则两翼振矣他日又问朕数梦双陆不胜何也仁杰与王方庆同辞对曰双陆不胜无子也天意者以儆陛下乎后感悟即日遣迎庐陵王于房州王至后匿之帐中召仁杰仁杰再三请情词切至涕下不能止后乃使王出曰还汝太子仁杰降拜顿首曰太子归未有知者人言纷纷何所取信乃复令出舍龙门具礼迎还中外大悦突厥寇赵定诏仁杰安抚河北时民多胁从贼去惧诛仁杰请赦勿问可其奏仁杰于是抚慰百姓得突厥所驱掠者悉递还本贯散粮运以赈贫乏修邮驿以济旋师自食疏粝禁其下不得侵扰百姓犯者必斩河北遂安还除内史后幸三阳宫有僧邀车驾观葬舍利后许之仁杰跪于马前曰此不足以屈天下之主彼僧人诡譎直欲招致万乘以惑远近之人耳后中道而还曰以成吾直臣之气时?丹?将有李楷固骆务整者尝败唐兵二人来降有司请族之仁杰曰二人骁勇絶伦能尽力于所事必能尽力于我若抚之以德皆爲我用矣奏以爲将军使将兵擊契丹余党悉平之献俘含枢殿后召公卿合宴举觴属仁杰曰公之功也后将造浮屠大像度费数百万官不能足令天下僧尼日施一钱以助仁杰諫曰功不使鬼必在役人物不天来终须地出不损百姓将何以求昔梁武简文舍施无限及三淮沸浪五岭腾烟列刹盈衢无救危亡之祸緇衣蔽路岂有勤王之师方今水旱不节边境未宁若费官财又尽人力一隅有难何以救之后曰公教朕爲善何得相违遂罢役圣历三年卒七十一諡文惠睿宗时进封梁公仁杰在位常以进贤爲务或谓曰桃李悉在公门矣仁杰曰荐贤爲国非爲私也卒以所荐张柬之桓彦范敬晖姚崇等光复中兴论曰仁杰心乎唐者也是时武氏已老太子犹存忍辱事牝主君子谅之谓其机深谋长欲成匡复之功有不得不然耳人臣之义苟利国家无所不可向令仁杰洁身以去自爲谋则忠矣万一小人乘闲攘夺太子不复唐祚以斩国何赖焉措置国是随宜补救从容岁月使武氏不疑羣宵不忌然後房州帝子得有反正之日盖用心苦矣纲目于武氏命官皆书周独仁杰柬之爲相则否亦深许其爲唐臣非僞周之私人也

徐有功名弘敏以字行国子博士文远孙也袭封东莞县男复举明经补蒲州司法参军爲政仁不忍杖罚民服其恩相约毋敢犯讫代不辱一人累迁司刑丞时武后僭位畏唐大臣谋已于是周兴来俊臣丘神积王弘义等揣识后指置总监牧院诸狱捕将相大臣俾相鉤逮楚掠备极又污引天下豪杰驰使者即按一切以反论吏争以周内穷诋相高后辄劝以官赏相告言者无虚日朝野震恐莫敢正言独有功数犯颜争枉直后厉语折抑持论益坚时博州刺史琅琊王冲责息钱于贵乡与尉颜余庆相闻知冲既坐逆诛魏州人告余庆豫冲谋后令俊臣鞠治以反状闻侍御史魏元忠请诛死籍其家诏可有功曰永昌赦令与虺贞同恶魁首已伏诛支党未发者原之书曰殲厥渠魁律以造意爲首?赦文已伏诛则魁首无遗矣余庆赦後被言是谓支党今以支爲首是以生入死也赦而复罪不如勿赦生而复杀不如勿生窃谓朝廷不当尔后怒曰何谓魁首答曰魁者大帅首者元谋后曰余庆安得不爲魁首答曰魁首虺贞已伏诛余庆今方论罪非支党而何后意解遂免死当是时左右及卫仗在廷陞者数百人皆缩项不敢息而有功气定言详巖然不挠有韩纪孝者受徐敬业官爵已物故推事使顾仲琰请籍其家诏报可有功追议曰律谋反者斩身亡即无斩法无斩法则不得相缘所缘之人亡则所因之罪减诏从之如此获宥者数十百姓累迁秋官郎中凤阁侍郎任知古冬官尚书裴行本等七人被诬当死后谓宰相曰古人以杀止杀今我以恩止杀就羣公丐知古等赐以再生可乎俊臣张知默固请如法后不许俊臣独引行本更验前罪有功奏曰俊臣违陛下再生之赐不可以示信于是悉免死道州刺史李仁褒兄弟爲人诬构有功争之不能得秋官侍郎周兴劾之曰汉法附下罔上者斩有功故出反囚罪当诛请按之后不许犹坐免官俄起爲左肃政台侍御史辞曰臣闻鹿走山林而命系庖厨陛下以法官用臣臣守正行法必坐此死矣后固授之天下闻有功复进洒然相贺时有诏公坐流私坐徒以上会赦免踰百日不首者复论有功奏曰凡律告赦前事以其罪坐之若无告言所犯终不自发如告言赦前事则与律乖今赦前之罪不自言者还以法论即恩虽布而一罪不能贷臣窃爲陛下不取后更诏五品以上议可又上疏曰天下员有定比选者日多选曹谗囑公行器谤满路近岁人多逆节事表生情法外构理而刻薄吏驱扇成奸虽朝堂进表列匭内牒叫阍弗听叩鼓弗闻使伸其冤正增其枉诚令天官铨注有所不平法司推断舞法深诋三司理匭受所上章拥塞不白者皆许臣按验劾发夺?贬劳不越月踰时可致刑措后纳之寔孝谏妻龐爲其奴诬告厌诅给事中薛季昶鞠之龐当死子希城讼冤有功明其枉季昶劾有功党恶逆当弃市有功方视事令史泣以告有功笑曰岂独吾死而诸人长不死耶安步去后诏诘曰公比断狱多失出何也对曰失出人臣小过好生陛下大德后默然龐得减死有功免爲民起拜右司郎中转运司刑少卿与皇甫文备同按狱复诬有功纵逆党久之文备坐事下狱有功出之或曰彼尝?君于死今生之何也对曰尔所言者私忿我所守者公法不可以私害公尝谓所亲曰大理人命所系不可阿旨诡词以求苟免故有功爲狱常持平守正以雪冤罔凡三坐大辟将死泰然不忧赦之亦不喜后以此重之所全活甚衆酷吏爲少衰然疾之如仇矣加司仆少卿卒年六十八赠司刑卿中宗即位赠越州都督授一子官会昌中追諡忠正有鹿城主簿潘好礼慕有功爲人论之曰昔称张释之爲廷尉天下无冤人然当文帝之时守法易也有功居革命之际周兴来俊臣等掩义隐贼有功守死明道身滨殆者数矣此其贤于释之远甚或称有功仁恕过汉于张起居舍人卢若虚曰徐公当雷霆之震而能全仁恕虽千载未见其比论曰诗曰风雨如晦鸡鸣不已有功当虐吏方张之时屡滨于危然据道执正始终无以异何所恃而能若是盖其仁恕不可解于心是以视物犹已古之仁人乎

张柬之

张柬之字孟将襄阳人少涉经史尤笃好三礼入太学祭酒令狐德棻异其才以王佐期之中进士第授清源丞永昌元年以贤良召对策擢第一年七十余矣授监察御史迁凤阁舍人以言事忤旨出爲合州刺史转蜀州故事岁以兵五百戍姚州地险瘴到屯辄死柬之论其弊请罢戍兵置郡畧曰臣谨按姚州古哀牢国东汉光武末始请内属置永昌郡统之赋其盐布擅鬪以利中土刘先主据蜀甲兵不充诸葛亮五月渡泸收其产入以益军故蜀志称亮南征後国以富饶此前世置郡以其利之也今盐布之税不供戈戟寶货之资不入而空竭府库驱率平人身膏草野朝廷无丝发利而百姓蒙终身之酷臣窃爲国家痛之往诸葛亮破南中即用渠帅统之不置汉官不留戍兵言置官留兵有三不易置官必番汉杂居猜嫌将起留兵转粮爲患滋重故纪纲粗立自然久定臣谓亮之策诚尽羈縻之要今宜罢姚州隶隲府岁时朝覲同诸国废泸南诸镇而设关泸北非命使不许交通增隲屯兵择清良吏以统之后不纳俄爲荆州大都督府长史后谓狄仁杰曰安得一奇士用之仁杰曰陛下求文章资历今宰相李峤苏味道足矣岂文士齷齪不足与成天下务哉后曰然仁杰曰荆州长史张柬之虽老宰相材也用之必尽节于国后召爲洛州司马他日又求人仁杰曰臣尝荐张柬之未用也后曰迁之矣曰臣荐宰相非司马也乃授司刑少卿迁秋官侍郎姚崇亦论其沉厚有谋能断大事即日召见拜凤阁侍郎同平章事柬之遂与平章事崔元暉中台右丞敬暉司刑少卿桓彦范相王司马袁恕己等谋诛二张匡复唐室以羽林大将军李多祚素慷慨可动以义柬之从容问曰将军居北门几年矣答曰三十年曰然则今日击钟鼎食贵重当世非大帝恩乎多祚泣曰死不敢忘柬之曰既知感恩必思以报今东宫乃大帝子迫于嬖竖宗社废兴将军宁有意乎多祚仰天痛哭自誓曰苟利国家惟相公所使柬之遂与定谋初柬之与荆州长史杨元琰相代语及太后革命事元琰慨然有匡复之志及柬之爲相引元琰爲右羽林将军又用彦范暉及右散骑侍郎李湛皆爲羽林将军典禁兵易之等疑惧以其党武攸宜参之俄而姚崇自灵武至都柬之彦范相谓曰事济矣遂以其谋告之时太子于北门起居彦范暉谒见密陈其策太子许之柬之元暉彦范乃与左威卫将军薛思行等帅羽林兵五百余人至玄武门遣多祚湛及内直郎王同皎诣柬宫迎太子斩关而入斩易之昌宗于庑下进至后所寝长生殿后惊起问曰乱者谁耶多祚等对曰易之昌宗谋反臣等奉太子令诛之恐有泄漏不敢以闻且请传位太子以顺天人之望于是收张昌期等皆斩之梟二张首于天津南收其党韦承庆房融崔神庆等系狱以太后制命太子监国遣使宣谕诸州明日中宗即位大赦惟易之党不原爲周兴等所枉者咸令清雪子女配没者免之相王旦加号安国相王皇族皆复属籍叙官爵其爲后所杀者访求其柩改葬之柬之以功擢天官尚书同凤阁鸾台三品封汉阳郡公俄进汉阳王与敬暉元暉彦范恕己同封名曰五王寔罢其政事也表求养疾授襄州刺史帝赋诗祖道诏羣臣餞定鼎门外至州持下以法虽亲故无所贷会汉水涨啗城郭因礮石爲堤以遏湍怒阖境赖之悬辞王爵弗许俄以三思计贬新州司马又流泂州忧愤卒年八十二桓彦范字士则润州丹阳人爲御史中丞时尝与宋璟同请案张昌宗谋逆罪疏请扬豫博三州之罗酷吏者悉赦之中宗正位每临朝韦后必施帷殿上预闻政事彦范极谏至引鲁桓齐姜牝鸡司晨事爲最後三思矫诏枉杀道逢彦范缚曳竹槎上肉尽杖死崔元暉安平人性至孝后久疾常奏言皇太子相王皆仁明孝友宜侍医药不宜引异姓出入禁闕後以流徙卒于道敬暉平阳人初爲卫州刺史有治绩放琼州时被杀袁恕己东光人中宗立常斥去佞巧杨务廉被杀于

环州

论曰张柬之经世奇才也举贤良第一年七十余及爲相已八十矣平章三月遂诛二张复唐室旋乾转坤功盖千载惜不戮三思夷诸武去疾留根无乃老而闇乎所以人主用贤贵及其锋而用之

史传三编卷二十二

卷二十三

<史部,传记类,总录之属,史传三编

钦定四库全书

史传三编卷二十三

大学士朱轼撰

名臣传十五

唐

姚崇

姚崇字元之陕州硤石人也本名元崇武后以其同突厥反者命以字行後避开元尊号又改名崇崇少倜傥尚气节年二十爲猎师呼鹰逐兽自喜张璟藏语以当位王佐无自弃故折节读书举下笔成章科累迁夏官郎中武后贤之拜侍郎后问周兴来俊臣诛後不闻有反逆以前论死得无冤枉崇曰当时坐谋反死者率皆兴等罗织陛下使近臣覆讯近臣尚不自保何敢动摇今天启圣心凶竖殲夷臣敢以一门百口保内外官无反者矣后悦赐银千两进凤阁鸾台平章事未几张易之私有请于崇崇不纳潛出爲灵武道大总管张柬之等谋诛二张崇适还参计议论功封梁县侯寻出爲亳州刺史历宋常越许四州睿宗时拜尚书进中书令与宋璟密奏太平公主干政危东宫请出公主及二王于外张说请太子监国以息异议崇赞之曰张说所言社稷之至计也帝从之已而爲公主所构事中变贬申州刺史明皇即位欲相之崇知帝大度鋭于治先设十事以坚帝意不可则辞帝曰试言之崇曰垂拱以来峻法绳下臣愿政先仁恕可乎朝廷覆师青海未有牵复之悔臣愿不幸边功可乎比来壬佞冒触宪网皆得以宠自解臣愿法行自近可乎后氏临朝喉舌之任出阉人之口臣愿宦竖不预政可乎戚里贡献以自媚于上公卿方鎮寢亦爲之臣愿租赋外一切絶之可乎外戚贵主更相用事班序荒杂臣愿戚属不任台省可乎先朝?狎大臣亏君臣之严臣愿陛下接之以礼可乎燕钦融韦月将以忠被罪自是诤臣沮抑臣愿羣臣皆得批逆鳞犯忌讳可乎武后造福先寺上皇造金仙玉眞二观费钜百万臣请絶道佛营造可乎汉以?莽阹梁乱天下国家爲甚臣愿推此鉴戒爲万代法可乎帝曰朕能行之崇乃顿首谢翌日拜兵部尚书同中书门下三品封梁国公迁紫薇令中宗以来贵戚争营佛寺度僧尼富户强丁削髮避役至是崇上言佛图澄不能存赵鸠摩罗什不能存秦齐襄梁武未免祸殃夫佛不在外悟之于心行事利益使苍生安稳是谓佛理乌用奸人以汨眞教帝善之诏天下沙汰僧尼髮而农者万二千人时帝方励精图治朝夕咨访他宰相畏帝威皆谦慚惟崇应答如响遇事裁决无滯碍故帝独专任之崇偶有事谒告十余日政务委积卢怀慎不能决惶恐入谢帝曰卿坐鎮雅俗耳崇既至须臾裁决俱

尽崇常于帝前序次郎吏帝左右顾不主其语崇惧再三言之卒不答崇趋出内侍高力士曰陛下新即位宜与大臣裁可否今崇亟言陛下不应非虚怀纳谏者帝曰我任崇以政大事吾当与决至用郎吏崇顾不能而重烦我耶崇闻乃安由是进贤退不肖黜陟以明开元三年山东蝗民不敢杀拜且祭崇遣御史督州县捉之怀慎以杀蝗太多恐伤和气崇曰奈何不忍于蝗而忍人之饥死若杀蝗有祸臣请当之四年复蝗崇又命捕汴州刺史倪若水上言蝗乃天灾刘聪捕之不克为害益甚崇牒若水曰聪僞主德不胜妖今日圣朝妖不胜德古之良守蝗不入境今坐视食苗不掇刺史其谓何若水惧乃纵捕得蝗十四万石议者犹喧譁不止帝疑复问崇曰庸儒泥文不知事变魏与後秦小忍不除至牛马相噉其毛民遂相食今纵不能捕尽不犹愈于养以遗患乎帝然之蝗害顿息卢怀慎卒源乾曜代之崇病谒告凡大政事帝必令乾曜就咨乾曜所奏善帝曰是必崇画之有不合则曰何不问崇帝以崇第僻远诏徙寓四方馆馆华大崇让不敢居帝曰恨不使处禁中何避也久之崇还政举宋璟自代乃以开府仪同三司致仕时开元四年也诏五日一参入阁供奉八年授太子少保九年卒年七十二謚文献遗戒薄葬治丧不许用浮屠法崇三爲宰相皆兼兵部尚书缘边屯戍斥堠士马储械无不谙记时承外戚干政之後纲纪大坏先天末宰相至十七人台省要职不可胜数崇常先有司罢冗职修制度择百官各当其材由是天子责成于下而权归于上天下以治

论曰姚崇救时相也舍人齐干言之矣即崇所自任亦无以过于此崇轶事尚多大抵好将顺用权术故畧其瑕而取其瑜然作相时陈十事于始率皆施行罢相时荐宋璟自代不负所托可谓得相体矣

宋璟

宋璟邢州南和人也举进士第爲监察御史武后高其才迁凤阁舍人居官鲠正张易之引张说证魏元忠不轨将廷辨璟谓说曰名义至重鬼神难欺不可党邪?正获罪流窜其荣多矣若有不测璟当叩阁力争与子偕死努力爲之万代瞻仰在此举也说感其言始以正对寻迁御史中丞会许州人杨元嗣告张昌宗名术士占相谋不轨后命平章事韦承庆司刑卿崔神庆与璟同鞠之神庆奏言昌宗语已奏闻法当首原璟独请穷治后曰易之等已自言于朕璟曰谋反无容以首原请下吏明国法后温言解之璟曰臣知言出祸随然激于义虽死不悔后不恠姚璩遽宣诏令出璟曰圣主在此不烦宰相擅宣勅命后不得已许收就狱俄诏原之勅二张诣璟谢璟拒不见顾左右叹曰悔不先碎竖子首使令复乱国经後宴朝堂二张皆位璟上易之素惮璟虚位揖曰公当今第一人胡下坐璟曰才劣位卑张卿以爲第一何也天官侍郎郑善果曰公奈何卿五郎璟曰以官言之正当爲卿君非张家奴何郎之有举坐悚惕时自武三思以下皆谨事易之兄弟璟独不爲礼二张积怒常欲中伤之诏按狱揚州璟奏此御史职耳复诏按幽州都督屈突仲翔辞曰中丞非大事不出仲翔罪止犯赃今使臣往此必有危臣者既而诏副李峤使陇蜀璟复言陇右无变臣以中丞副峤非故事易之等初冀璟出则劾奏诛之计既不行乃伺璟家婚礼遣客行刺璟乘庖车舍他所得免神龙中累迁黄门侍郎武三思怙宠数千请璟正色曰今复子明辟王宜以侯就第安得尚干朝政会韦月将告三思乱宫掖诏斩月将璟请付狱帝怒岸巾出侧门谓曰朕谓已诛矣尚何请璟曰人言中宫私三思陛下不问即诛之臣恐天下有窃议者帝愈怒璟曰必欲斩月将请先斩臣不然不敢奉诏乃流

月将岭南寻出璟贝州刺史历杭相二州爲政清毅羣下无敢犯者迁洛州长史睿宗立以吏部尚书同中书门下平章事厘革铨政旧弊流品以清太平公主谋倾东宫又尝乘輦邀宰相于光范门外讽以易置东宫衆皆失色璟抗言曰东宫有大功于天下眞宗庙社稷之主奈何忽有此议遂与姚崇密言于上曰宋王陛下之元子幽王高宗之长孙公主交构其间将使东宫不安请出宋王幽王皆爲刺史罢岐薛二王左右羽林太平公主武攸暨皆于东都安置上从其言且以太子监国既而中变贬楚州刺史历兖冀魏三州河北按察使进幽州都督以国子祭酒留守东都迁雍州长史开元初徙广州都督教民陶瓦以易茅茨筑堵列肆永无灾患四年召拜刑部尚书西京留守遣内侍杨思勗迎之璟在途不与思勗交一言勗自负贵幸诉于帝帝嗟叹良久益重璟寻迁吏部兼侍中璟爲相务在择人随材任使百官各称其职刑赏无私犯顔正谏帝甚敬惮虽不合意亦曲从之每进见便殿帝爲之起去则临轩送之与姚崇同敬礼他相莫如也突厥默啜世爲中国患郝灵佺得其首自谓不世之功璟以天子好武功恐後日宠利者爲国生事痛抑其赏五年帝将幸东都会太庙四室坏帝素服避殿以问璟及苏頌全对曰陛下三年之制未终遽尔行幸恐未?天心故灾异爲戒愿且停之姚崇以爲旧材腐坏适与行会帝遂行至东都以驰道隘黜河南尹及知顿使官璟曰陛下方事巡幸即以道不治罪二臣臣恐将来民受其弊帝遽命舍之璟曰陛下以怒责之以臣言免之是过归于上而恩在下也姑听待罪于朝然後诏还其职帝善之累封广平郡公尝命制皇子公主名号封进复命别择一美称及佳邑封上璟奏言七子均养风人所称今若同等别封或母宠子爱恐伤鳴鳩之义臣不敢奉诏帝益重之贞观旧制谏官史官随宰相奏事有失即匡美恶必记自许敬宗李义甫用事政多私僻奏事官多俟仗下屏左右密奏谏官史官不得预闻璟欲复贞观之政制自今事非的须秘密者皆令对仗奏闻史官仍依故事括州司马李邕仪州司马郑勉并有才畧文词璟以二人多是非好立异改变若全引进咎悔必生若弃之则才用可惜并迁远州刺史后父王仁皎卒将葬请用窆孝谿故事筑坟高五丈一尺帝许之璟请如着令已奏可明日复诏如孝谿璟还诏曰儻礼厚葬前世所戒韦庶人追王其父擅作鄆陵祸不旋踵岂可复蹈前轍臣所以再三进言者欲全朝廷之政成中宫之美耳帝悦曰朕每欲正身率下于后宁有私耶然人所难言公乃能之可其奏赐彩绢四百匹会日食素服避殿璟奏君子耻言浮于行愿动天以诚无事虚文臣闻日食修德月食修刑亲君子远小人絶女谒放谗夫所谓修德也圉圉不扰兵甲不渎官无苛治军不轻进所谓修刑也帝嘉纳王毛仲有宠百官附之毛仲嫁女帝问所须毛仲曰臣万事已备但未得客帝曰知汝所不能致者一人尔必宋璟也明日诏璟诣其第日中璟乃至饮不尽卮遽称腹痛归其刚直之操老而弥笃如此璟爲相每事必争上以王仁琛藩邸故吏墨勅与五品官璟曰仁琛向缘旧恩已获优改父是后族须杜輿言乞下吏部检勘苟无过犯请依资稍优注拟从之宁王宪奏选人薛嗣先请授微官璟奏嗣先以懿亲之故固应微假官资然自太阳当御斜封墨勅一皆杜絶望付吏部知由正敕从之先是朝集使往往齎货入京师将还多迁官璟奏一切勒还以革其弊璟又疾负罪而妄诉不已者悉付御史台治之人多怨之者会天旱优人作魃状戏于帝前问魃何爲出对曰奉相公处分又问何故对曰负冤者三百余人相公悉以系狱故不得不出耳帝心以为然时江淮间恶钱尤甚璟使监察御史萧隐之按之隐之严急烦扰于是贬隐之官遂并罢璟爲左丞相与苏頌同罢时开元八年也是时左右丞相者左右仆射也罢政事者居之二十一年致仕归东都越五年卒年七十有五赠太尉谥文贞後张嘉贞爲相閱堂案见其危言切议未尝不失声叹息当时以姚崇善应变成务璟善守法持正二人志操不同然协心辅政使赋役寛平

刑法清省百姓富庶以故唐世贤相前称房杜後称姚宋他人莫得比焉

论曰宋璟刚方正直房杜且当谢不敏况姚崇乎遭遇明皇匡君正国用致开元之治独怪其当武韦二后时昏虐薰灼而介石之贞始终不挠履尾而不爲所啗岂天于端人正士别有保佑而安全之耶抑有义有命工于趋避者果无益耶读宋璟传可以顽廉懦立矣

韩休

韩休京兆长安人也少工文词始应制举授桃林丞复条对国政中乙科擢左补阙判主爵员外郎累迁至礼部侍郎知制诰出爲虢州刺史虢于东西京爲近州乘輿经行刍牧旁午休请均赋他郡宰相张说不可休固请吏白恐忤相意休曰刺史幸知民之敝而不救岂爲政哉虽得罪所甘心焉卒如所请以母丧去服除爲工部侍郎知制诰迁尚书右丞开元二十一年帝使萧嵩择相嵩称休志行遂拜黄门侍郎同平章事休性方直不务进趋既爲相天下翕然宜之万年尉李美玉有罪帝将放之岭南休曰尉小官犯非大恶今金吾大将军程伯献恃恩而贪宅室舆马僭法度臣请先伯献而後美玉帝不许休固争曰罪细且不容而巨猾乃置弗问陛下不出伯献臣不敢奉诏帝不能夺初嵩以休恬和易制故荐之及与共事守正不阿时或折正嵩嵩不能平又凡时政得失言之未尝不尽宋璟叹曰不意休乃能尔仁者之勇也帝尝猎苑中或大张乐稍过甚必视左右曰韩休知否言未已谏疏已至帝时引监默然不乐左右曰韩休爲相陛下殊瘦于旧戚戚无一日懽何不逐之帝曰吾虽瘦天下肥矣萧嵩每启事顺旨我退而思天下寝不安韩休敷陈治道多讫直我退而思天下寝必安吾用韩休爲社稷计也加银青光禄大夫是冬十月罢爲工部尚书迁太子少师封宜阳县子卒年六十八谥文忠

论曰韩休刚直亚于宋璟然当是时明皇已倦勤矣盖自开元初年以至八年姚宋相继爲相朝廷清明百职修理比隆贞观者以此及十三年封泰山十四年大有年明皇之志已盈故宇文融以利臣柄用宋璟以罢政事虚拥右丞相之名然当时作相者张说张嘉贞诸人品虽未纯才堪理国裴光庭萧嵩等才本庸流心非奸匪犹平而未陂之时也及开元末年称贤相者不过休与张九龄耳李林甫牛仙客杨慎矜等渐见进用女谒内萌谗人交张开元之业衰矣惜哉韩休三月相之十月罢之虽欲施爲庸可得乎

张九龄

张九龄字子寿粤之曲江人也七岁知属文十三以书干刺史王方庆方庆曰是必致远张说谪岭南一见厚遇之与通谱系成进士调校书郎以道侔伊吕科策高第爲左拾遗明皇即位未郊九龄言陛下绍休圣绪于今五年而未行大报怠于事天不可又言元元之衆悬命于县令宅生于刺史欲治之本莫若重守令宜科定其资凡不历都督刺史虽有高第不得任侍郎列卿不历县令虽有善政不得任台郎给舍又古之选士惟取称职今不正其本而设巧于末吏部条章举羸千百求精于案牒而忽于人才是所谓遗剑中流刻舟以记者也时张说爲宰相亲重之尝曰後出词人之冠也迁中书舍人内供奉封曲江男会帝封泰山说多引两省录事主书及所亲掇官升山超阶至五品九龄当草诏谓说曰官爵者天下公器先德望後劳旧

今登封告成而清流隔于殊恩胥吏乃滥章?恐四方失望方进草尚可以改说不从己而果得谤九龄亦改太常少卿出爲冀州刺史以母老表换洪州都督徙桂州兼岭南按察使帝思张说常荐其才可备顾问召爲秘书少监集贤院学士迁工部侍郎知制诰数乞终养不许以其弟九臯九章爲岭南刺史岁时聽给驿省家迁中书侍郎以母丧解是岁夺哀拜平章事固辞不许明年迁中书令帝欲相李林甫九龄曰宰相系国安危陛下相林甫臣恐他日爲社稷忧不听范阳节度使张守珪以斩可突单于功欲用爲侍中九龄曰宰相代天理物不可以爲赏功之具帝曰假其名若何对曰名器不可假也守珪才破契丹即以爲相若尽灭东北二寇陛下何以加之帝乃止既又欲以凉州都督牛仙客爲尚书九龄曰不可尚书古之纳言唐兴以来惟旧相及敷历中外有德望者乃爲之仙客本河湟使典使班常伯天下其谓何帝曰然则加实封对曰封爵所以劝有功也边将积谷繕械乃常职耳赏以金帛爲可裂地则非所宜帝默然林甫曰仙客宰相才也何有于尚书九龄书生不達大体帝悦明日复以实封爲言九龄固执如初帝怒曰卿以仙客寒微耶卿固素有门阀哉九龄曰臣荒陬孤生陛下过聽以文学用臣出入台阁典司诰命有年矣仙客目不知书若大任之恐不愜衆望林甫退而言曰苟有才识何必辞学帝由是决用仙客九龄戾旨遂惧爲林甫所中因赐白羽扇献赋自况其末云苟効用之得所虽杀身其何怨又曰纵秋气之移夺终感恩于篋中帝虽优答然寢疎之时帝在位久渐肆奢欲怠于政事九龄遇事无大小皆力争所推引皆正人遂以尚书右丞相罢政事而用仙客又以尝荐周子諒爲御史而子諒弹仙客非宰相才帝杖而流之林甫奏九龄举非其人贬荊州长史久之封始兴县伯请归展墓卒年六十八諡文献九龄体微弱而有醞藉风度凝然後帝每用人必问曰风度能如张九龄不先是帝千秋节王公并献宝监九龄独述前世兴废之源爲书五卷号千秋金监录以伸讽谕武惠妃谋?太子瑛使人伺其过失以间帝大怒欲并废鄂王瑶光王琚九龄曰陛下享国长久子孙蕃昌天下之人方以爲庆今三子皆已成人不闻大过奈何一旦以无根之语废之乎且太子天下本不可轻揺陛下必欲爲此臣不敢奉诏是时林甫交构其间妃遣宦奴告九龄曰有废必有兴公爲援宰相可常处也九龄叱曰房幄安得有外言遽奏之帝爲动色故终九龄之相太子无患安禄山以范阳偏校入奏事气骄蹇九龄谓裴光庭曰乱幽州者此胡雏也後败于奚契丹张守珪执送京师九龄署其状曰穰苴出师必诛庄贾孙武习战犹戮宫嫔守珪法行于军禄山不宜免死帝不许赦之九龄固争曰?山狼子野心且有逆相宜诛之以絶後患帝曰卿勿以王夷甫识石勒枉害忠良竟不聽帝後在蜀思其忠爲泣下因遣使祭韶州厚恤其家开元後天下称曲江公而不名云

论曰九龄忠贞鯁直亦宋璟之流亚也知林甫他日爲庙社之忧料?山必乱烛照数计天宝间事已了然矣使明皇能用其言安有踉蹌蜀道之困哉名爲宰相而未尝一日信任唐自求覆九龄其将奈之何

张巡 许远

张巡邓州南阳人也开元末登进士第历眞源令?山反譙守杨万石逼巡爲长史使西迎贼巡率吏民哭于玄元皇帝庙起兵讨贼至雍丘其令狐潮已从逆缚吏民百余将杀之潮出行部囚相与解缚杀守者而迎巡入城以拒潮巡屠潮妻子磔城上潮大怒以衆四万薄城巡谓诸将曰贼兵锐有轻我心今出不意击之必惊溃乃分千人乘城而自驱数队出直冲贼阵人

马辟易贼退明日复进设百楼攻城巡束刍灌膏焚之贼不得上积六十余日大小三百战潮乃败走潮素与巡有旧至城下自说巡巡曰君平生以忠义自许今日之举忠义何在潮惭而退围守复四十日朝廷声闻不通大将六人白巡以兵势不敌且上存亡未可知不如降巡阳许诺明日堂上设天子画像率军士朝皆感泣引六将至责以大义斩之会粮乏潮饷贼盐米数百艘且至巡夜壁城南潮悉军来拒巡遣勇士衔枚渡河取盐米千斛焚其余而还城中矢尽巡缚藁为人披黑衣夜缒城下潮兵争射之得矢数十万其後复夜缒人贼笑不设备乃以死士五百斫潮营潮军大乱焚垒幕追奔十余里贼惭益兵来围巡使雷万春立城上与潮语贼射之面中六矢而不动潮疑木人谍得其实乃大惊遥谓巡曰向见雷将军知足下军令矣然其如天道何巡曰君未识人伦焉知天道未几薪水竭给潮退二舍欲引军走许之空城四出三十里撤屋发木还爲备潮怒围复合巡又曰归我马三十匹我且出奔君取城矣潮归马巡悉给骁将约曰贼至人取一将明日潮来三十骑突出禽将十四斩首百余收其牛马器械潮遁还陈留不复出于是河南节度使虢王巨屯彭城假巡先锋俄而鲁东平济陰于贼巨引兵走临淮贼将杨朝宗谋趋宁陵絶巡饷道巡乃拔衆保宁陵始与睢阳太守许远相见是日朝宗来寇遣雷万春南霁云等与战宁陵北大破之斩将二十杀贼万余朝宗遁去诏拜巡河南节度副使至德二载禄山死庆绪遣尹子奇将突厥兵十三万攻睢阳许远告急巡引兵入睢阳助之励士固守日中二十战气不衰远自以才不及巡请专治军粮战具居巡下巡受不辞昼夜苦战十六日禽贼将六十余人杀卒二万子奇大败遁去诏拜巡御史中丞远侍御史已而子奇复围城巡椎牛飧士悉军拒战贼望见兵少大笑巡率诸将冲贼阵贼大溃逐北数十里会方刈麦巡夜济师鸣鼓严队若将出战贼申警不得休息俄息鼓贼弛备巡与霁云万春等各将五十骑开门突出径抵子奇所斩将拔旗杀贼五千余人有大酋引千骑乘城招巡巡陰缒勇士数十人伏隍中城上鼓噪禽之复缒登陴贼皆愕眙巡欲射子奇而不识剡蒿爲矢中者谓巡矢尽走白子奇巡乃使霁云射之中其左目子奇走还七月复围睢阳城中食尽士日给米一勺杂树皮茶纸爲食皆饥病不能穀贼以云梯傅堞巡出鉤干挂之不得进又以钩车木马攻城巡辄破碎之贼服其机不复攻惟穿壕立栅以守时贺兰进明屯临淮巡使霁云求救兵引三十骑冒围出贼万衆遮之霁云左右射皆披靡既见进明进明不肯出师爱霁云欲留之爲具食霁云泣曰睢阳之人不食月余矣霁云虽欲独食且不下咽大夫坐拥强兵无分灾救急之意岂忠臣义士所爲乎霁云既不能達主将之命请留一指示信以归报中丞因拔佩刀断指一坐皆惊爲出涕卒不食去抽矢回射浮图曰吾破贼还必灭贺兰此矢所以志也次宁陵得廉坦兵三千且战且行至城下大战坏贼营死伤之外仅得千人驱贼牛数百入城将士相持而泣贼知无援围益急衆议东奔巡远谋曰睢阳江淮保障也若弃之贼乘胜而南江淮必亡且师饥衆行必不達不如死守茶纸既尽乃食马马尽罗雀掘鼠或煮铠弩以食雀鼠又尽食老弱妇女巡出爱妾曰诸军经年乏食而忠义不衰吾恨不能割肌啖汝宁惜一妾遂杀以飧士远亦杀奴僮哺卒人知必死莫有叛者所余才四百人十月癸丑贼登城莫能战巡西向拜曰臣力竭矣生不能报陛下死当爲厉鬼以杀贼城遂与远俱执衆见之大哭巡曰安之勿怖死乃命也子奇问曰闻公每战大呼辄皆裂齿碎何也曰吾志吞逆贼恨力不能耳子奇以刀抉视之巡大骂附贼犬彘不絶口子奇又胁霁云降巡呼曰南八男儿死尔不可爲不义屈霁云笑曰欲将有爲也公知我者敢不死遂与姚訔雷万春等三十六人俱遇害生致许远于洛阳至偃师亦不屈死巡远俱年四十九巡长七尺美须髯读书不过三复爲文章不立稿所在士卒居人一见问姓名後无不识历大小四百余战斩将三百杀贼卒十二万

人用兵不依古法令诸将教战各以其意或问之答曰贼将务驰突云合鸟散变态百出不可以古法拘吾止使兵识将意将识士情上下相习人自爲战耳其甲械皆取之于敌未尝自修推诚待人无所疑贰临危应变出奇无穷号令明赏罚信与衆共甘苦寒暑虽厮养必整衣见之故其下争致死力能以少击衆未尝败肃宗诏张镐率四节度救睢阳巡亡三日而镐至十日而广平王收东京时谓巡蔽障江淮沮贼势天下不亡乃其功也诏赠巡远等死事诸人并录其子孙立庙睢阳岁时致祭赐睢阳雍丘徭税

许远者敬宗曾孙爲人寬厚长者明于吏治?山反或荐于朝召拜睢阳太守远与巡同年生而巡长故呼巡爲兄大历中巡子去疾上书以远畏死误国家事请追夺官爵诏下百官议皆以远守睢阳子奇屠城以生致主将爲功其後巡死不足惑当时去疾尚幼事未详知且艰难以来忠烈未有先二人者事载简书若日星不可妄议乃止元和时韩愈读李翰所爲巡传以爲闕远事非是且力明远之不畏死愈于褒贬尤愼非无据也论曰张巡忠义贯星日薄云霄且其才亦不世出使假以尺寸之柄驰驱中原收复两京岂出子仪下远才稍不逮巡然推贤让能同心共济至死不少回屈可谓志士仁人相得益彰矣嗟彼孤城饿卒经数百战而未尝一败卒障江淮以保东南半壁韩愈谓天下不亡二公之力岂过论哉

顏杲卿 眞卿

顏杲卿字昕师古五世从孙也以文儒世家父元孙有名垂拱间终濠州刺史杲卿以?调遂州参军开元中迁范阳户曹?山闻其名表爲常山太守及反至藁城杲卿力不能拒偕长史袁履谦迎之禄山予二人金紫质其子弟使守常山又使假子李钦凑以兵七千屯土门杲卿指其衣谓履谦曰何爲着此履谦悟因共谋举兵讨贼适真卿在平原斩段子光遣甥卢逖至常山约起兵断贼北道杲卿大喜即矫禄山命召钦凑计事醉而斩之贼将高邈何千年适至皆禽械并钦凑首送京师传檄河北言王师二十万入土城遣郭仲邕领百骑爲先锋驰而南曳柴扬尘望者谓大军至贼张献诚方围饶阳弃甲走于是河北十七郡皆斩僞刺史传首常山?山惧使史思明蔡希德昼夜攻常山杲卿起兵才八日守备未完告急王承业拥兵不救六日而?与履谦同被执胁使降不应加刃少子季明颈上曰降活而子亦不应遂并卢逖杀之致杲卿洛阳数之曰吾擢尔太守何所负而反杲卿瞋目骂曰汝本营州牧羊奴天子擢汝爲三道节度使恩幸无比何负于汝而反乎我世爲唐臣守忠义恨不斩汝万段岂从汝反耶?山大怒缚之天津桥柱节解以肉噉之骂不絶口贼鈎断其舌曰复能骂否乃含糊而絶年六十五履谦被断手足贼党在旁咀血喷其面贼裔之杲卿宗子近属皆遇害顏氏死者三十余人杨国忠用张通幽之譖不加褒赠眞卿表其枉乃杖杀通幽赠杲卿太子太保諡忠节眞卿字清臣与杲卿同五世祖少?母殷氏躬加训导既长博学工词章事亲孝开元中登进士又擢制科再迁监察御史使河陇时五原有冤狱天久旱眞卿辩狱而雨郡人呼御史雨焉复使河东劾奏朔方令郑延祚母死不葬三十年有诏终身不齿迁殿中侍御史以不附杨国忠出为平原太守度安?山必反阳托霖雨增陴濬隍简丁壮储仓廩日与宾客泛舟饮酒以纾禄山之疑果以其书生不虞也?山反河朔尽?独平原城守具备又使参军李平驰奏帝方叹河北二十四郡无一忠臣及平至大喜谓左右曰朕不识眞卿何如人乃能若此时平原有静塞兵三千乃益募士得万人以録事参军李择交统之以刁万岁等五人分总部伍大飨士城西门谕以举兵讨

贼慷慨泣下咸感励由是饶阳太守卢全诚济南太守李随清河长史王怀忠景城司马李暉邳郡太守王焘各以衆归军声大振贼破东都遣段子光传李愬卢奕蒋清首徇河北真卿斩子光给诸将曰吾素识三人其首皆非是藏三首结刍续体敛而祭私爲位以哭是时顔杲卿爲常山太守斩贼将李钦凑等十七郡自归推真卿爲盟主兵二十万絶燕赵诏拜真卿户部侍郎加河北招讨采访使攻魏郡拔之肃宗即位灵武拜工部尚书仍领使禄山遣史思明等攻河北诸郡复?真卿谋于衆曰贼锐甚委身辱国非计也不如赴行在至德元载弃郡渡河至凤翔授御史大夫时朝廷虽草昧而真卿绳治如平日劾侍郎崔漪谏议大夫李何忌都虞候管崇嗣等百官肃然两京复帝遣左司郎中李选告宗庙祝署嗣皇帝真卿谓礼仪使崔器曰上皇在蜀可乎器遽奏改之帝以爲達识又建言春秋新宫灾鲁成公三日哭今太庙爲贼毁请筑坛于野皇帝东向哭然後遣使不从宰相厌其多言出爲冯翊太守转蒲州刺史爲御史唐旻诬劾贬饶州乾元一年拜浙西节度使度刘展必反预?战备李峘以爲生事毁之召爲刑部侍郎展卒举兵渡淮峘奔江右李辅国迁上皇西内真卿率百官问起居辅国恶之贬蓬州刺史代宗立累迁尚书右丞帝自陕还真卿请先谒陵庙而即宫宰相元载以爲迂真卿怒曰用舍在公言者何罪然朝廷事岂堪公再破坏耶载衔之俄拜刑部尚书知省事封鲁郡公元载专权畏羣臣论奏请自今百官论事皆先白宰相真卿上疏曰诸司长官者達官也皆得专達于天子郎官御史陛下腹心耳目之臣也故天下事无大小得失皆俾访察以闻此古明目達聰也今陛下欲自屏耳目使不聰明则天下何望焉太宗着司门式云其无门籍有急奏者皆令门司与仗家引奏无得关碍所以防壅蔽也李林甫爲相羣臣不先咨宰相奏事者托以他故中伤之陵夷至于今日其所从来者渐矣夫君子难进易退朝廷开不讳之路羣臣犹恐不言况怀厌怠令宰相宣进止不得直进从此人不奏事陛下闻见止于数人天下之士钳口结舌陛下便谓无事可论岂知惧不敢进则林甫国忠复起矣臣谓今日之事旷古未有虽林甫国忠犹不敢公然爲之陛下倘不蚤悟渐成孤立後虽悔之亦无及矣载以爲诽谤贬峡州别驾载诛杨綰荐之擢刑部尚书进吏部帝崩爲礼仪使时丧乱後典法湮废真卿博识今古屡建议厘正爲权臣沮抑德宗立杨炎当国又以直不容改太子少师犹领使及卢杞爲相益不喜改太子太师罢使数遣人问以方鎮所便欲出之真卿见杞辞曰先中丞传首平原面流血吾不敢以衣拭亲舌舐之公忍不见容乎?矍然下拜而衔恨切骨李希烈?汝州?建议遣真卿往谕李勉以爲失元老貽朝廷羞不聽至河南河南尹郑叔则劝勿往真卿曰君命也不可避与其子书但誠以奉家庙抚诸孤而已既至宣诏旨希烈养子千余环绕嫚骂拔刀拟之真卿色不变希烈以身扞麾衆退乃就馆逼上疏雪罪罢兵真卿不从希烈遣李元平说之真卿叱曰汝受国委任不能致命顾吾无兵戮汝尚说我耶希烈大会使倡优斥侮朝廷真卿怒曰公人臣奈何如是拂衣起希烈大惭时朱滔王武俊田悦李纳皆称王各遣使诣希烈劝进希烈召真卿示之曰四王见推不谋而同岂吾独爲朝廷所忌无所自容耶真卿曰此乃四凶何谓四王相公不自保功业爲唐名臣乃与乱臣贼子相从求与之同覆灭耶希烈不悦他日又与四使同宴四使谓希烈曰闻太师名德久矣公欲建大号求宰相无如太师者真卿叱曰汝知有骂安?山而死者顔杲卿乎吾兄也虽被执诟贼不絶口吾今年且八十官太师吾守吾节死而後已岂受鼠辈胁耶羣贼失色乃以兵拘守掘坎于庭示不屈且阬真卿怡然会其党周曾康秀林等谋袭希烈奉真卿爲帅事泄乃拘真卿蔡州度必死预作遗表墓志祭文希烈僭号问仪式答曰老夫耄矣所记诸侯朝覲礼耳贼积薪于庭示不屈且焚真卿起赴火贼遽止之已而李晟复长安希烈弟希倩坐朱泚党诛希烈怒遣中使至蔡州杀真卿中使曰有敕真

卿再拜中使曰今赐卿死真卿曰老臣无状罪当死不知使者几时发长安使者曰自大梁来真卿曰然则贼尔何谓敕耶遂缢杀之年七十六真卿立朝正色刚而有礼非公言正道不萌于心天下不以姓名称而独曰鲁公善正草书笔法遒劲爲世所宝

论曰杲卿真卿各以一郡起兵讨贼事虽无成大义凛千载矣义声一动河北响应以二公之才乌合二十万而常山未及旬日平原亦终不支胡氏史论谓明皇保奸弃贤天固不使得忠义之报信夫杲卿骂贼百世下如闻其声真卿立朝忠贞劲直侃侃乎社稷之佐临难则抗节贼庭至死不屈二人爲唐室增光岂小哉

史传三编卷二十三

卷二十四

钦定四库全书

史传三编卷二十四

大学士朱轼撰

名臣传十六

唐

郭子仪

郭子仪华州郑人也以武举异等累迁朔方节度使讨安禄山先是安思顺为朔方子仪与李光弼俱牙将不相能及代思顺光弼入见曰死固甘乞免妻子子仪趋下堂抱而泣曰今国乱主危岂怀私忿时耶执手相持而拜因率军东讨收静边军斩贼将周万顷败高秀岩于河曲遂收云中马邑引兵下井陘与光弼合破史思明衆数万平藁城破赵郡又破之于沙河禄山益出精兵战战未决戮一将以徇复大破之昼扬兵夜捣垒贼不得休息复乘其倦与光弼仆固怀恩等击之嘉山斩获六万思明奔博陵于是河北诸郡皆斩贼守迎王师会哥舒翰败绩潼关帝出奔蜀肃宗即位灵武诏子仪班师乃帅步骑五万赴行在时朝廷草昧衆单寡军容阙然子仪至国威始振人有兴复之望焉拜子仪兵部尚书同平章事仍总节度贼将阿史那从礼诱河曲九姓六州诸部数万迫行在子仪与回纥葛逻支擊敗之河曲遂平至德二年大破崔乾佑于潼关乾佑退保蒲津又攻蒲津平之自是潼关之间无复寇扰安禄山死诏还凤翔进司空充关内河东副元帅率师趋长安与贼将安太清安守忠战失利收合余衆保武功俄从元帅广平王率蕃汉兵十五万收复长安与贼将李归仁大战自午至酉斩首六万级生禽二万贼帅张通儒弃城走翼日王入京师老幼夹道呼曰不图今日复见官军王休士三日遂东安庆绪遣严庄悉衆十万助通儒旌帜钲鼓径百余里子仪以军横贯其营李嗣业率回纥从後夹撃大败之庄等走洛阳挟庆绪渡河保相州遂收东都于是河东河西河南州县悉平帝入长安遣使迎上皇子仪以功加司徒封代国公入朝帝遣具军容迎灞上劳曰国家再造卿之力也乾元元年破贼河上执安守忠以献复朝京师进中书令诏九节度大举讨庆绪以鱼朝恩为观军容使而不立元帅子仪收复卫州执贼安庆和斩首四万进围相州引漳水以灌城城中粮尽人相食庆绪求救于思明思明至会大风拔木跬步不相物色诸节度溃还子仪独全军保河阳时王师衆而无统进退相顾望故败为鱼朝恩所譖召子仪还以光弼代领朔方兵思明再?河洛西蕃扰畿辅朝廷旰食复以子仪为诸道兵马都统以兵趋范阳朝恩又沮解之明年光弼败邙山失河阳又明年河中乱杀李国贞太原乱?邓景山乃复以子仪为朔方河中北庭潞仪泽沁等州节度兼兴平定国副元帅封汾阳郡王屯绛州时帝已不豫羣臣莫得见子仪固请乃引至卧内谓曰河东事一以委卿子仪至屯诛首恶王元振等数十人

辛云景闻之亦杀害景山者诸镇皆惕息代宗立程元振用事罢子仪副元帅子仪惧谗哀肃宗所赐诏勅千余篇上之复自陈诉帝优诏答初帝与子仪平两京同天下忧患至是悔悟眷礼弥重史朝义尚盗洛欲使副雍王东讨朝恩元振交訾而止久之梁崇义据襄州叛回纥吐蕃寇河西残泾州犯奉天武功遽拜子仪为关内副元帅镇咸阳时罢归已久部曲离散逮承诏麾下才数十骑驱民马补行队至咸阳蕃兵已过渭水并南山而东帝走幸陕子仪南收兵得武关防卒数千泣谕将士共雪国耻皆感激思奋帝恐吐蕃出潼关徵子仪诣行在子仪表曰臣不收京城无以见陛下若兵出蓝田敌亦不敢东向帝许之会张知节迎子仪于洛南乃遣知节率乌崇福长孙全绪为前锋营韩公堆擊鼓譟山张旗帜夜丛万炬以疑贼于是吐蕃夜溃遂遣李忠义屯苑中王仲昇守朝堂斩射生将王抚以徇破贼书闻命子仪为京城留守自变生仓卒天子出走天下皆咎元振元振惧说帝都洛阳已可其计子仪奏请还都曰雍州古称天府右陇蜀左崤函负清渭浊河之固地方数千里?汉所以成帝业也故高祖入关定天下先帝兴朔方诛庆绪陛下席西土戮朝义虽天道助顺亦地势则然比吐蕃凭陵而不能抗者臣能言其畧夫六军皆市井人窜虚名逃实赋一日驱以就战有百奔而无一前又宦寺掩迷庶政荒夺遂令陛下彷徨暴露越在陕服斯委任失人岂地之非良哉今道路流言不识信否咸谓且都洛阳洛阳自大盗以来焚埃畧尽褰服不满千户千里萧条何以奉万乘牲饩供百官次舍哉陛下意者以京畿新罹剽蹂国用不足乎昔卫为狄灭文公庐于漕衣大布之衣冠大帛之冠卒复旧邦况赫赫天子躬俭节用宁为一诸侯下哉臣愿陛下斥素餐去冗食抑阉寺任直臣薄征弛役恤隐抚鰥委宰相以简贤任能付臣以训兵御侮则中兴之功日月可冀帝得奏泣谓左右曰子仪固社稷臣也朕西决矣乃还长安既见子仪谓用卿晚故至此因赐铁券图形凌烟阁广德二年仆固怀恩反诏子仪为副元帅河中节度等使怀恩将士闻之皆曰吾辈从怀恩为不义何面目见汾阳王子仪至河中怀恩走云州复诱吐蕃回纥数十万衆入寇朝廷震恐诏子仪屯奉天召问方畧子仪曰怀恩勇而少恩士心不附所以能入寇者因思归之士耳怀恩本臣偏裨其麾下皆臣部曲必不忍以锋刃相向无能为也至奉天诸将请战子仪曰客兵深入利于速战彼下素德我吾缓之当自携贰因下令敢言战者斩坚壁数日果不战而遁子仪以安史昔据洛阳故置节度使以制其要冲今大盗已平而所在聚兵耗蠹百姓表请罢之仍自河中为始从之遂罢河中节度及耀德军入朝进尚书令以太宗尝为此官固辞不受永泰元年怀恩尽诱吐蕃回纥党项羌浑奴刺等三十万衆掠泾邠躡凤翔入醴泉奉天京师大震急召子仪屯泾阳军才万人比到敌围已合子仪命诸将严设守备而不战时怀恩暴疾死回纥吐蕃争长不相睦子仪使李光瓚说回纥共击吐蕃回纥曰令公在此乎给我耳若在此可得见乎光瓚报子仪子仪遂挺身往说之与数骑开门出传呼曰令公来回纥大惊其帅药葛罗执弓注矢立阵前子仪免胄释甲投枪而进诸酋长相顾曰是也皆下马罗拜子仪亦下马执药葛罗手让之曰汝回纥有大功于唐唐之报汝亦不薄奈何负约深入吾地背恩德而助叛臣且怀恩叛君弃母于汝何有今吾挺身而来听汝杀之我之将士必致死与汝战矣药葛罗曰怀恩欺我言天可汗晏驾令公亦捐館我是以来今皆不然怀恩又为天所杀我曹岂肯与令公战乎子仪因曰吐蕃无道所掠之财不可胜载马牛杂畜长数百里此天赐汝也全师而继好破敌以取富为汝计甚便药葛罗曰吾为怀恩所悞负公诚深请为公尽力以谢过子仪命取酒与其酋长共饮申盟誓诸酋皆大喜曰向者巫师言此行甚安稳不与唐战见一大人而还今果然矣吐蕃知其谋夜遁遣白元光合回纥衆追之俘斩六万尽还所掠士女入朝加实封二百户复还河中大历二年吐蕃寇泾州诏屯泾阳败之于灵州

明年还河中吐蕃复寇灵武诏屯奉天又击败之议者以吐蕃数为寇马璘在邠不能支乃以子仪兼邠宁节度使屯邠州德宗嗣位诏还朝赐号尚父加太尉中书令实封二千户建中二年卒年八十五赠太师陪葬建陵谥忠武配享代宗庙廷子仪事上诚御下恕赏罚必信每降城下邑所至辄得人士心遭幸臣鱼朝恩程元振短毁无纤毫顾望握兵处外闻诏命即日就道故谗间不行方破吐蕃灵州时朝恩使人发其父墓子仪入朝中外大惧帝唁之子仪叩头号泣曰臣久主兵不能禁士卒残人墓今及此乃天谴也朝恩又尝约子仪修具元载使人告曰军容将不利于公将士请衷甲从子仪不许但以家僮十数人往朝恩曰何车骑之寡也语以所闻且曰恐烦公经营耳朝恩拊膺流涕曰非公长者能无疑乎田承嗣傲狠不轨子仪遣使至承嗣西望再拜谓使者曰此膝不屈于人久矣李灵耀据汴州公私财赋一皆遏绝独子仪封币道其境不敢留即持兵卫送麾下李怀光浑瑊等宿将数十皆王侯贵重子仪颐指进退如家人然代宗呼为大臣而不名天下以其身为安危者二十余年校中书令考二十四八子七壻皆贵显朝廷诸孙不能尽识至问安但颌之而已富贵寿考终始哀荣人臣之道无阙焉子曜旰晷咄咄晤暖曙映而四以才显

论曰子仪一生惟忠与诚而已功盖唐室而主不疑权倾天下而众不嫉忠诚之所感也在易中孚可化豚鱼孔子曰言忠信行笃敬虽蛮貊行矣于回纥鱼朝恩等见之

李光弼

李光弼营州柳城人也父楷洛本契丹酋长开元初封蓟国公光弼幼持节行读书执礼父忧终丧不入妻室禄山之乱子仪荐其能诏摄御史大夫河东节度副使领朔方兵救常山次真定常山民兵执安思义降光弼不杀时颜杲卿死後郡为战区露髻蔽野光弼酹而哭之出为贼幽闭者恤其家民心大悦贼将史思明李立节蔡希德等攻饶阳光弼用思义计按军入守复提轻兵敛旗鼓伺贼方饭袭杀之且尽思明惧引去因东出井陘与子仪合击思明大败走赵郡立节战死希德走钜鹿遂收藁城等十余县进攻赵郡拔之又与子仪击之嘉山大破之肃宗即位诏以兵赴灵武授户部尚书同平章事兼太原尹北京留守监军御史崔众以前使王承业军政弛谬每狎侮之至是诏以兵付光弼众慢易如旧不即付兵光弼收众将斩之会使者至除众御史中丞光弼曰众有罪当斩今但斩侍御史若宣制命即斩中丞使者纳诏不敢出遂斩众以徇威震三军至德二载思明等引兵十万攻太原时城中卒不满万众议培城光弼曰城环四十里贼至兴役是先自困也乃撤屋为橰石车飞礮击贼死伤十二复穿地道迎之思明梯冲出近城辄陷贼宴城下令倡优詈侮光弼遣人从地道中曳其足入斩之自是贼行皆视地徙营稍远光弼伪约降而穿贼营地为沟楮以木至期勒军城上遣将将数千人出若送款者俄而贼营忽陷因鼓噪骑乘之俘斩万计思明引还留希德围守又击败之斩首七万亦遁去又收清夷横野等军擒李弘义以归晋司空封郑国公乾元元年代子仪为朔方节度副元帅兵马使张用济憚其严有异议光弼俟其入谒斩之辕门诸将慑伏次汴州闻许叔冀降思明乘胜西向乃如东京留守韦陟请退保潼关光弼曰委五百里而守关贼势益张不如移军河阳北阻泽潞胜则出败则守表里相应贼不得西遂檄河南尹率吏民避贼而自悉军趋河阳众二万才十日粮与士卒均甘苦贼入洛阳城空无所得遂引兵河阳使骁将刘龙仙嫚骂挑战光弼遣白孝德以骑五十驰之孝德拥二矛策马乱流而渡瞋目大呼斩龙仙

首以还思明有良马千余匹浴于河南光弼索军中牡马五百繫其驹而出之思明马悉浮渡河尽驱入域思明怒泛火船欲烧浮桥光弼先置长竿承以巨木裹铁叉竿上以迎船遇叉不能进须臾自焚尽光弼与战中潭西大破之南城守将李抱玉出奇兵败贼帅周挚挚复攻中潭光弼使荔非元礼击败之挚并兵与安太清攻北城光弼登陴望曰彼军虽锐而器不足虞也日中当破及期未决问贼阵何所最坚曰西北隅命郝廷玉当之问其次曰东南隅命论惟贞当之自以刀纳鞬中有决死之志执大旗令望吾三麾至地诸军毕入生死以之既而廷玉军不前趣左右取其首来廷玉曰马中矢非怯也命易马仆固怀恩小却又命取其首怀恩更前决战光弼连颺其旗三军齐奋斩俘人马数万思明大败遁去擒徐璜玉李秦授等太清走怀州上元元年加太尉中书令进围怀州思明来救迎战沁水上又破之光弼壁野水渡既夕?还军留牙将雍希顓守营令曰贼将高晖李日越万人敌也必来劫我若至勿与战降则与偕来左右皆窃?之是夜日越果以铁骑五百至知太尉已去谓其下曰我受命云何今顾获希顓归必死矣遂降希顓与俱至光弼厚礼之表授特进右金吾大将军晖闻之亦降皆如所料诸军决丹水灌怀州未下令廷玉由地道入得其军号登陴大呼王师乘城擒安太清杨希仲送京师已而思明用谍间鱼朝恩谗之帝使使者督战光弼不得行已意出次邙山怀恩不用命遂大败怀州复?朝义乘胜畧申光等十三州光弼复輿疾入徐州朝义围李岑于宋州光弼使田神功击走之实应元年封临淮郡王朝恩元振用事深忌光弼而元振疾之尤甚光弼惧不免及同平章事来瑱以谗死光弼愈惧不知所措吐蕃寇京师代宗诏入援亦畏祸迁延不敢行由是诸将陰怀去就多不禀命恚忿成疾未几卒年五十七谥武穆光弼治军严重指顾号令诸将莫敢仰视谋定而後战能以少制衆与郭子仪齐名事继母孝与弟友爱时人称之

论曰光弼贤将也其用兵峻厉严肃料敌如神唐室中兴厥功为钜独异其起戎行而能持节行读书执礼以孝友着闻斯岂寻常将帅所可同年语欤使时无朝恩元振不以忧谗惧祸来晚节全镜之埃则汾阳何以过焉

杨绾

杨绾字公权华陰人少孤家贫事母谨甚性沉静独处一室左右图史凝尘满席淡如也第进士补太子正字举词藻宏丽科擢右拾遗肃宗即位累迁中书舍人历礼部侍郎建议复古德行乡举里选孝廉力田等科罢明经进士其意谓古之选士必取行实今进士试杂文明经加帖括公卿以此待士长老以此训子诵帖括以侥幸又令举人投牒自应欲其返淳朴崇廉让何可得也请置孝廉科令县取行着乡闾学知经术者荐之于州刺史考试升之于省人占一经问经义二十条对策三道上第注官中第出身下第罢归宰相以为明经进士行之已久不可遽改事虽不行时论伟之俄迁吏部精核人物品裁清允天下服其公元载秉政忌绾望高又孤立自守不肯一私谒建言太学当得天下名儒拜为国子祭酒外示尊重实以散地处之载日贪冒天下士议益归绾帝知自擢为太常卿以郊庙礼仪久废藉绾振起载败拜平章事修国史制下之日朝野相贺郭子仪方宴客闻之减座中声乐五分之四京兆尹黎干每出入从骑数百即日省之止存十骑御史中丞崔寛第舍弘侈亟毁撤之绾奏罢诸州团练守捉使减观察诸道判官员之半又言旧制刺史被代皆降鱼书开元後威柄外移置诸道采访使得专停刺史自今刺史有不职本道使具条以闻不得擅追停及差人署摄帝善之初元载以仕

进者多乐京师恶其迫已乃薄京官俸于是京官不能自给常从外官乞贷至是绾奏增之又定节度使以下至主簿尉禄廩使优狭相均始兵兴从权官品同而禄例差及四方既定元载王缙偷以为利因而不改故江淮大州月至千緡而山劔贫险止数十緡至是皆复其旧上下有叙法制初立代宗方虚心听纳厘补穿敝惟绾是恃而绾以疾辞位频诏敦勉居旬日寢剧诏就中书疗治未几卒帝闻之惊悼谓羣臣曰天不使朕致太平何夺我杨绾之速也即日赠司徒诏百官会吊赙赠加等谥文简绾性清俭车服朴古不治第宅不问产业生计禄廩分姻旧随多寡辄尽造之者清谈终晷而不及荣利欲干以私闻其言辄愧止辅政未数月人心自化世以比东京杨震云

论曰贤哉杨绾之相也白麻甫宣风俗已移虽郭子仪诸公能贬己以成人之美要其清望德馨服人心者深矣绾为相仅三閱月厘革弊政已有可观惜天夺之速如代宗所云耳唐书赞其论议浑大虽古王佐无以加非过誉也

崔佑甫

崔佑甫字诒孙太子宾客孝公沔之子也世以礼法闻第进士调壽安尉安祿山?洛阳佑甫冒矢石入私庙负木主以逃累迁中书舍人性刚直遇事不回时侍郎阙佑甫摄省事数与宰相常袞争议不平袞怒使知吏部选每拟官袞辄驳异佑甫不为下会朱泚军中猫鼠同乳表其瑞袞率羣臣贺佑甫独曰可吊不可贺诏使问状对曰臣闻礼迎猫为其食田鼠以其为人去害虽细必录今不能食鼠而反乳之猫职不修其应若曰法吏有不触邪疆吏有不扞敌臣愚以为当命有司察贪吏诫边候勤徼巡则猫能致功鼠不为害代宗异其言袞益不喜帝崩袞与礼官议天下吏民二十七日乃释服佑甫以遗诏不可改争之甚厉袞方入临遣从吏扶立殿墀上佑甫指之谓衆曰臣哭君前有扶礼乎袞不胜忿乃劾佑甫率情变礼挠国典请贬潮州刺史德宗以为重改河南少尹始肃宗时天下多事宰相更直掌事若休沐还第非大诏命不待徧晓则听直者代署以闻是时郭子仪朱泚俱以平章事当署敕尾而不行宰相事帝新即位袞如故事代署子仪泚入言佑甫不宜贬帝曰卿向何所言今云非耶二人对不知帝怒以袞为罔上即两换职调袞河南少尹而拜佑甫同平章事自至德乾元以来天下战讨啓圻填委故官赏谩紊永泰後稍稍平定而元载用事非贿谢不与官剗塞公道纲纪大坏载诛杨绾相未几卒常袞当国惩其弊凡奏请一杜絶之惟文词入第乃得进然无所甄异贤愚同滞焉及佑甫相荐举惟其人不自信畏推至公以行未踰年除吏凡八百员莫不谐允帝尝谓曰人言卿拟官多亲旧何耶对曰陛下令臣进拟度官夫进拟者必悉其才行如不与闻知何由得实帝以为然神策军使王驾鹤典卫兵久权震中外帝将代之惧其变以问佑甫佑甫曰是无足虑即召驾鹤留语移时而代者已入军中矣淄青李正己畏帝威断表献钱三十万緡以观朝廷帝意其诈未能答佑甫曰正己诚诈陛下不如因遣使劳其军以所献就赐将士若正己奉承诏书是陛下恩洽士心也若不用彼自歛怨军且乱又使诸藩不以朝廷为重帝曰善正己慙服时议者韪其谟谋谓可复贞观开元之治是岁卒建中元年也年六十赠太傅谥文贞朱泚之乱佑甫妻王?贼中泚尝与佑甫同列遗以繒帛菽粟受而緘鐃之帝还京具封以献士君子益重其家法焉

论曰不知其人视其时德宗之初朝廷清明藩臣惕息奉职诏罢四方贡献罢梨园禁天下奏祥瑞纵驯象出宫女减常贡及服玩数十事中外皆悦淄青将士至投兵相顾曰明主出矣吾属犹反乎自前後数十年未之有比也佑甫之辅佐盖有力云惜天不祚唐作相不及二年而卒及卢杞秉政抚驭乖方四镇称王希烈狂悖税间架除陌钱之虐政继行以驯至泾原兵之祸君子谓崔卢之在德宗犹张九龄之与杨李也

段秀实

段秀实字成公汧阳人也六岁母疾病不勺饮至七日病间乃肯食时号孝童及长然有济世志举明经其友易之秀实曰搢章摘句不足以立功乃弃去天宝四载从马灵督讨护蜜有功授安西偏将又从高仙芝讨大食仙芝兵失利夜相失秀实闻副将李嗣业声识之因责曰憚敌而奔非勇也免已衆非仁也嗣业慙乃与秀实收散卒成军而还又从封常清讨大勃律与战胜之常清逐北秀实曰贼出羸师诱我也请大索悉得其伏燔焉改绥德府折冲都尉肃宗在灵武诏嗣业以安西兵五千赴行在嗣业听梁宰谋欲逗留观变秀实责之曰公尝自称大丈夫今天子有急乃欲晏然此诚儿女子耳嗣业因固请于宰遂出师以秀实为副嗣业为节度使表秀实为判官安庆绪奔邺嗣业与诸将围之署秀实知怀州时师老财乏秀实督馈募士市马以助军诸军战於愁思冈嗣业中流矢卒衆推荔非元礼代将其军秀实闻之即遗白孝德书使发卒护丧送河内亲与将士迎诸境倾私财葬之元礼高其义奏擢试光禄少卿俄而元礼为麾下所杀将佐多死惟秀实以恩信为士卒所服不敢害更推白孝德为节度使秀实凡三佐府益知名时吐蕃袭京师代宗幸陕秀实劝孝德即日鼓行入援兵还荐为泾州刺史时郭子仪以副元帅居蒲子曦以检校尚书领行营兵屯邠州军士放纵不法邠人之嗜恶者以货窜名伍中因肆志吏不得问白昼羣行击伤市人椎釜鬲瓮盎盈道至撞害孕妇孝德患之而不敢言秀实自州以状白府愿计事至则曰天子以生人付公治公见人被暴害恬然且大乱若何孝德曰愿奉教因自请补署都虞候曦军士十七人入市取酒刺酒翁坏酿器秀实列卒取之悉断首注槩上植市门曦一营大噪尽甲秀实徐解佩刀选老嫠者一人持马径至曦门下甲者皆出秀实笑而入曰杀一老卒何甲也吾戴吾头来矣甲者愕眙秀实曰尚书负若属耶副元帅负若属耶奈何欲以乱败郭氏曦出秀实让之曰副元帅勲塞天地当务始终今尚书恣卒为暴使乱天子边欲谁归罪罪且及副元帅今邠恶子弟以货窜名军籍中杀害人籍籍如是几日不大乱乱由尚书出人皆曰尚书以副元帅故不戢士然则郭氏功名其与存者有几曦再拜谢曰公幸教曦以道敢不从命叱左右皆解甲令曰譁者死秀实曰吾未哺食请为我设具食已又曰吾疾作愿一宿门下遂卧军中曦大骇旦日偕秀实至孝德所陈谢邠赖以安大历元年马璘代孝德为节度每处事或不当秀实固争之璘怒甚秀实曰罪若可杀何以怒为无罪杀人恐涉非道璘置酒谢自是每事皆咨而後行璘城泾州表为留後以劳加御史中丞三年璘奉诏将徙泾其军自四鎮北庭赴难数征伐有功既骤徙遂出怨言兵马使王童之谋作乱期以辛酉日闻警鼓而纵秀实知之召鼓人阳怒失节且戒曰每筹尽当报因延数刻尽四鼓而曙童之不果发明日复约夜焚马坊草因救火作乱秀实申严警备夜果火即下令曰敢救火者斩及旦收捕童之并其党八人皆斩以徇下令曰後徙者族军遂徙无敢後者久之璘有疾以秀实摄节度事秀实严兵以备非常璘卒择谨愿将马頔主丧李汉惠主宾客家人位于堂宗族位于庭将佐位于牙内士卒位于营次非其亲不得居丧侧致祭

拜哭皆有仪节送丧远近皆有定处违者以军法从事有族谈离立者皆捕囚之别将史廷干崔珍等谋因丧作乱秀实遣廷干入京师徒珍等于外军府遂安即拜四镇北庭行军泾原郑颖节度使数年吐蕃不敢犯塞德宗立加检校礼部尚书封张掖郡王建中初宰相杨炎欲城原州以议不合改为司农卿朱泚反以秀实失兵必恨愤且素有人望使骑迎之不纳骑士踰垣入劫之秀实与子弟诀曰吾当以死殉社稷矣往见泚说之曰犒赐不丰有司之过天子安得知公宜以此开谕将士示以祸福扫清宫室奉迎乘輿此不世之功也泚默然秀实知不可乃阳与合陰结将军刘海宾泾原将吏何明礼岐灵岳欲共诛泚会源休教泚追迫天子遣韩旻将锐兵三千袭奉天秀实曰事急矣使灵岳窃取姚令言符印不获乃倒用司农印追其兵旻得符果还秀实谓海宾曰旻还吾等无遗类矣我当直搏泚杀之不克则死终不能为之臣也乃约事急为继而令明礼应于外翌日泚召秀实计事源休姚令言李忠臣李子平皆在坐语及僭位秀实勃然起执休腕夺其象笏唾泚面大骂曰狂贼可磔万段我岂从汝反耶遂击泚中颞流血蔑面匍匐而走贼衆未敢动海宾等卒无应者忠臣前卫泚泚得脱秀实知事不成乃大呼曰我不同汝反何不杀我遂遇害年六十五海宾灵岳明礼皆相继见杀帝在奉天闻之自愧不能用秀实使其才垂涕悔恨秀实性清俭非公会不举乐饮酒室无姬媵宾佐至议军政未尝及私自泾州被召戒家人过岐无纳赠遗泚致绫三百家人不能拒辇至都秀实怒曰吾终不以污吾第置司农署之梁间死後泚取视封识宛然初白志贞所补禁兵多取市井富儿名在军籍受给赐身居市廛为贩鬻秀实尝以禁兵寡弱不足备非常从容为德宗言猛虎所以百兽畏者为爪牙也若去之则犬彘马牛皆能为敌帝不听及乱召神策六军无至者世多其谋兴元元年赠太尉谥忠烈赐封户五百庄第各一区官诸子帝还都辍朝致祭表门闾亲铭其墓

论曰朱泚赫然议称帝不虞秀实之唾其面击其头破裂流血溅地匍匐而走此千古一大快也事虽不济死已重於泰山胡氏犹以未尽善惜之过矣不计利害不计成败乃为忠臣存一毫顾虑之心墮天下忠义之气岂少哉秀实才可大用观其责嗣业服郭曦处置徙泾诸将士精神智量旷世有几历事四朝不得一竟其用所可惜者在此不在彼

李泌

李泌字长源京兆人也七岁知为文开元十六年以童子真俶荐召之帝与张说观奕使赋方圆动静说曰方若棋局圆若棋子动若棋生静若棋死泌曰方若行义圆若用智动若骋才静若得意帝大悦赐束帛还家善视养之张九龄尤獎爱泌一日言严挺之太苦劲萧诚软美可喜泌率尔曰公起布衣以直道至宰相而喜软美者乎九龄改容谢呼为小友及长博学善属文尤工于诗以王佐自负操尚不羈耻随常格仕进遨游嵩华终南间天宝间诣阙献复明堂九鼎议帝使供奉东宫皇太子遇之厚杨国忠疾之斥置蕲春肃宗即位灵武物色求访会泌亦自至陈天下成败之几帝大悦延至卧内事无大小皆咨之欲以为相泌辞曰陛下待以宾友则贵于宰相矣何必屈其志帝乃止建寧王倓有才畧上欲以为元帅泌曰建寧诚元帅才然广平兄也可使为吴太伯乎帝曰广平冢嗣何必元帅泌曰天下艰难衆心所属在于元帅若建寧大功既成陛下不以为储副得耶乃以广平王俶为天下兵马元帅帝与泌出行车军士指曰衣黄者圣人也衣白者山人也帝谓泌且衣紫袍以絶羣疑泌不得已受之帝笑曰既

服此岂可无名称拜元帅府行军长史泌固辞帝曰非敢相臣以济艰难耳俟贼平任行高志帝以在东宫时数为李林甫构譖诸将克长安日掘塚焚骨泌谏以天子而念宿嫌示天下不广且上皇春秋高闻陛下录故怨将内慙不悻万一感疾是陛下以天下之大不能安亲也帝感悟泣曰朕不及此因从容问破贼期对曰贼所掠子女金帛悉送范阳岂有定四海之志耶不出二年天下无寇矣陛下无欲速王者之师当务万全图久安使无後害今诏李光弼守太原出井陘郭子仪取冯翊入河东则史思明张忠志不敢离范阳常山安守忠田乾真不敢离长安是以三地繫其四将也随禄山者独阿史那承庆耳贼北守范阳西救长安奔命数千里其精卒劲骑不逾年而敝我常以逸待劳以所徵之兵会扶风与太原朔方军互击之徐命建宁为范阳节度大使并塞北出与光弼相掎角以取范阳贼失巢窟当死河南诸将手帝然之会四方兵大集帝欲速得长安曰今战必胜攻必取何暇千里先事范阳泌曰今取两京亦必得然贼再强我必再困非久安之策且我所恃者碛西突骑西北诸戎耳若先取京师期必在春关东早热马且病士皆思归不可以战贼休兵秣马俟官军去复来此危道也帝不听帝以张良娣上皇所念欲使正位中宫泌曰陛下在灵武以羣臣望尺寸之功故践大位非私己也至于家事宜待上皇之命不过晚岁月间耳良娣由是恶泌至德二载又欲立广平为太子泌曰臣固尝言之矣戎事交切须即区处至于家事当俟上皇不然後代何以辨陛下灵武即位之意耶宦官李辅国与张良娣相表里建宁王倓恶之数于帝前诋二人罪二人譖倓恨不得元帅谋害广平王帝怒赐倓死于是倓及泌皆内惧倓谋去辅国及良娣泌曰不可王不见建宁之事乎王但尽人子之孝良娣妇人委曲顺之亦何能为二京平奏迎上皇帝召泌谓曰朕已表请上皇东归朕当还东宫复修人子之职泌曰如此上皇不来矣帝惊问故泌曰理势自然帝曰奈何泌曰今请为羣臣贺表言自马嵬请留灵武劝进及今成功圣上思恋晨昏请促还京师就孝养之意则可矣帝即使泌草表遣使入蜀因就泌饮酒同榻寝泌曰臣今报德足矣请复为闲人帝曰朕与先生同忧患今方同乐奈何遽去泌曰臣有五不可留愿陛下听臣去免臣于死上曰何谓也对曰臣遇陛下太蚤陛下任臣太重宠臣太深臣功太高亦太奇此其所以不可留也帝曰卿且眠异日议之泌曰陛下今就臣卧榻犹不得请况异日香案前乎陛下不听臣去是杀臣也帝曰不意卿疑朕至此岂朕而办杀卿耶泌曰陛下不办杀臣故臣得求去若既办臣安得言陛下向日待臣如此臣于事犹有不敢言者况天下既安臣敢言乎帝良久曰卿以朕不从北伐之谋乎对曰非也乃建宁耳帝曰建宁欲害其兄谋继嗣朕不得已泌曰若有此心广平当怨之广平每与臣言其冤辄流涕呜咽且陛下昔欲用建宁为元帅臣请用广平建宁若有此心当深憾臣而以臣为忠益相亲善陛下以此可察其心矣帝泣曰先生言是也既往不咎朕不欲闻之泌曰臣非咎既往乃欲陛下慎将来耳昔天后酖太子弘立次子贤贤亦废死尝作黄台瓜词曰种瓜黄台下瓜熟子离离一摘使瓜好再摘使瓜稀三摘犹为可四摘抱蔓归今陛下已一摘矣慎勿再摘帝曰安有是哉朕当书绅是时广平有大功良娣忌而譖之故泌言及泌复请还山帝曰俟将发此议之其後成都使至言上皇初得表曰当与我剑南一道自奉不复东矣羣臣表至乃大喜曰吾今方得为天子父定行日帝召泌告之曰皆卿力也踰月泌复请不已乃听归衡山代宗立复召至赐光福里第强诏食肉为娶妻元载恶不附已出为江西判官载诛诏还复为常袞所忌授澧朗峡团练使徙杭州刺史皆有风绩德宗在奉天召赴行在授左散骑常侍帝以河中为忧泌曰天下事甚有可忧者若惟河中不足忧也陛下已还宫阙怀光不束身归罪窜伏河中不日必为帐下所梟矣时蝗旱议者欲赦怀光泌破一桐叶以进言陛下与怀光不可复合如此叶初帝发吐蕃讨朱泚许以安

西北庭之地及泚诛欲如约泌言安西北庭控制西域五十七国及十姓突厥又分吐蕃之势使不得并兵东侵今与其地则关中危矣且吐蕃向持两端不战又掠我武功何功之有帝乃止议者言韩滉闻车驾在外聚兵修石头城蓄异志帝疑之泌曰滉公忠贡献不絶所以修城为迎扈之备耳彼性刚不附权贵以故多谤毁臣敢保其无他帝曰外议汹汹卿弗闻乎对曰臣固闻之其子臯为郎不敢归省以此故也退遂上章请以百口保滉他日又言于帝曰臣上章非私于滉乃为朝廷今天下旱蝗关中斗米千钱而江东丰稔愿陛下蚤下臣章以解朝衆之惑面谕韩臯使之归省令滉感激速运粮储此朝廷大计也帝从之滉感悦即日自临水滨发米百万斛陈少游闻之亦贡米二十万斛帝谓泌曰滉乃能化少游贡米耶泌曰岂惟少游诸道将争入贡矣贞元元年陕虢军乱兵马使逵奚抱晖杀节度张劝谋与怀光合帝谓泌曰若蒲陕连屯则不可制而水陆之运皆絶不得不烦卿一行乃以泌为都防御转运使使神策军送之泌言陕城三面悬絶攻之未可岁月下请以单骑往敕马燧与臣同行泌见陕州将吏在长安者语之曰主上以陕虢饥故不授泌节而领运使欲督令江淮米以赈之今当令抱晖将行营有功则赐节矣抱晖衆闻之稍自安泌疾趋而前将佐不待抱晖之命来迎泌笑曰吾事济矣去城十五里抱晖不得已亦出谒泌慰抚之余人皆不问由是反侧者自安泌召抱晖曰勾汝余生以事遣他往抱晖遂亡命不知所之泌始凿山开运道自集津至三门以便饷漕避砥柱之险录功加礼部尚书三年拜平章事封邳县侯泌初视事与李晟等入见上谓泌曰朕欲与卿有约卿慎勿报讐有恩者朕当为卿报之对曰臣素不与人为讐李辅国元载今自毙矣素所善者率已显逵或多零落臣无可报也臣今日亦愿与陛下约可乎帝曰何不可泌曰愿陛下勿害功臣李晟马燧有大功于国闻有谗之者陛下万一害之则宿卫之士方镇之臣无不愤怨反侧恐中外之变复生也帝以为然晟燧皆起泣谢上因谓泌曰自今凡军旅粮储事卿主之吏礼委延赏刑法委浑泌曰陛下不以臣不才使待罪宰相宰相之职天下之事咸共平章若各有所主是乃有司非宰相矣上笑曰朕适失词卿言是也时防秋兵大集国用不充泌奏自变两税以来藩鎮州县聚斂榷率以为军资自惧违法匿不敢言请赦其罪但令革正自非于法应留州之外悉输京师其官典逋负可徵者徵之难徵者释之敢沦没者罪之上喜曰卿策甚长然立法太寬恐所得无几对曰寬则人喜于免罪而乐输所得必多而速急则竟为隐匿非推鞠不能得其实财不足以济天下之急而皆入于奸吏所得必少而迟矣帝曰善乃以元友直为诸道勾勘两税钱帛使先是张延赏尝罢天下吏员泌以为州县可省吏员不可省因请复常员而罢冗官岁减用度是时刺史月俸至千缗方镇所取无艺而京官禄薄泌以为外太重内太轻乃随官闲剧普增其俸为窦参所沮不能悉如所请张延赏与李叔明有隙密奏叔明子昇私出入郾国大长公主第帝使泌察之泌曰此必有欲动摇东宫者其延赏乎帝问何以知之泌具言二人隙故且云昇典禁兵延赏无以中伤而郾国乃太子妃之母故欲以此?之耳帝笑曰是也俄有告主淫乱且厌禱帝怒幽主禁中切责太子太子惧请离婚立召泌示废立意且称舒王贤泌曰陛下惟有一子奈何一旦疑之而欲立侄臣不敢以古事争陛下今奉十宅诸叔若何帝曰卿不爱家族耶对曰臣惟爱家族故不得不尽言使畏陛下盛怒而为曲从他日陛下悔曰我惟一子杀之泌不吾諫吾亦杀尔子臣老矣余年不足惜若冤杀臣子以侄为嗣臣未得歆其祀也因呜咽流涕帝亦泣泌曰此大事愿陛下审图之自古父子相疑未有不亡国覆家者陛下记昔在彭原建寧何故而诛帝曰建寧叔实冤肃宗性急故耳泌曰臣昔为此故辞归誓不近天子左右不幸今日复为陛下相又覩兹事臣当日临辞尽言肃宗亦悔而泣且先帝自建宁死常怀危惧臣亦为诵黄台瓜词以防谗构之端肃宗

乃悔而泣帝意稍解乃曰贞观开元皆易太子何故不亡对曰承乾谋反事觉太宗使其舅朝臣数十人鞠之事状显白然当时言者犹云望陛下不失为慈父使太子得终天年太宗从之并废魏王泰且陛下既知肃宗急而建宁冤愿深戒其失从容三日究其绪端必释然知太子之无他矣若果有迹愿陛下如贞观之法并废舒王而立皇孙则百代之後有天下者犹陛下子孙也至于武惠妃潜太子瑛杀之乃百代所当戒又可法乎且太子居少阳院未尝接外人与外事安得有异谋彼潜人者巧诈百端虽有手书如晋愍怀衷甲如太子瑛犹未可信况但以妻母为累乎幸赖陛下语臣臣敢以宗族保太子向使杨素许敬宗李林甫之徒承此旨已就舒王图定策之功矣帝曰为卿迁延至明日思之泌抽笏叩头泣曰如此臣知陛下父子慈孝如初也然陛下还宫当自审勿露此意于左右露之则皆欲树功于舒王太子危矣帝曰具晓卿意间日召泌泣曰非卿切言朕悔无及太子仁孝实无他也泌拜贺因曰臣报国足矣惊悸亡魂不可复用愿乞骸骨帝慰喻不许初河陇没于吐蕃安西北庭及西域使在长安者归路阻绝皆仰给度支泌知胡客皆有妻子买田宅不欲归命停其给凡四千人诣政府诉之泌曰此皆从前宰相之过岂有外国使者留京师数十年不听归乎今当假道回纥各遣归国不愿者当于鸿胪自陈授以职位给俸禄为唐臣于是胡客无一人愿归者泌皆分隶神策两军禁旅益壮岁省五十万缗帝尝从容论卢?清介人言?奸邪朕殊不觉泌曰此乃?所以为奸邪也倘陛下觉之岂有建中之乱乎?以私隙杀杨炎害颜真卿激李怀光叛赖陛下窜逐之不然乱何由弭帝曰杨炎以童子视朕非由?也建中之乱术士桑道茂预请城奉天此盖天命非?所致泌曰天命他人皆可以言之君相造命不当言命若言命则礼乐政刑皆无用矣泌又极论彍骑六军之弊劝帝复府兵帝曰俟平河中当与卿议之帝忧饥乱之後经费不充欲减戍卒泌曰陛下诚能用臣之言可以不减戍卒不扰百姓粮食皆足粟麦日贱府兵亦成帝曰如何泌曰此须急为之过旬月则不及矣今吐蕃居原兰之间以牛运粮粮尽牛无所用请发左藏恶繒染为彩纛以市之计十八万疋可致牛六万头又命铸农器杂麦种给边军耕荒田约明年麦熟倍偿其种其余据时价五分增一官为杂贮来春种禾亦如之关中土沃而久荒所收必厚戍卒获利耕者寢多边地居人少粟麦必贱帝曰府兵亦集如何泌曰戍卒因屯田致富则安于其土不复思归三年应代下令愿留者即以所开田为永业家人愿来者本贯给长牒续食而遣之不过数番则人皆土着乃悉以府兵之法理之是变关中之疲敝为富庶也帝喜曰如此天下无复事矣泌曰未也臣能不用中国之兵使吐蕃自困帝曰计将安出泌曰臣未敢言之俟麦禾有效然後可议也泌意欲结回纥大食天竺云南与图吐蕃今吐蕃所备者多知帝素恨回纥恐闻之不悦并屯田之议不可故未敢言既而戍卒应募愿耕屯田者十五六久之回纥求和亲帝不许泌乃申前说帝曰三事皆如卿言惟回纥不可许泌曰岂非陕州之耻耶帝曰然韦少华等以朕受辱而死朕岂能忘泌曰害少华等乃牟羽可汗後复入寇为今可汗所杀然则今可汗乃有功于陛下又何怨耶是後凡十五对帝皆不许泌又反覆极论之帝谓李晟马燧曰朕素怨回纥今闻泌言自觉少理皆对曰诚如泌言帝曰朕与之为怨久今往与和若拒我益耻笑泌曰臣以书与之约令称臣子每来不过二百人市马不过千匹无得携中国人及商胡出塞五者皆如约则威加北荒旁讐吐蕃足以快陛下平昔之心矣帝曰至德以来与为兄弟之国今一旦欲臣之彼又安肯泌曰其国素信臣言若其未谐但应再发一书耳帝从之既而回纥可汗遣使上表称儿及臣所约五事皆听帝大喜曰回纥何畏服卿如此因与论招云南大食天竺之计皆从之先是帝尝谓泌曰每岁诸道贡献共直钱五十万缗今岁仅得三十万缗宫中用度殊不足泌曰古者天子不私求财今请岁供宫中钱百万缗

愿陛下勿受贡献及罢宣索必有所须降敕折税不使奸吏因缘诛剥上从之及元友直运江淮钱帛二十万至泌悉输之大盈库然帝犹数有宣索敕诸道勿令宰相知泌闻之惆怅而不敢言四年六月荐处士阳城帝徵为谏议大夫八月月蚀东壁泌曰东壁图书府大臣当有忧者吾以宰相兼学士当之矣五年三月卒年六十八泌出入中禁事君四数为权幸所疾常以智免好纵横大言时时说论能寤移人主然常持黄老鬼神说故为世所讥论曰李泌一代名臣也尤善处人父子之间留侯邴侯异世同称信哉泌谋甚忠功甚伟史氏以其好言神仙诡诞为时所轻屈矣泌历事诸君未尝以神仙诡诞之说进德宗欲立白起庙泌曰臣闻国将兴听于人立庙祈祷将长巫风由是观之泌何尝好鬼道乎笃信黄老乃其学术之差汉唐以降圣学不明虽以泌之贤不免为异端所牵惑悲乎其无师儒也幸其惑止一身不以施之于国则其心之明犹不肯离乎正君子观其忠贞事业焉可

史传三编卷二十四

卷二十五

钦定四库全书

史传三编卷二十五

大学士朱轼撰

名臣传十七

唐

陆贄

陆贄字敬輿嘉兴人也年十八举进士及第中博学宏词调郑尉罢归刺史张鎰有重名一见奇之请为忘年交既行饷钱百万曰请为母夫人一日费贄不纳止受茶一串曰敢不承公之赐以书判拔萃补渭南尉德宗立遣黜陟使庾何等十一人行天下贄说使者请以五术省风俗八计听吏治三科登俊又四赋经财实六德保罢瘵五要简官事五术曰听谣诵审其哀乐纳市价观其好恶讯簿书考其争讼览车服等其俭奢省作业察其趋舍八计曰视户口丰耗以稽抚字视垦田赢缩以稽本末视赋役薄厚以稽廉冒视按籍烦简以稽听断视囚系盈虚以稽决滞视奸盗有无以稽禁御视选举衆寡以稽风化视学校兴废以稽教导三科曰茂异贤良干蛊四赋曰閱稼以奠税度产以裒征料丁壮以计庸占商贾以均利六德曰敬老慈幼救疾恤孤賑贫穷任失业五要曰废兵之冗食蠲法之挠人省官之不急去物之无用罢事之非要时皆聽其言迁监察御史帝在东宫已闻其名召为翰林学士会马燧讨贼河北久不决请济师李希烈寇襄城诏问策安出贄言今幽燕恒魏之势缓而祸轻汝洛荊汴之势急而祸重田悦覆败之余无复远畧王武俊有勇无谋朱滔多疑少决互相制劫不能越軼此谓缓也希烈果于奔噬据蔡许富全之地益以邓襄掠获之资东寇则饒道阻北窥则都邑震此谓急也代朔邠寧昔之精骑上党盟津今之选师举而委之山东将多而势分兵广而财屈则屯戍失于太繁也李勉文吏也而当汴必争之地哥舒曜乌合也扞襄城方銳之贼则守御失于不足也今若还李芑河阳以援东都李怀光解襄城之围专以太原泽潞兵抗山东则梁宋安矣又论关中形势以为王者蓄威以昭德偏废则危居重以驭轻倒持则悖王畿者四方之本也太宗列置府兵分隶禁卫诸府八百余所而在关中者殆五百焉承平日久武备寢微故禄山窃倒持之柄一举滔天乾元之後继有外虞悉师东讨故吐蕃乘虚深入先帝避之东游是皆失居重驭轻之权忘深根固本之虑追想及此岂不寒心今朔方太原之衆远在山东神策六军之兵继出关外关辅之间徵发已甚宫苑之内备卫不全万一将帅之中又如朱滔希烈窃发郊畿惊犯城阙未审陛下将何以备之臣愿追还神策六军节将子弟明敕泾陇邠寧更不徵发仍罢间架等税冀已输者弭怨见处者获寧则人心不摇而邦本固矣帝不能用其冬泾原兵过京师作乱朱泚反帝如奉天贄从幸时天下骚扰远近徵发书诏日数十下皆出于贄

贽若不经思操笔辄成皆周尽事情中窾会旁吏承写不及同列咸拱手嗟叹尝与帝论致寇之由皆羣臣罪意指卢杞也帝护?因曰此天命非由人事贽上疏言陛下四征不庭兵连祸结行者有锋刃之忧居者有诛求之困非常之虞亿兆同虑惟陛下穆然凝邃独不得闻至使凶卒鼓行白昼犯阙陛下有股肱之臣有耳目之佐见危不能竭其诚临难不能效其死所谓羣臣之罪岂徒言欤臣又闻天所视听皆由于人人事理而天命降乱者未之有也自顷行讨颇频刑网稍密物力耗竭人心惊骇果如所虞非关天命臣闻理或生乱乱或资理有以无难而失守有以多难而兴邦今生乱失守之事则既往不可追矣其资理兴邦之业在陛下克励而谨修之而已帝又问当今切务贽言当今急务在于审察羣情羣情之所甚欲者陛下先行之所甚恶者陛下先去之君臣同志何有不从远迹归心孰与为乱疏奏旬日无所施行贽又上疏曰臣闻立国之本在乎得衆得衆之本在乎见情在易乾下坤上曰泰坤下乾上曰否损上益下曰益损下益上曰损夫天在下而地处上于位乖矣而反谓之泰者上下交故也君在上而臣处下于义顺矣而反谓之否者上下不交故也上约己而裕于人人必悦而奉上矣是不谓之益乎上蔑人而肆诸己人必怨而叛上矣岂不谓之损乎是以古先圣王之居人上也必以其欲从天下之心而不敢以天下之人从其欲陛下以明威照临以严法制断故远者惊疑近者畏慑人各隐情以言为讳至于变乱将起亿兆同忧独陛下恬然不知方谓太平可致陛下以今之所睹验往时之所闻则事之通塞人之情伪尽知之矣因劝帝使羣臣参日极言得失若以军务对者见不以时上乃遣中使谕之曰朕本性甚好推诚亦能纳谏将谓君臣一体全不堤防缘推诚信不疑所以反致患害谏官论事例自矜衒归过于朕以自取名又多雷同道听涂说试加质问遽则词穷所以近来不多对人非倦于接纳也贽以书对曰天不以地有恶木而废发生天子不以时有小人而废听纳且一不诚则心莫之保一不信则言莫之行陛下所谓失于诚信以致患者斯言过矣诚信之道不可斯须去身愿陛下慎守而力行之非所以为悔也夫仲虺赞汤成汤不称其无过而称其改过吉甫歌颂周宣不美其无阙而美其补阙是则圣贤惟以改过为能不以无过为贵盖以为智者改过而迁善愚者耻过而遂非迁善则其德日新遂非则其恶日积也谏官不密信非忠厚其于圣德固亦无亏陛下若纳谏不违则传之适足增美若违谏不纳安能禁之勿传衆多之议足见人情必有可行亦有可畏恐不宜一概轻侮莫之省纳且陛下虽穷其词而未穷其理能服其口而未服其心也夫上好胜必甘于佞词上耻过必忌于直谏如是则下之諂谀者顺旨而忠实之语不闻矣上骋辩必剿说而折人以言上衒明必亿度而虞人以诈如是则下之顾望者自便而切磨之言不尽矣上厉威必不能降情以接物上恣愎必不能引咎以受规如是则下之畏懦者避辜而情理之说不得伸矣上情不通于下则人惑而不从其令下情不通于上则君疑而不纳其诚诚不纳则应之以悖令不从则加之以刑下悖上刑不败何待故谏者多表我之能好谏者直彰我之能从谏者有失中而君无不美如此则纳谏之德光矣帝颇采用其言会术者言国家厄运数鍾百六宜有所变更帝议加尊号贽曰尊号本非古制行于安泰之日已累谦冲况今丧乱尤匪所宜若以屯难当有变革不若引咎降名以只天戒帝纳其言但改兴元年号下赦令贽言方今书诏宜痛自引过罪己以感人心昔成汤以罪己勃兴楚昭以善言复国陛下诚能不吝改过以谢天下使书诏之词无所忌讳庶能令叛逆者回心喻旨帝以中书所撰赦文示贽贽言动人以言所感已浅言又不切人谁肯怀今兹德音悔过之意不得不深引咎之词不得不尽乃为制曰小子长于深宫之中暗于经国之务不知稼穡之艰难不惜征戍之劳苦泽靡下究情未上通事既壅隔人怀疑阻由昧省已遂用兴戎远近骚然衆庶劳止天谴于上而朕不悟人

怨于下而朕不知驯致乱阶变兴都邑万品失序九庙震惊上累祖宗下负蒸庶痛心腠面罪实在予自今中外书奏不得言文武圣神之号李希烈田悦王武俊李纳等咸以勲旧各守藩维朕抚御乖方致其疑惧皆由上失其道下罹其灾朕实不君人则何罪宜并所管将吏等一切待之如初朱滔缘泚连坐路远必不同谋念其旧勲务在弘贷如能效顺亦与维新朱泚反易天常窃盗名器暴犯陵寝所不忍言获罪祖宗朕不敢赦其胁从将吏百姓等官军未到以前并从赦例赴奉天及收京城将士并赐名奉天定难功臣其所加垫陌钱税间架竹木茶漆榷铁之类悉宜停罢赦下人心大悦後李抱真入朝言山东宣布赦书士卒皆感泣臣见人情如此知贼不足平也帝于行宫设琼林大盈二库别贮贡物贄言天子与天同德以四海为家何必挠废公方藏聚私货效匹夫之藏以诱奸聚怨乎且顷者六师初降百物无储殆将五旬死伤相枕毕命同力陛下絶甘辍食以啗功劳无厚赏而人不怨悉所无也今者攻围已解衣食已丰而谣譟方兴军情稍阻岂不以患难既与之同忧而安乐不与之同利乎诚能近想重围之殷忧追戒平居之专欲凡在二库货贿尽令出赐有功每获珍华先给军赏如此则乱必靖贼必平徐驾六龙旋复都邑天子之贵岂当忧贫是散小储成大储捐小宝固大宝也帝即命去其榜李怀光与朱泚通谋李晟密奏恐为所并请移军东渭桥帝遣贄诣怀光营宣慰贄还言贼泚势穷援絶怀光乘胜芟剪易若摧枯而寇奔不追师老不用诸帅每欲进取怀光辄沮其谋若不别思制持终恐变故难测伏望即以晟表出付中书敕下依奏别赐怀光手诏示以移军东分贼势词婉而直理顺而明虽蓄异端无由起怨帝从之时李建徽杨惠元犹与怀光联营贄复言晟军既移二人孤弱可托言晟兵素少虑为贼泚所邀藉此两军以为掎角帝曰卿所料极善但怀光因此生辞转难调息且更俟旬时不阅旬怀光果袭夺建徽惠元军杀惠元行在震惊帝徙幸梁供储不豫道乏食民有献瓜果者帝欲官之贄曰爵位须宜慎惜不可轻用赐以钱帛可也若授以官则彼突銛锋忘躯命者必曰吾之躯命乃同瓜果视人如草木谁复肯为用哉帝居艰难中虽有宰相大小事必与贄谋之故当时谓之内相帝行止必与俱山南道险从官相失帝夜召贄不得惊且泣诏军中得贄者与千金久之乃至帝大喜太子以下皆贺贄素直谏忤帝卢?虽贬帝心庇之贄极言杞奸邪至乱帝貌从心颇不悦俄以劳迁谏议大夫仍兼翰林学士凤翔节度使李楚琳数遣使贡行在帝恶其为人皆不见欲以浑瑊代之贄奏楚琳罪固大但乘輿未复大憝犹存宜厚加抚循便足集事必欲精求素行追抉宿疵则是改过不足以补愆自新不足以赎罪凡今将吏孰免疑畏帝悟召见其使优诏劳安之帝又欲加内外从官普号定难功臣贄奏言官官具僚恪居奔走劳则有之何功之有难则当之何定之云今乃与奋命者齿恐沮战士之心结勲臣之愤帝乃止上又问贄近有卑官自山北来者论说贼势语多张皇颇似窥覷若不追寻恐成奸计贄上奏曰以一人之听览而欲穷宇宙之变态以一人之防虑而欲胜亿兆之奸欺役智弥精失道弥远项籍阮?卒防虞已甚汉高豁達大度天下之士至者纳用不疑蓄疑之与推诚其效固不同也陛下智出庶物有轻待人臣之心思用万几有独馭区?之意谋吞衆畧有过慎之防明照羣情有先事之察严束百辟有任刑致理之规威制四方有以力胜残之志由是才能者怨于不任忠荅者忧于见疑勲业者惧于不容怀反侧者迫于及讨驯致离叛构成祸灾愿陛下以覆轍为戒天下幸甚帝以李晟浑瑊兵少欲倚吐蕃以复京城贄极言吐蕃迁延观望翻覆多端致令羣帅进退忧虞彼若不归贼终不灭帝曰卿言甚善然晟瑊诸军当议规画令其进取贄以为?梁千里兵势无常遥为规画未必合宜彼违命则失君威从命则害军事进退羈碍难以成功不若假以便宜之权待以殊常之赏则将帅感悦智勇得伸矣京师平帝命贄草诏赐浑瑊使访求奉天所失内

人贽谏曰今大难甫平疲瘵之民疮痍之卒尚未拊循而首访妇人非所以副维新之望盖事有先後义有重轻宜遣大臣驰传迎复神主修飭郊丘展禋祀之礼申告谢之仪恤死义犒有功崇进忠直优问耆老若内人当离溃之後或为将士所私天下固多?人何必独此帝不复下诏犹遣中使求之帝发梁州问今至凤翔诸军甚盛可遣人代李楚琳贽曰如此则事同胁执以言乎除乱则不武以言乎治理则不诚易一帅而亏万乘之义结四海之疑不如俟到京邑徵授一官彼将奔走不暇安敢复劳诛鉏哉河中平上问贽今复有何事宜区处者贽以河中既平虑希旨生事之人请乘胜讨淮西李希烈必诱谕所部及新附诸帅曰奉天兵息之旨乃因窘急而言朝廷稍安必复诛伐如是则四方负罪者自疑河朔青齐响应兵连祸结赋役繁兴建中之忧行将复起乃上奏曰陛下悔过降号闻者流涕故诸将效死叛夫请罪逆泚怀光相继泉殄曩以百万之师而力殫今以咫尺之诏而化洽是则圣王之敷理道服暴人任德而不任兵明矣今叛帅革面修臣礼然其深言密议固亦未尽坦然必聚心而谋倾耳而听观陛下所行之事考陛下所誓之言若言与事符则迁善之心渐固倘事与言背则虑祸之态复回所宣布恤人之惠以济威乘灭贼之威以行惠臣所未敢保者唯希烈耳想其私心非不追悔但以猖狂失计已窃大名纵未顺命斯为独夫内则无词以起兵外则无类以求助陛下但敕诸郡各守封疆彼既气夺箠穷是乃狴牢之类古所谓不战而屈人之兵者斯之谓欤诏以李怀光尝有功宥其一男归其尸使收葬诸道与淮西连接者非彼侵軼不须进讨李希烈若降当待以不死自余一无所问越明年希烈将陈僊奇果杀希烈以降时刘从一姜公辅等材不逮贽远甚皆由下位建台宰而贽孤立一意为左右权幸沮短又言事无所回讳陰失帝意久之不得宰相还京但为中书舍人丁母忧免丧权知兵部侍郎复入翰林中外属意旦夕俟其为相竇参深忌之贽亦数言参罪失贞元七年罢学士以兵部侍郎知贡举于进士中得人最多为唐代第一明年参黜乃拜中书侍郎同平章事贽既相益以天下为己任面论敷奏不遗余力帝自贞元後惩杨炎卢?引树私党排忠良天下怨疾虽置宰相至除用庶官反复参诘乃得下贽请令台省长官各自荐其属有不职坐举者帝初许之或言诸司所引皆亲党帝复诏宰相自择贽奏言台省长官乃将来之宰相今乃不能进一二属吏则後日位宰相安能择天下材乎夫求才贵广考课贵精往者武后收人心务拔擢非徒人得荐士士亦许自荐然而课责严进退速当世称知人之明累朝赖多士之用帝虽嘉之然卒停荐士诏旧制吏部选每岁集人其後遂三年一选选人稽壅案牒丛淆伪冒混真吏因得大爲奸弊选士一蹉跌或至十年不得官缺者或累岁不补贽乃请以内外员为三分每岁计阙集人检柅吏奸天下便之贽又言于上曰边储不贍由措置失当蓄歛乖宜故也今戍卒不隶于守臣守臣不总于元帅至有一城之将一旅之兵各降中使监临皆承别诏委任每有寇至方从申覆比蒙徵发救援寇已获胜罢归此措置失当也顷设就军和籴之法以省运制加倍之价以劝农此令初行人皆悦慕而有司竞为纤啬不时歛藏遂使豪家贪吏反操利权度支物估转高军城谷价转贵此蓄歛乖宜也旧制关中岁运东方租米至有斗钱运斗米之言将制国用须权重轻食不足而财有余则弛财而务实仓廩食有余而财不足则缓食而啬用货泉近岁关辅屡丰公储委积江淮水潦米贵加倍运彼所乏益此所余可谓习闻见而不達时宜矣今江淮斗米直百五十钱运至东渭桥僦直又约二百而市司估籴三十七钱耗其九而存其一馁彼人而伤此农每年江淮运米百一十万斛至河陰太原留七十万斛而以四十万斛输东渭桥今二仓见米犹有三百二十余万斛京兆诸县斗米不过直钱七十请令来年江淮止运三十万斛至河陰以次运至京师其江淮所停八十万斛委转运使每斗取八十钱于水灾州县糴之以救贫乏计

得钱六十四万缗减僦直六十九万缗先令户部以二十万缗付京兆籾米以补渭桥之阙数斗用百钱以利农人以一百二万六千缗付边镇使籾十万人六年之粮余十万四千缗以充来年和籾之价其江淮米钱僦直并委转运使折市绫绢丝绵以输上都偿先贷户部钱诏行其策边备浸充时与赵憬卢迈贾耽同相上尝使人问贄曰自今要重之事勿对赵憬陈论当密封手疏以闻又萧晋卿往年摄政尝有不臣之言诸子皆与古帝王同名今不欲明行斥逐宜各除外官又卿清慎太过诸道馈遗一皆拒绝恐事情不通鞭靴之类受亦无伤贄奏曰昨臣所奏唯憬得闻陛下委曲防护是于心膂之内尚有形迹之拘职同事殊鲜克以济恐爽无私之德古者爵人于朝刑人于市唯恐衆之不睹事之不彰凡是谮诉之事多非信实之言利于中伤惧于公辩或云岁月已久不可究寻或云事体有妨须为隐忍或云恶逆未露宜假他事为名或云但弃其人何必明言责辱伤善售奸莫斯为甚若晋卿父子实有大罪则当公议典宪若彼诬枉岂令陰受播迁夫监临受贿盈尺有刑士吏之微尚当严禁矧居风化之首反可通行贿道一开展转滋甚鞭靴不已遂及金玉目见可欲何能自窒于心已与交私岂能中绝其意乎至是憬反疑贄排已与有隙贄又尝奏论备边六失以为措置乖方课责亏度财匱于兵衆力分于将多怨生于不均机失于遥制宜罢诸道防秋令本道但供衣粮募戍卒愿留及蕃汉子弟多开屯田官为收籾寇至则人自为战时至则家自力农又择文武能臣为陇右朔方河东三元帅缘边诸镇有非要者随便并之减奸滥虚浮之费以丰财定衣粮等级之制以和衆弘委任之道以宣其用悬赏罚之典以考其成如是则疆場寧谧矣帝不能尽心甚重之又以郊赦窜谪者未沾恩拟三状以进奏曰王者待人以诚有责怒而无猜嫌有怨沮而无怨忌斥远以徹其不恪甄恕以勉其自新人知复用谁不增修如其贬黜长从摈弃含凄念乱或起于兹矣帝性猜忌官无大小必自选用以辩给取人不得敦实之士贄谏曰明王不以词尽人不以意选士但在明鉴大度御之有道而已以一言称愜为能而付任逾涯以一事违忤爲咎而罪责过当则职司之内无成功矣又奏请均节财赋凡六条其一论两税之弊曰旧制租庸调法天下均一虽欲转徙莫容其奸人无摇心事有定制兵兴以来版图隳坏更旧法以爲两税但取大历中一年科率最多者以爲定数唯以资产爲宗不以丁身爲本务轻资而乐转徙者恒脱于徭税敦本实而树居产者每困于徵求又大历中供军进奉既收入两税今于两税之外复又并存望稍行均减以救雕残其二请两税以谷帛爲额不专以钱谷定税其三论长吏以增户减税辟田爲课绩其四论税限迫促请更定徵税期限其五请以税茶钱置义仓以备水旱其六论兼并之家私敛重于公税请爲占田条限裁减租价事皆不行初窦参恶李巽出爲常州刺史及参贬巽爲湖南观察使奏参交结蕃镇受汴州节度刘士寧赂遗帝怒欲杀参贄言朝廷大臣诛之不可无名昔刘晏之死罪不明白至使叛臣得以爲词参于臣素分陛下所知岂欲营救其人盖惜典刑有滥耳乃贬参驩州司马帝又欲理其亲党籍其家貲皆以贄切谏而止时宦官恨参尤深日谤毁竟赐死於路贄请以李巽权判度支帝许之又复欲用裴延龄贄言度支準平万货刻吝则生患寛假则容奸延龄诞妄小人不可用弗听俄而延龄奸佞天下皆嫉怨以得幸天子莫敢言贄复上书苦谏帝不恠延龄谋去贄潜毁百端十年罢爲太子宾客明年夏旱刍粮不给军校诉于上延龄奏曰此皆陆贄辈怨望鼓煽军人也帝遂发怒欲诛贄赖阳城等交章论奏乃贬忠州别驾顺宗立召还诏未至而卒年五十二谥曰宣平生樵古扬今絜情度物敷之爲文诰俾狡猾者向风则有制诰集一十卷论思献纳兴利除害吏事巨细酌量精絶则有奏草七卷其在相位推贤与能举直错枉内格君心外图治要将以致久安长治又有中书奏议七卷始入翰林年尚少以材得幸于天子歌诗宴游朝

夕侍从及出居艰阻之中虽有宰臣而谋猷参决多出于贄议者谓兴元勘难之功虽爪牙宣力盖贄有助焉天子常以行辈呼爲陆九而不名解衣推食同列莫敢望及辅政不敢自爱事之不可者皆争之所言悉剗拂帝短悬到深切或规其太过贄曰吾上不负天子下不负所学遑他恤乎居忠州十余年常阖户人不识其面又惧谤不敢着书地苦瘴疠只为古今集验方五十卷示乡人云其奏议至今传

论曰若贄者乃可谓知无不言言无不尽者也刚直如魏徵而性行较醇方正如宋璟而谋畧更优指陈时政洞若观火皆本仁祖义而出之昏佞漆胶正直不容贬窜在外十余年以歿何竟忘奉天被围梁州再幸时也贄之自言曰上不负天子下不负所学所学者学为忠与孝也学为明理而察物也学为理国而安民也若贄者始可以言学矣贄不负德宗而德宗负贄悲夫

阳城

阳城字亢宗北平人徙陕州夏县世为宦族好学贫不能得书乃求为集贤院吏窃官书读之昼夜不出经六年无所不通登进士第去隐中条山远近慕其行从学者踵相接闾里感化争讼不之官诣城决之李泌为相举为谏议大夫未至京师人皆想望风采谓城兴草茅不乐名利必谏诤死职下咸畏惮之既至诸谏官纷纷言事细碎帝厌苦而城闻得失且熟久之无一言韩愈作诤臣论以讥城方与弟昼夜痛饮若为弗闻也者客或造之欲有词城揣知其意辄强以酒或时醉卧客怀中不能听客语居位八年人莫能窥其际及裴延龄谗毁陆贄等坐贬黜德宗怒不解无敢言城闻而起曰吾谏官也不可令天子杀无罪大臣而信用奸人即率拾遗王仲舒等守延英门上疏论延龄奸佞贄等无罪状帝大怒召宰相将加城罪太子为开救乃解令宰相谕遣之金吾将军张万福闻谏官伏合趋往延英门大言贺曰朝廷有直臣天下必太平矣遂徧拜城与仲舒等连呼太平万岁万福武人年八十余自此名重天下时朝夕相延龄城曰脱以延龄为相当取白麻坏之恟?于廷竟坐延龄事改国子司业至引诸生告之曰凡学者所以学为忠与孝也诸生有久不省亲者乎明日谒城还养者二十辈有三年不归侍者斥之简孝秀德行升堂上罢沉?不率教者躬讲经籍生徒斤斤皆有法度有薛约者狂而直以言事得罪将徙连州城饮食之吏迹捕得于其家城步出郊外涕泣与别帝恶城党罪出为道州刺史太学生二百余人诣阙请留守数日为吏遮抑不得上至道州以家人礼待吏民宜罚罚之宜赏赏之不以簿书介意州产侏儒故事岁贡诸朝城哀其生离无所进帝使求之城曰州民尽短不知何者可以充贡自是罢州人感其德生子以阳名赋税不登观察使数谗让会上考功第城自署曰抚字心劳徵科政拙考下下观察使遣判官督其赋怪城不出迎以问吏吏曰刺史闻判官来以为已有罪自囚于狱不敢出判官大惊驰入狱谒曰使君何罪某奉命来候安否耳留数日城固不敢归馆门外有故门扇横地城昼夜坐卧其上判官不自安辞去其後又遣他判官崔某按之崔承命不辞载妻子以往中道而逃顺宗立召城还诏下则卒矣年七十赠散骑常侍

论曰城固世所称孝友者兄弟皆不娶无子友则愚孝则未也为谏官八年纳忠止此一日厥口亦太慎重然陆贄死生延龄相否有关于唐室甚大说论一扬邪氛立解可谓不负此官矣

其教国子治道州又何其温温然纯德君子也

李晟【子愬附】

李晟字良器洮州临潭人也幼孤奉母孝年十八从王忠嗣击吐蕃以万人敌着名又从高昇击叛羌连破之迁左羽林大将军广德间击党项有功授持进试太常卿大历初吐蕃寇灵州李抱玉授晟兵五千击之晟曰以衆则不足以谋则多乃请千人由大震关趋临洮屠定秦堡执其帅慕容谷钟而还加开府仪同三司俄充泾原四镇北庭兵马使马璘与吐蕃战盐仓败绩晟率游兵拔璘以归封合川郡王德宗立吐蕃寇剑南蜀大震诏晟将神策兵救之踰漏天拔飞越廓清肃寧等三城絶大渡河斩获千级吐蕃遁去建中二年与马燧李抱真合兵攻田悦斩杨朝光乘水渡洛水破之又战洹水悦大败遂进攻魏朱滔王武俊围康日知于赵州抱真分兵二千戍邢燧怒欲班师晟和解之燧与抱真相欢晟乃建言宜趋定州与张孝忠合以图范阳武俊等当舍赵自救于是引而北武俊果解去会帝出奉天诏晟赴难而孝忠以军介二盗间倚晟为重数止晟无西晟涕泣以子凭约婚为质解玉带良马遗孝忠言天子播越人臣当百舍一息必死乃已即踰飞狐进临渭北壁东渭桥时刘德信自扈涧败归晟斩之以数骑入壁并将其军由是兵势益振李怀光军咸阳不欲晟独当一面请合兵有诏徙屯乃引趋陈涛斜与怀光聯壁晟每与贼战必锦裘绣?自表指顾阵前怀光恶之迁延有异志晟说以贼据京邑天子暴露于外宜速进兵怀光不纳甫至都城军多抢掠忌晟整戢分遗所获以溷之晟军不敢受怀光奏言神策兵给赐比方镇独厚欲以激怒军士且使晟自削其军则士必怨之晟不为动怀光计塞屯咸阳凡八旬帝数催战但以伺贼隙为言卒不出晟见怀光逆迹已露惧为所并奏请移军东渭桥且言当先变制备蜀汉之路不可壅请以裨将赵光铤唐良臣张彧为洋利劔三州刺史各将兵以防未然不报及怀光反帝奔梁州道隘乏食乃叹曰早用晟言三蜀之利可坐致也因顾浑瑊曰渭桥在贼腹中兵孤絶晟能办胜否瑊曰晟秉义挺忠峯然不可夺臣策之必破贼帝乃安即诏进晟平章事晟受命拜泣以收复京师为己任乃缮甲兵治陴隍自念孤军当贼冲恐二盗合而轧已卑词厚礼致诚於怀光谕以祸福劝之立功补过又使张彧假京兆尹多署吏调畿内赋不淹旬刍米告具乃陈兵下令曰国家多难乘輿播迁见危死节臣子之分公等此时不诛元凶取富贵非豪杰也因歔歔流涕士皆雪泣曰惟公命时朱泚盗京城怀光图反噬河朔僭位者三李纳虎视河南希烈?张汴郑晟内无资粮外无应援徒以忠义感激将士故其衆虽单弱而锐气不衰于是骆元光以华州之衆守潼关尚可孤以神策兵保七盘皆受晟节度戴休顔韩游瓌悉举奉天邠宁军从晟怀光始惧欲引军袭晟其下不应又惧为晟所袭乃奔河中帝欲西幸晟奏请驻蹕梁汉以系天下望诏加晟诸道兵马副元帅晟家百口及神策军士家属在长安朱泚善遇之军中有言及家者晟泣曰天子何在敢言家乎泚使晟亲近以家书欸壁门告曰公等家属皆无恙晟怒曰汝敢为贼间立斩之时未授春衣盛夏犹衣裘褐晟与军士同甘苦终无攜怨五月三日引兵叩都门贼不敢出明日会诸将图所向衆请先拔外城晟曰外城有里閭之隘若设伏格战居民嚣潰非计也贼重兵精甲皆聚苑中今宜直击之披其心腹庶可保安宫阙无扰坊市乃檄诸军并进壁光泰门贼将张庭芝李希倩来战晟纵兵鏖击大破之乘胜入光泰门再战贼却尸相藉余衆走白华咸大哭终夜不息翌日将复战或请待西师晟不许使王泌李演将骑史万顷将步抵苑北晟先夜隕苑墙二百步为道贼树栅断之晟怒叱诸将曰安得纵贼今先斩公万顷惧先登

拔栅以入，使督骑继之，贼奔溃。诸军分道并入，贼将姚令言及庭芝希倩殊死鬪，晟令唐良臣等以步骑。其阵贼伏千骑，出官军背，晟以麾下百骑自驰之，令左右传呼曰：「相公来！」贼惊溃，禽馘畧尽，泚率残卒万人西走。使田子奇追之，余党悉降。晟引军屯含元殿前，舍右金吾仗，下令军中曰：「五日内不得辄通家问，违者斩。」遣京兆尹长安万年令分慰居民，秋毫无所扰。别将高明曜取贼妓，司马伾取贼马，皆斩以徇。坊人之远者宿昔方知王师之入也。明日，晟屯安国寺，斩贼将宦竖于市，表着节不屈者，择文武摄台省官以俟。乘舆条脇污于贼者，请以不死作露布上行。在曰：「臣已肃清宫禁，只谒寝园，钟簴不移，庙貌如故。」帝览之，泣下。羣臣拜贺，咸言晟荡扫凶慝，市不易廛，宗庙不震，长安之人不识旗鼓。虽三代行师，无以加帝。帝曰：「天生李晟为社稷也。」拜司徒、中书令，实封千户，赐田宅园林女乐。帝自为文纪功。皇太子书碑立东渭桥，以示後世。始晟屯渭桥，荧惑守岁久，乃退。府中皆贺晟曰：「天子野次，人臣当力死勤难安，知天道既克，长安乃谓之曰：『躔非相拒也。』」吾闻五星盈缩无常，苟一夕复来守岁，则军心不战自屈矣。皆曰：「非所及也。」泾州倚边，数戕其帅。晟请治不恭命者，因以训耕积粟，实塞下，羁制西戎。帝乃拜晟凤翔陇右泾原节度兼行营副元帥，徙封西平郡王。晟至凤翔，治杀张镒者，罪诛。乱将王斌等十余人，又托行边至泾，治杀冯河清，罪执田希鉴并其党石奇等三十余人，悉伏诛。晟尝言：「河陇之非吐蕃能取之，皆将臣贪暴，其种落不得耕稼，日益东徙，自弃之耳。然土无繒絮，人苦役扰，思唐之心，宁有既耶？」因悉家货，怀辑降附，得大酋浪息曩表以王号。每外使至，召息曩与坐，衣大锦袍，金带夸异之，皆指目歆艳焉。吐蕃君臣大惧，尚结赞者善计，乃曰：「唐名将李晟，马燧浑瑊而已，不去之必为吾患。」即遣使委词，因燧请和，以求盟。欲因盟执瑊以要燧，子是兴兵踰陇岐，不抄掠，阳怒曰：「李令公召我来，乃不牛酒犒我。」徐引去。以是间晟。晟选兵三千，使王伾伏汧阳旁，击其中军，几获结赞。又遣兵攻摧沙堡，拔之。结赞屡乞和，晟入朝，力奏不可。时天子厌兵，而张延赏当国，密请解晟兵柄。贞元三年，进晟太尉、中书令，罢其兵。越两月，吐蕃刼盟，瑊仅以身免。诏罢燧、河、东，皆如结赞计。云：「明年诏为晟立五庙。」与马燧图像凌烟阁。九年卒，年六十七，谥忠武。晟为人沉默，有所谋猷，虽至亲未尝泄。临下明察，凡治军，知某有何劳，某有何长，即廝养小善，必记姓名，恶朋党，笃分一本至诚。尝慕魏徵直言危行，欲致太宗于尧舜。李叔度以为此儒者事，非勲德所宜。晟曰：「君失词。」晟任兼将相，知朝廷得失而不言，何以为臣哉？叔度慙而退。由是每进对，必謦謦尽大臣节，未尝露于外。晟与马燧皆在朝，每宴乐，恩赐使者相衔于道。两家日出，无钟鼓声，则金吾以闻。少选，使者至，必曰：「今日何不举乐？」其眷遇始终无与比。晟有十五子，其闻者愿宪，愬听皆历官节度使，愿检校尚书左仆射，宪以吏能显，听以功封凉国公，听子琢亦拜尚书右仆射，历四镇节度使。惟愬独有父风，平淮蔡，不戮一人，智谋德量，战功皆第一。

愬字元直，宪宗讨吴元济为唐邓节度使，揣知新败之後，士卒惮战，诡言天子以愬柔懦，能忍耻，故使拊循，尔曹战非吾事也。蔡人以愬名轻，果易之。愬沉鸷，能推诚待士，视伤痍疾病者存恤之。贼来降，辄听其便有父母者，孤未葬者，给粟帛遣还，以故衆愿效死。凡贼中山川险易，情伪愬一一知之。居半岁，知士可用，乃攻下马鞍山，拔道口栅，平青陵城，禽其骁将丁士良。愬不杀，署为捉生将。士良因说取吴秀琳，禽其谋主陈光洽，以献秀琳，遂举文城栅，降其将李宪。有才畧，愬更其名曰忠义而用之。遂以其衆攻吴房，诸将曰：「今日往亡。」愬曰：「彼谓吾不来，正可击也。」克其外城，遂引还。贼孙献忠来追，衆将走愬，下马据匡床，令曰：「退者斩。」衆决战，杀献忠，或劝取吴房。愬曰：「取吴房则奔蔡，并力固守，不如存之以分其兵。」秀琳献策曰：「必破贼，非李佑不可。」

佑贼健将也守兴桥栅愬候佑刈麦伏壮士禽之待以上客令佩刀出入帐下与李忠义皆屏人语至夜分军中皆言二人不可近愬待之益厚诸军诡云得贼牒佑为内应愬恐谤先達於上不及救乃持佑泣曰天不欲平贼乎何吾二人相知之深不能胜衆口耶械送佑于朝密奏若杀佑则无以成功诏还愬署兵马使或与同宿密语達曙募敢死士三千人自教之号为?将委佑统焉旧令舍谍者族愬除其禁使厚待之故谍者反效以情益尽知贼中虚实时李光顔战数胜蔡精兵尽屯?曲佑言其隙可乘愬乃遣郑澥见裴度告师期于时元和十一年十月己卯师夜起佑及忠义率?将三千人为前锋愬将三千为中军进诚以下军殿东行六十里袭张柴旣其戍敕士少休食乾糲整羈勒留兵镇之以断朗山救援又分兵以断?曲及诸道桥梁复夜引兵出时大雨雪凜风偃旗士裂肤马皆缩栗诸将请所之愬曰入蔡州取吴元济将士咸失色监军?曰果落李佑奸计人人自以为必死然畏愬莫敢违行七十里夜半至悬弧城雪愈甚城旁皆鵞鵝池令击之以乱军声贼恃吴房朗山戍晏然无知者佑等坎墉先登衆从之杀门者开关留持柝传夜自如黎明雪止愬入驻元济外宅蔡吏惊曰城?矣元济尚不信曰是洄曲子弟归索寒衣耳俄闻号令常侍传语始惊曰何常侍得至此率左右登牙城拒战愬计元济且望救于洄曲访洄曲将董重质家慰安之而以书召重质重质降愬攻牙城火南门元济请罪梯而下檻送京师申光诸屯尚二万衆皆降愬不戮一人自官吏帐下厨廩之卒皆用其旧乃屯兵鞠塲以待裴度度至愬囊鞬迎道左度将避之愬曰此方废上下之分久矣请因示之使知朝廷之尊度乃受愬谒蔡人耸观事闻进检校尚书左仆射封凉国公又使代其兄愿帅武宁军淄青平进平章事历昭义魏博帅卒年四十九赠太尉谥曰武

论曰晟平日战功固已伟矣奉天播越慷慨勤王以孤军扼羣贼之吭无异委肉当饿虎之喂卒能克复京师功存社稷则其忠义之气有以感激乎人心非寻常战胜者比也兵克城而市不改肆则仁人君子之师庶几春秋所谓王事矣小心谨慎善保功名诸子克家世所罕见若愬平蔡一役轰烈震聳克肖乃父与汉之周勃亚夫宋之曹彬曹玮父子济美为时宗臣近世以来不多见也

史传三编卷二十五

卷二十六

<史部,传记类,总录之属,史传三编

钦定四库全书

史传三编卷二十六

大学士朱轼撰

名臣传十八

唐

马燧

马燧字洵美汝州郾城人也少姿度魁杰与诸兄共学见时方多故辍策叹曰丈夫当建功业弘济四海渠老一儒哉更学兵书战策沈勇多算禄山反使贾循守范阳燧说循曰禄山首乱今虽举洛阳後将诛覆公盍斩向润客牛廷玠倾其本根使进不得入关退无所据则坐受禽此不世之功也循许之不以时决会顔杲卿招循举兵禄山遣韩朝阳缢杀之燧走西山间道归平原闻已不守复走魏宝应中泽潞李抱玉署为赵城尉时回纥还国恃功恣睢所过皆剽伤州县供饩不称辄杀人抱玉将馈劳宾介无敢往燧自请典办具乃先赂其酋给得信旗犯令者得杀之又取死囚供役左右小违令辄戮死回纥大惊至出境无敢暴者抱玉才之燧因说曰属与回纥接且得其情仆固怀恩树党自重裂河壮以授薛嵩等四将其子瑒佻勇不义必窥太原公当备之既而果然嵩自相卫遗怀恩粮抱玉令燧说嵩絶怀恩自归朝廷即署燧兵曹参军累进郑州刺史劝课农田总户籍岁一税之人称便徙怀州乘荒乱後瘞暴鬻止横歛勤教化将吏有亲者躬造礼之大获秋稔民赖以济抱玉守凤翔表为陇州刺史州西山直吐蕃上有通道燧聚石种树障之设二门为谯橹八日而毕吐蕃不能暴从抱玉入朝代宗雅闻其才授商州刺史兼水陆转运使大历中转检校左散骑常侍镇河阳三城李灵耀反诏燧与淮西李忠臣讨之师次郑州遇敌来犯忠臣兵溃将引归燧军顿荥泽固止之忠臣乃还收亡卒共败贼将张清于西梁固灵耀有锐兵八千号饿狼军燧战破之进至浚仪值田悦帅衆助逆忠臣战不利燧引四千人爲奇兵击败之悦单骑遁灵耀亦走汴州平燧知忠臣暴傲让其功出舍板桥忠臣入汴果争功击杀宋州刺史李僧惠燧还河阳迁河东留後进阶度使太原承鲍防败後兵力衰单燧募厮役数千人补骑士教之战数月成精卒造铠分短长三等称士所衣为战车前冒狻猊怪象列戟于後行以戟兵止则为阵器用完整辟广场罗兵三万以肄之威震北方建中二年朝京师迁兵部尚书封豳国公奏田悦必反宜先御备甫还镇悦果围邢州次临洺筑重城絶内外援诏与李抱真李晟救邢洺燧出?口未过险移书示好悦以燧畏已大喜既次邯鄲悦使至燧皆斩之遣兵破其支军杀其骁将悦闻乃自攻临洺使大将杨

朝光率万人据双冈筑东西二栅以御燧又分恒州兵五千助朝光燧令大将李自良等以兵守双冈戒曰令悦得过者斩燧乃推火车焚朝光栅自晨及晡大破之斩朝光禽其将卢子昌及麾下八百人获首五千级进军临洛悦悉军战百余合大败之斩获万余馆谷三十万斛邢围亦解以功迁尚书右仆射初将战与衆约胜则以家货赏至是倾家财赐麾下德宗嘉叹诏出度支钱五千万偿之进兼魏博招讨使李纳李惟岳合兵救悦悦裒散兵壁洹水燧进屯邺诏李芑以兵会次于漳悦遣王光进守漳长桥筑月垒扼军路燧于下流用铁鑕维车数百絶河囊土遏水而渡悦知无多粮深壁不战燧进营仓口与悦夹洹而军造三桥踰洹日挑战不出燧令诸军夜半食先鸡鸣鼓角趋魏州旁匿百骑须悦渡即焚桥悦果率李纳等兵噪而前燧令士无动预除战塲列壮士五千以待比至纵击之悦败趋桥桥已焚衆赴水死者不可计斩首二万横屍三十里杀贼将孙晋卿安墨啜淄青兵几尽悦夜走魏婴城自守于是李再春以博州悦兄昂以洺州并王光进符璘李瑶皆降遂傳魏城絶御河上流魏人大恐悦遣使告急于朱滔王武俊未至出兵背城而阵复大破之进同平章事封北平郡王会泾师乱帝幸奉天诏还军太原李怀光反诏燧为河东保宁奉诚军行营副元帅与浑瑊骆元光合兵讨之时贼党要廷珍守晋毛朝敷守隰郑抗守慈燧檄諭皆以州降即命兼晋绛慈隰节度使固让于康日知帝嘉许乃分兵收夏县畧积山攻龙门降其将冯万兴任象玉遂围绛拔外郭伪刺史王克用弃城去遣李自良定闻喜万泉等六县降其将辛旼裨将谷秀违令掠士女斩以徇又战宝鼎杀贼将徐伯文斩首万级时天下蝗旱兵艰食朝议多请赦怀光帝未决燧入朝言怀光逆计久反覆不可信河中近畿舍之无以示天下请给三十日粮足破之贼将徐廷光守长春宫城燧度此城不下则怀光固守久攻所伤必衆乃挺身至城下见廷光諭曰公等自禄山以来功高天下奈何弃之为族灭计若从吾言非止免祸富贵可保也未对燧曰汝以我为欺耶今不远数步可射我披而示之心廷光感泣一军皆流涕请降燧以数骑入其城衆大呼曰吾等更为王人矣浑瑊闻之叹曰尝疑马公能窘田悦今观其制敌固有大过人者吾不逮远矣进营焦篱堡堡将尉珪降余戍望风遁去遂济河直抵城下陈兵八万是日怀光死守兵万六千皆降诛其党阎晏孟宝张清吴罔等他胁附悉赦之果二十七日河中平迁光禄大夫兼侍中还太原帝赐宸宸台衡二铭言君臣相成之美勒石起义堂榜其顔以宠之贞元二年吐蕃破盐夏诏燧为绥银麟胜招讨使次于石州吐蕃惧请盟帝不许遣将论颊热甘词重币转请于燧明年燧与论颊热俱入朝帝许之吐蕃尚结赞谋去燧平凉劫盟释燧兄子弇曰河曲之屯春草未生马饥人疫若此时引兵渡河吾无种矣赖公许和今释弇以报帝闻果悔怒夺其兵拜司徒奉朝请而已与李晟皆图像凌烟阁卒年七十赠太傅谥庄武

论曰浑瑊称马公制敌固有大过人者此乃燧实録非虚誉也燧沉勇多算善誓师能得人死力故所向未尝挫衄与李晟共享大名遭时眷宜矣史以与抱真交恶及不禽田悦信吐蕃为燧惜亦春秋责备贤者意乎然抱真睚眦闻晟一言即和好如初此不足为盛德累田悦有河朔羣助未易轻取奉天忽狩诏趣还军谓力所能而故纵燧何至于此极也轻信吐蕃乃其一时之悞亦尚结赞狡黠计去三贤之计深君子当原燧之心而谅之

浑瑊

浑瑊铁勒浑部人也世为臯兰都督父释之从朔方军积战功累迁开府仪同三司宁朔郡王

城年十一善骑射随父防秋节度张齐丘戏曰与乳媪俱来耶是岁立跳荡功後二年从破贺鲁部拔石堡城龙驹岛其勇常冠军迁中郎将从李光弼讨禄山定河北射贼将李立节贯左肩毙之迁右骁卫将军肃宗即位城以兵趋灵武至天德遇吐蕃入寇击败之遂从郭子仪复两京讨安庆绪胜之于新乡擢武锋军使又从仆固怀恩平史朝义大小数十战功称最加开府仪同三司太常卿实封二百户怀恩反城以所部归子仪父释之与吐蕃战死既免丧起朔方行营兵马使从子仪击吐蕃数有功迁太子宾客吐蕃引去城邀击大破之悉夺所掠而还是後屡击走吐蕃回纥进兼副都护振武军使检校工部尚书德宗析子仪所部为三节度城居一焉李希烈反诈为城书若与同乱者帝知为反间不疑更赐良马锦币帝狩奉天卫从仪宦官左右百余人城率家人子弟以从城时为金吾大将军有威望衆心赖之以安授行在都虞候京畿渭北节度使朱泚兵薄城战譙门晨至日中不解城曳弓车塞门焚以战贼方解去自是二十五日间贼四面攻围矢石如雨昼夜不息城中死者可藉人心危惴或夜缒出掇蔬本供御帝与城相泣泚方据乾陵下瞰城翠翟黄袍左右宦人趋走宴赐拜舞又纵慢词戏斥天子以为胜在顷刻使骑环驰招降公卿士庶妄言不识天命帝召城授诰敕千余自御史大夫实封五百户而下募突将死士当贼赐城御笔使量功署诏不足则署衣以授因曰朕与公诀矣城俯伏呜咽会贼造云梁广数十丈载数千人施大轮冒以毡革周布水囊驱民运土塞隍城与防城使侯仲庄揣云梁所道掘大隧积马矢及薪燃之时王师乘城者皆冻馁兵暨甲敝但以忠义感率使当贼羣臣号天以祷城中流矢自拔去血战愈厉云梁及隧而陷风反悉焚贼皆死举城欢噪是日授城二子官第赏将校会李怀光奔难贼乃去怀光反帝如山南城以诸军卫入谷口追骑至击却之迁尚书左仆射同平章事兼灵盐丰夏定远西域天德永平军节度朔方邠宁振武等道奉天行营副元帅帝临轩授钺用汉拜韩信故事乃率诸军趋京师贼将韩旻屯武功来拒城率吐蕃论莽罗兵破之武亭川斩首万级遂赴奉天应接李晟以抗京城西面晟自东渭桥破贼城以西军收咸阳进屯延秋门泚平论功兼侍中封楼烦郡王帝还宫授河中绛慈隰节度使改封咸宁郡王讨李怀光加朔方同陕虢行营副元帅河中平加检校司空赐大宁里甲第女乐与李晟钧礼吐蕃尚结赞请盟诏城为会盟使盟于平凉被刦副使崔汉衡以下皆?惟城独得免贞元四年吐蕃入泾邠授邠宁庆副元帅十二年进检校司徒兼中书令十五年卒年六十四赠太师谥忠武城好书通春秋汉书史记慕司马迁自序着行纪一篇词不矜大天性忠谨功虽高而志益下岁时贡奉必躬亲閱视每有赐予下拜跪受若在帝前时论方之金日磾贞元後天子常恐藩镇生事稍桀骜则姑息之惟城有所论奏不尽从可辄私喜曰上不疑我矣故帝始终信待常持军猜间不能入

论曰浑瑊贤将也功烈可嘉其学问不可及也最爱其忠诚谨慎贡奉受赐若在帝前论奏不从独喜见信功愈高而志益下此岂武夫勲人能之乎为将者诚不可不知学哉

李抱真

李抱真字太玄河西安兴贵之裔也从兄抱玉有战功耻与禄山同族赐姓李氏因徙籍京兆代宗朝封凉国公历官三节度三副元帅位望隆赫为将臣之良抱真沉虑有断兄帅泽潞时属以军事授汾州别驾仆固怀恩反挺身归朝帝方忧怀恩兵精又倚回纥召问破贼状抱真对曰郭子仪尝领朔方军人多德之怀恩欺其下言子仪为朝恩所杀故衆信而为之用今若

起子仪使将兵是伐其谋可不战解也帝从之果如抱真所料迁殿中少监充陈郑泽潞节度留後抱真因言百姓劳逸在牧守愿得一州以自试更授泽州刺史兼节度副使凡八年抱真揣山东有变泽潞当要冲乃籍户三丁择一蠲其徭租给弓矢令间月得曹偶习射岁终大校亲按籍第能否赏责比三年皆为精兵举所部得成卒二万既不廩于官而府库实故天下称昭义步兵为诸军冠德宗即位领昭义节度使田悦反围邢及临洛诏抱真与河东马燧合神策兵救之败悦于双冈斩其将杨朝光遂解临洛邢之围复与悦战洹水进围魏悦战城下复大败之进尚书右仆射会朱滔王武俊反救悦又闻德宗狩奉天抱真与燧乃各引麾下还屯于时李希烈汴李纳反郢怀光相次反河中抱真独以数州截然横絶叛乱中离阻其奸为羣盗所惮兴元初同平章事封义阳郡王滔悉幽蓟兵与回纥围贝州以应朱泚而希烈既僭号则欲臣制诸叛于是衆稍离心适天子下罪已诏并赦羣盗抱真乃遣客贾林以大义说王武俊使合从击滔武俊许诺而心尚犹豫抱真以数骑诣武俊营命行军司马卢玄卿勒兵以俟曰今日之举系天下安危若其不还领军事以听朝命惟子厉兵东向雪吾之耻亦惟子言终遂行见武俊叙国家祸难天子播迁持武俊哭且曰泚希烈争窃帝号滔攻贝州此其志皆欲自肆于天下足下奈何舍九叶天子而臣反贼涕下交颐武俊亦悲不自胜左右皆掩泣莫能仰视抱真遂与武俊约为兄弟誓同灭贼退入武俊帐中酣卧者久之武俊感其至诚乃指心誓天曰此身已许十兄死矣食讫而别旦日合战大破滔进检校司空实封六百户抱真喜士闻世贤者必欲与之游虽小善皆卑词厚币数千里邀致之至无可録徐徐以礼谢遣晚年好方士饵丹丸卒年六十二

论曰纲目书李抱真会王武俊于南宫幸之也幸抱真忘身徇义此一会关天下安危故书之也披肝沥胆慷慨激切之情状千载下如将见之其劝代宗起子仪辞留後试牧守策山东将变练民为兵一生好士皆识高志远岂他藩镇所可同日语哉

杜黄裳

杜黄裳字遵素京兆万年人也登进士宏辞二科郭子仪辟为朔方从事子仪入朝使主留事李怀光与监军陰谋代子仪伪为诏书欲诛大将温儒雅等黄裳得诏辨其非以质怀光怀光流汗服罪于时诸将狼骄难制者黄裳皆以子仪令易置衆不敢乱入为侍御史裴延龄恶之十期不迁贞元末拜太子宾客顺宗立迁太常卿时王叔文用事黄裳未尝一造其门以壻韦执谊辅政劝令率百官请太子监国执谊曰丈人始得一官便可开口议禁密事勃然怒曰黄裳受恩三朝岂可以一官见卖拂衣出及太子总军国事擢门下侍郎同平章事以夏绥银节度使韩全义憊佞无功奏罢之宪宗欲讨刘辟议者多言蜀险固不宜生事黄裳独曰辟狂慝书生取之如拾芥耳神策军使高崇文勇略可用愿陛下专以军事委之勿置监军辟必擒帝从之时名臣宿将各自谓当征蜀之选及诏用崇文皆大惊凡兵进退自战伐以及成功黄裳自中指授无不切中机宜辟既擒羣臣入贺宪宗目黄裳曰卿之功也始德宗创艾多难务姑息每藩镇物故遣中人伺其军所欲立者故大将私金币结左右以求节制方镇选不出朝廷黄裳言陛下宜鉴贞元之弊整法度脔损诸侯则天下治帝尝问前古帝王所以治乱黄裳知帝鋭于治恐不得其要因推言王者之道在修己任贤而已舜举十六相去四凶未尝劳神疲体而万世称之秦始皇程石决事见嗤後代魏明帝欲按尚书事陈矫不从隋文帝日昃听政

唐太宗笑之故王者择人委任而责其成功信赏信罚孰敢不力帝嘉纳之由是平夏翦齐灭蔡复两河以机秉还宰相纪律张设赫然号中兴皆黄裳启之也元和二年以司空平章事为河中晋绛节度使封邠国公明年卒年七十一谥宣献黄裳达权变有王佐大略性雅澹与物无忤居相位不久未究其才及处外天下常所属意初奏罢韩全义以李演为夏绥节度使全义甥杨惠琳知夏绥留後勒兵拒演命河东天德军合击惠琳传首京师李师古跋扈惮黄裳未敢失礼有干吏寄钱千緡并羶车一乘直千緡使者于宅门候伺累日未敢送适有绿輿自宅出从婢二人青衣縵缕使者闻知为相公夫人遽归以告师古师古折其谋终身不敢改节论曰史称黄裳达权变有王佐大略得之矣乃又言其通馈谢无洁白名则以卒後数年御史劾纳高崇文钱四万五千緡之故也天下焉有王佐之才以振纲饬纪整齐一世为己任而不能律身清白者乎御史不劾于生前而劾于身後其诬可知观于李师古之事而益见焉

裴垪

裴垪字弘中绛州闻喜人也擢进士以贤良方正第一补美原尉藩府交辟皆不就四迁考功员外郎吏部侍郎郑珣瑜委垪校词判研核精密皆称才实元和初召入翰林为学士再迁中书舍人李吉甫始执政谓曰吉甫流落江淮踰十五年一日蒙恩至此思所以报德惟在进贤顾比日人物吾懵不及知君有精鉴悉为我言之垪取笔疏三十余人吉甫以荐于朝天下翕然称得人焉吉甫罢乃拜同平章事帝尝谓之曰以太宗玄宗犹藉辅佐以成其理况朕不及先圣万倍者乎为理之要何先垪对曰先正其心垪始承旨翰林天子新翦蜀乱厉精致治中外机管垪多所参与以小心慎密称帝意既当国请绳不轨课吏治分明淑慝帝每降意顺纳在殿中常呼垪官而不名吐突承璀自东宫得幸恩顾亲渥承间欲有关说帝惮垪诚使勿言岭南节度杨於陵为监军许遂振所诬诏授冗官垪曰以一中人罪藩臣陛下之法安在更授美官严绶守太原政出监军垪劾其懦以李鄴代之王承宗擅袭节度帝欲讨之垪与李绹言河北诸镇联结已久此时形势未可进讨承璀自请往于时泽潞卢从史陰苞逆节内连承宗外请兴师以图身利垪固争不听承璀果无功王师告病从史遣部将王翊元奏事垪诱得其情知从史稔恶可图状比遣再往得其大将乌重胤等要领乃为帝陈从史暴戾无君视承璀若小儿相与往来军中可因其机致之後免兴师之劳帝初惊愕徐乃许之从史果就缚因班师垪奏承璀首谋无功陛下虽拙法人心不厌请流斥以谢天下李绹继奏语并切乃罢所领兵先是天下赋法有三曰上供曰送使曰留州建中初厘定常赋其时物重钱轻後轻重相反民输率一倍其初而所在以留州送使之入又降省估以自润故赋益苛民重困垪奏禁止之一以公估準物观察使得用所治州租调至不足乃取支郡以贍故送使之财悉为上供自是淮江而南民少息矣垪以茂年骤柄用器局峻整持法度虽钜权宿贵造请不敢干以私故颇不为时所悦谏官言得失大抵执政多忌之惟垪獎勵使尽言拾遗独孤郁李正辞严休复三人皆迁及过谢垪垪独让休复曰君异夫二人孜孜献纳者前日进拟上固为疑休复大惭垪为学士时引李绹崔羣与同列及相又擢韦贯之裴度知制诰李夷简御史中丞皆踵躐为辅相其余量材授职皆协人望选任之精前後莫及议者咸谓才与时会故元和之治百度修举朝无幸人五年暴风痹帝怅惜遣使致问药膳进退辄疏闻居三月益痼乃罢为兵部尚书垪之进吉甫所荐也及居中多变更吉甫约束吉甫复用衔之乃徙为太子宾客至卒不加赠刘伯刍表其忠方赠太子太傅

论曰宪宗之朝多贤相杜黄裳李绹裴度三人者忠谋远略振耀今古故能恢中兴之治致削平之功均处其间清谨守法度天子亦敬而惮之尤长于知人孳孳进贤大小之官各称其职可谓裨益弘多矣令天假之年俾得集思兼策以就大猷岂可量哉

李绹

李绹字深之赵郡赞皇人也擢进士宏辞补渭南尉拜监察御史元和二年授翰林学士知制诰李錡诛宪宗将羣取其货绹与裴垪上言錡僭侈诛求六州之人怨入骨髓今元恶传首愿以其财赐本道代贫民租赋帝从之帝尝论太宗玄宗之盛欲庶几其道德风烈何行而致此绹言陛下正身励行尊道德远邪佞进忠直与大臣言敬而信无使小人参焉与贤者游亲而礼无使不肖与焉去官无益于治者则材能出斥宫女之希御者则怨旷消将帅择则士卒勇矣官师公则吏治赖矣法令行而下不违教化笃而俗必迁则可与祖宗合德号称中兴帝曰善即诏绹与崔羣白居易等搜次君臣成败五十种为连屏张于便坐每顾左右作意劝诫吐突承璀请于安国佛寺立圣德碑使绹撰文欲以万缗酬之绹言大人与天地合德非文字所能尽若令可述是美有分限故自尧舜禹汤文武并无建碑之事至秦始皇刻石罍峰扬征伐之功纪巡幸之迹适足为万代讥笑帝悟以百牛曳碑楼倒之绹见浴堂殿帝言谏官多朋党论奏不实欲黜其尤者绹曰此殆非陛下意必有憊人欲壅蔽陛下之聪明也人臣死生系人主喜怒敢发口谏者有几昼度夜思始欲陈十事俄而去五六及将以闻则又惮而削其半故上达者十无二三人主孜孜求谏犹惧不至况罪之乎如此杜天下之口非社稷之福也帝曰非卿言朕不知谏官之难承璀讨王承宗绹当草制固争不可言古无以宦人统师者帝不能夺诏宰相授勅承璀果无功还欲加开府仪同三司绹奏承璀丧师当抵罪反宠以崇秩後有败军之将陛下何以处之又数论宦官横肆言此属不知仁义不分枉直惟利是视得赂则誉跼踖为廉良失意则毁糞黄为贪暴能用倾巧之智构成疑似之端朝夕左右浸润以入之自古宦官败国备载方册陛下岂得不防其渐乎绹自知言切且斥去悉取内署所上疏藁焚以俟命帝果怒绹谢曰陛下处臣以腹心之地若惜身不言乃臣负陛下若犯圣颜忤贵幸因而获罪乃陛下负臣于是帝动容曰卿所言皆人所不能言者疾风知劲草卿当之矣迁司勳郎中进中书舍人学士如故赐金紫帝自择良笏与之乌重胤缚卢从史承璀即牒署留後绹奏泽潞据山东要害今孽竖就擒方收威柄遽以偏将涖本军两河诸镇必谓陛下陷以官爵使逐其帅其肯嘿然哉宜以孟元阳为泽潞而重胤节度三城闻者始服张茂昭举族入覲绹请亟授以官且遣使诏其麾下皆听节度乃拜河中节度使任迪简以帑廩匱竭简罢士之疲老者人情不安绹请斥禁帑绢十万以济事机吴少诚病甚绹言朝廷命将今乃其时有如阻命则决可讨然镇蔡不可并取愿赦承宗趣立蔡功江淮旱帝下赦令有所蠲弛绹与白居易言所贷未广欲令实惠及人不如减其租税官人数广宜简出之诸道横歛以充进奉南方多掠良人卖为奴婢皆宜禁絶上悉从之制下而雨帝尝畋苑中至蓬莱池谓左右曰李绹必谏今可还也其见惮如此後閱月不赐对绹奏曰大臣持禄不敢谏小臣畏罪不敢言管仲以为害霸最甚今臣等饱食不言无履危之患自为计得矣其如圣治何诏明日对三殿白居易因论事言陛下错帝怒欲黜之以语绹绹曰陛下容纳直言故羣臣欲竭诚无隐居易言虽少思志在纳忠陛下今日罪之恐天下各思箝口非所以广聪明昭圣德也帝悦待居易如初时帝未立太子绹奏曰陛下临御四年储闈未立岂所以承宗庙重社稷遂立邓王宁为皇太子帝怪

前代任贤致治今无贤可任绦曰自古无借才异代者惟圣王慎选极其才分不以己能盖覆折节下之则贤者乃出帝曰何由知其贤而任之对曰循其名而验以事所得十七若任官廉辨措事不阿无希望依违之态邪媚愉悦之容此近于贤贤则当任任则当久贤者中立而寡助举其类则不肖者怨杜邪径则怀奸者疾一制度则贵戚毁伤正过失则人君疏忌用贤岂容易哉帝曰卿言得之矣六年罢学士迁户部侍郎帝问户部故有献卿何独无绦曰守土之官厚敛于人以市私恩天下犹共非之况户部所掌皆陛下府库之物乌有羡余若以为献是徙东库物实西库臣不敢踵此弊也帝瞿然悟寻欲相之以承瓘不合先出为淮南监军始拜绦同平章事封高邑男时裴垕已罢绦与李吉甫并相吉甫善逢迎上意而绦鲠直数争论于帝前吉甫尝盛赞天子威德宜及时太平为乐绦曰陛下自视今日何如汉文帝帝曰朕安敢望对曰是时贾谊犹以为厝火积薪之下不可谓安今法令所不及者五十余州西戎内讧接近泾陇烽火屡惊加以水旱时作仓廩空虚正陛下宵衣旰食之时岂得谓之太平遽为乐哉帝悦顾谓左右曰吉甫专为悦媚如李绦真宰相也吉甫言人臣当使君悦臣安不宜强谏绦曰人臣当犯颜苦口指陈得失若君于恶岂得为忠吉甫又言今惠泽已深宜振刑威中外懈惰愿加严以束之绦曰王者之政尚德不尚刑岂可舍成康文景而效始皇父子乎帝曰绦言是也吉甫至中书卧不视事长吁而已绦或久不谏上辄谓之曰岂朕不能容受耶将无事可谏耶论者谓元和之君臣有贞观之风焉元义方媚承瓘得京兆尹绦恶而出之义方因言绦私其同年许季同帝以问绦对曰陛下不以臣愚备位宰相宰相职在量才授任若其人果才虽在兄弟子侄之中犹将用之况同年乎帝曰善田季安死子怀谏请袭节度吉甫议发兵讨之绦以为魏博不必用兵当自归朝廷请蓄威以俟不过数月必有自效于军中未几其军果拥立田兴迁怀谏以魏博听朝命帝大悦吉甫请遣中使宣慰以观其变绦曰不可田兴奉其土地兵众坐待诏命不乘此际推心抚纳结以大恩必待勅使至彼持将士表来请节钺然後与之则是恩出于下将士为重朝廷轻矣帝竟遣宣慰绦固请曰如兴万一不受命即姑息复如向时朝廷恩威得失在此一举时机可惜奈何弃之由是拜兴节度使绦又言魏博不沾王化五十余年一旦挈六州来归剗河朔之腹心倾叛乱之巢穴不有重赏过其所望则无以慰士卒之心使四邻劝慕请发内库钱百五十万缗赐之宦官以为太过绦曰使国家发十五万兵以取六州期年而克之其费岂止百五十万缗已乎帝悦曰朕所以恶衣菲食蓄聚货财者正欲平定四方不然徒贮之府库何益即遣裴度颁赏赐复军民欢声动地成德兖郛使者见之相顾失色叹曰倔强者果何益耶帝患朋党以问绦对曰自古人君最恶者朋党小人揣知故常藉口以激怒上心夫朋党者寻之则无迹言之则可疑以此目之则天下贤人君子无能免者此东汉所以亡也愿陛下深察之王播为盐铁使有月进绦曰比禁天下正赋外不得有他献而播妄名羡余不出禄廩家貲愿悉付有司帝曰善讫绦在位献不入禁中绦尝奏振武天德左右良田可万顷请择能吏开置营田帝即命卢坦经度四年之间开田四千八百顷岁省度支钱二十余万缗帝问凡人举事常病不通于理于过失古人处此有道否绦曰事或过差虽圣哲不免惟天子有谏臣所以救过圣人改过不吝愿陛下以此自处教坊使称密诏闚良家女子及别宅妇人纳禁中京师嚣然吉甫畏不敢谏绦独上疏论之帝曰朕以丹王等无侍者命访闾里以貲致之祇取愿者四人岂知便尔生事乃悉放归俄足疾求免罢为礼部尚书由是复召承瓘于淮南十年出绦为华州刺史承瓘田多在部中主奴扰民绦捕系之会遣五坊使帝戒曰至华宜自戢绦大臣有奏即行法矣入为兵部尚书母丧免後复召入穆宗素游畋绦切谏不纳以疾辞为东都留守宝历初拜尚书左仆射绦伟仪质以直道进退望冠一

时然贤不肖太分故屡为谗邪所中皇甫鏖李逢吉皆恶之文宗立召为太常卿累封赵郡公太和四年南蛮寇蜀诏绛募兵千人往赴不半道蛮已去兵还监军使杨叔元素疾绛遣人迎说军士曰将收募直而还为民士皆怒大噪而入绛不及设备遂遇害年六十七事闻赠司徒谥曰贞绛所论万余言其甥夏侯孜以授蒋偕次为七篇

论曰李绛论事得大体动协机宜其才可为王佐而方正鲠直惓惓以纳忠为己任则魏徵宋璟之流他人何足以及之惜不幸多遇小人吐突承璀皇甫鏖李逢吉不能加害而祸生所忽卒堕杨叔元之计悲夫然绛也知有国而不知有身躬历四朝年近七十此亦非所吝矣

裴度

裴度字中立河东闻喜人也贞元初擢进士第以宏辞补校书郎举贤良方正异等调河陰尉迁监察御史论权幸忤旨贬官元和七年以知制诰宣慰魏博节度田兴为兴陈君臣上下之义兴听之终食不倦请度遍行所部宣布朝命奉法令输赋税累迁至御史中丞宣徽五坊小使方秋閱鷹狗所过暴横苦百姓挠官司厚得饷遗乃去下邳令裴寰才吏也不为礼小使奏寰出慢语帝怒下诏狱论大不敬宰相不能解度奏寰无罪帝愈怒度曰陛下爱百姓何如爱小使今寰以爱百姓加罪可乎帝色霁乃释寰王师讨蔡以度视行营诸军还奏攻取策与帝意合问诸将孰才度言李光顏义而勇当有成功不三日果奏大捷帝叹其知人进兼刑部侍郎王承宗李师道谋缓兵伏盗京师刺宰相武元衡又击度刃三进断鞬刺背裂巾单复伤首度帽墮得不死骆王义持贼大呼贼断义手度坠沟贼意已死因亡去议者请罢度官以安二镇反侧帝怒曰度得全天也若罢之是贼计适行朝纲尽废吾倚度足破二贼矣度亦自以纲纪未张王室凌迟常愧恨无死所自行营归知贼曲折帝益信仗及病创再旬分卫兵护第存候踵路疾愈拜中书侍郎同平章事自是以平贼为己任始德宗多猜忌朝士有相过从者金吾皆伺察以闻宰相至阖门谢宾客度以时多故宜延天下髦英咨筹策乃请还第与士大夫相见诏可会庄宪太后崩为礼仪使帝不听政议置冢宰度以为不宜徇空名稽庶务乃诏百司权听中书门下处可王锬死家奴告锬子稷易父奏未冒留遗献帝留奴仗内遣使者如东都按责其貲度谏曰锬死虽有遗献今因告讐而省其私恐天下将帅闻之有以家为计者帝悟杀二奴还使者于时讨蔡数不利羣臣争请罢兵钱徽萧俛尤力度奏病在腹心不时去且为大患两河亦将视此为逆顺会唐邓节度高霞寓战却他相请赦贼鉤帝意帝曰胜负兵家常势今但论帅臣勇怯兵强弱处置何如耳渠一败便沮成计乎于是左右不能间十二年宰相李逢吉建言饷亿烦匱宜休师度请身督战帝独目度留曰果为朕行乎度俯伏流涕曰臣誓不与贼偕存臣比观元济表势实窘蹙但诸将心不一不并力迫之故未降耳若臣自诣行营诸将恐臣夺其功必争进破贼矣帝然之即以本官兼彰义节度淮西宣慰招讨处置使度以韩弘领都统乃上还招讨以避弘表韩愈等为行军司马入对延英曰主忧臣辱义在必死贼未授首臣无还期帝壮之为流泪度至鄆城劳诸军宣朝廷厚意士奋于勇奏罢中使监军使诸将得专制号令皆大悦战气数倍冬十月李愬用李佑计将袭蔡遣掌书记郑澥白度度大喜曰兵非出奇不胜常侍良图也愬果以雪夜入蔡州缚吴元济度乃建彰义旌节领洄曲降卒万人往抚定之除元济苛禁偶语燃烛酒食馈遗听从民便蔡人始知有生之乐度以蔡牙卒侍帐下或谓不可度笑曰吾为彰义节度使元恶已擒蔡人即吾人也衆闻之皆感泣度

入朝行至鄆城会帝封二剑付监军梁守谦使悉诛贼将度乃复还蔡腾奏申解全宥甚衆策勲进上柱国晋国公复知政事程异皇甫鏌以言财赋进羨余得幸俄至为宰相制下朝野骇愕度三上书极陈其不可帝不听表求自退亦不许度复上疏曰鏌异皆钱谷俗吏巧佞小人一旦为相中外骇笑臣若不退天下谓臣无耻臣若不言天下谓臣负恩今退既不许言又不听臣如烈火焚心衆竊丛体所可惜者淮西荡定河北底宁承宗歛手削地韩弘輿疾讨贼陛下建昇平之业十已八九何忍遽自隳坏使四方解体乎帝以度为朋党弗之省又与崔羣言五坊使杨朝汶暴横妄捕系无辜责息钱诬引至千人帝曰此小事朕自处置且与卿商量东军度曰兵事不理忧止山东中人横暴将乱都下帝不悦退召朝汶责之曰以汝故令吾羞见宰相命诛之而原系者由是京师澄肃初蔡平王承宗惧度遣辩士栢耆胁说乃献德棣二州纳质子又谕程权入覲始判沧景德棣为一镇朝廷命帅承宗势促李师道怙强度劝帝讨之奏令宣武义成武宁横海四节度与田弘正将兵自杨刘渡河直抵郢州师道平河南北三十余州藩镇跋扈垂六十年至是尽遵朝廷约束度乃纂述蔡郢用兵以来帝之忧勤机畧因侍宴献之请付史馆卒为异鏌所构以平章事出为河东节度使穆宗即位进检校司空朱克融王庭湊乱河朔加度镇州行营招讨使时元微之结宦官魏弘简求执政恐度复当国凡度所奏军事多与弘简从中挠之不使有功度上表暴二人过恶以为逆竖构乱震惊山东奸臣作朋挠败国政陛下欲扫荡幽镇先宜肃清朝廷何者河北逆贼只乱山东禁闥奸臣必乱天下是则河朔患小禁闥患大小者臣与诸将必能翦灭大者非陛下觉悟制断无以驱除臣自兵兴以来所陈章疏皆是至切所奉书诏多有参差蒙陛下委付之意不轻遭奸臣抑损之事不少但欲令臣失所使臣无成则天下理乱山东胜负悉不顾矣若朝中奸臣尽去则河朔逆贼不讨自平臣伏读国史知代宗之朝被程元振壅蔽几危社稷当时柳伋乃太常一博士耳犹抗表归臯为国除害今臣所任兼总将相岂可坐视凶邪有愷日月天鉴孔昭照臣肝血但得天下之人知臣不负陛下则臣虽死之日犹生之年表三上帝虽不悦以度大臣不得已罢弘简微之近职俄擢微之宰相以度守司空平章事东都留守谏官叩延英言不可罢度兵摇衆心不听于是交章极论亦不省会中人使幽镇还言军中谓度在朝两河诸侯无不怀畏今居东人人失望帝悟诏度入朝度见帝先谢奉命讨贼无功次陈所以入覲意感慨流涕帝为动容时以度无援且久外为奸憊恨抑虑帝未能明其忠及进见词切气和卓然当天子意在位闻者皆竦武夫贵臣至咨嗟出涕乃拜度守司徒领淮南节度使会昭义监军刘承偕数陵轹节度使刘悟陰与张汶谋缚悟送阙举军譁怒执承偕欲杀悟拘以闻帝问度何以处置度对曰承偕骄纵不法臣所素知陛下必欲收忠义心惟有令悟集将士斩之帝曰太后以为养子卿更思其次度奏请流承偕于远州帝从之是时徐州王智兴逐崔羣诸军盘互河北议者交口请相度乃以本官同平章事而权佞侧目咸谓逢吉善谋可以构度共讽帝自襄阳召逢吉还度居位再閱月果为逢吉所间罢为左仆射帝暴风眩中外不闻问者凡三日度数请到内殿求立太子翼日乃见帝遂立景王为嗣逢吉既代相出度山南西道节度使长庆四年王廷凑屠牛元翼之家敬宗羞惋叹宰辅非人使凶贼炽肆学士韦处厚上疏曰臣闻汲黯在朝淮南寝谋干木处魏诸侯息兵裴度元勲巨德文武兼备若置之岩廊委其参决河北山东必稟朝算陛下当食叹息恨无萧曹今有一裴度尚不能留此冯唐所以谓汉文得颇牧不能用也帝见度奏状无同平章事问何故处厚奏为逢吉所挤于是复兼平章事帝虽幼孺然实注意度中人至度所必丁宁慰安且示召期宝历二年度求入朝逢吉党大惧张权輿作伪謡云绯衣小儿坦其腹天上有口被驱逐又长安城中有六冈横亘如乾象度宅居第五冈权輿上言

度名应图?宅占冈原不召而来其意可见帝虽年少独能察其诬待度益厚留辅政帝将幸东都诸臣切谏不听度奏言国家设立两都本备巡幸但自多难以来宫阙营垒百司廨舍荒圯弗治必假岁月完新然後可行帝悦曰羣臣谏朕不及此如卿言诚有未便因止不行令狐楚为观察使言亳州圣水出饮者疾辄愈度判曰妖由人兴水不自作命所在禁塞朱克融执赐衣中使杨文端诡言所赐滥恶又勾假度支帛三十万匹且助丁匠五千修东都帝患之欲遣重臣宣慰仍索勅使度曰克融无礼已甚殆将亡也譬如猛兽自于山林咆哮跳踉久当自困必不敢辄离巢穴陛下无庸遣宣慰徐赐诏书言中人倨骄待到当自谴春衣不谨方诘有司所上丁匠宜即遣来已诏所在排比供拟如此则贼谋穷矣若欲示含容则云东都宫阙事在有司不假丁匠远来其预借春衣非朕所爱祇是事体不可独给范阳帝曰善不旬日幽州军乱杀克融及二子如度所料帝纵弛日晏坐朝度谏曰还陛下月数临朝人知勤政河朔贼臣皆耸畏近开延英益稀恐万几壅阏夫颐养之道当顺适时候则六气平和万壽可保今方居盛夏谓宜诘旦数坐广加延问漏及己午则炎赫可畏圣躬劳矣帝嘉纳帝为宦寺刘克明等所弑王守澄等讨乱迎立江王是为文宗进阶开府仪同三司实封三百户太和四年数引疾上政事乃诏进司徒平章军国重事牛僧孺李宗闵辅政又出为山南东道节度使八年徙东都留守李训之祸宦官肆戮凡训注宗亚宾客悉收逮无遗度上疏申理全活数十姓时阉竖擅威天子拥虚器缙绅道丧度不复有经济意乃治第东都集贤里沼石林丛岑缭幽胜午桥作别墅具燠馆凉台号绿野堂激波其下度野服萧散与白居易刘禹锡为文章把酒穷昼夜相欢不问人间事而帝知度年虽及神明不衰每大臣自洛来必问度安否开成二年复以本官节度河东固辞老疾帝命谕意曰为朕卧护北门可也度乃之镇三年以病勾还东都拜中书令上已宴羣臣曲江度不赴帝赐诗及御札使者及门而度卒年七十六赠太傅谥文忠帝怪无遗奏敕家人索之得半稿以储贰为请无私言度退然才中人而神观迈爽操守坚正善占对既有功名震四陲使外国者其君长必问度年岁几何状貌孰似天子用否其威誉德业比郭汾阳而用不用常为天下重轻及没之後莫不思其风烈

论曰度始佐宪宗平淮蔡功无与比唐书以为非度破贼之难排羣议任度之为难可谓知言者矣广德以来藩镇跋扈河南北三十余州久非唐家所有自度为相海内肃然遵朝廷约束而憊壬小夫乃不肯使一日安其身于庙堂之上至于穆宗抑又甚焉卢龙成德瀛州相州诸军继乱魏博武宁未几亦失则宰相非其人之故也敬宗有志用度而不永文宗徒事外貌而无实天不佑唐度亦安能如之何哉晚岁优游绿野史氏以浮沉目之不知蔡郢成功鑄异谗构之日度之宜去久矣彼亦自以用舍关天下盛衰故可进可退而终不忍愬然则其忠不可及也

卷二十七

钦定四库全书

史传三编卷二十七

大学士朱轼撰

名臣传十九

唐

李渤

李渤字濬之刻志於学与仲兄涉偕隐庐山白鹿洞後久之徙少室元和初以右拾遗召不拜洛阳令韩愈遗以书曰昔孔子知不可为而为之不已迹接於诸侯之国今可为之时自藏深山牢关而固拒即与仁义者异守矣必审察而谛思之务使合於孔子之道渤善其言始移家东都每朝政有阙失辄附章列上元和九年讨淮西上平贼三术及御戎新録召为著作郎迁右补阙以直忤旨左迁王府谏议参军分司东都十二年上言昔舜禹以匹夫宅四海其烈如彼今以五圣营太平其难如此臣恐羣臣蘊晦术略啓沃未尽使陛下翹然思文武禹汤而不获也宜正六官叙九畴修王制月令崇孝弟敦九族广谏路黜选举复俊造定四民省抑佛老明刑行令治兵御戎愿下宰相公卿大夫议博引海内名儒大开学馆与羣臣参讲据经稽古作制度因上五事一礼乐二食货三刑政四议都五辨讐渤虽在外然志存朝廷表疏凡四十五献擢库部员外郎会皇甫鏐辅政务剥下佐用度而渤适奉诏吊郗士美丧于道上言州县逃亡多其弊始于摊逃人之赋诚由聚斂之臣割下媚上愿诏禁止计不三年人必归农夫农国之本本立而太平可议矣渤既以峭直触要臣意乃谢病归穆宗立召拜考功员外郎岁终校考渤上奏自宰相而下皆升黜之值渤请急冯宿领考功渤议遂废时魏博节度使田弘正表渤为副杜元颖由是劾渤外交方镇出为?州刺史至州奏还信州移税钱二百万免赋米二万石废冗役千六百人丕閱岁移刺江州白鹿洞在江州境渤旧所隐处也乃即洞创台榭环以流水杂植花木为一州胜度支使张平叔方斂天下逋租渤言州田二千顷今旱死者千九百顷若复追逋臣惧天下谓陛下当大旱而责民赋臣上不能奉诏下不忍民穷无所逃死请放归田里有诏蠲责又治湖水筑堤七百步人不病涉入为职方郎中进谏议大夫敬宗晏朝羣臣入合帝久不出至有顿仆者渤见宰相曰昨论晏朝事今益晚是谏官不能移人主意渤请出合待罪会唤仗乃止退即上疏曰陛下不时见羣臣羣臣皆布路跛倚夫跛倚形诸外则忧思结诸内忧倦既积灾衅必生小则为旱为孽大则为兵为乱礼三谏不听则逃之陛下新即位臣至三谏恐危及社稷俄充理匭使建言事大者以闻次白宰相下以移有司有司不当许再纳匭妄欣者加所坐一等以絶冒越诏可时政移近幸纪律荡然渤劾正不顾患通封章无阋日天子虽幼亦感寤擢给事中赐金紫服未几以论宦人益横出为桂管观察使桂有漓

水出海阳山世言秦史禄伐粤凿为漕马援讨徵侧复治以通馈其後江水溃毁渠遂厥浅每转饷役数十户济一艘渤酺浚旧道鄣泄得宜舟楫利焉踰年以病归洛太和中召拜太子宾客卒年五十九渤孤操自将不苟合于世人咸谓之沽激屡以言斥而幸直不少衰守节者尚之

论曰阳城及渤皆起处士而能以直名城不毛举细故渤则遇事风发此为少异耳白鹿洞之迹自渤倡之至南唐建学于是朱子为之修坠葺废揭五教之目为学之序及修身处事接物之要以示学者其高弟继之母荒厥绪是地遂为理学源澜之所自出渤之风流亦因以百世不湮矣

韦处厚

韦处厚字德载京兆万年人也亲没庐墓终丧事继母以孝闻登进士授校书郎举贤良方正异等预修德宗实录改咸阳尉宪宗初擢左补阙进规纳忠言多切直时人莫知也李绹规帝未闻纳谏帝乃言处厚路隋数上疏极忠切由是中外推其慎密历考功员外郎坐与宰相韦贯之善出为开州刺史穆宗以其学有师法召为翰林侍讲学士处厚以帝冲怠不向学偕路隋合并五经孝经论语掇其粹要题为六经法言二十篇上之冀助省览帝称善迁中书舍人张平叔以言利得幸建言官自鬻盐笼天下之财宰相不能诘处厚发十难平叔愧缩事遂寝敬宗初李逢吉党刘栖楚等构李绅欲置之死处厚言绅先朝旧臣就令有过尚当祓瑕洗垢以成三年无改之道况被谗譖比杨炎为元载复讐卢?为刘晏偿怨诸镇多为不平兵连祸结天下骚然陛下目所亲见宁不深念哉绅得免死远窜逢吉怒未解宝历三年赦书不予降官量移处厚复奏逢吉缘绅一人使旷荡之恩不及近岁斥逐之徒非所以示天下帝悟追改其条进学士承旨兵部侍郎时帝畋游无度月视朝不过三四处厚入见自陈有罪当死帝曰何哉对曰臣昔为谏官不能死争使先帝因酒色而损寿于法应诛所以不死者以陛下在春官年十有五可望弼成今皇子方在襁褓臣安敢畏死而不谏帝感其言赐以锦彩然实无能改也王廷凑之乱帝叹宰相不才使奸臣跋扈处厚奏陛下有一裴度而不能用何况其他于是以度为司空同平章事尝奉命于宣州徵鹰鹫及扬益两浙索奇文绫锦皆抗疏不奉诏帝不得已从之帝即位三年以荒淫嬉戏为内侍刘克明等所弑矫诏立绹王悟宦官王守澄等迎江王涵入宫讨赋党尽斩之绹王为乱兵所害守澄等欲号令中外疑所以为词问于处厚处厚言春秋大义灭亲内恶必书以明逆顺正名讨罪何所避讳又问江王践阼之礼处厚曰诘朝当下王教以已平内难布告中外然後羣臣三表劝进以太皇太后令册命即位耳守澄等从其言以裴度摄冢宰百官谒江王于紫宸外庑王素服涕泣明日即位进处厚中书侍郎同平章事封灵昌郡公居位务在济时不为身家计中外补授咸得其宜先是齐抗奏罢诸州别驾凡当授者壅滞京师又元和以来裨将立功得补宫官久伺阙者朱紫淆沓处厚乃置六雄十望十紧等州别驾以处之由是流品澄别帝虽自力机政然骤信轻改浮论易夺与宰相议事已定寻复中变处厚尝独对谏曰陛下不以臣不肖使待罪宰相凡所奏可中辄变易出自上心耶乃示臣不信得于横议耶即臣何名执政裴度元勳旧德寔易直长厚忠实所宜亲信臣乃陛下自擢今言不见听宜先罢退趋下顿首帝矍然曰何至是卿之忠力朕自知之安可遽辞以重吾不德处厚趋出帝复召问所欲言对以近君子远小人始可为治淳复数百言又

言裴度忠可久任帝嘉纳之自大历以来节度使多出禁军大将以倍称之息贷钱以赂中尉动踰亿万至镇则重歛以偿至是处厚与裴度始革其弊中外相贺曰自今债帅鲜矣李同捷叛史宪诚陰怀向背心度待以不疑宪诚遣吏白事处厚召语曰晋公以百口保汝帅于天子我则不然正须所为以邦法从事耳宪诚惧不敢贰卒有功李载义数破沧镇兵每俘执生口皆剝剔之处厚戒諭前後全活数百千人太和二年方奏事暴疾次日卒年五十六赠司空处厚姿状如甚懦者至廷争嶷然不可回夺百僚谒事畏惕未尝敢及以私推择羣材往往弃瑕録善时亦讥其太广性嗜学家书讐正至万卷本名淳避宪宗讳改焉论曰处厚望不及裴度才不及李德裕而鰓亮公明为晚唐一贤相方穆敬时立朝尤难而处厚苦口纳忠不少自替文宗初政清明恭俭励精若出宫人三千放五坊鹰犬省教坊总监冗食千二百余员罢别贮宣索奇日视朝深谈政体待制官屡蒙召问中外咸冀太平因以知处厚匡扶之力不少也文宗时方信任又荐裴度元老同心共事故初政如此此与崔佑甫在德宗初年何异迨处厚卒而李宗闵牛僧孺相裴度不能独立矣驯致甘露之变读史者不能不为之叹也

李德裕

李德裕字文饶吉甫子也卓犖有大节不喜与诸生试有司以补校书郎穆宗即位擢翰林学士凡号令大典册皆更其手累迁至御史中丞雅有入相之望始吉甫相宪宗牛僧孺李宗闵对直言策痛诋当路吉甫欣于帝有司皆得罪遂与为怨而李逢吉亦怨吉甫至是逢吉引僧孺并相出德裕为浙西观察使润州兵素骄倾府库賚之犹不足德裕自检约以留州财贍兵均而不怨南方信禳巫父母疴疾虽其子不敢养德裕择长老諭以慈孝大伦违约者有明法恶俗大变按属州毁淫祠千余所撤山房廋盗者千四百舍敬宗立侈用无度诏浙西上脂盞粧具德裕奏比年蝗旱物力未完本道所存惟留使钱五十万缗率岁经费尚少十三万军用徧急今所须脂盞粧具度用银及金二万余两愿诏宰相议何以俾臣不违诏旨不乏军兴不疲人不歛怨则前勅後诏咸可遵承不报又诏索盘纁縑綾千匹德裕奏言太宗时或献名鹰李大亮谏止赐诏嘉叹玄宗令益州织半臂琵琶扞拨镂牙合子等苏頲不奉诏帝不加罪岂二祖有臣如此今独无之盖有位者蔽而不闻非陛下拒不纳也优诏为停止时帝好游幸狎比羣小听朝简忽德裕上丹宸六箴一曰宵衣讽视朝稀晚也二曰正服讽服御乖异也三曰罢献讽歛求怪也四曰纳海讽侮弃忠言也五曰辨邪讽信任羣小也六曰防微讽伪游轻出也帝虽不能用犹敕韦处厚作诏厚谢其意然为逢吉所排讫不内徙自元和後禁毋度僧徐州王智兴言天子诞月请筑坛度僧以资福因收其利以自入德裕劾智兴为坛泗州愿度者输钱二千自淮而右户三丁男必一男削髮规避徭赋若不禁遏江淮失丁男六十万不为细变诏徐州禁止亳州浮屠诡言有圣水可愈疾南方之人率十户僦一人往汲互相欺誑德裕严勒津逻捕絶之且言昔吴有圣水宋齐有圣火皆本妖祥古人所禁请下观察使令狐楚填塞以絶妄源从之帝方惑佛老祷福祈年奸徒杜景先妄言其师周息元壽数百岁遣宦者至浙西迎之德裕疏言此皆迂怪小术如文成五利者前世天子虽好方士未御其药岂非以宗庙为重乎不听太和三年召拜兵部侍郎裴度荐其材堪宰相而李宗闵以中人助先秉政出德裕为郑滑节度使引僧孺协力罢度政事凡德裕所善悉逐之于是二人权震天下踰年徙剑南西川蜀自南诏入寇一方凋敝德裕至完残奋怯皆有条次建筹边楼按南道山川险要与蛮相入者图之左西道与吐蕃接者图之右其部落衆寡馈运远迤曲折咸具召习边事者

与之指画商订，纖悉情伪必尽知之。乃请甲人于安定，弓人于河中，弩人于浙西。由是器械犀利，率户二百取一人，使习战。贷勿事，缓则农，急则兵。谓之雄边子弟，筑仗义城以制大度，清溪之阻，作御侮城以控荣经，犄角之势，作柔远城以扼西山。吐蕃复印，岷关徙，嵩州治，台登以夺，蛮险于是二边。浸惧，南诏还所俘掠四千人。吐蕃将悉怛谋以维州来降，德裕遣兵据守。且陈出师之利，僧孺居中沮其功。诏德裕以其城及悉怛谋等还吐蕃。吐蕃尽诛之，境上极惨酷。德裕终身以为恨。会监军使王践言入朝，盛言悉怛谋死拒远人，向化帝亦悔之。乃召为兵部尚书，俄拜平章事。未几，宗闵罢，德裕代为中书侍郎。时郑注因王守澄以进，又荐李训。待诏帝欲授以谏官，德裕曰：训小人，咎恶满天下，不宜引置左右。帝曰：人谁无过？当容其改。且逢吉尝言之，对曰：圣贤则有改过。若训天资奸邪，尚何能改？逢吉位宰相而顾爱凶回，亦罪人也。训注皆怨，复召宗闵辅政，出为镇海节度使，再贬袁州长史。未几，宗闵以罪斥，而训注等败。帝悟，乃以德裕为太子宾客，分司东都。开成中，迁淮南节度使。武宗立，复召同平章事。既入谢，即疏辨邪正，专委任。而後朝廷治，请以松柏莛萝为喻。惟正人一心事君，无待于助；邪人必更为党，以相蔽欺。幸以是辨之。又引管仲对齐桓公，所以害霸事，惟知人不能举，举不能任，任而杂以小人，之故也。又曰：先帝于大臣好为形迹，小过皆含容，不言日累月积，以至祸败。兹事大误。愿陛下以为戒。臣等有罪，陛下当面诘之，小过容其俊改，大罪加之诛谴，则君臣之际无疑间矣。上嘉纳之。初，上之立，非宰相杨嗣复、李珣意。仇士良既潜死，知枢密刘弘远、薛季棱又奏遣中使就诛嗣复及珣。杜惊奔马见德裕曰：天子新即位，兹事不宜手滑。德裕乃与同官崔珙、崔郸、陈夷行上奏曰：德宗疑刘晏摇动东宫而杀之，中外咸以为冤。两河不臣者，得以为词。德宗後悔，録其子孙。文宗疑宋申锡交通藩邸，窜谪至死，既而追悔为之出涕。嗣复等若有罪，当先行讯鞫，俟署状着白，诛之未晚。帝命之坐者三。德裕等曰：臣等愿陛下免二人于死，勿使既死而衆以为冤。今未奉圣旨，臣等不敢坐上。乃曰：特为卿等释之。德裕等跃阶舞蹈。帝召升坐，追还二使。二人得免。时帝数出畋游，德裕上言：人君动法于日，故出而视朝，入而燕息。传曰：君就房有常节，惟深察古谊，毋继以夜。侧闻五星失度，恐天以是勤儉戒。诗曰：敬天之渝，不敢驰驱。愿节田游，承天意，寻册拜司空。回鹘挟太和公主所求无厌，遂寇振武。德裕以方略授刘沔、荐石雄，邀击之大破之，于杀狐山夺太和公主以还。进位司徒，黠戛斯遣使来请攻取安西北庭地。德裕以为汉魏相请罢车师，贾捐之请弃珠崖，近狄仁杰亦请弃四镇及安东，皆不欲贪外以耗内，得之无用，遂止。又追论维州事云：维州据高山絶顶，三面临江，在戎卤平川之中，是汉地入兵之路。初，河陇尽没，惟此独存。吐蕃潜以妇人嫁此州门者二十余年，生子长成，窃开垒门，引兵夜入，遂为所陷。号曰无忧城，从此得以并力。西边凭陵，近甸旰食累朝。贞元中，韦臯欲经略河湟，须此城为始。急攻数年，卒不可克。臣到西蜀，空壁来归。南蛮震慑，山西八国皆愿内属，可减八处镇兵，坐收千里旧地。且维州未降前一年，吐蕃犹围鲁州，岂顾盟约？臣受降之初，指天为誓，面许奏闻，各加酬赏。当时不与臣者，望风疾臣。诏执送悉怛谋等，令彼自戮。臣累表陈论，乞垂矜舍。答诏严切，竟令执还，体备三木，繫于竹畚。及将就路，冤叫呜呜。将吏对臣，无不陨泪。蕃帅即以此人戮于汉境之上，恣行残忍，用固携离。至乃擲其婴孩，承以枪槊，絶忠款之路，快凶虐之情。从古以来，未有此事。虽时更一纪，而运属千年，乞追獎忠魂，各加褒赠。乃诏赠悉怛谋右卫将军、泽潞节度，刘从谏死军中立其从子擅留事，以邀节度。廷议以回鹘余烬未灭，复讨泽潞，国力不支。德裕独曰：泽潞事体与河朔三镇不同，泽潞近处腹心，一军素称忠义，如李抱真成立此军，德宗犹不许承袭。敬宗不恤国务，宰相又无远略，刘悟之死，因授从谏使其跋扈，垂死之际，复以兵权付竖子。若又因而授之，则诸镇谁不思效其所为？天子威令不复行矣。帝曰：

卿以何术制之果可克否对曰泽潞所恃者三镇但得镇魏不与之同则彼无能为也若遣重臣往谕王元逵何弘敬以河朔自艰难以来列圣许其传袭已成故事与泽潞不同今将加兵泽潞不欲更出禁军其山东三州委两镇攻之贼平之日将士并加厚赏苟两镇听命则泽潞必破矣上喜曰吾与德裕同之保无後悔命德裕草诏赐元逵弘敬曰泽潞一镇与卿事体不同勿为子孙之谋欲存辅车之势但能显立功效自然福及後昆上曰当如此直告之是也又赐张仲武诏令专御回鹘于是遣御史中丞李回往三镇宣慰弘敬元逵仲武皆具橐键郊迎立道左不敢令人控马让制使先行自兵兴以来未之有也三镇皆奉诏已而元逵兵已出弘敬逗留持两端德裕建遣王宰以陈许精甲假道于魏以伐磁弘敬闻遽勒兵自涉漳取磁潞会横水兵叛入太原逐其帅李石奉裨将杨弁主留事方是时泽潞未下议者颇言兵可罢王宰又言游奕将得泽潞表有意归附德裕言建立奇功实在今日必不可以太原小扰失此事机望即遣使督其进兵必其与举族面缚方可受纳又为相府与宰书言昔王承宗逆命遣子弟奉表入朝宪宗犹未之许今置表于衢路之间游奕不即毁除实恐非是自今更有章表宜即所在焚之惟面缚而来始可容受德裕又上言太原人心从来忠顺止是赏犒不足况千五百人何能为事必不可纵且用兵未罢深虑所在动心望诏李石还赴太原召兵讨乱上皆从之诏王逢留太原守榆社以易定汴兗兵还讨弁又遣中使马元实到太原晓谕且觐之元实受弁赂还于衆中大言相公须蚤与之节德裕曰何故元实曰自牙门至柳子列十五里明光甲若之何取之德裕曰李相以无兵故发横水兵赴榆社弁何能遽致如此之衆乎元实曰召募所致耳德裕曰召募须有货财李相止以欠军士绢一匹故致此乱弁何从得之元实词穷德裕曰纵其有十五里明光甲必须杀此贼因奏弁微贼决不可恕如国力不支宁舍泽潞而讨弁河东兵戍榆社者闻朝廷令客军取太原恐妻孥为所屠灭乃拥监军吕义忠自取太原斩弁献首京师德裕每疾贞元太和间有所讨伐诸道兵出境即仰给度支多迁延以困国力或与贼约令懈守备得一县一屯以报天子故师无大功因请勅诸将令直取州勿攻县故元逵等下邢洛磁而泽潞气索又先是韩全义败于蔡杜叔良败于深皆监军宦人制其权将不得专进退胜则飞章奏捷不胜则归其罪于将凡诏书一日三四下宰相不预又诸道銳兵皆监军取以自卫每督战乘高建旗自表小不胜辄卷旗去大兵随以北德裕之讨回鹘泽潞也请诏书付宰相司乃下监军不得干军要自是号令明壹所向有功未几泽潞将郭谊斩其主以降帝问何以处之德裕曰谊先教乳臭子以反今见主将败复卖主求利不诛无以惩恶帝从之泽潞平策功拜太尉德裕固让不敢当太尉又言赵先臣旧封将传旧封乃改封卫尝与帝从容言朋党之说正人同心共济不可为党大意欲朝廷尊臣下肃而政出宰相深疾朋党故感切言之又尝谓省事不如省官省官不如省吏乃请罢郡县吏凡二千余员衣冠去者皆怨时天下已平德裕当国凡六年方用兵时决策制胜他相莫能与故威名独重于时宣宗即位德裕奉册太极殿帝退谓左右曰向行事近我者非太尉耶顾我毛髮为森竖翼日罢为荆南节度使俄徙东都留守大中元年白敏中令狐綯使仇党李咸斥德裕陰事再贬潮州司马明年又贬为崖州司户参军明年卒年六十三德裕性孤峭明辨有风采善为文章虽至大位犹不去书其谋议援古为质衮衮可喜尝以经纶天下自为武宗知而能任之言从计行是时王室几中兴先是元和後数用兵宰相率不休沐以夜继日至德裕从容裁决虽遽书警奏沛然若无事午漏还第休沐如常帝以诏书处报机急学士不能尽意悉命亲为之泽潞平帝每道其语切于事情而能伐谋也河北三镇每遣使至京师德裕常面谕之曰河朔兵力虽强不能自立须藉朝廷官爵威命以安军情语汝吏与其使大将邀勅使以求官爵何如自奋忠义立

功立事结知明主乎且李载义为国家平沧景及为军中所逐不失作节度使杨志诚遣大将遮勅使马求官及为军中所逐朝廷竟不赦其罪此二人祸福足以观矣由是不敢有异志後除浮屠法僧亡命多奔幽州德裕召邸吏戒曰为我谢张仲武刘从谏招纳亡命今安在也仲武惧以刀授居庸关吏曰僧敢入者斩之时归俗僧尼二十六万人收良田数千万顷又虑朝廷数讨有功或伤于武奏请少息勿损威重愿以兵为戒乃可保其成功帝嘉纳之尝奏言方士赵归真乃敬宗时罪人不宜近左右帝以归真无大过召与语养生术耳对曰小人于利若蛾赴烛向见归真之门车辙满矣帝不听于是挟术诡时者进帝志衰焉所居安邑里第有院号起草亭曰精思每计大事则处其中虽左右侍御不得预不喜饮酒後房无声色娱乐生平所论着多行于世论曰德裕与僧孺宗闵等为水火未免徇爱憎因事贬黜又若崔珙荐柳公权为学士以恩非己出而左迁之恶白居易而沮其为相何德量之不弘也然其才猷事业烺烺炳炳宇宙间有卓然不可磨灭者在浙西能化污俗在西川筹边经济为当世第一不幸佞臣居中沮挠坠震叠怀来之事机维州一弃千载有余恨焉匡勳事宜决策制胜泽潞既平三镇惕息而不敢动仇士良专擅奸滑屏息而求自退藩镇反侧宦寺专恣不知消归何有唐室几于中兴固武宗之英明亦德裕有以佐之也昔人称姚崇为救时相若德裕何多让乎使加以圣贤中正和平之问学其功业且不知所届矣

刘蕡

刘蕡字去华幽州昌平人登宝历进士博学善属文通春秋能言古兴亡事沉健于谋浩然有球世志元和後纪纲弛废宦竖弑逆更二帝不能讨支党握兵横制海内号曰北司蕡常愤嫉之太和二年举贤良方正能直言极谏蕡对策曰臣诚不佞有正国致君之术无位而不得行有犯顔敢谏之心无路而不得达陛下询求过阙咨访嘉谋请披肝胆为陛下别白而重言之谨按春秋元者气之始也春者岁之始也春秋以元加于岁以春加于王明王者当奉若天道以谨其始也又举时以终岁举月以终时虽无事必书首月明王者当承天之道以谨其终也陛下能谨其始又谨其终懋而修之勤而行之安有三代循环之弊百伪滋炽之渐乎臣闻不宜忧而忧者国必衰宜忧而不忧者国必危陛下不以国家存亡社稷安危之策降于清问臣未知果以布衣之臣不足与定计耶或万几之勤有所未至宜忧而不忧乎臣以为陛下所忧者宫闱将变社稷将危天下将倾四海将乱此四者国家已然之兆圣虑宜先及之夫帝业艰难而成之固不可容易而守之太祖肇其基高祖勤其绩太宗定其业玄宗继其明至于陛下二百余载其间圣明相因扰乱继作未有不用贤士近正人而能兴者谨按春秋人君之道在体元以居正继故必书即位所以正其始也终必书地所以正其终也故为君者所发必正言所履必正道所居必正位所近必正人春秋閹弑吴子余祭书其名讥疏远贤士昵刑人有不君之道伏惟陛下思祖宗开国之勤念春秋继故之诫明法度之端杜篡弑之渐远刀锯之残亲骨鯁之直使辅相得以颢其任庶寮得以守其官奈何以?近五六人总天下大政外专上命内窃朝权威摄斧展势倾海内羣臣莫敢指其状天子不得制其心祸稔萧墙奸生帷幄曹节侯览复生今日此宫闱将变也臣谨按春秋定公元年春王不言正月者春秋以为昭公不得正其终则定公不得正其始今忠贤无腹心之寄閹寺专废立之权事与定公无异况太子未立郊祀未修将相之职不归名器之宜不定此社稷将危也臣谨按春秋王札子杀召伯毛伯两下相杀不书此书者重其颢王命也夫天之所授者在命君之所存者在令操其命而失之

者是不君也侵其命而夺之者是不臣也不君不臣此天下所以将倾也臣谨按春秋赵鞅以晋阳之兵叛入于晋书其归者善其能逐君侧之恶以安其君也今威柄陵夷藩臣跋扈有不达人臣大节而首乱者将以安君为名不究春秋之微而称兵者将以逐恶为义则典刑不由天子征伐必自诸侯此海内之将乱也故樊哙排闥而雪涕袁盎当车而抗词京房发愤以殒身窦武不顾而毕命此皆陛下能明知之矣臣谨按春秋狐射姑杀阳处父书襄公杀之者以其君漏言也襄公不能固陰重之机处父所以及残贼之祸故春秋非之夫上漏其情则下不敢尽意上泄其事则下不敢尽言故传有造膝诡词之文易有失身害成之戒今公卿大臣非不欲为陛下言之虑不能用而反泄必嬰其祸适足钳直臣之口而重奸臣之威故徘徊郁塞以须上意感悟然後尽其启沃陛下何不于听朝之余时御便殿召当世贤相老臣访持变扶危之谋求定倾捄乱之术塞陰邪之路屏?狎之臣制侵陵迫胁之心复门户扫除之役则虽不得治其前能治其後不得正其始能正其终可以奉典谟克承丕构臣闻尧禹之为君元凯在下虽微必举四凶在朝虽强必诛至秦二世汉元成不见安危之机不任大臣不亲忠良不远谗佞伏惟陛下察唐虞之所以兴而景行于前鉴秦汉之所以亡而戒惧于後无谓庙堂无贤相庶官无贤士今纲纪未絶典刑犹在人谁不欲致身为王臣致时为昇平陛下何忽而不用耶又有居官非其能左右非其贤恶如四凶诈如赵高奸如恭显陛下何憚而不去耶昔秦之亡也失于强暴汉之亡也失于微弱强暴则奸臣畏死而害上微弱则强臣窃权而震主伏见敬宗不虞亡秦之祸不翦其萌惟陛下深轸亡汉之忧以杜其渐则祖宗之洪业可绍三五之遐轨可追矣臣谨按春秋梁亡不书取者梁自亡也以其思虑昏而耳目塞上出恶政人为寇盗皆不知其所终而自取灭亡也臣闻国君之所以尊重其社稷社稷之所以重存其百姓故治天下者不可不知百姓之情夫百姓者陛下之赤子陛下宜令慈仁者视育之如保傅焉如乳哺焉则人之于上恭之如神明爱之如父母今或不然所亲者贵幸分曹建署补除卒吏召致宾客因其货贿假以声势大者统藩方小者为守牧无清惠之政而有饕餮之害无忠诚之节而有奸欺之罪海内困穷饥寒流散冤痛之声上达于九天下入于九泉鬼神为之怨怒陰阳为之愆错君门万里不得告欣士人无所归化百姓无所归命官乱人贫盗贼并起窃恐陈胜吴广不独兴于秦赤眉黄巾不独生于汉此臣所以为陛下发愤扼腕痛心泣血也臣闻汉元帝即位之初更制七十余事其心甚诚其称甚美然不能择贤而任之以致失其操柄纪纲日紊国祚日衰奸究日强黎元日困陛下即位忧勤兆庶屡降德音四海之内莫不抗首而长息自喜复生于死亡之中也伏惟陛下慎终如始以塞四方之望揭国柄以归于相持兵柄以归于将选清慎之官择仁惠之长敏之以利煦之以和教之以孝慈导之以德义俾万国懽康兆庶苏息即心无不达而行无不孚矣臣闻德以修己则人不劝而自立教以导人则人不教而率从夫立教之方在乎君以明制之臣以忠行之陛下能斥奸邪而不私其左右举贤正而不遗其疏远则化浹朝廷矣爱人而敦本分职而奉法修其身以及于人始于中而成于外则化成天下矣臣愚又谓欲气之和在遂其性以导之纳人于仁壽也夫欲人之仁壽在立制度修教化制度立则财用省赋歛轻而人富矣教化修则争竞息刑罚清而人安矣既富则仁义兴焉既安则壽考至焉仁义之心感于下和平之气感于上故灾害不作休祥荐臻四方底宁万物咸遂矣臣又谓捄灾旱在乎致精诚谨按春秋鲁僖公一年之中三书不雨者以其君有恤人之志也文公三年之中一书不雨者以其君无闵人之心也故僖致诚而旱不害物文无恤闵而变则成灾陛下有闵人之志则无成灾之患矣臣又谓广播殖在乎视食力谨按春秋君人者必时视人之所勤人勤于力则功筑罕人勤于财则贡赋少人勤于食则百事废今财

食与力皆勤矣愿陛下废百事之用以广三时之务则播殖不愆矣臣又谓国廩罕蓄本乎冗食尚繁谨按春秋臧孙辰告余于齐讥其无九年之蓄一年不登而百姓饥臣愿斥游惰之人以笃耕殖省不急之费以赡黎元则廩蓄不乏矣臣又谓吏道多端本乎选用失当取人不尽其材任人不明其要也今陛下之用人求其声而不求其实故人之趋进务其末而不务其本臣愿核考课之实定迁序之制则多端之吏息矣臣又谓豪猾踰检由中外之法殊者以其官禁不一也谨按春秋齐桓公盟诸侯不日而葵丘独以日者美其能宣天子之禁率奉王官之法夫官者五帝三王之所建也法者高祖太宗之所制也法宜画一官宜正名未闻分外官中官之员立南司北司之局或犯禁于南则亡命于北或正刑于外则破律于中法出多门人无所措夏官不知兵籍止于奉朝请六军不主武事止于养阶勲军容合中官之政戎律附内臣之职首一戴武弁疾文吏如仇讐足一蹈军门视农夫如草芥谋不足以翦除奸凶而诈足以抑扬威福勇不足以镇卫社稷而暴足以侵害里闾羁縻藩臣干陵宰辅隳裂王度汨乱朝经张武夫之威上以制君父假天子之命下以御英豪有藏奸观衅之心无仗节死义之谊岂先王经文纬武之旨耶臣愿陛下贯文武之道均兵农之功正贵贱之名一中外之法还军卫之职修省署之官近崇贞观之风远复成周之制自邦畿以刑下国始天子而达诸侯可以制猾奸之强无踰检之患矣昔晁错为汉削诸侯非不知祸之将至忠臣之心壮夫之节苟利社稷死无悔焉臣非不知言发而祸应计行而身戮盖痛社稷之危哀生人之悔岂忍姑息时忌窃陛下下一命之宠哉时第策官冯宿贾餗等咸咨嗟叹服以为过古晁董而畏中官不敢取士人读其词有感慨流涕者谏官御史交章论其直为执政所抑同时被选者裴休李郃杜牧等二十三人皆得优调物论嚣然称屈李郃曰刘蕡下第我辈登科能无颜厚乃上疏曰陛下御正殿求直言臣才志懦弱不能质今古是非使陛下闻未闻之言行未行之事忽忽内思愧羞神明今蕡乃敢空臆尽言指切左右辄引春秋为据汉魏以来无与为比有司以言涉忤不敢上闻万口籍籍叹其忠鲠至于垂泣诚恐忠良道穷纲纪遂绝季汉之乱复兴于今且陛下以直言召天下士虽忤必容虽过必录书于史策千古昭明而蕡以直言副陛下所问近臣衔怒朝野惴息万一变兴非常蕡不幸死天下必曰陛下阴杀讠直结讐海内忠义之士皆惮诛戮人心一摇无以自解况臣所对不及蕡远甚自谓贤良奈人言何乞回臣所授以旌蕡直庶臣逃苟且之惭朝有公正之路顾不美哉帝不纳蕡对後七年果有甘露之难迄于唐季祸不可解节度令狐楚牛僧孺皆表蕡幕府授秘书郎以师礼礼之而宦人深嫉蕡诬以罪贬柳州司户参军卒及昭宗诛韩全海等左拾遗罗衮上言使蕡策早用则杜渐防萌逆节可消宁殷忧多难远及圣世耶帝感悟赠蕡左谏议大夫访子孙授以官云

论曰蕡之忠至矣唐书言仲舒天人三策大槩缓而不切蕡独讥切宦官果若所言刘将无贤于董乎仲舒承文景之余遭时尚盛蕡亲见宪宗敬宗之祸故所言有和缓激烈之不同要易地则皆然耳至称蕡太疎直恐帝漏言而身诵语于廷则蕡当亦笑无以自解然忠臣之心每多直遂彼但知有君与国其身之利害言之行否初不暇计及之也蕡忠诚鲠节彪炳乾坤虽终司户贤于位高而无所建白者远矣独叹宇宙生才甚难如此人而不以匡扶国家君子不能不为唐惜焉

五代周

王朴

王朴字文伯东平人也举进士为校书郎依汉枢密使杨邠邠与王章史弘肇有隙朴知必乱去之东归後隐帝诛权臣邠章弘肇皆见杀三家之客多及而朴以去独免周世宗镇澶州辟掌书记尹开封拜右拾遗为推官及即位迁比部郎中世宗銳意征伐慨然有平一天下之志数问治道命近臣着为君难为臣不易论及平边策各一篇以献朴乃献策曰唐失道而亡吴蜀晋失道而丧幽并必先观所以失之由然後知所以平之术当失之时君暗政乱兵骄民困奸党内炽武夫外横因小致大积微成着今欲取之在乎反唐晋之所为而已进贤退不肖以收其才恩信号令以服其心赏功罚罪以尽其力去奢节用以丰其财时使薄歛以阜其民俟其仓廩实器用备人可用而後举之彼方之民知我政化大行上下同心力强财足人安将和有必取之势则知其情状者愿为间谍知其山川者愿为乡导民心既归天意必从矣攻取之道从易者始当今惟吴易图东至海南至江可挠之地二千里从少备处先挠之备东则挠西备西则挠东彼必奔走以救其敝奔走之间可以知其虚实强弱然後避实击虚避强击弱未须大举且以轻兵扰之南人怯弱闻小有警必悉师以救则民疲而财竭彼竭我利江北诸州将为国家有也既得江北则用彼之民扬我之兵江之南亦不难平之也得江南则桂广巴蜀可传檄而定南方既定则燕地必望风内附惟河东必死之寇不可以恩信诱必须以强兵攻之此可为後图俟天下既平然後伺间一举可擒也今士卒精练甲兵有余羣下畏法诸将用命期年之後可以出师世宗欣然纳之迁谏议大夫知开封府事时羣臣多守常偷安所对少可取者惟学士陶谷窦仪中丞杨昭俭与朴皆言用兵之策世宗伟朴论引与计议天下事无不合遂决意用之显德三年征淮以朴为东京副留守还拜户部侍郎迁枢密使四年再征淮留守京师广新城通道路壮伟雄濶入宋因之朴为人明敏多才智非独当世之务至于陰阳律历之法莫不通焉奉诏校定大历削去近世符天流俗不经之学设通经统三法以岁轨离交朔望周变率策之数步日月五星为钦天历又诏考正雅乐以十二律管互吹难得其真乃依京房为律准以九尺之弦十三依管长短寸分设柱用七声为均乐成而和凡其所为当世无敢难者然人亦莫能加也其後宋兴皆用之不可变至言诸国兴灭次第宋平定四方惟并独後服皆如朴言六年卒年五十四世宗临其丧以玉钺卓地大恻赠侍中

论曰欧阳公谓五代之际君不君臣不臣且勿论臣品之纯疵其朝梁唐夕晋汉不可名为一代之臣者何可胜数欧阳公皆以杂传列之其亦可叹也夫五代之君首推周世宗次唐明宗为之臣者亦首推王朴次则郭崇韬崇韬佐庄宗灭梁为佐命元勲识大体善谏争斥宦寺有古大臣之风然以畏谗而请立刘后其後杀之者即刘后也欲立大功而灭蜀以自固其後祸即起于克蜀庄宗杀之固自取灭亡然人臣之义公尔忘私死生以之私意一萌罔知所届况刘后位在第三而劝立出自大臣非正也故削崇韬而録王朴者以此推而论之梁臣之最着者敬翔李振王彦章也翔振当朱温在藩之时翼成篡窃之事本无足言李振尤险陂无行庄宗入汴即先入朝又不如敬翔一死矣彦章一武人死节之外无闻焉唐臣之最着者则崇韬与周德威安重海也德威战将少瑕疵重海专愎骄恣虽有谏正补益之功然不如崇韬远矣其得祸宜也晋以用桑维翰而兴用景延广而亡维翰始终乎晋者然迹其行事可羞惋者多矣汉臣尤无足称史弘肇畧有微劳然险贼小人与苏逢吉杨邠同死于隐帝之手尤有天道无足惜焉周臣如王峻斗筭小才范质又欠一死惟朴行谊无忝其理国料敌有成算定律历

兴礼乐有太平休风焉方之六朝魏周之间其与苏绰等伦乎

史传三编卷二十七

卷二十八

<史部,传记类,总录之属,史传三编

钦定四库全书

史传三编卷二十八

大学士朱轼撰

名臣传二十

宋

吕蒙正

吕蒙正字圣功河南人太平兴国二年擢进士第一五年拜左补阙知制诰初蒙正父龟图多内宠与妻刘氏不睦并蒙正出之沦蹶窘乏刘誓不复嫁及蒙正登仕迎二亲奉养备至入为翰林学士旋参知政事初入朝堂有朝士指之曰此子亦参政耶同列不能平诘其姓名蒙正遽止之曰若一知其姓名则终身不能忘也李昉罢相以蒙正同平章事蒙正质厚宽简有重望遇事敢言每论时政有未允者必固称不可帝嘉其无隐赵普开国元老蒙正後进同相位普甚推许之先是卢多逊为相其子雍起家即授员外郎後以为常至是蒙正奏曰臣忝甲科及第释褐止授九品京官况天下才能老於岩穴不沾寸禄者多矣今臣男始离襁褓膺此宠命不可乞以臣释褐时官补之乃止授九品京官遂为定制尝入对论及征伐帝曰朕比来征讨盖为民除暴苟好功黷武则天下之人?亡尽矣蒙正曰隋唐数十年中四征辽碣人不堪命炀帝全军?没太宗自运土木攻城卒无所济且治国之要在内修政事则远人来归自致安静帝韪之灯夕设宴蒙正侍帝曰五代之际生灵凋丧当时谓无复太平之日矣朕躬览庶政万事粗理上天之赐致此繁盛乃知理乱在人蒙正避席曰乘輿所在士庶走集故繁盛如此臣尝见都城外不数里饥寒而死者甚衆愿陛下视近以及远苍生之幸也帝变色蒙正侃然复位人皆多其直谅帝欲遣使朔方命中书选才蒙正以名上帝不许他日三问三以其人对帝曰卿何执耶蒙正曰臣非执盖陛下未谅耳臣不敢用媚道以害国事同列悚息帝退谓左右曰蒙正器量我不如卒用所荐果称职景德二年表请归洛陛辞日因言远人宜和弭兵省财古今上策帝嘉纳之真宗封太山过洛幸其第问卿诸子孰可用蒙正曰臣诸子皆不足用从子夷简任颍州推官宰相才也夷简由是见知富弼父富言蒙正客也请令弼入书院事廷评太祝蒙正许之及见惊曰此儿他日名位与吾相似而勲业远过於吾令与诸子同学蒙正初为相张绅知蔡州坐赃免或谗於帝曰绅家富不至此特蒙正贫时勾索不如意今报之耳帝即复绅官蒙正不辨後考课院得绅实状黜之及蒙正再入相太宗谓曰张绅果有赃蒙正亦不谢尝问诸子曰我为相外议如何诸子云大人为相四方无事蛮夷宾服甚善但人言无能

为事权多为同列所夺蒙正曰我有一能善用人耳蒙正夹袋中有册子每四方人谒见必问以人才客去随即疏之悉分门类或有一人而数人称之者必贤也朝廷求贤取之囊中文武百官各称职者以此卒年六十八赠中书令諡文穆

论曰宋自艺祖以及太宗之初师旅亟兴日不暇给朝廷之规未定而践台辅者多周室旧臣恭朝夕惟恐有过所守者簿书之计而已若乃竭忠尽虑以道匡君犯顔数争不欺其志者自蒙正始观其延接人士搜閱俊彦书策貯囊以待敷求斯宰臣之法也

张齐贤

张齐贤曹州冤句人也生三岁值晋乱徙家洛阳孤贫力学有远志慕唐李大亮之为人故字师亮太祖幸西都齐贤以布衣献策马前召至行宫以手画地条陈十事曰下并汾曰富民曰封建曰敦孝曰举贤曰太学曰籍田曰选良吏曰慎刑曰惩奸内四说称旨齐贤坚执以为皆善帝怒命拽出之及还语太宗曰我幸西都惟得一张齐贤耳我不欲爵之异时可使辅汝为相也及太宗立擢进士欲置齐贤高第有司偶失抡选帝不悦一榜尽与京官于是齐贤以大理评事判衡州累迁著作佐郎直史馆改左拾遗车驾北征议者皆言宜速取幽蓟齐贤上言方今海内一家朝野无事若缘边诸砦抚驭得人但使峻垒深沟畜力养锐以逸自处宁我致人此李牧所以用赵也圣人先本而後末安内以养外臣虑羣臣或以纖微之利侵苦穷民以为功能伏望慎择通儒分路采访凡赋歛苛重者改而正之诸州有不便於民者委长吏以闻敢循故常者重置之法以德怀远以惠型民则远人之归可立而待也六年为江南西路转运使以饶信等诸州产铜铁铅锡乃推求前代铸法取饶州永平监所铸以为定式岁铸五十万贯凡用铜八十五万筋铅三十六万筋锡十六万筋诣阙面陈其事敷奏详等议者不能夺先是诸州罪人多錮送阙下路死者十常五六齐贤道逢南剑建昌等州所送索牒视之率非首犯悉伸其冤抑因力言于朝後凡送囚至京请委强明吏虑问不实则罪及原问官属自是江南送罪人者为减大半先是江南诸州民居官地者有地房钱吉州缘江地虽沦没犹纳勾栏地钱编木浮居者名水塲钱齐贤悉论免之初李氏据有江南民户税钱三千以上者户出丁一人黥面自备器甲输官库出即给之日支粮二升名为义军既内附皆放归农至是言者以为此辈久在行伍不乐耕农乞遣使选充军伍并其家属送阙下齐贤上言江南义军例皆良民横遭黥配无所逃避克复之後便放归农久被皇风并皆乐业若逐户搜索不无惊扰不若且仍旧贯齐贤居使职勤究民弊务行宽大江左人思之不忘召拜枢密直学士擢右谏议大夫签书枢密院事雍熙初迁左谏议大夫三年大举北伐代州杨业战没帝访近臣以策齐贤请行授给事中知代州与部署潘美同领缘边兵马是时辽兵自湖口入寇薄城下齐贤选厢军二千誓衆慷慨一以当百辽兵遂却先是约潘美以并师来会战间使为辽人所得齐贤以师期既漏虞美为辽所乘既而东师败绩于君子馆美奉诏不许出战全军还州齐贤得报乃曰贼知美之来而不知美之退乃夜发兵二百人持一帜负一束刍距州城西南三十里列帜然当辽兵遥见以为并师至矣骇而北走齐贤又先伏兵二千於土磴砦掩擊大败之擒其北大王之子一人帐前锡里一人斩数百级获马二千器甲甚衆端拱元年冬拜工部侍郎辽人又自大石路南侵齐贤预简厢兵千人为二部分屯繁峙崞县令曰代西有寇则崞县之师应之代东有寇则繁峙之师应之比接战则郡兵集矣至是果为繁峙兵所败入拜刑部侍郎枢密副使

淳化二年参知政事数月拜平章事齐贤母孙氏年八十余封晋国太夫人每入谒禁中帝叹其福壽有令子多手诏存问加赐与縉紳榮之四年罢相知定州以母老不愿往丁内艰水浆不入口者七日自是日啖粥一器终丧不食酒肉寻知河南府狱有大辟将决齐贤立辨而释之徙知永兴军时合门只候赵赞以言事得幸提点关中刍粮所为多豪横齐贤论列其罪卒抵於法加刑部尚书真宗即位召拜兵部尚书同平章事尝从容言皇王之道而推本其所以然帝曰朕以皇王之道非有迹但庶事适治道则近之矣戚里有讼分财不均者入宫自诉齐贤曰是非台府所能决臣请自治之齐贤坐相府问曰汝非以彼所分财多汝所分少乎曰然命具欸乃召两吏令甲家入乙舍乙家入甲舍货财无得动分书则交易之明日奏闻帝大悦曰朕固知非君莫能定者坐冬至朝会被酒失仪免四年李继迁?清远军命为泾原等州军安抚经畧使齐贤上言清远既?灵武一郡援隔势孤今加讨则不足防遏则有余其计无他蕃部大族首领素与继迁有隙者若能?以官爵诱以货利结之以恩信而激之以利害则山西之蕃部族帐靡不倾心朝廷矣人言灵州斗絕一隅南去镇戎五百余里东去环州仅六七日程欲全军民理须应接为今之计若能增益精兵以合西边屯聚对替之兵从以原渭镇戎之师率山西熟户从东界入严约师期两路交进设若继迁分兵以应敌我则乘势而易攻且奔命道途首尾难卫千里趋利不败则禽臣谓兵锋未交而灵州之围自解然後取灵州军民置砦於萧关武延川险要处以侨寓之如此则蕃汉土人之心有所依赖裁候平宁却归旧贯然後纵蕃汉之兵乘时以为进退成功不难矣时不能用未几灵武果陷十二月拜右仆射坐事责太常卿分司西京景德初起为兵部尚书知青州二年改吏部从东封还复拜右仆射时建玉清昭应宫齐贤言绘画符瑞有损谦德又违奉天之意屡请罢其役三年出判河阳进左仆射五年请老以司空致仕归洛得裴度午桥庄日与亲旧觴咏其间七年卒年七十二赠司徒諡文定齐贤姿仪丰硕议论慷慨有大畧以致君自负留心刑狱多所全活喜提獎寒隲少时家贫父死无以为葬河南县吏为办其事齐贤深德之事以兄礼虽贵不替也仲兄昭度尝授齐贤经及卒表赠光祿寺丞又尝依太子少师李肃家肃死为营葬事岁时祭之赵普尝荐齐贤於太宗未用普即列其前事以为陛下若进齐贤则齐贤他日感恩更过於此帝大悦遂大用之齐贤四践两府九居八座以三公就第康宁福壽时罕其比

论曰齐贤之用兵临敌制胜变化若神虽武夫健将有所不逮及其涖民施政弘清浄务简易去民所疾苦是以所居民乐所去民思何其能也两登政府辄以事罢其亦有未竟其用者欤筹边事千里外若眼见使施行其言裨益不少无同所见者故卒不行古所称才士者齐贤盖其人欤

田锡

田锡字表圣嘉州洪雅人自为布衣有意风化上书阙下请复乡饮藉田礼太平兴国三年进士高等授将作监丞通判宣州累迁左拾遗上疏献军国要机者一朝廷大体者四其畧曰顷岁王师平太原稽功赏者二载愿因郊禋之礼叙平戡之功驾馭戎臣莫此为重此要机也今交州未下老师费财纵使得之如获石田自古圣人不务广疆土惟务广德业声教远被自当来宾臣愿陛下修德以来远何必以蕞尔蛮邦上劳震怒乎此大体之一也今諫官不闻廷争给舍不闻封驳左右史不闻升殿陛记言动御史不敢弹奏中书舍人未尝访以政事集贤院

虽有书籍而无职官秘书省虽有职官而无图籍臣愿陛下择才任人使各司其局职业修举则威仪自严此大体之二也尔者?县平宁京师富庶军营马监靡不恢崇佛寺道宫悉皆轮奂加又辟西苑广御池而尚书省湫隘尤甚郎曹无本局尚书无厅事九寺三监寓天街之两廊贡院就武成王庙是岂太平之制度耶臣愿陛下别修省寺用列职官此大体之三也案狱官令枷杻钳鎖尺寸筋两并载刑书未闻以铁为枷者也昔唐太宗观明堂图见人之五藏皆丽于背遂减徒刑况隆平之时将措刑于不用法之所无去之可矣此大体之四也疏奏优诏褒答赐钱五十万僚友有劝以少晦者锡曰事君之诚惟恐不竭矧天植其性岂为一赏夺耶时赵普当国令有司受羣臣章奏必先白然後闻又令於合门署状锡谓普曰公以元勳当国宜事损检今羣臣书奏先经中书既非尊王之体諫官章疏令合门填状尤弱台宪之风皆不便普引咎厚谢皆罢之六年出为河北转运副使驿书言边要四事一谓动静之机不可不审应动而静则养寇以生奸应静而动则失时以败事今北鄙绎骚皆以居边任者规羊马细利矜捕斩小功贾怨结仇兴戎致寇愿飭将帅慎固封守勿尚小利许通互市俘获蕃口抚而还之务使河朔之民得务农业亭障之地可积军储然後待其乱而取之则克乘其衰而兵之则省力省功倍诚要举也二谓国家务大体求至治则安舍近谋远务则危为君有常道为臣有常职是务大体也上不拒諫下不隐情是求至治也汉武帝躬秉武节登单于之台唐太宗手结雨衣伐辽东之国沙漠穷荒得之何用是舍近谋远劳而无功也在位之臣敢言者少言而见听未必蒙福言而不从方且虞祸欲下不隐情得乎三谓利害相生变易不定兵书曰不能尽知用兵之害者则不能尽知用兵之利盖事有可进而退则害成可退而进则违利可速而缓则利必失可缓而速则害必至可诛而赦则奸宄生心可赦而诛则忠勇解体可赏而罚则害勤劳之功可罚而赏则利僭踰之輩诚不可不审也四谓取舍无惑思虑必精夫孟賁之狐疑不如童子之一得差之毫厘谬以千里自国家图燕以来连兵未解财用不得不耗人心不得不扰愿陛下精思虑决取舍无使旷日持久穷兵极武书奏帝甚嘉之七年徙知相州改右补阙复上章论事明年移睦州睦州旧阻礼教锡下车建孔子祠请入纸国子学印经籍给诸生诏赐以九经睦人由是知学会文明殿灾又上章极言时政转起居舍人还判登闻鼓院兼知制诰加兵部员外郎锡好直諫太宗虽或时不能堪然心益重之端拱二年京畿旱锡言陰阳失和调燮倒置上侵下之职而烛理未尽下知上之失而规过未能帝及宰相皆不悦出知陈州召为工部员外郎复论时政阙失俄诏直集贤院真宗即位迁吏部郎中出使秦陇还连章言陕西数十州苦於灵夏之役生民重困帝为之惻然同知审官院与魏廷式议不协出知泰州将行会彗星见疏请责躬以答天戒帝召见优赐之咸平三年诏近臣举贤良方正翰林学士承旨宋白以锡应诏还朝屡召对言事因奏曰陛下即位以来治天下何道臣愿以皇王之道治之旧有御览但记分门事类无益治道臣请钞略四部别为御览三百六十卷万几之暇日览一卷经岁而毕又采经史要切之言为御屏风十卷置宸座之侧则治乱兴亡之鉴常在目矣帝善其言锡乃先成御览三十卷御屏风五卷上之时京东西淮南水灾遣使賑恤平决狱讼锡言朝廷检勘灾伤乃是虚名施行賑贷亦非实事今灾沴之余盗贼若起适足以貽宵旰之忧而已帝为动容五年再掌银台览天下章奏有言民饥盜起及诏勅不便者悉条奏其事帝以锡得争臣之体即日命兼侍御史每进见帝容色必庄目之曰此吾汲黯也俄擢右諫议大夫史馆修撰连上八疏皆直言时政得失六年冬病卒年六十四遗表劝上以慈俭守位以清净化人居安思危在治思乱真宗召宰相示之且曰朕閱是表多矣非祈泽宗族则希恩子孙未有如锡生死以国家为虑而傲于朕者又谓李沆曰田锡直臣也朝廷少有阙失方

在思慮錫之章奏已至矣若此諫官不可多得天何奪之速乎特贈工部侍郎錄其二子并爲大理評事給俸終喪他日帝幸龍圖閣閱書指一漆函帝親署錄者謂學士陳堯咨曰此田錫疏章也愴然久之錫爲人動必以禮言必以法賢不肖咸慚服之耿介寡合未嘗趨權貴之門居公庭危坐終日無懈容慕魏徵李絳之爲人以盡規獻替爲己任立朝以來章疏五十有二自謂諫臣任職之常言苟獲從幸也豈可藏副本示後以賣直耶悉焚之有咸平集五十卷

論曰宋自開國羣臣言事盡諫諍之道號稱直臣者自錫始也錫事太宗位侍從知無不言爲盧多遜等嫌忌頻歷州郡不盡其能晚遇真宗虛懷納諫動見褒獎拔之庶僚之中三四年間致位卿班旋至大用矣值錫以天年終不然錫之忠直敢言又明習於國家之務其功施未可量也

呂端

呂端字易直幽州安次人初以司門員外郎知成都府爲政清簡會秦王廷美尹開封端充判官太宗征河東廷美將有居留之命端白曰主上栉風沐雨以申吊伐王地處親賢當表率扈從今主留務非所宜也廷美由是懇請從行尋知蔡州有善政出使高麗風折檣舟人大恐端恬然讀書若在齋閣拜右諫議大夫許王元僖尹開封又爲判官王薨有發其陰事者坐裨贊無狀遣御史武元穎內侍王繼恩就鞠於府端方決事二使曰有詔推君端神色自若顧從者曰取?來二使曰何遽至此端曰天子有制問即罪人矣因下堂隨問而答無何爲樞密直學士逾月拜參知政事時趙普在中書曰呂公奏事得嘉賞未嘗喜遇抑挫未嘗懼亦不形於言真台輔之器也時旦暮相端左右或曰端爲人糊塗太宗曰端小事糊塗大事不糊塗會呂蒙正罷即相端焉端爲相持重識大体以清簡爲務同列奏對多有異議惟端罕所建明一日內出手札戒諭自今中書事必經呂端詳酌乃得聞奏保安軍奏獲李繼遷母時寇准居樞密獨召與謀准退端問故准以告端曰何以處之准曰准欲斬之於保安軍北門之外端曰必若此非計之得也愿少緩其事端將覆奏即入奏曰昔項羽得太公欲烹之高祖曰愿分我一杯羹夫舉大事不顧其親况繼遷悖逆之人乎且今日殺繼遷之母繼遷可擒乎徒結怨讐愈堅其叛心耳以臣之愚宜置於延州使善養視之以招來繼遷雖不能即降終可以系其心而母死生之命在我矣太宗抚髀稱善曰微卿几誤我事即用端策其母與繼遷尋俱卒繼遷子竟納款請命端之力也太宗不豫端日與太子問起居及疾大漸內侍王繼恩忌太子英明陰與參政李昌齡殿前指揮使李繼勳知制誥胡旦謀立故楚王元佐太宗崩李皇后使繼恩召端端知有變鎖繼恩於閣內使人守之而入皇后曰宮車已晏駕立嗣以長順也今將何如端曰先帝立太子正爲今日豈可更有異議真宗既即位垂帘引見羣臣端平立殿下不拜請卷帘升殿审视然後降階率羣臣拜呼萬歲繼恩等皆坐貶真宗每見端入對肅然拱揖不以名呼又以端軀體洪大宮庭階阤稍峻特令梓人爲納陛嘗召對便殿訪軍國大事經久之策端陳當世之務皆有条理端器量寬厚多恕意豁如也虽屢經擯退未嘗以得喪介懷兩使絕域其國叹重之後有使往者每問端爲宰相否其名显如此卒年六十六贈司空謚正惠

論曰朱子有言不貪之心一也而一介與千駟捐之有難易之殊不惧之心一也而平地與高台習之有先後之序是知定大事者非小器所能勝任何則成敗之機重而罪責匪輕也當太

宗晏驾事几不测虽有宏才远畧文武兼资者未必能定之俄顷也端决机於始而坚持於後升阶审视然後下拜非器识凝定其孰能之迹其洊历州郡所在着声周旋同列羣而不党小事糊涂岂笃论哉

李沆

李沆字太初洺州肥乡人少好学器度宏远其父炳尝曰此儿异日必至公辅太平兴国五年举进士甲科尝侍曲宴太宗目送之曰沆风范端凝真贵人也累官翰林学士参知政事真宗咸平初以户部侍郎同平章事李继迁久叛有图取朔方之意朝廷困於飞挽中外咸以灵州乃必争之地苟失之则边郡不可保帝以问沆沆曰继迁不死灵州非朝廷有也莫若密召州将使部分军民空垒而归则关右之民息肩矣衆议各异未即从沆言未几灵州陷帝由是益重之沆为相王旦参政以西北用兵或至盱食旦叹曰我辈安得坐致太平优游无事耶沆曰少忧勤足为警戒他日四方宁谧朝廷未必无事後丹和亲旦问何如沆曰善则善矣然边患既息恐人主渐生侈心耳旦未以为然沆又日取四方水旱盗贼奏之旦以为细事不足烦上听沆曰人主年少当使知四方艰难不然血气方刚不留意声色犬马则土木甲兵祷祠之事作矣吾老不及见此参政他日之忧也及旦亲见王钦若丁谓等所为欲谏则业已同之欲去则上遇之厚不忍去乃叹曰李文靖真圣人也沆在相位接宾客常寡言马亮与沆同年生又与其弟维善语维曰外议以大兄为无口匏维乘间达亮语沆曰吾非不知也然今之朝士得升殿言事上封论奏了无壅蔽多下有司皆见之矣邦国大事北有强辽西有叛夏日旰条议所以备御之策非不详究荐绅中如李宗谔赵安仁皆时之英秀与之谈犹不能启发吾意自余通籍之子坐起拜揖尚周章失措即席必自论功最以希宠獎此有何策而与之接语哉苟曲意妄言即世所谓箴吾病未能也为我谢马君沆尝言居重位实无补万分独中外所陈利害一切报罢之惟此少以报国耳朝廷防制纖悉备具或徇所陈请施行一事即所伤多矣寇准与丁谓善屡以谓才荐於沆不用准问之沆曰如斯人者才则才矣顾其为人可使之在人上乎准曰如谓者相公终能抑之使在人下乎沆笑曰他日後悔当思吾言也准後为谓所倾始服沆言真宗尝问治道宜何先沆曰不用浮薄新进喜事之人此最为先问其人曰如梅询曾致尧是也又尝问沆曰人皆有密启卿独无何也对曰臣待罪宰相公事则公言之何用密启夫人臣有密启者非谗即佞臣常恶之岂可效尤真宗尝夜遣使持手诏欲以刘氏为贵妃沆对使者引烛焚诏附奏曰但道臣沆以为不可议遂寝驸马都尉石保吉求为使相帝问沆沆曰赏典之行须有所自保吉因缘戚里无攻战之劳台席之拜恐腾物论他日再三问之执议如初遂止景德元年卒年五十八上哭之恸谓左右曰沆为大臣忠良纯厚始终如一岂意不享遐壽贈太尉中书令謚文靖沆尝读论语或问之沆曰沆为宰相如论语中节用而爱人使民以时尚未能行圣人之言终身诵之可也性直谅内行修谨言无枝叶识大体居位慎密不求声誉动遵条制人莫能干以私公退终日危坐未尝跛倚治第封邱门内厅事前仅容旋马或言其太隘沆笑曰居第当传子孙此为宰相厅事诚隘为太祝奉礼厅事已宽矣至於垣颓壁损不以屑虑沆与诸弟友爱尤器重维暇日相对宴饮清言未尝及朝政亦不及家事沆没後或荐梅询可用真宗曰李沆尝言其非君子其信倚如此

论曰真宗之朝多贤相最为世所称者沆及王旦寇准是也沆能遏真庙东封西祀之萌而旦

至同其事发於感叹旦能抑丁谓王钦若辈使十年不为宰相而准始受其欺终罹其祸时为之耶抑沆之劲正清苦所以发诚忠而养威重者实有以过人乎殷忧启圣虑远思深力持镇静以与黎元休息培国家元气者厚哉

王旦

王旦字子明魏州人也父祐以文章显於汉周之际事太祖太宗为名臣常谕杜重威使无反汉拒卢多逊害赵普之谋以百口保符彦卿无异志世多称其陰德尝手植三槐於庭曰吾子孙必有三公者旦少而好学有文祐甚器之太平兴国五年进士及第通判郑州表请天下建常平仓以塞兼并之路真宗即位拜翰林学士尝奏事退日送之曰为朕致太平者必斯人也咸平四年拜参知政事契丹犯边旦从幸澶州而东都留守元份遇暴疾帝命旦驰还权留守事旦曰愿宣寇准臣有所陈准至旦曰十日之间未有捷报时当如何帝默然良久曰立皇太子旦至京直入禁中下令毋得传播及驾还旦子弟皆迎於郊忽闻後有驺诃声惊视之乃旦也景德三年拜工部尚书同平章事时西北二边兵罢不用帝以无事治天下旦务行祖宗故事慎所变改帝久益信之言无不聽凡大臣有所请必曰王旦以为何如旦为人寡言笑默坐终日及奏事羣臣异同旦徐一言以定天下大蝗执政或袖死蝗以进曰蝗实死矣请率百官贺旦独不可後数日方奏事飞蝗蔽天帝顾旦曰使百官方贺而蝗如此岂不为天下笑耶宫禁灾旦驰入帝曰两朝所积一朝殆尽可惜也旦曰陛下富有天下财帛不足忧所虑者政令赏罚之不当耳臣备位宰府天灾如此当罢免连上表待罪帝乃下诏罪已许中外上封事言得失後有言实荣王宫火所延者置狱劾当坐死百余人旦独请曰陛下降诏罪已今反归咎於人何以示信且火虽有迹宁知非天譴耶帝欣然聽纳当坐者皆免有日者上书言宫禁事坐诛籍其家得朝士所与往还占问吉凶之说帝欲付御史问状旦曰此人之常情且语不及朝廷不足罪帝怒不解旦因自取尝所占问之书进之曰臣少贱时不免为此必以为罪愿并臣付狱帝曰此事已发何可免旦曰臣为宰相执国法岂可自为之幸於不发而以罪人帝意解旦至中书悉焚所得书既而帝复悔驰取之已焚矣由是皆免及帝将东封契丹请於岁给外别给钱币旦曰东封甚近车驾将出彼以此探朝廷耳乃于岁给银绢内各借三万谕以次年额内除之次年复下有司契丹所借事属微末今仍依常数与之後不为例契丹大慙赵德明言民饥求粮百万斛帝以问旦旦请敕有司具粟百万于京师而诏德明来取德明得诏慙且拜曰朝廷有人旦任事久人有谤之者辄引咎不辨至人有过失虽人主盛怒可辨者辨之必得而後已旦专称寇准而准数短旦帝以语旦旦曰理固当然臣在相位久阙失必多准对陛下无所隐益见其忠直此臣所以重准也帝以是愈贤旦中书有事送密院违诏格准在密院以闻旦被责第拜谢堂吏皆见罚不踰月密院有事送中书亦违诏格堂吏欣然呈旦旦令送还密院准大慙及准罢枢密使托人求为使相旦惊曰将相之任岂可求耶已而除准武胜军节度使同平章事准入谢曰非陛下知臣安能至此帝具道旦所以荐准者准始愧叹以为不可及准在镇服用僭侈为人所奏帝怒曰寇准每事辄欲效朕可乎旦徐对曰准诚贤能无如駭何帝意解曰然此正是駭耳遂不问翰林学士陈彭年尝诣政府呈科場条贯旦投之地曰内翰得官几日乃欲隔截天下进士耶彭年惶惧而退其後彭年再来旦不见既而同官向敏中为呈所留文字旦瞋目取纸封之曾不一览曰不过兴建符瑞图进取耳帝尝示两府喜雨诗旦袖归见有一字误写将入奏正王钦若止之已而密奏之帝愠诘旦曰诗有误字何

不来奏旦但拜谢诸臣皆拜惟马知节不拜具以实奏且曰王旦畧不辨真宰相器也帝顾旦而笑焉帝欲相钦若旦曰钦若遭逢陛下恩礼已隆且乞留之枢密帝遂止及旦没後钦若始大用语人曰为王公迟我十年作相钦若与陈尧叟马知节同在枢府因奏事忿争帝大怒命付狱旦从容曰钦若恃陛下厚顾上烦谴诤当行朝典然观天颜不怡愿且还内来日取旨明日召旦问之旦曰钦若等当黜未知坐以何罪帝曰坐忿争无礼旦曰陛下临驭天下使大臣坐忿争无礼之罪或闻外国恐无以威远帝曰卿意如何旦曰愿至中书召钦若等宣示陛下含容之意且戒约之俟少间罢之未晚也帝曰非卿言朕固难忍後月余钦若等皆罢旦尝与杨亿评品人物亿曰丁谓久远当何如旦曰才则才矣语道则未他日在上位使有德者助之庶得终吉若独当权必为身累後皆如言内臣刘承规得幸病且死求为节度使帝语旦曰承规待此以瞑目旦执不可曰他日将有求为枢密使者奈何遂止旦为相宾客满堂无敢以私请察可与言及素知名者召与语询访四方利病或使疏其言而献之观才之所长密籍其名其人复来不见也每有差除先密疏三四人姓名以请所用者帝以笔点之同列不知争有所用惟旦所用奏入无不可丁谓以是数毁旦帝益厚之故参政李穆子行简以将作监丞家居有贤行迁太子中允使者不知其宅帝命问旦人始知行简为旦所荐旦凡所荐其人未尝知旦没後史官修真宗实录得内出奏章始知朝士多旦所荐云谏议大夫张师德两诣旦门不得见意为人所毁以告向敏中为从容明之及议知制诰旦曰可惜张师德敏中问之旦曰师德名家子有士行不意两及吾门状元及第荣进素定但当静以待之耳若复奔竞使无阶而入者当如何也石普知许州不法朝议欲就劾旦曰普武人不明典宪恐恃薄效妄有生事乞召归置狱乃下御史按之一日而狱具议者以为不屈国法而保全武臣真国体也张旻为马军副都指挥使被旨兵下令太峻兵惧欲谋为变帝召二府议之旦曰若罪旻则自今帅臣何以御衆捕谋者则震惊都邑今但擢旻使解兵柄反侧者当自安矣帝从其言以旻为枢副兵果无他帝语左右曰王旦善处大事真宰相也薛奎为江淮发运使辞旦旦无他语但云东南民力竭矣奎退曰真宰相之言也张咏知成都召还以任中正代之言者以为不可帝以问旦对曰非中正不能守咏之规他人往妄有变更矣天禧中疾甚累疏恳辞帝曰朕方以大事托卿而卿疾如此因命皇太子出拜旦惶恐走避太子随而拜之旦言太子盛德必任陛下事因荐可为大臣者十余人其後惟李及凌策不至宰相亦皆为名臣旦复求避位帝覩其形瘁惻然许之寻又命肩輿入禁中帝曰卿万一不讳天下事复谁托旦曰知臣莫若君惟明主择之帝历举有时望者一二人旦不对帝曰试以卿意言之旦强起举笏曰以臣之愚莫如寇准帝曰准刚褊更思其次旦曰他人臣所不知也後岁余竟用准为相旦与杨亿素厚既疾甚延入卧内撰遗表旦授以意曰吾忝为宰辅不可以将尽之言为宗亲求官止叙平生遭遇愿日亲庶政进用贤士而已仍饬子弟当务俭素毋厚葬以累清德表上帝幸其第赐赆甚厚卒时年六十一帝临之恻赠太师諡文正乾兴初配享真宗庙庭旦事寡嫂有礼与弟旭友爱甚笃婚姻婣不求门阀被服质素家人欲以绘锦饰殯席不许服饰过者即令减损有货玉带者弟以呈旦旦命系之曰还见佳否弟曰系之安得自见旦曰自负重而使观者称好无乃劳乎亟命还之平生不置田宅曰子孙当各念自立何必田宅徒使争财为不义耳真宗以其居陋欲治之旦辞以先人旧庐乃止诸子多贤素最知名与欧阳余蔡称庆历四谏

论曰易称天地交而万物通上下交而其志同真宗之於王旦其庶几者乎当是时契丹始讲和好德明亦受约束帝能虚怀恭己以尽羣下之情而旦受不世之知竭诚殫智以忠於上虑

事周密见微知彰是以兵息於外政修於内列庶位者多公卿之?黎民乂安有宋三百年间未有如此盛者也或乃指其不谏东封以为大圭之瑕然旦之功烈远矣

史传三编卷二十八

卷二十九

钦定四库全书

史传三编卷二十九

大学士朱轼撰

名臣传二十一

宋

寇准

寇准字平仲华州人少英迈通春秋三传年十九举进士太宗取人多临轩顾问年少者往往罢去或教准增年答曰准方进取可欺君耶既中第授大理评事知成安县每期会赋役未尝辄出符移惟具乡里姓名揭县门百姓莫敢後期擢右正言直史馆会诏百官言事准极陈利害帝益器重之尝奏事殿中语不合帝怒起准辄引帝衣请复坐决其事然後退帝由是嘉之曰朕得寇准犹唐文皇之得魏徵也淳化二年大旱帝延近臣问得失皆曰天数也准独曰刑罚偏颇天旱为是发耳帝怒起入禁中顷之召准问所以偏颇状准曰愿召两府至臣即言之有诏召两府入准乃言曰顷者祖吉王淮皆侮法受赇吉赃少乃伏诛淮以参政之弟盗主守财至千万止杖仍复其官非不平而何太宗以问准顿首谢即皆罢去暮遂大雨帝喜擢准枢副後坐事贬明年入为参知政事自唐末蕃户有居渭南者温仲舒知秦州驱之渭北立堡栅以限其往来帝览奏不恠曰古羌戎尚杂处伊洛蕃落易动难安一有调发将重困吾关中矣准言唐宋璟不赏边功卒致开元太平疆場之臣邀功以稔祸深可戒也帝因命准使渭北安抚族帐而徙仲舒凤翔时帝在位久冯拯等以乞立储贰斥岭南中外无敢言者准自青州召还入见帝曰卿来何缓朕诸子孰可以付神器者准曰陛下为天下择君谋及妇人中官不可也谋及近臣不可也惟陛下择所以副天下望者帝俛首久之屏左右曰襄王可乎准曰知子莫若父圣虑既以为可愿即决定于是立襄王为太子庙见还京师之人拥道喜跃曰少年天子也帝闻之不恠召准谓曰人心遽属太子置我何地准再拜贺曰此社稷之福也真宗景德元年与毕士安并同平章事时契丹内寇纵游骑掠深祁间小不利辄引去准曰是狃我也请练师命将简骁锐据要害以备之是冬契丹果大入急书一夕凡五至准不发饮笑自如明日同列以闻帝大骇以问准准曰陛下欲了此不过五日耳因请帝幸澶州同列惧欲退准止之令候驾起帝难之欲还内准曰陛下入则臣不得见大事去矣请无还而行也帝乃议亲征召羣臣问方略既而契丹围瀛州直犯贝魏中外震骇参知政事王钦若江南人也请幸金陵陈尧叟蜀人也请幸成都帝以问准准曰谁为陛下画此计者罪可斩也今陛下神武将臣协和大驾亲征贼自当遁去不然出奇以挠其谋坚守以老其师劳逸之势我得胜算矣奈何弃庙社欲幸楚蜀人心崩溃天下可复保耶固请幸澶州及至南城契丹兵方盛衆请驻蹕以觐军

势准曰陛下不过河人心益危敌气未慑非所以取威决胜也且王超领劲兵屯中山以扼其吭李继隆石保吉分大阵以扼其左右肘四方征镇赴援者日至何疑而不进衆议皆惧准力争之不决出遇高琼谓曰太尉受国恩今日有以报乎对曰琼武人愿効死准复入琼随立庭下准厉声曰陛下不以臣言为然盍试问琼等琼即仰奏曰寇准言是准曰机不可失宜趣驾琼即麾卫士进辇帝遂渡河御北门城楼远近望见御盖踊跃懽呼声闻数十里契丹相视惊愕不能成列帝尽以军事委准准承制专决号令明肃士卒喜悦敌数千骑乘胜薄城下诏士卒迎击斩获大半乃引去帝还行宫留准居城上徐使人视准何为准方与杨亿饮博歌謔懽呼帝喜曰准如此吾复何忧相持十余日其统军达兰中流矢死契丹乃奉书请盟准不从使者请益坚帝将许之准欲邀使称臣且献幽州地而帝厌兵有潜准幸兵以自取重者准不得已许之帝遣曹利用如军中议岁币曰百万以下皆可许也准召利用语曰虽有敕旨汝所许过三十万吾斩汝矣利用果以三十万成约而还河北罢兵准之力也帝尝欲用一人为马步军指挥使吏以文籍进准问何也曰例簿也准曰用一牙官尚须检例耶准为相用人不以次同列颇不悦帝之在澶渊也问准曰魏州危急何人可守准曰智将不如福将王钦若福祿未艾宜可用是时契丹未退钦若惊惧不敢辞乃驰入魏及事毕潜准曰陛下知博乎钱输将尽取其余尽出之谓之孤注陛下寇准之孤注也帝顾准遂衰明年罢知陕州天禧元年复拜同平章事三年帝得风疾刘皇后预政准请间曰皇太子人所属望愿陛下思宗社之重传以神器择方正大臣为羽翼丁谓钱惟演佞人也不可以辅少主帝然之准密令翰林学士杨亿草表请太子监国且欲援亿辅政已而谋泄丁谓曹利用以准谋白太后矫诏罢准政事以太常卿知相州三贬雷州司户天圣元年徙衡州司马一日沐浴具朝服束带北面再拜呼左右施卧具就榻而卒准镇大名时北使道由之谓曰相公望重何以不在中书准曰上以朝廷无事北门鑰钥非准不可准为相时丁谓参政会食都堂羹染准须谓起拂之准正色曰身为执政而亲为宰相拂须耶谓由是不悦既贬雷州谓遣中使賫敕往授之以锦囊贮剑於马前准方宴饮衆惶恐不知所为准神色自若使谓之曰朝廷若赐准死愿见敕书中使不得已授之准拜受於庭升阶复宴至暮而罢及谓窜崖州道出雷州准遣人以一蒸羊逆境上闻家僮欲报讐乃杜门使纵博母得出伺谓行远乃罢准少时不修小节爱飞鹰走狗太夫人性严尝不胜怒举□锤投之中足流血由是折节从学及贵母已亡每扞其痕辄哭初为枢密直学士尝赐金帛甚厚乳母泣曰太夫人不幸时家贫求一縑作衾襚不可得岂知今日富贵哉准闻之恸哭尽散金帛生平不蓄财产外奢内俭无声色之娱寝处一青帟二十余年破坏命补葺或举公孙弘事准曰彼诈我诚何伤且用之久不忍弃也卒於雷还葬洛阳过公安民皆迎祭斩竹插地以挂纸钱寻复生笋成林邦人神之因号曰相公竹立庙其旁

论曰准传所载澶渊之役帝已至澶州闻契丹兵盛不欲过河王钦若劝幸金陵陈尧叟劝幸蜀非也初契丹兵至准劝帝幸澶州帝博问羣臣而王钦若陈尧叟等各异说准极陈利害帝乃从之及至南城衆请驻驂以观兵势准与高琼固请渡河史所定本末如此及和议欲成而准固谏曰用臣之策可数百年无兵不然四五十年後又生戎心矣帝曰朕不忍生灵受困遂许之真宗疾时以准与李廸可托大事其知之深如此以性刚褊不大用也非毕士安则准无所施其长若士安者岂在齐鲍叔郑子皮辈之下哉

张咏

张咏字复之濮州鄆城人少负气不拘小节太平兴国五年郡举进士以咏首荐咏以让夙儒张覃是岁登进士乙科以大理评事知崇阳县县民以茶为业咏曰茶利厚官将榷之不若早自异也命拔茶植桑民以为苦其後榷茶他县皆失业而崇阳之桑为绢岁百万匹民富数世累官至银台出知益州时川中李顺作乱招讨使王继恩始收复成都关中馈粮道路不絕咏至府问城中屯兵尚三万人而无半月之食访知盐价素高而廩有余积乃下其估聽民以米易盐民争趋之未踰月得米数十万斛益虽收复余寇尚盛继恩恃功骄恣缓兵不进往往剽夺民财咏悉擒招安司吏数其罪将斩之吏皆股栗求活咏曰汝帅聚兵玩寇皆汝辈为之今能亟白乃帅分兵出可免死吏曰惟公所命咏乃释之继恩即分兵邻州城中兵减半既而诸军请马刍粟咏给以钱继恩诟曰马不食钱给钱何也咏曰今贼党尚多民不敢出君顿兵不讨贼刍粟何由得之继恩惧即出城讨贼咏计军食有二岁备乃奏罢陕西运粮帝喜曰益州日以运粮为请咏至踰月已有二岁备此人何事不能了朕无虑矣咏以顺党皆良民胁从当示恩信许自新揭榜諭之自是首者相踵皆释其罪归田里一日继恩械数十人请行法悉前自首者咏复纵之继恩不悦咏曰李顺胁民为贼今吾化贼为民不亦可乎咏度继恩日横以状闻帝命上官正代之咏激正亲行仍盛为供帐饒之酒酣举盃属军校曰汝曹蒙国厚恩无以塞责此行当直抵寇垒荡平丑类若老师旷日即此地还为尔死所矣正由是决行深入卒大捷再閱月而两川平西川卒刘旰逐其巡檢使韩景裕掠怀安破汉州报至咏方会僚属饮燕如故旰又掠邛蜀将趋益报者愈急咏召上官正曰贼始发不三四日破数郡势方銳不可击气骄迫吾城乃送死耳请出兵北至方井当遇贼破之必矣正行至方井果遇贼一战斩旰首余党尽平兵还有以斩首级求赏者咏曰当奔突交战时岂暇获其首耶此必战後翦来殿直段伦曰公果神明也当时随伦为先锋入贼用命者皆中伤破体咏命悉舁以来先録其功於是军情以赏罚至当相顾懽跃初知益州斩一猾吏吏称无罪咏封判令至市曹读示之既闻断词告市人曰尔辈得好知府矣盖李顺尝有死罪此吏纵之也民间讹言有白头老翁午後食人男女一郡嚣然咏召犀浦谓曰讹言惑衆汝归县访市肆中有大言其事者立解来明日果得之咏戮之於市即日帖然咏曰妖讹之兴沴气乘之妖则有形讹则有声止讹之术在乎识断不在厌胜也蜀不贡士几二十年学校颓废咏察郡人张及李旼张逵皆有学行延獎加礼勉就举後三人登科历美官於是两川学者知劝文风益振咏每断事有情轻法重情重法轻者必为判语读以示之蜀人镂板传布谓之戒民集为政恩威并用蜀民畏而爱之咏以蜀地素狭游手者衆事宁之後生齿日繁稍遇水旱则民必艰食乃按诸邑田税如其价岁折米六万斛至春计口给券俾输元估余之奏为永制行之百十年虽时有灾饉而益民无饥色咏凡有兴作先牒诸县於籍系工匠者具帐申来分为四番役十日满则罢去夏则卯入午中暂歇冬抵暮放各给木札一幘以御寒工徒皆悦咏寢室中张灯炷香通夕宴坐郡楼上鼓番漏水历历分明少差必诘之咏曰鼓角为军中号令号令在前尚不分明余事将如何也有清监善臧否人物凡在荐辟皆方正恬退之士尝谓转运黄虞部曰举人须举好退者好退则廉谨知耻举之忠节愈坚少有败事若奔竞者则能曲事谄媚求人知己举之则矜才好利累及举官故不少矣有诏川陕诸州参用铜铁钱每铜钱一当铁钱十咏言诸州钱有铜铁价轻重不一望依估折纳铜钱公私便之咸平二年以工部侍郎出知杭州属岁歉民多私鬻盐以自给捕获数百人官属请痛惩之咏曰钱塘十万家饥者八九苟不以盐自活一旦蜂起为盗则患深矣俟秋成当仍旧法遂悉宽之有民家子与姊壻讼家财壻言妻父临终此子方三岁命壻掌产有遗书令异日以十之三与子余七与壻咏览之曰汝妻父智人也以子幼故属汝

不然子死汝手矣乃命以七给其子而三给壻人皆服其明断咏之自蜀还也诏以牛冕代之咏曰冕非抚御才其能绥辑乎踰年王均乱逐冕据益州後虽讨平之民尚未宁上以咏治蜀威惠在人复以刑部侍郎知益州蜀民鼓舞相庆如赤子久失父母而复来也咏知民信已易严以宽令下人情懽懽蜀复大治帝谕咏曰卿在蜀朕不复有西顾之忧因诏铸景德大钱于嘉邛州一当小铁钱十民咸便之大中祥符三年以江左旱歉命充昇宣等十州安抚使范延贵为殿直押兵过金陵咏问曰天使来于道曾见好官否延贵曰过萍乡县得一邑宰张希颜咏曰何以知之延贵曰入县境驿传桥道皆完葺田莱垦辟至县则肆无赌博市易不敢諠争夜宿邸中更鼓分明以是知之咏大笑曰希颜固善矣天使亦好官也即日同荐于朝後二人皆为能吏以疾召还恨不得面陈所怀乃抗疏论近年以来虚国家帑藏竭生民膏血以奉无用之土木者皆贼臣丁谓王钦若启上侈心之为也不诛死无以谢天下章三上出知陈州咏自奉甚俭寢室中无侍婢服用之物閭如也知益州日单骑赴任官属惮其严莫敢蓄侍婢咏不欲絶人情遂自买一婢以侍巾栉自此官属稍置姬侍及还阙呼婢父母出资嫁之仍处女也尝曰事君者廉不言贫勤不言苦忠不言己效公不言己能可以事君矣谓李昉曰大小之事皆须用智智犹水也不流则腐又曰临事有三难能见一也见而能行二也当行必果决三也李昉苦店既瘳请谒咏曰子於病中曾得移心法否曰未也咏曰人能於病中移其心如对君父畏之慎之静久自愈守蜀时闻寇准拜相曰寇准真宰相也又曰苍生无福李昉怪而问之咏曰人千言不尽者准一言而尽然仕太早用太速不及学耳张寇布衣交也准兄事咏常面折不少恕虽贵不改准在岐咏自蜀还将别谓准曰曾读霍光传否曰未也准归取传读之至不学无术笑曰此张公谓我矣尝语人曰吾榜中得人最多慎重有雅望无如李文靖深沉有德镇服天下无如王文正面折廷争素有风采无如寇公当方面寄则咏不敢辞卒年七十赠左仆射諡忠定

论曰真宗之时衆正在朝而丁谓王钦若挟其私邪投机抵隙以售其志虽王旦寇准周旋其间与之出入咏独抗疏三上乞斩之以谢天下可谓忠义死节之臣矣咏之公忠直谅明达有远识使施之朝廷其功谋亦不可胜道者试之方隅固可见其概云

李廴

李廴字复古其先赵郡人後家濮州廴深厚有器局尝携所为文见柳开开以公辅奇之出见曰读君文须沐浴乃敢见举进士第一授将作监丞历通判徐兗州累迁右司谏知郢州迁起居舍人安抚江淮以尚书吏部员外郎为三司盐铁副使擢知制诰真宗幸亳州为留守判官遂知亳州亡卒羣剽城邑发兵捕久不得廴至悉罢所发兵陰察知贼区处部落骁銳士擒斩以徇代归会响廝罗叛帝忧关中召对长春殿进右谏议大夫集贤院学士知永兴军城中多无赖子弟喜犯法廴奏取其甚者部送阙下徙陕西都转运使入为翰林学士时仍岁旱蝗国用不给一日归沐忽传诏对内东门帝出三司所上岁出入财用数问何以济廴曰祖宗初置内藏库欲复西北故土及以支凶荒今边无他费陛下用此以佐国用赋敛宽民不劳矣帝曰今当出金帛数万借三司廴曰天子於财无内外愿下诏赐三司以显示德泽何必曰借帝悦又言陛下东封时勅所过毋伐木除道即驿舍或州治为行宫裁令加涂墍而已及幸汾亳土木之役过往时几百倍蝗旱之灾殆天意所以儆陛下也帝深然之他日又召对龙图阁帝谓

廸曰曹玮在秦州屡请益兵未及遣遽辞州事第怯耳谁可代玮者廸对曰玮知唃廝罗欲入寇且闚关中故请益兵为备非怯也且玮有谋略诸将皆非其比何可代陛下重发兵岂非将上玉皇圣号恶兵出宜秋门邪秦之旁郡兵甚多可分兵赴玮帝因问兵有几何对曰臣向在陕西以方寸小册籍兵粮数备调发今犹置佩囊中帝令探取廸曰小黄门取纸笔具疏某处当留兵若干余悉赴塞下帝顾曰真所谓颇牧在禁中矣未久唃廝罗果犯边秦州方出兵帝复召廸问曰玮此举胜乎对曰必胜居数日奏至玮与敌战三都谷果大胜帝问廸何以知玮必胜对曰唃廝罗兵远来使谍者声言以某日下秦州会食以激怒玮玮勒兵不动坐待敌至是以逸待劳也此知其胜帝益重之自是欲大用矣初帝将立章献后廸屡上疏谏以章献起寒微不可母天下章献深衔之天禧中拜给事中参知政事周怀政之诛帝怒甚欲责及太子羣臣莫敢言廸从容奏曰陛下有几子乃欲为此计帝大悟乃独诛怀政等仁宗为皇太子除太子宾客寇准罢帝欲相廸廸固辞一日对滋福殿皇太子出拜曰陛下用宾客为宰相敢以谢帝顾谓廸曰尚可辞耶拜吏部侍郎兼太子少傅同平章事初真宗不豫寇准议皇太子总军国事廸赞其策丁谓以为不便曰即日上体平朝廷何以处此廸曰太子监国非古制耶力争不已于是太子于资善堂听常事他皆听旨准既得罪帝命与小州丁谓辄云与远小州廸言圣旨无远字由是二人不协谓浸擅权至除吏不以闻廸愤语同列曰廸起布衣至宰相有以报国死犹不恨安能附权幸为自安计耶谓益恨之时议二府皆进秩兼东宫官廸以为不可谓又欲引林特为枢密副使廸曰除两府必须面奉圣旨既而帝御长春殿内出制书置榻前谓辅臣曰此卿等兼东宫官制书也廸进曰东宫官属不当增置臣不敢受此命宰相丁谓罔上弄权私林特钱惟演而嫉寇准特子杀人事寝不治准无罪罢斥惟演姻家使预政曹利用冯拯相为朋比臣愿与谓俱罢付御史台劾正帝怒左迁廸户部侍郎谓再对传口诏入中书复视事出廸知郢州及帝临崩惟言寇准李廸可用仁宗即位太后预政以宿憾贬准雷州廸衡州团练副使谓使人逼之或讽谓曰廸若贬死其如士论何谓曰异日诸生记事不过曰天下惜之而已谓贬起为秘书监知舒州累迁工部尚书太后崩复同平章事廸自以受不世之遇尽心辅佐知无不为吕夷简忌之潜短之於上景佑中范讽得罪廸坐姻党罢为刑部尚书历知徐州廸谓人曰廸不自量恃圣主之知自以为宋璟而以吕为姚崇不知其待我乃如是也後以太子太傅致仕庆历四年冬卒年七十七謚文定帝篆其神道曰遗直之碑又改所居乡曰遗直乡廸初贬时宋绶知制诰将草廸责辞请其罪名谓指以春秋无将汉法不道宋受而陰改之及谓贬朱崖宋犹掌词命即为之词曰无将之戒深着于鲁经不道之诛难逃于汉法天下快之子柬之历官少师孙孝基累官光禄卿年才五十父子同致仕士大夫以比二疏云

论曰李廸谳识大体其曰天子于财无内外大哉斯言料曹玮如指掌至先籍兵数预备调遣可谓留心远虑者矣与寇准同谏立章献定太子正色立朝风表棱棱卒与准同为奸邪所忌丁谓知天下惜之而摈之不遗余力小人害正虽公论非所畏也可惧哉

王曾

王曾字孝先青州益都人由乡贡试礼部及廷对皆第一学士刘子仪戏之曰状元试三场一生吃着不尽曾答曰曾平生之志不在温饱当召试学士院宰相寇准奇之特试政事堂授秘

书省著作郎迁右正言知制诰时瑞应?至曾奏曰此诚国家承平所致然愿推而弗居异日或有灾沴可免輿议及後飞蝗旱暵乃亟被擢用焉帝既受符命大建昭应宫曾上疏谏极陈不便者五知审刑院旧违制无故失率坐徒二年曾请须亲被旨乃坐既而有犯者曾以失论帝曰如卿言是无复有违制者曾曰天下至广岂人人尽晓制书如陛下言亦复无有失者帝悟卒从曾议以谏议大夫参知政事罢知应天府民间讹言妖起自京师以南人皆恐曾令夜开里门敢倡言者即捕之卒无妖徙天雄军复参知政事真宗不豫刘皇后讽宰臣丁谓欲临朝中外汹汹无敢言者钱惟演后戚也曾密语惟演曰太子幼非中宫不能立公后之肺腑何不入白皇后太子即位太后辅政岂不为刘氏之福乎若欲称制以取疑天下非惟刘氏之祸亦恐延及公矣惟演大惧入白之其议遂止真宗晏驾曾被命入殿庐草遗诏以明肃皇后辅立皇太子权聽断军国大事丁谓欲去权字曾曰皇帝冲年太后临朝斯已国家否运称权犹足示後且增减制书有法表则之地先欲乱之耶太后既权处分军国事仪式久而未定曾时判礼仪院乃取蔡邕独断所述东汉故事皇帝在左母后在右同殿垂帘中书枢密院以次奏事如仪人心乃定丁谓欲擅权不欲同列与闻机政潜结入内押班雷允恭密请太后降手书云帝朔望见羣臣大事则太后召辅臣决之非大事则令允恭传奏禁中画可乃下学士草制辞允恭先以示谓谓閱訖乃示王曾曾曰两宫异处而柄归宦官祸端兆矣於是允恭恃势专恣而谓权倾中外衆莫敢抗惟曾正色立朝时倚为重谓既擅权因大行贬窜逐李廵於衡州贬寇准於雷州曾不平之曰责太重矣谓熟视曾曰居停主人勿复言恐亦未免耳曾尝以第舍假准故谓云尔曾遂不复争会谓为山陵使允恭为都监判允恭欲移穴山陵上百步司天监邢中和曰恐有石与水允恭曰第移上我入见太后白之允恭方贵横人不敢违后命与山陵使议谓唯唯而已既而改穿上穴果有石石尽水出内侍毛昌达奏之诏两府议遣曾覆视曾还请独对因言谓包藏祸心故令允恭移皇堂於絶地太后大惊命按劾其事遂诛允恭而逐谓谓既去自是两宫垂帘辅臣奏事如曾初议焉是年秋拜中书侍郎同平章事曾以帝初即位宜近师儒即召孙奭冯元更侍经筵曾方严持重每进见言利害事审而中理多所荐拔尤恶侥幸帝问曾曰比臣僚请对多求进者曾对曰惟陛下抑奔竞而崇恬静庶几有难进易退之人矣曾尝詮录古先圣贤事迹凡六十事绘事以献帝嘉纳之王钦若卒帝谓辅臣曰钦若久在政府观其所为真奸邪也曾对曰钦若与丁谓林特陈彭年刘承珪同恶时称五鬼奸邪儼伪诚如圣谕天圣四年六月大雨震雷平地水数尺坏京城民舍溺死者数百人时宰执方晨朝未入有旨放朝曾独附中使奏曰天变甚异乃臣等變理无状岂可退安私室亟请入见陈所以备御之道同列先归者咸愧服焉又传言汴口决水已大至都人恐欲东奔帝以问曾曾曰河决奏未至民间妖言不足信也已而果然陕西转运使置醋务以榷利且请推其法於天下曾言其非便罢之曹利用恶曾班已上常怏怏不悦及利用坐事太后大怒曾为之解太后曰卿言利用强横今何解也曾曰利用素恃恩臣故常以理折之今加以大恶则非臣所知太后意少解卒从轻议始太后受册将御大安殿曾执不可及长宁节上壽止供张便殿太后左右嫺家稍通请谒曾多所裁抑太后滋不悦乃出知青州徙天雄军又改判河南属岁歉里有困积者饥民聚党胁取邻郡以强盗论报死者甚衆曾但重笞而释之远近闻以为法全活者数千人景佑二年复拜平章事封沂国公初吕夷简参知政事事曾甚谨曾力荐为相及曾再入相位夷简下夷简遇事专决曾不能堪论议多异同遂与夷简俱罢宝元元年卒年六十一赠侍中諡文正曾资质端厚在朝廷进止有常处平居寡言笑人莫敢干以私帝之即位也少而太后垂帘专制曾正色危言以立於朝由是宦官近习不敢窥觐而帝德日就太后亦全令

名世推为社稷臣云曾为相门下未尝显拔一人范仲淹乘间讽之曰明扬士类宰相之任也公之盛德独少此耳曾徐曰君不之思耶恩若已出怨使谁当仲淹惘然叹曰真宰相也曾尝言始参大政属王太尉当国每进用朝士必先望实或曰某人才某人贤则曰诚知此人然历官尚浅且俾养望岁久不渝而後擢任则荣途坦然中外允惬故曾执政之日遵行是言而人心皆服再泄大名军民画像事之?丹使往来入境皆云此府王公在焉必沐浴洁服而入在阁下累年杨亿已居内制杨性诙谐凡僚友无不狎侮至曾则曰第四?舍人不敢奉戏李翰林昌武尤叹服尝曰若王舍人可谓不可得而亲疎也曾尝语人曰昔杨文公有言人之操履无如诚实吾每钦服斯言苟执之不渝夷险可以一致韩琦为谏官时曾称之曰近来见章疏非择利则近名须如此纯意于国事乃可耳琦以为荣

论曰曾在政府时值危疑耆臣端士皆被斥远莫与共扶持者独能定仁宗之位正朝廷之仪首锄大奸以安宗庙可谓功无与二矣胡文定尝谓李文靖淡然无欲王沂公俨然不动资学并至皆几于道者世以为知言

杜衍

杜衍字世昌绍兴山陰人总发苦志笃学厉操擢第补扬州观察推官历著作佐郎知平遥县通判晋州知乾州衍聽讼明敏屡决疑狱人以为神其簿书出纳推析毫发终日无倦色至为条目必使吏不得为奸而後已及其施於民者则简而易行在乾州未岁以陈尧咨荐移权凤翔二邦之民争於界上一曰此吾公也汝夺之一曰今我公也汝何有焉俄除太常博士提点河东刑狱按行潞州有诬知州王继昇谋变者衍廉得其冤抵告者罪宁化军守将鞠人死罪不以实衍覆正之迁祠部员外郎移知扬州复辨疑狱法当赏改刑部章献太后察其治状转河东运副陕西运使召为三司户部副使擢天章阁待制会河北乏军资选为都转运使不增赋而用足还授枢密直学士求外以右谏议大夫知天雄军为治谨密不以威刑督下吏民咸惮其清整仁宗亲政召为御史中丞衍言中书枢密古之三事大臣坐而论道者今止只日对前殿何以尽天下之事宜迭召见赐坐便殿以极献可替否又论常平法曰岁有丰凶谷有贵贱豪商大贾乘时贱收水旱之岁则闭籴高价以图厚利而困吾民请量州郡远近户口衆寡严赏罚课官吏出纳无壅增损有宜公籴未充则禁争籴以规利者籴毕而储之则察其以供军为名而假借者州郡阙母钱愿出官帑助之皆见裨益判吏部流内銓选补科格繁长主判不能悉閱吏多受赇出缩为奸衍始视事选者三人争某阙衍以问吏吏受丙赇对曰当与甲乙不能争遂授他阙居数日吏教丙讼甲负某事不当得衍悟召乙问之乙谢曰仆已得他阙不愿争衍不得已与丙笑曰此吾未知銓法尔因命诸曹各具格式科条以白问曰尽乎曰尽矣衍閱视具得其本末曲折令诸吏无得升堂各坐曹聽行文书銓事悉自予夺由是吏不能为奸利数月声动京师改知审官院裁制如判銓时有以赂求官者吏谢不受曰我公有贤名不久见用去矣姑少待之迁尚书工部侍郎知永兴军民有昼亡其妇者为设方略捕立得杀人贼发所埋屍并得所杀他妇人屍二秦人大惊徙并州宝元二年复知永兴军时元昊反方用兵陕西困於科敛吏缘侵渔调发督迫民至破产不能足往往自经投水以死衍语其民曰吾不能免汝然可使汝不劳耳乃为区处计较量物有无贵贱道里远近宽其期会使以次输送由是物不涌贵车牛刍秣宿食来往如平时而吏束手无所施民比他州省费十六七召

还权知开封府远近闻衍名莫敢干以私拜同知枢密院事改枢密副使夏竦上攻守策宰相欲用出师衍曰侥幸成功非万全计争议久之求罢不许出为河东宣抚使拜吏部侍郎枢密使每内降恩泽率寝格不行积诏旨至十数辄纳帝前帝语谏官欧阳修曰外人徒知杜衍封还内降不知凡有求於朕告以杜衍不可而止者更多于所封还也?丹与元昊战黄河外参知政事范仲淹宣抚河东欲以兵自从衍曰二国方交鬪势必不来我兵不可妄出仲淹争议帝前诋衍衍不以为恨後契丹卒不来契丹壻刘三嘏避罪来归辅臣欲厚馆之以诘契丹陰事衍曰中国主信义若违誓纳叛不直在我且三嘏为契丹近亲而逋逃来归其谋身若此尚足与谋国乎纳之何益不如还之乃还三嘏拜同平章事衍好荐引贤士推獎後进一时知名之士多出其门沮止侥幸小人多不悦言者攻范仲淹富弼帝欲罢其政事衍常左右之御史并劾衍壻苏舜欽及所知王益柔因以倾衍罢为尚书左丞出知兖州庆历七年遂以太子少师致仕衍清介不殖私产既退寓南都凡十年第室卑陋才数十楹居之裕如也出入从者十许人乌帽皂履绋袍革带或劝衍为居士服衍曰老而谢事尚可窃高士名耶居家闻时事有不便者则忧形於色闻善人进用则喜曰社稷之福也尝曰孔子称不在其位不谋其政第衍受国恩深退居以来家事一不关心但未能忘国耳善为诗楷书行草皆有法嘉佑元年卒年八十赠司徒兼侍中諡正献遗疏有曰无以久安而忽边防无以既富而轻财用宜早建储副以安人心语不及私衍尝曰今之在上者多撻发下位小节是诚不恕也衍知兖州日州县官有累重而素贫者以公租所得均给之公租不给即继以公帑量其小大咸使自足尚有复侵扰者真贪吏也于义可责又曰衍历知州提转安抚未尝坏一官员其间不职者即委以事使之不暇惰不慎者谕以祸福俾之自新从而迁善者甚衆不必绳以法也其有文学政事殊行絶德者虽不识面未尝不力荐于朝有一善可称一长可录者未尝不随其所能而荐之人有问衍曰公在相位未久而去使苍生不被泽衍曰衍以非才妨贤路得去乃遂素心然独有一恨耳衍平生闻某人之贤可某任某人之才可某用未能悉荐而去此所以为恨也韩琦称衍公心而乐与人善始琦为枢密副使论难一二事衍不乐久而相敬信琦益为之尽心不敢忽君子两贤之论曰汉世以良吏起家後登台辅者多云威名减于治郡时才之难兼也如此衍之发幽摘伏鉤距繆数奸不得隐人服其神又当扰攘之秋加以师旅饥饉而能斟酌条理沛然有余虽古称良吏莫能过也迨至位历台阶谋兼军国是时韩范富等皆以盖世非常之材各抒所见论议纷然而衍以虚公清慎为之弁冕和衷同济退无後言可谓得公辅之体矣宋至仁宗之朝士知廉耻人怀自励几于三代之风所患者兵弱财匱而外寇肆其侵袭也诚得衍之才而用之因权制变精通微密财易足兵易振也语曰士易得而难用岂衍谓耶

卷三十

钦定四库全书

史传三编卷三十

大学士朱轼撰

名臣传二十二

宋

范仲淹

范仲淹字希文苏州吴县人二岁而孤母改适长山朱氏既长知其世家泣辞母去之南都入学舍扫一室昼夜讲诵未尝解衣就寝夜或昏怠辄以水沃面往往饘粥不充日昃始食居五年大通六经之旨爲文章论说必本于仁义举进士第爲广德军司理日抱狱词与太守争是非守盛怒临之不爲屈比去贫止一马鬻之徒步而归徙监楚州粮料院先是迎母归养至楚州以母丧去官晏殊知应天府延掌府学仲淹常宿学中训督学者生徒辐辏尝上宰相书请择郡守举县令斥游惰去冗僭慎选举抚将帅凡万余言王曾见而伟之及晏殊荐一人爲馆职曾谓曰公知范仲淹不荐而荐此人乎殊从之遂除仲淹秘阁校理仲淹泛通六经尤长于易学者多从质问爲执经讲解无所倦每感激论天下事奋不顾身宋代士大夫踔厉尚风节自仲淹倡之天圣七年冬至立仗礼官议请太后受朝天子帅百官献寿于庭仲淹极言其非且曰奉亲于内自有家人礼顾与百官同列北面而朝不可爲後世法晏殊大惧召仲淹责之仲淹正色抗言曰仲淹受公误知常惧不称爲知己羞不意今日更以正论得罪也殊惭无以应顷之又疏请太后还政不报出通判河中府徙陈州时方建太一宫及洪福院市材木陕西仲淹言比者昭应寿宁被火天戒不远今又侈土木破民产非所以顺人心合天意也宜罢修寺观减市木之数以蠲除积负又言恩幸多以内降除官非太平之政事虽不行仁宗以爲忠太后崩召爲右司谏太后遗诏以太妃杨氏爲皇太后参决军国事仲淹上疏曰太后母号也自古无因保育而代立者今一太后崩又立一太后天下且疑陛下不可一日无母后之助矣及帝始亲政言事者多追诋太后时事仲淹又言于帝曰太后受遗先帝调护陛下者十余年宜掩其小故以全大德帝曰此亦朕所不忍闻也遂下诏戒飭中外毋得辄言皇太后垂帘时事後岁大旱蝗江淮京东尤甚仲淹请遣使循行未报因请间曰宫掖中半日不食当如何帝惻然乃命仲淹安抚江淮所至开仓赈乏禁淫祀奏蠲庐舒折役茶江东丁口盐钱且条上救弊十事还以太平州民所食乌昧草进帝乞宣示六宫戚里用抑奢侈郭皇后废仲淹与中丞孔道辅率谏官御史伏合争之不能得明日将留百官揖宰相廷争方至待漏院有旨出知睦州岁余徙苏州州苦水仲淹爲疏五河导太湖注之海兴作未就诏徙明州转运使请留仲淹以毕其役许之卒爲苏人利还判国子监迁吏部员外郎权知开封府吕夷简执政进用者多

出其门仲淹爲百官图以献指其次第曰如此爲序迁如此爲不次如此则公如此则私凡进退近臣超格者不宜全委之宰相夷简不悦他日论建都事仲淹曰洛阳险固而汴爲四战之地太平宜居汴卽有事必居洛阳当渐广储蓄缮宫室帝以问夷简夷简曰此迂濶之论也仲淹乃更爲四论上之一曰帝王好尚二曰选贤任能三曰近名四曰推委大抵讥切时弊夷简大怒由是出知饶州明年夷简罢元昊反召爲天章阁待制知永兴军会夏竦经畧陕西进仲淹龙图阁直学士同韩琦副之夷简再入相帝谕仲淹使释前憾仲淹顿首谢曰臣向所论皆国家事于夷简无憾也因上言关中无备若元昊贼乘虚深入东阻潼关隔两川贡赋则朝廷不得高枕矣爲今之计宜严戒边城实其关内使无虚可乘寇至边城清野不得浪战关中稍实不能深入二三年间彼自困弱此上策也今边城请五路入讨臣恐承平岁久无宿将精兵一旦兴深入之谋国之安危未可知也时延州诸砦多失守仲淹自请行诏兼知延州先是诏分边兵总管领万人軫辖领五千人都监领三千人寇至御之则官卑者先出仲淹曰将不择人以官爲序取败之道也于是大阅州兵得万八千人分六将领之日夜训练量贼衆寡使更出御之夏人闻之相戒曰无以延州爲意今小范老子腹中自有数万甲兵不比大范老子可欺大范谓范雍也仲淹又用种世衡策城青涧以据贼冲大兴营田且听民互市以通有无又以民远输劳苦请建鄜城爲康定军以河中同华中下户税租就输之春夏徙兵就食所省余十之三他所减不与又修承平永平等砦稍招还流亡定堡障通斥候于是羌汉之民相踵归业明年正月诏诸路入讨仲淹以爲塞外方寒我师暴露不如俟春深贼马瘦人饥势爲易制且鄜延密迤灵夏西羌必由之地第当按兵不动稍以恩信招来之不然羌情阻絶臣恐偃兵无期也时韩琦决意进兵乃奏言两路协力尚惧不胜若鄜延以牵制爲名是委泾原军于贼手乞督令同入帝以奏示仲淹仲淹又言臣与琦等皆一心非有怯弱但战者危事一或差失则平定之期转延岁月未见其利琦又遣判官尹洙至庆州与仲淹爲约仲淹曰我军新败士卒气沮不可深入洙曰公于此不及韩公也韩公云大凡用兵置胜败于度外仲淹曰大军一动万命所悬而乃置于度外仲淹不见其可议卒不合及後出兵果败大将任福死之先是元昊归陷将高延德因与仲淹约和仲淹以书谕之值任福败元昊爲答书语极悖慢仲淹对来使焚之大臣以仲淹不当辄通书又不当辄焚降知耀州寻复起爲环庆路经畧招讨使与韩琦龐籍王沿各当一路谓之四镇初元昊阴诱属羌爲助而环庆酋长六百余人约爲乡导仲淹知诸酋反覆不常至部卽奏行边以诏书犒赏诸羌阅其人马爲立条约若讎已和断辄敢私报伤人者罚羊百马二至死者斩负债争讼听告官爲理辄质缚平人者罚羊五十马一贼入界追集不赴随本族每户罚羊二质其首领贼大入老幼入保本砦官爲给食卽不入砦本家罚羊二全族不至质其首领诸羌皆受命自是始爲中国用矣羌人爱之呼爲龙图老子庆之西北马铺砦当後桥川口在贼腹中仲淹欲城之度贼必争密遣子纯佑与蕃将赵明先据其地引兵随之诸将不知所向行至柔远始下号令版筑皆具旬日城成卽大顺城是也大顺既成而白豹金汤贼皆不敢犯环庆自此寇盜稀少仲淹在边纯佑年方冠与衆卒偕处鈎深擿隐得其材否由是任人无失所向有功明珠灭臧劲兵数万泾原欲袭讨之仲淹上言曰二族道险不可攻平时且怀反侧今讨之必与贼表里南入原州西扰镇戎东侵环州边患未艾也若北取细腰葫芦衆泉爲堡障以断贼路则二族安而环州镇戎径道通彻矣其後遂筑细腰葫芦诸砦葛怀敏败于定川怀敏者王沿属将也贼大掠至潘原关中震恐民多窜山谷间琦与籍二路不敢出仲淹率衆六千由邠泾援之帝闻定川之败按图谓左右曰若仲淹出援吾无忧矣及仲淹奏至帝大喜曰吾固知仲淹可用也进枢密直学士右谏议大夫然仲淹兵

至贼已出塞自以无功辞不受命诏不听时已命文彦博经畧泾原而帝以泾原伤痍欲对徙仲淹遣王怀德喻旨仲淹谢曰泾原地重恐臣不足当此路请与韩琦并驻泾州琦兼秦凤臣兼环庆泾原有警合秦凤环庆之兵犄角而进若秦凤环庆有警亦可率泾原之师爲援臣当与琦练兵选将渐复横山以断贼臂不数年间可期平定愿诏龐籍兼领环庆以成首尾之势秦州委文彦博庆州用滕宗谅总之孙沔亦可若办集渭州一武臣足矣帝乃复置陕西路安抚经畧招讨使以仲淹韩琦龐籍分领之使仲淹与琦开府泾州而徙彦博帅秦宗谅帅庆张亢帅渭用仲淹之言也仲淹爲将号令明白爱抚士卒所得赐赉皆以上意分赐诸将使自爲谢诸蕃质子纵其出入无一人逃者蕃酋来见召之卧内与语不疑士勇边实恩化大洽边上谣曰军中有一韩西贼闻之心骨寒军中有一范西贼闻之惊破胆既乃与琦决策谋复宁夏横山元昊遂遣使称臣初西人籍爲乡兵者数万既而黥以爲军惟仲淹所部但刺其手及罢兵独得复爲民其于两路既得熟羌爲用因使守边而徙屯兵就食内地以纾西人馈挽之劳凡所设施既去而人德之後人多守其法而不敢变云召入爲枢密副使旋除参知政事是时帝方锐意太平数问当世事仲淹语人曰上用我至矣事有先後久安之弊非朝夕可革也及帝再赐手诏又开天章阁召二府条对仲淹惶恐乃退而上十事一曰明黜陟二府非有大功大善不迁内外在职须满三年在京百司非选举须满五年乃得磨勘庶几考绩之法二曰抑侥幸罢少卿监以上乾元节恩泽正郎以下若监司边任须在职三年始得荫子大臣不得荐子弟任馆阁职任子之法庶无冗滥三曰精贡举进士诸科请罢糊名法参考履行无玷者以名闻进士先策论後诗赋诸科取兼通经义者赐第以上皆取诏裁余优等免选注官次第人守本科庶可循名以责实四曰择长官委中书枢密院先选转运使提点刑狱大藩知州次委两制三司御史台开封府官诸路监司举知州通判知州通判举知县令限其人数以举主多者从中书选除刺史县令庶可得人五曰均公田外官廩给不均何以责其爲善请使有以自养则不法者可以诛废六曰厚农桑每岁预下诸路风吏民言农田利害堤堰渠塘州县选官治之定劝课之法以兴农利减漕运七曰修武备约府兵法募畿辅强壮爲卫士三时务农一时教战省给贍之费畿辅有成法则诸道皆可举行八曰推恩信赦令有所施行主司稽迟者重置于法别遣使按视其所当行者斯上恩不至废格九曰重命令法度所以示信也请命政事之臣参议可以久行者删去烦冗裁爲制敕行下斯命令不至数更十曰减徭役户口耗少而供亿滋多请省县邑户少者爲镇并使州两县爲一职官白直给以州兵其不应受役者悉归之农斯民无重困之忧天子方信用仲淹悉采用之宜着令者皆以诏书画一颁下独府兵法衆以爲不可而止又建言周制三公分兼六官之职汉以三公分部六卿唐以宰相分判六曹今之中书古天官冢宰也枢密院古夏官司马也四官散于羣有司无三公兼领之重而二府惟进擢差除循资级议赏罚检用条例而已上非三公论道之任下无六卿佐王之职非治法也臣请仿前代以三司司农审官流内铨三班院国子监太常刑部审刑大理羣牧殿前马步军司各委辅臣兼判其事凡官吏黜陟刑法重轻事有利害者并从辅臣予夺其体大者二府合议奏裁章得象等皆以爲不可久之乃命参政贾昌朝领农田仲淹领刑法然卒不果行初仲淹以忤吕夷简放逐者累年及陕西用兵天子以仲淹人望所属拔用之既还朝帝?以爲治中外想望其功业而仲淹以天下爲己任裁削幸滥考核官吏日夜谋虑兴致太平然更张无渐规摹濶大论者以爲不可行及按察使出多所举劾人心不悦自任子之恩杀磨勘之法密侥幸者尤不便之于是谤毁稍行而譖愬之语浸上闻矣会边陲有警因与富弼请行边于是出爲河东陕西宣抚使麟州新罹大寇仲淹爲修故砦招还流亡三千余户蠲其税罢榷酤

予民又奏免府州商税河外遂安是时攻者益急仲淹乃请罢政事以爲陕西四路安抚使知邠州其在中书所施爲多罢而复故以疾请邓州寻徙荆南邓人遮留许之寻徙杭州又徙青州病甚请颍州未至而卒年六十四谥文正仲淹内刚外和泛爱乐善士多出其门下虽里巷之人皆能道其名字爲政尚寛厚所至有恩邠庆二州之民与属羌皆生祠事之及其卒也哭之如父爲参政时患监司不才取班簿视之每见不才者姓名辄笔勾之以次更易富弼曰六丈则是一笔焉知一家哭矣仲淹曰一家哭何如一路哭耶领浙西时岁大饥殍殣枕路仲淹发粟及募民存饷爲术甚备吴人喜竞渡好爲佛事仲淹乃纵民竞渡太守日出宴湖上自春至夏居民空巷出游召诸寺主谕以饥岁工贱劝令兴役于是诸寺工作鼎兴又新廩仓吏舍日役千夫监司劾仲淹不恤荒政仲淹乃条叙所以宴游及兴造皆欲发有余之财以惠贫者贸易饮食工技服力之人仰食于公私者日无虑数万人荒政之施莫此爲大是岁两浙惟杭州晏然民不流徙仲淹尝与吕夷简论人物夷简曰吾见人多矣无有节行者仲淹曰天下固有人但相公不知耳以此意待天下士宜乎节行者之不至也尝曰吾遇夜就寝即自计一日食饮奉养之费及所为之事果相称则鼾鼻熟寐或不然则终夕不能安眠明日必求所以称之者性至孝以母在时方贫後虽贵非宾客不重肉妻子衣食仅能自充而好施予尝戒诸子曰吾贫时与汝母养吾亲汝母躬执?而吾亲甘旨未尝充也今而得厚禄欲以养亲亲不在矣汝母又早世忍令若曹享富贵之乐也在杭州时早有退志子弟请治第洛阳树园圃以爲逸老之地仲淹曰人苟有道义之乐形骸可外况居室哉吾之所患在位高而艰退不患退而无居也且西都士大夫园林相望谁独障吾游者岂必有诸已而後爲乐耶语诸子弟曰吾吴中宗族甚衆于吾固有亲疎然吾祖宗视之则均是子孙吾安得不恤其饥寒若独享富贵而不恤宗族异日何以见祖宗于地下今亦何颜以入家庙乎既贵于姑苏近郭买良田数千亩爲义庄以养羣从之贫者择族人长而贤者一人主其出纳人日食米一升岁衣缣一匹嫁娶丧葬皆有贍给自政府出归姑苏搜外库有绢三千匹录亲戚及闾里知旧散之皆尽曰宗族乡党见我生长幼学壮仕爲我助喜我何以报之哉以朱氏长育有恩及贵用南郊恩乞赠朱氏父太常博士槩诸子皆爲葬之岁别爲享祭朱氏他子弟以仲淹荫得补官者三人在睢阳时遣子纯仁到姑苏取麦五百斛纯仁时尚少既还舟次丹阳见石曼卿问寄此久何如曼卿曰三丧在浅土欲葬之而北归无可与谋者纯仁以所载麦舟与之单?归仲淹问之曰东吴见故旧乎曰曼卿爲三丧未举留滞丹阳时无郭元振莫可告者曰何不以麦舟与之纯仁曰已付之矣晏殊判南京仲淹权掌西监殊谓曰吾有女及笄君爲我择壻仲淹曰监中有二举子富臯张爲善皆有文行他日至卿辅殊曰然则孰优仲淹曰富修谨张疎俊殊即以富爲壻後改名即弼也爲善亦改名方平云张载少喜谈兵年二十以书谒仲淹仲淹谓之曰儒者自有名教可乐何事于兵因劝读中庸载读其书复大究六经之旨遂成大儒在睢阳有孙秀才者上谒仲淹赠以千钱明年又来又赠千钱因问何爲仆仆道路孙生戚然曰母老无以养若日得百钱则甘旨足矣仲淹曰吾今补子学职月得钱三千足以供养子能安于学乎孙生大喜于是授以春秋明年仲淹去睢阳孙亦辞归後十年闻泰山下有孙明复先生以春秋教授学者道德高迈朝廷召至乃昔日索游孙秀才也爲西帅时狄青隶节下仲淹奇之曰此国器也以左氏春秋授之曰熟此可以断大事将不知古今匹夫之勇不足爲也青于是益喜书史其鉴识成就人多此类南都朱某者与仲淹善疾革语仲淹曰某曾遇异人得变水银爲白金术吾子幼今以方药传君仲淹不纳强之乃受未尝启封後其子长教之义均子弟及其子登第乃以所封药并术还之仲淹早有大节其于富贵贫贱毁誉欣戚不动其心常自诵曰士当先

天下之忧而忧後天下之乐而乐

论曰仲淹与韩富齐名然怀尧舜君民之志业欲举明主于三代之隆者规模尤爲宏濶吕本中及朱子皆称爲宋代人物第一谅哉在军临事而惧斤斤尺寸若过于畏慎者及其居庙堂总机务百度齐举云行飈逝若不足爲其故何哉是时承平日久兵弱将懦守备不完仲淹爲将居外庙算中制未必如意所欲爲惟期谨守方畧少抑其锐而已然用兵数年卒能设险疆場分委将帅棋布星罗隐然成犄角之势遂挫凶逆之锋者仲淹之谋也及中书所设施皆深虑熟筹非一朝之积论之朝堂付之有司顺流更化固无难者向使听用其说百年之基俄顷可定而复以他说乱之惜哉仲淹所造士张横渠大贤也富弼元辅孙明复名儒种世衡狄青以将帅显其余不可胜数本深而未茂源远而流长有学术而後有事功岂不信乎

韩琦

韩琦字稚圭相州安阳人天圣五年仁宗初临轩试进士琦年二十名在第二方唱名太史奏日下五色云见左右从官皆贺监左藏库禁中需金帛皆内臣批旨取之琦请复旧制置传宣合同司以相防察又每纲运至必俟内臣监涖始得受往往数日不至暴露庀下衙校以爲病琦奏罢之徙开封府推官府尹王博文大重之曰要路在前而治民如此宰相器也拜右司諫劾宰相王随陈尧佐参知政事韩亿石中立无所建明四人同日罢又言赏罚当从中书出今数有内降不可不止琦遇事有不便未尝不言每以明得失正纪纲亲忠直远邪佞爲急前後七十余疏王曾爲相见面琦论事切直有本末谓曰比来台諫多畏避爲自安计不则激发近名如君固不负所职矣琦又言自古兴俭以劝天下必以身先之今欲减省浮费当自宫掖始请令三司取先朝及今来赐予支费之目比附酌中皆从减省无名者一切罢之爲諫官三年自序諫稿谓諫主于理胜而以至诚将之益利路岁饥爲体量安抚使时赋调繁急市上供绮绣诸物多不予直琦爲缓调蠲给之招募壮者等第刺爲厢禁军一人充军数口赖以全活檄剑门关民流移而东者勿禁初明道中简州以灾伤尝募纳粟後棗钱十六余万归于常平至是琦曰是钱乃賑济之余非官缗也尽发以给四等以下户逐贪残不职吏罢冗役七百六十人爲饘粥活饥人一百九十余万蜀人曰使者之来更生我也赵元昊叛琦适自蜀归论西师形势甚悉即命爲陕西安抚使至则选练材武治战守具慰安居人收召豪杰与之计议范雍守延州朝廷以爲不能欲以赵振代琦奏曰愿留雍以观後效无已则范仲淹爲可乃命仲淹守延州康定元年副夏竦爲经畧安抚招讨使琦往来塞下勤苦忘寢食按屯至泾原闻元昊乞和琦曰无约而讲者谋也命戒严贼果犯山外琦悉兵付任福令自怀远城趋德胜砦出贼後约曰如未可战即据险置伏要其归及行又移檄戒之福违节度没于好水川琦自劾及竦收散兵得琦檄于福衣带间乃言罪不在琦独夺一官知秦州寻复之琦在秦州增广州城以保固东西市招集属户益市诸羌马讨杀生羌之钞边者厉兵以待贼讫琦去秦贼不敢窥塞未几复陕西四路招讨使初京师所遣戍兵脆懦不习劳苦贼尝轻之目曰东军而土兵劲悍善战琦乃增土兵以抗贼而稍减屯戍内实京师又以笼竿城据冲要建爲德顺军以蔽萧关鸣沙之道既任事久甲械精坚诸城皆有备赏罚信于军中将习战鬪识形势每出辄有功又建鄜延渭三州各以土兵三万爲一军军虽别屯耳目相通爲一互出捣之因以招横山规取河南而元昊遂称臣召入爲枢密副使琦自请扞边章五上不许又与范仲淹决策上前期覆元

昊朝廷不果用元昊介契丹爲援邀索无厌宰臣晏殊等厌兵将一切从之琦陈其不便条所宜先行者七事一曰清政本二曰念边计三曰擢材贤四曰备河北五曰固河东六曰收民心七曰营洛邑继又陈救弊八事欲选将帅明按察丰财利遏侥幸进能吏退不才谨入官去冗食帝悉嘉纳遂宣抚陕西琦以兵数虽多而杂以疲弱耗用度停放禁军不堪战者万余人遂讨平羣盗尽修鄜延城障归陈西北四策请以和好爲权宜战守爲实务缮甲厉兵营修洛城密定讨伐之计时二府奏事琦必尽言虽事属中书亦指陈其实同列不悦帝独识之曰韩琦性直琦与范仲淹富弼杜衍皆以海内人望同时登用中外跂想其勲业仲淹等亦以天下爲己任羣小不便之毁言日闻仲淹等相继罢琦乃上疏曰陛下用杜衍爲相方及百二十日而罢范仲淹以夏人初附自乞保边固亦有名至于富弼之出所损甚大弼大节难夺天与忠义昨契丹压境弼以正辩屈之忘身立事古人所难陛下两命爲枢副辞避不受及其居位不顾毁誉动思振缉纪纲爲陛下立万世之业近日臣僚多务攻击忠良取快私忿非国家之福疏入不报琦求补外出知扬州徙郢州京东素多盗捕盗之法以百日爲三限限不获者抵罪盗未必得而被刑者衆琦请获他盗者听比折除过捕者有免刑之路故盗多获朝廷遂着爲法徙鎮定州定州久用戎将治兵无法度骄不可使琦用军制勒习诛其尤无良者士死攻围赙赏其家恤其孤嫠使继衣廩恩威既信则仿古兵法作方员锐三阵日月教习之由是中山兵精劲冠河朔岁大饥爲法賑之活饥人七百万邻城旁路取以爲法玺书褒美拜武康军节度使知并州始潘美鎮河东患寇钞令民内徙而空塞下不耕于是忻代宁化大山之北多废壤琦以此皆良田弃不耕适足资敌请距北界十里爲禁地其南募弓箭手居之垦田至九千六百顷嘉佑元年拜枢密使三年六月拜同平章事中书习旧弊每事用例五房史操例在手惟意所去取琦令删取五房例及刑房断例除其冗缪不可用者爲纲目类次之封滕谨掌每用例必自阅自是赏罚可否出宰相五房史不得高下其间琦自爲相卽与诸贤谋议制作铨补天下士所汲引多正直有名或忠厚可鎮风俗以公议用之士莫知出何人门下嘉佑四年下詔享赦事多便民者命诸路举学行尤异遣詣京师馆于太学试舍人院差使授官立柴氏後爲崇义公择才臣詣四方寬恤民力籍户絶田租爲广惠仓以广賑恤募耕唐邓废田劝课农作守令治最者久其任以率吏课裁定令敕以省疑讞弛茶禁以便东南之民议者以爲近于三代之仁义多琦所论议施行是时曾公亮爲亚相赵槩欧阳修爲参政凡事该政令则曰问集贤该典故则曰问东厅该文学则曰问西厅至大事则自决之人以爲得相体仁宗春秋高自至和来常病不能御殿中外惴恐争以立嗣爲言依违未及行至是琦乘间进曰皇嗣者天下安危所系陛下春秋高何不择宗室贤者以爲宗庙社稷计帝曰姑待之後宫将有就馆者已又生女琦乃怀孔光传以进曰成帝无嗣立弟之子定陶王爲太子彼中材之主犹能如是况陛下乎太祖爲天下长虑泽流至今惟陛下以太祖之心爲心则无不可者会司马光吕海皆以爲请琦进读二疏帝曰朕有意久矣谁可者琦惶恐对曰此非臣辈所可议当出自圣择帝曰宫中尝养二子小者甚纯近不慧大者可也琦请其名帝曰宗实琦遂力贊之议乃定时英宗居濮王丧命起知宗正英宗固辞帝复问琦琦曰陛下既知其贤而选之今不敢遽当盖器识远大所以爲贤也愿固起之英宗既终丧犹不起琦言宗正之命初出外人皆知必爲皇子犹豫不决招谗慝生变故不若遂正其名乃下诏立爲皇子及仁宗崩英宗嗣琦预大议宫门徐开追百官班宣遗制卫士坐甲诸司幕庑下治丧人情肃然日至午市肆犹有未知者琦性厚重未尝名其功每燕坐从容或语及定策事必正色曰此仁宗圣德神断爲天下计太后母道内助之力朝廷定议久矣臣子何预焉初英宗爲太子时允弼最尊属心不平有他语宋

制嗣天子即位先亲王贺次六军次见百官琦独召允弼先入言先帝晏驾皇子即位大王当贺允弼曰皇子爲谁曰某人允弼曰何不立尊行琦曰先帝有诏允弼曰焉用宰相遂循殿陞上琦叱下曰大王人臣也不得无礼左右甲士已至遂贺次召诸亲王次见六军百官中外晏然英宗即位数日于丧次疾暴作大呼左右皆反走大臣惊愕不知所措琦急投杖于地直趋至前抱入帘曰谁激恼官家且当服药再三慰安以出仍戒当时见者曰今日事惟某人见某人见外人未有知者复就位哭英宗疾久不平卧壁不受药饵琦日率同僚自捧药以进或熟视而不言或取药覆琦之衣琦或跪于榻上者移时或拜于牀下者数四太后每劳之曰相公亦不易胜矣然他人劝之不顾也须琦强之而後服时太后垂帘听政英宗方寝疾琦虑宫中有不测一日因对深以言动太后曰臣等在外不得见官家内中保护全在太后太后惊曰相公是何言也我日夜更尽心琦曰太后保护则衆人自保护同列皆爲缩颈流汗既而吴奎曰母乃太过否琦曰不得不如此英宗疾甚时有不逊语尝奏事帘前太后呜咽流涕具道状琦曰此病故尔病已必不然子病母不能容之乎欧阳修委曲进言太后意稍和久之而罢太后一日密札与琦有爲孀妇作主之语琦但曰领旨数日琦独见帝帝曰太后待我无恩琦曰自古圣帝明王不爲少矣独称舜爲大孝岂其余皆不孝耶父母慈而子孝此常事不足道惟父母不慈而子不失孝乃爲可称但恐陛下事之未至耳父母岂有不慈者哉帝大感悟自此不复言太后短矣琦以山陵有事乞晚临後上殿既见密奏曰官家不得惊有一文字进呈陛下今日皆太后力恩不可报既非天属之亲愿加意承奉帝曰谨奉教琦又曰此文字臣不敢留幸宫中密焚之若泄则间遂开卒难合矣琦潜察英宗疾良已乃建议一出祈雨使天下人识官家太后曰帝未安恐未能出琦曰可以出矣太后曰人主出不可不备礼仪今素仗未具琦曰此小事颐指即办数日素仗成帝遂幸相国寺京师之疑已解人情大安琦心欲太后还政乃取十余事禀帝裁决悉当即诣太后覆奏太后每事称善琦因求去太后曰相公不可去我当归宫耳琦即称前代如马邓之贤不免贪恋权势今太后便能复辟诚马邓所不及连赞成之後数日批出云某日更不御殿至时琦即命鸾仪司撤帘帘既落犹于屏後见太后衣也初内侍任守忠欲援立昏弱以邀大利及英宗立乘帝疾语言错谬交构两宫时司马光吕海文章请诛之尚未施行琦一日出空头勅一道参政欧阳修已签书矣赵槩难之修曰第书之韩公必自有说既而琦坐政事堂召守忠立庭下数之曰汝罪当死责蕲州团练副使蕲州安置取空头勅填之即日押行琦意以爲少缓则中变也其党悉窜南方中外快之琦以帝勇智不世出可与有爲乃考寻中书祖宗御批得百余番皆经国长算大策补缀缺畧编成十余轴以献英宗见之不觉避御座夏人寇大顺琦议停岁赐絶和市遣使问罪枢密使文彦博难之琦曰谅祚狂童也非有元昊智计而吾边备过当时远甚亟诘之必服既而谅祚上表谢帝顾琦曰一如卿所料也夏使至将以十事闻朝廷未知其何事也时太常少卿祝谿馆伴琦乃徐料十事以授谿曰彼及某事则以某词对辯某事则以某词折十得其八夏人竦服英宗疾革琦入问起居奏曰陛下久不视朝中外忧惧宜早建太子以安衆心帝颌之琦请亲笔指挥帝乃批曰立大王爲皇太子琦曰大王乃穎王也圣躬更亲书之帝又批云大王穎王某琦曰请即以今晚宣麻帝又颌之由是国本定矣神宗即位中丞王陶弹琦不押常朝班爲跋扈帝遣近臣以示琦琦曰臣非跋扈者陛下遣一小黄门至则可縛臣矣帝爲之动出陶知陈州琦力求去位帝不得已以琦爲司徒兼侍中判相州入谢帝泣琦亦泣帝曰卿去谁可属国者琦引元老一二人帝曰王安石何如琦曰安石爲翰林学士则有余处辅弼之地则不可帝不答琦居相位临事喜愠不形于色再决大策以安社稷当朝廷多故琦处危疑之际知无不爲或

曰公所爲誠善万一蹉跌豈惟身不自保恐家無所處矣琦嘆曰是何言耶人臣當盡力事君死生以之至于成敗天也豈可豫憂其不濟遂輟不爲哉時青澗守將種諤取夏綏州夏主諒祚誘殺知保安軍楊定等邊衅復啓朝議欲棄綏乃命琦判永興軍經畧陝西琦初言綏不當取及定等被殺復言綏不可棄樞密以初議詰之琦具論其故乃卒存綏州改判大名充安撫使王安石始行新法百姓苦之琦上疏曰臣准散青苗詔書務在惠小民不使兼并乘急以要倍息而公家無所利其入今所立條約乃自鄉戶一等而下皆立借錢貫陌三等以上更許增借且鄉戶上等并坊郭有物業者乃從來兼并之家今令多借之錢一千令納一千三百則是官自放錢取息與初詔絕相違戾又鄉村每保須有物力人爲甲頭雖云不得抑勒而上戶必不願請時甚易納時甚艱將來必有督索同保均賠之患陛下勵精求治但躬行節儉以先天下自然國用不乏何必使興利之臣紛紛四出以致遠迹之疑乞盡罷諸路提舉官依常平旧法施行帝袖其疏以示執政曰琦真忠臣雖在外不忘王室朕始謂可以利民不意乃害民如此且坊郭安得青苗而使者亦強與之安石勃然進曰苟从其欲雖坊郭何害遂稱疾不出帝猶欲罷青苗法而執政中有請須安石出乃定議者已而安石既出持之益堅且令曾布条析其說刊石頒之天下琦申辨愈切且論安石妄引周禮以惑上听皆不報熙寧六年還判相州契丹來求代北地帝手詔訪琦琦言近年以來朝廷舉事似不以大敵爲恤彼見形生疑必謂我有圖復燕南之意故引先發制人之說造爲弊端所以致疑其事有七高麗本臣屬北方今誘之使來一也取吐蕃之地以建熙河二也植榆柳于西山以制蕃三也剽掠保甲四也諸州筑城凿池五也頒弓矢式大作战車六也置河北三十七將七也臣嘗竊計始爲陛下謀者必曰治國之本當先聚財積谷募兵于民則可以鞭笞四海故散青苗錢使民出利爲免役之法次第取錢迫置市易務而小商細民無所措手新制日下更改无常官吏茫然不能詳記監司督責以刻爲明今農怨于畝商嘆于道路長吏不安其職陛下不尽知也夫欲攘斥強敵以興太平而先使邦本困搖衆心离怨此則爲陛下始謀者大誤也臣今爲陛下計謂宜遣使報聘具言向來興作乃修備之常豈有他意疆土素定悉如旧境不可持此造端以隳累世之好如將官之類因而罷去益養民愛力選賢任能疎遠奸諛進用忠鯁使天下悅服邊備日充若其果自敗盟則可以一振威武恢復故疆摅累朝之宿憤矣會安石再入相悉以所爭地与契丹東西七百里論者惜之八年卒年六十八前一夕大星隕于治所柩馬皆驚帝哭之恟發兩河卒爲治冢篆其碑曰兩朝顧命定策元勲贈尚書令謚忠獻配享英宗廟庭常令其子孫一人官于相以護丘墓琦早有盛名識量英偉其爲學士臨邊年甫三十天下已稱爲韓公其鎮大名也魏人爲立生祠相人愛之如父母有鬪訟者傳相勸止曰勿撓吾侍中也辽使每過魏都移牒必書名曰以韓公在此故也忠彥使辽辽主問知其貌類父命工圖之其見重于外国如此琦天資朴忠折節下士無貴賤禮之如一尤以獎拔人材爲急公論所與雖意所不悅亦收用之故得人爲多初新法下曰琦旧臣也義不敢默及不見听曉官屬亟奉行曰琦一郡守也其敢不如令太宗眞宗嘗獵于大名之郊有詩數十篇旧刻于石琦留守日藏詩于班瑞殿之壁客有勸摹本以進者琦曰修之則已安用進爲後韓絳來遂進之琦嘆曰昔豈不知此耶顧上方銳意邊功不當更導之耳琦在外其心常系社稷至老益篤有時間更祖宗一法度坏朝廷一紀綱則泣血終日不食嘗曰琦平生仗孤忠以進每遇大事即以死自處幸而不死皆天扶持非琦所能也又嘗謂大臣以李固杜喬爲本其弊犹恐爲胡廣趙戒若以胡趙自處弊可知也又曰庆历中与希文彦國同在兩府上前爭事議論各别下殿不失和氣如未嘗爭也當時正如推車其心主于車可行而已琦性含容善惡白黑不大分小人忌之亦少如范富

欧尹尝欲分君子小人故忌怨日至朋党亦起方诸公斥逐琦独安後扶持诸人复起皆琦力也尝论君子小人之际当以诚待之但知其小人则浅与之接凡人于小人欺已处必露其明以破之琦独不然每受之未尝形于色也又因论进退曰处进退之难者不可猛而有迹历事四朝元勲盛德闻人一小善则曰琦不及也凡荐人于上前未尝辄漏其语间因上有宣论或同僚谈说人始知之在魏府时僚属路拯者就案呈事状尾忘书名琦即以袖覆之仰首与语稍稍潜卷以授之有人献玉盞一双絶宝也每召客特设一席置之一日吏误触碎之惶恐伏罪琦徐曰汝误也非故也何罪之有帅定州时夜作书一卒持烛误燃琦须遽以袖麾之而作书如故少顷回视则已易其人矣琦恐主吏鞭之亟呼之曰勿易渠已解把烛矣军中感服吴璟素有节槩琦尝称之及幕府有阙门下以璟爲言琦曰此人气虽壮然包蓄不深发必暴且不中节当以此败不踰年璟败如言钱明逸出爲秦州常快快不事事琦闻之曰已虽不足独不思所部十万生灵耶琦于时望诸公皆未以经纶许之谓才器须周可当四面入粗入细乃经纶事业今皆可当一面才也有问公何以识安石琦曰尝读介甫答杨忱一书窥其心术只爲一身不爲天下以此知非宰相器尝曰始学行已当如金玉不受微尘之污及其成德有所受亦有所不害者不然无容矣又曰忠义之心人皆有之惟其执之不固勉之不力是以不及于古人观书文昼夜不倦书爱顔鲁公適健端重类其爲人後有人问程伊川魏公可学否伊川曰魏公是间气

论曰宋自李廸既贬王曾没後在位者率多因循固宠罔顾国家之虑及至元昊发难契丹败盟大敌在外而草窃潜兴师徒不振而征敛日繁当是之时宋事几殆非琦与范富共起而安定之虽吕夷简之智亦安所施哉迨嘉佑治平之间遭遇仁英二帝独相者七八年兴贤举能修政立事教养之风法三代之遗意向使继其後者绍休遗绪昇平可致而神宗安石贪功好胜逝梁发笥以堕厥功岂不惜哉躬定大策遭时之难志不舍命卒能调和两宫安寧社稷自古未尝有也始于筦库终于罢相历郡事无巨细动爲世法故详录焉

史传三编卷三十

卷三十一

<史部,传记类,总录之属,史传三编

钦定四库全书

史传三编卷三十一

大学士朱轼撰

名臣传二十三

宋

富弼

富弼字彦国河南人少笃学有大度穆修谓之曰进士不足以尽子之才当以大科名世范仲淹见而奇之曰王佐才也以文示晏殊殊妻以女试礼部不中将归仲淹使人追之曰有旨以大科取士弼遂以贤良方正登第授将作监丞签书河阳判官仲淹坐争废后事贬弼上言一举二失纵不能复后宜还仲淹以表忠言不听通判绦州赵元昊反弼陈八事且言元昊遣使求割地邀金帛使者部从仪物如契丹而词甚倨此必元昊腹心谋臣自请行者宜出其不意斩之都门又劾枢密夏守彬庸材不当用召知谏院康定元年日食正旦弼请罢宴彻乐执政不可弼曰万一契丹行之爲朝廷羞後使者北还言契丹果罢宴帝深悔之时方禁臣僚越职言事弼因极言应天变莫若通下情遂除其禁元昊寇鄜延延州民二十人诣阙告急帝召问具得诸将败亡状执政恶而禁之弼言此必非陛下意宰相恶上知四方有败尔民有急不得诉之朝则西走元昊北走契丹矣时元昊破金明钤辖卢守勲不救内侍黄德和引兵走大将刘平战死德和诬其降贼弼请按竟其狱德和坐要斩夏守彬爲陕西都总管又以宦者王守忠爲都钤辖弼言用守彬已爲天下笑今益以守忠殆与唐监军无异守勲德和覆车之辙可复蹈乎诏罢守忠自用兵以来吏民上书者甚衆初不省用弼言知制诰本中书属官可选一人置局中书考其所言可用用之又引国初故事请使宰相兼领枢密会西夏首领二人来降补借奉职羁置荆湖弼言二人之降其家已族矣当厚赏以劝来者事下中书宰相初不知也弼叹曰此岂小事而宰相不知耶更极论之乃从弼言以宰相兼枢务庆历二年知制诰纠察在京刑狱时有用僞牒爲僧者事觉乃堂吏爲之开封按其狱不及吏弼请以吏付狱执政吕夷简指其坐曰公卽居此无爲近名弼正色曰必得吏乃止夷简滋不悦会契丹屯兵境上遣萧英刘六符来求石晋所与关南地朝廷择报聘者皆以敌情叵测莫敢行夷简因是荐弼欧阳修引颜真卿使李希烈事请留之不报弼卽入对叩头曰主忧臣辱臣不敢爱其死帝爲动色先以爲接伴英等入境中使迎劳之英托足疾不拜弼曰昔吾使北病卧车中闻命辄起今中使至而君不起何耶英矍然起拜弼开怀与语英感悦卽以其情告且曰可从从之不可从

更以一事塞之弼具以闻帝进弼枢密直学士辞曰国家有急义不憚劳奈何逆以官爵赂之遂爲使报聘弼见契丹主契丹主曰南朝违约塞雁门增塘水治城隍籍民兵将以何爲羣臣请举兵而南吾以爲不若求地求而不获举兵未晚弼曰北朝忘章圣皇帝之大德乎澶渊之役若从诸将言北兵无得脱者且北朝与中国通好则人主专其利而臣下无获若用兵则利归臣下而人主任其祸故诸臣劝用兵者皆爲身谋非国计也契丹主惊曰何谓也弼曰晋高祖欺天叛君而求功于北末帝昏乱土宇狭小上下离心故契丹全师独克虽所获金帛充牣诸臣之家而壮士健马物故大半今中国提封万里精兵百万法令修明上下一心北朝欲用兵能保其必胜乎就使其胜所亡士马羣臣当之坎抑人主当之坎若通好不絶岁币尽归人主臣下所得止奉使者岁一二人羣臣何利焉契丹主大悟首肯者久之弼又曰塞雁门者备元昊也增塘水始于何承矩事在通好前城隍皆修旧民兵亦补阙非违约也契丹主曰微子言吾不知其详然吾所欲者祖宗故地耳弼曰晋高祖以卢龙一道赂契丹周世宗复取关南皆异代事若各欲求地岂北朝之利哉既退六符曰吾主耻受金帛坚欲十县何如弼曰本朝皇帝言朕爲祖宗守国岂敢妄以土地与人北朝所欲不过租赋耳朕不忍多杀两朝赤子故屈己增币以代之若必欲得地是志在败盟假此爲词耳朕安得独避用兵乎澶渊之盟天地鬼神实临之今北朝首发兵端过不在我天地鬼神其可欺乎明日契丹主召弼同猎引弼马自近犹言求地事弼反覆陈其不可状且言北朝既以得地爲荣南朝必以失地爲辱兄弟之国岂可使一荣一辱哉猎罢六符曰吾主闻荣辱之言意甚悟今惟有结婚可议耳弼曰婚媾易生嫌隙本朝长公主出降齎送不过十万缗岂若岁币无穷之利哉契丹主乃遣弼归弼归复命帝复使持和亲增币二议及誓书往且命受口传之词于政府既行次乐寿弼谓副使张茂实曰吾爲使者而不见国书万一书词与口传者异则吾事败矣后视果不同乃驰还都以晡时入见奏曰执政故爲此欲置臣于死地臣死不足惜奈国事何吕夷简辞曰误耳当令改定晏殊亦曰夷简决不然弼怒曰晏殊奸邪党夷简以欺陛下殊弼之妻父也弼易书遂行既至契丹不复求婚专欲增币曰南朝遗我书当曰献否则曰纳弼争不可契丹主曰南朝既惧我何惜此二字若我拥兵而南得无悔乎弼曰本朝皇帝兼爱南北之民不忍使蹈锋鏑故屈己增币何名爲惧哉若不得已至于用兵则当以曲直爲胜负非使臣之所忧也契丹主曰卿勿固执古已有之弼曰自古惟唐高祖借兵于突厥故臣事之当时或称献纳则不可知其後颉利爲太宗所擒岂复有此礼哉弼声色俱厉契丹主知不可夺乃留所许增币誓书而使六符以其国誓书来且求献纳字弼归奏曰臣以死拒之彼气折矣可勿许也朝廷竟以纳字与之增币二十万而契丹平始受命闻一女卒再受命闻一男生皆不顾得家书不发而焚之曰徒乱人意耳复除枢密直学士迁翰林学士皆力辞曰增岁币非臣本志也特以朝廷方讨元昊未暇与之角故不敢以死争耳敢受爵乎庆历三年三月命爲枢密副使辞愈力至七月复申前命弼言契丹既和好议者便谓无事边备遽弛万一败盟臣死且有罪愿陛下思其轻侮之耻坐薪尝胆不忘修政以诰纳上前而罢踰月帝使宰相谕旨曰此朝廷特用非以使契丹故也弼不得已乃受是时仁宗锐意兴太平进用皆一时之选而尤责成于范仲淹及弼数以手诏督弼等令条具其事又开天章阁召弼等坐给笔札使书其欲爲者且命仲淹主西事弼主北事弼上当世之务十余条又上河北安边十三策大畧以进贤退不肖止侥幸去宿弊爲本欲稍易诸路监司之不才者使澄汰所部吏于是小人始不悦矣元昊以书来称男不称臣弼言契丹臣元昊而我不臣则契丹爲无敌于天下不可许乃却其使卒臣之十二月诏册元昊爲夏国主使将行而止以俟北使弼曰若北使未至而行则事自我出既至则恩归契丹矣

从之四年契丹发兵会元昊伐爱勒族于河东爲近帝疑二边同谋弼曰兵出无名契丹不爲也元昊本与契丹约相左右今契丹独获重币元昊有怨言故城威塞以备之爱勒屡寇威塞契丹疑元昊使之故爲是役安能合而寇我哉或请调发爲备弼曰如此正堕其计臣请任之帝乃止契丹卒不动夏竦中弼以飞语弼不自安求出宣抚河北归及国门不得见除知郢州踰年移青州是时河朔大水民流京东就食弼择所部丰稔者三州劝民出粟得十五万斛益以官廩随所在贮之得公私庐舍十余万间散处其人以便薪水官吏自前资待阙寄居者皆给其禄使即民所聚选老弱捐瘠者廩之山林河泊之利有可取爲生者听流民取之其主不得禁官吏皆书其劳约爲奏请他日得以次受赏于朝率五日辄遣人以酒肉糗饭劳之出于至诚人人爲尽力流民死者大塚葬之谓之丛塚自爲文祭之明年麦大熟流民各以远近受粮而归凡活五十余万人募爲兵者万计帝闻之遣使褒劳拜礼部侍郎弼曰此守臣职也辞不受前此救灾者皆聚民城郭中爲粥食之蒸爲疾疫及相蹈藉或待哺数日不得粥而仆自弼立法简便周尽天下传以爲式王则叛齐州禁兵欲应之齐非弼所部弼恐事泄变生适中贵人张从训衔命至青弼度其可用密付以事使驰至齐发吏卒捕之无得脱者即自劾擅擅之罪帝益嘉之复以爲礼部侍郎又辞不受至和二年召拜同平章事与文彦博并命宣制之日士大夫相庆于朝帝觐知之谓欧阳修曰古之求相者或得以梦卜今朕用二相人情如此岂不贤于梦卜也哉修顿首称贺初帝问置相于王素素对曰惟宦官宫妾不知姓名者可充其选帝曰如此则富弼尔故有是命时契丹使者适至谓王德用曰天子以公爲枢密而用富公爲相皆得人矣弼爲相守格法行故事而附以公议无心于其间故百官任职天下无事以所在民力困弊岁役不均遣使分道相视裁减又弛茶禁以利商贾省刑狱天下便之嘉佑六年以母忧去位帝五起之弼谓此金革变礼不可施于平世卒不从命英宗立召爲枢密使英宗以疾不视朝太后垂帘英宗疾已韩琦奏台諫有疏请太后归政琦亟令撤帘弼怪琦不关报枢密院又欧阳修爲参政首议追尊濮王弼曰欧公读书知礼法所以爲此举者忘仁宗累主上欺韩公耳遂面奏曰仁宗之立陛下太后之功也今太后谓臣与胡宿吴奎等曰无夫妇人无所告至不忍闻臣实痛之岂仁宗所望于陛下哉以笏指御床曰非陛下有孝德孰可居此英宗俯躬曰不敢弼求去甚坚遂出判河阳英宗初立时韩琦进拟数宦者策立有劳当迁官弼曰先帝以神器付陛下此辈何功可书琦有愧色後琦帅长安爲范纯仁言其事曰琦便畏富公也神宗初入覲帝从容访以治道弼知帝果于有爲对曰人主好恶不可令人窥测可穷测则奸人得以傅会当如天之鉴人善恶皆所自取然後诛赏随之则功罪皆得其实矣又问边事对曰陛下临御未久当先布德泽二十年口不言兵不宜重赏边功干戈一起祸福不细帝默然欲留之力辞归郡熙宁三年召拜司空侍中平章事未至闻有言灾异皆天数非人事所致者弼叹曰人君所畏者天耳若不畏天何事不可爲此必奸人欲进邪说以摇上心使辅弼谏诤之臣无所施其力是治乱之机不可不速救即上书数千言杂引春秋洪范及古今传记人情物理以明其不然及入对又言君子小人之进退系王道之消长愿深加辨察勿以同异爲喜怒喜怒爲用舍今中外之务渐有更张此必小人献说于陛下也大抵小人喜动作生事则其间有所希觊若朝廷守静则事有常法小人何所望哉愿深烛其然无使有悔是时久旱羣臣请上尊号及用乐帝不许而届同天节契丹使当上寿弼言此盛德事正当以此示之乞并罢上寿帝从之即日雨弼又上疏愿益畏天戒远奸佞近忠良帝手诏褒答之王安石用事雅不与弼合弼度不能争称疾求退章数十上神宗乃许之问曰卿即去谁可代卿者弼荐文彦博神宗默然良久曰王安石何如弼亦默然遂出判亳州方行青苗钱弼谓此法行则

财聚于上人散于下持不行提举常平赵济劾弼以大臣格新法改判汝州弼言新法臣所不晓不可以复治郡愿归洛养疾许之遂请老加拜司空进封韩国公致仕弼虽家居而朝廷有大利害知无不言交趾叛诏郭逵讨之弼言海峽深远不可责其必进愿诏逵择利进退以全王师契丹争河南地界帝手诏问弼弼言熙河诸郡皆不足守河南地界决不可许星文有变乞开广言路又请速改新法以解倒县之急帝虽不用而眷礼不衰尝因安石有所建明却之曰富弼手疏称老臣无所告诉但仰屋窃叹者即当至矣其敬之如此故参政王尧臣子同老上言至和三年仁宗弗豫其父与文彦博刘沆及弼同决大策乞立储嗣会翼日疾瘳故缓其事人无复知者以尧臣所撰诏草上之帝以问彦博彦博言与同老合帝嘉弼不自言诏加司徒一辞而拜或问公治平初屡辞官今不然何也弼曰治平初乃弼自辞官今日潞公皆迁弼岂敢坚辞妨他人也盖彦博论新法不合七年不召至是眷礼复厚云弼屡疏言天子无职事惟辨君子小人而进退之此天子之职也君子与小人处其势必争君子不胜则奉身而退小人不胜则交结构扇千岐万辙必胜而後已小人复胜必肆毒于善良无所不爲求天下不乱不可得也元丰六年卒年八十手封遗奏使其子绍庭上之大畧言陛下即位之初邪臣纳说图任之际听受失宜上误聪明寢成祸患今上自辅臣下及多士畏祸图利习成敝风忠词谗论无复上达臣老病将死尚何顾求特不忍上负圣明辄倾肝胆冀怜愚忠曲垂采纳去年永乐之役兵民死亡数十万今久戍未解百姓困穷愿归其侵地休兵息民使关陕之间稍遂生理兼陕西再团保甲又葺教塲州县奉行势侔星火人情惶骇难以复用不若寝罢以绥怀之臣之所陈急于济事若夫要道则在圣心所存与所用君子小人之辨耳帝览奏震悼辍朝三日赠太尉谥文忠弼天性至孝恭俭好修与人言必尽敬虽微宦及布衣皆与之抗礼气色穆然不见喜愠其好善嫉恶出于性生晚岁清心学道独居还政堂每早作放中门钥入瞻礼家庙对夫人如宾客子孙不冠带不见闺门肃如也平时谢客文彦博爲留守时节往来年八十自书坐屏云守口如瓶防意如城平生所荐士甚衆尤知名者如王质与其弟素余靖孙复石介吴奎韩维陈襄等十余人皆有闻于世世以爲知人使契丹功甚伟而每不自以爲功至知青州活饥民五十万则每自言之曰过于作中书二十四考矣论曰韩富之异自英宗临御太后垂帘时也然韩居枢轴之地则以安国本爲急富列辅弼之臣则以正君德爲先易地皆然未易论其优劣也富之事君交友正道直行危言谏论遇事直陈未尝少有回曲及其临机应敌因权制变军旅之事动中机会何其明也施之州郡活民百万安居庙堂不劳而理可谓才德兼备之君子矣

欧阳修

欧阳修字永叔庐陵人四岁而孤母郑守节自誓亲诲之学家贫至以荻画地学书幼敏悟从闾里借书抄之未毕已成诵宋兴且百年文章体裁犹仍五季余习苏舜元舜钦柳开穆修辈有意张之而尚未大振修游随得韩愈遗稿于废书簏中心慕焉苦志力索思与之并两试国子监一试礼部皆第一遂中甲科补西京留守推官始从尹洙游爲古文议论当世事迭相师友与梅尧臣游爲歌诗倡和遂以文章名冠天下入爲馆阁校勘范仲淹以言事贬在廷多论救司谏高若讷独以仲淹当黜修贻书责之谓不复知人间有羞耻事若讷上其书修坐贬夷陵令徙乾德令武成节度判官仲淹帅陕西辟修掌书记修曰昔者之举岂以爲己利哉同其退不同其进可也辞不就久之复校勘进集贤校理庆历三年知谏院是秋诏谏官日赴内朝

用仲淹爲参知政事以修之言也帝方更用大臣杜衍富弼韩琦范仲淹皆在位增谏官员用天下名士修每进见帝延问执政咨所宜行既多所张弛小人翕翕不便修虑善人必不胜数爲帝分别言之修论事切直人视之如讎帝独獎其敢言赐五品服顾侍臣曰如修者何处得来澧州进柿木成文有太平字修言四海骚然未见太平之象请不宣示于外淮南漕臣献羨余十万贯修请拒之以防刻剥同修起居注遂知制诰故事必试而後命帝知修诏特授之奉使河东自西方用兵议者欲废麟州以省馈饷修曰麟州天险不可废废之则河内郡县民皆不安居矣不若分其兵驻并河内诸堡缓急得以应援而平时可省转输于策爲便由是州得存又言忻代岢岚多禁地废田愿令民得耕之不然将爲敌有朝廷下其议久乃行岁得粟数百万斛凡河东赋敛过重民所不堪者奏罢十数事使还会保州兵乱以修爲河北转运使陞辞帝谕无爲久留之计有所欲言言之修曰谏官得风闻言事外官越职而言罪也上曰第以闻勿以中外爲意河北诸军怙乱骄恣小不如意辄胁持州郡修乞优假将帅以镇压士心军中乃定初保州乱兵皆招以不死既而悉诛之胁从二千人分隶诸州富弼爲宣抚使恐後生变与修相遇于内黄夜半屏人谋欲使诸州同日诛之修曰祸莫大于杀已降况胁从乎既非朝命州郡有一不从爲变不细弼悟乃止修奏置御河催纲司以督粮饷边州赖之又置磁州都作院以缮一路戎器河北方小治而二府诸人相继罢去修慨然上疏曰杜衍韩琦范仲淹富弼天下皆知其有可用之贤而不闻其有可罢之罪夫正士在朝羣邪所忌谋臣不用敌国之福也今此四人一旦罢去使羣邪相贺于内敌国相贺于外臣爲朝廷惜之于是羣小益忌修因其孤甥张氏狱傅致以罪遂降知滁州居二年徙扬州颍州时吕夷简子公着爲通判有贤行时人未知修力荐之由是渐见擢用复学士留守南京以母忧去服除召判流内铨时在外十二年矣帝见其髮白劳问甚至小人恐修复用诈爲修奏乞澄汰宦官宦官果怒阴以事中修遂命出知同州以吴充言乃止迁翰林学士帝一日见御阁春帖子读而爱之问知爲修之词也乃悉取宫中诸帖阅之叹曰举笔不忘规谏真侍从之臣也嘉佑二年权知贡举时进士爲文以诡异相高号太学体修患之所取率以词义近古爲贵比以险怪知名者多不在列怨议纷然修出聚噪于马首然塲屋之习从是遂变而是科号得人程颢朱光庭曾巩苏轼苏辙诸人出焉加龙图阁学士知开封府先是包拯以威严御下名震都邑修简易循理不求赫赫之名而京师亦治有以拯之政厉修者修曰凡人材性不一用其所长事无不举强其所短势必不逮吾亦任吾所长耳闻者称善拜礼部侍郎兼翰林侍读学士修在翰林八年知无不言河决商湖北京留守贾昌朝欲开横壠故道回使东流有李仲昌者欲导入六塔河议者莫知所从修以爲河水重浊理无不淤下流既淤上流必决以近事验之决河非不能力塞故道非不能力复但势不能久耳横壠功大难成虽成将复决六塔狭小以全河注之滨棣德博必被其害不若因水所趋增堤峻防疏其下流纵使入海此数十年之利也宰相陈执中主昌朝文彦博主仲昌竟爲河北患修尝因水灾上疏曰陛下临御三纪而储宫未建昔汉文帝初卽位用羣臣之言卽立太子而享国长久爲汉太宗唐明宗恶人言储嗣事不肯早定致秦王之乱宗社遂覆陛下何疑而久不定乎其後建立英宗盖原于此五年拜枢密副使六年参知政事修在兵府与曾公亮考天下兵数及三路屯戍多少地理远近更爲图籍凡边防久缺屯戍者必加蒐补其在政府与韩琦同心辅政凡兵民官吏财利之要中书所当知者集爲总目遇事不烦求之有司时东宫未定修与韩琦等协定大议先以英宗判宗正而英宗坚卧不起修奏曰宗室自来不领职事今不次擢用外人皆知将立爲皇子不若遂正其名命学士作一诏书告报天下事卽定矣韩琦力赞之遂定立爲皇子英宗既立以疾不能亲政太后垂帘左

右交构几成嫌隙韩琦奏事太后泣语之故琦以帝疾爲解太后意未释修进曰太后事仁宗数十年仁德着于天下昔温成之宠太后处之裕如今母子之间反不能容耶太后意稍和修复曰仁宗在位日久德泽在人故一旦晏驾天下奉戴嗣君无一人敢异同者今太妃一妇人臣等五六措大耳非仁宗遗意天下孰肯听从太后默然久之而罢自嘉佑以後朝廷务惜名器进人之路稍狭修屡建言馆阁育材之地材既难得而又难知当博采而多蓄之杰然者出爲名臣余亦不失爲佳士遂诏二府各举五人修平生与人尽言无所隐及执政士大夫有所干请辄面谕可否虽台諫官论事亦必以是非诘之由是怨诽日衆以议尊濮王事爲台諫所论又彭思永蒋之奇造帷薄不根之谤上章劾修会神宗即位令诘问思永等词穷坐黜而修亦力求退罢爲刑部尚书知亳州明年迁兵部尚书知青州诸县散青苗钱修乞令民止纳本钱以示不爲利罢提举管勾官听民以愿请不报改判太原府修辞求知蔡州且曰时多喜新奇而臣思守拙衆方兴公利而臣欲寻常遂以本官知蔡州修素以风节自持既数被污蔑又多与执政忤遂连乞谢事熙宁四年以太子少师致仕五年卒赠太子太师谥文忠修天资刚劲见义勇爲放逐流离至于再三志气自若也学者求见惟与谈政事少及文章张舜民问其故修曰文章止于润身政事可以及物吾昔贬夷陵无以自遣求史汉一观无有乃取陈年公案反覆观之见其枉直乖错不可胜数以夷陵之荒远褊小尚如此天下可知也当时仰天誓心曰自尔遇事不敢忽今出入中外忝尘三事以此自将人之望我必谓翰墨致身以我自观谅是当时一言之报也又曰凡治人者不问吏才能否设施何如但民称便即是良吏故修爲数郡所居民便所去民思如扬青南京皆大郡修至三五日间事已减十五六一两月後官府如僧舍或问公政寬简而事不废何也修曰以纵爲寬以畧爲简则弛废而民受其弊吾所谓寬者不爲苛刻耳所谓简者不爲繁碎耳修少孤母告之曰汝父爲吏常夜烛治官书屡废而叹吾问之则曰此死狱也我求其生不得尔吾曰生可求乎曰求其生而不得则死者与我皆无恨也况求而有得耶夫常求其生犹失之死而世常求其死也修闻而佩服之终身凡死罪非杀人者多所平反盖成其先志云修爲文天才自然丰约中度纾徐委备往复百折而条达疎畅无所间断要之于至理以服人心故天下翕然师尊之獎引後进惟恐不及赏识之下率爲闻人曾巩王安石苏洵洵子轼辙当其布衣屏处未爲人知修即游其声誉皆显于世笃于朋友生则振掖之死则调护其家好古嗜学自周秦以降金石遗文断编残简一切掇拾研稽异同的可表证谓之集古录与宋祁分修唐书修领纪志而祁爲列传及书成奏御旧例只列官高者一人姓名而修官高宜书修曰宋公于列传功多吾岂可掩其名乎于是纪志书修列传书祁祁闻而善之修又自修五代史师春秋之遗意卷帙减旧史之半而事迹添数倍苏轼序其文曰论大道似韩愈论事似陆贄记事似司马迁诗赋似李白识者以爲知言

论曰五季之衰学丧文敝而修于周程未出之前首以古文爲当世倡推大道之要而发明六经圣贤之旨使学者晓然知论说必本于仁义有功世道于斯爲大而文章之复古其末也修爲台諫时摧邪扶正论列爲多屡历州郡声迹可纪及仁英授受之际辅佐韩琦功在社稷矣琦之初荐修第以文高名重恐世以不用爲国家惜盖一时权宜之词不知者以爲实则谬也

文彦博

文彦博字寬夫汾州介休人其先本敬氏以避晋高祖及宋翼祖讳改焉登进士第知翼城县

通判绛州转殿中侍御史西方用兵偏校有临陈先退望敌不进者旧着令皆中覆彦博言此可施之平居无事时耳今拥兵数十万而将权不专兵法不峻将何以济仁宗嘉纳之黄德和之诬刘平降寇也以金带賂平奴使证之平家二百口皆械系诏彦博置狱河中既鞫治得实德和谋翻其狱复遣他御史来彦博拒不纳曰朝廷虑狱不就故遣君今案具矣宜亟还事或不成彦博执其咎德和并奴卒就诛以直史馆爲河东转运副使鄜州饷道回远银城河外有唐时故道废弗治彦博父洎爲转运使日将复之未及而卒彦博嗣成父志益储粟元昊来寇围城十日知有备解去以枢密直学士知泰州改益州时成都米价腾贵彦博就诸城门相近院凡十八处减价棗卖不限其数米价遂减前此或限升?以棗或抑市井价直适足以增其气焰而价不可减乃知其术之善云尝宴軫辂廨舍夜久不罢从卒辄折马房爲薪不可遏军校白之座客股栗彦博曰天实寒可折与之神色自若饮宴如故卒气沮无以爲变召拜枢密副使参知政事贝州王则反明镐讨之久不克彦博请行命爲宣抚使监诸军时枢密使夏竦恶镐凡镐所奏请多从中沮惟恐其成功彦博请得便宜从事不中覆帝许之至贝与明镐督诸将筑距闌以攻城旬余不下有牢城卒董秀刘炳请穴地以攻之贝城南临御河秀等夜于?边穿穴弃土于水昼匿穴中城中不之见久之穴成秀等走白彦博选死士二百衔枚自穴入登城杀守者垂絙以引外人城中惊扰遂生擒王则檻送京师拜同平章事因进对言尝闻德音以搢绅多务奔竞非裁抑之无以厚风俗莫若稍旌恬退之人则躁竞者自知愧耻乃荐王安石韩维张瓌皆擢用焉与枢密使龐籍议汰冗兵六万减半给者又二万论者纷然恐相聚爲盗帝亦疑焉彦博曰今公私困竭正坐冗兵脱有难臣请死之又减陕西兵屯内地以省边费兵卒无事御史唐介劾彦博在蜀日以奇锦结宫掖帝大怒诏送台劾之彦博独留再拜曰御史言事职也愿不加罪介既贬彦博亦罢知许州改忠武军节度使知永兴军初起居舍人母湜乞废陕西铁钱朝廷虽不从而陕人闻之争以铁钱买物卖者不肯受长安爲之乱彦博乃召丝绢行人出其家缣帛数百匹使卖之曰纳其直尽以铁钱勿以铜钱也于是衆知铁钱不废市肆复安至和二年复以吏部尚书同平章事与富弼并命士大夫皆以得人爲庆三年正月帝疾暴作彦博召内侍史志聪等问状志聪对以禁中事密不敢泄彦博叱之曰汝曹出入禁闕不令宰相知天子起居欲何爲耶自今疾势增损必一一见白不尔当行军法又与同列刘沆富弼留宿殿庐志聪等白曰无故事彦博曰此岂论故事时耶因赦死罪以下令辅臣禱天地宗庙社稷知开封府王素夜叩宫门上变彦博不听入比旦诘之则禁卒有告都虞候爲乱者刘沆欲捕治彦博问都虞候何如人都指挥使许怀德称其愿可保彦博曰然则卒有怨诬之耳当亟诛以靖衆乃请沆判状尾斩于军门先是弼用朝士李仲昌策自澶州商湖河穿六漯渠入横壠故道北京留守贾昌朝素恶弼阴约内侍武继隆转令司天官二人于殿庭抗言国家不当穿河北方致上体不安後数日二人又言请皇后同听政史志聪以状白执政彦博视而怀之不以示同列徐召二人责之曰天文变异汝言职也何得辄预国家大事汝罪当族二人惧变色彦博曰观汝直狂愚耳未忍加汝罪自今无复然二人退乃出状示同列同列皆怒曰何不斩之彦博曰斩之则事彰灼于中宫不安衆皆曰善既而议遣司天官定六漯方位彦博复使二人往继隆请留之彦博曰彼本不敢妄言有教之者耳继隆默不敢对二人至六漯恐治前罪更言六漯在东北非正北也帝疾愈彦博等始归第当是时京师业业赖彦博弼持重衆心以安已而沆密白帝曰陛下违豫时彦博擅斩告反者彦博闻之以沆判呈帝意乃解御史吴中复乞召还唐介彦博言介顷爲御史言臣事多中臣病其间虽有风闻之误然当时责之太深请如中复奏乃召知谏院时称彦博长者久之以使相出判河南府封潞国公

连改判大名太原河南丁母忧英宗即位起复成德军节度使三上表乞终丧许之初仁宗之不豫也彦博与富弼等乞立储嗣仁宗许焉而後宫将有就馆者故其事缓彦博既服阕以故官判河南入覲英宗曰朕之立卿之力也彦博竦然曰陛下入继大统乃先帝圣意太后协赞之力臣何力之有陛下登储纂极臣方在外韩琦等承圣志受顾命臣无与焉帝曰备闻始议卿于朕有恩彦博逊避不敢当徙镇淮南判永兴军入爲枢密使熙宁二年陈升之入相诏彦博朝廷宗臣其令升之位彦博下彦博曰国朝枢密使无位宰相上者独曹利用尝在王曾张知白之上臣忝知礼义不敢效利用所爲乃止彦博言于帝曰朝廷行事务合人心宜兼采衆论以静重爲先陛下厉精求治而人心未安者更张太过也祖宗法未必皆不可行但有偏而不举之弊耳王安石知彦博言爲已发极力排之彦博又言市易司之设下至果实亦官监卖有伤国体凡衣冠之家罔利于市清议尚所不容岂有堂堂大国皇皇求利而不爲物议所非者乎不报因求去遂以司空判河阳府元丰三年拜太尉复判河南于是王同老言至和中议储嗣事彦博适入朝神宗问之彦博以前对英宗者复于帝帝曰卿深厚不伐善阴德如丙吉真定策社稷臣也彦博曰如周勃霍光是爲定策自至和来中外之臣献言甚衆臣等虽尝有请弗果行其後韩琦等讫就大事盖琦功也帝曰发端爲难是时仁祖意已定嘉佑之末止申前诏正如丙吉霍光不相掩也遂加彦博两镇节度使辞不拜久之请老以太师致仕居洛阳元佑初司马光荐彦博宿德元老宜起以自辅乃命平章军国重事六日一朝一月两赴经筵恩礼甚渥然彦博无岁不求退居五年复致仕绍圣初卒年九十二後追谥忠烈彦博虽时在外而帝眷有加在大名时转运汪辅之奏彦博不事事帝批其奏以付彦博曰侍中旧德故烦卧护北门细务不必劳心辅之小臣无礼将别有处置未几罢之王中正经制边事所过称密旨募禁兵彦博以无诏拒之中正不敢募而去彦博逮事四朝任将相五十年名闻外国元佑间契丹使者来聘见彦博于殿门外却立改容曰此潞公也耶问其年曰何壮也馆客苏轼曰使者见其容未闻其语其综理庶务虽精练少年有不如其贯穿古今虽专门名家有不逮使者拱手曰天下异人也彦博虽富贵而接物谦下尊德乐善如恐不及其在洛也洛人邵雍程顥兄弟皆以道自重宾接之如布衣交与富弼司马光等十三人用白居易九老会故事置酒赋诗相乐序齿不序官爲堂绘像其中谓之洛阳耆英会神宗导洛通汴而主者遏絶洛水不使入城中洛人苦之彦博因中使刘惟简至洛语其故惟简以闻诏令通行如初遂爲洛城无穷之利彦博幼时与羣儿击球球入柱穴中不能取彦博以水灌之球浮出与司马光取石破瓮事同识者已知二公之仁智不凡矣

论曰彦博之才德亦韩富之流亚也三公皆社稷重臣兼资文武辉映四朝迭居将相而彦博尤眉寿名施蛮貊天下想望其风采焉自熙宁元丰以後一切舍其旧而新是图使嘉佑遗老噤不得施用惜夫蜀锦一事爲唐介所论古今莫能明也惟闻见录云其家遗之而彦博不知盖得其实矣

赵拚

赵拚字阅道衢州人进士及第爲武安军节度推官知崇安海陵江原三县通判泗州濠守给士卒廩赐不如法声言欲变守惧不出转运使檄拚摄治之拚至从容如平时州以无事曾公亮荐爲殿中侍御史弹劾不避权幸声称凜然京师目爲铁面御史其言常欲朝廷别白君子

小人以爲小人虽小过当力排而絕之後乃无患君子不幸而有诖误当保全爱惜以成就其德论宰相刘沆陈执中宣徽使王拱辰翰林学士李淑不称职皆罢去台諫吴充鞠真卿刁约马遵吕景初吴中复皆以直言相继被逐以拚言得召还欧阳修贾黯复求郡拚言近日正人端士纷纷引去侍从之贤如修辈无几今皆欲去者以正色立朝不能諂事权要伤之者衆耳修黯由是得留正人赖以复安出知睦州睦岁爲杭市羊拚移文却之民籍有茶税而无茶地拚奏蠲之移梓州路转运使改益州蜀地远民弱吏肆爲不法州郡公然相馈赂拚以身帅之蜀风爲变穷城小邑民或生而不识使者拚行部无不至父老喜相慰奸吏竦服召爲右司諫力论内侍邓保信引退兵董吉烧炼禁中以文成五利郑注爲比又论陈升之奸邪交结宦官求进章二十余上升之去拚亦罢知州素难治拚御之严而不苟召戒诸县令使人自爲治令皆喜争尽力狱以屡空岭南仕宦旅死不能归者拚造舟百艘移告诸郡并资其道里费相继归之召爲侍御史改度支副使进天章阁待制河北都转运使时贾昌朝以故相守魏拚至即按视府库昌朝甚不悦前此有诏募义勇过期不能办官吏当坐者八百余人拚被旨督之奏言河北频岁丰熟故应募者少请寬其罪以俟农隙从之坐者获免而募亦随足昌朝愧服加龙图阁直学士知成都以寬爲治拚先在蜀日有聚衆爲妖祀者治以峻法及是复有此狱皆谓不免拚察其无他止刑首恶余释不问蜀民大悦英宗尝称之曰赵拚爲成都中和之政也神宗立召知諫院入谢帝曰闻卿匹马入蜀以一琴一鹤自随爲政简易亦称是乎未几擢参知政事拚感激知遇知无不言朝政有未协者必密启闻帝手诏褒答时王安石用事拚屡斥其不便韩琦上疏极论青苗法帝语执政令罢之安石时属疾求去拚曰新法皆安石所建不若俟其出自罢之既出安石持之愈坚拚大悔恨即上言制置条例司建使者四十辈骚动天下安石强辯自用诋天下公论以爲流俗违衆罔民顺非文过近者台諫侍从多以言不听而去司马光除枢密不肯拜且财利于事爲轻而民心得失爲重青苗使者于体爲小而禁近耳目之臣用舍爲大今去重而取轻失大而得小非社稷之福也奏入恳乞去位以资政殿学士知杭州改青州因其俗朴厚临以清静时山东旱蝗青独多麦蝗来及境遇风退飞墮水而尽会成都忧戍卒爲变帝以拚有遗爱于蜀欲令复知成都召见劳之曰前此未有自政府往者能爲朕行乎拚曰陛下所言即法也顾岂有例哉因乞便宜从事既至蜀治益尚寬有卒长立堂下呼谕之曰吾与汝年相若吾以一身入蜀爲天子抚一方汝亦宜清谨畏戢以率衆比戍还得余赀持归爲室家计可也人喜转相告莫敢爲恶蜀郡晏然劔州民私作僧度牒或以爲谋逆告拚拚不畀狱吏以意决之悉从轻比谤者谓其纵逆党朝廷取具狱阅之皆与法合改知越州是时吴越大饥拚前民之未饥爲书问属县灾所被者几乡民能自食者有几当廩于官者几人沟防构筑可僦民使治之者几所库钱仓粟可发者几何富人可募出粟者几家僧道士食之羨粟书于籍者其几具存使各书以对而谨其备州县吏録民之孤老疾弱不能自食者二万一千九百余人以告故事岁廩穷人当给粟三千石而止拚敛富人所输及僧道士食之羨者得粟四万八千余石佐其费使自十月朔人受粟日一升幼小半之忧其衆相蹂也使受粟者男女异日而人受二日之食忧其且流亡也于城市郊野爲给粟之所凡五十有七使各以便受之而告以去其家者勿给计官爲不足用也取吏之不在职而寓于境者给其食而任以事不能自食者有是具也能自食者爲之告富人无得闭粜又爲之出官粟得五万二千余石平其价予民爲粜粟之所凡十有八使粜者自便如受粟又僦民完城四千一百丈爲工三万八千计其佣与钱又与粟再倍之民取息钱者告富人纵予之而待熟官爲责其偿弃男女者使人得收养之明年春大疫爲病坊处疾病之无归者募僧二人属以视医药饮食

令无失时凡死者使在处随收瘞之法廩穷人尽三月而止是岁尽五月止拚于是时竭尽心力早夜不懈给病者药食多出私钱凡事有非便文者一以自任不烦其属有上请者或便宜多辄行民得免于转死虽死得敛埋皆拚之力也又两浙旱蝗米价踊贵诸州皆榜衢路禁增米价拚独榜衢路令有米者任增价粜之于是诸州米商辐辏诣越米价更贱民无饥者复徙知杭州杭爲天下剧郡拚从容爲之其政本于孝悌然不严而肃民莫敢犯元丰二年以太子少保致仕朝廷官其子帆提举两浙常平以便养帆奉拚遍游名山吴人以爲荣七年卒年七十七赠太子少师谥清献拚长厚清修人不见其喜愠平生不治产业不畜声伎嫁兄弟之女十数人他孤女二十余人施德悖贫不可胜数日所爲事夜必焚香告天不可告者则不敢爲也其爲政善因俗施設寬猛不同要之以惠利为本在?与成都尤为世所称道神宗每诏二郡守必以拚为言韩琦尝称拚真世人标表初拚以母丧庐于墓三年不宿于家县榜其所居里为孝悌处士孙侔为作孝子传及帆执父丧而甘露降墓木帆卒子云又以毁死人称其世孝论曰拚之治郡所居而理固其经画之才有以过人欤抑清慎诚恪有不言而化者欤史所载他事仅得其槩独越州救灾见于曾巩所记者甚详诚可为後世法则知名人贤士救民恤物其法行于当时而不传于後世者盖不可胜数也拚之每夜告天而清修不迹声色则其中有以自得者非独其外之云尔

蔡襄

蔡襄字君谟兴化仙游人举进士为西京留守推官馆阁校勘范仲淹以言事去余靖尹洙同贬欧阳修移书责司谏高若讷亦贬襄作四贤一不肖诗都人争相传诵庆历三年仁宗亲擢修靖及王素为谏官襄又以诗贺且勉之三人者以其诗闻于上帝亦命襄知谏院襄喜言路开而虑正人难久立也乃上疏曰朝廷增用谏臣而修靖素一旦并命朝野相庆三人忠诚刚正必能尽言臣恐邪人不利必造为三说以御之一曰好名夫忠臣引君当道论事惟恐不至若避好名之嫌则无可言之路矣二曰好进夫前世谏者之难激于忠愤患且不避何好进之有苟得尽其职虽死是官犹无悔也三曰彰君过谏争之臣盖以司过举耳人主听而行之足以致从谏之誉何过之能彰乎惟陛下察之时有旱蝗日食地震之变襄以为灾害之来皆由人事原其所致君臣上下皆阙失也不专听断不揽威权使号令不信于人恩泽不及于下此陛下之失也持天下之柄司生民之命无嘉谟异画以矫时弊不尽忠竭节以副任使此大臣之失也朝有弊政而不能正民有疾苦而不能去陛下寬仁少断而不能规大臣循默避事而不能斥此臣等之罪也陛下既有引过之言达於天地神只矣愿思其实以应之疏出闻者皆悚然进直史馆兼修起居注开宝浮图灾下有旧瘞舍利诏取以入宫人多灼臂落发者议复营之襄谏曰非理之福不可徼幸今生民困苦四裔骄慢陛下当修人事奈何以佛法邀福乎天之降灾以示儆戒顾大兴功役是将以人力排天意也吕夷简平章国事宰相以下就其第议事襄奏请罢之元昊纳款始自称乌珠既又译为吾祖襄曰吾祖犹云我翁慢侮甚矣使朝廷赐之诏而亦曰吾祖是何等语耶夏竦罢韩琦范仲淹在位襄言陛下罢竦而用琦与仲淹士大夫贺于朝庶民歌于路虽然以治疾譬之陛下既得良医矣信任不疑非徒愈病而又壽民医虽良术不得尽用虽有和扁难责效矣保州卒作乱推懦兵十余辈为首恶杀之以求招抚襄曰天下兵百万苟无赏罚必行之令必开骄慢暴乱之源今州兵戕官吏闭城门不能讨从而招之岂不为四方笑乞将兵入城诛之诏从其议时天子慨然思正百度以兴太平襄感

帝知遇每论事奋发无所回避权幸畏敛不敢挠法干正以母老求知福州改福建路转运使开古五塘溉民田奏减五代时丁口税之半复修起居注唐介攻宰相触盛怒襄趋进曰介诚狂愚然出于进忠必望全贷既贬春州襄又上疏以为此必死之谪得改英州进知制诰御史吕景初吴中复马遵坐论丞相梁适罢台职除他官襄封还词头不草制後每除授非当辄封还之帝遇襄益厚曰有子如此其母之贤可知命特赐冠帔以宠之又亲书君谟二字遣使特诏予之迁龙图阁直学士知开封府襄精吏事谈笑剖决破奸发引吏不能欺以枢密直学士再知福州往时闽士多好学而专用诗赋以应科举襄得郡士周希孟陈烈陈襄郑穆皆以行义着襄备礼招延以经术教授学者至数百人襄亲至学舍执经讲问为诸生率俗重凶仪亲亡或秘不举至破产饭僧襄下令禁止之徙知泉州距州二十里万安渡絶海而济往来畏其险襄立石为桥梁其长三百六十丈种蛎于础以为固至今赖焉又植松七百里以庇道路闽人刻碑纪德召为翰林学士三司使较天下盈虚出入量力以制用剗剔蠹弊簿书纪纲纖悉皆可法英宗立以端明殿学士知杭州治平三年丁母忧明年卒年五十六赠吏部侍郎襄工于书为当时第一仁宗尤爱称之御制元舅陇西王碑文诏襄书之其後命学士撰温成皇后父碑又勅襄书辞曰此待诏职也乾道中赐諡忠惠

论曰苏轼有言臣尝逮事仁宗皇帝窃观四十余年间左右前後之人其大者固已光明俊伟深厚雄杰不可窥较其小者犹能敦朴恺悌靖恭持重号称长者是以天人和同上下欢心而福祿无穷云若襄者盖深厚雄杰之一也当其在朝受仁宗顾遇所言皆当世初务而人之所不敢言及退历州郡诘奸惠良以富而教其丰功殊蹟施于後代者历久犹未忘也岂不伟哉

史传三编卷三十一

卷三十二

钦定四库全书

史传三编卷三十二

大学士朱轼撰

名臣传二十四

宋

司马光

司马光字君实陕州夏县人父池天章阁待制光生七岁俨然如成人闻讲左氏春秋即了其大指羣儿戏于庭一儿登瓮没水中衆皆弃去光持石破瓮水迸出儿得活宝元初中进士甲科除奉礼郎求便养通判苏州时年尚少每卧斋中忽蹶起公服执手板危坐人问其故荅曰吾时忽念天下事夫以天下安危为念岂可不敬耶丁内外艰毁瘠如礼服除判武成军改大理评事国子直讲龐籍荐为馆阁校勘同知礼院中官麦允言死给卤簿光言繁纓以朝孔子且犹不可允言近习臣非有元勲大劳而赠以三公给一品卤簿其视繁纓不亦大乎夏竦赐諡文正光驳之改文庄从龐籍辟判并州改直秘阁开封府推官交趾贡异兽指为麟光言诚伪不可知使其真非自至不为瑞若伪为远人笑愿厚赐而还之修起居注判礼部有司奏日食不满分或京师不见皆当贺光言四方皆见京师不见不当贺从之同知諫院苏辙荅策切直考官胡宿将黜之赖光言诏至未级初至和三年仁宗不豫太子未立天下寒心光上疏请择宗室贤者使摄储贰不然则典宿卫尹京邑亦足以系天下望疏三上一留中二付中书至是复面言臣昔判并州所上三章愿陛下果断力行帝沉思久之曰得非欲选宗室为继嗣者乎此忠言但人不敢及耳光退复上疏曰臣向者进说陛下欣然听纳谓即行矣今寂然无闻此必有小人言陛下春秋鼎盛何遽为此小人无远虑特欲仓卒之际遂其私谋耳帝大感动曰送中书光至中书见韩琦等曰诸公不及今定议异日夜半禁中出寸纸以某人为嗣则天下莫敢违琦等拱手曰敢不尽力未几诏英宗判宗正辞不就立为皇子又称疾不入光言皇子辞不赘之富至于旬月其贤于人远矣然父召无诺君命召不俟驾愿以臣子大义责皇子宜必入英宗遂受命改天章阁待制兼侍讲知諫院时朝政尚姑息等威浸以凌迟如胥吏喧譁羣官悖慢卫士凶逆军卒詈三司使光抗疏皆请以法正之充媛董氏薨赠淑妃辍朝成服定諡行册礼葬给卤簿光言董氏秩本微病革方拜充媛古者妇人无諡近制惟皇后有之卤簿本以赏军功未尝施於妇人唐平阳公主有佐高祖定天下之功乃得给至韦庶人始令妃主葬日皆给鼓吹非令典不足法及有司定後宫封赠法后与妃俱赠三代光又言妃不当与后同袁盎引却慎夫人席正为此耳天圣亲郊太妃止赠二代况妃乎英宗立遇疾太后同听政光上疏言昔章献明肃有保佑先帝之功特以亲用外戚小人负谤海内今摄政之际大臣

有忠厚如王曾清纯如张知白刚正如鲁宗道质直如薛奎者当信用之猥鄙如马季良谄谀如罗崇勲者当疎远之则天下服帝疾愈太后还政光上疏言治身莫先于孝治国莫先于公皆母子间人所难言者及议濮王典礼光言汉宣帝为昭帝後终不追尊卫太子史皇孙光武上继元帝亦不追尊钜鹿南顿君此万世法也复诏两制集议学士王珪等相视莫敢先光独奋笔书曰为人後者为之子不得顾私亲王宜准封赠期亲尊属故事称为皇伯高官大国极其尊荣珪即命吏以其手稿为案太后既还政诏以曹佺为使相两府皆还官光言陛下欲以慰母心而迁除无名则宿卫将帅内侍小臣必有觊望已而迁都知任守忠等官光抗疏言守忠大奸陛下为皇子非守忠意沮坏大策离间百端赖先帝不听及陛下嗣位反覆交构国之大贼乞斩于都市以谢天下诏责守忠节度副使蕲州安置天下快之韩琦建议刺陕西义勇二十万光抗言民情惊扰实不可用琦曰兵贵先声使贼骤闻益兵二十万岂不震懾光曰此但可欺之目前耳不过十日彼将知其详尚何惧琦曰君但见庆历间乡兵刺为保捷忧今复然已降勅榜与民约永不充军戍边矣光曰前屡失信于民虽光亦未敢保也琦曰吾在此君无忧光曰公长在此可也异日他人当位因公见兵用之运粮戍边反掌间事耳琦默然不说不十年皆如光虑王广渊除直集贤院光论其奸邪且曰昔汉景帝重卫绾周世宗薄张美广渊当仁宗之世私结于陛下岂忠臣哉宜黜以厉天下进龙图阁直学士神宗即位擢翰林学士晋御史中丞疏论修心之要三曰仁曰明曰武治国之要三曰官人曰赏信曰必罚其说甚备且曰昔臣为谏官即以此献仁宗其後以献英宗今以献陛下云还为翰林兼侍读学士光常患历代史繁人主不能遍览为通志八卷以献英宗悦之命置局秘阁续成其书至帝尤重之以为贤于荀悦汉纪名之曰资治通鉴自为制序赐以颍邸旧书二千四百卷数促成之西戎部将嵬名山欲以横山之衆取谅祚以降诏边臣招纳其衆光极论不可以为名山之衆未必能胜谅祚幸而胜之灭一谅祚生一谅祚何利之有若其不胜必引衆归我不知何以待之臣恐朝廷不特失信于谅祚又将失信于名山矣若名山余衆尚多还北不可入南不受必将突据边城以救其命陛下独不见侯景之事乎帝不听遣种諤发兵迎之取绥州费六十万西方用兵盖自此始百官上尊号光言先帝亲郊不受尊号末年有献议者谓契丹往来通信彼有尊号我独无于是复以非时奉册昔匈奴冒顿自称天地所生日月所置匈奴大单于不闻汉文帝复为大名以加之也愿追述先帝本意不受此名帝大悦手诏獎光使为荅诏以示中外执政以河朔灾伤国用不足乞南郊勿赐金帛诏学士议光与王安石同见光曰救灾节用宜自贵近始可听也安石曰常衮辞堂饌时以为衮自知不能当辞位不当辞禄且国用所以不足者以未得善理财者耳光曰善理财者无亦头会箕歛尔安石曰不然善理财者不加赋而用足光曰天下安有此理天地所生财货百物不在民则在官彼设法夺民其害乃甚于加赋此盖桑宏羊欺武帝之言至其末年盗贼蜂起几至于乱争议不已帝曰朕意与光同然姑以不允荅之及安石得政创立制置三司条例司建青苗助役水利均输之法置提举官四十余员光逆陈其利害曰某事後当如是某事後当如是行之十余年无一不如光言者一日迺英进读至曹参代萧何事帝曰汉常守萧何之法不变可乎对曰宁独汉也使三代之君常守禹汤文武之法虽至今存可也汉武取高帝法纷更之盗贼半天下元帝改孝宣之政汉业遂衰後数日吕惠卿进讲因言先王之法有一年一变者正月始和布法象魏是也有五年一变者巡狩考制度是也有三十年一变者刑罚世轻世重是也光言非是帝以问光光曰布法何名为变若四孟月朔属民读法为时变月变耶诸侯有变礼易乐者王巡狩则诛之王不自变也刑新国用轻典乱国用重典平国用中典是为世轻世重非变也且治天下譬如居室敝则

修之非大坏不更造也三司使掌天下财不才而黜可也不可使执政侵其事今为制置三司条例司何也宰相以道佐人主尚安用例苟用例则一胥吏足矣今为看详中书条例司何也惠卿不能对讲毕帝屏左右曰朝廷每更一事举朝汹汹何也光曰青苗出息平民为之尚能以蚕食下户况县官法令之威乎惠卿曰青苗法愿取则与之不愿勿强也光曰愚民知取债之利不知还债之害非独县官不强富民亦不强也昔太宗平河东立和籴法时米斗十余钱民乐与官为市後物贵而和籴不解遂为河东世世之患臣恐异日之青苗犹河东之和籴也帝曰坐仓籴米何如光曰京师有七年之储而钱常乏若坐仓钱益乏米益陈奈何惠卿曰坐仓得米百万斛则省东南百万之漕以其钱供京师何患无钱光曰东南钱荒而米狼戾今不籴米而漕钱弃其有余取其所无农末皆病矣侍讲吴申曰光言至论也光曰此皆细事不足烦人主但当择人而任之有功则赏有罪则罚此陛下事也帝曰然他日留对帝曰今天下汹汹孙叔敖所谓国之有是衆之所恶也光曰然陛下当论其是非今条例司所为独安石韩絳惠卿以为是耳天下皆以为非也陛下岂能独与此三人共为天下耶陈升之为相帝谓光外议如何光曰升之诚有才智但恐不能临大节而不可夺耳又问安石何如光曰人言安石奸邪则毁之太过但不晓事又执拗耳问吕惠卿光曰惠卿儉巧非佳士使安石负谤中外皆惠卿所为也帝曰惠卿明辨亦似美才光曰惠卿文学辨慧诚如圣旨然用心不端江充李训若无才何以动人主因论及台谏光曰台谏天子耳目陛下当自择人今言执政短长者皆斥逐之尽易以执政之党臣恐聪明将有所蔽蒙也帝曰谏官难得卿更为朕择其人光退而举苏轼王元规赵彦若等韩琦上疏论青苗之害帝感悟欲罢其法安石卧家不起帝乃拜光枢密副使光辞曰陛下所以用臣盖察其狂直庶有补于国家若徒以禄位荣之而不取其言是以天官私非其人也臣徒以禄位自荣而无所裨益是盗窃名器以私其身也陛下诚能罢制置条例司追还提举官不行青苗助役等法虽不用臣臣受赐多矣今言青苗之害者不过谓使者骚动州县为今日患耳臣之所忧乃在十年之外非今日也夫出钱贷民而敛其息富者既不愿取而使者以多散为巧一切抑配又恐其逋负必令贫富相保贫者无可偿则散而之四方富者不能去必责使代偿数家之负春算秋计展转日滋贫者既尽富者亦贫十年之外百姓无复存者矣又尽散常平钱谷专行青苗他日富室既尽常平已废加之以师旅因之以饥馑民之羸者委死沟壑壮者聚而为盗贼此事之必至者也抗辞至七八帝使谓之曰枢密兵事也官各有职不当以他事为辞对曰臣未受命则犹侍从也于事无不可言者安石起视事光遂求去以端明殿学士知永兴军本路宣抚令分义勇戍边选诸军骁勇及市井恶少年为奇兵调民造乾糲修城池楼櫓关辅骚然光一切不从而上言公私困敝不可举事京兆一路皆内郡缮治非急若乏军兴臣当任其责于是路独得免徙知许州请判西京御史台归洛自是絶口不论事熙宁七年天下旱蝗诏求直言光读诏泣下乃复上陈其尤病民者凡六事请先罢之一青苗二免役三市易四边事五保甲六水利又以言责宰相吴充曰天子仁圣如此而公不言何也蔡天申为察访妄作威福河南尹转运使事之如上官会朝谒应天院神御殿府独为设一班光顾台吏曰引蔡寺丞归本班吏即引天申立监竹木务官富赞善之下天申窘沮即日行帝尝谓蒲宗孟曰如光未论别事只辞枢密一节朕即位以来惟见此人又云如光者常在左右自可无过及元丰官制成帝指御史大夫曰非司马光不可为蔡确所沮而止帝感疾既安语宰辅曰来春建储以司马光吕公着为师保其知之深如此光归洛十五年天下望其为相田夫野老皆号为司马相公妇人孺子亦知其为君实也神宗崩光赴阙卫士望见皆以手加额曰此司马相公也所至民遮道聚观马不得行曰公无归洛留相天子活百

姓时哲宗幼冲太皇太后临政遣使问政所当先光言近岁士大夫以言为讳闻阁愁苦于下而上不之知明主忧勤于上而下无所诉其罪在羣臣而愚民无知归怨先帝宜下诏旨首开言路从之而大臣有不欲者于诏中设六事曰若陰有所怀犯非其分或扇摇机事之重或迎合已行之令上以观望朝廷之意以侥幸希进下以眩惑流俗之情以干取虚誉若此者罚无赦太皇太后封诏草以问光光曰此非求谏乃拒谏也人臣惟不言言则入六事矣请改诏书从之于是四方吏民言新法不便者以千数光方草具所当行者而太后已令散遣修京城逻卒罢减皇城內覩者止御前工作出近侍之无状者三千余人戒饬中外无敢苛刻暴敛废导洛司物货場及民间户马寬保马限旨皆中出大臣不与光上疏谢于是召光拜为門下侍郎是时民日夜引领以观新政光慨然建议罢保甲团教废市易法所儲物皆鬻之不取息民所欠钱皆除其息京东铸铁钱河北江西福建湖南盐及福建茶法皆复其旧独川陕茶以边用未罢遣使相视去其甚者户部钱谷皆领之尚书三司使事有散隶五曹及寺监者皆归户部使尚书周知其数量入以为出请立经明行修科以勉励天下敦士行示不专取文学之意于是诏自今凡遇科举令升朝官各举经明行修之士一人如进士高选又以人才难兼长若专引知识则嫌于私若止修资序未必皆才奏立德行文学吏事武略等十科侍从以上每岁于十科举三人中书置籍记之有事须材执政按籍视其所举科随事试之有劳又书之籍内外官阙取尝试有效者随科授职所赐告命仍具所举官姓名其人任官无状坐其举主当光之将改新法也或谓光曰熙丰旧臣多儉巧小人他日有以父子义间上则祸作矣光正色曰天若祚宋必无此事遂改之不疑元佑元年拜尚书左仆射时光已得疾而青苗免役将官之法犹在西戎之议未决光叹曰四患未除吾死不瞑目矣折简与吕公着曰光以身付医以家事付愚子惟国事未有所托今以属公乃论免役五害乞降勅罢之诸将兵皆隶州县军政委守令通决废提举常平司以其事归之转运提点刑狱边计以和戎为便谓监司多新进少年务为刻急令近臣于郡王中选举而於通判中举转运判官皆从之诏免朝谒许乘肩輿三日一入省光不敢当曰不见君不可以视事诏令子康扶入对且曰母拜遂罢青苗钱复常平糴余法两宫虚已以听光自见言行计从欲以身徇社稷躬亲庶务不舍昼夜宾客见其体羸举诸葛亮食少事烦以为戒光曰死生命也为之益力病革不复自觉谆谆如梦中语然皆朝廷天下事也是年九月卒年六十八太皇太后闻之恸与帝即临其丧赠太师温国公诏户部侍郎赵瞻内侍冯宗道护丧归葬謚文正赐碑曰忠清粹德京师人罢市往吊鬻衣以致奠巷哭以过车及葬哭者如哭其私亲岭南封州父老亦相率具祭都中及四方皆画像以祀饮食必祝光孝友忠信恭儉正直居处有法动作有礼自少至老语未尝妄自言吾无过人者但平生所为未尝有不可对人言者耳诚心自然天下敬信陕洛间皆化其德有不善曰君实得无知之乎于财利纷华淡然无所嗜博学无不通音乐律历天文书数皆极其妙晚尤好礼为冠婚丧祭法酌古今之宜不喜释老曰其微言不能出吾书其诞吾不信不事生产买第洛中仅蔽风雨有田三顷丧妻卖田以葬恶衣菲食以终其身与兄旦友爱尤笃旦年将八十光奉之如严父保之如婴儿每食少顷则问曰得无饥乎天少冷则抚其背曰衣得毋薄乎初赴阙时苏轼自登州召还缘道人相聚号呼曰寄谢司马相公母去朝廷厚自爱以活我辽夏使至必问光起居勅其边吏曰中国相司马矣母轻生事开边隙及徽宗时蔡京擅政撰党人碑以光为首令郡国皆刻石长安石工安民当镌字辞曰民愚人固不知立碑之意但如司马相公者海内称其正直今谓之奸邪民不忍刻也府官怒欲加罪泣曰被役不敢辞乞免镌安民二字于石未恐得罪于後世闻者愧之光之修资治通监以刘放刘恕范祖禹等为属官十九年方成合

三百五十四卷文集八十卷他着述二十种云

论曰宋至元丰之末仁英之遗老凋谢畧尽光与吕公着范纯仁等废居田野年皆垂暮而吕蔡章曾之党上自公卿侍从外至州郡盘根连体布满于天下黷货殃民怙兵专杀当是之时宇内既已困人心既已去事势既已坏而宣仁太后以耄期女主熟观三朝之变态慨然发愤思致太平进用耆艾与百姓更始虽数年之间功效着见譬犹返照之光不可以久而绍圣以後数十年衰剥之运其势方兴已如北风凄厉霰雪交下奔腾澎湃而不可止彼奸逆之炽盛虽在窜斥伏匿之中尚能举指摇目恫疑虚喝使当事之人寒心自危变色却顾或倡为调停之论或遂就中立之谋岂不知其不可哉其气焰使之然也光以旧臣起家值两宫之顾遇誓心刻骨区理衆事如救溺追亡惟恐不及保甲青苗之法更革於前章惇蔡确之徒放流于後期月之顷百度

吕公着

吕公着字晦叔幼嗜学至忘寝食父夷简器之曰他日必为公辅恩补奉礼郎登进士第通判颍州郡守欧阳修荐公着文学行谊宜在左右清静寡欲有古君子之风判吏部南曹仁宗獎其恬退赐五品服除崇文院检讨同判太常寺寿皇观会营真宗神御殿公着言先帝已有三神御而建立不已殆非祀无丰昵之义改天章阁待制兼侍读与司马光同侍经筵光退语人曰每闻晦叔讲便觉已语为烦一日讲人不知而不愠不亦君子乎公着言在下而不见知于上者有之然在上者亦未有见知于下者也故古之人君政令有所未孚人心或有未服则反身修德而不以愠怒加之如舜之诞敷文德文王之皇自敬德是也帝改容颔之英宗治平初奏请日御迺英以循先帝故事又以尚书备二帝三王之道尤切于治术乞候进讲论语毕日进讲尚书从之加龙图阁直学士方议追崇濮王或欲称崇伯考公着曰此真宗所以称太祖岂可施于王及下诏称亲且班讳公着又言称亲则有二父之嫌王讳但可避于上前不应与七庙同制吕海等坐议濮王礼去公着争之不听遂乞补外将行上言臣伏见程颐年三十四有特立之操出羣之姿嘉佑四年已与殿试报罢自後絶意进取旧在太学诸生愿得以为师臣方领国子监亲往敦请卒不能屈臣尝与之语洞明经术通古今治乱之要实有经世济物之才使在朝廷必为国器望不次补用神宗立召为翰林学士知通进银台司司马光以论事罢中丞还经幄公着封还其命曰光以举职赐罢是为有言责者不得尽其言也诏以告直付阁门公着又言制命不由门下则封驳之职因臣而废愿理臣之罪以正纪纲帝曰所以徙光者赖其劝学耳非以言事故也公着请不已罢知开封府时夏秋淫雨京师地震公着疏言君人者去偏听独任之弊而不主先入之言则不为邪说所乱顔渊问为邦而孔子告以远佞人盖佞人易亲正人易疎惟陛下察之又荐周敦颐擢为广东转运判官礼官用唐故事请以五月御大庆殿受朝因上尊号公着曰陛下方度越汉唐追复三代何必于陰长之日为非礼之会受无益之名从之二年拜御史中丞入对帝语及西陲事公着曰惟当严修武备来则应之以逸待劳若临遣大臣张皇武事或议深入或求奇功皆非国家至计也时程颢为晋城令公着荐为监察御史又荐张载为崇文院校书王安石方行青苗法公着极言之曰自古有为之君未有失人心而能图治亦未有胁之以威胜之以辨而能得人心者也昔日所谓贤者皆以此举为非而主议者一切诋为流俗浮论岂昔皆贤而今皆不肖耶安石怒其深切帝使举吕

惠卿为御史公着曰惠卿固有才然奸邪不可用帝以语安石安石大怒诬以恶语出知颍州熙宁八年彗星见诏求直言公着上疏曰陛下临朝愿治为日已久而左右前後莫敢正言使陛下有欲治之心而无致治之实此任事之臣负陛下也古之为政初不信于民者有之若子产治郑一年而人怨之三年而人歌之陛下垂拱仰成七年于此然輿人之诵亦未有异于前日陛下独不察乎起知河阳迁端明殿学士帝从容与论治道遂及释老公着曰尧舜知此道乎帝曰尧舜岂不知公着曰尧舜虽知此而惟以知人安民为难所以为尧舜也帝又言唐太宗能以权智御臣下对曰太宗之德以能屈己从谏耳帝善其言未几同知枢密院事因奏熙宁以来朝廷议论不同端人良士例为小人所沮格指为沮坏法度不可复用此非国家之利帝曰当以次收用之帝以慈圣升祔推恩曹氏进官被赏者二百余人公着因言自古家国之败不过亲小人任宦官通女谒宠外戚数事而已帝深以为然元丰二年召程颢判武学李定何正臣劾其学术迂濶新法之初首为异论罢之公着上言颢立身行己素有本末昔在言路时有论列皆辞意忠厚不失臣子之体所除武学未为仕宦要津而小人断断以为不可者直欲深梗正路其所措意非特一二人而已不纳夏人幽其主秉常朝议讨之公着曰问罪之师当先择帅苟未得人不如勿举及兵兴秦晋民力大困公着又数上疏言其害元丰五年以疾乞罢出为定州安抚使至定谢表有曰进不敢希功而生事退不敢弛备以旷官及永乐城陷帝临朝叹曰边民疲弊若此独公着为朕言他人未尝及也时多献北伐之策者公着言中国与?丹通好日久塞上屯军素有节制惟宜静以镇之保甲法行边皆设教塲公着以为遣边人习战法于境上非管子寓令之意也请一切罢去不听哲宗即位以侍读还朝太皇太后遣使迎问所欲言公着曰先帝本意以宽省民力为先而建议者以变法侵民为务与己异者一切斥去故日久而病愈深法行而民愈困诚得中正之士讲求天下利病协力而为之宜不难矣至则上言曰人主即位之初当正始以示天下修德以安百姓修德之要莫先于学谨昧死陈十事以裨聪明一曰畏天二曰爱民三曰修身四曰讲学五曰任贤六曰纳谏七曰薄敛八曰去奢九曰省刑十曰无逸又乞备置谏员以开言路拜尚书左丞门下侍郎元佑元年拜尚书右仆射兼中书侍郎先是程颐在治平元丰间累荐皆不起至是公着与司马光共疏其行义于朝曰伏见河南处士程颐力学好古安贫守节言必忠信动遵礼法年逾五十不求仕进真儒者之高蹈圣世之逸民望擢以不次使士类有所矜式诏授崇政殿说书官制三省而建而中书独为取旨之地门下尚书奉行而已公着曰三省均辅臣也自今事干三省者乞同进取旨而各行之遂定为令初执政三五日一集都堂长官专决同列多不与议及公着秉政非有故日聚都堂遂为故事与司马光同心辅政推本先帝之志凡欲革而未暇与革而未定者一一举行之民謐呼鼓舞咸以为便光卒独当国除吏皆一时之选初光议凡役人皆不许雇人以代然东南及西蜀诸路民有高赀或子弟业儒皆当为弓手执贱役既不许募代甚苦之公着闻其弊即令一切听雇募民情大悦公着在仁宗朝尝请进士先策论神宗初又献议以经术取士及知熙宁二年贡举遂密启临轩专用策试未几王安石专政废去春秋撰定诸经说凡士子非新义不得用学者至不诵本经惟窃安石之书以干进精熟者得上第故科举益弊公着乃令禁主司不得以老庄命题经义参用古今诸儒说毋得专取王氏复贤良方正科右司谏贾易言事讦直将峻责公着以为言乃罢知怀州公着以为谏官所论得失未足言顾主上春秋方盛虑异时有进谏说惑乱者正赖左右争臣不可豫使人主轻厌言者其旨如此帝宴近臣于资善堂出所书唐人诗分赐公着乃集所讲书要语明白切于治道者百篇进之以备游意翰墨为圣学之助三年四月辞位拜司空同平章军国事诏建第于东府之南启北扉

以便执政会议凡三省枢密院之职皆得总理间日一朝因至都堂其出不以时盖异礼也明年二月卒年七十二太皇太后见辅臣泣曰邦国不幸司马相公既亡吕司空复逝痛闵久之帝亦悲感即诣其家临奠赐金帛万计赠太师申国公諡正献御书碑首曰纯诚厚德公着自少讲学即以治心养性为本平居无疾言遽色于声利纷华泊然无所好暑不挥扇寒不附火简重清静天禀自然其识虑深敏遇事善决苟便于国不以私利害动其心与人交出于至诚好贤乐善见士大夫以人物为意者必问其所知与其所闻参互考实以达于上每议政事博取衆善以为善至所当守则毅然不回夺神宗尝称其于人材不欺如权衡之称物尤能避远声迹不以知人自处安石博辨骋辞人莫敢与亢公着以精识约言服之安石尝曰疵吝每不自胜一诣长者即废然而返所谓使人之意消者于晦叔见之又曰晦叔作相吾辈可以言仕矣其敬重之如此

论曰昔魏文侯问相于李克克曰穷视其所与达视其所举足以定之文侯以魏成子所荐卜子夏田子方段干木皆当世名贤遂以魏成子为相公着同时如周程张邵皆絶德也公着屡上封章再三推轂非宏度远识殊絶于人乌能知当世之大贤哉元佑三相相继司马光尚矣经事综物斟酌权变范纯仁之才诚有以过人者至当轴处中凝然如止水招之不来挥之不去则公着有焉竭诚尽虑以忠国家则一也观公着之晰理论事语约而破的非夫心正理明者亦孰能与于斯

范纯仁

范纯仁字尧夫仲淹次子也始生之夕母李氏梦儿堕月中承以衣裾得之幼敏悟八岁能讲所授书以?为太常寺太祝皇佑元年中进士第调知武宁县以远亲不赴易长葛又不往仲淹曰今近矣何辞纯仁曰岂可重爵禄而轻去父邦耶仲淹门下多贤士如胡瑗孙复石介李觏之徒纯仁皆与之游昼夜肄业至夜分不寝置灯帐中及後已贵夫人收其帐如墨色以示子孙曰此汝父少时勤学灯烟迹也仲淹没始出仕以著作佐郎知襄城县兄纯佑有心疾奉之如父药膳居服皆躬亲之贾昌朝守北都请参幕府以兄辞宋庠荐试馆职以兄病不赴富弼责之曰台阁之任岂易得小官出常调亦难事何必苦辞纯仁曰富贵有命卒不就襄城民不事蚕织纯仁劝使植桑有罪而情轻者酌令植多寡除其罚故後人目其桑为著作林著作纯仁宰县时官也兄死葬洛阳韩琦富弼移书洛尹使助葬纯仁曰吾力足办岂宜愿公为哉改许州观察判官复知襄邑牧地旧不隶县卫士牧马践民稼纯仁捕杖之主者怒曰天子宿卫令敢尔耶白其事于上劾治甚急纯仁言养兵出于税亩若暴民田而不得问粮安所出诏释之且听牧地隶县时久旱不雨纯仁度必阙食遂籍境内贾舟谕之曰民将无食尔所贩五谷贮之佛寺中俟阙食时吾为汝主粲衆贾从命运贩不停所蓄数十万斛至春诸县皆饥独境内之民不知也治平中擢江东转运判官召为殿中侍御史时方议濮王典礼宰相韩琦参政欧阳修等议之崇之翰林学士王珪等议宜如先朝追赠期亲尊属故事纯仁言陛下受命仁宗而为之子与前代定策入继之主不同宜如王珪等议不听还所授告敕家居待罪既而皇太子手书尊濮王为皇夫人为后纯仁复言陛下以长君临御奈何使命出房闱异日或为权臣矫托之地非便也寻诏罢追尊起纯仁就职纯仁固请外遂通判安州改知蕲州历京西提点刑狱京西陕西转运副使召还神宗问陕西城郭甲兵粮储如何对曰城郭粗完甲兵粗修

粮储粗备帝曰卿之才朕所倚信何为皆言粗对曰粗者未精之辞如是足矣愿陛下且无留意边功恐边臣观望要功生事贻他时意外之忧拜兵部员外郎兼起居舍人同知谏院奏言王安石变祖宗法度掊克财利民心不宁书曰怨岂在明不见是图愿陛下图不见之怨帝曰何谓不见之怨对曰杜牧所谓天下之人不敢言而敢怒是也神宗嘉纳之曰卿善论事宜为朕条古今治乱可为监戒者乃作尚书解以进曰皆尧舜禹汤文武之事治天下无以易此愿深究而力行之加直集贤院同修起居注神宗多延见蹊逖小臣谘访阙失纯仁言小人之言听之若可采行之必有累盖知小忘大贪近昧远愿加深察又论吕诲不当罢御史中丞李师中不可守边薛向任发运使行均输之法于六路掊克生灵歟怨基祸安石以富国强兵之术启迪上心欲求近功忘其旧学尚法令则称商鞅言财利则背孟轲鄙老成为因循弃公论为流俗异己者为不肖合意者为贤人刘琦钱顗一言降黜在廷之臣方大半趋附陛下又从而驱之其将何所不至道远者理当驯致事大者不可速成人材不可急求积弊不可顿革倘欲事功亟就必为憊佞所乘宜速还言者而退安石答中外之望不听遂求罢谏职改判国子监去意愈确其所上章疏语多激切神宗悉不付外纯仁尽录申中书安石大怒乞加重贬神宗曰彼无罪姑与一善地命知河中府徙成都路转运使以新法不便戒州县未得遽行安石怒其沮格以事左迁知和州徙邢州未至加直龙图阁知庆州过阙入对神宗曰卿父在庆着威名卿随父既久兵法必精边事不熟纯仁恐帝喜边功即对曰臣儒家未尝学兵先臣守边时臣尚幼不复记忆且今日事势宜有不同陛下使臣缮治城垒爱养百姓愿竭愚忠若开拓侵攘乞别谋帅臣遂行环庆大饥餓殍满路纯仁发常平粟麦赈之僚属请奏而须报纯仁曰报至无及矣诸公但勿预吾独任其责或谤其所全活不实帝遣使按视会秋大稔民讙曰公实活我忍累公乎昼夜争输还之使者至已无所负邠宁间有丛冢使者曰全活不实之罪于此得矣发冢籍骸上之诏本路监司穷治乃前帅楚建中所封也朝廷治建中罪纯仁上言建中守法申请间不免有殍死者已坐罪罢去今缘按臣而复及建中是一罪再刑也建中以赎铜免种古诬熟羌为盗流南方过庆呼冤纯仁以属吏非盗也古避罪讼纯仁诏御史治于宁州纯仁就逮民万数遮马涕泗不得行至有自投于河者狱成古以诬告谪亦加纯仁他过黜知信阳军移齐州齐俗凶悍人轻为盗有西司理院系囚常满皆屠贩盗窃而督偿者纯仁曰此何不保外使输纳耶通判曰此释之复案官司往往待其以疾毙于狱中是与民除害尔纯仁曰法不至死以情杀之岂理也耶尽呼至庭下训使自新即释去期岁盗减大半丐罢提举西京留司御史台时洛中多耆旧纯仁与司马光皆好客而家贫相约为真率会脱粟一饭酒数行洛中以为胜事复知河中诸路閱保甲妨农论救甚力录事参军宋儋年暴死纯仁使子弟视丧小斂口鼻血出纯仁疑其非命按得其妾与小吏奸因置毒于酒而杀之遂正其罪哲宗立召为天章阁待制兼侍讲除给事中时宣仁太后垂帘司马光秉政将尽改熙宁元丰法度纯仁谓光去其太甚者可是差役一事尤当熟讲而缓行不然滋为民病愿公虚心以延衆论不必谋自己出谋必自己出则谄谀得乘间迎合矣役议或难回则请先行之一路以观其究竟光不从又曰按宁按问自首之法既已行之有司立文太深四方死者视旧数倍殆非先王宁失不经之意纯仁素与光同志及临事规正类如此光欲令进士由朝官保任然後应举又更贡举法纯仁曰举人难得朝士相知士族近京犹可寒远之士尤不易矣孟子恐不可轻废犹六经之春秋也光皆从之元佑初进吏部尚书同知枢密院事三年拜尚书右仆射兼中书侍郎学士苏轼以发策问为言者所攻韩维罢门下侍郎补外纯仁奏轼无罪而惟尽心于国事乞留之时朝议欲治熙宁元丰诸乱政者章惇蔡确邓绾等太师文彦博欲窜蔡确于岭峤

左相吕大防奏确私党甚盛不可不问纯仁皆力争以为不宜録人之过太深恐伤仁厚之化而司谏吴安诗正言刘安世交章击纯仁党确纯仁亦力求罢明年以观文殿学士知颍昌府踰年改太原府其境土狭民衆惜地不葬纯仁遣僚属收无主烬骨别男女异穴葬者三千余又推之一路葬以万计徙河南府再徙颍昌召还拜右仆射时吕大防欲引杨畏为谏议大夫纯仁曰谏官当用正人畏不可用大防不聽後畏得志凡可以害大防者无不至大防乃悔之宣仁太后寢疾召纯仁曰卿父仲淹可谓忠臣在明肃太后时惟劝明肃尽母道明肃上宾惟劝神宗尽子道卿宜似之纯仁泣曰敢不尽忠宣仁太后崩哲宗亲政纯仁乞避位哲宗语吕大防曰纯仁有时望不宜去可为朕留之即召入见问先朝行青苗法如何对曰先帝爱民之意本深但王安石立法过甚激以赏罚故官吏急切以致害民退而上疏言青苗之不便焉是时用二三大臣从中出侍从台谏官亦多不由进拟纯仁上言陛下初政四方拭目舜举皋陶汤举伊尹不仁者远纵未能如古人亦须极天下之选又羣小力排宣仁垂帘时事纯仁奏曰太皇保佑圣躬功烈诚心幽明共鉴议者不恤国事一何薄哉遂以仁宗禁言明肃垂帘事诏书上之曰望陛下稽仿而行以戒薄俗苏辙论殿试策问引汉昭变武帝法度事哲宗震怒曰安得以汉武比先帝辙下殿待罪羣臣莫敢言纯仁言武帝雄才大畧史无贬词辙以比先帝非谤也哲宗曰人谓秦皇汉武纯仁曰辙所论事与时也非人也哲宗少霁辙竟落职知汝州台谏言苏轼行吕惠卿告词因黜知英州纯仁上疏救之纯仁凡荐引人材必以天下公议其人不知自纯仁所出或曰为宰相岂可不牢笼天下士使知出于门下纯仁曰但愿朝廷进用不失正人何必使知出于我耶章惇为相纯仁力请外出知颍昌府又徙陈州初哲宗尝言贬谪之人殆似永废纯仁前贺曰陛下念及此尧舜用心也既而吕大防等窜岭表会明堂肆赦章惇先期言此数十人当终身勿徙纯仁闻而忧愤欲上疏申理之所亲劝以勿为触怒万一远斥非高年所宜纯仁曰事至于此无一人敢言若上心遂回所系大矣不然死亦何憾乃上疏曰大防等年老疾病不习水土炎荒非久处之地忧虞不测何以自存臣曾与大防共事多被排斥陛下所亲见臣之激切止是仰报圣德愿陛下断自宸衷将大防等引赦原放疏奏章惇诋为同罪贬知随州明年又贬武安军节度副使永州安置时纯仁疾失明闻命即时就道切戒子弟不得少有不平曰不见是而无闷尔曹勉之或谓近名纯仁曰七十之年两目俱丧万里之行岂其欲哉但区区爱君之心不能自己人若避好名之嫌则无为善之路矣至永州闻韩维责均州其子诉维执政日与司马光不合得免行纯仁诸子欲以纯仁与光议役法不同为请纯仁曰昔同朝论事不合则可汝辈以为今日之言则不可也有愧心而生不若无媿心而死遂止居三年徽宗即位钦圣显肃后同听政即日遣中使赐茶药谕曰知公先朝言事忠直今虚相位以待纯仁顿首谢不数月以观文殿大学士中太一宫使诏曰岂惟尊德尚齿昭示宠优庶几颺论嘉谋日闻忠告纯仁捧诏泣曰上果用我矣死有余责又赐药促入覲而纯仁已有疾乞归帝不得已许之乃曰范纯仁得一识面足矣遣上医视疾疾小愈诏赐医章服疾革神色不乱呼诸子口占遗表命门生李之仪次第之其畧曰盖尝先天下而忧期不负圣人之学此先臣所以教子而微臣资以事君又曰若宣仁之诬谤未明致保佑之忧勤不显本权臣以快其私愤非泰陵实谓之当然又曰未解疆場之严几空帑藏之积有城必守得地难耕凡八事建中靖国改元之旦受家人贺明日熟寐而卒年七十五诏赙白金三千两敕许洛官给其葬諡忠宣御书碑额曰世济忠直之碑纯仁坦易寛简不以声色加人谊之所在则挺然不少屈自为布衣至宰相廉俭如一所得俸赐皆以广义庄前後任子恩多先疎族没之日幼子五孙犹未官尝曰吾生平所学惟得忠恕二字一生用不尽以至立朝事君接待僚友

亲睦宗族未尝须臾离此也每戒子弟曰人虽至愚责人则明虽有聪明恕己则昏苟能以责人之心责己恕己之心恕人不患不至圣贤地位也又戒曰六经圣人之事也知一字则行一字要须造次颠沛必于是则所谓有为者亦若是岂不在人耶又曰人材难得欲随事有用则缓急无以应手七年之病三年之艾非储之以待则如病者何故雅以人材为己任每有荐引必先公议亲族子弟有请教者纯仁曰惟俭可以助廉惟恕可以成德其人书于坐隅终身佩服有文集五十卷纯仁每议论依于平恕不为已甚务以博大开上意忠厚革士风世谓使其言行于熙丰之时後必不至纷更尽申于元佑中必无绍圣大臣复讐之祸云

论曰纯臣忠信仁厚而长于治理观其在神宗之朝论王安石之弊及元佑之初与司马光争变法皆洞达机宜审于权变之要轻重得体可施而行其济世之畧同时诸人未能或之先也纯仁在朝事权归于同列所长未尽施用及其行于州郡仁足以惠下明足以诘奸立法经制民赖其利至于刑罚不用而梗顽化服非所谓中孚之吉可感豚鱼者耶而纯仁亦以此施之熙宁元丰之小人寬贷以愧其心恩惠以格其志而不知彼等皆资谗谄以致身历艰难而弥厉机变之窞牢结于心胷贪毒之性深入于骨髓以神宗之明安石之劲终身堕其术中而不悟纯仁乃欲收其桑榆之效终于揖盗养虎自贻其菑悲夫虽然纯仁之困而能亨穷不失正所谓造次颠沛必于是者殆于践其言也亦可谓贤矣

史传三编卷三十二

卷三十三

钦定四库全书

史传三编卷三十三

大学士朱轼撰

名臣传二十五

宋

范镇

范镇字景仁成都华阳人举进士礼部奏名第一故事殿廷唱第过三人则首礼部选者越次自陈率得置上列吴育欧阳修号称耿介亦从衆镇独不然同列屡趣之不为动调新安主簿西京留守宋绶荐为国子直讲召试学士院当得馆阁校理主司抑之补校勘镇处之晏如以龐籍荐授开封府推官擢起居舍人知諫院疏论民田困弊请约祖宗以来官吏兵数酌取其中为定制即今赋入之数以十之七为经费而储其三以备水旱非常又言古者冢宰制国用唐以宰相判盐铁度支今中书主民枢密主兵三司主财各不相知故财已匮而枢密益兵无穷民已困而三司取财不已请使中书枢密通知兵民财利大计与三司同制国用旧制商人输粟河北取偿京师而榷货不即予钞久而鬻之十才得其六或议出内帑钱稍增价与市岁可得羨五十万镇谓外府内帑均为有司今外府滞商人而内帑乘急以牟利殊伤国体帝遽止之及葬温成后太常议礼前谓之园後谓之陵宰相刘沆前为监护使後为园陵使镇曰尝闻法吏舞法矣未闻礼官舞礼也请诘前後异同状又请罢焚瘞锦绣珠玉以纾国用从之石全贊护葬转观察使他吏悉优迁两官镇言章献章懿章惠三后之葬推恩皆无此比乞追还全贊等告勅时有勅凡内降非准律令者并许执奏曾未一月大臣辄废不行镇乞正中书枢密之罪以示天下帝天性寛仁言事者竞为激讦至污人以帷箔不可明之事镇独务引大体非关朝廷安危生民利疚则濶畧不言陈执中相镇论其无学术非宰相器及嬖妾笞杀婢御史劾奏欲逐去之镇言今陰阳不和财匱民困盜賊滋熾狱犴充斥执中当任其咎御史舍大责细暴扬燕私若用此为进退是因一婢逐宰相非所以明等级辨堂陛也识者韪之时方禁百官不得谒宰相于居第及文彦博富弼入相诏令百官郊迎镇乃言隆之以虚礼不若开之以至诚乞罢郊迎而除谒禁以通天下之情仁宗在位三十五年未有继嗣嘉佑初得疾中外危恐镇独奋曰天下事尚有大于此者乎即上疏曰太祖舍其子而立太宗此天下之大公也周王既薨真宗取宗室子养之禁中此天下之大虑也愿陛下以太祖之心行真宗故事择宗室贤者异其礼物而试之政事以系天下心章累上不报因阖门待罪会有星变其占为急兵镇言国本未立若变起仓卒祸不可以前料兵孰急于此者乎陛下得臣疏不以留中而付中书是欲使大臣奉行也臣两至中书大臣设辞以拒臣是陛下欲为宗庙社稷计而大臣不欲

也臣窃原其意特恐行之而陛下中变耳夫中变之祸死而无媿急兵之忧死且有罪愿以此示大臣使自择而审处焉闻者为之股栗除兼侍御史知杂事镇以言不从固辞不受凡见帝面陈者三镇泣帝亦泣曰朕知卿忠卿言是也当更俟二三年章凡十九上待罪百余日须髮为白朝廷不能夺乃罢知谏院改集贤殿修撰判流内铨修起居注镇虽罢言职无岁不申前议见帝春秋益高每因事及之冀以感动帝意及除知制诰因入谢首言陛下许臣今复三年矣愿早定大计其後韩琦因之定策立英宗顷之拜镇翰林学士英宗即位议追尊濮王镇时判太常寺率礼官上言汉宣帝于昭帝为孙光武于平帝为祖则其父容可以称皇考然议者犹非之谓以小宗而合大宗之统也今陛下既考仁宗又考濮王则其失非特宣光之比矣凡称帝若考立寝庙皆非是于是具列仪礼及汉儒论议上之明年出知陈州视事三日擅发钱粟以贷饥民监司绳之急即自劾诏原之是岁陈州大熟神宗即位复为翰林学士兼侍读知通进银台司王安石改常平为青苗镇言常平之法始于汉之盛时视谷贵贱发敛以便农末最为近古不可改而青苗行于唐之衰世不足法且陛下疾富民之多取而少取之此正百步与五十步之间耳今有两人坐市贸易一人下其直以相倾夺则人皆知恶之其可以朝廷而行市易之所恶乎疏三上不报时韩琦极论新法之害送条例司疏驳李常乞罢青苗钱诏令分析司马光辞枢密副使诏许之镇又举苏轼为谏官而御史谢景温奏罢之举孔文仲制科文仲对策论新法不便罢归故官凡数事镇皆力争之不报遂上疏乞致仕疏中复言青苗有见效者不过岁得什百万缗钱缗钱什百万非出于天非出于地非出于建议者之家盖一出于民耳民犹鱼也财犹水也养民而尽其财犹养鱼而竭其水也疏五上最後指言安石以喜怒为赏罚且曰陛下有纳谏之资大臣进拒谏之计陛下有爱民之性大臣用残民之术安石大怒持其疏至手颤自草制极诋之以户部侍郎致仕镇表谢有曰臣虽乞身而去敢忘忧国之心望陛下集羣议为耳目以除壅蔽之奸任老成为腹心以养和平之福天下闻而壮之哲宗立韩维上言镇在仁宗朝首开建储之议而镇未尝以语人人亦莫敢为言者虽顔子不伐善介之推不言禄不能过也悉以镇十九疏上之拜端明殿学士将以为门下侍郎镇辞曰六十三而求去盖以引年七十九而复来岂云中礼再三强之卒不起以银青光禄大夫再致仕累封蜀郡公年八十一卒諡忠文镇清慎坦夷遇人必以诚口不言人过笃于行义兄鎡卒仅有遗腹子在外镇徒步求之两蜀间二年乃得之曰吾兄体有四乳是儿亦必然已而果然既仕临大节决大议色和而语壮无所回挠每遇奏补必先族人而後子孙乡人有不克婚葬者辄为主之少时学于龐直温其後直温子昉卒镇为养其妻子终身其学本六经口不道佛老契丹高丽皆传诵其文尤注意于乐自谓得古法既致仕请大府铜造器逾年乃成帝及太后御延和殿试之赐诏褒獎以乐下太常乐奏三日而镇卒然镇所主实房庶以律生尺之法司马光以为不然与之论难凡数千言云

论曰以司马光之贤当时镇与之齐名则其所守固有以服天下矣镇之忠直劲正始终一节其见义必为而不以利害祸福动其心盖刘安世之流使其得政居位而行所欲为又未知其孰先後也乃平居温厚坦夷以考经论乐为事又超然远矣

吕海

吕海字献可开封人端之孙也性纯厚家居力学不妄与人交登进士第由屯田员外郎为殿

中侍御史首言台谏许以风闻言事者盖欲广采纳补阙政苟非职分是为侵官今乃诋斥平生暴扬暧昧刻薄之态浸以成风请下诏惩革枢密副使程勘结权幸致位政地海论罢之嘉佑中上疏请早建皇嗣曰窃闻中外臣僚以圣嗣未立屡有密疏请择宗人惟陛下思忠言奋独断以遏未然之乱诚恐有奸臣附会其间阳为忠实以缓上心此为患最大不可不察也仁宗以海章付中书韩琦由此定义召为侍御史改同知谏院英宗不豫海请皇太后日命大臣一员与淮阳王视进药饵都知任守忠用事久英宗之立非守忠意数间东朝播为恶言内外汹惧海上两宫书开陈大义词旨深切多人所难言帝疾小愈海屡乞亲万几及太后归政海言于帝曰太后辅佐先帝历年閱天下事多矣事之大者宜关白咨访然後行示弗敢专遂论守忠罪恶并其党史昭锡鞶之南方内臣王昭明等为陕西四路钤辖专主蕃部海言自唐以来举兵不利未有不自监军者今走马承受官品至卑一路已不胜其害况钤辖乎卒罢之治平二年迁兵部员外郎兼侍御史知杂事上言台谏者人主之耳目旧三院御史常有二十员而後益衰减今台阙中丞御史五员惟三人在职封章十上报闻者八九谏官二人一他迁一出使言路壅塞窃为陛下惜之帝览奏即命邵必知谏院坐论濮王事下迁工部员外郎出知蕲州神宗立擢天章阁待制复知谏院拜御史中丞中旨下京东买金数万又令广东市珠海亟请罢之未几王安石执政时多谓得人独海言其不通时事大用之非所宜遂上疏劾安石曰大奸似忠大佞似信安石外示朴野中藏狡诈陛下悦其才辨而委任之初石初无远畧惟务改作立异罔上欺下文言饰非误天下苍生必此人也疏上出知邓州初安石始参政帝意向之海时召对崇政殿与司马光相遇于路海举手示光曰袖中弹文乃新参也光止之海曰安石虽有时名然好执偏见轻信奸回喜人佞已听其言则美施于用则疎若在侍从犹或可容置诸宰辅天下必受其祸矣且上新嗣位所与朝夕图议者二三执政而已苟非其人将败国事此乃心腹之疾救之惟恐不逮顾可缓耶海既斥安石益横光由是服海之先见自以为不及也明年改知河南命未下而海以疾表求致仕曰臣无宿疾偶值医者用术乖方殊不知脉候有虚实陰阳有顺逆诊察有标本治疗有先後妄投汤剂率意任情差之指下祸延四肢非祇憚????盤之苦又将虞腹心之变盖以一身之疾喻朝政也光及邵雍日就卧内问疾海所言皆国家事忧愤不能忘未尝一语及私一日手书托光以墓志光亟省之已瞑目矣光呼曰更有以见属乎海复张目曰天下事尚可为君实勉之遂卒年五十八海内闻者痛惜之元初初吕大防范纯仁刘贇表其忠诏赠通议大夫以子由庚为太常寺太祝

论曰安石初有盛名不悦者有韩琦张方平孙固李师中然着论以辨者惟苏洵特疏纠参者惟吕海而陆九渊以为洵之知安石非必特识盖其气味不相入耳海平生清苦劲厉比于安石传所称譬诸草木吾臭味也独能逆料其将然如烛照龟卜司马光推服之为不虚矣海临没勉光以天下事尚可为後二十年光再致元佑之盛海不及见矣及光卒而海之子由庚挽之云地下若逢中执法为言今日再昇平盖推其先人之意当时之人共悲惜之有以也夫

郑侠

郑侠字介夫福建福清人治平中随父官江宁闭户苦学王安石知其名邀与相见称獎之进士高第调光州司法参军安石居政府凡所施行民间不以为便光有疑狱侠献议传奏安石悉如其请侠感为知己思欲尽忠秩满入都时初行试法之令选人中式者超京官安石欲使

以是进侠以未尝习法辞三往见之问以所闻对曰青苗免役保甲市易数事与边鄙用兵在侠心不能无区区也安石不答侠退不复见但数以书言法之为民害者久之监安上门安石虽不悦犹使其子雱来语以试法方置修经局又欲辟为检讨更命其客黎东美谕意侠曰读书无几不足以辱检讨所以来求执经相君门下耳而相君发言持论无非以官爵为先所以待士者亦浅矣果欲援侠而成就之取其所献利民便物之士行其一二使进而无愧不亦善乎是时自熙宁六年七月不雨至于七年之三月人无生意东北流民每风沙霾暄扶携塞道羸疾愁苦身无完衣或茹木实草根至身被鎖械而负瓦揭木卖以偿官累累不絕侠知安石不可谏悉绘所见为图奏疏诣合门不纳乃假称密急发马递上之银台司其畧云去年大蝗秋冬亢旱麦苗焦枯五种不入羣情惧死方春斩伐竭泽而渔草木鱼鼈亦莫生遂灾患之来莫之或御愿陛下开仓廩赈贫乏取有司掊克不道之政一切罢去冀下召和气上应天心延万姓垂死之命今台谏充位左右辅弼又皆贪猥近利使无抱道怀识之士皆不欲与之言陛下以爵禄名器驾驭天下忠贤而使人如此甚非宗庙社稷之福也窃闻南征北伐者皆以其胜捷之势山川之形为图来献料无一人以天下之民质妻鬻子斩桑坏舍流离逃散遑遑不给之状上闻者臣谨以逐日所见绘一图但经眼目已可涕泣而况有甚于此者乎如陛下行臣之言十日不雨即乞斩臣宣德门外以正欺君之罪疏奏神宗反覆观图长吁数四袖以入是夕寝不能寐翌日命开封体放免行钱三司察市易司农发常平仓三卫具熙河所用兵诸路上民物流散之故青苗免役权息追呼方田保甲并罢凡十有八事民间謏叫相贺又下责躬诏求言越三日大雨远近沾洽辅臣入贺帝示以侠所进图状且责之皆再拜谢安石上章求去外间始知所行之由羣奸切齿遂以侠付御史治其擅发马递罪吕惠卿邓绾言于帝曰陛下数年以来忘寐与食成此美政天下方被其赐一旦用狂夫之言罢废殆尽岂不惜哉相与环泣于帝前于是新法一切如故安石去惠卿执政侠又上疏论之仍取唐魏徵姚崇宋璟李林甫卢杞传为两轴题曰正直君子邪曲小人事业图迹在位之臣暗合林甫辈而反于崇璟者各以其类复为书献之又荐冯京可相并言禁中有披甲登殿等事惠卿奏为谤仙编管汀州御史台吏谒忠信谒之曰御史緘嘿不言而君上书不已是言责在监门而台中无人也取怀中名臣谏疏二帙授侠曰以此为正人助惠卿暴其事喉御史张琥并劾冯京为党与时侠已行惠卿令奉礼郎舒亶往捕遇于陈州搜其篋得所録名臣谏疏有言新法事及亲朋书尺悉按姓名治之狱成惠卿议致之死帝曰侠所言非为身也忠诚亦可嘉岂宜深罪但徙英州既至得僧屋将压者居之英人无贫富贵贱皆加敬争遣子弟从学为筑室以迁哲宗立始得归苏轼孙觉表言之以为泉州教授元符七年再窜于英徽宗立赦之仍还故官又为蔡京所夺自是不复出布衣粝食屏处田野然一言一话未尝忘君宣和元年卒年七十九里人揭其闾为郑公坊州县皆祀之于学绍熙宗诏赠朝奉郎官其孙嘉正为山陰尉论曰侠素受知安石安石雅敬爱之使其贬损依附曾布韩絳之位可以立致终不以彼易此者义利明而忠愍胜也当新法初行以韩琦之勲德司马光之正直莫之或移侠监门末吏绘图入告痛切呼吁诸法顿罢甘霖遂沛虽神宗旋霁复暄而侠之丹心浩气耿日星而凌霄汉矣一斥之後遂不复起元佑间衆正彙征侠终蹇滞遐方不能与君子同其进千载下令人有憾焉

范祖禹

范祖禹字淳甫成都华阳人其生也母梦一伟丈夫入寢室曰吾故汉将军邓禹也既寤犹见

之遂以为名初字梦得司马光以传称邓仲华笃行纯备为改淳甫幼孤叔祖镇抚育如己子祖禹自以既孤每岁时亲宾庆集惨怛若无所容闭门读书未尝预人事至京师所与游皆一时正人镇器之曰此儿天下士也登进士甲科从光编修资治通监在洛十五年不事进取书成光荐为秘书省正字时王安石当国尤爱重之安石弟安国与祖禹友善尝谕安石意竟不往谒富弼致仕居洛素严毅杜门罕与人接惟待祖禹独厚疾笃授以密疏大抵论安石误国及新法之害言极愤切弼卒人皆以为不可奏祖禹卒上之哲宗立除著作佐郎修神宗实录时程颐为崇政殿说书颐谓光曰经筵若得范淳甫尤善光曰朝廷已自擢用矣颐曰不谓如此但经筵须用之光问其故颐曰颐自度少温润之气淳甫色温而气和尤可以开陈是非导人主之意乃除侍讲神宗既祥祖禹上疏宣仁太后曰今即吉方始服御一新奢侈之端皆由此起凡可以荡心悦目者不宜有加于旧皇帝幼冲圣性未定覩俭则俭覩奢则奢所以训导成德者动宜有法今闻奉宸库取珠户部用金其数至多恐增加无已愿止于未然崇俭敦朴辅养圣性使目不视靡曼之色耳不听淫哇之声非礼勿言非礼勿动则学问日益圣德日隆此社稷无疆之福故事服除当开乐置宴祖禹以为因除服而置宴设乐非君子不得已而除之意不可冬大寒禁中出钱一万贯以赐贫民祖禹因言嘉佑以前诸路皆有广惠仓以救恤贫苦京师有东西福田院以收养大小废疾至嘉佑八年增置南比福田院共为四院此古之遗法也臣以为宜于四福田院增盖官屋以处贫民不限人数委左右厢提举使臣预设方畧救济计其存活死损以为殿最其天下广惠仓宜更举行令官吏用心赈恤使实惠及民帝纳之因赐御书唐人诗祖禹表谢曰臣愿陛下笃志学问亦如好书益进道德皆如游艺退而节尚书论语孝经切要之语训戒之言得一百十九事名曰三经要语进之夏暑暂罢讲祖禹上言陛下今日之学不学系他日治乱如好学则天下君子以直道事陛下辅佐德业而致太平不学则小人皆动其心务为邪谄以窃富贵凡人进学莫不于少时今圣质日长数年之後恐不得如今日之专窃为陛下惜也拜右谏议大夫首论人主正心修身之要乞太皇太后日以天下之勤劳万民之疾苦羣臣之邪正政事之得失开导上心晬然存之于中使异日衆说不能惑小人不能进蔡京镇蜀祖禹言京小有才非端良之士不宜崇长迁给事中吴中大水诏出米百万斛缗钱二十万赈救有司疑诉灾为妄乞加验考祖禹封还其章云国家根本仰给东南今一方赤子呼天赴愬开口仰哺以脱朝夕之急若稍施惩戒恐後无复敢言者矣拜礼部侍郎论择监司守令曰祖宗分天下为十八路置转运使提点刑狱收乡长镇将之权悉归于县收县之权归于州州之权归于监司监司之权归于朝廷上下相维轻重相制建置之道最为合宜监司付以一路守臣付以一州令宰付以一县皆与天子分土而治其可不择乎祖宗尝有考课之法专察诸路监司置簿于中书以稽其要今宜委吏部尚书取当为州者条别功状以上三省三省召而察之苟其人可任则以次表用之至官则令监司考其课绩终岁之後可以校优劣而施黜陟焉如此则得人必多监司郡守得人县令不材非所患矣尝闻禁中觅乳媪祖禹以帝年十四非近女色之时即疏劝进德爱身又乞宣仁后保护圣躬言甚切至既而宣仁谕以外议皆属虚传祖禹复疏言臣前言事虽无其实亦足为先事之戒臣侍经左右有闻于道路实怀私忧是以不敢避妄言之罪凡事言于未然则诚为过及其已然则又无所及陛下宁受未然之言勿使臣等有无及之悔尝采集帝王学问及祖宗讲读故事为帝学八卷上之拜翰林学士元佑七年还英阁对祖禹奏言臣伏观仁宗在位四十二年丰功盛德固不得而名言所可见者其事有五畏天爱民奉宗庙好学纳谏仁宗行五者于天下所以为仁也仁宗每因事示好恶皇佑中杨安国讲直哉史鱼一章仁宗曰伯玉信君子矣然不若史鱼

之直仁宗欲臣下切直故言伯玉不如史鱼以开臣下切直之路此圣人大德也愿陛下以为法帝然之宣仁太后崩祖禹虑小人乘间害政上疏曰陛下初揽庶政延见羣臣此国家隆替之本社稷安危之机生民休戚之端君子小人进退消长之际天命人心去就离合之时不可不慎也先后有大功于宗社有大德于生灵九年之间始终如一然羣小怨恨亦为不少必将以改先帝之政逐先帝之臣为言以事离间先后因天下人心变而更化既改其法则作法之人有罪当退亦顺衆言而遂之是皆上负先帝下负万民天下之所讐疾而欲去之者也岂有憎恶于其间哉惟辨析是非深拒邪说有以奸言惑听者付之典刑痛惩一人以警羣慝则帖然无事矣此等既误先帝又欲误陛下天下之事岂堪小人再坏耶初苏轼约俱上章论列諫草已具见祖禹疏遂附名同奏曰公之文经世之文也竟不复出其稿祖禹又言先后以大公至正为心罢安石惠卿所造新法而行祖宗旧政故社稷危而复安人心离而复合乃至辽主亦戒其臣勿生事曰南朝专行仁宗之政矣外国之情若此中国之人心可知先后日夜苦心劳力为陛下立太平之基已有成效愿守之以静恭己以临之虚心以处之则羣臣邪正万事是非了然于圣心矣章累上不报忽有旨召内臣十余人祖禹言陛下亲政以来四海倾耳未闻访一贤臣而所召者乃先内侍必谓陛下私于近习望即赐追改因请对曰熙宁之初王安石吕惠卿造立新法悉变祖宗之政多引小人以误国黜旧之臣屏弃不用忠正之士相继远引又用兵开边结怨外国天下愁苦百姓流徙赖先帝觉悟罢逐两人而所引羣小已布满中外不可复去蔡确连起大狱王韶创取熙和章惇开五溪沈起扰交管沈括徐禧俞克种谔兴造西事兵民死伤皆不下二十万先帝临朝悼悔以为朝廷不得不任其咎以至吴居厚行铁冶之法于京东王子京行茶法于福建蹇周辅行盐法于江西李稷陆师闵行茶法市易于西川刘定教保甲于河北民皆愁痛嗟怨比屋思乱赖陛下与先后起而救之天下之民如解倒悬惟是向来所斥逐之人窥伺事变妄意陛下不以修改法度为是如得至左右必进奸言万一过听而复用之臣恐国家自此凌迟不复振矣又论汉唐之亡皆由宦官自熙宁元丰间李宪王中正宋用臣辈用事总兵权势震灼中正兼干四路口勅募兵州郡不敢违师徒冻饿死亡最多宪陈再举之策致永乐摧陷用臣兴土木之工无时休息罔市井之微利为国敛怨此三人者虽加诛戮未足以谢百姓宪虽已亡而中正用臣尚在今召内臣十人而宪中正之子皆在其中二人既入则中正用臣必将复用愿陛下念之时绍述之论已兴有相章惇意祖禹力言惇不可用不见从遂请外乃以龙图阁学士知陕州言者论祖禹修实录诋诬又摭其諫禁中雇乳媪事连贬武安军节度副使昭州别驾安置永州贺州又徙宾化而卒年五十八祖禹平居恂恂口不言人过至遇事则别白是非不少借隐在迹英守经据正献纳尤多尝讲尚书至内作色荒外作禽荒六语拱手再诵却立云愿陛下留听帝首肯再三乃退每当讲前夕必正衣冠俨如在上侧命子弟侍先按讲其说开列古义参之时事言简而当无一长语义理明白粲然成文苏轼称为讲官第一祖禹又尝进唐监十二卷仁宗政典六卷而唐监深明唐三百年治乱学者尊之目为唐监公云

论曰语云称人者必本其父兄师友至矣哉祖禹为镇之从孙忠孝世植学于程氏得伊洛之渊源而又与司马光编辑古今商榷得失盖其所自得深矣祖禹之著述传于世者为多乃若其进讲之语与奏疏之文固精金美玉世之所共宝也

苏轼【弟辙】

苏轼字子瞻眉山人生十年父洵游学四方母程氏亲授以书闻古今成败辄能语其要比冠博通经史属文日数千言好贾谊陆贽书嘉佑二年试礼部第二殿试中乙科调福昌县主簿欧阳修以才识兼茂荐之秘阁试六论复对制策入三等除大理评事判凤翔府关中自元昊叛民贫役重岐下岁输南山木筏自渭入河经砥柱之险衙吏踵破家轼访其利害使自择水工以时进止自是害减半治平二年入判登闻鼓英宗久闻其名欲授知制诰宰相韩琦曰轼之才远大之器也他日自当为天下用要在朝廷培养之乃授直史馆轼闻之曰韩公可谓爱人以德矣父洵将终以兄太白早亡子孙未立妹嫁杜氏卒未葬属轼轼既除丧即葬姑後官得?推与太白曾孙彭熙宁二年还朝王安石执政恶其议论异已以判官告院四年安石欲变科举兴学校诏两制三馆议轼以为得人之道在于知人知人之法在于责实不在变法也议上神宗曰吾固疑此得轼议意释然矣即日召见问当今政令得失安在虽朕过失指陈可也对曰陛下生知之性天纵文武不患不明不患不断但患求治太急进人太锐听言太广愿以安静待物之来然後应之神宗悚然曰卿三言朕当熟思之安石闻之不悦命权开封府推官欲困之以事轼决断精敏声闻益远会上元勅府市浙灯且令损价轼疏言陛下岂以灯为悦不过以奉二宫之欢耳然百姓不可户晓皆谓以耳目不急之玩夺其口体必用之资此事至小体则甚大愿追还前命即诏罢之时安石创行新法轼上书论其不便曰臣之所欲言者三愿陛下结人心厚风俗存纪纲而已人主所恃者人心也自古及今未有和易同衆而不安刚果自用而不危者祖宗以来治财用者不过三司今又创制置三司条例司六七少年日夜讲求于内使者四十余辈分行营干于外造端宏大民实惊疑创法新奇吏皆惶惑自古役人必用乡户今者徒闻江潮之间数郡雇役而欲措之天下女户单丁盖天民之穷者也而陛下首欲役之自杨炎为两税租调与庸既兼之矣今两税如故奈何复欲取庸万一後世不幸有聚斂之臣庸钱不除差役仍旧推所从来则必有任其咎者矣青苗放钱自昔有禁今陛下始立成法每岁常行虽云不许抑配而数世之後陛下能保之欤计愿请之户必皆孤贫不济之人鞭挞已急则继之逃亡逃亡不还则均及邻保势有必至理有固然异日天下恨之国史记之曰青苗钱自陛下始岂不惜哉且常平之法可谓至矣今欲变为青苗坏彼成此所丧逾多昔汉武帝用贾人桑宏羊之说买贱卖贵谓之均输于时商贾不行盗贼滋炽几至于乱孝昭既立霍光顺民所欲从而与之天下归心遂以无事不意今日此论复兴立法之初其费已厚纵使薄有所获而征商之额所损必多譬之有人为其主畜牧以一牛易五羊一牛之失则隐而不言五羊之获则指为劳绩今坏常平而言青苗之功亏商税而取均输之利何以异此议者必谓民可与乐成难与虑始此乃战国贪功之人行险侥幸之说未及乐成而怨已起矣臣所愿陛下结人心者此也国家所以存亡者在道德之浅深不在乎强与弱历数之所以长短者在风俗之厚薄不在乎富与贫臣愿陛下务崇道德而厚风俗不愿陛下急于有功而贪富强仁祖持法至宽用人有叙专务掩覆过失未尝轻改旧章考其成功则曰未至以言乎用兵则十出而九败以言乎府库则仅足而无余徒以德泽在人风俗知义故升遐之日天下归仁焉议者乃欲矫之以苛察齐之以智能招来新进勇锐之人以图一切速成之效未享其利浇风已成近岁朴拙之人愈少巧进之士益多惟陛下哀之救之臣所愿陛下厚风俗者此也祖宗委任台谏未尝罪一言者纵有薄责旋即超升许以风闻而无官长言及乘舆则天子改容事关廊庙则宰相待罪台谏固未必皆言所言亦未必皆是然须养其锐气而借之重权者将以折奸臣之萌而救偏重之弊也臣闻长老之谈皆谓昔日台谏所言常随天下公论今者物议沸腾怨讟交至公论所在亦可知矣而相顾不发中外失望臣恐自兹以往习惯成风尽为执

政私人以致人主孤立纪纲一坏何事不生臣所愿陛下存纪纲者此也轼见安石赞帝以独断专任因试进士发策以晋武平吴独断而克苻坚伐晋独断而亡齐桓专任管仲而霸燕哱专任子之而败事同而功异为问安石大怒使御史谢景温论奏其过穷治无所得轼遂请外通判杭州高丽入贡发帑于官吏书称甲子轼却之曰高丽于本朝称臣而不禀正朔吾安敢受使者易书称熙宁然後受之时新政日下轼于其间每因法以便民民赖以安徙知密州司农行手实法不时施行者以违制论轼谓提举官曰违制之坐若自朝廷谁敢不从今出于司农是擅造律也提举官惊曰公姑徐之未几朝廷知法害民罢之有盗窃发安抚司遣三班使臣领悍卒来捕卒凶暴杀人因畏罪惊溃且为乱民奔欣轼投其书不视曰必不至此散卒闻之少安徐使人招出戮之徙知徐州河决曹村滙于城下城将败富民争出避水轼曰富民出民皆动摇吾谁与守吾在是水决不能败城驱使复入轼诣武卫营呼卒长曰河将害城事急矣虽禁军且为我尽力卒长曰太守犹不避涂潦吾侪小人当效命率其徒持畚鍤以出筑东南长堤首起戏马台尾属于城雨日夜不止城不沈者三版轼庐于其上使官吏分堵以守卒全其城复请调来岁夫增筑故城为水岸以虞水之再至朝廷从之徙知湖州御史李定舒亶何正臣摭其谢表语并所作诗以为谤讟逮赴狱欲置之死帝怜之诏黄州安置三年移汝州轼上书自言饥寒有田在常愿得居之朝奏入夕报可哲宗立复朝奉郎知登州召为礼部郎中迁起居舍人元佑元年迁中书舍人初祖宗时差役行久生弊编户充役者不习其役虐使之多致破产狭乡民至有终岁不得息者王安石改为免役使户差高下出钱雇役行法者过取以为民病司马光为相如免役之害不知其利欲复差役差官置局轼与其选轼曰差役免役各有利害免役之害掊敛民财十室九空敛聚于上而下有钱荒之患差役之害民常在官不得专力于农而贪吏猾胥得缘为奸此二害轻重盖畧等矣光曰于君何如轼曰法相因则易成事有渐则不惊今欲骤罢免役而行差役盖未易也光不听轼又陈之于政事堂光不悦轼曰昔韩公刺陕西义勇公为谏官争之甚力韩公不乐公亦不顾岂今日作相不许轼尽言耶光改容谢之寻除翰林学士二年兼侍读每进读至治乱兴衰邪正得失之际未尝不反覆开导觐有所启悟哲宗虽恭默不言辄首肯之尝锁宿禁中召见便殿太皇太后问曰卿今何官对曰翰林学士曰何以遽至此对曰遭遇太皇太后皇帝陛下曰非也曰岂大臣论荐乎曰亦非也轼惊曰臣虽无状不敢自他途以进曰此先帝意也先帝每诵卿文章必叹曰奇才奇才但未及进用卿耳轼不觉哭失声太皇太后与帝亦泣左右皆感泣已而命坐赐茶撤御前金莲烛送归院尝读祖宗宝训因及时事轼历言今赏罚不明善恶无所劝沮又黄河势方北流而强之使东夏人入镇戍杀掠数万人帅臣不以闻每事如此恐寢成衰乱之渐三年权知礼部贡举巡铺内侍每摧辱举子轼尽奏逐之四年乞外拜龙图阁学士知杭州杭州大旱饥疫并作轼请免本路上供米三之一复得赐度僧牒易米以救饥者明年春又减价糴常平米多作饘粥药剂遣使挟医分方治病活者甚衆轼曰杭水陆之会疫死者常多乃裒羨缗得二千复发橐中黄金五十两以作病坊稍畜钱粮待之杭本近海地泉咸苦居民稀少唐刺史李泌始引西湖水作六井民足于水白居易又浚西湖水入漕河自河入田所溉至千顷民以殷富湖水多葑自唐及钱氏岁辄浚治宋兴废之葑积为田漕河失湖水之利取给于江湖潮浊多淤河行闌阨中三年一淘为市井大患而六井亦几废轼见茅山一河专受江湖盐桥一河专受湖水遂浚二河以通漕复造堰闸以为湖水蓄泄之限江湖不复入市以余力复完六井又取葑田积湖中南北径三十里为长堤以通行者吴人种菱春辄芟除不遗寸草轼募人种菱湖中葑不复生收其利以备修湖取救荒余钱万缗粮万石及请得百僧度牒以募役者

堤成植芙蓉杨柳其上望之如画图杭人名为苏公堤云高丽贡使至旧例吴越七州费二万四千余缗轼令诸州量事裁损民获交易之利无侵挠之害浙江潮自海门东来势如雷霆而浮山峙于江中与渔浦诸山犬牙相错洄湊?射岁败公私船不可胜计轼议自浙江上流地名石门并山而东凿为漕河引浙江及谿谷诸水二十余里以达于江又并山为岸不能十里以达龙山大慈浦自浦北折抵小岭凿岭六十五丈以达岭东古河浚古河数里达于龙山漕河以避浮山之险人以为便奏上有恶轼者力沮之功以故不成轼复言三吴之水潴为太湖太湖之水溢为松江以入海海日两潮潮浊而江清潮水常淤塞江路而江水清驶随辄涤去海口常通则吴中少水患昔苏州以东公私船皆以篙行无陆挽者自庆历以来松江大筑挽路建长桥以扼塞江路故今三吴多水欲凿挽路为十桥以迅江势亦不果用人皆以为恨轼二十年间再蒞杭有德于民家有画像饮食必祝又作生祠以报六年入为翰林承旨数月复请外乃以龙图阁学士出知颍州先是开封诸县多水患吏不究本末决其陂泽注之惠民河河不能胜致陈亦多水又将凿邓艾沟与颍河并且凿黄堆欲注之于淮轼始至颍以水平准之淮之涨水高于新沟几一丈若凿黄堆淮水顾流颍地为患轼言于朝乃止郡有宿贼尹遇等数劫杀人捕不获轼召汝陰尉李直方曰君能擒此当言于朝行优赏不获则奏免君矣直方缉盗获之朝廷以小不应格推赏不及轼请以己之年劳为直方赏不从其後吏部迁轼一阶轼言已许直方又不报七年徙扬州旧制发运司主东南漕法听操舟者私载货物征商不得留难故操舟者辄富厚以官舟为家补其漏且周船夫之乏故所载速达无虞其後禁而不许舟弊人困多盗所载以济饥寒公私皆病轼请复旧从之召为兵部尚书兼侍读是岁哲宗亲郊轼为卤簿使导驾入太庙值皇后及大长公主争道不避仪仗时李之纯为仪仗使轼曰中丞职当肃政不可不以闻之纯不敢言轼于车中奏之哲宗遣使驰白太后明日诏整肃仪卫自皇后以下皆毋得迎谒寻迁礼部兼端明殿翰林侍读两学士为礼部尚书八年宣仁后崩哲宗亲政轼乞补外知定州时国事将变轼不得入辞既行上书言天下治乱出于下情之通塞陛下听政之初当以通下情除壅蔽为急务臣日侍帷幄方当戍边顾不得一见而行况疎远小臣欲求自通难矣然臣愿效愚忠者陛下圣智絶人春秋鼎盛臣愿虚心循理默观庶事之利害与羣臣之邪正以三年为期俟得其实然後应物而作使既作之後天下无恨陛下亦无悔臣恐急进好利之臣辄劝陛下轻有改变故进此说敢望陛下留神天下幸甚不报定州军政坏弛将贪卒惰轼取贪污者配隶远恶缮修营房禁止饮博军中衣食稍足乃部勒战法衆皆畏伏有卒吏以赃诉其长轼曰此事吾自治则可听汝告军中乱矣立决配之衆乃定会春大閱将吏戎服执事讫事无敢慢者定人言自韩琦去後不复见此礼矣绍圣初御史奏轼讥讪遂以本官知英州未至贬宁远军节度副使惠州安置居三年泊然无所蒂芥人无贤愚皆得其欢心又贬琼州别驾居昌化昌化故儋耳地非人所居初僦官屋有司不可遂买地筑室儋人运甓畚土以助之独与幼子过处着书以为乐时从其父老游徽宗立移廉州改舒州徙永州更三大赦还提举玉局观复朝奉郎建中靖国元年卒于常州年六十六轼少师父洵为文而多所自得尝言作文如行云流水初无定质但常行于所当行止于所不可不止虽嬉笑怒骂之词皆可书而诵之洵初作易传未成命轼述其志卒成之复作论语说後居海南作书传又有东坡集四十卷後集二十卷奏议十五卷内制十卷外制三卷和陶诗四卷一时文人如黄庭坚晁补之秦观张表陈师道举世未之识轼待之如朋俦自为举子至出入侍从必以爱君为本忠规谏论挺挺大节羣臣无出其右但为小人挤排不使安于朝廷之上高宗即位赠资政殿学士以其孙符为礼部尚书常以其文置左右读之终日忘倦复赠太师諡文忠

轼三子迈迨过俱善为文弟辙

辙字子由年十九与兄轼同登进士科又同策制举极言得失於禁廷事尤为切至考官不敢取仁宗曰以直言召人而以直言弃之天下其谓我何宰相置之下等除商州军事推官改大名推官丁父忧服除熙宁二年上书言事即日召对时王安石以执政领三司条例司辙为之属一日安石出一卷曰此青苗法也诸君熟议之有不便以告勿疑辙曰以钱贷民使出息二分本以救民非为利也然出纳之际吏缘为奸法不能禁钱入民手虽良民不免妄用及其纳钱虽富民不免逾限如此则鞭箠必用州县事不胜烦矣唐刘晏掌国计未尝有所假贷而四方丰凶贵贱知之未尝踰时有贱必籴有贵必粜以此四方无甚贵甚贱之病此常平旧法公诚举而行之晏之功可立矣也及青苗既行辙力陈其不可安石怒出为河南推官历著作佐郎坐兄轼事谪监筠州盐酒税移知绩溪县元佑元年入为右司谏时宣仁后用司马光吕公着等欲革弊事而故相蔡确韩缜枢密使章惇犹在位窥伺得失辙皆论去之又论吕惠卿之奸惠卿坐安置建州除中书舍人初元丰中河决大吴故道不可复还因导之北流至是执政力主回河之计辙言诸公不因其旧而修其未全乃欲取而回之其为力也难其为责也重不听已而河朔财力因之大困擢御史中丞时元丰旧党多起邪说以撼在位吕大防刘摯患之欲稍引用以平夙怨谓之调停辙面斥其非复上疏曰君子小人势同水炭同处则必争一争之後小人必胜君子必败何者小人贪利忍耻击之则难去君子洁身重义沮之则引退此辈若返岂肯但已哉必将戕害正人渐复旧事以快私忿人臣被祸盖不足言所惜者祖宗朝廷也疏入调停之说遂已绍圣初哲宗起李清臣为中书舍人邓润甫为尚书左丞二人稍复言熙丰事以激怒哲宗会廷试进士清臣即于策题寓绍述之旨辙谏曰伏见御试策题历诋近岁行事有绍复熙宁元丰之意臣谓先帝以天纵之才行大有为之志其所设施度越前古盖有百世不可改者元佑以来上下奉行未尝失坠也至于他事有失当何世无之父作于前子救于後此圣人之孝也汉武帝外事征伐内榷财货民不堪命几至于乱昭帝委任霍光罢去烦苛汉室乃定臣愿陛下反覆臣言慎勿轻事改易若轻变九年已行之事擢用累岁不用之人人怀私忿而以先帝为辞则大事去矣哲宗不悦落职知汝州累贬化州别驾雷州安置移循州徽宗朝复大中大夫致仕筑室许州而居焉号颍滨遗老自作传万余言不复与人相见终日默坐如是者几十年政和二年卒年七十四淳熙中謚文定辙性沈静简洁为文汪洋澹泊而秀杰之气自不可掩所着诗传春秋传古史老子解栞城文集并行于世

论曰轼之才气虽古今以来魁垒豪杰不世出之士尚兼数子而况其下者乎论新法者多矣未有如轼之深切着明也其大节巍然不久安于朝廷及行之郡邑因事成功法施于千载若使得究其用其乌可涯也辙自熙宁以前滞于小官及元佑之朝耆旧居职未及有所施用至绍圣而世变不胜言矣其斥调停论绍述之非有味乎其言之也平居澹然无营至引当否商是非直言抗论无所回挠斯可尚也已

卷三十四

<史部,传记类,总录之属,史传三编

钦定四库全书

史传三编卷三十四

大学士朱轼撰

名臣传二十六

宋

陈瓘

陈瓘字莹中南剑州沙县人少好读书不喜为进取学父母强之乃应举一出即中甲科调湖州掌书记签书越州判官太守蔡卞察其贤礼之有加而瓘常远之屡引疾求归卞不听檄摄通判明州卞素敬道人张怀素时且来越留瓘小须之瓘不肯曰子不语怪力乱神斯近怪矣守既信重民将从风而靡不识之未为不幸也後二十年而怀素诛章惇入相闻其名邀与同载询当世之务瓘曰请以所乘舟为喻偏重其可行乎移左置右其偏一也天子待公为政敢问将何先惇曰司马光奸邪所当先辨瓘曰公误矣果尔将失天下望为今之计惟消朋党持中道庶可以救弊惇意虽忤亦惊异之至都用为太学博士会卞与惇合志卞党薛昂林自官学省议欲毁资治通监板瓘闻之因策士题特引神宗序文自惊曰此岂神考亲制耶瓘曰谁言其非也自曰亦神考少年之文耳瓘曰圣人之学得之天性岂有少长之异自以告卞卞乃令学中置板高阁不敢复议毁尝为别试所主文自谓蔡卞曰闻陈瓘欲尽取史学而黜通经之士意在动摇荆公之学也卞怒谋因此害瓘瓘已预料其然乃於前五名悉取用王氏学者卞无以发然自五名而下皆博洽稽古之士瓘尝曰当时若无矫揉则势必激坏故随时所以救时不必取快目前也迁秘书省校书郎时绍述之说盛瓘奏言尧舜禹皆以若稽古为训若者顺而行之稽者考其当否必使合於民情所以成帝王之治天子之孝与士大夫之孝不同哲宗感悦执政闻而恶之出判沧州知卫州徽宗即位以韩忠彦荐召为右正言与台谏龚夬等劾蔡卞免之又论邢恕矫诬定策之罪恕坐安置均州又与龚夬丰稷等共劾章惇惇罢知越州瓘以为责轻复论惇在绍圣中置看详元佑诉理局凡於先朝言语不顺者加以钉足剥皮斩颈拔舌之刑看详之官如安惇蹇序辰等受大臣讽谕傅致语言指为谤讪考之公论宜正典刑於是二人并除名而再贬惇居潭州丰稷又疏蔡京奸状瓘与江公望继言之京夺职居杭州初瓘因朝会见蔡京视日久而不瞬尝语人曰京精神如此他日必贵然矜其稟赋敢敌太阳吾恐此人得志必擅私逞欲无君自肆矣居谏省即攻其恶京因所亲以情恳且以甘言啖瓘瓘曰京为恶首吾不得已也攻之愈力时皇太后已归政瓘言外戚向宗良兄弟与侍

从希宠之士交通使物议籍籍谓太后今犹预政由是罢监扬州粮料院瓘出都门缴四章奏之并明宣仁诬谤事帝密遣使赐以黄金百两后亦命勿遽去畀十僧牒以为行装改知无为军明年入为右司员外郎兼权给事中宰相曾布使客告以将即真瓘语其子正彙曰吾与丞相议事多不合今若此是欲以官爵相饵也吾有一书论其过将投之以决去就明旦入省布邀与相见甫就席遽出书布大怒争辨移时至箕踞诮语瓘色不动徐曰适所论者国事是非有公议公未可失待士礼布矍然改容瓘退即录所上布书及所尝着日录辨国用须知以状申三省曰瓘不达大体触忤大臣伏乞敷奏早行窜黜出知泰州连贬通州安置初瓘以绍圣史官专据王安石日录以修神宗实录变乱是非不可传信故居谏省首论其事进日录辨乞改实录又因窜责合浦着尊尧集深辟诬妄以正君臣之义张商英为相取其书既上而商英罢瓘徙台州宰相徧令所过州出兵护送至台又命凶人石慄知州事执至庭大陈狱具将胁以死瓘揣知其意大呼曰今日之事岂被诏旨耶慄失措始曰朝廷令取尊尧集耳瓘曰然则何用如此君知尊尧所以立名乎盖以神考为尧主上为舜助舜尊尧何得为罪时相学术浅短为人所愚君所得几何乃亦不畏公议干犯名分乎慄惭揖瓘退虽窘辱百端而不敢加害在台五年复承事郎听自便帝令再叙一官与差遣执政持不行卜居江州旋令居南康甫至又移楚瓘平生论京卞皆披摛其处心发露其情愿最所忌恨故得祸最酷不使一日少安宣和六年卒年六十五靖康初赠谏议大夫召官其子正彙绍兴二十六年高宗谓辅臣曰陈瓘为谏官甚有谏议所着尊尧集明君臣大分合於易春秋之义宜赐谥以表之谥曰忠肃瓘谦和不与物竞闲居矜庄自持语不苟发元丰己丑瓘为礼部贡院点检官与范祖禹同舍祖禹言颜子不迁怒不贰过惟伯淳能之瓘问曰伯淳谁也祖禹默然久之曰不知有程伯淳也瓘因以寡陋自愧每得明道之文必冠带然後诵之蔡京为翰林学士承旨以词命为职潜奸伏愿未形於事瓘於是时即力言京不可用用之必为腹心患闻者或甚其言已而京怙宠妄作人始服瓘为蓍龟范纯仁年高望重尤留心人才或问以今谁可用者答曰陈瓘又问其次曰陈瓘自好也宣和末世事日非或问游酢以当今济世之才酢曰陈了翁其人也瓘病刘安世使人勉以医药自辅曰天下方将有赖於公其为贤士所钦属如此瓘智虑明远通易数如靖康变故隆佑垂帘高宗中兴之事往往预言之士大夫间有亲闻者

论曰嘉佑治平以前一时贤者皆获柄用而天下蒙其福後虽既衰元佑数年之间司马光吕公着之徒犹得有所救正瓘晚出而位下属当章惇蔡京曾布相继柄政屡撓其锋几至不免虽然瓘之学博而才大观其平生守经达权迭用柔刚与夫硜硜抱咫尺之义者相去远矣北宋自开国以来公辅之器代不乏人当以瓘为殿後云

韩忠彦

韩忠彦字师朴琦长子也?将作监簿复举进士召试馆职累官户部判官丁父丧服除直龙图阁擢天章阁待制知瀛州朝廷以夏人囚废其主秉常用兵西方既下米脂等城砦数十夏人求救於??人移书继至会遣使贺?主生辰忠彦遂以给事奉使?遣赵资睦迓之语及西事忠彦曰此小役也何问为及燕於馆?主又使王言敷问夏国何罪而中国兵不解无失两朝之懽则善矣忠彦曰问罪西夏於二国之好何预乎使还会官制初行值章惇为相奏给事中封驳宜先禀而後上忠彦言朝廷之事执政所行也事当封驳则固与执政异矣尚何禀议诏从之左

仆射王珪为南郊大礼使事有当下者多自画旨忠彦以官制驳之乃诏事无钜细必经三省而後行拜礼部尚书以枢密直学士知定州元佑中召为户部尚书擢左丞改枢密同知迁知院事哲宗亲政羣小多言宣仁后垂帘时事忠彦言仁宗亲政当时亦多议斥章献时事仁宗恶其持情近薄下诏戒飭陛下能法仁祖用心则善矣以观文殿学士知真定府移定州忠彦在西府以用兵西方非是愿以所取之地弃还之以息民力至是言者劾之降资政殿学士改知大名府徽宗即位召拜吏部尚书兼门下侍郎忠彦入对陈四事一曰广仁恩二曰开言路三曰去疑似四曰戒用兵踰月拜尚书右仆射兼中书侍郎旋进左仆射帝用忠彦言数下诏蠲天下逋负收用忠直敢言及知名之士於是以龚夬为殿中侍御史陈瓘邹浩为左右正言而常安民任伯雨江公望张舜民等布列台谏召还流人而甄叙之复以程颐判西京国子监复范纯仁等官徙苏轼等於内郡又追复元佑宰执文彦博司马光吕公着吕大防刘摯等三十三人官而章惇蔡卞等相继劾去一时翕然望治而右相曾布与忠彦不协引其党排忠彦崇宁元年以观文殿大学士罢知大名府忠彦既去於是忠直之士前後斥逐而蔡京进用并逐曾布权归於京而政事日非矣言者又以皇太后欲复废后为忠彦罪再降太中大夫安置怀州又论忠彦在相位不应弃湟州谪崇信军节度副使济州居住逮复湟鄯又谪磁州团练副使稍复太中大夫遂以宣奉大夫致仕卒年七十二理宗宝庆二年图功臣像於昭勲崇德阁自赵普至赵汝愚二十四人忠彦与焉论曰元佑之朝尚有老成人焉故能和衷协济以成数年之功及徽宗之初范纯仁闻命而卒程伊川就位一月而去其余畧无存者独一韩忠彦耳所荐引之人如陈瓘邹浩常安民任伯雨之徒虽皆天下才然起疎逖之中德泽未加於人恩意未孚於上孤忠愤懣适足为小人排击之资而已绍圣诸奸方据高位重禄以图其後虽有英哲之主欲使一日之间舍其旧而新是图亦已难矣孟子曰一齐人傅之衆楚人咻之其忠彦之谓乎

李纲

李纲字伯纪邵武人也父夔终龙图阁待制纲登政和二年进士积官监察御史以言事忤权贵改比部员外郎迁起居郎宣和元年京师大水纲言陰气太盛当以盗贼外患为忧谪监南剑州沙县税务七年为太常少卿时金人渝盟朝议避敌纲上御敌五策且语给事中吴敏曰朝廷命太子为开封牧岂非欲委以留守之任乎巨敌猖獗非传以位号不足招徠天下豪杰公以献纳为职盍为上极言之敏曰监国可乎纲曰唐肃宗灵武之事不出於明皇後世惜之主上聪明仁恕公言万一得行则天下受其赐翼日敏请对具道所以且言李纲论与臣同有旨召纲入纲刺臂血上书畧云皇太子监国典礼之常也今大敌入寇存亡呼吸犹守常礼可乎若假以位号使为陛下守宗社收将士心以死扞敌天下可保疏上内禅之议乃决钦宗即位纲上封事请上应天心下顺人欲攘除外患使中国之势尊诛锄内奸使君子之道长以副太上付托之意李邕使金议割地纲奏祖宗疆土当以死守不可尺寸与人帝嘉纳之除兵部侍郎靖康元年金兵渡河徽宗东幸宰执又议请帝避敌纲曰太上挈宗社以授陛下委而去之可乎帝默然太宰白时中曰都城不可守纲曰天下城池孰有如都城者且宗庙社稷百官万民所在舍此欲何之帝顾宰执曰策将安出纲进曰今日之事当整军马固结民心相与坚守以待勤王之师帝问谁可将者纲曰朝廷以高位厚禄崇养大臣盖将用之有事之日白时中李邦彦虽未必知兵然藉其位号抚将士以抗敌锋乃其职也时中忿曰李纲莫能将兵出

战否纲曰陛下不以臣庸懦倘使治兵愿以死报乃以纲为尚书右丞宰执犹守避敌之议有旨以纲为东京留守纲复为上力陈所以不可去之意且言唐明皇潼关失守即时幸蜀宗庙朝廷毁於贼手今四方之兵不日云集奈何蹈明皇之覆辙乎帝意颇悟会内侍奏中宫已行帝色变仓卒降御榻曰朕不能留矣纲泣拜以死邀之帝顾纲曰朕今为卿留治兵御敌专委之卿纲惶恐受命未几复决意南狩纲趋朝则禁卫擐甲乘舆已驾矣纲急呼禁卫曰尔等愿守宗社乎愿从幸乎皆曰愿死守纲入见曰今六军父母妻子皆在都城愿以死守万一中道散归陛下孰与为卫敌兵已迫知乘舆未远以健马疾追何以御之帝感悟遂命辍行禁卫皆拜伏呼万岁於是命纲为亲征行营使以便宜从事纲治守战之具不数日而毕敌兵攻城纲身督战募壮士縋城而下斩其裨将十余及其士卒数千金人知有备又闻帝已内禅乃退求遣大臣至军中议和纲请行帝遣李昞纲曰安危在此一举臣恐李昞怯懦误国事帝不听竟使昞往金人需金币以千万计求割太原中山河间地以亲王宰相为质昞不敢措一词还报纲言金人所需金币竭天下且不足况都城乎三镇国之屏蔽割之何以立国至於遣质即宰相当往亲王不当往若遣辩士姑与之议宿留数日大兵四集彼孤军深入虽不得所欲亦将速归此时而与之盟则不敢轻中国而和可久宰执议不合纲退则誓书已行所求皆与之以皇弟康王少保张邦昌为质时朝廷日输金币而金人需求不已日肆屠掠四方勤王之师渐有至者种师道姚平仲以泾原秦凤兵至纲言金人贪婪无厌势非用兵不可且敌兵十万而吾勤王之师集城下者已二十余万彼以孤军入重地当以计取之不必与角一旦之力若扼河津絶粮道分兵复畿北诸邑而以重兵临敌营坚壁勿战俟其食尽力疲然後以一檄取誓书复三镇纵其北归半渡而击之此必胜之计也帝深以为然约日举事姚平仲急於要功先期以步骑万人夜斫敌营不克纲承旨率诸将出封丘门援之则平仲已亡去矣纲乃与金人战於幕天坡以神臂弓射却之已而金使来李邦彦语之曰用兵乃李纲姚平仲非朝廷意遂罢纲以蔡懋代之太学生陈东等诣阙上书明纲无罪军民不期而集者数十万呼声动地猝不得奏至杀伤内侍帝亟召纲纲入见泣拜请死帝亦泣命纲复为尚书右丞充京城四壁守御使蔡懋代之纲也禁不得辄施矢石将士积愤至是纲下令能杀敌者厚赏衆皆奋跃金人惧稍稍引却且已得三镇及亲王为质乃退师除纲知枢密院事纲请如澶渊故事遣兵护送且戒诸将可击则击之乃以兵十万分道并进将士受命踊跃以行已而执政咎纲尽遣城下兵恐仓卒无措急徵诸将还诸将已追及金人於邢赵间遽得还师之命无不扼腕迨纲力争复遣而将士解体矣初徽宗南幸童贯高俅等以兵扈从及陈东乞诛蔡京蔡攸朱勔及贯俅等朝议遣聂山为发运使往图之纲曰使山所图果成震惊太上忧在陛下万一不果是数人者挟太上於东南求剑南一道陛下将何以处之不若罢山之行请於太上去此数人可不劳而定帝从其言金人既退徽宗还次南都以书问改革政事之故且召吴敏李纲或虑太上意有不测纲曰此无他不过欲知朝廷事尔乃自请行既至具道皇帝圣孝思慕欲以天下养之意请太上早还京师徽宗泣数行下又询都城攻围守御次第语渐浹纲因言皇帝仁孝惟恐有一不当太上意者每得诘问之诏辄忧惧不食皇帝传位之初太上巡幸适当大敌入攻为宗社计庶事不得不小有更革太上回銮臣谓宜有大慰皇帝之心勿问细故可也徽宗感悟出玉带金鱼象简赐纲且曰卿辅助皇帝扞守宗社有大功若能调和父子间当遂书青史垂名万世纲感泣再拜纲还具道太上意及太上还纲迎拜於国门是时北兵已去太上还宫上下恬然置边事不问纲独以为忧乃上备边御敌八事又奏边事方棘调度不给宜稍抑冒濫以足国用如节度使至遥郡刺史本以待勲臣今皆以戚里恩泽得之堂吏转官止於正

郎崇观间始转至中奉大夫今宜皆复旧制初奉迎太上时纲与耿南仲争论议注南仲大怒诬纲结士民伏阙纲待罪帝慰解之至是南仲等潜颇行帝遂疑纲专权会金兵围太原种师中战没师道病归南仲乃曰援太原非纲不可遂以纲为河东北宣抚使纲辞曰臣书生实不知兵在围城中不得已为陛下料理兵事今为大帅恐误国不许退而乞致仕章十余上不许可许翰书杜邮二字遗纲纲惶恐受命帝手书裴度传以赐纲纲言臣何足以望裴度但扫除小人使君子道长则扞御外患不难也因书裴度论魏洪简等章疏要语以进时宣抚司兵仅万二千人庶事未集而诏屡趣纲行纲行次怀州即诏罢减所起兵而趣解太原之围诸将又别受御画事皆专达宣抚司徒有节制之名俄又以议和止纲进兵每一次诏下纲皆上疏极论之不报初纲陛辞时言唐恪聂山之奸至是徐处仁吴敏罢相而相唐恪许翰罢同知枢密院而进聂山陈过庭李回等纲叹曰事不可为矣即上疏丐罢乃命种师道代纲而召纲赴阙寻以观文殿学士知扬州未几以纲主战丧师费财落职建昌军安置再谪江宁及金兵再至帝始悟和议之非除纲资政殿大学士领开封府事纲行次长沙被命即率湖南勤王之师入援未至而都城失守先是康王至北军为金人所不喜求遣肃王代之至是康王开大元帅府承制复纲故官及即位拜纲尚书右仆射兼中书侍郎趣赴阙纲至见於内殿涕泗交集帝为动容因辞曰陛下总师於外为天下臣民所推戴内修外治还二圣而抚万邦责在陛下与宰相臣自视阙然不足以副委任帝曰朕知卿忠义智畧久矣欲使敌国畏服四方安宁非卿不可纲顿首曰昔唐明皇欲相姚崇崇以十事要说皆中一时之病今臣亦以十事仰干天听陛下度其可行者赐之施行臣乃敢受命一曰议国是谓中国之御四裔能守而後可战能战而後可和而靖康之末皆失之今欲战则不足欲和则不可莫若先自治专以守为策俟吾政事修士气振然後可议大举二曰议巡幸谓车驾不可不一到京师见宗庙以慰都人之心度未可居则为巡幸之计以天下形势而观长安为上襄阳次之建康又次之皆当诏有司预为之备三曰议赦令谓祖宗登极赦令皆有成式前日赦书乃以张邦昌伪赦为法如赦恶逆及罪废官尽复官职皆泛滥不可行宜悉改正四曰议僭逆谓张邦昌为国大臣不能临难死节而挟金人之势易姓改号宜正典刑垂戒万世五曰议伪命谓国家更大变鲜仗节死义之士而受伪官屈膝於其庭者不可胜数昔唐肃宗平贼污伪命者以六等定罪宜仿之以励士风六曰议战谓军政久废士气怯惰宜一新纪律信赏必罚以作其气七曰议守谓敌情狡狴势必复来宜於沿河江淮措置控御以扼其冲八曰议本政谓政出多门纪纲紊乱宜一归之中书则朝廷尊九曰议久任谓靖康间进退大臣太速功效蔑着宜慎择而久任之以责成功十曰议修德谓上始膺天命宜益修孝悌恭俭以副四海之望翼日颁纲议於朝惟僭逆伪命二事留中不出纲言二事乃政刑之大者方金人为易姓之谋邦昌偃然正位号处宫禁擅降伪诏以止四方勤王之师及知天下之不与乃请元佑太后垂帘听政而议奉迎邦昌僭逆始末如此陛下欲建中兴之业而专崇僭逆之臣以示四方其谁不解体又伪命臣僚一切置而不问何以励天下士大夫之节帝召执政议之纲复曰邦昌僭逆岂可使在朝廷俾道路指目曰此亦一天子哉因泣拜曰臣不可与邦昌同列当以笏击之陛下必欲用邦昌第罢臣帝颇感动汪伯彦乃曰李纲气直臣等所不及乃谪邦昌於潭州吴玠莫俦以下皆迁谪有差纲又言近世士大夫寡廉鲜耻不知君臣之义靖康之祸能仗节死义者在内惟李若水在外惟霍安国愿加赠恤帝从其请仍诏有死节者诸路询访以闻帝谓纲曰卿昨争张邦昌事内侍辈皆泣涕卿今可以受命矣纲拜谢有旨兼充御营使入对奏曰当今之务先定规模而知先後缓急之序乃能成功所谓规模者外御强敌内销盗贼修军政变士风裕邦财宽民力改弊法省冗

官诚号令以感人心信赏罚以作士气择帅臣以任方面选监司郡守以奉行新政俟吾所以自治者政事已修然後可以问罪金人迎还二圣此规模也至所当急而先者则在于料理河北河东盖河北河东者国之屏蔽也今河东所失者恒代太原泽潞汾晋余郡犹存也河北所失者不过真定怀卫瀋四州而已其余三十余郡皆为朝廷守两路士民兵将所以戴宋者甚坚皆推豪杰以为首领多者数万少者亦不下万人朝廷不因此时置司遣使以大慰抚之分兵以援其危急臣恐粮尽兵疲危急无告金人因而用之皆精兵也莫若於河北置招抚司河东置经制司择有才畧者为之使宣谕天子恩德不忍弃两河於敌国之意有能全一州复一郡者以为节度防御团练使令自为守非惟絶其从敌之心又可责其御敌之力使朝廷无北顾之忧此今日之先务也帝善其言问谁可任者纲荐张所傅亮所尝为监察御史在围城中以蜡书募河北兵士民得书喜曰朝廷弃我犹有一张察院拔而用之应募者凡十七万人故纲以为招抚河北非所不可傅亮者先以边功得官尝治河朔都城受围时亮率勤王之兵三万人屡立战功纲察其智畧可用帝乃以所为河北招抚使亮为河东经制副使有顷皇子生故事当肆赦纲奏陛下登极赦书独遗河北河东愿因今赦广示德意帝从之於是两路人情翕然有以破敌捷书至者金人围守诸郡之兵往往引去而山砦之兵应招抚经制二司募者甚衆开封守阙纲荐宗泽帝从之纲立军法五人为伍伍长以牌书同伍四人姓名二十五人为甲甲正以牌书伍长五人姓名百人为队队将以牌书甲正四人姓名五百人为部部将以牌书队将正副十人姓名二千五百人为军统制官以牌书部将正副十人姓名命招置新军及御营司兵并依新法团结有所呼召使令按牌以遣三省枢密院置赏功司受赂乞取者行军法遇敌逃溃者斩因而为盗贼者诛及家属凡军政申明改更者数十条又以步不足胜骑骑不足胜车请以车制颁京东西制造而教閱之又造战舰募水军及询访诸路武臣材畧之可任者以备用时议遣使於金纲奏曰尧舜之道孝悌而已今所遣使但当奉表通问两宫致思慕之意可也帝乃命纲草表以周望傅雱为二圣通问使奉表以往纲乞降哀痛之诏以感动天下使同心协力以致中兴又乞省冗员节浮费帝皆从其言时四方溃兵为盗者十余万人攻劫山东淮南襄汉之间纲命将悉讨平之又言陛下纵未能行上策幸关中犹当且适襄邓示不忘故都以系天下之心不然中原非复我有帝为诏谕两京以还都之意读者皆感泣未几有诏欲幸东南纲极论其不可且言南阳光武所兴地利足恃可暂驻蹕乃还汴都计无出於此者帝许之而黄潜善汪伯彦陰主南行之计或谓纲曰外论汹汹咸谓东幸已决纲曰国之存亡於是焉分吾当以去就争之先是纲每有所论諫言虽切直无不容纳至是所言常留中不报已而迁纲门下侍郎而潜善为中书侍郎潜善伯彦力排河东北二司之议使张所置司北京勿渡河北而召傅亮还京纲力争之不得乃再疏求去初諫议大夫宋齐愈当金人议立异姓时齐愈书张邦昌姓名入议至是纲进三疏一曰募兵二曰买马三曰募民出财以助兵费齐愈以为不可行疏论其非不报章将再上其乡人嗾齐愈者窃其草示纲时方论僭逆附伪之罪於是逮齐愈戮之东市张浚时为御史劾纲以私意杀侍从诏罢纲为观文殿大学士提举洞霄宫许翰言纲忠义舍之无以致中兴会帝召见陈东东言潜善伯彦不可任纲不可去东坐死翰曰吾与东皆争李纲者东戮都市吾在庙堂可乎遂求去後有旨纲落职居鄂州自纲罢张所以罪去傅亮以母病辞归招抚经制二司并废车驾遂东幸两河郡县相继沦陷凡纲所规画军民之政一切废罢金人攻京东西残毁关辅而中原盗贼蠭起矣绍兴二年除观文殿学士湖广宣抚使知潭州是时江湖江湘之间流民溃卒羣聚为盗贼多者至数万人纲悉平之上言荆湖国之上流如鼎澧岳鄂若荆南一带皆当屯宿重兵倚为形势使四

川之号令可通襄汉之声援可接乃有恢复中原之渐议未及行而谏官徐俯刘裴劾纲罢之四年金人及伪齐来攻纲上防御三策诏付枢密院及三省施行五年诏问攻战守备措置绥怀之方纲奏言守备之宜当先料理淮南荆襄以为东南屏蔽近年以来大将拥重兵於江南官吏守空城於江北故敌人得以侵扰今当於淮之东南及荆襄置三大帅屯重兵以临之分遣偏帅进守支郡加以战舰水军上运下接自为防守敌马虽多不敢轻犯有守备矣然後分责诸将因利乘便收复京畿要以必为之志而勿失机会攻战之利莫大於是若夫万乘所居必择形胜莫善於建康权宜驻蹕愿诏守臣治城池修宫阙立官府置营壁使粗成规模以待巡幸盖有城池然後人心不恐有官府然後政事可修有营垒然後士卒可用此措置所当先也至於西北之民未尝一日忘宋有愿为内应者宜给之土田予以爵赏优加抚循使莫不感悦益坚戴宋之心此绥怀所当先也又条上六事一曰信任辅弼二曰公选人材三曰变革土风四曰爱惜日力五曰务尽人事六曰寅畏天威疏上除江西安抚制置大使兼知洪州时张浚赵鼎相继柄国知纲贤可任然不引当枢轴又不使建阊淮北以当恢复之任仅使安抚江西而兵少粮希事权不重纲屡疏请兵筹度措置江西赖以晏然及张浚以吕祉败引咎去相位言者引汉诛王恢为比纲言浚措置失当诚为有罪然其区区徇国之心有可矜者愿少寛假以责来效时车驾将幸平江纲以为平江去建康不远徒有退避之名不宜轻动八年王伦使金还与金使偕来以诏谕江南为名纲愤懣上疏言金人邀求无厌愿陛下且勿轻许深诏羣臣讲明可以久长之策择其善者从之九年除知潭州荆湖南路安抚大使纲力辞次年卒年五十八赠少师官其亲族十人纲负天下之望以一身用舍为社稷生民安危虽身或不用用又不久而其忠诚义气凜然动乎远迩每宋使至金人必问李纲赵鼎安否其为远人所畏服如此纲所著有易传内篇十卷外篇十二卷论语详说十卷文章歌诗奏议百余卷又有靖康传信录奉迎录建炎时政记建炎进退志建炎制诏表劄集宣抚荆广记制置江右录

论曰纲在靖康承京贯之後文武干畧之士无一存者及高宗之起惟一宗泽如韩岳之流尚隐於卒伍时方艰难莫与共理然纲在围城之中徒手奋臂以成却敌之勲处新造之朝颐指心运遂建中兴之业计其前後皆不过数十日自古遭时之难成功之速未有如纲者也纲去後犹有十年竟置之若有若无之间两建大勲成效章章如此国势抢攘又非承平无事之时犹遭摈抑噤不得施用惜哉

史传三编卷三十四

卷三十五

钦定四库全书

史传三编卷三十五

大学士朱轼撰

名臣传二十七

宋

宗泽

宗泽字汝霖义乌人登元佑六年进士廷对极陈时弊考官恶其切直置末甲调馆陶尉中使督开御河方隆冬役夫僵仆相望泽上书其帅请待来春从之调龙游令民未知学泽为建庠序设师儒讲论经术风俗一变调晋州赵城令下车请升县为军不从泽曰承平时固无虑他日有警当思吾言矣改知掖县部使者承旨市牛黄泽报曰方时疫疠牛饮其毒则结为黄今和气滂流牛安得黄使者怒欲劾邑官泽曰此泽意也通判登州境内官田数百顷皆不毛之土岁输万余缗率横取於民泽奏免之及朝廷遣使由登州结女真盟海上谋夹攻契丹泽曰天下自此多事矣退居东阳结庐山谷间靖康元年中丞陈过庭等列荐假宗正少卿充和议使泽曰是行不生还矣或问之泽曰敌能悔过退师固善否则安能屈节北庭以辱君命乎议者谓泽刚方不屈恐害和议止不遣命知磁州时太原失守官两河者率托故不行泽曰食禄而避难不可也即日单骑就道从羸卒十余人磁经敌骑蹂躏人民逃徙帑廩枵然泽至缮城浚池治器械募义勇为固守计上言邢洺磁赵相五州各蓄精兵二万人敌攻一郡则四郡皆应是一郡之兵常有十万人帝嘉之除河北义兵都总管金人破真定引兵南取庆源自李固渡过河恐泽兵蹙其後遣数千骑直扣磁州城泽擐甲登城令壮士以神臂弓射走之开门纵击斩首数百级所获羊马金帛悉以赏军士康王再使金行至磁泽迎谒曰肃王一去不返今敌又诡词以致大王愿勿行王遂还相州有诏以泽为副元帅从王起兵入援泽言宜急会兵李固渡断敌归路不从乃自将兵趋渡道遇金兵遣秦光弼张德夹攻大破之金人既败乃留兵分屯泽遣壮士夜捣其军破三十余砦时康王开大元帅府檄兵会大名泽履冰渡河见王曰京城受围日久入援不可缓会签枢密院事曹辅齎蜡封手诏至自京师言和议可成泽曰金人狡谲是欲款我师耳君父之望援何啻饥渴宜急引军直趋澶渊次第进垒以解京师之围万一敌有异谋则吾兵已在城下汪伯彦等难之劝王遣泽先行自是泽不得预府中谋议矣二年正月泽至开德十三战皆捷以书劝王檄诸道兵会京城又移书北道总管赵野河东北路宣抚范讷知兴仁府曾楙合兵入援三人皆不答泽以孤军进都统陈淬言敌方炽未可轻举泽怒欲斩之诸将乞贷淬使效死泽命淬进兵遇金人败之金人攻开德泽遣孔彦威与战又败之泽度金人必犯濮先遣三千骑往援金人果至败之金人复向开德权邦彦孔彦威

合兵夹击又大败之泽兵进至卫南度将孤兵寡不深入不能成功乃挥衆直前与战败之转战而东敌益生兵至王孝忠战死前後皆敌垒泽下令曰今日进退等死不可不从死中求生士卒知必死无不一当百斩首数千级金人大败退走数十里泽计敌衆十倍於我今一战而却势必复来使悉其铁骑夜袭吾军则危矣乃暮徙其军金人夜至得空营大惊自是惮泽不敢复出兵泽出其不意遣兵过大河袭击败之王承制以泽为徽猷阁待制时汴京失守金人迫二帝北行泽闻即提军趋滑走黎阳至大名欲径渡河据金人归路还二帝而勤王之兵卒无一至者又闻张邦昌僭位欲先行诛讨会得大元帅府书约移师近都按甲观变泽上书于王曰人臣岂有服赭袍张红盖御正殿者乎自古奸臣皆外为恭顺而中藏祸心未有窃据宝位改元肆赦恶状昭着若邦昌者今二圣诸王悉渡河而北惟大王在济天意可知宜亟行天讨兴复社稷又劝王近刚正而远柔邪纳谏诤而拒谀佞尚恭俭而抑骄侈体忧勤而忘逸乐进忠实而退私伪以系天下之心因累表劝进王即帝位於南京泽入见涕泗交颐陈兴复大计时与李纲同入对相见论国事慷慨流涕纲奇之帝欲留泽黄潜善等沮之除龙图阁学士知襄阳府时金人有割地之议泽言天下者太祖太宗之天下陛下当兢兢业业思传之万世奈何以割地为议乎自金人再至朝廷未尝命一将出一师但闻奸邪之臣朝进一言以告和暮入一说以乞盟终致二圣北迁宗社蒙耻今即位四十日矣未闻有大号令是褫天下忠义之气而自絶其民也臣虽弩怯当躬冒矢石为诸将先捐躯报国恩足矣帝览其言壮之改知青州时年六十九矣开封尹阙李纲言绥复旧都非泽不可徙知开封府时敌骑留屯河上金鼓之声日夕相闻而京城楼櫓尽废兵民杂居盗贼纵横泽至追捕诛舍贼者数人下令曰为盗者赃无轻重并从军法由是盗贼屏息人赖以安王善者河东巨寇也拥衆七十万欲据京城泽单骑入善营泣谓之曰朝廷当危难时使有如公一二辈岂复有敌患乎今日乃汝立功之秋不可失也善感泣遂解甲降又有杨进者兵三十万王再兴李贵王大郎等各拥衆数万往来侵掠泽悉招降之因上疏请帝还京俄有诏荆襄江淮悉备巡幸泽复言比来开封物价市肆渐同平时将士农民商旅士大夫之怀忠义者莫不愿陛下亟归京师以慰人心除延康殿学士京城留守兼开封尹金尝遣人以使伪楚为名至开封府泽曰此名为使实觐我也拘其人乞斩之有诏延置别館泽切谏帝乃亲札谕泽竟纵遣之言者附黄潜善意欲因是构泽尚书左丞许景衡抗疏力辨乞厚加任使以成御敌治民之功且言得宗泽方可保东京有东京行在始安枕帝悟封其章付泽泽乃安时真定怀卫间敌兵甚盛泽以为忧乃渡河约诸将共议事宜以图收复於京城四壁各置使以领招集之兵造决胜战车千余乘车用五十有五五人运车者十有一执器械辅车者四十有四周旋曲折可以应用又据形势立坚壁三十四所於城外驻兵数万泽往来按视之沿河鳞次为联珠砦结连两河山水砦及陕西义士开五丈河以通西北商旅京畿濒河七十二里命十六县分守之县皆开濠深广丈余於其南植鹿角又团结班直诸军及民兵之可用者於是陕西京东西诸路人马咸愿听泽节制泽视师河北还疏言陛下尚留南都舍宗庙朝廷使社稷无依生灵失所仰戴宜亟回汴京以慰元元之心不报及遣官迎奉六宫往金陵泽复上疏曰京师天下腹心也两河虽未敕宁特一手臂之不伸耳今遽欲去之非惟一臂之弗彊且并与心腹而弃之矣昔景德间契丹寇澶渊王钦若劝幸金陵陈尧叟劝幸成都惟寇准请亲征卒用成功臣何敢望寇准然不敢不以章圣望陛下又条上五事其一言黄潜善汪伯彦赞南幸之非泽前後建议经从三省枢密院辄为潜善等所抑金将乌珠渡河谋攻汴京诸将请先断河梁严兵自固泽笑曰去冬金骑直来正坐断河梁耳乃命部将刘衍趋滑刘达趋郑以分敌势戒诸将极力保护河梁以俟大兵之集金人闻

之夜断河梁遁去二年金人自郑抵白沙都人震恐僚属入问计泽方对客围棋笑曰何事张皇刘衍等在外必能御敌乃选精锐数千使绕出敌後伏其归路金人方与衍战伏兵起前後夹击之金人果败金将尼玛哈据西京泽遣部将李景良阎中立郭俊民领兵趋郑遇敌大战中立死之俊民降景良遁去泽捕得景良斩之既而俊民与金将及燕人何仲祖来招泽泽数俊民曰汝为金人持书相诱何面目见我乎斩之谓金将曰汝为人将不能以死敌我乃欲以儿女子语诱我乎亦斩之谓仲祖胁从而免之诸将皆服金师入滑部将张伪请往救泽以五千人付之戒毋轻战以待援擣至迎战敌骑十倍诸将请避其锋擣曰避而偷生何面目见宗公力战死之泽闻擣急遣王宣领骑五千救之擣死二日宣始至与金人大战破之杀伤甚衆泽迎擣丧归恤其家以宣权知滑州金人自是不敢复犯东京山东盗起执政谓其多以义师为名请下令止勤王泽上疏曰自敌围京城忠义之士愤懣争奋广之东西湖之南北福建江淮越数千里争先勤王当时大臣无远识大畧不能抚而用之使之饥饿困穷弱者填沟壑强者为盗贼此非勤王者之罪乃一时措置乖谬所致耳今河东西不降敌而保山砦者不知其几诸处节义之夫自黥其面争先救驾者复不知其几此诏一出臣恐草泽之士一旦解体仓卒有急谁复有效忠义者哉王策者本辽臣为金将往来河上泽擒之解其缚坐堂上为言契丹本宋兄弟之国今女真灭汝国又辱吾主义当协谋雪耻策感泣愿效死泽因问金人虚实尽得其详遂决大举之计召诸将谓曰汝等有忠义心当协谋剿敌期还二圣成大功言讫泣下诸将皆泣听命泽上疏请帝还京曰臣为陛下保护京城自去年秋冬至於今春又三月矣陛下不早回京则天下之民何所依戴又遣子颢诣行在上疏曰天下之事见几而动今收复伊洛而金将渡河扞蔽滑台而敌国屡败河东北山砦义民引领举踵日望官军之至以时而言中兴之兆可见在陛下见机乘时而已又言楚人城郢史氏鄙之今乃於仪真教习水战传闻四方必谓中原不守为江宁控扼之计非所宜也先是泽去磁以州事付兵马钤辖李侃统制赵世隆杀之至是世隆及弟世兴以兵二万来归衆惧生变泽曰世隆本吾一校耳何能为世隆至泽责而斩之时世兴佩刀侍侧衆兵露刃庭下泽徐谓世兴曰汝兄犯法当诛汝能奋志立功足以雪耻世兴感泣会金人攻滑州泽遣世兴往救世兴至掩其不备败之泽威声日着北方闻其名常尊惮之对南人言必曰宗爷爷契丹人有归中国者泽引置坐侧推诚与语谕以忠义给资粮遣之且赐以公凭候官军渡河以为信验人持数百本而去又为榜文散示陷没州县以为公据遂连结诸路义兵燕赵豪杰尝谓人曰事可举矣复上疏言丁进数十万衆愿守护京城李成愿扈从还阙即渡河剿敌杨进等兵百万亦愿渡河同致死力臣闻多助之至天下顺之陛下及此时还京则衆心翕然何敌之足忧乎又言圣人爱其亲以及人之亲所以教人孝敬其兄以及人之兄所以教人弟陛下当与忠臣义士合谋肆讨迎复二圣今太上所御龙德宫俨然如旧惟渊圣未有宫室望改修宝籙宫以为迎奉之所帝乃下诏择日还京而竟不果是年六月王彦聚兵太行山欲大举趋太原泽恐彦孤军不可独进召彦计事彦悉召诸砦指授方畧以俟会合乃以万余人趋汴金人以重兵蹙其後而不敢击既至汴泽令宿兵近甸以卫根本彦遂屯滑州之沙店泽上疏曰臣欲乘此暑月遣彦等自滑州渡河取怀卫濬相等州王再兴等自郑州直护西京陵寝马扩等自大名取洺相真定杨进王善丁进等各以所领兵分路并进既渡河则山寨忠义之民相应者不啻百万契丹汉儿亦必同心协力事方就绪乞朝廷遣使声言立辽天祚之後讲吾旧好以携敌情遣知机辩博之士西使夏东使高丽谕以祸福必出助兵同加扫荡愿陛下早还京师臣当躬冒矢石为诸将先中兴之业必可立致疏入潜善等忌泽成功从中沮之泽前後请帝还京二十余奏每为潜善伯彦所

抑忧愤成疾疽发于背诸将入问疾泽矍然曰吾以二帝蒙尘愤愤至此汝等能殲敌则我死无恨衆皆流涕曰敢不尽力诸将出泽叹曰出师未捷身先死长使英雄泪满襟无一语及家事但连呼过河者三而卒年七十都人号恸遗表犹赞帝还京赠观文殿学士谥忠简泽质直好义亲故贫者多依以为活而自奉甚薄常曰君父侧身尝胆臣子乃安居美食耶始泽招集羣盗聚兵储粮结诸路义兵连燕赵豪杰自谓渡河克复指日可冀有志弗就识者恨之子颢居戎幕素得士心泽卒数日将士去者十五都人请以颢继父任会已命杜充留守乃以颢为判官充酷而无谋屡失人心颢争之不能得乃请持服归自是豪杰不为用羣聚城下者复去为盗而中原不守矣充卒降于金颢官终兵部郎中

论曰泽初在汴京金师屡至及数月之後渡河北去不复侵扰矣故得以选练材武收召豪杰纠合四路之兵以成长驱之势泽之功虽不成然扞蔽北门奋扬威武使行在君臣得整兵辑将终成南渡之基者非泽之力耶泽之守旧都以李纲之举及泽连疏数十上为汪黄等所抑纲之去位久矣语曰安危在出令存亡在所任岂此谓耶

赵鼎

赵鼎字元镇解州闻喜人少孤母樊氏教之渐能通经史百家崇宁五年登进士第对策直斥章惇误国累官洛阳令宰相吴敏知其能擢为开封士曹金人破太原朝廷议割三镇地鼎曰祖宗之地不可以与人何用议及京师失守二帝北行金人立张邦昌鼎与胡寅张浚逃太学中不书议状高宗即位张浚荐为司勳郎官帝幸建康诏条具防秋事宜鼎言宜以六宫所止为行宫车驾所止为行在择精兵以备仪卫其余兵将分在江淮使敌莫测巡幸之定所帝纳之久雨诏求阙政鼎言今日之患始於王安石成於蔡京今安石犹配享庙庭而京之党未除时政之阙无大於是帝为罢安石配享擢右司諫将迁为殿中侍御史故事无自司諫迁殿中者范宗尹以为言帝曰鼎在言路所言四十事已施行三十六可谓举职矣遂用之时刘光世部将王德擅杀韩世忠之将世忠亦率部曲夺建康守府廨鼎请治德专杀无忌之罪而下诏切责世忠指取其将吏付有司治之诸将肃然帝曰唐肃宗得李勉朝廷始尊今朕得卿无愧昔人矣及金兵至江帝幸会稽召台諫议去留鼎陈战守避三策拜御史中丞鼎言经营中原当自关中始经营关中当自蜀始欲幸蜀当自荆襄始吴越介在一隅不足以进取中原荆襄左顾川陕右控湖湘下瞰京洛三国所必争宜以公安为行阙而屯重兵于襄阳运江浙之粟以资川陕之兵经营大业计无出此除端明殿学士签书枢密院事以言事忤旨出知平江府改知建康又移洪州京西招抚使李横欲复东京鼎言横乌合之衆不能当敌恐遂失襄阳已而横战败襄阳竟陷召拜参知政事宰相朱胜非方规复襄阳帝问岳飞可使否鼎曰知上流利害无如飞者飞出师竟复六郡顷之执政忌鼎出为川陕宣抚使将行会边报沓至帝谓鼎曰卿岂可去当遂相卿拜尚书右仆射同平章事兼知枢密院事制下中外相庆时刘豫子麟与金人合兵大入举朝震恐鼎独赞进御之计帝亦曰朕当亲总六师临江决战鼎喜曰累年退怯敌志益骄今圣断亲征成功可必於是诏韩世忠屯扬州命刘光世移军建康而起张浚知枢密院及帝将发临安鼎恐帝意变复乘间言曰陛下养兵十年用之正在今日若少加退阻则人心涣散长江之险不可复恃帝遂幸平江下诏暴逆豫之罪而世忠大仪之捷奏至帝遂欲自将渡江决战鼎曰敌远来利在速战遽与争锋非策也且豫犹遣其子岂可烦至尊耶

帝乃止未几张浚至见鼎执其手曰此行举措皆合人心即日命浚视师江上将士见浚勇气十倍金人闻之遂谋北归帝谓鼎曰近将士致勇争先诸路守臣亦翕然自効乃朕用卿之力也鼎谢曰皆出圣断臣何力之有或问鼎曰金人倾国来攻衆皆恟惧公独言不足畏何耶鼎曰敌衆虽盛然以豫?而来非其本心战必不力以是知其不足畏也帝语张浚曰鼎真宰相天使佐朕中兴宗社之幸也金人既退鼎首请博采羣言为善後计帝还临安以鼎守左仆射浚守右仆射俱兼枢密院督诸路军马鼎於政事先後及人才所当召用者条而置之座右次第奏行之故列要津者多一时之望人号为小元佑及刘豫遣子麟猊分路入寇时张浚屯盱眙杨沂中屯泗韩世忠屯楚岳飞驻鄂刘光世驻庐沿江上下无兵鼎以为忧移书於浚欲令浚与沂中同保合肥浚以为然时边报日急浚欲弃盱眙光世欲弃庐州皆张大贼势以闻鼎曰豫逆贼也若与豫战而不能胜或更退守何以立国今贼已渡河当亟遣浚合光世军尽扫淮南之寇帝然之诏二将进兵浚军至藕塘与猊战大破之鼎命沂中趋合肥以会光世光世已弃庐回江北浚以书告鼎鼎白上诏浚有不用命者听以军法从事光世大骇复进至肥河与麟战破之麟猊拔栅遁去鼎因抑吕祉与张浚不平遂丐去罢知绍兴府七年祉军败没於伪齐浚引咎去位乃复拜鼎尚书左仆射同平章事兼枢密使台谏交论淮西无备鼎曰行朝拥兵十万敌骑直来自足抗之设有他虞鼎身任其责淮西迄无惊时浚已落职帝犹欲加以远窜鼎言浚母老且有勤王功帝曰功过自不相掩已而内批谪浚岭南鼎留不下诘旦鼎入帝怒未解鼎力恳曰浚罪不过失策耳凡人计虑岂不欲万全傥因一失便置之死地後有奇谋秘计谁复敢言者此事自关朝廷非私浚也帝意乃解以散官居浚永州鼎既再相或议其无所施为鼎曰今日之事如人患羸当静以养之若复加攻砭必伤元气矣金废刘豫鼎遣间招河南守将寿亳陈蔡之间往往举城或率部曲来归得精兵万余马数千知庐州刘錡亦言淮北归正者不絶度可得四五万帝喜曰朕尝虑江池守备空虚今得此军可无患矣金人遣使议和朝论以为不可信帝怒鼎曰陛下於金人有不共戴天之讐今屈己请和不憚为之者以梓宫及母后耳羣臣愤懣之词出於爱君不可以为罪陛下宜谕之曰讲和非吾意以亲故不得已为之但得梓宫及母后还敌虽渝盟吾无憾焉帝从其言羣议遂息初鼎与浚共荐秦桧及桧得志密以事间鼎至是遂罢鼎为忠武节度使知绍兴府桧往饯鼎鼎不为礼桧益憾之鼎既去王庶入对帝谓曰鼎两为相於国有大功再赞亲征皆能决胜他人所不及也先是王伦使金从鼎受指鼎曰问礼数则答以君臣之分已定问地界则答以大河为界二者使之大旨不从则已伦受命而行至是伦与金使俱来以抚谕江南为名帝叹息谓庶曰五日前得此报赵鼎岂可去耶鼎尝荐胡寅魏矼晏敦复潘良贵吕本中张致远等数十人及再相奏曰今才德可用如刘大本胡寅吕本中常同林季仲之流陛下能用之乎妬贤长恶如赵霈胡世将周秘陈公辅之徒陛下能去之乎帝为徙世将而补公辅等於外初禁卫诸军遇赦转员其法甚备自中原俶扰军营纷乱诸将所总岁岁奏功而天子亲兵久无陞迁之望鼎请据三衙见管人数彷彿旧例立为转员之法常曰三省常为敌不来而为陛下拔人才修政事枢密常为敌见侵而为陛下申军律治兵甲则两得之矣鼎至越丐祠桧恶其迫已徙知泉州又诬以受张邦昌伪命遂夺节鼎自泉州复上书言时政桧恐其复用使中丞王次翁诬其乾没官钱谪居兴化移漳州潮州安置在潮五年杜门谢客中丞詹大方诬其受贿移吉阳军鼎谢表曰白首何归怅余生之无几丹心未泯誓九死以不移桧见之曰此老倔强犹昔在吉阳三年潜居深处门人故吏皆不敢通问桧命本军月具存亡申省鼎遣人语其子汾曰桧必欲杀我我死汝曹无患先得疾自书墓中石记乡里及除拜岁月至是书铭旌云身骑箕尾归天上气作山

河壮本朝遗言属其子乞归葬遂不食而死时绍兴十七年也天下闻而悲之明年得旨归葬孝宗即位谥忠简追封丰国公擢用其孙十二人鼎为文浑然天成凡高宗处分军国机事多鼎视草有拟奏表疏杂诗文二百余篇号得全集行于世

论曰谈者谓高宗之初人心思奋苟图兴复指期可致及鼎得政而南北之势成矣故鼎专固根本不急用兵然使当鼎之时宗泽尚在李纲再用其所设施亦未可预料也观於岳飞可以见矣虽然鼎善观时施计因事奏功任贤使能兴利救败治国之良材也微鼎则宋之南渡不复能立国矣

张浚

张浚字德远汉州绵竹人唐宰相九龄弟九皋之後父咸举进士贤良两科浚四岁而孤行直视端无诳言识者知为大器入太学中进士第靖康初为太常簿张邦昌僭立逃入太学中闻高宗即位驰赴南京除枢密院编修官擢殿中侍御史时帝在扬州浚请葺东京关陕襄邓以备巡幸擢礼部侍郎浚度金人必来攻而庙堂宴然殊不为备力言之建炎三年金人南侵帝幸钱塘留朱胜非与浚于吴门同节制军马已而胜非召浚独留招溃兵数万安集甫定而苗傅刘正彦之乱作改元赦书至平江浚秘不宣及傅等以檄来浚恸哭谋起兵讨贼傅等以张俊为秦凤路总管俊将卸兵而西浚知帝遇俊厚急?俊握手语之故相持而泣时吕颐浩节制建业刘光世领兵镇江浚乃以蜡书约颐浩光世来会而命俊分兵扼吴江疏请复辟会韩世忠舟师抵常熟俊曰世忠来事济矣白浚招之世忠至对浚恸哭请以身任之浚因大犒俊世忠将士呼诸将校至前抗声誓曰贼以重赏购吾首倘浚此举违天悖人者若曹可取吾头去不然有一退缩悉以军法从事衆皆感愤於是令世忠先进急趋秀州据粮道以俟大军世忠至秀即大治战具傅等以书招浚浚报云自古言涉不顺谓之指斥乘輿事涉不顺谓之震惊宫阙废立之事谓之大逆不道大逆不道者族今建炎皇帝不闻失德一旦逊位岂所宜闻傅等得书大恐乃遣重兵扼临平责浚柳州安置及颐浩光世兵踵至浚乃声傅正彦罪传檄中外率诸军继进浚前遣客冯轡以计说傅等及大军且至傅等忧恐不知所出轡知其可动即以大义白宰相朱胜非使率百官请复辟高宗御笔除浚知枢密院事浚进次临平贼兵拒不得前世忠等搏战大破之傅正彦遁去世忠追擒斩之语在世忠传浚入见伏地涕泣待罪高宗劳问再三曰向在睿圣两宫隔絶一日啜羹小黄门忽传太母之命不得已贬卿柳州朕不觉羹覆于手念卿被谪此事谁任因引入内殿解所服玉带以赐浚谓中兴当自关陕始慷慨请行诏以浚为川陕宣抚处置使便宜黜陟将行平寇将军范琼拥衆自豫章至先是靖康中金人尽取君后太子宗室北行多琼之谋琼又乘势剽掠左右张邦昌为之翼卫至是入朝悖傲无礼乞贷傅正彦等死罪浚奏琼大逆不道召至都堂数其罪诛之分其军隶神武军然後行时金人已取鄜延渡渭攻永兴诸将莫肯相援浚至即出行关陕访问风俗罢斥奸赃以搜揽豪杰为先务诸将惕息听命闻金乌珠犹在淮西恐其复扰东南谋牵制之乃合五路之师以复永兴乌珠驰至战于富平官军大败浚退保兴州命吴玠聚兵於和尚原大散关以断敌来路关师古等聚兵於岷州大潭孙渥贾世方等聚兵于阶成凤三州以固蜀口绍兴元年吴玠连破金将乌噜乌珠之师金兵遂引而北去因拜浚检校少保浚在陕蜀三年训新集之兵当方张之敌以刘子羽为上宾任赵开为都转运使擢吴玠为大将子羽慷慨有才畧开善理

财而玠每战辄胜西北遗民归附日衆故关陕虽失而全蜀安堵且以形势牵制东南江淮亦赖以安初富平之败浚以环庆帅赵哲违节度斩之至是又杀将军曲端言者以为非朝廷疑之三年遣王似副浚浚闻以来求解兵柄且奏似不可任宰相吕颐浩朱胜非毁短浚而御史中丞辛炳以宿憾劾浚遂以本官提举洞霄宫居福州浚既去虑金人释川陕之兵并力窥东南上疏极言其状未几刘麟果引金人南侵帝思浚前言幸平江召浚入见除知枢密院事浚既受命即日赴江上视师时乌珠拥兵十万於扬州约日渡江决战浚至召韩世忠张俊刘光世议事将士见浚勇气十倍浚部分诸将身留镇江节度之世忠遣麾下王愈诣乌珠约战言张枢密已在镇江乌珠曰张枢密贬岭南何得在此愈出浚所下文书示之乌珠色变一夕引去五年除尚书右仆射同平章事兼知枢密院事都督诸路军马浚与赵鼎并相同心辅治务在塞幸门抑近习时巨寇杨么据洞庭诸将讨之不克浚自请行至醴陵释邑囚数百皆么谍者给以文书俾招谕诸砦及岳飞破么贼衆二十余万相继来降湖寇尽平浚遂奏遣飞屯荆襄以图中原乃自鄂岳转淮东会诸将议防秋之宜诏促归朝进中兴备覧四十一篇帝嘉叹置之坐隅六年会诸将议事江上榜豫僭逆之罪命韩世忠据承楚以图淮阳刘光世屯合肥以招北军张俊练兵建康进屯盱眙杨沂中领精兵为後翼以佐俊岳飞进屯襄阳以窥中原浚渡江徧抚淮上诸戍因入覲请幸建康未几刘豫复遣麟猊入寇浚勅诸将曰贼豫以逆犯顺不剿除何以为国今日之事有进无退及刘麟迫合肥俊请益兵光世欲退师朝议欲召飞东下令俊光世还保江浚言俊等渡江则无淮南而长江之险与敌共矣且岳飞一动襄汉有警复何所恃诏从之杨沂中兵抵濠州光世已舍庐州而南淮西汹动浚闻疾驰至采石令曰有渡江者斩光世复驻军与沂中接沂中与刘猊战大破之猊麟皆拔栅遁於是赵鼎等议回蹕临安浚独言天下之事不倡则不起三岁之间陛下一再临江士气百倍今六飞一还人心解体帝幡然从浚计及徽宗皇帝宁德皇后崩问至帝号恸擗踊哀不自胜浚言天子之孝不与士庶同今梓宫未返天下涂炭愿陛下挥涕而起敛发而趋一怒而安天下之民帝乃命浚草诏告谕中外词甚哀切浚又请命诸大将率三军发哀成服中外感动浚退上疏曰陛下思慕两宫忧劳百姓臣之至愚获遭任用臣每感慨自期誓殲敌讐昊天不吊祸变忽生使陛下抱无穷之痛罪将谁执念昔陕蜀之行陛下命臣曰我有大隙於北刷此至耻惟尔是属而臣终隳成功使敌无惮今日之祸端自臣致乞赐罢黜再疏待罪帝令起视事乃请乘輿发平江至建康浚总中外之政凡事丛委以一身任之每奏对必言讎耻之大反覆再三帝未尝不改容流涕时天子方厉精克己戒飭宫庭内侍无敢越度事无巨细必以咨浚赐诸将诏往往命浚草之光世在淮西军无纪律浚奏罢光世使吕祉节制其军而以王德为都统制酈琼副之未几琼举军叛降刘豫吕祉死之浚坐此引咎求去帝问可代者且曰秦桧何如浚曰近与共事方知其闇帝曰然则用赵鼎桧由是憾浚浚既去落职居永州九年除资政殿大学士福建安抚大使大治海舟为直指山东之计十六年彗星出西方浚将极论时事恐貽母忧母訝其瘠问故浚以实对母诵其父对策语曰臣宁言而死於斧钺不能忍不言以负陛下浚意乃决上疏言当今事势譬如养成大疽於头目心腹之间不决不止惟陛下谋之於心谨察情伪使在我有不可犯之势庶几社稷安全不然後将噬脐秦桧大怒黜浚以特进提举太平兴国宫居连州二十年徙永州浚去国几二十年天下士无贤不肖莫不倾心慕之金人惮浚每使至必问浚安在惟恐其复用当是时秦桧怙宠专权每令台臣弹劾必欲杀浚至桧死乃已二十五年复观文殿大学士判洪州浚时以母丧归葬念天下事为桧所坏边备荡弛又闻金亮篡立必将举兵自以大臣义同休戚不敢以居丧为嫌具奏论之会星变求言浚复上疏极论沈

该汤思退等笑浚为狂诏复居永州三十一年有旨自便浚至潭闻钦宗崩号恸不食上疏请早定战守之计未几亮兵大入中外震恐乃复浚观文殿大学士判潭州时金骑充斥王权兵溃刘錡退归镇江遂改命浚判建康府兼行宫留守浚至岳阳买舟冒风雪而行敌兵方焚采石烟焰涨天长江无敢行北岸者独浚一舟径进或止之浚曰吾赴君父之急知直前求乘輿所在而已过池阳闻亮死李显忠兵在沙上浚往犒之一军见浚以为从天而下至建康即牒办行宫仪物亟请乘輿临幸三十二年帝幸建康浚迎拜道左卫士见浚无不以手加额浚起废复用风采隐然人倚为重及帝将还临安劳浚曰卿在此朕无北顾忧矣浚招集忠义及募淮楚壮勇以陈敏为统制且谓敌长于骑我长於步卫步无如弩卫弩无如车乃命敏专制弩治车孝宗即位召浚入见浚从容言人主之学以心为本一心合天何事不济所谓天者天下之公理而已必兢业自持使清明在躬则赏罚举措无有不当人心自归敌国自服帝悚然曰当不忘公言进封浚魏国公史浩议欲城瓜洲采石浚谓不守淮而守江是示敌以削弱怠战守之气不若先城泗州及浩参政浚所规画浩必沮之金人以十万衆屯河南声言规淮移文索海泗唐邓商州及岁币浚以大兵屯盱眙濠庐备之卒无事隆兴元年除枢密使都督军马如故时金人将南侵浚欲及其未发攻之会殿前司李显忠建康都统邵宏渊亦献进攻之策浚以闻帝报可乃遣显忠出濠州趋灵壁宏渊出泗州趋虹县显忠至灵壁败萧琦军宏渊围虹县降富察图们周仁进克宿州中原震动会金帅赫舍哩志宁率兵与显忠战显忠小不利而谍报敌兵大至显忠夜溃引归浚上疏待罪主和议者因毁短浚帝不听浚乃以魏胜守海州陈敏守泗州戚方守濠州郭振守六合治高邮巢县两城为大势修滁州关山以扼敌冲聚水军淮陰马军寿春大飭两淮守备时汤思退为右相秦桧党也素主和议金人索四郡及岁币遣卢仲贤报金浚言仲贤小人多妄不可委信已而仲贤果辱命方再遣使浚力陈其失帝不听更遣胡昉等往而拜浚尚书右仆射同平章事兼枢密使都督如故胡昉等至宿金人胁之昉等不屈更礼而归之帝谕浚曰和议不成天也自此事当归一矣三年议幸建康诏浚行视江淮时浚所招徕山东淮北忠义之士以实建康镇江两军凡万二千余人万弩营所招淮南壮士及江西羣盗又万余人陈敏统之以守泗州凡要害之地皆筑城堡其可因水为险者皆积水为圉增置江淮战舰诸军弓矢器械悉备金人屯重兵于河南将刻日决战及闻浚来亟撤归淮北之来归者日不絶山东豪杰悉愿受节度思退多方构之浚八章乞致仕乃以少保充醴泉观使朝廷遂决割地求和之议浚既去犹疏论尹穡奸邪必误国事且劝上务学亲贤或勉浚勿复以时事为言者浚曰君臣之义无所逃於天地之间吾荷两朝厚恩久尸重任安忍不言上如欲用浚当即日就道不敢以老病为辞也行次余干得疾手书付二子曰吾尝相国不能恢复中原雪祖宗之耻即死不当葬我先人墓左葬我衡山下足矣讣闻孝宗震悼赠太师谥忠献浚幼有大志及为熙河幕官徧行边垒覽观山川形势与旧戍守将握手饮酒问祖宗以来守边旧法及军陈方畧故一旦起自疎远当枢筦之任能通知边事本末在京城中亲见二帝北行皇族系繫生民涂炭誓不与敌俱存故终身不主和议每论定都大计以为东南形势莫如建康人主居之可以北望中原常怀愤惕至如钱塘僻在一隅易於安肆不足以号召北方所荐虞允文汪应辰王十朋刘珙等为名臣拔吴玠吴玠於行间谓韩世忠忠勇可倚以大事一见刘錡奇之付以事任卒皆为名将有成功一时称浚为知人浚学邃于易有易解及杂说十卷书诗礼春秋中庸亦各有解文集十卷奏议二十卷论曰建炎诸将相志於恢复者惟李纲宗泽岳飞韩世忠及浚五人而已浚之任事详审精密若不逮於赵鼎者然登朝则国势振举在军则将士用命缓急进退旋转曲折如臂之使指莫敢违也观其诛范琼废

刘光世指顾之间不动声色非其气有大过人者乎惟勇於赴敌轻举浪战有违於临事而惧之义然包举羣谋驱策衆力其所成功亦已多矣所举士皆为名臣贤将数十年之间効命战场保安疆圉揆厥所由咸浚之建立固不可以富平符离之败黜之也

史传三编卷三十五

卷三十六

<史部,传记类,总录之属,史传三编

钦定四库全书

史传三编卷三十六

大学士朱轼撰

名臣传二十八

宋

岳飞

岳飞字鹏举相州汤阴人世力农父和能节食以济饥人飞少负气节沈厚寡言家贫力学尤好左氏春秋孙吴兵法生有神力未冠挽弓三百筋弩八石学射於周同尽其术能左右射同死朔望设祭于其家父异之曰汝他日为时用其徇国死义乎宣和四年应真定宣抚刘韜募相有剧贼陶俊贾进和飞请百骑灭之遣卒伪为商入贼境贼掠以充伍飞乃伏百人山下以数十骑逼贼贼出战飞阳北贼追之伏起先所遣卒擒俊进和以归康王至相命飞招贼吉倩倩降补承信郎从刘浩解东京围领百骑习兵河上敌猝至飞麾其徒曰敌虽衆未知吾虚实当及其未定击之乃驰迎敌有梟将舞刀而前飞斩之敌大败迁承义郎隶留守宗泽犯法将刑泽见奇之曰此将材也免之会金人攻汴水泽以五百骑授飞遂大败金人而还泽谓曰尔勇智才艺古良将不能过然好野战非万全计因授与陈图飞曰陈而後战兵法之常运用之妙存乎一心泽是其言高宗即位飞上书数千言大畧谓陛下已登大宝社稷有主勤王之师日集宜乘其怠击之黄潜善汪伯彦辈不能承圣意奉车驾日益南恐不足系中原之望愿陛下亲率六军北渡则将士作气中原可复书闻以越职夺官诣河北招讨使张所所问曰汝能敌几何飞曰勇不足恃用兵在先定谋桀枝曳柴莫敖采樵皆谋定也所矍然曰君殆非行伍中人待以国士飞因说所曰国家都汴恃河北以为固苟冯据要冲峙列重镇一城受围诸城或挠或救金人不能窥河南则京师根本之地固矣招讨诚能提兵压境飞惟命是从所大喜借补武经郎使从王彦渡河至新乡金兵盛彦不敢进飞独引所部鏖战夺其纛而舞诸军争奋遂拔新乡飞军食尽从彦乞粮彦不与飞乃引兵益北战於太行山擒金将托卜雅尔乌居数日复遇敌飞单骑持丈八铁枪刺杀哈芬大王敌衆败走飞知彦不悦已复归宗泽为留守司统制泽卒杜充代之飞居职二年每战皆捷尝驻兵竹芦渡与敌相持乃选精锐三百伏前山下令各以薪刍交缚两束夜半爇四端而举之金人疑援兵至惊溃贼黄善曹成孔彦舟等合兵五十万薄南薰门飞部仅八百衆惧不敌飞曰吾为诸君破之左挟弓右运矛横冲其陈贼乱大败之又擒贼杜叔五孙海于东明败黄善于清河授英州刺史及杜充将走建康飞諫

曰中原地尺寸不可弃今一举足此地非我有他日欲取之非数十万衆不可充不听飞不得已从而南於道连破张用李成诸贼及充降金乌珠趋杭州飞要击至广德六战皆捷擒其将王权俘簽军首领四十余衆可用者结以恩遣还令夜斫营纵火敌衆乱飞击败之驻军钟村军无见粮将士忍饥不扰民金所籍兵相谓曰此岳爷爷军也争来降附四年乌珠攻常州宜兴令迎飞移屯盗郭吉闻飞来遁入湖飞使王贵传庆追破之因遣辩士尽降其衆金人再攻常州飞四战皆捷尾袭於镇江东又捷战於清水亭又大捷横屍十五里乌珠趋建康飞设伏牛头山待之夜令百人黑衣混金营中扰之金兵惊自相攻击乌珠次龙湾飞以骑三百兵二千驰至新城大破之乌珠奔淮西遂复建康因上言建康要害之地宜选兵固守仍益兵戍淮拱护腹心帝嘉纳焉乌珠归飞?击於静安败之诏讨戚方降其军绍兴元年张俊讨李成请飞为副时成党马进犯洪州连营西山飞曰贼贪而不虑後若以骑兵自上流絶生米渡出其不意破之必矣请自为先锋俊大喜飞重铠跃马潜出贼右突其陈所部从之进大败走筠州飞抵城东贼出城布陈十五里飞设伏以红罗为帜上刺岳字选骑二百随帜而前贼易其少薄之伏发贼败飞使人呼曰不从贼者坐吾不汝杀坐而降者八万余人进以余卒奔成於南康飞夜引兵至朱家山又斩其将赵万成闻进败自引兵十余万来飞与遇於楼子庄大破之成走降伪齐贼张用者亦相人寇江西飞以书谕之曰吾与汝同里南薰门铁路步之战皆汝所悉今吾在此欲战则出不战则降用得书曰果吾父也遂降江淮悉平飞功第一二年贼曹成拥衆十余万据道贺二州命飞招之成闻飞将至惊曰岳家军来矣即分道遁飞至茶陵招成成不从飞上言比年多命招安故盗强则肆暴屈则就招苟不畧加剿除蠹起之衆未可遽殄许之飞入贺州境得谍缚之帐下飞出帐调兵食吏曰粮尽矣奈何飞曰姑反茶陵已而顾谍者若失意状顿足而入陰令逸之谍者既去飞即蓐食潜趋遶岭未明已至太平场麾兵掩击贼大溃成走据北藏岭上梧关遣其党迎战飞不陈而鼓夺其二隘成又以衆十余万守蓬头岭飞部才八千一鼓登岭破其衆成奔连州飞谓张宪等曰成党散去追而杀之则胁从可悯纵之则复聚为盗今遣若等诛其魁而抚其衆慎勿妄杀累主上保民之仁於是宪等分道招降二万人与飞会连州进兵追成成走宣抚司降时以盛夏行师瘴地抚循有方士无一人病者岭表平移屯江州甫入境承檄捕剧贼数部皆平之三年?吉盜合衆寇掠闽广帝命飞讨之飞至?贼彭友迎战跃马驰突飞麾兵即马上擒之余党退保固石洞洞高峻环水止一径可入飞列骑山下皆持满黎明遣死士疾驰登山贼衆乱弃山而下骑兵围之贼呼丐命飞令勿杀受其降复授徐庆等方畧悉破降诸郡余贼初帝以隆佑震惊之故密令屠?飞请诛首恶赦胁从不许请至三四帝为曲赦?人?人感其德祠之秋入覲帝手书精忠岳飞字制旗赐之授镇南军承宣使江南西路沿江制置使李山吴全吴锡李横牛皋皆隶焉及伪齐遣李成挟金人入侵破襄阳唐邓随郢诸州及信阳军湖寇杨么又与伪齐通欲顺流而下李成亦欲自江西趋两浙与么会四年遂除飞兼荆南鄂岳州制置使使为之备飞奏襄阳六郡为恢复中原基本今当先取六郡除心膂之病然後加兵湖湘以殄羣盗帝以问赵鼎鼎曰知上流利害无如飞者遂授黄复州汉阳军德安府制置使飞渡江中流顾幕属曰飞不擒贼不涉此江矣兵抵郢州伪将京超号万人敌乘城拒飞飞鼓衆而登超投崖死复郢州俄复随州进趣襄阳李成迎战飞见成陈笑曰步兵利险阻骑兵利平旷成左列骑江岸右列步平地虽衆百万何能为举鞭指王贵曰尔以长枪步卒击其骑兵指牛皋曰尔以骑兵击其步卒合战马应枪毙後骑皆拥入江步卒死者无数成夜遁遂复襄阳又进复邓州唐州及信阳军襄汉悉平帝闻喜曰朕素闻飞行军有纪律未知能破敌如此乃以随郢唐邓信阳并为襄阳府路以隶飞授飞清

远军节度使湖北路荆襄潭州制置使封武昌县开国子移屯鄂飞上言金人所爱惟子女金帛志已骄惰刘豫僭伪人心终不忘宋如以精兵二十万直捣中原恢复故疆诚易为力襄阳随郢地皆膏腴苟行营田其利必厚臣候粮足即过江北剿戮敌兵又言六郡人户阙牛粮乞量给官钱免官私逋负州县官以招集流亡为殿最时方重深入之举而营田之议自此始乌珠刘豫合兵围庐州帝命飞解围飞至庐张岳字旗与精忠旗一战而金兵溃五年入觐封武昌郡开国侯命招捕杨么飞所部皆西北人不习水战飞曰兵何常顾用之何如耳乃先遣使招之贼党黄佐曰岳节使号令如山若与之敌万无生理不如降飞表佐武义大夫单骑按其部拊佐背曰子知逆顺者果能立功封侯岂足道欲复遣子至湖中视可乘者擒之可劝者招之如何佐感泣誓以死报佐袭周伦砦杀伦擒其统制陈贵等飞上其功迁武功大夫时张浚以都督军事至潭将还防秋飞袖小图示浚曰已有定画都督能少留八日可破贼浚曰何言之易飞曰王四厢以王师攻水寇则难飞以水寇攻水寇则易水战我短彼长以所短攻所长所以难若因敌将用敌兵夺其手足之助离其腹心之托而後以王师乘之八日之内当俘诸酋浚许之飞遂如鼎州黄佐招杨钦来降飞喜曰杨钦骁悍既降贼腹心溃矣表钦武义大夫礼遇甚厚复遣归湖中两日钦说余端刘洸等来降飞诡骂钦曰贼不尽降何来也杖之复令入湖是夜掩贼营降其众数万么负固不服方浮舟湖中以轮激水其行如飞旁置撞竿官舟迎之辄碎飞伐君山木为巨筏塞诸港汊又以腐木乱草浮上流而下择水浅处遣善骂者挑之且行且骂贼怒来追则草木壅积舟轮碍不行飞亟击之贼奔港中为筏所拒官军乘筏张牛革以蔽矢石举巨木撞其舟尽坏么投水牛皋擒斩之飞入贼垒余酋惊曰何神也俱降飞亲抚慰之纵老弱归田籍少壮为军果八日而贼平浚叹曰岳侯神算也初么恃其险曰欲犯我者除是飞来至是人以其言为?所获贼舟千余鄂渚水军遂为沿江之冠加检校少保进封公还军鄂州太行山忠义社梁兴等百余人慕飞义率众来归六年入觐请置襄阳监司以按察州县帝从之且命自知州通判以下贤否许飞黜陟张浚至江上会诸大帅独称飞与韩世忠可倚大事令飞屯襄阳以窥中原曰此君素志也寻除宣抚副使置司襄阳丁母忧扶柩还庐山降制起复连表乞终丧不许累诏趣起乃就军又命宣抚河东节制河北路飞乃遣王贵等攻虢州下之获粮十五万石降众数万张浚曰飞措画甚大今已至伊洛则太行一带山砦必有应者矣飞又遣杨再兴进兵长水县再战皆捷复遣人焚蔡州粮中原响应会刘豫遣子麟猊入寇帝虑张俊刘光世不足任命飞东下飞驰至贼已败去乃还时伪齐屯兵窥唐州飞遣王贵董先等攻破之焚其营因请图蔡以取中原不许七年入觐拜太尉除宣抚使兼营田大使从幸建康以王德瑄琼兵隶飞飞数见帝论恢复之畧又手疏言金人所以立刘豫於河南盖欲以中国攻中国彼得休兵观衅耳愿陛下假臣日月便则提兵趋京洛据河阳陕府潼关以号召五路叛将叛将既还王师前进彼必弃汴而走河北京畿陕右可以尽复然後分兵濬滑经畧两河如此则刘豫成擒金人远遁社稷长久之计实在此举帝答曰有臣如此顾复何忧进止之机朕不中制又召至寝阁命之曰中兴之事一以委卿会秦桧主和不欲以德琼兵隶飞张浚遂以德为淮西统制琼为副而吕祉以督府参谋领之飞言其不可与浚忤乃乞解兵柄终丧步归庐母墓侧浚怒以张宗元为宣抚判官监其军帝累诏趣飞就职飞趋朝待罪帝慰遣之未几郿琼叛降伪齐杀吕祉浚始悔之飞上言比者寝阁之命窃谓圣断已坚何至今尚未决臣愿提兵进讨顺天道因人心以曲直为老壮以逆顺为强弱万全之功可必又言钱塘僻在海隅非用武地愿建都上游用光武故事亲率六师往来督战庶将士知圣意所向人人用命飞知刘豫结尼玛哈而乌珠恶刘豫可间而动会得乌珠谍者飞阳责之曰汝非

吾军人张斌耶吾向遣汝至齐约诱至四太子汝往不复来吾继遣人问齐已许我今冬以会合寇江为名致四太子於清河汝所持书竟不至何背我耶谍冀缓死即诡服因谓曰吾今贷汝复遣至齐问举兵期乃作蜡书封其股纳之戒勿泄谍归以书示乌珠乌珠大惊驰白金主遂废豫飞复请乘其废豫长驱以取中原不报八年秋金人遣使许归河南地时飞适以召赴行在因言金人不可信和好不可恃相臣谋国不臧恐貽後世讥桧衔之及明年以金归河南地大赦飞谢表有云愿定谋於全胜期收地於两河唾手燕云终欲复讐而报国誓心天地尚令稽首以称藩疏入桧愈恨会遣使谒诸陵飞请以轻骑从洒扫且言金人无事请和此必有肘腋之虞名以地归我实寄之也桧沮其行明年金兵果南下攻拱亳刘錡告急帝命飞驰援且赐札曰设施之方一以委卿朕不遥度飞乃遣王贵牛皋董先杨再兴孟邦杰李宝等分布经畧西京汝郑颍昌陈曹光蔡诸郡遣梁兴渡河纠合忠义以图河东北又复东援刘錡西援郭浩自以其军长驱以阡中原将发密奏曰今欲恢复必先正国本以安人心然後不常厥居以示无忘复讐之意帝得奏大褒其忠飞将李宝牛皋相继败金人於京西飞自攻金人於蔡州破之复其城於是遣张宪败金韩常於颍昌复颍昌府宪又战陈州界败之复陈州王成战郑州败之复郑州统制孟邦杰复永安军张应韩清复西京杨遇战南城军败之复南城军乔握坚复赵州张宪又复淮宁府他将所至皆捷金人大震河南兵马钤辖李兴聚衆收复伊阳等八县及汝州以应飞金李成弃城走飞又使张应会兴复永安军时诸将分道出战飞留大军於颍昌而自以轻骑驻鄆城兵势甚锐金将大惧与龙虎大王议以为诸将易与独飞不可当欲致其师并力一战飞闻之曰金人技穷矣乃出挑战且骂之乌珠怒合龙虎大王盖天大王与韩常之兵迫鄆城飞遣子云领骑兵直贯其陈戒之曰不胜先斩汝鏖战数十合敌屍遍野初乌珠有劲军皆重铠贯以韦索三人为联号拐子马官军不能当是役也以万五千骑来战飞戒步卒以麻札刀入陈勿仰视第砍马足拐子马相连一马仆二马不能行飞军奋击遂大破之金人大恟曰自海上起兵皆以此胜今已矣因益兵而前飞时出视战地望见黄尘蔽天自以四十骑突战败之乌珠愤甚合师十二万次於临颖杨再兴以二百骑遇於小商桥骤与之战杀二千人再兴死焉获屍焚之得箭簇二升飞痛惜之张宪继至复战金兵夜去追奔十五里飞谓云曰贼屡败必还攻颍昌汝宜速援王贵既而乌珠果至贵将游奕云将背嵬战於城西云以骑兵八百挺前决战步军张两翼继之杀乌珠壻夏金吾副统军尼雅满索贝勒乌珠引去是时梁兴亦会太行忠义两河豪杰败金人于垣曲又败之於沁水遂复怀卫州太行道絶金人益恐飞进军朱仙镇距汴京四十五里与乌珠对垒而陈遣骁将以背嵬骑五百奋击大破之乌珠遂还汴京飞檄陵台令行葺诸陵先是飞遣梁兴等布德意招结两河豪杰山砦韦铨孙谋等斂兵固堡以待王师至是李通胡清李宝李兴张恩孙琪等举衆来归金人动息山川险要一时尽得其实尽磁相开德泽潞晋绛汾隰之境皆期日兴兵与官军会所揭旗以岳为号父老百姓争挽车牵牛载糗粮以馈义军顶盆焚香迎候者充满道路自燕以南金人号令不行乌珠欲签军以抗飞河北无一人应者乃叹曰自我起北方以来未有如今日之挫衄金将乌凌阿思谋素号骁勇亦不能制其下但谕之曰毋轻动俟岳家军来即降金将王镇崔庆李凯崔虎华旺等皆率所部降飞以至禁卫龙虎大王之将奇彻千户高勇等皆密受飞旗榜自其国来降大将韩常欲以五万衆内附飞大喜方指日渡河而秦桧欲画淮以北与金为和讽台臣请班师飞言金人锐气沮丧尽弃輜重疾走渡河豪杰向风士卒用命时不再来机难轻失桧知飞志锐不可回乃令张俊杨沂中等先归而後言飞孤军不可久留一日奉十二金字牌飞愤惋泣下东向再拜曰十年之力废於一旦飞班师民遮马恸哭诉曰我等

戴香盆运粮草以迎官军金人悉知之相公去我辈无噍类矣飞亦悲泣取诏示之曰吾不得擅留哭声震野飞留五日以待其徙徙而南者如市亟请以汉上闲田处之方乌珠将弃汴去有书生叩马曰太子母走岳少保且退矣乌珠曰岳少保以五百骑破吾十万京城日夜望其来何谓可守生曰自古未有权臣在内而大将能立功於外者岳少保且不免况欲成功乎乌珠悟遂不去飞既归所得州县旋复入於金飞力请解兵柄不许及入覲帝问之飞拜谢而已十一年金人分道渡淮帝趣飞应援时飞方苦寒力疾而行飞至庐州金兵望风而去乌珠破濠州张俊驻兵不敢进杨沂中遇伏而败及飞至金人乃去初飞在诸将中年最少累立显功张俊不能平飞屈已下之及俊出兵无功而飞屡捷俊愈怒俊又与桧捕韩世忠军吏景着诬以他事欲以撼世忠飞驰书告世忠世忠见帝自明於是俊与桧大憾飞桧之逐赵鼎也飞每对客叹息又以恢复为己任不肯附和议乌珠遗桧书曰汝朝夕以和请而飞方为河北图必杀飞始可和故桧力谋杀之谏议大夫万俟卨中丞何铸御史罗汝楫承桧旨交章劾飞飞遂解兵柄奉朝请桧又使张俊劫王贵诱王俊诬告张宪谋还飞兵因捕飞父子证张宪事使者至飞笑曰皇天后土可表此心初命何铸鞫之飞裂裳以背示铸有尽忠报国四大字深入肤理既閱实无左验铸明其无辜桧乃改命万俟卨傅会其狱岁暮狱不成桧手书小纸付狱即报飞死时年三十九云与宪皆弃市家徙岭南幕属于鹏等从坐者六人初飞在狱大理寺丞李若朴何彦猷大理卿薛仁辅宗正卿士布衣刘允升皆以上书救飞或斥或死狱之将上也韩世忠不平诣桧诘实桧曰飞子云与张宪书虽不明其事莫须有世忠曰莫须有三字何以服天下也时洪皓在金蜡书驰奏言金人所叹服者惟飞耳及闻其死酌酒相贺飞事母至孝药饵必亲母卒水浆不入口者三日家无姬侍吴玠素服飞遗以名姝飞曰主上宵旰岂大将安乐时耶却不受少豪饮帝戒之曰卿异时到河朔乃可饮遂绝不饮帝为飞营第飞辞曰敌未灭何以家为或问天下何时太平飞曰文臣不爱钱武臣不惜死天下太平矣师每休舍课将士注坡跳壕皆重铠习之卒有取民麻一缕以束刍者斩以徇卒夜宿民开门愿纳无敢入者军号冻死不拆屋饿死不掳掠卒有疾躬为调药诸将远戍遣妻劳问其家死事者哭之而育其孤或以子婚其女凡有颁犒均给军吏秋毫不私善以少击衆欲有所举尽召诸统制与谋谋定而後战故有胜无败猝遇敌不动故敌为之语曰撼山易撼岳家军难张浚尝问用兵曰仁智信勇严阙一不可调军食必蹙额曰东南民力耗矣荆湖平募民营田又为屯田岁省漕运之半张所死飞感旧恩鞠其子宗本奏以官好贤礼士览经史雅歌投壶恂恂如书生每辞官必曰将士効力飞何功之有然忠愤激烈议论持正不挫於人卒以此得祸绍兴末太学生程宏图上书讼飞冤中丞汪澈宣抚荆襄故部曲合词讼之哭声雷震孝宗时诏复飞官以礼改葬赐钱百万求其後悉官之建庙於鄂淳熙六年谥武穆嘉泰四年追封鄂王宝庆元年改谥忠武五子云雷霖震霆云飞养子从飞功最多每战手握两铁椎重八十筋先诸军登城陷阵颍昌大战十数出入行阵体被百余创甲裳为赤初飞下狱桧令其党王会搜其家得御札数篋束之左藏南库霖请于孝宗还之霖子珂以淮西十五御札辨验彙次凡出师应援之先後皆可考嘉定间为吁天辨诬集五卷天定錄二卷上之

论曰飞以韩白之才而忠孝出於天性谦恭不伐忧国勤民可谓大臣也已恢复之志虽不遂然平生大功亦莫之与敌宋初南渡溃裂分散不可为国飞始复建康以扃北户取襄阳以遏上流平羣盗以清根本又设间废刘豫以除心腹之害微飞则诸将帅不能独当虽欲限江淮而守之恐未能也至於襄阳飞所自营置终宋之世以为强藩宁理之後视襄阳为存亡宋之

有是人也而使之至此可悲也夫

韩世忠

韩世忠字良臣延安人风骨伟岸目瞬如雷早年鸷勇絶人能骑生马驹年十八以勇敢应募乡州隶赤籍挽强驰射勇冠三军崇宁四年西夏骚动郡调兵扞御世忠在遣中至银州夏人婴城自固世忠斩关杀敌将掷首陴外诸军乘之夏人大败俄夏人复出间道世忠独部勇敢士殊死鬪遇夏监军驸马乌伊跃马斩之夏人大溃累功转进勇副尉宣和二年方腊反世忠以偏将从王渊讨之次杭州贼奄至渊惶怖无策世忠以兵二千伏北关堰贼过伏发衆蹂乱世忠追击大败之渊叹曰真万人敌也世忠穷追至睦州清溪峒问野妇得径挺身仗戈渡险数里捣其穴格杀数十人擒腊以出转承节郎及金人内侵世忠与苏格以五十骑抵滹沱河逢金兵二千余格失措世忠从容令列高冈戒勿动值燕山溃卒舟集命舫岸鼓噪助声势亲跃马薄之回旋如飞敌分二队据高阜世忠出其不意突二执旗者因奋击格等夹攻之舟卒鼓噪敌大乱追斩甚衆时山东河北盗贼蠭起世忠从王渊梁方平讨捕殆尽转武节郎钦宗即位梁方平与金人战而败世忠陷重围中挥刀力战突围出焚桥而还钦宗召问转武节大夫宣抚副使李弥大军校李复作乱淄青附者数万人弥大檄世忠将所部追击至临淄河兵不满千分为四队布铁蒺藜自塞归路令曰进则胜退则死走者令後队剿杀於是莫敢返顾皆死战大破之斩复余党奔溃乘胜逐北追至宿迁贼尚万人方拥子女椎牛纵酒世忠单骑夜造其营呼曰大军至矣亟束戈卷甲吾能保全汝共功名贼骇栗请命跪进牛酒世忠下马解鞍饮啖之尽於是衆悉降授单州团練使屯滹沱河时真定失守世忠知王渊守赵亟援之金人至闻世忠在攻甚急粮尽救絶人劝溃围去弗听会大雪夜半以死士三百捣敌营敌惊乱自相击刺及旦尽遁有自金国来者言其大帅是夜被创死故衆不能支康王如济州世忠率所部劝进高宗即位授光州观察使与诸将讨平羣盗入备宿卫尝请移都长安下兵收两河时论不从建炎二年擢定国军承宣使帝如扬州世忠以所部从张遇自金山来降抵城下不解甲人心危惧世忠独入其垒晓以逆顺衆悉听命授鄜延路副总管屯淮阳三年帝召诸将议移蹕张俊?企宗请往湖南世忠曰淮浙富饶今根本地詎可舍而之他人怀疑一退避则不逞者思乱重湖闽岭之遥安保道路无变乎世忠在阳城收合散亡得数千人闻帝如钱塘方赴行在而苗傅刘正彦之乱作张浚等和平江议讨之世忠适至浚喜以书招之世忠见书大恸举酒酹神曰誓不与此贼共戴天入见浚曰今日大事世忠愿与张俊任之公无忧三月戊戌以所部发平江至秀州称病不行造云梯治器械苗刘始惧时世忠妻梁氏及子亮为傅所质朱胜非给傅曰今遣慰世忠则平江诸人益安矣於是召梁氏入封安国夫人俾迓世忠梁氏疾驱出城一日夜会世忠於秀州未几明受诏至世忠曰吾知有建炎不知有明受斩其使取诏焚之进兵益急傅等大惧进次临平贼将苗翊马柔吉负山阻河为陈中流植鹿角梗行舟世忠舍舟力战张俊继之刘光世又继之军少却世忠复舍马操戈而前令曰今日当以死报国面不被数矢者皆斩於是士皆用命贼列神臂弩持满以待世忠瞋目大呼挺刃突前贼辟易矢不及发遂大败傅正彦拥精兵二千开涌金门以遁世忠驰入帝步至宫门握世忠手恸哭曰中军吴湛佐逆为最尚留朕肘腋能先诛乎世忠即谒湛握手与语折其中指戮於市又执贼谋主王世修以属吏世忠请於帝曰贼拥精兵距瓯闽甚迓倘成巢窟卒未可灭臣请讨之於是以为江浙制置使自衢信追击至渔梁驿与贼遇世忠步走挺戈而前贼望见

昨曰此韩将军也皆惊溃擒正彦及傅弟翊送行在傅亡建阳追擒之皆伏诛世忠初陛辞奏曰臣誓生获贼为社稷刷耻乞殿前二虎贲护俘来献至是卒如其言帝手书忠勇二字揭旗以赐命守镇江及乌珠分道渡江诸屯皆败世忠亦退保江陰乌珠自广德破临安帝如浙东世忠以前军驻青龙镇中军驻江湾後军驻海口俟敌归邀击之会上元节在秀州张灯高会忽引兵趋镇江金兵至则世忠军已先屯焦山寺乌珠遣使通问约日大战许之战将十合梁夫人亲执桴鼓金兵终不得渡尽归所掠假道不听请以名马献又不听达喇在潍州遣贝勒太一趋淮东以援乌珠军江北乌珠军江南世忠以海舰进泊金山下预以铁纆贯大鈎授骁健者敌舟噪而前则分海舟为两道出其背每纆一纆则曳一舟沈之乌珠穷蹙求会语祈请甚哀世忠曰还我两宫复我疆土则可以相全乌珠语塞又数日求再会言不逊世忠引弓欲射之亟驰去谓诸将曰南人使船如使马奈何募人献破海舟策闽人王某者教以舟中载土平版铺之穴船版以擢桨风息则出江有风则勿出海舟无风不可动也又有献谋者曰凿大渠接江口则在世忠上流乌珠一夕潜凿渠三十里次日风止官军帆弱不能运金人以小舟纵火矢下如雨孙世询严允皆战死乌珠得絶江遁去初世忠料敌至必登金山庙观我虚实乃遣兵百人伏庙中百人伏岸浒约闻鼓声岸兵先入庙兵合击之金人果五骑闯入庙兵喜先鼓而出仅得二人逸其三中有一人得而复驰者乃乌珠也是役也乌珠兵号十万世忠仅八千余人相持於黄天荡者四十八日帝六赐札褒之拜检校少保范汝为反於建安势甚炽命世忠讨之世忠曰建居闽岭上流贼沿流而下七郡皆血肉矣亟领步卒三万水陆并进次剑潭贼焚桥世忠策马先渡师遂济贼尽塞要路世忠令诸军偃旗仆鼓径抵凤凰山俯瞰城邑设云梯火楼连日夜并攻贼震怖五日城破汝为窜身自焚斩其弟岳吉擒其谋主裨将等五百余人世忠欲尽诛建民李纲自福州驰见世忠曰建民多无辜世忠即令军士弛城上勿下听民自相别农给牛谷商贾弛征禁胁从者汰遣独取附贼者诛之民感更生世忠谓之曰活汝者李相公也曹成拥余衆在郴邵世忠既平闽寇旋师永嘉若将休息者忽由处信径至豫章连营江滨数十里贼不虞其至大惊世忠招之成以衆降得战士八万遣诣行在遂移师长沙时刘忠有衆数万据白面山营栅相望世忠与贼对垒奕棋张饮坚壁不动衆莫测一夕与苏格联骑穿贼营候者呵问世忠先得贼军号随声应之周覽以出喜曰此天锡也夜伏精兵二千於白面山与诸将拔营而进贼兵方迎战所遣兵已驰入中军夺望楼植旗盖传呼如雷贼回顾惊溃麾将士夹击大破之斩忠首湖南遂平授太尉师还建康置背嵬军皆勇鸷絶伦者四年以江东宣抚使驻镇江金人与刘豫合兵分道入侵帝手札命世忠词旨恳切世忠受诏泣曰主忧如此臣子何以生为遂自镇江济师俾统制解元守高邮候金步卒亲提骑兵当敌骑伐木为栅自断归路会魏良臣使金世忠撒炊?给良臣曰有诏移屯守江良臣疾驰去世忠度良臣已出境即上马令军中曰视吾鞭所向於是引兵次大仪勒五陈设伏二十余所约闻鼓声即起击良臣至金军中金人问王师动息具以所见对韞尔贝勒闻世忠退喜甚引兵至江口距大仪五里别将托卜嘉拥铁骑过五陈东世忠传小麾鸣鼓伏兵四起旗色与金人旗杂出金军乱官军迭进背嵬军各持长斧上搥人胸下斫马足敌被甲陷泥淖世忠麾劲骑四面蹂躏人马俱毙遂擒托卜嘉等二百余人所遣董旼亦败金人於天长县之鶚口擒四十余人解元至高邮遇敌设水军夹河陈日合战十三相拒未决世忠遣成闵将骑士往援复大战败之世忠亲追至淮金人惊溃相蹈藉溺死甚衆捷闻羣臣入贺帝曰世忠忠勇朕知其必能成功沈与求曰自建炎以来将士未尝与金人一战今世忠连捷以挫其锋厥功不细於是部将皆峻擢有差论者以是役为中兴武功第一时达喇屯泗州乌珠屯竹塾镇为世

忠所扼金馈道不通野无所掠杀马而食乌珠夜引军还刘麟刘猊弃輜重遁五年进少保六年授京淮路宣抚使置司楚州世忠披草莱立军府与士同力役夫人梁氏亲织簿为屋将士有怯战者遗之巾幘以耻之人人奋力抚集流散通商惠工山阳遂为重镇张浚以右相视师命世忠图淮阳兵至城下为敌所围世忠奋戈一跃溃围而出不遗一镞呼延通与金将雅哈贝勒搏战扼其吭而擒之乘锐掩击金人败去世忠遂围淮阳乌珠与刘猊救之世忠勒阵向敌使人传语曰锦衣骢马立陈前者韩相公也或危之世忠曰不如是不足以敌敌至杀其导战二人遂引去寻诏班师归楚州淮阳民从而归者以万计七年筑高邮城民益安之初世忠移屯山阳遣间结山东豪杰约以缓急为应宿州马秦及太行羣盗多愿奉约束者金人废刘豫中原震动世忠谓机不可失乞全师北讨招纳归附为恢复计不听秦桧主和议命世忠移屯镇江世忠言金人诡诈恐以计缓我师乞留此军蔽遮江淮又力陈和议之非章数十上金使者来以诏谕为名世忠闻之四上疏谏且曰愿举兵决战兵势最重处臣请当之又言金人欲以刘豫相待恐人心离散士气凋沮既而伏兵洪泽镇将杀金使不克十年世忠围淮阳金人来救世忠迎击於淝口镇败之又遣解元击金人於潭城刘宝击于千秋湖皆捷亲随将成闵从统制许世安夺淮阳门而入大战门内世安中四矢闵被三十余创复夺门以出世忠上其功闵由是知名世忠在楚州十余年兵仅三万而金人不敢犯及秦桧收三大将权拜枢密使世忠遂以所积军储钱百万贯米九十万石酒库十五归於国复抗疏言秦桧误国桧讽言者论之帝寝其奏不下世忠连疏乞骸骨十月罢奉朝请封福国公自此杜门谢客口不言兵时跨驴携酒从一二奚童纵游西湖以自乐平时将佐罕得见其面十三年封咸安郡王二十一年八月卒赠太师世忠初得疾将吏入问世忠曰吾以布衣百战致位王公赖天之灵保首领没於家诸君尚哀其死耶尝戒家人曰吾名世忠汝曹毋讳忠字讳而不言是忘忠也性忠义勇敢事关庙社必流涕极言岳飞冤狱举朝无敢出一语世忠独诣桧诘之又抵排和议触桧尤多或劝止之世忠曰今畏祸苟同他日瞑目岂可受铁杖於太祖殿下与桧同在政地一揖外未尝与谈嗜义轻财锡赉悉分将士持军严重与士卒同甘苦器仗规画精絶过人凡克敌弓连锁甲狻猊鍪及跳涧以习骑洞贯以习射皆其遗法也尝中毒矢入骨以强弩括取之十指仅全四不能动刀箭瘢如刻画然知人善奖用成闵解元王胜王权刘宝岳超起行伍秉将旄皆其部曲云解兵罢政卧家凡十年澹然自若如未尝有权位者子彦直彦质彦古皆以才见用孝宗朝追封蕲王谥忠武配享高宗庙庭

论曰中兴诸将首推岳韩非独用兵之能乃其忠诚义勇远过於人世忠章数十上与秦桧争和议之非不以祸福介意其在行间挺身决鬪百战不怠老而益奋非夫忠义激於其心者其孰能之飞多方面之功而世忠扃钥北户与金人进退如邀乌珠於金山擒卜嘉於大仪皆呼吸存亡在於俄顷世忠身独任之张俊刘光世辈未有肯与为首尾者也至诛苗刘平羣盗功尤多固将帅中社稷臣也

刘錡

刘錡字信叔德顺军人节度使仲武第九子也美仪状善射声如洪钟常从仲武征讨牙门水斛满以箭射之拔箭水注随以一矢塞之人服其精宣和间授合门只候高宗即位録仲武後召见奇之授合门宣赞舍人知岷州为陇右都护与夏人战屡胜夏人儿啼辄怖之曰刘都护

来张浚宣抚陕西奇其才以为泾原经畧使兼知渭州绍兴六年权提举宿卫亲军帝驻平江解潜王彦两军交鬪俱罢命錡兼将之扈从赴金陵十年金人归三京以錡充东京副留守所部八字军三万七千人将发益以殿司三千人皆携老幼而行錡自临安泝江絕淮凡二千二百里至渦口方食暴风拔坐帐錡曰此贼兆也主暴兵即下令兼程而进未至順昌三百里果闻金人败盟南下錡舍舟陆行先趋順昌庚寅谍报金人入东京知府事陈规见錡问计錡曰城中有粮则能与君共守规曰有米数万斛錡曰可矣及旦金骑已入陈錡与规敛兵入城为守御计召诸将计事皆曰金兵不可敌也请以精銳为殿步骑遮老少顺流还江南錡曰吾本赴官留司今东京虽失幸全军至此有城可守奈何弃之吾意已决敢言去者斩部将许清议与錡合錡大喜凿舟沈之示无去意置家寺中积薪於门戒守者曰脱有不利即焚吾家毋辱敌手也分命诸将守诸门明斥堠募土人为间探於是军士皆奋男子备战守妇人砺刀剑争呼跃曰平时人欺我八字军今日当为国家破敌立功时守备一无可恃錡躬自督励取伪齐所造痴车以轮轆埋城上又撤民户扉周匝蔽之凡六日粗毕而金游骑已涉颍河至城下合围錡豫设伏擒其千户阿哈等二人诘知韩将军营白沙渦距城仅三十里即遣千余人夜往击之连战杀敌颇衆既而三路都统葛王褻以兵三万与龙虎大王合兵薄城錡令开诸门金人疑不敢近初錡傅城筑羊马垣穴垣为门至是蔽垣为陈金人纵矢皆自垣端軼着於城或止中垣上錡用破敌弓翼以神臂强弩自城上或垣门射敌无不中金兵稍却复以步兵邀击溺河死者不可胜计破其铁骑数千順昌受围四日金兵益盛乃移砦於东村距城二十里錡遣骁将阎充募壮士五百人夜斫其营是夕天欲雨电光四起见异服者辄殲之金兵退十五里錡复募百人以往或请衔枚錡笑曰无以枚为也命折竹为觶人持一以为号直犯金营电所烛则皆奋击电止则匿不动敌衆大乱百人者闻吹声则聚金人益不能测终夜自战积屍盈野退军老婆灣乌珠在汴闻之即索靴上马不七日至順昌錡闻乌珠至会诸将问计或请乘屡捷之势具舟全军而归錡曰朝廷养兵十五年正为缓急之用况已挫贼锋军声稍振且敌营甚近而乌珠又来吾军一动彼蹶其後则前功俱废使敌侵軼两淮震惊两浙则平生报国之志反成误国之罪矣衆皆感动奋曰惟太尉命錡募得曹成等二人谕之曰遣汝作间第如我言敌必不汝杀今置汝绰路骑中汝遇敌则佯坠马为敌所得敌问我何如人则曰太平边帅子喜声伎朝廷以两国讲好使守东京图逸乐耳二人如言乌珠大喜曰此城易破耳即置鷺车炮具不用翼日錡登城望见二人械而来縋而上之械上系文书一卷錡恐惑衆立焚之乌珠责诸将丧师衆皆曰南朝用兵非昔比元帅临城自见錡遣耿训约战乌珠怒曰刘錡何敢与我战以吾力破尔城直用靴尖趯倒耳训曰太尉非但请与太子战且谓太子必不敢渡河愿献浮桥五所济而大战乌珠曰诺乃下令明日府治会食迟明錡果为五浮桥於颍河上敌既济錡陰遣人毒颍上流及草中戒军士虽渴死毋得饮於河敌用长胜军严阵以待诸帅各居一部衆请先击韩将军錡曰击韩虽退乌珠精兵尚不可当法当先击乌珠乌珠一动则余无能为矣时天大暑敌远来疲敝人马饥渴食水草者辄病往往困乏而錡士气闲暇皆番休更食羊马垣下方晨清凉錡按兵不动逮未申间忽遣数百人出西门接战俄以数千人出南门戒勿喊但以銳斧犯之统制官赵撙韩直身中数矢战不肯已士殊死鬪入其阵刀斧乱下敌大败方大战时乌珠被白袍乘甲马以牙兵三千督战兵皆重铠甲号铁浮图戴铁兜牟周匝綴长檐三人为伍贯以韦索每进一步即用拒马拥之退不可却錡军以枪标去其兜牟大斧断其臂碎其首敌又有长胜军以铁骑分左右翼号拐子马专以攻坚战酣然後用之自用兵以来所向无前至是亦为錡兵所杀敌既败錡遽以拒马木自障少休城上鼓声不絕

出饭羹坐饷战士如平时敌披靡不敢近食已撤拒马木深入斫敌又大破之弃尸毙马血肉枕藉车旗器甲积如山阜是夕大雨平地水深尺余乙卯乌珠拔营北去錡追之死者又万数是役也金兵数十万而錡兵不过数万出战仅五千人錡能以逸待劳以故辄胜捷闻帝甚喜授錡武泰军节度使知顺昌府沿淮制置使时洪皓在燕密奏顺昌之捷金人震恐诸凡燕之重宝珍器悉徙而北欲捐燕以南弃之故议者谓是时诸将协力进兵则乌珠可擒汴京可复未几秦桧以和议召还诸将錡亦还太平州十一年乌珠复南下錡引兵会诸将据东关出清溪两战皆捷复与诸将败乌珠於柘皋又追败之於东山金人望见曰此顺昌旗帜也即退走初錡名位最在诸将後以顺昌之捷骤贵张俊杨沂中等深嫉之二人还朝诬錡战不力秦桧陰主之遂罢錡知荆南府岳飞请留錡掌兵不听錡在荆南六年军民安之及魏良臣言錡名将不当久闲乃复加太尉帅荆南府三十一年金主亮调兵六十万自将而南中外大震时诸名将多已物故而錡病剧不能将兵金人且渡江会都督府参赞军事虞允文督舟师大破金人於采石已而谒錡问疾錡执允文手曰疾何必问朝廷养兵三十年一技不施大功乃出一儒生我辈媿死矣三十二年闰二月錡愤懣呕血数升而卒谥武穆錡慷慨深毅有儒将风金主亮之南也下令有敢言錡姓名者罪不赦枚举南朝诸将问其下孰敢当者其答如响至錡莫有应者亮曰吾自当之世传錡通陰阳家行师知所避就錡在扬州用石灰画白城壁书曰完颜亮死於此亮多忌见而恶之遂居龟山人衆不可容卒以致变云论曰顺昌之捷战功甚伟考其审机观变自始至终皆有成算非侥幸而胜者也兵法攻瑕则坚者瑕此谓兵力畧相当可以摇撼而动若乌珠之於錡人衆相十倍气势相百纵能击败其偏师适自耗其力耳而乌珠之中军虎旅百万岂能损其秋毫哉故錡不用诸将之策直以劳逸之势攻之有以也哉

卷三十七

钦定四库全书

史传三编卷三十七

大学士朱轼撰

名臣传二十九

宋

刘子羽

刘子羽字彦修其先京兆人十三世祖翱後唐清泰中官建州因家崇安父韜第进士尝摄鄜延帅出奇兵捣夏人解震武围未几夏人纳款知越州击败方腊守真定招降贼首柴宏却金人之兵京师陷遣诣金营尼雅满素知其名命仆射韩正馆之正曰军方议立异姓欲以君代正为仆射北向取富贵在此行矣韜仰天大呼退而自书曰贞女不更二夫忠臣不事二君况主忧臣辱主辱臣死予今必死所以报国即沐浴更衣酌卮酒而缢子羽宣和初为韜主管浙东幕府机宜文字以破睦贼功再迁卫尉丞从父守真定誓以必死金人不能拔而去建炎中大将范琼拥强兵在江西召之弗来来又不肯释甲张浚与子羽密谋诛之一日浚命张俊以千兵甲来若备他盗者因设酒食召俊琼及刘光世赴都堂议事食已相顾未发子羽就庑下取黄纸趋前麾琼下曰有敕召将军诣大理置对琼愕视不知所为子羽顾左右拥置輿中卫以俊兵送狱光世出抚其衆曰所诛止琼尔等固天子自将之兵也皆应曰诺有旨分隶御营五军顷刻而定浚大奇其材除徽猷阁待制参议川陕宣抚军事开幕府秦州节制五路规以五年而後出师金人窥江淮急浚念禁卫寡弱计所以分挠其势欲合五路之兵以进子羽以非本计争之不得未几富平失利人情汹汹有建策徙治夔州者子羽叱曰孺子可斩也四川全盛敌久欲入寇直以川口有铁山栈道之险未敢遽窥今不坚守而僻处夔峡与关陕声援不闻进退失计悔将何及宣司但当留驻兴州外系关中之望内安全蜀之心急遣官属出关呼召诸将收集散亡分布险隘坚壁固垒观衅而动浚然其言子羽即自请奉命北出至秦州召诸亡将诸将闻命大喜悉衆来会分兵守险塞敌知有备引去明年复来攻浚移治阆州子羽请独留河池调护诸将以通内外声援会秦凤金房二镇皆饥镇帅吴玠王彦皆愿得子羽守汉中浚承制拜为利州路经畧使兼知兴元既至通商输粟二镇获安除宝文阁直学士金人复攻金州彦失守退保石泉子羽急移兵守饶风关驰告玠玠自镇昼夜驰至列营拒守金兵悉力仰攻死伤山积更募死士由闲道绕出关後全蜀大震玠邀子羽去子羽固持不可留玠同守定军山玠亦难之子羽焚兴元退守三泉县从兵不满三百取草芽木甲而食遗玠书诀别玠时在仙人关其爱将杨政大呼军门曰节使不可负刘待制不然政辈亦舍节使去矣玠乃间道与子羽会子羽留玠共守三泉玠曰关外蜀之门户不可轻弃复往守仙人关子

羽就山筑壁垒金人至子羽据匡床坐垒口诸将泣告曰此非待制坐处子羽慷慨语曰子羽今日死于此诸将皆奋会敌乏食引去子羽与玠合击败之于金牛镇始还兴元金人入梁洋浚欲移潼川子羽遗浚书言已在此金人必不敢南浚乃止萨拉噶遣人持书旗来招子羽斩之纵其一还寄语云欲来即来吾有死尔何可招也先是金人再窥蜀为必取计子羽预徙梁洋公私之积敌无所掠馈饷不继腹背受攻疫疠且作故亟引去浚虽屺师卒能全蜀子羽之功居多寻坐与浚俱罢责授单州团练副使泉州安置吴玠始为裨将未知名子羽独奇之荐于浚至是玠上疏讼子羽功请纳节赎罪得复元官浚还朝请子羽知鄂州再视师荆襄川陕遣往抚谕川陕还言金人未可图宜益兵屯田以俟机会及浚劾罢刘光世欲以兵属子羽子羽固辞改知泉州会酈琼叛浚罢相子羽安置漳州金人复入浚荐复元官知镇江充沿江安抚使建议清野徙淮东人于镇江抚以恩信兵民杂居无敢相侵者未几议和秦桧风谏官论罢之卒諡忠定鞠之裔孙名頌者收峒寇有功諡忠简名纯者死邵武寇立庙封忠烈諡忠显子羽子珙字共父諡忠肃世号五忠刘氏云

论曰子羽佐父鞏守真定时年未弱冠孤城疲卒当大敌压攻神志不慑守御有方迨鞏死忠义子羽佐张浚宣抚川陕挟吴玠共图厥功危急存亡之秋劲节远略可谓具文武长才矣一门五忠弟子翬以学有渊源为考亭师伟哉

吴玠 璘

吴玠字晋卿德顺军陇干人父葬永洛城因徙焉少沉毅有志节知兵善骑射读书能通大义未冠以良家子隶泾原军累功权泾原第十将靖康初夏人攻怀德军玠以百余骑追击斩首百四十级擢第二副将建炎二年金人畧秦雍都统制曲端以玠为前锋逆击大破之追奔三十里权泾原路兵马都监兼知怀德军攻华州拔之三年冬剧贼史斌欲犯长安玠击斩之迁忠州刺史张浚巡关陕刘子羽称玠及其弟璘材勇浚与玠语大悦即授统制寻举为秦凤副总管知凤翔府时兵火之余玠劳来安集民赖以生九月浚合五路兵与金人战而败巴蜀大震玠收散卒保和尚原积粟缮兵列栅为死守计或劝玠退守汉中以扼蜀口玠曰我保此敌惧吾蹶其後不能越我而进是所以保蜀也玠在原上凤翔民感其惠夜输刍粟助之玠赏以银帛民益喜输者益多金人虽邀杀之民冒禁如故绍兴元年金将摩哩与乌噜舍赫约日攻和尚原乌噜舍赫先期至阵北山索战玠令诸将坚阵待之更战迭休山谷路狭多石马不能行金人舍马步战大败移砦黄牛会大风雨雹遂引去摩哩方攻箭箐关玠复遣将击退之两军终不得合始金人之入也玠与璘以散卒数千驻原上朝问隔絕人无固志有谋劫玠兄弟北去者玠知之召诸将歃血盟勉以忠义将士皆感泣张浚上其功承制拜明州观察使居母忧起复兼陕西诸路都统制金人自起海角狃常胜及与玠战辄北愤甚谋必取玠十月乌珠会诸道兵十余万攻和尚原玠令诸将选劲弓强弩分番迭射号驻队矢连发不絕繁如雨注敌稍却则以奇兵旁击絕其粮道度其困且走设伏于神垓以待金兵至伏发大乱纵兵夜击大败之乌珠中流矢仅以身免张浚承制以玠为镇西节度使璘为泾原路马步军副总管二年命玠兼宣抚处置使节制兴文龙三州金久窥蜀以和尚原扼其冲不得逞将出奇取之时玠在河池金人用叛将李彦琪驻秦州睨仙人关以缀玠复令游骑出熙河以缀关师古而萨拉噶自商於直捣上洋三年正月取金州二月长驱趋洋汉兴元守臣刘子羽急令田晟守饶

风关驿书召玠入援玠自河池日夜驰三百里以黄柑遗敌曰大军远来聊用止渴萨拉噶大惊以杖击地曰尔来何速耶遂大战饶风岭金人被重铠登山仰攻一人先登则二人拥後前者既死後者代攻玠军弓弩乱发大石摧压如是者六昼夜死者山积而敌不退会玠有小校得罪奔金者导以祖溪间路出关背乘高以阨饶风诸军不支遂溃玠退保西县敌入兴元子羽退保三泉筑潭毒山以自固玠走三泉会之未几金人北归玠急遣兵邀于武休关掩击其後军堕涧死者以千计尽弃輜重去金人始谋本谓玠在西边故道险东来不虞玠驰至虽入三郡而得不偿失四年二月敌复大入攻仙人关先是璘在和尚原餉馈不继玠又以其地去蜀远命璘弃之经营仙人关右杀狐平剏筑一垒移原兵守之至是乌珠萨拉噶及刘夔率十万骑入侵自铁山凿崖开道循岭东下玠以万人当其冲璘率轻兵自七方关倍道而至与金兵转战七昼夜始与玠合敌首攻玠营玠击走之又以云梯攻垒壁杨政以撞竿碎其梯以长矛刺之璘拔刀画地谓诸将曰死则死此退者斩金分军为二乌珠阵于东韩常阵于西璘率锐卒介其间左萦右绕随机而发战久璘军少惫急屯第二隘金生兵踵至人被重铠铁钩相连鱼贯而上璘以驻队矢迭射矢下如雨死者层积敌践而登萨拉噶驻马四视曰吾得之矣翼日命攻西北楼姚仲登楼酣战楼倾以帛为绳挽之复正金人用火攻楼以酒缶扑灭之玠急遣统领田晟以长刀大斧左右击明炬四山震鼓动地明日大出兵统领王喜王武率锐士分紫白旗入金营金阵乱奋击射韩常中左目金人宵退玠遣统制官张彦劫横山砦王浚伏河池扼归路又败之自是金人还据凤翔不复妄动矣拜检校少师玠与敌对垒且十年常苦远饷劳民屡汰冗员节浮费益治屯田岁收至十万斛又调戍兵命梁洋守将治褒城废堰民知灌溉可恃愿归业者数万家九年玠卒于仙人关年四十七赠少师玠善读史凡往事可师者録置座右积久墙牖皆格言也用兵本孙吴务远略不求小利故能保必胜御下严而有恩虚心询受虽身为大将卒伍至下者得以达情故士乐为之死选用将佐视劳能为高下不以亲故权势挠之玠死胡世将问玠所以制胜者璘曰璘从先兄有事西夏每战不过一进却之顷胜负辄分至金人则更进迭退忍耐坚久令酷而下必死每战非累日不决胜不遽追败不至乱与之角逐滋久乃得其情盖金人弓矢不若中国之劲利中国士卒不若金人之坚耐吾常以长技洞重甲于数百步外则其冲突固不能相及于是选据形便出锐卒更迭挠之与之为无穷使不得休暇以沮其坚忍之势至决机于两阵之间则璘有不能言者方富平之败秦凤皆陷金人一意睨蜀东南之势亦棘微玠身当其冲无蜀久矣故西人至今思之淳熙中追封涪王

璘字唐卿玠弟也从玠多战功绍兴三年累官至荣州防御使知秦州是岁弃和尚原别营仙人关以防金兵深入四年乌珠萨拉噶果以十万衆至关下璘自武阶路入援先以书抵玠谓杀狐平地阔远前阵散漫须後阵阻隘然後可以必胜玠从之急修第二隘璘冒围转战与玠会敌果极力攻第二隘诸将有请别择形胜以守者璘曰兵方交而退是不战而走也吾度敌去不久矣诸君第忍之震鼓易帜血战连日金兵大败自是不敢窥蜀者数年迁定国军承宣使知熙州九年升护军都统制知秦州及玠卒而胡世将制置四川至河池璘见之曰金大兵屯河中府止隔大庆一桥耳骑兵疾驰不五日至川口吾军远在陕西缓急不可追集关隘不葺粮运断絶此存亡之秋也时朝廷恃和议欲废仙人关世将乃抗奏谓当外固欢好内修守御今日分兵当使陕蜀相接闻金人之谋欲佯弃陕西不顾使南兵来主之然後一发取蜀敌情如是当为伐谋之备仙人关未宜遽废鱼关仓亦宜积粮于是璘仅以牙校三队赴秦州留

大军守阶成山砦戒诸将毋撤备而世将以宣抚使置司河池十年金萨拉噶渡河入长安趋凤翔陕右诸军隔在敌後远近震恐世将急召诸将议参谋孙渥谓河池不可守请退保仙人原璘厉声折之曰懦语沮军可斩也璘请以百口保破敌世将壮之指所居帐曰世将誓死于此乃命田晟以三千人迎敌璘又遣姚仲拒于石壁砦败之金呼纽郎君以三千骑冲璘军璘使李师顔以骁骑击走之呼纽入扶风复攻拔之获三将及士卒百十有七人萨拉噶怒甚自战百通坊列阵二十里璘遣姚仲力战破之十一年与金统军和珍战剡家湾败之复秦州及陕右诸郡初和珍与苏卜实合军五万屯刘家圈璘请讨之世将问策安出璘曰有新立叠阵法每战以长枪居前坐不得起次最强弓次强弩跪膝以俟次神臂弓约贼相搏至百步内则神臂先发七十步强弓并发次阵如之凡阵以拒马为限铁钩相连俟其伤则更代之遇更代则以鼓为节骑两翼以蔽于前阵成而骑退谓之叠阵诸将窃议曰吾军其歼于此乎璘曰此古束伍法也军法有之诸君不识耳得车战余意无出于此士心定则能持满敌虽锐不能当也及战遂用之金二帅老于兵据险自固前临峻岭後控腊家城谓官军必不敢轻犯先一日璘会诸将问所以攻姚仲曰战于山上则胜山下则败璘以为然乃夜半遣仲及王彦銜枚截坡约上岭而後发火二将至岭寂无人声军已毕列万炬齐发敌骇愕曰吾事败矣苏卜实善谋和珍善战二帅异议璘先以兵挑之和珍果出鏖战璘以叠阵法更休迭战轻裘驻马亟麾之士殊死鬪金人大败降者万人和珍走保腊家城璘围而攻之城垂破会诏班师世将浩叹而已明年竟割和尚原以与敌撤戍割地皆秦桧主之也十四年以璘为西路安抚使治兴州阶成和凤文龙兴七州隶焉时和议方坚而璘治军经武常如敌至三十二年璘遣姚仲攻德顺四十日不克以李师顔代之遣子挺节制军马挺与敌战于瓦亭败之璘自将至城下守陴者闻呼相公来观望咨嗟矢不忍发璘按行诸屯预治黄河战地斩不用命者先以数百骑尝敌敌一鸣鼓锐士空壁跃出突璘军璘军得先治地无不一当十至暮璘忽传呼某将战不力人益奋搏敌敌大败遁入壁会天大风雷金人拔营去凡八日而克璘入城市不改肆父老拥马迎拜不絶孝宗乾道元年诣阙且朝德寿宫高宗见璘叹曰朕与卿老君臣也两朝存劳相踵拜太傅封新安郡王仍领宣抚使改判兴元府璘至汉中修复褒城古堰溉田数千顷民甚便之三年卒年六十六赠太师追封信王初璘病笃命具遗表曰愿陛下毋弃四川毋轻出兵不及家事人称其忠璘刚勇喜大节略苛细读史晓大义代兄为将守蜀余二十年隐然为方面之重高宗尝问胜敌之术璘曰弱者出战强者继之高宗曰此孙臆三驷之法一败而二胜也尝着兵法二篇大要谓金人有四长我有四短当反我之短制彼之长四长曰骑兵曰坚忍曰重甲曰弓矢吾集蕃汉所长兼收而并用之以分队制其骑兵以番休迭战制其坚忍制其重甲则劲弓强弩制其弓矢则以远尅近以强制弱布阵之法则以步军为阵心左右翼以马军为左右肋拒马布两肋之间至帖拨增损之不同则系乎临机知兵者取焉璘举诸将率以功有荐才者璘曰兵官非尝试难知其才以小善进之则侥幸者获志而边人宿将之心怠矣

论曰宋之南渡巴蜀最为上游所以藩蔽荆襄控御关陇者也二吴兄弟实经营之始保和尚原继守仙人关设形势据险阻使金人不得轶越而下流安矣及和议既成将遂分兵撤备而璘与胡世将力陈其不可终以保蜀兄弟相继数十年绥辑人民辅宁国家可谓悉心以勤其事者贤于张俊杨沂中辈远矣

高登字彦先号东溪漳浦人少孤力学日诵数千言刻志励行宣和间为太学生金人攻京师徽宗出走登与陈东等上书乞斩蔡京童贯王黼梁师成李邦彦朱勔六贼以谢天下廷臣复建和议割三镇夺种师道李纲兵柄登与东再抱书诣阙军民不期而会者数万王时雍纵兵欲尽歼之登与十人屹立不动乃止钦宗即位擢吴敏张邦昌为相敏白李邦彦无辜乞复用登上言陛下以东宫践祚人人翘足以观新政奈何相吴敏张邦昌复再纳邦彦大失民望不报明日又上言陛下有太甲之不明而朝无阿衡靡明皇之有初而遽相林甫乞罢敏邦昌逐王时雍等召徐处仁为相书五上俱不报因谋南归闻有旨张邦昌李邦彦各与远郡赵野李梈王孝迪相继罢斥徐处仁正台司登喜曰是可以尽言矣复上书言谏官所论陛下批答有云朕所素定有云朕所不好是护所短而不使人言也言路塞则下情壅危亡可立待矣书入皆不报初金人至六馆诸生将遁去登曰君在可乎与林迈等请随驾帝不果出金师退吴敏讽学官起罗织登等屏斥还乡绍兴二年高宗驻蹕临安登以十事投时相不行遂于廷对尽言之以直见忌授下州文学寻调富川主簿宪使董弁闻其名檄讫六郡狱仍兼贺州学事学故有田罢归买马司登请复其旧守曰买马与养士孰急登曰买马固急然学校礼义由出一日废衣冠之士与堂下卒何异守曰抗长吏耶登曰天下所恃以治者礼义与法度耳既两弃之登亦何言守改容从之寻摄狱事有囚杀人守欲薄其罪曰阴德可为登曰阴德岂可有心为之杀人者死而可幸免则被死之冤何由而消满秩士民丐留不获相率馈钱五十万不告姓名登辞之未知所归乃尽为购书置于学归至新宁会大饥州帅连南夫曰抚凋瘵者莫如高主簿遂檄以往至则发廩赈济愿贷者听复为糜于野以食之全活万计嗣岁大稔偿亦及数帅漕列奏遂改正任绍兴八年赴政事堂审察上疏万言及时议六篇其序云方今贤才未用有蔽主者焉二府容具位之臣盈廷多罔上之议作蔽主上下二篇财计未足有蠹国者焉太仓给冗食之兵良田膳游手之民作蠹国上下二篇兆庶未宁有害民者焉冗官起贪残之念募役长戕贼之奸作害民上下二篇帝览而善之秦桧恶其议已授静江府古县令至静江广西帅沈晦问登何以治县登条十余事晦曰此古人之政今人诈恐不可行登曰忠信可行蛮貊谓不能行诚不至耳但登不差人下乡愿公不差人下邑晦曰谨奉教登以廉谨公仁四字自警有所追呼必宽期限讼者悉从面决吏无所容其欺又新黄宫以来学徒远方之士皆赢粮而至胥徒有辞役而就学者县有豪民秦琥为民害持吏短长号秦大虫登呼至面数叱下必寘之法琥忿而死一郡称快郡帅胡舜陟谓登曰古县秦太师父旧治太师生焉盍祠之登曰桧为相无状祠不可立又令市熊掌与牛乳登曰践雪而搏猛兽非驱民于死乎将春而夺之牛是劝农之职乎舜陟大怒掀秦琥事罢之登适母病申乞寻医不待报去舜陟遂创桧父祠且诬以专杀之罪诏送静江府狱桧实主之舜陟径遣卒至漳浦捕登登时母死诣阙上书求纳官赎罪以终丧帝览而怜之故人有为右司者谓登曰丞相尝识君于太学能一见终身事且无忧上书徒尔为也登曰登但知有君父不知有权臣既而中书奏故事无纳官赎罪仍下静江府狱登号泣而归葬母毕诣静江勘所舜陟先以事下狱死矣事卒白辟摄归善令差考试潮州登愤权臣专恣使诸生论直言不闻之可畏策闽浙水灾之所自时丞相赵鼎在潮谓曰天下主文多矣未有如公忠诚爱君者留语终日桧闻取旨编管容州登时方出潮阳试院归旧隐与学者讲论州遣使臣谢大作持省符示登登读毕即拜谢上马大作谓少入告家人无害也登曰君命不敢稽比夜巡检领百卒至兵刃森列登从容谓曰朝廷若赐死亦当拜勅而後就法大作感登忠义叱巡检曰省符在我手无他也吾当以死扞之登至容种蔬植竹为终焉之计家事一不介意惟闻朝廷所行事小失则颦蹙不安大失则恸哭随之容本穷

闻登至执经从者数百人为讲大学中庸之旨教方行而疾作以绍兴戊辰年卒有巨星自寝飞出登初得疾召所游诀别其子扶请更医登曰原始要终故知死生之说吾不起矣复请灼艾登曰身体发肤受之父母不敢毁伤命止此无益也通守黄勲至曰彦先怕痛乎登曰登尝献瞽言刀锯鼎镬且不顾此何足畏但无益耳因命扶榜于厅事云奉先人遗训不受僧道纸龕之类语出处行藏及天下大计累数百言不及其私翼日勲再至曰无所属乎登以手抚床曰天下苍生望霖雨勲起谢勲何足以当此揖勲出焚香端坐而逝登少失父事母至孝尝舟行阻风念无以奉晨羞忽有白鱼跃于舟母病思鹿肉夜有虎衔鹿置其门其学以慎独为本所着有家论及东溪集後丞相梁克家以其事闻追复迪功郎胡铨为作忠辨朱子守漳为作祠堂记奏加褒赠论曰登事亲孝事君忠与陈东等上书请斩六贼留李纲种师道其有功于宋室大矣至登所自上书或用或不用要其关於国是者不小也为秦桧阻抑始终不得大用而祸且随之然其宦游所至兴学息讼赈饥断狱声绩懋着其所挟持居何等也程子云天德王道其要只在谨独登之学以谨独为本故其志存忠义心怀济物历患难而不以动其心随所施而无不得其宜又能了然於死生之际可谓存顺没宁者矣

洪皓 朱弁

洪皓字光弼番易人少负奇节慷慨有经略四方志政和五年登进士第王黼朱勔皆欲婚之力辞宣和中为秀州司录大水民多失业皓以拯荒自任白郡守发廩损直以赈民至集皓恐其纷竞乃别以青白帟涅其手以识之令严而恩徧浙东纲米过城下皓白守邀留之守不可皓曰愿以一身易十万人命人感之切骨号洪佛子其後秀军叛纵掠郡民无一得脱惟过皓门曰此洪佛子家也不敢犯时议遣人使金张浚荐皓入对帝语以国步艰难两宫远播皓言天道好还金人安能久陵中国此正春秋邲郢之役天其或者警晋训楚也帝悦以皓为通问使龚璿副之行至顺昌与盗遇警晓之曰自古无白头贼盗悔悟因使持书招其魁二魁听命领兵入宿卫至太原留几一年及至云中尼玛哈迫使仕刘豫皓曰万里衔命不得奉两宫南归恨力不能磔逆豫忍事之耶留亦死不即豫亦死不愿偷生鼠狗间愿就鼎镬无悔尼玛哈怒将杀之旁一将喏曰此真忠臣也目止剑士为之跪请得流涕冷山云中至冷山行六十日距金主所都仅百里地苦寒穴居百家陈王乌克绅聚落也乌克绅使皓教其八子或二年不给食盛夏衣粗布尝大雪薪尽以马矢然火煨麪食之或献取蜀策乌克绅以问皓皓力折之且曰兵犹火也弗戢必自焚自古无四十年用兵不止者又数言所以来者为两国事乃令深入教小儿非待使之礼也乌克绅或答或默忽发怒欲杀之皓曰自分当死但大国无受杀行人之名愿投之水以坠渊为辞可也乌克绅义之而止和议将成乌克绅问所议十事皓条析甚至大略谓封册乃虚名年号则本朝自有之金三千两景德时所无东南不宜蚕绢不可增也至於取淮北人景德载书犹可覆视乌克绅悟曰吾与汝如燕遣汝归议遂行以议不合中止未几乌珠杀乌克绅株连数千人独皓得免皓遂留燕初二帝迁居五国城皓在云中密遣人奏书以桃梨粟麪献二帝始知帝即位皓闻佑陵讣北向泣血旦夕临为文以祭其词激烈读者皆挥涕绍兴十年因谍者赵德书机事数万言藏故絮中归达于帝言顺昌之役金人震惧遂将燕山珍宝尽徙以北意欲捐燕以南弃之王师亟还自失机会今再举尚可十一年又求得太后书遣李微持归帝大喜曰朕不知太后宁否几二十年虽遣使百辈不如此一书是冬又密奏书曰金已厌兵势不能久异时以妇女随车今不敢也若乘势进击再造之功在反

掌耳又言胡铨封事此或有之金人知中国有人益惧张丞相名动异域惜置之散地又问李纲赵鼎安否献六朝御容徽宗御书其後梓宫及太后归音皓皆先报初皓至燕宇文虚中已受金官因荐皓金主闻其名欲以为翰林直学士皓力辞皓有逃归意请於参政韩昉乞於真定或大名以自养昉怒始易皓为中京官皓不就职又令皓校云中进士试皓复以疾辞未几金主以生子大赦许使人还乡皓与张邵朱弁三人在遣中已而金人惧为患遣人追之七骑及淮而皓已登舟十二年七月见於内殿力求郡养母帝曰卿忠贯日月志不忘君虽苏武不能过岂可舍朕去耶请见慈宁宫帘人设帘太后曰吾故识尚书命撤之皓自建炎己酉出使至是得还凡留北中十五年同时使者十三人惟皓弁邵生还忠义之声闻于天下以皓为最皓既对退见秦桧语连日皓曰张和公金人所憚乃不得用钱塘暂居而景灵宫太庙皆极土木之华岂非示无中原意乎桧不悦八月除徽猷阁直学士金人来取赵彬等三十人家属皆吴人仕於金者诏归之皓曰昔韩起求环于郑郑小国也能引义不与今遽从之谓秦无人益轻我矣既而复上疏曰恐以不与之故或致渝盟宜告之曰俟渊圣及皇族归乃遣又言王伦郭元迈以身殉国弃之不取缓急何以使人桧大怒又言锡纳寄声锡纳者桧留金密好也桧益怒使言者劾皓出知饶州又罢为提举江州太平观居母丧终制除饶州又责濠州团练副使安置英州中官白锔从太后北归素闻皓名曾言洪尚书名闻天下胡不用桧遂系锔大理狱流岭表九年始复皓朝奉郎徙袁州至南雄卒年六十八死後一日桧亦死帝闻皓卒嗟惜之复徽猷阁学士諡忠宣皓虽久在北庭不堪其苦然为金人所敬所着诗文争钞诵侵梓既归後使者至必问皓何官居何地性急义当艰危中不少变懿节后之戚赵伯璘隶乌克绅戏下贫甚皓每调之范镇之孙祖平为□奴皓言于金人而释之刘光世庶女为人豢豕赎而嫁之他贵族流落贱微者皆力拔以出皓博学强记有文集五十卷及帝王通要姓氏指南松漠记闻金国文具錄等书

朱弁字少章徽州婺源人少穎悟读书日数千言既冠入太学晁说之奇之与归新郑妻以兄女新郑多故家遗俗弁游其中闻见日广靖康之乱家碎于贼弁南归建炎初议遣使问安两宫弁奋身自効诏补修武郎借吉州团练使为通问副使至云中见尼玛哈邀说甚切尼玛哈不听使就馆守之以兵弁复与书言用兵讲和利害甚悉绍兴二年金人忽遣宇文虚中来言和议可成当遣一人诣元帅府受书还虚中欲弁与正使王伦探策决去留弁曰吾来固自分必死岂应今日觐幸先归愿正使受书归报天子成两国之好早申四海之养于两宫则吾虽暴骨外国犹生之年也伦将归弁请曰古之使者有节以为信今无节有印印亦信也愿留印使弁得抱以死死不腐矣伦解以授弁弁受而怀之卧起与俱金人迫弁仕刘豫且诱之曰此南归之渐弁曰豫国贼也吾尝恨不食其肉忍北面臣之乎吾有死耳金人怒絕其饩遗以困之弁固拒驿门忍饥待尽誓不为屈金人亦感动致礼如初久之复欲易其官弁曰自古兵交使在其间言可从从之不可从则囚之杀之何必易其官吾官受之本朝誓不易以辱吾君也移书耶律绍文等曰上国之威命朝以至则使人夕以死夕以至则朝以死又以书诀後使洪皓曰杀行人非细事吾曹遭之命也要当舍生以全义耳乃具酒食召被掠士夫饮半酣语之曰吾已得近郊某寺地一旦毕命报国诸公幸瘞我其处题其上曰有宋通问副使朱公之墓于我幸矣衆皆泣下莫能仰视弁谈笑自若曰此臣子之常诸君何悲也金人知其终不可屈遂不复强王伦还朝言弁守节不屈帝为官其子林赐其家银帛会尼玛哈等相继死灭弁密疏其事及金国虚实曰此不可失之时也遣李发等间行归报其後伦复归又以弁奉送徽宗

大行之文为献其词有曰叹马角之未生魂消雪窖攀龙髯而莫逮泪洒冰天帝读之感泣官其亲属五人赐吴兴田五顷八年金使来称弁忠节诏附黄金三十两以赐十三年和议成弁得归入见便殿有所陈奏帝嘉纳之赐金帛甚厚又以金国所得六朝御容及宣和御书画为献秦桧恶其言敌情再转仅得奉议郎十四年卒弁为文慕陆宣公援据精博曲尽事理金国名王贵人多遣子弟就学弁因文字往来说以和好之利及归述北方所见闻忠臣义士朱昭史玩张忠辅高景平孙益孙谷傅伟文李丹五台僧宝真妇人丁氏晏氏小校阎进朱积等死节事状请加褒录以劝来者有骋游集四十二卷书解十卷曲洧旧闻三卷新郑诗南归诗文各一卷

论曰以洪皓朱弁之忠处十死一生之地十数年间关得归中外之人莫不叹息而皆沮于秦桧功不见录又皆先桧以卒使坎 以终其身何其厄哉皓之在北能知金人情形又能因间使以达于宋其才智有过人者使其用于朝廷或秉节钺以镇方隅其勋业将不可量而仅使之羁系困苦于敌人之邦以节着而不得以功显其可为婉惜也夫其所成就亦已多也夫

胡铨

胡铨字邦衡庐陵人建炎二年高宗策士淮海铨对策万余言高宗见而异之将以冠多士有忌其直者移置第五授抚州军事判官未上会隆佑太后避兵赣州金人蹶之铨以漕檄掇本州幕募乡丁助官军扞御第赏转承直郎丁父忧从乡先生萧楚学春秋绍兴五年张浚开督府辟湖北仓属不赴有诏赴都堂审察兵部尚书吕祉以贤良方正荐赐对除枢密院编修官八年宰臣秦桧决策主和金使以诏谕江南为名中外汹汹铨抗疏言曰臣谨案王伦本一狎邪小人市井无赖顷缘宰相无识举以专使骤得美官天下之人切齿唾骂今者无故诱致金使以诏谕江南为名是欲臣妾我也夫天下者祖宗之天下也陛下所居之位祖宗之位也奈何以祖宗之天下为敌国之天下以祖宗之位为藩臣之位陛下一屈膝朝廷宰执尽为陪臣异时无厌之求安知不加以无礼如刘豫也哉今伦之议乃曰我一屈膝则梓宫可还太后可复渊圣可归中原可得呜呼自变故以来主和议者谁不以此啗陛下哉然而卒无一验陛下尚不觉悟竭民膏血含耻忍垢举天下而臣之甘心焉就令敌决可和尽如伦议天下後世谓陛下何如主况敌情变诈百出而伦又以奸邪济之梓宫决不可还太后决不可复渊圣决不可归中原决不可得而此膝一屈不可复伸国势陵夷不可复振可为痛哭流涕长太息矣今内而百官外而万民万口一谈皆欲食伦之肉谤议汹汹陛下不闻正恐一旦变作祸且不测臣窃谓不斩王伦国之存亡未可知也虽然伦不足道也秦桧以腹心大臣而亦为之陛下有尧舜之资桧不能致君如唐虞而欲导陛下为石晋近者礼部侍郎曾开等引古谊以折之桧乃厉声曰侍郎知故事我独不知则桧之遂非愎谏已自可见而乃建白令台谏侍臣会议可否是盖畏天下议已而令台谏侍臣共分谤耳有识之士皆以为朝廷无人吁可惜哉孙近傅会秦桧遂得参知政事天下望治有如饥渴而近伴食中书漫不敢可否事桧曰敌可和近亦曰可和桧曰天子当拜近亦曰当拜臣尝至政事堂三发问而近不答但曰已令台谏侍从议矣呜呼参赞大政徒取充位如此尚能折冲御侮耶臣窃谓秦桧孙近亦可斩也臣备员枢属义不与桧等共戴天区区之心愿断三人头悬竿藁街然後羁留金使责以无礼徐兴问罪之师则三军之士不战而气自倍不然臣有赴东海而死耳宁能处小朝廷求

活耶书既上桧以铨狂妄凶悖诏除名编管昭州给舍台谏及朝臣多救之者桧迫於公论乃以铨监广州盐仓明年改签书威武军判官十二年除名编管新州十八年移谪吉阳军二十六年桧死量移衡州铨之初上书也宜兴进士吴师古谳木传之金人募其书千金其谪广州也朝士陈刚中以啓事为贺其谪新州也同郡王廷珪以诗赠行皆为人所讐师古流袁州廷珪流辰州刚中谪知州安远县遂死焉三十一年铨得自便孝宗即位复奉议郎召对言修德结民练兵观衅上曰久闻卿直谅除吏部郎官隆兴元年迁秘书少监擢起居郎又进言乞都建康谓汉高入关中光武守信都大抵与人鬪不搯其吭拊其背不能全胜今日大势自淮以北天下之吭与背也建康则搯之拊之之地也若进据建康下临中原此高光兴王之计也诏议行幸遂以张浚视师江淮侍御史王十朋赞之克复宿州大将李显忠私其金帛且与邵宏渊忿争军大溃十朋自劾帝怒甚铨上疏愿毋以小衅自沮时旱蝗星变诏问政事阙失铨应诏上书数千言始终以春秋书灾异之法言政事之阙有十而上下之情不合亦有十且言尧舜明四目达四聪虽有共鯀不能塞也陛下自即位以来号召逐客与臣同召者张焘辛次膺王大宝王十朋今焘去矣次膺去矣十朋去矣大宝又将去惟臣在耳以言为讳而欲塞灾异之源臣知其必不能也时以边事全张浚而王之望尹穡专主和排浚铨廷责之兼权中书舍人十一月诏以和金遣使大询于庭侍从台谏预议者凡十有四人主和者半可否者半言不可和者铨一人而已乃独上一议曰京师失守自耿南仲主和二圣播迁自何主和维扬失守自汪伯彦黄潜善主和完颜亮之变自秦桧主和议者乃曰外虽和而内不忘战此向来权臣误国之言也一溺于和不能自振尚能战乎除宗正少卿乞补外不许先是金将富察图们大周仁以泗州降萧琦以军百人降诏并为节度使铨言受降古所难六朝七得河南之地不旋踵而皆失梁武时侯景以河南来奔未几而陷台城宣政间郭药师自燕云来降未几为中国患今金之三大将内附高其爵禄优其部曲以系中原之心善矣然处之近地万一包藏祸心或为内应後将噬脐愿勿任以兵柄迁其衆于湖广以絶後患二年兼国子祭酒寻权兵部侍郎八月上以灾异避殿减膳诏廷臣言阙政急务铨以振灾为急务议和为阙政其议和之书谓自靖康迄今凡四十年三遭大变皆在和议肉食鄙夫万口一谈牢不可破非不知和议之害而争言和者是有三说焉曰偷懦曰苟安曰附会偷懦则不知立国苟安则不戒酖毒附会则觊得美官小人之情状具于此矣今日之议若成则有可吊者十若不成则有可贺者亦十如以臣言为不然乞赐窜殛为臣子出位犯分之戒是时朝议急于求和已弃唐邓海泗四州矣而金又欲得商秦地拘留使者分兵攻淮乃命铨以本职措置浙西淮东海道时金兵号八十万刘宝弃楚州王彦弃昭关濠滁皆陷惟高邮守臣陈敏拒敌射阳湖而大将李宝预求密诏为自安计拥兵不救铨劾奏曰臣受诏令范荣备淮李宝备江缓急相援今宝视敏弗救若射阳失守大事去矣宝惧始出师时大雪河冰皆合铨先持铁鎚鎚冰士皆用命金人遂退久之提举太平兴国宫乾道初以集英殿修撰知漳州改泉州趣奏事留为工部侍郎入对言少康以一旅复禹绩今陛下富有四海非特一旅而即位九年复禹之効尚未赫然又言四方多水旱左右不以告谋国者之过也宜令有司速为先备旋乞致仕七年以敷文阁直学士与外祠陞辞犹以归陵寝复故疆为言上曰朕志也且问今何归铨曰归庐陵臣向在岭海尝训传诸经欲成此书特赐通天犀带以宠之铨归上所着易春秋周礼礼记解诏藏秘书省寻复原官累进端明殿学士召归经筵铨引疾力辞以资政殿学士致仕卒諡忠简有澹庵集一百卷

论曰铨之论议横厉振发若决江河而下若引星辰而上近古以来不多见也固其忠义之所

奋发亦其涵千古之心盖一世之气有以大过人者欤铨非徒慷慨尚气者观其早募乡勇以助军晚鎚河冰而退敌临事坚决动即有功使用其言安知不庙胜而算乎才与时违动即摧挫然志则与日月争光矣

史传三编卷三十七

卷三十八

<史部,传记类,总录之属,史传三编

钦定四库全书

史传三编卷三十八

大学士朱轼撰

名臣传三十

宋

虞允文 陈康伯

虞允文字彬甫隆州仁寿人六岁诵九经七岁能属文以父任入官丁母忧哀毁骨立既葬朝夕哭墓侧墓有枯桑两乌来巢念父鰥且疾跬步不忍离左右父没始登绍兴二十三年进士通判彭州权知黎州渠州秦桧当国蜀士多屏弃桧死以中书舍人赵逵荐召对谓人君必畏天必安民必法祖宗又论士风之弊以文章进必抑其轻浮以言语进必黜其巧伪以政事进必去其苛刻庶可任重致远且极言四川财赋科纳之弊帝嘉纳之除秘书丞累迁礼部郎官金主亮修汴已有南侵意而朝廷置边备不问及金使施宜生颇泄敌情允文乃疏言金必败盟兵出有五道愿豫备御未几借工部尚书充贺正使还言金人方运粮造舟而亮又有看花洛阳之语请修淮海之备除中书舍人直学士院时三衙管军以宦寺充承受允文言自古人主大权不移于奸臣则落於近幸秦桧盗权十有八年桧死权归陛下迺来三衙交结中官宣和明受厥鉴未远帝大悟立罢之金使来贺生辰口传亮悖慢语欲得淮南地索将相大臣议事于是闻金人当窥襄汉朝议遣成闵为京湖制置使将禁卫五万以御上流允文曰兵来不除道敌为虚声以分我兵成其出淮奸谋耳不听三十一年七月金主亮徙汴允文复语宰臣陈康伯闵军约程在江池宜令到池者驻池到江者驻江若敌出上流则荆湖之军扞於前江池之军援于後若出淮西则池之军出巢县江州军出无为可为淮西援是一军而两用之康伯然其说然闵军竟屯武昌九月金命李通为大都督造浮梁于淮水上金主自将兵号百万橐帐相望钲鼓之声不絶十月自涡口渡淮先是刘錡措置淮东王权措置淮西至是权首弃庐州錡亦回扬州中外震恐帝欲航海惟康伯力赞亲征已而权又自和州遁归錡回镇江遂尽失两淮十一月壬申金主率大军临采石别以兵争瓜洲时枢臣叶义问督江淮军以允文参军事适朝命成闵代錡李显忠代权义问乃使允文往芜湖趣显忠交权军且犒权军于采石丙子允文至采石权已去显忠未来敌骑充斥官军三五星散解鞍束甲坐道旁皆权败兵也允文立招诸将勉以忠义曰金帛告命皆在此待有功衆皆曰愿死或曰公受命犒师不受命督战他人坏之公任其咎乎允文叱之曰坐待显忠必悞国事危及社稷吾将安避至江滨

见江北已筑高台中建黄屋侦知金人以明日济江时敌人实四十万马倍之宋军才一万八千允文乃命诸将列大阵不动分戈船为五其二并东西岸而行其一驻中流藏精兵代战其二藏小港备不测部分甫毕敌已大呼亮操小红旗麾数百艘绝江而来瞬息抵南岸者七十艘直薄宋军军少却允文入阵中抚时俊背曰汝胆畧闻四方立阵後则儿女子耳俊即挥双刀出土殊死战中流官军亦以海鳎船冲敌舟皆平沉敌半死半战日暮未退会有溃军自光州至允文授以旗鼓从山後转出敌疑援兵至始遁又命劲弓尾击大败之允文乃犒将士谓曰敌今败明日必复来夜半部分诸将分海舟縋上流别遣兵截杨林口丁丑敌果至因夹击之复大战焚其舟三百既而敌遣诏来谕王权似有宿约者?文曰此反间也即复书言权已置典宪新将李世辅也愿一战以决雌雄亮得书大怒遂焚龙凤车而趋瓜洲李显忠至自芜湖允文语之曰敌入扬州必与瓜洲兵合京口无备我当往公能分兵相助乎显忠分万六千与之甲申允文至京口杨存中成闵邵宏渊诸军皆会不下二十万惟海鳎船不满百戈船半之?文乃聚财冶铁改马船为战舰且借之平江遣张深守滁河口扼大江之冲以苗定驻下蜀为援庚寅亮至瓜洲允文与存中临江按试战士踏车船中流上下三周金山回转如飞敌持满以待相顾骇愕乙未亮为其下所杀帝闻允文之绩嘉叹谓陈俊卿曰?文公忠出天性朕之裴度也诏往两淮措置允文奏收两淮三策不报明年正月以允文充川陕宣谕使陛辞言金亮既死彼国方乱天相我恢复也和则海内气沮战则海内气伸帝以为然允文至蜀与大将吴玠经略中原遂进取凤翔复巩州孝宗受禅用史浩议欲尽弃陕西退守蜀口?文言恢复莫先于陕西陕西五路新复州县又系于德顺之存亡一旦弃之则窥蜀之路愈多西和阶成利害至重前後凡十五疏争之不能得隆兴元年史浩相遂为诏书弃地及允文入对帝问及弃地允文以笏画地陈其利害且言今日有八可战帝曰此史浩误朕也寻除兵部尚书湖北京西宣抚使时方遣使议和汤思退又欲弃唐邓海泗允文五疏力争不从遂乞致仕罢知平江府卒弃唐邓二州二年金兵复南下帝乃贬思退悔不用允文言乾道元年陈俊卿荐允文可大用拜参知政事兼知枢密院事是秋金遣完颜仲议事偃蹇不敬允文请斩之三年吴玠卒代帝谕允文曰无以易卿即拜资政殿大学士四川宣抚使允文过郢奏筑黄鹄山城过襄阳奏修府城至蜀尤以军政为急阅诸军第其壮怯为三上备战中下备輜重老者少者不预握兵凡万人减缗钱四百万汰去之兵先有劳绩者置员阙处之兴洋义士者民兵也绍兴初以七万计大散之战将不授甲驱使先官军死亡畧尽允文命利帅晁公武核实得二万三千九百余人又得陕西弓箭手法参绍兴制为一书俾将吏守之以马政付张松奏依旧制分茶马为川秦司金洋兴元归正人二万各分给官田俾得振业邛蜀十四郡告饥所施荒政凡六十五事五年八月拜右仆射同中书门下平章事兼枢密使允文好荐知名士及为相籍人才为三等有所见闻即记之号才馆录凡所举帝皆收用如洪适汪应辰胡铨周必大王十朋赵汝愚晁公武李焘皆允文所荐也帝以兵冗财匱为忧允文与俊卿议革三衙杂役汰冗籍三军无怨言六年俊卿以奏留龚茂良帝震怒允文请对极论帝意稍解乃命俊卿判福州後闻金人欲以三十万骑奉迁陵寝来归中外汹汹允文谓金方惩亮决不轻动不过以虚声撼我耳敌卒无他自庄文太子薨储位未定允文累疏恳陈七年正月始下诏立恭王惇为皇太子胡铨以台评去允文奏留之经筵铨荐朱子帝以问允文允文谓熹不在程颐下遂召朱子朱子不至检校院以六条抑上书人允文力言不可从之金使入见骄倨甚固请帝降榻问金主起居帝不许使跪不起侍臣错愕失措允文请大驾还禁中因谕之曰大驾既兴难再御殿使人来且随班上寿金使惭而退八年四月御史萧之敏劾允文允文上章待罪上过德壽宫太上

曰采石之功之敏在何许母听其去帝为出之敏允文言之敏端方乞召归以辟言路帝叹其忠厚会命选谏官允文以李彦颖林光朝王质对三人皆鲠亮又以文学推重于时帝久不报而曾觌荐一人即赐第擢谏议大夫允文争之不从力求去授少保武安军节度使四川宣抚使进封雍国公先是蜀军月给米一石五斗不足赡其家允文捐宣司钱三十万易米计口增给在蜀一岁淳熙元年卒後四年帝幸白石大閱见军皆少壮谓辅臣曰允文沙汰之効也诏赠太傅諡忠肃允文姿雄伟长六尺四寸慷慨有大志而言动有则度望而知为任重之器早以文学致身台阁晚际时难出入将相垂二十年孜孜忠勤无二尝注唐书五代史藏于家有诗文十卷经筵春秋讲义三卷奏议二十二卷内外志十五卷行于世

陈康伯字长卿弋阳人宣和三年中上舍丙科累迁太学正丁内艰贵溪盗将及其乡康伯起义丁逆击俘其渠魁邑得全通判衢州摄郡事盗发白马原督州兵济王师进讨克之提举江东常平茶盐高宗幸建康康伯以职事过阙因请择将帝嘉纳之知泉州海盗间作康伯以上意招怀盗多出降籍为兵久之不逞者阴倡乱论杀之州以无事秩满三奉祠垂十年秦桧死起知汉州召对除吏部侍郎首请节用寬民凡州县取民无艺许监司互察台谏弹劾寻兼礼户二部乞约岁用会所入储十之一二备水旱复兼刑部前坐为桧所陷未及洗涤者康伯平讞直冤士大夫存没多赖之累擢吏部尚书参知政事寻拜尚书右仆射同平章事先是叶义问贺允中使还言金必败盟康伯请早为之备建四策一增刘錡荆南军以重上流二分画两淮地命诸将结民社各保其境三刘宝独当淮东将骄卒少不可倚四沿江诸郡修城积粮以固内地及金主亮南下议举兵康伯传上旨曰今日更不问和与守直问战当如何时帝意雅欲视师内侍张去为阴沮之且陈退避计中外妄传幸闽蜀人情汹汹右相朱倬无一语同知枢密院事周麟之受命聘金憚不欲行康伯独以为己任奏曰金敌败盟天人共愤今日之事有进无退圣意坚决则将士之气自倍愿分三衙禁旅助襄汉待其发应之复勉周麟之曰使某不为宰相当自行大臣与国存亡虽死安避陈俊卿请用张浚斩张去为以作士气康伯以俊卿振职奏权兵部侍郎九月金人抵庐州王权败归中外震骇朝臣有遣家豫避者康伯独具舟迎家入浙且令临安诸城门扃鐍率迟常时人恃以安敌迫江上命杨存中就康伯议之康伯延之入解衣置酒帝闻之稍安翌日入奏曰闻有劝陛下幸越趋闽者审尔大事去矣盍静以待之一日忽降手诏如敌未退散百官康伯焚之而後奏曰百官散主势孤矣帝意既坚遂下诏亲征以叶义问督江淮军虞允文参谋军事允文遂破金兵于采石金主亮为其下所杀金师还明年金世宗遣高忠建来告登位议授书礼康伯以谊折之于是报书始用敌国礼高宗倦勤有与子意康伯密赞大议草立太子诏以进及行内禅礼以康伯奉册孝宗即位以病求去不允明年请益坚遂以太保观文殿大学士福国公判信州慰劳甚勤隆兴二年金兵再入淮甸人情惊骇皆望康伯复相帝出手札遣使即家起之未出里门拜尚书左仆射同平章事兼枢密使亲故谓康伯实病宜辞康伯曰不然吾大臣也今国事危急当舆病就道幸上哀而归之耳道闻边遽兼程而进至阙诏子堦扶入见减拜赐坐敌师退寻以目疾免朝谒乾道元年正月丐归章屡上不许卒年六十九赠太师諡文恭庆元初配享孝宗庙廷改諡文正

论曰方金主亮之南下也宋承秦桧秉政之余奸回在位忠良黜远武备废弛人心离散是以敌兵甫临江淮糜溃微康伯定议於内允文决策破敌于外宋之为宋未可知也当是时守江之兵既退上流之师未来羸卒数千不足自保而金人强旅百万即日渡江其危如一髮引千

钩诎足为喻允文不避死亡之责临机制变遂破敌兵安社稷虽谢石之振淝水未有若斯之烈也使用其言于敌兵未起之前增修守备则两淮不至失守使用其言於敌兵方来之时专固北户不分兵襄汉则江上不至无兵既失之于前复能收之於後此所以为难乎允文同时二三贤相而恢复之功不就者非其才之不能也遭金世宗在位百度修举无隙可乘宋虽得贤明之佐曷由扼其吭而夺之乎康伯处置大事安重不移徇国忘身老而益笃其亦贤矣

陈俊卿

陈俊卿字应求闽之兴化人幼庄重不妄言笑父亡执丧如成人绍兴八年登进士第授泉州观察推官服勤职业同僚宴集恒谢不往一日郡中火大守汪藻走视之诸掾属方饮某所俊卿輿卒亦假之行皆以後至被诘俊卿唯唯谢已而知其实问故俊卿曰某不能止同僚之行又资其仆安得谓无过时公方盛怒忍自解以重人罪乎藻叹服以为不可及秩满秦桧察其不附己予散秩桧死乃以校书郎召时孝宗为普安郡王高宗命择端厚静重者辅导之除著作佐郎兼王府教授讲经辄寓规戒正色特立累迁殿中侍御史劾韩仲通本以狱事附桧冤陷无辜刘宝总戎京口恣掊克二人皆抵罪汤思退专政时冬日无云而雷俊卿言宰相上不当天心下不厌人望诏罢思退及金人侵軼之势已形俊卿乃言张浚忠荩白首不渝复请对力言之帝悟即以浚守建康又言内侍张去为阴沮用兵陈避敌计摇成算请按军法帝曰卿可谓仁者之勇命权兵部侍郎金主亮渡淮俊卿受诏整浙西水军李宝因之遂有胶西之捷亮死诏俊卿治淮东堡砦屯田所过安辑流亡金世宗新立申旧好廷臣多附和议俊卿奏和议本非得已不若先正名名正则国威强岁币可损因陈选将练兵屯田减租之策择文臣有胆畧者为参佐俾察军政习戎务以储将材孝宗受禅献言为国之要有三用人赏功罚罪所以行之者至公而已愿留圣意迁中书舍人时孝宗銳意兴复以俊卿充江淮宣抚判官兼权建康府事奏曰吴璘孤军深入敌悉衆拒战久而不决危道也两淮事势已急乞分遣舟师直捣山东彼必还师自救而璘得乘胜定关中及其未至溃其腹心此不世之功也会和议方坚诏璘班师俊卿亦召还复陈十事请定规模振纪纲励风俗明赏罚重名器遵祖宗之法蠲无名之赋隆兴初建都督府以俊卿参赞军事张浚谋大举俊卿以为未可已而邵宏渊军溃还言者附汤思退劾浚俊卿奏浚果不可用则别选贤将若欲责其後劾降官示罚古法也议者但知恶浚不复为宗社计疏再上帝悟命浚都督且召为相浚卒为汤思退尹穡所挤出视师江淮俊卿亦罢奉祠思退既窜太学诸生伏阙下乞召俊卿乾道元年入对除吏部侍郎因言人才当以气节为主气节者小有过当容之邪佞者甚有才当察之寻授吏部尚书初帝在邸时好鞠戏俊卿尝诵韩愈谏张建封书以讽至是将猎白石复引汉桓灵唐敬穆及司马相如之言以爲戒帝喜曰备见忠说朕决意用卿矣受诏馆金使遂拜同知枢密院事时会龙大渊怙旧恩窃威福士大夫颇出其门及俊卿馆伴大渊副之公见外不交一语洪迈白俊卿人言郑闻除右史某当除某官信乎诘所从迈以渊觐告俊卿具以迈语质于帝帝曰朕曷尝谋及此辈必窃听得之遂出渊觐于外中外称快焉镇江军帅戚方刻削军士俊卿奏内臣中有主方者当并惩之即诏罢方以内侍陈瑤李宗回付大理狱拜俊卿参知政事四明献银鑪将召工即禁中锻之俊卿奏不务帝王之大而屑屑有司之细恐为有识者所窥从官梁克家莫济俱求补外俊卿奏二人皆贤其去可惜因劾洪迈奸险谗佞不宜在左右罢之减福建钞盐罢江西和籴广西折米盐钱蠲诸道宿逋金谷钱帛以巨万计于是政事稍归中书矣龙大渊

死帝怜曾觐欲召之俊卿曰自出此两人中外莫不称颂今复召必大失天下望臣请先罢遂止不召殿前指挥使王琪按视两淮城壁还妄有所荐又传旨增筑城垣俊卿请于帝知其诈即请诛琪琪坐削秩罢官先是禁中密旨直下诸军宰相多不预闻内官张方事觉俊卿奏自今百司承御笔处分事须奏审方行从之既而以内诸司不乐收前命俊卿言张方王琪事圣断已明忽谕臣曰禁中取一饮一食必待申审岂不留滞臣所虑者命令之大如三衙发兵户部取财岂为宫禁细微事哉臣等备数出内陛下命令凡奏审者欲取决陛下非臣欲专之也且非新条申旧制耳已行复收中外惶惑恐小人以疑似激圣怒帝曰朕岂以小人之言疑卿等耶同知枢密院事刘珙进对争辨激切忤旨既退手诏除珙端明殿学士奉外祠俊卿即藏去密言前日奏劄臣实草定以为有罪臣当先罢珙之除命未敢奉诏陛下即位以来纳谏诤体大臣皆盛德事今珙以小事获罪臣恐自此大臣皆阿顺持禄非国家福帝色悔久之四年十月授尚书右仆射同平章事兼枢密使俊卿以用人为己任所除吏皆一时之选獎廉退抑奔竞或才可用资历浅密荐于上未尝语人每接朝士及牧守自远至必问以时政得失人才贤否虞允文时宣抚四川俊卿荐其才堪相五年正月帝召允文为枢密使至则以为右相俊卿为左相是岁措置两淮屯田俊卿奏以两准备御未设民无固志万一寇至仓卒渡兵恐不及事请于扬州和州各屯三万人预为守计仍籍民家三丁者取其一以为义兵授之弓弩教以战陈农隙之日给以两月之食聚而教之沿江诸郡亦用其法诸将渡江则使之守城以备缓急且以阴制州兵颉颃之患要使大兵屯要害必争之地待敌至而决战使民兵各守其城相为犄角以壮声势帝以爲然即诏行之然竟为衆论所持俊卿寻亦去位不能及其成也允文建议遣使金以陵寝为请俊卿面陈复手疏以为未可帝御弧矢弧激至目眚俊卿奏陛下志图恢复任智谋明赏罚恢信义则英声义烈不越尊俎岂在区区骑射于百步间哉愿以为戒曾觐官满当代俊卿预请处以浙东总管帝曰觐意不欲为此官俊卿曰前陛下去此二人公论甚愜愿捐私恩伸公议觐怏怏而去枢密承旨张说为亲戚求官惮俊卿不敢言会在告请于允文得之俊卿闻敕已出语吏留之说惶恐谢允文亦惭犹为之请俊卿竟不与说深憾之吏部尚书汪应辰与允文议事不合求去俊卿数奏应辰刚毅正直可为执政帝初然之后竟出应辰守平江俊卿自是数求去明年允文复申陵寝之议俊卿奏陛下痛念祖宗思复故疆然大事欲计其万全俟一二年间吾之事力稍充乃可不敢迎合意指误国事请去益坚遂以观文殿学士帅福州陛辞犹劝帝远佞亲贤以修政事泛使未可轻遣既去允文遣使卒无成功曾觐亦召还建节钺跻保传而士大夫莫敢言俊卿至福州政尚寛厚严于治盗海道晏清明年请祠归第敝屋数楹怡然不介意惇熙二年再知福州累章告归除特进起判建康府兼江东安抚召对垂拱殿从容言曰将帅当由公选臣闻诸将多以贿得曾觐王拊招权纳贿进人皆以中批行之贓吏已经结勘而内批改正将何所劝惩帝曰卿言甚当陛辞复曰去国十年见都城谷贱人安惟士大夫风俗大变帝曰何也俊卿曰向士大夫奔觐拊之门十才一二尚畏人知今则公然趋附已七八不复顾忌矣人材进退由私门大非朝廷美事帝曰拊则不敢觐时或有请朕多抑之自今不复从矣俊卿曰此曹身势既长侍从台諫多出其门无敢为陛下言者臣恐坏朝廷纪纲废有司法度败天下风俗累陛下圣德寻除少保八上章告老以少师魏国公致仕十三年十一月卒年七十四手书示诸子遗表止谢圣恩勿祈恩泽勿请諡树碑帝闻嗟悼赠太保諡正献俊卿孝友忠敬得于天资清严好礼终日无惰容平居恂恂若不能言而在朝廷正色微论分别邪正斥权势无顾避凡所奏请关治乱安危之大者雅善汪应辰李焘尤敬朱子屡尝论荐其卒也朱子不远千里往哭之又状其行有集二十卷子五

人必有志於学朱子为铭其墓云

王十朋

王十朋字龟龄温州乐清人资颖悟日诵数千言及长有文行聚徒梅溪受业者以百数入太学主司异其文秦桧死高宗亲策士命对策切直者并置上列十朋策几万余言帝嘉其经学淹通议论醇正亲擢第一学者争传诵以拟鼂董策中有言铺翠已禁而中外首饰自若岂法令不可禁乎抑澣濯之化衣不曳地之风未行於外乎帝用其言严销金铺翠之令取交址所贡翠物焚之授绍兴府签判裁决如神吏奸不行时以四科求士帅王师心谓十朋身兼四者遂以应诏召为秘书郎兼建王府小学教授先是教授入讲堂居宾位十朋不可皇孙特加礼位之中坐金人渝盟十朋言御敌莫急于用人今有天资忠义材兼文武可为将相者有长于用兵士卒乐为之用可为大帅者或投闲置散或老于藩郡愿起而用之以寝敌谋以图恢复盖指张浚刘錡也又言杨存中以管军位三公利源皆入其门阴结诸将相为党援枢密本兵之地立班甘居其後台谏论列委曲庇护风宪独不行于管军之门何以为国至若清资加于佞伍高爵滥于医门诸军承受威福自恣甚于唐之监军皇城逻卒旁午察事甚于周之监谤将帅剥下赂上结怨三军道路捕人为卒结怨百姓皆非治世事帝嘉纳之戢逻卒罢诸军承受更定枢密管军班次解杨存中兵权其言大畧施行秦桧久塞言路至是十朋与冯方胡宪查翥李浩相继论事太学生为五贤诗述其事除著作郎迁大宗正丞请祠归孝宗受禅起知严州召对首言太上非倦勤时而以大器付陛下陛下当思所以副太上者今社稷之安危生民之休戚人才之进退朝廷之刑赏宜若舜之协尧断然行之以尽继述之道累迁侍御史帝问胡铨曰比除台官外议如何铨曰皆谓得人十朋见帝英锐每见必陈恢复之计及将北伐上疏曰天子之孝莫大于光祖宗安社稷靖康之祸亘古未有陛下英武志在兴复奈何大臣不能仰副圣心愿戒在位者去附和之私心赞国家之大计则中兴日月可冀矣因论史浩八罪曰怀奸误国植党盗权忌言蔽贤欺君讪上帝为出浩知绍兴府十朋再疏谓陛下虽能如舜之去邪未能如舜之正名定罪绍兴密迕行都浩尝为属吏奸赃彰闻亦何颜复见其吏民遂改与祠史正志与浩族异拜浩而父事之十朋论正志倾险奸邪观时求进宜黜正志以正典刑林安宅出入史浩龙大渊门盗弄威福至是诈病求致仕十朋并疏其罪皆罢去张浚出师复灵壁虹县归附者万计又复宿州十朋奏王师以吊民为主先之以招纳不得已而战伐随之乞以此指戒浚金将既降宜速加爵赏以劝来者帝皆嘉纳会李显忠邵宏渊不协王师失律张浚上表自劾主和者乘此倡异议十朋疏言陛下立志恢复固不以一蝼为羣议所摇然异议纷纷浚既待罪臣岂可尚居风宪之职乞赐窜殛改除吏部侍郎力辞出知饶州饶并湖盗出没其间闻十朋至一夕遁去丞相洪适请故学基益其圃十朋曰先圣所居十朋何敢予人移夔州饶民走诸司乞留不得至断其桥乃以车从间道去衆葺其桥以王公名之又移湖州召对刘珙请留之帝曰朕岂不知王十朋顾湖州被水非十朋莫能镇抚至郡户部虚逋三十四万命吏持券往办不听即请祠去起知泉州十朋前在湖割奉钱糴贡闾至是又为泉建之凡历四郡布上恩恤民隐士之贤者诣门以礼致之朔望会诸生学宫讲经询政僚属间有不善反覆告戒俾之自新民输租俾自槩量闻者相告宿逋亦争偿讼至庭温词晓以理义多退听者所至人绘而祠之去之日老稚攀留涕泣越境以送思之如父母饶久旱入境雨即至湖久雨入境即晴霁凡所祷必有应其至诚所感如此遇疾累章告老以龙图阁学士

致仕命下而卒年六十諡忠文十朋事亲孝终丧不处内友爱二弟郊恩先奏其名没而二子犹布衣书室扁曰不欺每以诸葛亮顔真卿寇准范仲淹韩琦唐介自比朱子张栻雅敬之

论曰观十朋之言行昭昭乎若揭日月而行也语云世之所少者非才也气也有是气者浩然塞乎天地之间其于物也不约而信不令而从成功立事非可以意拟言谈而数计也十朋若用于时其几于是矣

赵汝愚

赵汝愚字子直汉王元佐七世孙居饶之余干县父善应以纯孝笃行着称汝愚早有大志每曰丈夫得汗青一幅纸始不负此生擢进士第一召试馆职除秘书省正字孝宗方銳意恢复始见即陈自治之策孝宗称善迁著作郎知信州徙台州入为吏部郎迁秘书少监兼权给事中内侍陈源有宠于德寿宫差浙西副总管汝愚言童贯典兵卒开边衅源不宜用帝喜诏自今内侍不得兼兵职旧制密院文书皆经门下省至张说始废汝愚谓东西二府朝廷治乱所关中书庶政无一不由东省密院何独不然帝命如旧制权吏部侍郎兼太子右庶子论知合王拚出之以集英殿修撰帅福建陛辞言国事之大者四其一谓吴氏四世专蜀兵非国家利请渐抑之进直学士制置四川兼知成都府诸羌为边患汝愚以计分其势帝谓其有文武威风召还光宗受禅授敷文阁学士知福州绍熙二年召为吏部尚书先是高宗以宫人黄氏侍帝于东宫及即位为贵妃后李氏不能平是年冬十一月郊有司已戒而风雨暴至帝震惧改齐青城贵妃暴薨驾还闻之恚是夕疾作寿皇仓卒至南内问致疾之由有所戒责及帝疾稍平不朝重华宫至会庆节上壽及冬至朝贺皆不出汝愚往复规谏帝乃与后俱诣北内从容竟日两宫之情复通迁知枢密院事帝之疾生于疑畏闻汝愚谏辄悟入辄复疑汝愚患之五年春寿皇不豫夏五月疾日臻丞相率两府请帝诣重华宫侍疾帝辄疑遽起入内越二日宰相又请帝令知合门事韩侂胄传旨云宰执并出于是俱至浙江亭俟命寿皇闻之忧甚使秀王伯珪传意令复入侂胄言昨传旨令出殿门非都门也因自往宣押宰执乃还六月丁酉夜五鼓寿皇崩中书将以闻汝愚虑帝疑不出持不上及朝乃以状进帝许过北内至日昃又不出宰相率百官诣重华宫发丧壬寅将成服留正与汝愚议因少傅吴玕请宪圣太后垂帘暂主丧事太后不许正等奏曰臣等连日造南内请对不获累上疏不报恐人情骚动为社稷忧乞太皇太后降旨以皇帝有疾暂就宫中成服然丧不可无主祝文称孝子嗣皇帝宰臣不敢代行太皇太后壽皇之母也请摄行祭礼是时正与汝愚以国本系乎嘉王欲因帘前陈宗社大计使命出帘帟之间事行庙堂之上则体正言顺可无後艰而吴玕素畏慎且以后戚不欲与闻大计议竟格丁未宰臣以下待对和宁门不报乃入奏云皇子嘉王仁孝夙成宜早正儲位以安人心又不报越六日再请御批云甚好明日拟旨以进乞帝亲批付学士院降诏是夕批云历事岁久念欲退闲留正见之惧佯仆於庭为去计汝愚自度不得辞其责念故事须坐甲以戒不虞而殿帅郭杲莫可使输腹心者会尚书赵彥逾至汝愚第语及国事汝愚泣彥逾亦泣汝愚因及内禅意彥逾喜汝愚知其与杲善謬曰郭杲倘不同奈何彥逾曰某当任之约明日复命汝愚曰此大事已出诸口岂容有所俟愿亟往汝愚不敢入室退坐屏後以待有顷彥逾至议遂定明日正以五更肩輿出城去人心益摇汝愚与徐谊叶适谋可以白意于慈福宫者乃遣韩侂胄侂胄屡奏不获命逡巡将退重华宫提举关礼见而问之侂胄具述汝愚意

礼令少俟入见太后而泣太后问故礼曰圣人读书万卷亦尝见有如此时而保无乱者乎太后曰此非汝所知礼曰此事人人知之今丞相已去所赖者赵知院旦夕亦去矣言与泪俱太后惊曰知院同姓事体与他人异乃亦去乎礼曰知院未去非但以同姓故以太皇太后爲可恃耳今定大计而不获命势不得不去将如天下何太后问侂胄安在礼曰臣已留其俟命太后曰事顺则可令好为之礼报侂胄令复命汝愚始以其事语陈騤余端礼使郭杲及步帅阎仲夜以兵卫南北内礼使宣赞舍人傅昌朝密制黄袍翌日嘉王入临汝愚率百官诣大行前宪圣垂帘汝愚等奏皇帝疾未能执丧臣等乞立嘉王为太子以系人心皇帝批有甚好二字继有念欲退闲之语取太皇太后处分宪圣曰既有御笔相公当奉行汝愚曰兹事重大播之天下书之史册须议一指挥太后允诺汝愚袖出所拟太皇太后指挥以进云皇帝以疾至今未能执丧曾有御笔欲自退闲皇子嘉王扩可即皇帝位尊皇帝为太上皇帝皇后为太上皇后宪圣览毕曰甚善汝愚言自今臣等有合奏事当取嗣君处分然恐两宫父子间有难处者须赖太皇太后主张又言上皇疾未平骤闻此事不无惊疑乞令都知杨舜卿提举本官任其责遂召舜卿至帘前面谕之宪圣乃命皇子即位皇子固辞曰恐负不孝名汝愚奏曰天子当以安社稷定国家为孝今中外人人忧乱万一变生置太上皇何地乃扶入素幄披黄袍方却立未坐汝愚即率同列再拜宁宗诣几筵殿哭尽哀须臾立仗讫催百官班帝衰服出就重华殿东庑素幄立内侍扶掖乃坐汝愚即丧次召还留正长百僚命朱子待制经筵悉收召士君子之在外者除汝愚特进右丞相汝愚辞不拜曰同姓之卿不幸处君臣之变敢言功乎乃命为枢密使汝愚裁抑侥幸进引贤士中外引领望治而韩侂胄依托肺腑出入宫掖传导诏旨浸见亲幸用事侂胄欲推定策功汝愚曰吾宗臣汝外戚也何可言功但加汝州防御使侂胄大失望寿皇将薨汝愚议攒宫非永制欲改卜山陵与留正议不合侂胄因而间之出正判建康府命汝愚为右丞相汝愚力辞不许汝愚方倚正共事怒侂胄不以告及来谒故不见侂胄慙忿枢密罗点曰公误矣汝愚亦悟复见之侂胄终不悛朱子白汝愚以厚赏酬侂胄勿使预政而汝愚谓其易制不为虑朱子因讲毕上疏谏诤遽出内批除宫观汝愚袖批还上且谏且拜侂胄必欲出之汝愚退求去不许吏部侍郎彭龟年力陈侂胄窃弄威福内批与郡侂胄势益张日夜谋引其党布满言路汝愚益孤于是陈傅良刘光祖吴猎等先後斥去羣憊和附而衣冠之祸始矣侂胄欲逐汝愚而难其名擢其党李沐为正言沐尝求节度使于汝愚不得至是承侂胄意奏汝愚以同姓居相位将不利于社稷乞罢其政遂以观文殿学士知福州旋以大学士提举洞霄宫国子祭酒李祥言去岁国遭大戚两宫隔絶国丧无主人情汹汹汝愚不避殒灭之祸勲劳着于社稷精忠贯于天地乃卒受黯黹而去天下後世其谓何博士杨简亦以为言李沐并劾祥简罢之大府丞吕祖俭太学生杨宏中等皆讼汝愚冤侂胄既陷祖俭宏中等益忌汝愚诬以不轨责宁远军节度副使永州安置汝愚怡然就道至衡州病作为守臣钱鏐所窘暴卒天下闻而冤之汝愚学务有用常以司马光富弼韩琦范仲淹自期凡平昔所闻于师友如朱子张栻吕祖谦等之言皆欲次第行之未及而去所着诗文十五卷太祖实录举要若干卷宋臣奏议三百卷汝愚聚族而居门内三千指所得廩给悉分与之菜羹蔬食恩意均洽人无间言自奉甚薄为夕郎时大冬衣布裘至为相犹然侂胄既诛复元官赐諡忠定赠太师追封沂国公理宗庙诏配享宁宗庙庭追封福王

论曰宋之辅臣最厚于朱子者二人陈俊卿之相朱子与书所以望之者甚至及其卒也数千里往哭之晚遇汝愚与俱兴废二人操行若不同至于辨义利之机审诚僞之介皎然明白不

以利害动其心者则二人之所同也汝愚为相欲以所闻於师友者次第行之若使得遂其志其亦非小补也欤

史传三编卷三十八

卷三十九

钦定四库全书

史传三编卷三十九

大学士朱轼撰

名臣传三十一

宋

孟珙

孟珙字璞玉随州枣阳人嘉定十年金人至襄阳父宗政时为赵方将以兵御之珙料其必窥樊城献策由罗家渡济河宗政然之越翼日诸军临渡布阵金人果至半渡伏发殲其半宗政被檄援枣阳临阵尝父子相失珙望敌骑中有素袍白马者曰吾父也急麾骑军突阵遂脱宗政以功补进勇副尉十二年完顔额克步骑二十万攻枣阳珙登城射却之宗政命珙取它道劫金人破砦十有八斩首千余级大俘军器以归金人退理宗朝累官至京西第五副将初宗政招唐邓蔡壮士二万余人号忠顺军命江海总之衆不安制置司以珙代海珙分其军为三衆乃帖然绍定元年珙白制置司剏平堰于枣阳自城至军西十八里由八叠河经渐水侧水跨九阜建通天槽八十有三丈溉田十万顷立十庄三辖使军民分屯是岁收十五万石又命忠顺军家自畜马官给刍粟马益蕃息四年升京西兵马钤辖六年元将纳延布展追金主守绪逼蔡朝命檄珙戍鄂伐金唐邓行省武仙仙时与武天锡等相犄角欲迎金主入蜀锋甚锐天锡者邓之农夫乘乱聚衆二十万为边患珙逼其垒一鼓拔之壮士张子良斩天锡首以献俘其将士得户十二万有奇授江陵府副都统制金人旋抵吕堰砦珙趋军击破之金人弃輜重走获甲士马牛橐驼不可胜计归其民三万二千有奇邓守伊喇瑗奉书请降得县五镇二十二马步军万五千人户三万五千三百珙入城抚归附之人因其乡土而使之耕因其人民而立之长少壮籍为军俾自耕自守才能者分以土地任以职使各招其徒以杀其势七月仙爱将刘仪降珙问仙虚实得破砦良策遣将分攻各砦来归者万二千余人与金人遇三战三捷招降金将及金军五千人料武仙必登岵山窥伺令樊文彬诘旦夺岵山驻军其下前设伏後遮其归路已而仙衆果登山及半文彬挥旗伏兵四起杀其将擒七百余入弃铠甲如山珙进军至小水河刘仪还言仙谋往商州然老稚不愿北去珙曰进兵不可缓夜漏十刻召文彬等受方略蓐食启行晨至石穴积雨未霁文彬患之珙曰此雪夜擒吴元济之时也分兵进攻九砦俱破武仙易服而遁降其衆七万人获甲兵无算还军襄阳元兵遣人约共攻蔡制置使谋于珙珙请以二万人行尽护诸将鼓行而前金人败却追斩千余级布展遣三将来迎珙约为兄弟金兵万人自东门出战珙遮其归路掩入汝河擒其偏裨八十七人得蔡降人言城中饥珙曰已窘矣当死守以防突围决堰水布虎落进逼石桥夺柴潭楼蔡人恃潭为固外即汝

河珙激励将士决之实以薪芻遂济师攻城端平元年正月降者言城中已絕粮三月珙下令诸军衔枚列云梯令诸将闻鼓则进万衆竞登大战城中降其丞相等官门西开招布展入金主已自经而殂制置司奏留珙襄阳兼镇北军都统制二年授主管侍卫马军行司公事黄州驻劄朝辞帝曰卿名将之子忠勤体国破蔡灭金功绩昭着珙对曰此宗社威灵陛下圣德与三军将士之劳臣何力之有帝问恢复对曰愿陛下寬民力蓄人材以俟机会问和议对曰臣介胄之士当言战不当言和兼知光州黄州至黄增埤浚隍蒐访军实边民来归者日以千数为屋三万间以居之厚加賑貸又虑兵民杂处因高阜为齐安镇淮二砦以居诸军元兵攻蕲州珙遣兵解其围又攻襄阳隋守荆门守郢守皆弃城走复州施子仁死之江陵危急诏沿江淮西遣援衆谓无踰珙者乃先遣张顺渡江珙以全师继之元兵分两路渡江珙变易旌旗服色循环往来夜则列炬照江数十里相接又遣外弟赵武等共战躬往节度破砦二十有四还民二万嘉熙元年封隋县男知江陵府未几授鄂州诸军都统制元分兵入汉阳淮甸蕲舒守臣皆弃郡走光守董尧臣以州降合三郡人马粮械攻黄州江帅万文胜战不利珙入城军民喜曰吾父来矣驻帐城楼指画战守卒全其城斩逗留者四十九人以徇二年升京西湖北路制置使兼知岳州乃檄江陵节制司捣襄郢于是张俊复郢州贺顺复荆门军刘全战于豕头战于樊城战于郎神山皆以捷闻三年春正月曹文鏞复信阳军刘全复樊城遂复襄阳谭深复光化军息蔡降珙命以兵逆之得壮士万余籍为忠卫军初诏珙复京襄珙谓必得郢然後可以通饋餉得荆门然後可以出奇兵由是指授方畧发兵深入所至皆捷珙奏言襄樊为朝廷根本今百战而得之当加经理如护元气非甲兵十万不足分守与其抽兵于敌来之後孰若保此全胜乃置先锋军以襄郢归顺人隸焉时元兵欲大举临江而大将达海等帅师入蜀号八十万珙增置营砦分布战舰遣诸将据险守隘刘义战捷于巴东县之清平村元兵乃退四年进卦子珙条上流备御宜为藩篱三层峡州松滋须各屯万人舟师隸焉归州屯三千人鼎澧辰沅靖各五千人郴桂各千人如是则江西可保会谍知元兵于襄樊间集衆布种积船材于顺阳乃遣张汉英出随任义出信阳焦进出襄分路挠其势遣王坚潜兵烧所积船材又度元兵必因粮于蔡遣张德刘整分兵入蔡火其积聚拜四川宣抚使兼知夔州厘蜀政之弊为条班诸郡县曰差除计属曰功赏不明曰减尅军粮曰官吏贪黷曰上下欺罔又曰不择险要立砦栅则难责兵以卫民不集流离安耕种则难责民以养兵乃立赏罚以课殿最俾诸司奉行之兼夔路制置大使屯田大使军无宿储珙大兴屯田调夫筑堰募农给种首秭归尾汉口为屯二十为庄百七十为顷十八万八千二百八十上屯田始末与所减券食之数淳佑二年珙以京襄死节死事之臣请于朝建祠岳阳岁时致祭有旨赐名闵忠庙元兵分道入侵珙遣李得帅精兵四千往援淮东而令诸将各守其处不许失寸土诸将稟令惟谨拜检校少保封汉东郡公珙言沅之险不如辰靖之险不如沅三州皆当措置而靖尤急今三州粒米寸兵无所从出隆冬水涸节节当防此京湖之忧也陆抗有言荆州国之藩表如其有虞当倾国争之今日事势大畧相似利害至重余玠宣抚四川道过珙珙以重庆积粟少餉屯田米十万石遣晋德帅师六千援蜀四年兼知江陵府诏京湖调兵五千戍安丰援壽春珙遣刘全将以往又有命分兵三千备齐安珙言黄州与壽昌三江口隔一水耳须兵即渡何必预遣先日则有一日之费无益有损万一上游有警我军已疲非计之得也不从珙至江陵登城叹曰江陵所恃三海不知沮洳有变为桑田者敌一鸣鞭即至城外乃修复内隘十有一别作十隘于外有距城数十里者沮漳之水旧自城西入江因障而东之俾遶城北入于汉而三海遂通为一随其高下为匱蓄泄三百里间渺然巨浸土木之工百七十万民不知役枢密调兵五千赴广

西珙移书执政曰大理至邕数千里部落隔絕今当择人分布数郡使之分治生蛮险要形势随宜措置而闻风调遣空费钱粮无益于事不听珙奏襄蜀荡析土无所归蜀土聚于公安襄土聚于郢渚臣作公安南阳两书院以没入田庐隸之使有所教养请帝题其榜赐焉初珙招镇北军驻襄阳李虎王旻军乱镇北亦溃乃厚招之降者不絕元行省范用吉密通降款以所受告为质珙白于朝不从珙叹曰三十年收拾中原人今志不克伸矣病遂革终于江陵府治累赠太师封吉国公谥忠襄珙忠君体国之念可贯金石在军中与参佐部曲论事言人人异珙徐以片语折衷衆志皆愜谒士游客老校退卒一以恩意抚接名位虽重惟建鼓旗临将吏而色凜然无敢涕唾者退则焚香扫地隐几危坐若萧然事外远货色絶滋味其学邃于易六十四卦各系四句名警心易赞

论曰珙当宋事扰攘之秋每得一城复一郡则增兵置卫据关设险十数年襄汉之间所欲规画者甚备值时无贤宰凡事沮滯百不及一及珙没後元兵南侵以一吕文焕力守襄阳阻遏其冲十年之中兵未及国乃知珙之经纪上流其功实大也珙百战百胜而兼长于治国昔伊川论蹇之六二以为事虽不可为苟可以扶此之衰难彼之进苟得为之圣贤之所屑为也王允谢安之于汉晋是也珙在宋末殆庶几乎

汪立信

汪立信六安人也淳佑元年献策招安庆剧贼胡兴刘文亮等借补承信郎六年登进士理宗奇其状貌雄伟顾侍臣曰此阍帅才也授乌江主簿荆湖制置赵葵辟充参议官葵去马光祖代之希贾似道意求葵过失乃以元夕张灯宴设三万缗为葵放散官物闻于朝立信争之曰方艰难时赵公莅事勤劳而公乃以非理攬拾之公一旦去此後來者复効公所为可乎光祖怒曰吾不能为度外事君他日处此勉为之立信曰使某不为则已果为之必不效公也遂投効去擢京西提举常平再迁浙西提点刑狱明年冬即嘉兴治所讲行荒政累官湖南安抚使知潭州至官供帐之物悉置官库所积钱代纳潭民夏税贫无告者予钱粟病者加药饵雨雪旱潦军民皆有给兴学校士习为变以潭为湖湘重镇荆威敌军所募精銳数千人後來者赖其用权兵部尚书荆湖安抚制置知江陵府时襄阳围急立信上疏请益安陆府屯兵凡边戍皆不宜抽减又移书似道言今天下之势十去八九而君臣宴安不以为虞夫天之不假易也从古以然此诚上下交修以迓续天命之几重惜分阴以趋事赴功之日也而乃酣歌深宫啸傲湖山玩岁愒日缓急倒施卿士师师非度百姓郁怨欲以求当天心俯遂民物拱揖指挥而折冲万里不亦难乎为今之计其策有三夫内郡何事乎多兵宜尽出之江干以实外御今总计见兵可七十余万人老弱柔脆十分汰二为选兵五十余万人沿江之守不过七千里若距百里而屯屯有守将十屯为府府有总督其尤要害处则三倍其兵无事则泛舟长淮往来游徼有事则东西齐奋战守并用刁斗相闻馈饷不絕互相应援以为联络之固选宗室亲王忠良有干用大臣立为统制分东西二府以蒞任得其人成率然之势此上策也久拘聘使无益于我请礼而归之许输岁币以缓师期不二三年边遽稍休藩垣稍固生兵日增可战可守此中策也二策果不得行则天败我也衔璧舆櫜之礼请备以俟似道得书大怒抵之地寻中以危法废斥之咸淳十年元兵大举伐宋似道督诸军出次江上以立信为沿江制置使江淮招讨使俾就建康募兵以援江上诸郡立信受诏不辞即日上道以妻子托爱将金明曰我不负

国家汝亦必不负我遂行与似道遇芜湖似道拊立信背哭曰不用公言以至于此立信既至则建康守兵已溃四面皆元兵立信知事不可为叹曰吾生为宋臣死为宋鬼终为国一死但徒死无益耳以此负国率所部数千人至高邮欲控引淮汉以为後图俄而闻似道师溃江汉守臣皆望风降遁立信叹曰吾今日犹得死于宋土也乃置酒召宾佐与诀手为表起居三宫夜分起步庭中慷慨悲歌握拳抚案者三以是失声三日扼吭而卒遗表闻赠太傅元巴延入建康金明以其家人免或以立信二策告巴延巴延叹息久之曰宋有是人有是言哉使果用我安得至此求其家厚恤之曰忠臣之家也金明以立信之丧归葬丹阳立信子麟在建康不肯从衆降崎岖走闽以死初立信之未仕也吴渊守镇江其客黄应炎一见立信言于渊渊大奇之礼以上客共张服御视应炎有加渊曰此君吾地位人也但遭时不同耳是年试江东转运司明年登第後践历略如渊而卒死于难世以渊为知人

论曰观立信所论着岂非保邦之善策哉非独此时耳用于数十年之前不为早矣天之生才也虽掩抑困蹶犹或偶用于一时或试之小以知其大犹不为全无焉如立信者遭遇贾似道非独不得施行其大以经邦固国欲偏制一军以当敌人之冲亦不可得可慨也已

文天祥

文天祥字宋瑞又字?善吉水人也体貌丰伟美皙如玉秀眉而长目自为童子时谒四忠一节祠慨然慕之曰没不俎豆其间非夫也年二十举进士对策集英殿时理宗在位久寢怠天祥以法天不息为说凡万余言一挥而成帝亲拔为第一考官王应麟曰是卷古谊若龟鉴忠肝如铁石臣敢为得人贺丁父忧归服阙除宁海军节度判官元兵南侵宦官董宋臣说帝迁都避之天祥上书乞斩宋臣以一人之心不报即自免归後稍迁至刑部郎官又上书极言宋臣罪又不报出守瑞州改江西提刑迁刑部左司郎官权直学士院贾似道称病以要君有诏不允天祥当制语讥似道似道怒使台臣张志立劾罢之天祥既数斥遂致仕时年三十七咸淳九年起为湖南提刑见故相江万里语及国事万里愀然曰吾老矣观天时人事当有变世道之责其在君乎明年改知赣州德佑初江上报急诏天下勤王天祥捧诏涕泣使陈继周发郡中豪杰并结溪峒蛮使方兴召吉州兵诸豪杰皆应有衆万人事闻以江西提刑安抚使召入卫其友止之曰今敌兵三道鼓行破郊畿薄内地君以乌合万余赴之何异驱羣羊而搏猛虎天祥曰吾亦知其然也第国家养育臣庶三百余年一旦有急徵天下兵无一人一骑入援者吾故不自量力欲以身徇之庶天下忠臣义士闻风而起则社稷犹可保也天祥性豪华平生自奉甚厚至是痛自贬损尽以家赀为军费每与宾佐语及时事辄流涕抚几言曰乐人之乐者忧人之忧食人之食者死人之事闻者莫不感动八月提兵至临安除知平江府天祥陛辞疏言朝廷姑息牵制之意多奋发刚断之义少吕师孟借敌人之势偃蹇自恣乞斩以衅鼓以作将士之气又言宋惩五季之乱削藩镇建郡邑虽足以矫尾大之弊然国亦以寢弱故敌至一州则破一州至一县则破一县中原陆沈痛悔何及今宜分天下为四镇各建都督统御以广西益湖南而建阊于长沙以广东益江西而建阊于隆兴以福建益江东而建阊于番禺以淮西益淮东而建阊于扬州责长沙取鄂隆兴取蕲黄番禺取江东扬州取两淮使其地大力衆足以抗敌约日齐奋有进无退日夜以图之彼备多力分而吾民之豪杰者又伺间出于其中如此则敌不难却也时议以为迂濶不报十月天祥至平江元兵已入常州矣天祥遣其将朱

华尹玉麻士龙与张全援常州至虞桥士龙战死朱华以广军战五牧败绩玉军亦败以残兵五百人夜战比旦皆没全不发一矢走归元兵破常州入独松关陈宜中留梦炎召天祥奔平江守余杭明年正月除知临安府未几都城降元天祥以右丞相使军中请与巴延抗论皋亭山巴延怒拘之比至镇江天祥与其客杜浒十二人夜亡入真州苗再成出迎喜且泣曰两淮兵足以兴复特二阨小隙不能合从耳天祥与定计即以书遗二制置遣使四出约结天祥未至时扬有归兵言敌人密遣一丞相入真州说降李庭芝信之使再成亟杀天祥再成见其忠义不忍杀以二十人导往扬州四鼓抵城下闻制置司捕文丞相甚急乃东入海道遇元兵伏环堵中得免行入板桥元兵又至伏丛筱中元兵入索之执杜浒金应浒应解所怀金与之获免募二樵者以策荷天祥至高邮嵇家庄嵇耸迎天祥至家遣子德润卫至泰州遂由通州泛海如温州以求二王闻益王未立上表劝进至福州拜右丞相寻与陈宜中议不合乃以同都督出江西遂行收兵入汀州十月遣参谋赵时赏谄议赵孟滌取宁都参赞吴浚取雩都刘洙萧明哲陈子敬皆自江西起兵来会邹?以招谕副使聚兵宁都元兵攻之?兵败同起事者刘钦鞠华叔顔斯立顔起岩皆死武冈教授罗开礼起兵复永丰县已而兵败被执死于狱天祥闻开礼死制服哭之哀二年正月元兵入汀州天祥遂移漳州乞入卫时赏孟滌亦提兵归独吴浚兵不至未几浚降元来说天祥天祥缢杀之四月复梅州都督王福钱汉英跋扈斩以徇五月自梅州出江西复会昌县六月复兴国县七月遣参谋张汴监军赵时赏赵孟滌等盛兵薄赣城邹?以赣诸县兵捣永丰其副黎贵达以吉诸县兵攻泰和吉八县复其半惟赣不下临洪诸郡皆送款潭赵璠张虎张唐熊桂刘斗元吴希夷陈子全王梦应起兵邵永间复数县抚州何时等皆起兵应天祥分宁武军建昌三县豪杰皆遣人如军中受约束八月元李恒遣兵援赣州而自将兵攻天祥於兴国天祥不意恒兵猝至乃引兵走就邹?於永丰?兵先溃恒穷追天祥至方石岭及之巩信拒战箭被体死之至空坑军士皆溃天祥妻妾子女皆见执时赏坐肩輿後兵问为谁时赏曰我姓文衆以为天祥擒之而归天祥以此得逸去孙?彭震龙张汴死於兵繆朝宗自缢死吴文炳林栋刘洙皆被执归隆兴时赏奋骂不屈有系累至者辄麾去云小小签厅官耳执此何为由是得脱者甚衆临刑洙颇自辩时赏叱曰何必然於是栋文炳萧敬夫萧焘夫皆死焉天祥收残兵奔循州驻南岭黎贵达谋叛执而杀之三年三月进屯丽江浦六月入船澳益王殂卫王继立天祥上表自劾乞入朝不许八月加天祥少保信国公军中疫起兵士死者数百人天祥惟一子与其母皆死十一月进屯潮阳县潮州盗陈懿刘兴数叛附为潮人害天祥攻走懿执兴诛之十二月趋南岭邹?刘子俊又自江西起兵来再攻懿党懿乃遁去元张弘范兵济潮阳天祥方饭五坡岭弘范兵突至衆不及战天祥仓皇出走千户王惟义执之天祥吞脑子不死邹?自刭死官属陈龙复萧明哲萧资杜浒张唐熊桂吴希夷陈子全俱死焉唐张栻後也刘子俊被执自诡为天祥冀可脱天祥及天祥至各争眞伪元人遂烹子俊而执天祥至潮阳见弘范左右强之拜天祥不屈弘范释其缚以客礼见之天祥固请死弘范不许与俱入厓山使为书招张世杰天祥曰吾不能扞父母乃教人叛父母可乎强之天祥遂书所过零丁洋诗与之其末云人生自古谁无死留取丹心照汗青弘范笑而置之厓山破元军置酒大会弘范曰国亡丞相忠孝尽矣能以事宋者事元将不失为宰相也天祥涕泣曰国亡不能救死有余罪肯逃其死而二其心乎弘范义之遣使归之京师道经吉州不食八日犹生乃复食十月至京师馆人供帐甚盛天祥不寝处坐达旦丞相博罗见之於枢密院天祥不屈仰首言曰天下事有兴有废自古帝王将相灭亡诛戮何代无之天祥今日忠於宋氏以至於此愿早求死博罗曰自古以来人臣有以宗社土地与人而复逃者乎天祥曰非

也予前使於巴延军中被留不得归已而贼臣献国国亡矣吾职当死所不死者以度宗二子在浙东老母在广故也博罗曰德佑非尔君耶弃嗣君而立二王忠乎天祥曰德佑吾君也不幸失国当此之时社稷为重君为轻吾别立君为宗庙社稷计也从怀愍而北者非忠从元帝为忠从徽钦而北者非忠从高宗为忠博罗语塞徐曰汝立二王何济於事天祥曰国家不幸丧亡吾立君以存社稷存一日则尽臣子一日之责人臣事君如子事父母父母有疾虽甚不可为岂有不下药之理尽吾心焉不可为则天命也今日天祥有死而已何必多言博罗怒囚之天祥於狱中作正气歌以见志未几元世祖召之於狱欲用之天祥固辞欲杀之天祥益不屈乃赦之天祥留燕三年坐卧一小楼足不?地时世祖求南人之才者王绩翁言无如天祥世祖即遣绩翁谕旨天祥曰国亡吾分一死耳傥缘寛假得以黄冠归故乡他日以方外备顾问可也若遽官之非直亡国之大夫不可与图存举其生平而尽弃之将安用我绩翁欲约宋官谢昌元等十人请释天祥为道士留梦炎不可曰天祥出复号召江南置吾十人於何地事遂已世祖知天祥终不屈也与宰相议释之有以天祥起兵江西事为言者不果释至元十九年有闽僧言土星犯帝座疑有变未几中山有狂人自称宋主有兵千人欲取文丞相世祖召天祥谓之曰汝何愿天祥曰天祥受宋恩为宰相安事二姓愿赐一死足矣世祖犹未忍遽麾之退言者力赞从天祥之请从之俄有诏止之天祥死矣天祥临刑殊从容谓吏卒曰吾事毕矣南向拜而死年四十七其衣带中有赞曰孔曰成仁孟曰取义惟其义尽所以仁至读圣贤书所学何事而今而後庶几无愧数日其妻欧阳氏收其屍面如生南北人闻者皆为流涕有张毅甫者负天祥骸骨归葬吉州会林某亦自惠州舁天祥母之柩同日而至人以为忠孝所感天祥子俱亡遗命以弟璧之子叔子为後天祥博学善谈论饮酒能多而不乱所居对文笔峰自号文山平生作文未尝属草下笔滔滔不竭尤长於诗有古赋比兴之旨流离中感叹悲悼一发於诗在京口有指南集在燕狱有集杜诗百首又有吟啸集行於世

论曰天祥建议分境内为四镇各树重兵以相掎角与汪立信列卫江滨之策皆为保邦之至计使用之於未失襄阳之前宋社可保也即天祥建言时苟用其策亦可以迁延岁月亡岂若是速乎天祥早为贾似道所抑终为陈宜中所摈羈孤外郡无尺兵斗粮之藉虚假名号招致豪杰遂能以数千罢散之卒克复州县震动中原虽无成功之望而事亦奇矣所用之人如赵时赏刘子俊邹?杜浒辈间关拥卫九死而不悔士卒遭空坑五坡之厄前後丧失虽死不叛盖其忠义足以感人心制御足以一衆志向若用之於早国虽抢攘势未倾危稍出其十二三运用舒卷以遏敌人之冲则宋事未可料也至於国破身囚临死生之变从容无动於中犹凤翔千仞俯视世间非古所谓大丈夫者孰能当此哉

陆秀夫 张世杰 谢枋得

陆秀夫字君实楚州盐城人父徙镇江自少才思清丽一时文人鲜能及之景定元年成进士李庭芝镇淮南辟之幕中时天下称得士者以淮南为第一秀夫性沈静每僚吏至合宾主交欢独斂焉无一语或时宴集坐尊俎间矜庄终日至察其事皆治庭芝益器之虽改官恒留之幕中三迁至主管机宜文字咸淳十年庭芝制置淮东擢参议官德佑元年边事急僚属多亡者惟秀夫数人不去庭芝上其名累擢宗正少卿权起居舍人二年二月以礼部侍郎使军前请和不就而还二王走温州秀夫与苏刘义追从之使人召陈宜中张世杰等皆至遂相与立

益王於福州进端明殿学士签书枢密院事宜中以秀夫久在兵间知军务每事咨访始行秀夫亦悉心赞之无不自尽旋与宜中议不合宜中使言者劾罢之世杰让宜中曰此如何时动以台谏论人宜中惶恐即召秀夫还时君臣播越海滨庶事疎畧杨太妃垂帘与羣臣语犹自称奴每时节朝会秀夫俨然正笏立如治朝或时在行中凄然泣下以朝衣拭泪衣尽浥左右无不悲动者属井澳风端宗以惊疾崩羣臣皆欲散去秀夫曰度宗皇帝一子尚在将焉置之古人有以一成旅成中兴者今百官有司皆具士卒数万天若未欲絶宋此岂不可为国耶乃与衆共立卫王时陈宜中往占城屡召不至乃以秀夫为左丞相与世杰共秉政世杰驻兵厓山秀夫外筹军旅内调工役凡有述作又尽出其手虽匆遽流离中犹日书大学章句以勤讲及厓山破秀夫走少帝舟是时诸军皆溃元兵四合秀夫度不得脱乃先驱其妻子入海自负少帝赴海死年四十四後宫诸臣从死者甚衆方秀夫在海上时记二帝事为一书甚悉以授礼部侍郎邓光荐曰君後死幸传之其後厓山破光荐还庐陵其书存亡无从知故海上事世莫得其详云

张世杰范阳人隸淮兵中阮思聪见而奇之言於吕文德召为小校累功至黄州武定诸军都统制攻安东州战甚力与高达援鄂州有功转十官从贾似道入黄州战蕪草坪夺还所俘加环卫官咸淳四年元兵筑鹿门堡吕文德请益兵於朝调世杰与夏桂赴之及吕文焕以襄阳降元命世杰将五千人守鄂州世杰以铁絙锁两城夹以炮弩其要津皆施杙设攻具元兵破新城长驱而下世杰力战不得前元遣人招之不听元巴延阳攻严山隘潜舟自唐港入汉东攻鄂鄂降世杰提所部兵入卫道复饶州遂入朝时方危急徵诸将勤王多不至独世杰来累加保康军承宣使总都督府兵遣将四出取浙西诸郡复平江安吉广德溧阳诸城兵势颇振是月与刘师勇诸将大出师焦山令以十舟为方碇江中非有号令毋发碇示以必死元将阿珠载穀士以火矢攻之世杰兵乱不及发碇遂大败死者万余人世杰奔圖山疏请济师不报元兵至独松关召文天祥入卫世杰寻亦入卫加检校少保元兵迫临安世杰请移三宫入海而与天祥合兵背城一战陈宜中方遣人请和不可未几元兵至臯亭山世杰乃提兵入定海石国英遣都统卞彪说之使降世杰以彪来从已俱南也椎牛享之酒半彪从容为言世杰大怒断其舌磔之巾子山四月从二王入福州五月与宜中奉益王即位王世强导元兵攻之世杰乃奉端宗入海而自将陈吊眼许夫人诸翼兵攻蒲壽庚不下十月元将索多将兵援之遂解去既而索多遣经历孙安甫说世杰世杰拘安甫不遣元将刘深攻浅湾世杰兵败移踣居井澳深复来攻世杰擊却之因徙碇州其明年四月端宗崩卫王昺立拜世杰少傅枢密副使世杰以碇州不可居徙新会之厓山八月封越国公发琼州粟以给军明年元将张弘范等兵至厓山或谓世杰曰北兵以舟师塞海口则我不能进退盍先据海口幸而胜国之福也不胜犹可西走世杰恐久在海上有离心动则必散乃曰频年航海何时已须与决胜负悉焚行朝草市结大舶千余作水砦为死守计人皆危之已而弘范兵至据海口樵汲道絶兵茹乾粮十余日渴甚下掬海水饮之海咸饮即呕泄兵大困世杰率苏刘义方兴等日夕大战弘范得世杰甥韩命以官使三至招之世杰不从曰吾知降生且富贵但为主死不移耳会元将李恒自广州以师会弘范守厓山北二月癸未恒乘早汐攻宋兵之北弘范攻其南世杰南北受敌兵士皆疲不能复战遂大败陆秀夫负少帝赴海世杰乃与苏刘义断维以十六舟夺港而去行收兵遇杨太妃欲奉以求赵氏後太妃始闻少帝亡抚膺大恸遂赴海死世杰葬之海滨世杰将趋占城土豪强之还广东乃回舟舩南恩之海陵山散溃稍集谋入广 风大作将士劝世

杰登岸世杰曰无以为也登舵楼露香祝曰我为赵氏亦已至矣一君亡复立一君今又亡我未死者冀敌兵退别立赵氏以存祀耳今若此岂天意耶舟遂覆世杰溺死焉诸将函其骨葬潮居里

谢枋得字君直信州弋阳人也宝佑中举进士对策极攻丞相董槐与宦官董宋臣中乙科除抚州司户参军即弃去明年中兼经科除教授建宁府吴潜宣抚江东西辟差干办公事团结民兵以扞饶信抚又说邓傅二社诸大家得民兵万余人守信州五年枋得考试建康擿似道政事为问且言兵必至国必亡似道闻之追两官谪居兴国军咸淳三年赦归德佑元年吕文焕导元兵东下鄂黄蕲安庆九江凡其亲友部曲皆诱下之遂屯建康枋得与吕师夔有旧乃应诏上书乞通信师夔使之行成且愿身至江州见文焕与议从之以沿江察访使行会文焕北归不及而回以江东提刑江西招谕使知信州明年正月师夔南下枋得以兵逆之使前鋒呼曰谢提刑来吕军驰至射之矢及马前枋得走入安仁调淮士张孝忠逆战团湖坪矢尽孝忠挥双刀击杀百余人前军稍却後军绕出孝忠後衆惊溃孝忠中流矢死马奔归枋得坐敌楼见之曰马归孝忠败矣遂奔信州师夔下安仁进攻信州不守枋得乃变姓名入建寧唐石山转茶坂寓逆旅中日麻衣蹑屨东向而哭人不识之以为被病也已而去卖卜建阳市中有求卜者惟取米屨而已委以钱率谢不取其後人稍稍识之多延至其家使为弟子论学元既得天下遂隐闽中至元二十三年集贤学士程文海荐宋臣二十二人以枋得为首枋得方居母丧遗文海书曰某所以不死者以九十三岁之母在耳先妣今以考终某无意人间事矣亡国之大夫不可与图存某之至愚不可以辱召命又明年元行省丞相蒙古岱将旨召之执手相勉劳枋得曰上有尧舜下有巢由枋得名姓不祥不敢赴诏蒙古岱义之不强也既而宋故臣留梦炎力荐之枋得复遗梦炎书言江南无人才未有如今日之可耻欲求一人如瑕吕饴甥程婴杵臼之厮养卒亦不可得殷之亡也以八百国之精兵而不敢抗二子之正论武王太公凛凛无所容急以兴灭继絶谢天下殷之後遂与周并立今吾年六十余矣所欠一死耳岂复有他志哉终不行福建行省参政魏天佑见时方以求材为急欲荐枋得为功枋得闻之骂曰天佑仕闽无毫发推广德意反起银冶病民顾以我辈饰好耶及见天佑又傲岸不为礼与之言坐而不对天佑怒挟之而北二十六年四月至京师问谢太后攢所及恭宗所在再拜恸哭已而病迁悯忠寺见壁间曹娥碑泣曰小女子犹尔吾岂不汝若哉留梦炎使医持药杂米进之枋得怒曰吾欲死汝乃欲生我耶弃之於地终不食而死子定之负骸骨归葬信州枋得风岸孤峭不能与世轩輊以植世教立民彝为己任平生无书不读为文章高迈奇絶汪洋演迤自成一家学者师尊之所着诗传注疏行於世其北行也衣结?穿人尝德之者賙以金帛不受又为诗别其门人故友词甚慷慨人传诵之

论曰自古亡国忠臣死义未有如南宋之烈也其表表在耳目间者尚以百十数至於偏裨下吏弱子寡妇役夫走卒方外技艺之人盖不可胜数也岂其流风善教使之然欤抑诸君子者首为之倡有以激发其心欤秀夫世杰披草莱立幼君秉志金石与君国为存亡故特着之枋得徇义於元既有天下十数年之後从容不挠与文天祥相类古之所谓难者欤平生好学执义善为文章其遭遇可悲也余不胜载数人者略见其概云

卷四十

钦定四库全书

史传三编卷四十

大学士朱轼撰

名臣传三十二

金

梁襄

梁襄字公赞绛州人登大定三年进士调耀州同官主簿三迁邠州淳化令有善政察廉升庆阳府推官召为薛王府掾世宗将幸金莲川襄上疏极谏曰臣闻上古帝王高城浚池深居邃禁以为藩篱壮士健马坚甲利兵以为爪牙今所幸金莲川在重山之北地积阴冷中夏降霜五谷不殖郡县难建盖自古极边荒弃之壤也行宫之制非有深广殿宇城池之固环卫周垣惟用氍毹布顿舍之处军?阌塞主客不分攘夺蹂躪未易禁止公卿百官富者车帐仅容穷者穴居露处舆台皂隶不免困踣饥不得食寒不得衣一夫致疾染及众人及乎秋杪将归人疲马弱粮空衣敝犹且远幸松林以从畋猎往来不测动踰旬月转输移徙之劳飞挽逋逃之苦又更倍于前矣以陛下神武善?射固不忧銜橛之变设若烈风暴至宿雾四塞翠华有崑陵之避百官狼狽于道途卫士参错于队伍当此宸衷宁无戒悔矧乎行幸所过林谷晦靄上有悬崖下多深壑垂堂之戒不可不思臣闻汉武帝幸甘泉遂中江充之奸唐太宗居九成几致结社之变太康畋于洛汭后羿拒河而失邦魏主拜陵近郊司马窃权而篡国隋炀海陵离弃宫阙远事游巡其祸遂速故君人者不可恃人无异谋要在处已于无忧患之域也燕都地处雄要北?山嶮南压区夏亡辽得此控制南北坐享有年况今有宫阙井邑之繁仓府武库之实居庸古北松亭榆林等关东西千里皇天本以限中外开大金万世之基也奈何无事之日越居草莱轻不?之圣躬爱沙磧之微凉臣实惜之昔唐宗将幸关南畏魏徵而遂停汉文欲驰霸陵因袁盎而遽止陛下能行唐虞之难行而未能罢中主之易罢此臣所未喻也陛下曩牧济南日遇炎蒸不离府署今九重之上台榭高明宴安穆清何暑可到如必谓往年辽国之君春水秋山冬夏巴纳左右喜谈以为快乐无乃非圣君所急乎且辽之基业根本在山北之临潢壤地褊小仪物殊简辎重不多方今幅员万里惟奉一君辎重浩穰随驾殆逾百万何故岁岁而行使远近困役伤财不得其所陛下其?之欵议者谓陛下远监人主多生深宫畏见风日弯弧上马皆所不能筋力柔弱故临战畏惧束手就亡是以不憚勤身远幸实欲服劳讲武臣以为事贵适中不可过当今过防骄惰之患先蹈危险之途何异无病而服药也但欲习武不必度关伏乞陛下发如纶之旨回北轅之车安处中都不复北幸则宗社无强之休疏上世宗纳之遂为罢行仍谕辅臣曰梁襄谏朕无幸金莲川朕以其言可取故罢其行然襄谓隋炀帝以巡

游败国不亦过乎炀帝失道虐民民心既叛虽不巡幸国将安保为人上者但尽君道而已岂必深居九重然後无虞哉襄由是以直声闻天下擢礼部主事太子司经除监察御史未几迁通远军节度副使以丧去服阙累迁至保大军节度使以卒襄生平练习典故学问该博长于左氏春秋至地理氏族无不该贯自早达至晚贵服食常淡薄云

论曰史称金始立国即设科取士渐摩培养至大定间人材辈出加以世宗之听纳论议书疏多可传者观襄疏亦足见当时君明臣直不以言为忌金之致治于斯为盛若襄之贤亦翹然而杰出哉

图克坦镒

图克坦镒本名爱新上京人北京副留守乌纳子也金世宗大定中诏学士图克坦温以女直字译贞观政要白氏策林史汉等书颁行四方选诸路学生三十余人教以古书习作诗策镒在选中?精诣兼通契丹大小字及汉字该习经史久之设女直进士科取镒等二十七人及第除中都教授迁国子助教丁母忧服阙改国史院编修世宗问完顏守道曰图克坦镒何如人也对曰镒容止温雅其心平易兼有材力可任政事世宗曰然当以剧任处之累迁翰林待制兼右司员外郎献汉光武中兴赋世宗大悦曰不设此科安得此人章宗即位迁谏议大夫兼吏部侍郎寻拜参知政事修国史镒知章宗銳意于治平乃上书言臣观唐虞之时其臣进言于君必曰戒哉懋哉曰吁曰都既陈其戒复导其美君之为治必曰稽于衆舍已从人既能听之又行之又从而兴起之君臣上下之间相与如此陛下继兴隆之运抚太平之基诚宜稽古崇德留意于此无因物以好恶无以好恶为喜怒轻忽小善不恤人言夫上下之情有通塞天地之运有否泰唐陆贄尝陈隔塞九弊谓上有其六下有其三陛下能慎其六为臣子者敢不慎其三哉上下之情既通则大纲举而细目张矣进尚书右丞三年罢为横海军节度使改定武军节度知平阳府事寻改西京留守承安三年转上京留守五年拜平章政事封济国公时淑妃李氏内宠过盛兄弟横恣诏以烈风昏暝连日问变异之由镒上疏言仁义礼智信谓之五常父义母慈兄友弟敬子孝谓之五德今五常不立五德不兴搢绅学古之士弃礼义忘廉耻细民遗道畔义迷不知返背毁天常骨肉相残动伤和气此非一朝一夕之故也今宜正薄俗顺人心父父子子夫夫妇妇各得其道然後和气普洽福祿荐臻矣因论为政之术其急有二一曰正臣下之心窃见羣下不明礼义趋利者衆何以责小民之从化哉其用人也德器为上才美为下兼之者待以不次才下行美者次之虽有才能行义无取者抑而下之则臣下之趋向正矣其二曰导学者之志教化之行兴于学校今学者失其本真经史雅奥委而不习藻饰虚词钩取禄利乞令取士兼问经史故实使学者皆守经学不惑于近习之靡则善矣又曰凡天下之事丛来者非一端形似者非一体法制不能尽隐于近似乃生异论孔子曰义者天下之断也记曰义为断之节伏望陛下临制万几事有异议少凝圣虑寻绎其端则裁断有定而疑可辨矣镒言皆切中时弊金主虽纳其说而不能行尝问汉高帝光武孰优张万公曰高祖优甚镒曰光武再造汉业在位三十年无沈湎冒色之事高祖惑戚姬卒至于乱由是言之光武似优章宗默然盖知其讽谏也泰和四年罢知咸平府六年徙河中兼陕西安抚使寻改知京兆府事充宣抚使陕西元帅府并受节制诏曰卿之智略朕所深悉且股肱旧臣今南征将帅久历行阵而宋人狡狴资卿胜算宜以长策御敌厉兵抚民称朕意焉镒言初置急通

舖本为转送文牒今一切乘驿非便金主深然之始置提控急遞舖官自此邮达无复滞焉七年吴玠死宋安丙分兵出秦陇间乃命镒出兵金房以分掣宋人梁益汉沔兵势镒遣页噜鸿和尔等引兵出商州与宋军战连胜宋王桷议和乃退守鹑岭关八年改知真定府事大安初封濮国公改东京留守过阙入见卫绍王谓镒曰卿两朝旧德欲用为相因太尉匡乃卿门人不可屈下进阶开府仪同三司充辽东安抚副使三年改上京留守平章事徵拜尚书右丞相监修国史上言自用兵以来彼聚而行我散而守以聚攻散其败必然不若入保大城并力备御昌桓抚三州素号富庶人皆勇健可以内徙益我兵势人畜货财不至亡失平章伊喇参政梁鎰曰如此是自蹙境土也卫绍王以责镒镒复奏曰辽东国家根本距中都数千里万一受兵州府顾望必须报可误事多矣可遣大臣行省以镇之卫绍王不从其後失昌桓抚三州王乃大悔曰从丞相之言当不至此顷之东京不守镒坠马伤足闻呼沙呼难作将命驾入省不得进俄而呼沙呼犹豫不能自定乃诣镒问疾从人望也镒从容谓之曰翼王章宗之兄显宗长子衆望所属元帅决策立之万世之功也乃迎立宣宗即位进左丞相封广平郡王诏以足疾未愈侍朝无拜明年建议和亲言事者请罢按察司镒曰今郡县多残毁正须赖以抚集不可罢乃止宣宗将如南京镒曰銮辂一动北路皆不守矣今已讲和聚兵积粟固守京师策之上也南京四面受兵辽东根本之地依山负海其险足恃备御一面以为後图策之次也不从是岁卒赠优厚镒为人明敏方正学问该贯一时名士皆出其门多至卿相尝叹文士委顿虽巧拙不同要以仁义道德为本乃着学之急道之要二篇太学诸生刻之于石有弘道集六卷

论曰镒有学识知治道能献替可谓忠矣所论君臣上下之间五常五德为政之术儒者之言也指画兵势逆料三州东京必至失守若烛照焉至其从容数语遂定宣宗则又功在社稷不动声色而措泰山之安者乎奈何两策不从南都播越使元人得以为词而根本之地尽弃岂不惜哉

完顏承暉

完顏承暉字维明本名福兴好学淹贯经史袭父世职金世宗大定间选充符宝只候迁笔砚直长调中都右警巡使章宗即位迁近侍局使尝夜诏开宫门召皇后妹夫乌页尔承暉不奉诏明日奏曰乌页尔得罪先帝不可召章宗善之未几迁兵部侍郎兼右补阙选除东京延平等路提刑副使改上京留守同知御史台奏承暉前为提刑豪猾屏息迁临海军节度使历利涉辽海军累迁至北京留守副留守李东阳素骄贵承暉自非公事不与交一言寻召为刑部尚书兼知审官院惠民司都监伊勒哈图迁织染署直长承暉駁奏曰伊勒哈图以廕得官别无才能擢惠民司都监已为太优况乃平章镒之甥不能不涉物议章宗从之改知大兴府事宦者李新喜有宠用事借大兴府妓乐承暉拒不与章宗闻而嘉焉豪民与人争种稻水利不直赂元妃兄宣徽使李仁惠仁惠使人属承暉右之承暉杖遣豪民谓其人曰此可以报宣徽也复改知大名府雨潦害稼承暉决引潦水纳之濠隍迁山东路统军使山东盗贼起承暉奏明安穆昆以下皆得权行的决俟事定依例奏闻俄而盗贼渠魁稍就招降余党犹潜匿泰山岩穴间按察使请发数万人刈除林木深入剿捕承暉奏曰泰山五岳之宗不可赭也矧齐人易动驱之入山此海盗非止盗天下之山岂可尽赭哉议遂寝是时行限钱法承暉上疏言货聚于上怨结于下不报改知兴中府卫绍王即位召为御史大夫拜参知政事驸马图克坦摩

哩与其父南平干政事大为奸利承晖面质其非进宣德行省尚书右丞参知政事承裕败绩于会河堡承晖亦坐除名至宁元年起为横海军节度使贞佑初召拜尚书右丞承晖即日入朝妻子留沧州沧州破妻子皆死呼沙呼伏诛拜平章政事兼都元帅封邹国公中都被围出议和事宜宗迁汴进右丞相都元帅徙封定国公留守中都左丞穆延尽忠久在军旅知兵事遂以赤心相托兵事悉付之已乃总持大纲期于保完都城顷之副元帅富察齐勤以其军出降中都危急承晖以死固守遣人以矾写奏曰齐勤既降城中无有固志臣虽以死守之岂能持久伏念一失中都辽东河朔皆非我有诸军倍道来援犹期有济诏乃趣诸路兵粮俱往赴救高琪忌其成功虽遣将分道往终无一兵至者乃与穆延尽忠会议于尚书省约同死社稷而尽忠谋南奔承晖召帅府经历完顏实古谓曰始我谓平章知兵故推赤心相托尝许与我俱死今忽异议行期且在何日汝必知之实古曰今日向暮且行曰汝行李办未曰办矣承晖变色曰社稷若何实古不能对叱下斩之承晖起辞家庙召郎中赵思文与之饮酒谓之曰事势至此惟有一死以报国家作遗表付令史师安石引咎自归论国家大计辨君子小人治乱之本历指当时邪正者数人论高琪赋性陰险报复私憾窃弄威柄包藏祸心终害国家复谓妻子死于沧州为书以从兄子永怀为後从容若平日尽出财物召家人随年劳多寡而分之举家号泣不能仰视承晖神色泰然方与安石举白引满谓之曰承晖于五经皆经师授谨守而力行之不为虚文既被酒取笔与安石诀最後倒写二字投笔叹曰遽尔谬误得非神志乱邪谓安石曰子行矣徐仰药死贞佑三年五月二日也安石以遗表至行在宣宗设奠于相国寺哭之哀赠太尉尚书令广平郡王諡忠肃官其嗣子及长孙承晖生而贵富居家类寒素常奉司马光苏轼像于书室曰吾师司马而友苏公平章完顏守贞素敬之与为忘年交

论曰完顏承晖骨鯁大臣也居恒则方正着声临难则从容尽节非学养素优忠贞贯乎金石者能有是耶观其自言五经皆经师授身体而力行之不为虚文呜呼亶哉尝考金末忠节诸臣或自杀或战死或被执不屈难以悉数有完顏陈华善者尝以四百骑破蒙古兵于大昌原时称二十年来战功第一及三峯之败诣蒙古营自言曰我忠孝军总领陈和尚也大昌原之胜者我也卫州之胜亦我也倒回谷之胜亦我也我死乱军中入将谓我负国家今日明白死天下必有知我者蒙古将欲其降不可斫足胫折之不为屈割口吻至耳嚙血大呼至死不絕又宋元兵入蔡州完顏呼沙呼闻金主自縊谓将士曰吾不能死于乱兵之手吾赴汝水从吾君矣诸君其善为计言讫赴水死将士皆曰相公能死我辈独不能耶于是参政以下及军士五百余人皆从死此皆非常忠烈之士而承晖为最先又行能最着故表而出之

卷四十一

钦定四库全书

史传三编卷四十一

大学士朱轼撰

名臣传三十三

元

耶律楚材

耶律楚材字晋卿辽东丹王托云八世孙父?以学行事金世宗见亲任终尚书右丞楚材生三岁而孤母杨氏教之学及长博极羣书旁通天文地理律历术数及释老医卜之说仕金至员外郎太祖定燕闻其名召见之楚材身長八尺美髯宏声帝伟之曰辽金世讎朕为汝雪之对曰臣父祖尝委质事之既为之臣敢讎君耶太祖重其言置之左右呼曰乌尔图萨哈勒而不名乌尔图萨哈勒盖国语长髯人也己卯夏六月太祖西伐回回禡旗之日雨雪三尺疑之楚材曰克敌之徵也庚辰冬大雷复问之对曰回回国主当死于野後皆验壬午八月长星见西方楚材曰金将易主矣明年金宣宗殂夏人常巴津善造弓每曰国家方用武耶律儒者何用楚材曰治弓用弓匠为天下岂可不用治天下匠耶太祖闻之喜曰见亲用每征伐必用楚材卜亦自灼羊脾以相符应谓太宗曰此人天赐我也後军国庶政当悉委之甲申太祖至东印度驻铁门关有一角兽形如鹿而马尾其色绿作人言谓侍卫者曰汝主宜早还太祖以问楚材对曰此瑞兽也名角端能言四方语好生恶杀此天降符以告陛下天之元子天下之人皆陛下之子愿承天心以全民命帝即日班师丙戌冬从下灵武诸将争取子女金帛楚材独收遗书及大黄既而士卒病疫得大黄辄愈用活万人是时经营西土未暇定制州郡长吏生杀任情燕蓟留後实默斡喇布尤贪暴杀人盈市楚材闻之泣下即请禁州郡非奉玺书不得擅徵发囚当大辟者必待报违者罪死于是贪暴之风稍戢燕多剧贼未夕辄曳牛车指富家取财物不与则杀之时睿宗以皇子监国遣楚材穷治之楚材询察得其姓名皆留後亲属及势家子尽捕下狱戮十六人于市燕民始安先是西域历人言五月望月当蚀楚材曰否卒不蚀明年十月楚材言月当蚀西域人曰否果食八分至是楚材以金天明历不应天度乃制庚午元历上之己丑秋太宗将即位宗亲戚会议犹未决楚材言于睿宗曰此宗社大计宜早定睿宗者太宗亲弟也遂定策立仪制乃告亲王察罕岱曰王虽兄位则臣也礼当拜王拜则莫敢不拜及即位王率皇族及臣僚拜帐下既退王抚楚材曰真社稷臣也元朝尊属有拜礼自此始中原初定民多误触禁网而国法无赦令楚材从容为太宗言诏自庚寅正月朔日前事勿治且条便宜十有八事颁天下其略言郡宜置长吏牧民设万户总军使势均力敌以遏骄横中原之地财用所出宜存恤其民州县非奉上命敢肆行科差者罪之贸易借贷官物者罪之

蒙古回鹘河西诸人种地不纳税者死监主自盗官物者死应犯死罪者具由申奏待报然後行刑贡献礼物为害非轻宜禁断太宗悉从之惟贡献一事不允楚材曰蠹害之端必由于此矣楚材又奏曰陛下将南伐军需宜有所资诚均中原地税商税盐酒铁冶山泽之利岁可得银五十万两帛八万匹粟四十余万石太宗曰卿试行之乃立燕京等十路徵收课税使凡长贰悉用士人参佐皆用省部旧人辛卯秋太宗至云中十路进廩籍及金帛笑谓楚材曰汝不去朕左右而能使国用充足南国之臣复有如卿者乎对曰在彼者皆贤于臣臣不才故留燕为陛下用帝嘉其谦赐之酒即日拜中书令楚材奏凡州郡宜令长吏理民事所掌课税权贵不得侵之举镇海钮祜?均与之同事权贵不能平鞞喇布以旧怨尤疾之譖于宗王宗王请杀之太宗不听属有讼鞞喇布者命楚材鞫之楚材曰此人倨傲易招谤今将有事南方他日治之未晚也太宗私谓侍臣曰楚材不较私讎真长者也汝曹当效之中贵可思巴哈奏徙西京宣德万余户以充采金银役夫及种田西域与栽蒲萄户楚材曰先帝遗诏山後民质朴无异国人缓急可用不宜轻动今将征河南请无残民以给此役太宗可其奏壬辰春太宗南征将涉河诏降者免死或曰此辈急则降缓则走徒以资敌不可宥楚材请制旗数百以给降民使归田里全活甚衆旧制凡攻城邑以矢石相加者即为拒命既克必杀之汴梁拒战久将下大将苏布特请屠之楚材驰入奏曰将士暴露数十年所欲者土地人民耳得地无民将焉用之太宗意未决楚材曰奇巧之工厚藏之家皆萃于此若尽杀之将无所获乃诏止戮完顔氏余皆勿问时避兵居汴者凡百四十七万人楚材又请求孔子後收太常礼乐生及聘召名儒乃以孔子五十一代孙元措袭封衍圣公付以林庙召名儒梁涉王万庆赵着等使释九经进讲东宫又率大臣子孙执经解义俾知圣人之道置编修所于燕京经籍所于平阳由是文治兴焉时河南初破俘获甚衆军还逃者十七八有旨居停逃民及资给者灭其家乡社连坐楚材曰河南既平民皆陛下赤子走复何之奈何因一俘囚连死数十百人乎太宗悟除其禁金之亡也惟秦巩二十余州久未下楚材曰往年吾民逃罪或萃于此故以死拒战若许以不杀将不攻自下矣诏下诸城皆降呼沙呼等籍中原民议以丁为户楚材曰不可丁逃则赋无所出当以户定之朝议将以回回人征江南汉人征西域楚材又曰不可中原西域相去辽远未至敌境人马疲乏水土异宜疾疫将生宜各从其便有于元者奏行交钞楚材又曰不可金章宗时初行交钞与钱通行有司以出钞为利收钞为讳谓之老钞至以万贯易一饼民力困竭国用匱乏当为鉴戒今即造交钞宜不过万锭太宗皆从之时议裂州县赐亲王功臣楚材曰裂土分民易生嫌隙不如多以金帛与之太宗曰已许奈何楚材曰若朝廷置吏收其贡赋岁终颁之使毋擅科徵可也太宗然其计遂定天下赋税每二户出丝一筋以给国用五户出丝一筋以给诸王功臣汤沐之资地税中田亩二升又半上田三升下田二升水田亩五升商税三十分而一盐价银一两四十筋既定常赋朝议以为太轻楚材曰作法于凉其弊犹贪後将有以利进者则今已重矣时工匠制造糜费官物十私八九楚材又请核之以为定制太宗尝执觴赐楚材曰朕所以推诚任卿者先帝之命也非卿则中原无今日朕得安枕者卿之力也楚材复奏曰制器者必用良工守成者必用儒臣儒臣之事业非积数十年未易成也太宗曰果尔可官其人楚材曰请校试之乃命宣德州宣课使刘中随郡考试以经义词赋论分为三科儒人被俘为奴者亦令就试主匿弗遣者死得士凡四千三十人免为奴者四之一先是州郡长吏多借贾人银以偿官息累数倍至奴其妻子犹不足偿楚材奏令本利相侔而止永为定制民间所负者官为代偿之至一衡量给符印立钞法定均输布通传明驿券庶政畧备民稍苏息焉有道士结中贵杨惟忠虐杀其讐之党二人楚材收按惟忠太宗怒繫楚材既而自悔

命释之楚材不肯曰陛下初令繫臣以有罪也今释臣是无罪也臣备位公辅岂宜轻易反覆如戏小儿国有大事何以行焉衆皆失色帝乃温言慰之楚材因陈时务十策曰信赏罚正名分给俸禄官功臣考殿最均科差选工匠务农桑定土贡制漕运皆切于时务悉施行之太原路转运使吕振副使刘子振以赃抵罪太宗责楚材曰卿言孔子之教可行何故乃有此辈对曰君父教臣子亦不欲令陷不义三纲五常圣人之名教有国家者莫不由之如天之有日月也岂得缘一夫之失使万世常行之道独见废于我朝乎太宗意乃解太宗好酒楚材屡諫不听乃持酒槽铁口进曰麴蘖能腐物铁尚如此况五脏乎太宗悟语近臣曰汝曹爱我有如乌尔图萨哈勒者耶勅日进酒三锺而止自庚寅定课税格岁有增羨至戊戌增至一百一十万其後富人刘呼图等请以一百四十万扑买天下课税楚材曰此贪利之徒罔上虐下为害甚大奏罢之至是温都尔哈玛尔又请扑买课税增至二百二十万楚材极力辩諫声色俱厉言与涕俱太宗曰尔欲搏鬪耶又曰尔欲为百姓哭耶姑试行之楚材力不能止乃叹息曰民之困穷自此始矣尝曰兴一利不如除一害生一事不如少一事後之负谴者方知吾言不妄也楚材当国日久得禄分其亲族未尝私以官或从容讽之楚材曰睦亲之义但当资以金帛若使从政而违法吾不能徇私也辛丑二月帝疾笃医言脉已絶皇后不知所为召楚材楚材曰今任使非人卖法鬻狱囚繫非辜者多古人一言而善莢惑退舍请赦天下囚徒后即欲行之楚材曰非君命不可俄顷帝少苏因请肆赦太宗首肯之是夜医者候脉复生翼日而瘳冬十一月太宗将出猎楚材以数推之亟言其不可不听猎五日崩于行在所皇后柰曼珍氏称制癸卯五月莢惑犯房楚材曰当有惊扰居无何朝廷用兵事起仓卒后令授甲欲西迁以避之楚材曰朝廷天下根本根本一摇天下将乱臣观天道必无患也後数日果定时温都尔哈玛尔以货得政柄廷中皆畏附独楚材面折廷争言人所难言后以御宝空纸付温都尔哈玛尔使自填行之楚材曰朝廷自有宪章今欲紊之臣不敢奉诏事遂止又有旨凡温都尔哈玛尔所建白令史不为书者断其手楚材曰国之典故先帝悉委老臣令史何与焉事若合理自当奉行如不可行死且不避况截手乎后不悦楚材因曰老臣事太祖太宗三十余年无负于国皇后亦岂能无罪杀臣也后虽憾之亦以先朝旧勲深敬惮焉甲辰夏五月卒年五十五赙赠甚厚後有譖楚材在相位久天下贡赋半入其家者后命近臣核视之惟琴玩十余及古今书画金石遗文数千卷而已至顺元年赠太师上柱国追封广宁王諡文正论曰天生斯民则并其所以生养之具而并有之金木水火土谷桑麻之类民所赖以生者与人而俱生而其于人也农圃医卜及百工一切养人之具其始为之者无所师授心通其理制为定法以垂于後盖天人之际道之自然自古及今常如此者非偶然也耶律楚材辽之种姓生长于金而元之太祖太宗拔起而大用之数十年之间上自文武经畧立国规模钱谷兵刑之制外及律吕星象工械技艺靡不毕具大要以仁心为质而正直忠厚才智渊深古名臣中少有伦比也故能使军国有章上下有体无分争鬪暴之患民安国富 传之後奄有九有岂虚乎哉

刘秉忠

刘秉忠字仲晦其先瑞州人也世仕辽为官族曾太父仕金为邢州节度副使因家焉元兵取邢以其父润署州录事历两县有惠爱秉忠风骨秀异英爽不羈年十七为邢台令史居常郁郁不乐一日投笔叹曰吾家累世衣冠乃汨没为刀笔吏乎丈夫不遇於世当隐居以求志耳即弃去隐武安山中久之入天宁寺为僧世祖在?邸召见秉忠于书无不读尤邃于易及邵氏

经世书至天文地理律历三式六壬遁甲之属无不精通论天下事如指诸掌世祖大悦之遂留藩邸後数岁奔父丧服除复被召上书数千百言其畧谓天下户过百万自呼图克诺延断事之後差徭甚大民致逃窜宜比旧减半就见在之民以定赋税官无定次清洁者无以迁污滥者无以降可比附古例定百官爵禄仪仗使家足身贵威福者君之权奉命者臣之职今百官自行威福进退生杀惟意之从宜从禁治天下之人宜施以教令使之知法则犯者自少罪不至死者皆提察然後决犯死刑者覆奏然後听断官民债负自宜遵依皇帝圣旨一本一利官司归还凡赔偿无名虚契所负及还过元本者并行赦免纳粮就远仓有一废十者宜从近仓以输为便当驿路州城饮食只待宜计所费以准开发关市津梁宜从旧制禁横取减税法以利百姓仓库加耗甚重宜令权量度均为定法使锱铢圭撮尺寸皆平以存信去诈珍贝金银难得之货一旦以缠丝缕饰皮革涂木石粧器仗甚可惜也宜从禁治今地广民微赋敛繁重民不聊生何力耕耘宜差劝农官二员率百姓务农桑营产业古者庠序学校未尝废今郡县虽有学并非官置宜从旧制修建三学设教授开选择才以经义为上词赋策论次之天下莫大于朝省亲民莫近于县宰虽朝省有法县宰宜择县宰正民自安矣关西河南地广土沃宜设官招抚民归土辟以资军马之用鄂罗哈喇于诸税旧额加倍榷之民无所措手足宜罢繁碎止科徵勿从献利之徒削民害国鰥寡孤独废疾者宜设孤老院给衣粮以为养使臣到州郡宜设馆不得于官衙民家安下孔子为百王师立万世法今庙堂虽废存者尚多宜令州郡祭祀释奠如旧仪近代礼乐器具靡散宜令徵太常旧人教引後学使器备人存渐以修之国家广大如天万中取一以养天下名士宿儒之无产业者使不致困穷实国家养材励世之大也今言利者衆非图利国害民实欲残民自利宜将国中人民必用场冶付各路课税所以定榷办余并罢去古者明王不宝远物所宝惟贤如使贤者在位能者在职此皆一人之睿知贤王之辅成也立朝省以统百官分有司以御衆事以至京府州郡亲民之职无不备纪纲正于上法度行于下故天下不劳而治今新君即位之後可立朝省以为政本世祖嘉纳焉又言邢州旧万余户兵兴以来不满数百凋坏日甚得良牧守如真定张耕洺水刘肃者治之犹可完复乃以耕为邢州安抚使肃为副使由是流民复业升邢为顺德府癸丑从世祖征大理明年征云南每赞以天地好生王者神武不杀故克城之日不妄戮一人己未从伐宋所至全活不可胜计中统元年世祖即位问以治天下之大经养民之良法秉忠采祖宗之旧典参以古制之宜于今者条列以闻于是下诏建元纪岁立中书省宣抚司朝廷旧臣山林遗逸之士咸见录用文物粲然一新秉忠虽居左右而犹不改旧服至元二年翰林学士承旨王鹗言秉忠定社稷之大计忠勤劳绩宜正其衣冠崇以显秩帝览奏即日拜光禄大夫位太保参预中书省事秉忠既受命以天下为己任事无巨细凡有关于国家大体者知无不言言无不听帝宠任愈隆燕闲顾问辄推荐人物可备器使者凡所甄拔後悉为名臣初帝命秉忠相地于桓州东滦水北建城郭于龙冈三年而毕名曰开平继升为上都而以燕为中都四年又命秉忠筑中都城始建宗庙宫室八年奏建国号为大元而以中都为大都他如颁章服举朝仪给俸禄定官制皆自秉忠发之为一代成宪十一年扈从至上都其地有南屏山筑精舍居之秋八月无疾端坐而卒年五十九帝闻惊悼谓羣臣曰秉忠事朕三十余年小心慎密不避艰险言无隐情其陰阳术数之精占事知来若合符契惟朕知之他人莫得闻也出内府钱遣官护丧葬十二年赠太傅封赵国公諡文贞後赠太师封常山王秉忠自幼好学至老不衰虽位极人臣而斋居蔬食终日澹然不异平昔为诗萧散闲淡如其为人有文集十卷

论曰秉忠当出处之际踪蹟甚奇方其栖心方外放浪山泽间宁自知遭时遇主出素蘊以纲维一世垂之无穷哉昔范蠡泛舟观兵强吴李泌衡山之逸客再定两京光复唐室秉忠岂其流亚耶

廉希宪

廉希宪字善甫布鲁哈雅子也幼魁伟举止不凡笃好经史手不释卷世祖为皇弟希宪年十九入侍一日方读孟子闻召急怀以进世祖问其说遂以性善义利仁暴之旨对世祖嘉之由是知名世祖以京兆分地命希宪为宣抚使京兆控制陇蜀诸王贵藩分布左右民杂羌戎号难治希宪讲求民病抑强扶弱暇日从名儒许衡姚枢辈谘访治道首请用衡提举京兆学校教育人材为根本计国制为士者无隶奴籍京兆多豪强废令不行希宪至悉令着籍为儒初世祖受命宪宗经理河南关右至是宪宗惑于谗命阿拉克岱尔刘太平检核所部大开告讐希宪曰宣抚司事由己出有罪当独任僚属何预及事竟卒无获罪者世祖渡江取鄂州命希宪入籍府库希宪引儒生百余拜伏军门因言王师渡江俘获士人宜遣还世祖纳之还者五百余人宪宗崩希宪启世祖曰殿下太祖嫡孙先皇母弟前征云南尅期抚定及今南伐率先渡江天道可知且殿下收召才杰悉从人望子惠黎庶率土归心今先皇奄弃万国神器无主愿速还京正大位以安天下世祖从之庚申至开平宗室诸王劝进希宪复以天时人事赞世祖早定大计明日世祖遂即位先是汉地分为十道世祖乃并京兆四川为一道以希宪为宣抚使是时刘太平和罗海在关右琿塔哈在六盘各怀异志刘太平和罗海潜入京兆谋为变而琿塔哈遂举兵反杀所遣使者遣人约其党密拉和卓于成都奇塔特巴哈于青居使各以兵来会又约刘太平和罗海同日俱发希宪得报即遣使掩捕刘太平和罗海等获之尽得其谋置于狱乃使刘哈玛尔诛密拉和卓汪惟正诛奇塔特巴哈具以驿闻复命汪惟良将秦巩诸军讨六盘惟良以未得旨辞希宪即解所佩虎符银印授之曰君但办吾事制符已飞奏矣惟良遂行又发蜀卒更戍及余丁使蒙古官巴沁将之谓曰君所将未经训练六盘兵精勿与争锋但张声势使不得东则大事济矣会有诏赦至希宪命绞刘太平等于狱方出迎诏乃自劾停赦行刑徵调诸军擅以惟良为帅等罪帝深善之曰经所谓行权此其是也赐金虎符使节制诸军且曰事当从宜勿拘常制西川将纳琳鄂罗官将举兵应琿塔哈巴沁获之系其党五十余人送二人至京兆并请杀之希宪谓僚佐曰琿塔哈不能乘势东来保无他虑今衆心未一犹怀反侧彼军见其将校执囚或别生心为害不细今因其惧死并加寛释使感恩効力就发此军余丁往隶巴沁上策也于是将校兵士人人感悦果得精骑数千巴沁将之而西琿塔哈闻京兆有备遂西渡河趋甘州阿拉克岱尔复自和林提兵与之合分结陇蜀诸将人心危疑朝议欲弃两川退守兴元希宪力言不可会亲王哈坦及汪惟良巴沁等合兵与战于西凉大败之俘斩畧尽得二叛首梟之京兆市事闻帝大嘉之曰希宪真男子也进拜平章政事时希宪年三十矣希宪奏四川降民皆散处山谷宜勅军吏止俘掠违者千户以下与犯人同罪禁无贩易生口由是四川遂安降者益衆又罢解盐户所摘军及京兆诸处无籍户之戍灵州屯田者以寛民力镇戎州有谋为叛者连引四百余人希宪详推之惟诛首恶五人宋将刘整以泸州降尽系前归宋者数百人待报希宪奏释之宋将家属在北者希宪岁给其粮仕于宋者子弟得越界省其亲人皆感之召还拜中书平章政事振举纲维综核名实汰逐冗滥裁抑侥幸兴利除害事无不举典章文物粲然可考当时翕然称治又建言国家开创以来凡纳

土及始命之臣咸令世守子孙奴视部下都邑长吏皆其皂隶僮使前古所无宜更张之使考课黜陟始议行迁转法帝谓希宪曰吏废法而贪民失业而逃工不给用财不赡费先朝患此久矣自卿等为相朕无此忧对曰陛下圣犹尧舜臣等未能以皐陶稷契之道赞辅治化怀愧多矣今日少治未足多也因论及魏徵对曰忠良之臣何代无之顾人主用不用尔有内侍传旨朝堂言某事当尔希宪曰此阉官预政之渐不可启也遂入奏杖之或讼丞相史天泽威权日盛渐不可制诏罢天泽政事待鞫问希宪进曰天泽事陛下久始自潜藩多经任使将兵牧民悉有治効陛下知其可付大事用为辅相小人一旦有言陛下奈何不熟察其心迹而遽疑之臣等备员政府陛下之疑信若此何敢自保天泽既罢亦当罢臣事遂解又有讼四川帅奇彻者帝勅遣使诛之希宪覆奏帝怒希宪曰奇彻大帅以一小人言被诛民心必骇收系至此与讼者廷对然後明其罪于天下为宜诏遣使按问事竟无实希宪每奏事帝前议论激切无少回惜帝曰卿昔事朕王府多所容受今为天子臣乃尔木强耶对曰王府事轻天下事重一或面从天下将受其害臣非不自爱也方士请炼大丹勅中书给所需希宪具以秦汉故事奏且曰尧舜得壽不因大丹也帝曰然遂却之时方尊礼国师帝命希宪受戒对曰臣受孔子戒帝曰孔子亦有戒耶对曰为臣当忠为子当孝孔子之戒如是而已五年始建御史台继设各道提刑按察司时阿哈玛特专总财利乃曰庶务责成诸路钱谷付之转运今绳治之如此事何由办希宪曰立台察古制也内则弹劾奸邪外则察视非常访求民瘼裨益国政无大于此若去之使上下专恣贪暴事岂可集耶阿哈玛特不能对七年秋坐事罢相一日帝问希宪居家何为阿哈玛特因谗之曰日与妻子宴乐耳帝变色曰希宪清贫何从宴设尝有疾须沙糖作饮阿哈玛特饷之二斤希宪却之曰使此物果能活人吾终不以奸人所饷求活也帝闻乃赐之嗣国王特纳格行省镇辽阳扰民不便十一年诏起希宪为北京行省平章政事辽东多亲王使者传令旨官吏立听希宪至始革正之俄诏国王归国希宪独行省省长公主及国婿入朝纵猎扰民希宪欲奏之国婿大惧入语公主公主出饮希宪酒曰从者扰民吾不知也以钞万五千贯还民自是贵人过者皆莫敢纵十二年右丞相阿尔哈雅下江陵请命重臣镇之帝急召希宪还使行省荆南承制授三品以下官希宪冒暑疾驱至镇阿尔哈雅率其属郊迎望拜尘中荆人大骇即日禁剽夺通商贩兴利除害兵民安堵首录宋故宣抚制置二司幕僚能任事者以备采访左右难之希宪曰今皆国家臣子也何用致疑乃择二十余人随才授职令凡俘获之人敢杀者以故杀平民论为军士所获病而弃之者许人收养病愈故主不得复有先时江陵城外蓄水扞御希宪命决之得良田数万亩以业贫民发沙市仓粟之不入官籍者二十万斛以赈公安之饥大纲既举乃曰教不可缓也遂大兴学选教官置经籍旦日亲临讲舍以厉诸生西南溪洞及思播田杨二氏重庆制置赵定应俱越境请降事闻帝曰先朝非用兵不可得地今希宪能令数千里外越境纳土其治化可见也希宪疾久不愈十四年春召还京师江陵民号泣遮道留之不得相与画像建祠希宪还囊橐萧然琴书自随而已帝知其贫赐白金五千两钞万贯五月至上都太常卿田忠良来问疾希宪谓之曰上都圣上龙飞之地天下视为根本近闻龙冈遗火延烧民居此常事耳慎勿令妄谈地理者感动上意未几果有以徙置都邑事奏者枢密副使张易中书左丞张文谦力言不可帝不悦明日召田忠良质其事忠良以希宪语对帝曰希宪病甚犹虑及此耶议遂止十六年春诏复入中书希宪称疾笃皇太子遣侍臣问疾因问治道希宪曰君天下在用人用君子则治用小人则乱臣病虽剧委之于天所甚忧者大奸专政羣小阿附误国害民病之大者殿下宜开圣意急为屏除不然日就沉痾不可药矣戒其子曰丈夫见义勇为祸福无预于己谓皐夔稷契伊傅周召为不可

及是自弃也天下事苟无牵制三代可复也又曰汝读狄梁公传乎梁公有大节为不肖子所坠汝辈宜慎之十七年十一月十九夜有大星陨于正寝之旁流光照地是夕希宪卒年五十大德八年赠忠清粹德功臣太傅追封魏国公諡文正

论曰希宪负青云之愿至以臯夔稷契自励欲追迹于三代此其志岂小哉受世祖恩遇知无不为是时邦家初建万事草创希宪居枢轴之位则能挈纲维明条贯成一代之规受专阃之寄则能诘奸御暴安民养士使疆土日辟折冲万里之外及当成败呼吸审察几宜代谋制胜用力少而成功多可谓拔萃之奇才也值阿哈玛特奸回贪冒动相牵制与之终始不然以希宪之才当此位望其功谋亦曷可胜道哉史传三编卷四十一

卷四十二

钦定四库全书

史传三编卷四十二

大学士朱軾撰

名臣传三十四

元

史天泽

史天泽字润甫大兴人身长八尺音如洪钟善骑射勇力绝人从其兄天倪帅真定天倪使护母北归甫行而天倪爲武仙所害天泽在道闻变即倾赀装易甲仗南还行次满城部曲散走者多来归得士马甚衆天泽摄行军事转战皆捷遂下中山畧无极拔赵州会天泽兄天安引兵来赴击武仙败之仙奔双门遂复真定大帅实讷台忿民从贼将尽杀之天泽曰彼皆吾民爲贼所胁耳力争得释天泽勇而善谋战胜攻取功最多又以招集流散存恤困穷爲务时政繁赋重贷钱於西北贾人以代输累倍其息谓之羊羔利民不能给天泽奏请官爲偿一本息而止继以岁饥假贷充贡赋积银至一万三千錠天泽倾家赀率族属官吏代偿之又请以中户爲军上下户爲民着爲定籍境内以宁世祖时在藩邸以河南不治请以天泽爲经畧使至则兴利除害政无不举诛郡邑长貳之尤贪横者二人境内大治阿拉克岱尔鈎较诸路财赋鍛链罗织无所不至天泽以勲旧独见优容天泽曰我爲经畧使今不我责而罪余人我何安乎由是得释者甚衆中统元年世祖即位首召天泽问以治国安民之道即具疏以对大畧谓朝廷当先立省部以正纪纲设监司以督诸路霈恩泽以安反侧退贪残以任贤能颁奉秩以养廉禁贿赂以防奸庶上下丕应内外休息帝嘉纳之二年五月拜中书右丞相天泽既秉政凡前所言治国安民之术无不次第举行又定省规十条以正庶务宪宗初年括户余百万至是诸色占役者大半天泽悉奏罢之三年春李璫以益都叛遂据济南诏亲王噶必齐讨之继命天泽往天泽闻璫入济南笑曰豕突入苙无能爲也至则进说於噶必齐曰璫多譎而兵精不宜力角当以岁月毙之乃深沟高垒绝其奔軼凡四月城中食尽军溃出降生擒璫斩之诛同恶者数十人余悉纵归明日引军东行未至益都城中人已开门迎降初天泽将行帝临轩授诏责以专征俾诸将皆听节度天泽未尝以诏示人及还帝慰之悉归功於诸将其慎密谦退如此至元元年加光祿大夫六年议攻襄阳诏天泽与呼喇珠往经画之至则相要害立城堡以绝其声援爲必取之计十年春与阿珠等进攻樊城拔之襄阳降十一年与巴延总大军自襄阳水陆并进天泽得疾还至真定帝遣其子与尚医驰视天泽附奏曰臣大限有终死不足惜但愿天兵渡江慎勿杀掠语不及他以十二年二月七日卒年七十四赠太尉谥忠武後累赠太师进封鎮阳王天泽平居未尝自矜其能及临大节论大事毅然以天下之重自任年四

十始折节读书立论多出人意表拜相之日门庭悄然或劝以权自张天泽曰唐人不云乎愿相公无权爵禄刑赏天子之柄人臣何权之有言者惭服当金末名士流寓失所悉爲治其生理而宾礼之後多致显达委任僚吏知之明而用之专是以出入将相五十年上不疑而下无怨人以爲有郭子仪曹彬之风云论曰天泽材兼文武爲开国元臣身出行间不下百战然其志与衆异观其临没之奏则平生之所存可知矣当时曹郭之誉有由然也元取天下诸将惟天泽知大体如阿珠李恒张弘范等皆不过战将巴延深厚有谋处衆不伐其识度比诸人爲优然其出兵之日世祖命之曰当如曹彬不戮一人及巴延南下兵之所过杀戮无数岂可与古人同日语耶

安图

安图穆呼哩四世孙世祖追录勲旧召入长宿卫年方十三位百寮上母鸿吉哩氏昭睿皇后之姊帝一日见之问及安图对曰安图虽幼公辅器也帝曰何以知之对曰每退朝必与老成人语未尝狎一年少是以知之四年执额呼布格党凡千余人帝语安图曰朕欲置此属於死何如对曰人各爲其主陛下甫定大难遽以私憾杀人将何以怀服未附帝惊曰卿年少何从得老成语由是深重之至元二年八月拜中书右丞相辞曰今三方虽定江南未附臣以年少谬膺重任恐四方有轻朝廷心帝动容有间曰朕思之熟矣无以踰卿冬十月召许衡至令衡入省议事衡以疾辞安图即亲候其馆与语良久既还念之不释者累日後帝谓衡曰安图尚幼未经事善辅导之汝有嘉谏当先告之以达朕朕将择焉衡对曰安图聪敏且有执守告以古人所言悉能领解臣不敢不尽心安图尝请内外官俱用老成人及令儒臣姚枢等入省议事皆从之及阿哈玛特用事安图奏曰臣近言尚书省枢密院各令奏事并如常制其大政令从臣等议定然後上闻既得旨矣今尚书一切径奏似违前旨帝曰岂阿哈玛特专权耶勅如前旨十一年安童遂劾奏阿哈玛特蠹国害民数事其明年诏从太子北平王出鎮极边十年乃归复拜中书右丞相值卢世荣败安图与诸儒条其所用人及所爲事悉罢之尝奏帝曰比闻圣意欲倚近侍爲耳目臣猥承任使若所行非法从其举奏罪之轻重惟陛下裁处今近臣乃伺隙援引非类曰某居某官某居某职以所署奏目付中书施行臣谓铨选之法自有定制其尤无事例者臣常废格不行虑其党有短臣者幸陛下详察帝曰卿言是也二十四年宗王纳延叛帝亲讨平之宗室诬误者命安图按问多所平反是岁复立尚书省安图切谏不听则曰臣力不能回天乞不用僧格别相贤者犹或不至虐民误国又不听其後大权尽归尚书安图屡求退不许至二十八年乃罢相仍领宿卫事三十年春正月卒年四十九大德七年赠太师东平王諡忠宪

论曰安图在位无赫赫之功然每观当时之正人贤士其推轂扶翼及国家利民稽古之事未尝不在其中也其他邪人则与岐趋弊事则与异议主持之力於是爲多故元初称贤相必举安图岂虚语哉安图之孙拜珠辅相英宗厘奸除弊二年之间几致太平爲逆党所疾君臣不密至以俱殒其治效虽不克终亦一时之盛也後之论拜珠者欲因以爲过则有伤於宋孔父之忠欲均之垂训则无以表卫甯俞之义故姑阙其名而附论之如此

彻尔

彻尔扬珠济达氏曾祖塔齐以功封徐邳二州因家於徐彻尔幼孤母富察氏教以读书至元十八年世祖召见应对详雅悦之俾常侍左右民间事时有所咨访从征东北边还因言大军所过民不胜烦扰寒饿且死宜加赈给帝乃赐边民谷帛牛马有差赖以存活者衆擢利用监二十三年奉使江南省风俗访遗逸时行省理财方急卖所在学田以价输官彻尔曰学田所以供祭礼育人才也安可鬻遽止之还朝以闻帝嘉纳焉二十四年分中书爲尚书省僧格爲相引用党与鈎考天下钱粮凡前权臣阿哈玛特积年负逋举以中书失徵奏诛二参政行省承风督责尤峻主无所偿则责及亲戚或逮系邻党械禁榜掠民不胜其苦自杀及死於狱者以百数中外骚动廷臣顾忌无敢言彻尔乃於帝前具陈僧格奸贪误国害民状词语激烈帝怒命批其颊彻尔辩愈力且曰臣与僧格无讎所以力数其罪而不顾身者正爲国家计耳若畏圣怒而不敢言则奸臣何由而除民害何由而息且使陛下有拒谏之名臣窃惧焉於是帝大悟即命帅羽林三百人往籍僧格家得珍宝如内藏之半僧格既诛诸枉系者始得释复命往江南籍僧格姻党於是江浙省臣乌玛喇密拉实都王济湖广省臣约苏穆尔等皆坐弃市天下大快之彻尔往来凡四道徐皆过门不入进拜御史中丞俄陞福建行省平章政事汀漳剧盗欧狗久不平彻尔征之号令严肃所过秋毫无犯有降者则劳以酒食而慰遣之曰吾意汝岂反者耶良由官吏污暴所致今既来归即爲平民吾安忍罪汝其返汝耕桑安汝田里毋恐他柵闻之悉款附未几欧狗爲其党缚致於军梟首以徇胁从者不戮一人汀漳平大德元年拜江南诸道行台御史大夫一日召都事贾钧谓曰国家置御史台所以肃清庶官美风俗兴教化也乃者御史不存大体按巡以苛爲明徵赃以多爲功至有迫子证父弟证兄奴证主者伤风败教莫兹爲甚君爲我语诸御史毋庸效尤爲也帝闻而善之改江浙行省平章政事江浙税粮甲天下平江嘉兴湖州三郡当江浙十六七而其地极下水鍾爲震泽震泽之注由吴松江入海岁久江淤塞豪民利之封土爲田水道不通由是泛溢败诸郡禾稼朝廷命行省疏导之发卒数万人彻尔董其役凡四閱月毕工九年召入爲中书平章政事十月以疾卒年四十七家貲不满二百缗人服其廉赠太傅追封徐国公谥忠肃

论曰元诸奸臣僧格爲甚所附丽恶党尤多彻尔不避汤镬之诛一言悟主活亿万生灵於俄顷非烈丈夫孰能致此哉考其平生言行一出於正故曰名不虚立功不幸成彼云一节之士而已者谬矣夫

博果密

博果密一名时用字用臣其先高车国人资禀英特进止详雅世祖命给事东宫受学於许衡日记数千言衡每称之以爲有公辅器至元十三年与同舍生数人上疏乞立学校兴教化养人才帝览之喜授利用少监出爲燕南河北道提刑按察副使迁提刑按察使二十一年召参议中书省事时卢世荣阿附僧格言能用已国赋可十倍於旧帝以问博果密对曰自昔言利之臣如桑弘羊宇文融之徒操利术以惑时君始者莫不谓之忠及其罪稔恶着国与民俱困虽悔何及臣愿陛下无纳其说帝不听以世荣爲右丞博果密遂辞参议不拜二十二年世荣以罪诛帝曰朕殊愧卿擢吏部尚书时方籍阿哈玛特家其奴张萨勒扎等罪当死谬言阿哈玛特家貲隐寄者多遂勾考捕系连及无辜京师骚动帝颇疑之命丞相安图集六部长贰官询问其事博果密曰是奴爲阿哈玛特心腹死有余罪爲此言者盖欲苟延岁月徼幸不死耳

岂可复受其诬嫁祸善良耶急诛此徒则怨谤自息丞相以其言入奏帝悟命博果密鞫之具得其实萨勒扎等伏诛其捕系者尽释之二十三年改工部尚书俄迁刑部河东按察使先是阿哈玛特贷钱於官以媚权贵约偿羊马至勒取部民所产以输事觉遣使按治皆不伏及博果密往尽得其不法百余事会大同民饥布呼密以便宜发仓廩赈之阿哈玛特所善幸臣遂劾其擅发军储又鍛链阿哈玛特使自诬服帝曰使行发粟以活吾民乃其职也何罪之有命移其狱至京师阿哈玛特竟伏诛图图尔哈求钦察之爲人奴者增益其军而多取编民中书僉省王遇验其籍改正之图图尔哈遂诬遇有不臣语帝怒欲斩之钦察密諫曰始令以博果密之人奴爲兵未闻以编民也万一他卫仿此户口耗矣若诛遇後人岂肯爲陛下尽职乎帝意解遇得不死二十四年僧格奏立尚书省诬杀参政杨居寛郭佑博果密争之不得僧格深忌之尝曰他日籍我家者此人也因其退食将诬以罪博果密遂以疾免二十七年起爲翰林学士承旨知制诰二十八年春帝猎柳林彻尔劾僧格罪状帝召问博果密具以实对帝大惊乃决意诛之罢尚书省复以六部归中书帝欲相博果密让於谔勒哲乃拜谔勒哲右相博果密平章政事上都留守茂巴尔斯言改按察司置廉访司不便因求宪臣赃罪以动上听帝以责中丞崔彧彧谢不知博果密斥彧不直言因历陈不可罢之说帝意乃释王师征交趾失利复谋大举博果密曰天威所临寧不震惧兽穷则噬势使之然今其子曰燇袭位若遣一介之使谕以祸福彼能悔过自新则不烦兵而下矣如或不悛加兵未晚帝从之於是交趾感惧遣使谢尽献历岁所当上贡物帝喜曰卿一言之力也以其半赐之辞曰此陛下神武不杀所致臣何功焉敏珠尔丹请复立尚书省博果密廷责敏珠尔丹阿哈玛特相继误国身诛家没前鉴未远奈何又效之乎事遂寝或言蒙古人宜与汉人间处以制不虞博果密曰新民乍迁犹未宁居若复纷更必致失业此盖奸人欲擅货易之利交结近幸借爲纳忠之说耳乃止有潜谔勒哲徇私者帝以问博果密对曰谔勒哲与臣俱待罪中书设如所言岂得专行臣等虽愚陋备位宰辅人或发其阴短宜使面质明示责降若内怀猜疑非人主至公之道也言者果屈帝亟称色辰肯之能博果密从容问其故帝曰彼事宪宗常阴资朕财用博果密曰是所谓爲人臣怀二心者今有以内府财物私结亲王陛下以爲若何帝急挥以手曰卿止朕失言三十年有星孛於帝座帝召博果密问所以销变之道对曰易震之象曰君子以恐惧修省诗曰敬天之怒三代圣王克谨天戒鲜不有终汉文之世同日山崩者二十有九日食地震频岁有之卒之上天悔祸海内乂安此前代之龟监也因诵文帝日食求言诏帝悚然曰正合朕意可复诵之遂详论款陈至四鼓乃退成宗即位躬揽庶政廷议大事多采博果密之言河东守臣献嘉禾大臣欲奏之博果密问曰汝部内尽然抑止此耶曰止此耳博果密曰止此何益於民遂罢遣之大德四年卒年四十六博果密素贫穷自爨汲妻织紵以养母後因使还母已卒号恸呕血几不起平居服儒素不尚华饰禄赐有余即散施亲旧明於知人多所荐拔丞相哈喇哈逊达尔罕皆所荐也其学先躬行而後文艺居则简默及帝前论事吐词洪畅引义正大以天下之重自任知无不言每侍燕闲必陈说古今治要世祖每拊髀叹曰恨卿生晚不得早闻此言然亦吾子孙之福武宗时赠太傅鲁国公谥文贞

论曰博果密行已有本末论思献纳裨益尤多僧格之事自赵孟頫发之彻尔行之得博果密之言帝意乃决早事许衡亲师力学其渊源所渐有由然矣同时右相谔勒哲能革僧格弊政罢安南之师屡蠲赐百姓与民休息当时亦称贤相然较之博果密风节稍不逮矣

董文用

董文用字彦材真定藁城人功臣董俊子也十岁而孤兄文炳教之学弱冠试词赋中选世祖潜藩命主文书讲说帐中常见许重从征云南督粮械赞军务又令授皇子经累官兵部郎中至元元年擢爲西夏中兴等路行省郎中中兴自瑋塔哈之乱民相恐动窜匿山谷文用至鎮之以静始开唐来汉延秦家等渠垦中兴西凉甘肃瓜沙等州之土爲水田若干於是民之归者户四五万悉授田种颁农具更造舟黄河中受诸部落及溃叛之来降者时诸王哲伯特穆尔鎮西方其下纵横需索无算省臣不能抗文用坐幕府辄面折以法因谓王傳曰王以重威鎮远方而其下毒虐百姓凌暴官府伤王威名於事体不便因历指其不法数十事傳惊白王王召文用谢之曰非郎中我殆不知自是省府事颇立二年入奏经畧事宜还以上旨行之中兴遂定八年授山东东西道巡行劝农使山东自更叛乱野多旷土文用巡行獎勵无问幽僻於是列郡咸劝地理毕兴政绩爲天下最十二年丞相安图荐爲工部侍郎明年出爲卫辉路总管佩金虎符郡当冲要民爲兵者十之九余皆单弱贫病不堪力役初得江南图籍金玉财帛之运不绝於道警卫输挽日役夫数千文用忧之曰民敝矣而又重妨耕作殆不可乃从转运主者言州县吏卒足以警卫不必重烦吾民主者曰固也然万一不虞罪将谁归文用即保任之民稍稍得耕而运事亦不废诸郡例运江淮粟於京师卫当运十五万石文用曰民籍可役者无几且江淮风水舟不能以时至而先爲期会是未运而民已困矣乃与旁郡通议立驿置法民力以舒十四年汴漕司议通沁水北东合流於御河以便漕适文用以事诣汴言曰卫爲郡地最下大雨时行沁水辄溢雨更甚即浸淫入卫今又引之使来岂惟无卫将无大名长芦矣会朝廷遣使相度沁不可通如文用议十六年受代归田里茅茨数椽读书自乐十九年朝廷选用旧臣召爲兵部尚书自是朝廷有大议未尝不与闻江淮省臣忌廉察官欲使行台隶行省上集朝臣议之文用曰不可御史台譬之卧虎虽未噬人人犹畏其爲虎也今虚名仅存纪纲犹不振一旦摧抑之则风采繭然无可复望者矣诏从文用议转礼部尚书迁翰林集贤二院学士知秘书时中书右丞卢世荣以货利得幸权要爲贵官阴结贪刻之党以錙铢掊克爲功乃建议曰我立法治财视常岁当倍增而民不扰诏下会议人无敢言者文用问曰此钱取之右丞之家耶将取之民耶取之右丞之家则不敢知若取诸民则有说矣牧羊者岁常两剪其毛今牧人日剪其毛而献之则主者喜其得毛多然羊无以避寒热即死且尽毛又可得耶民财有限取之以时犹惧其伤残也今刻剥无遗犹有百姓乎世荣不能对议者出皆谢文用曰君以一言折邪臣而厚邦本眞仁人之言也世荣竟以是得罪二十二年拜江淮行中书省参知政事行省长官素贵同列跪起禀白如小吏文用至则坐堂上侃侃与论是非无所避虽数忤之不顾也有以帝命建佛塔於宋故宫者有司奉行甚急天大雨雪役者死数百人文用谓其人曰非时役民民不堪矣少徐之如何其人曰参政奈何格上命耶文用曰非敢格上命今日之困民力而失民心者岂上意耶其人意沮爲稍寬其期二十三年朝廷将用兵海东徵敛益急有司大爲奸利文用谓疲国家可宝之民力取僻陋无用之小邦不可因请入奏事列其条目甚悉事遂罢二十五年拜御史中丞文用曰中丞不亲细务吾当先举贤才乃举胡只遹王恽雷膺荆幼纪许楫孔从道等十余人爲按察使徐琰魏初爲行台中丞当时以爲极选是时僧格当国权势方盛自近戚贵人皆屏息逊避文用以旧德任中丞独不附之数与争辩不爲屈且具奏僧格奸状僧格日诬譖文用帝不听迁大司农时欲夺民田爲屯田文用固执不可迁爲翰林学士承旨世祖崩成宗即位巡狩彻巴喇之地文用奏曰先帝新弃天下

陛下巡狩不以时还无以慰安元元宜趣还京师且臣闻人君犹辰极居其所而衆星拱之不在勤远畧也帝悟即日可其奏是行也帝每召至帐中问先朝故事文用盛言先帝虚心纳贤开国经世之务谈说或至夜半诏修先帝实录兼修国史文用於祖宗世系功德近戚将相家世勋绩皆记忆贯穿史馆有所考究质问文用应之无遗失大德元年请老六月以疾卒年七十有四赠银青光禄大夫少保壽国公謚忠穆

论曰文用学足从政斐然可观巡行州郡惠可庇民及处中朝侃然持大体执正不阿其折卢世荣牧羊剪毛之说尤可念也此与司马光斥吕惠卿善理财之说同意而罕譬而喻可发昏蒙其谓名言矣

郭守敬

郭守敬字若思顺德邢台人大父荣通五经精於算数水利时刘秉忠与张文谦张易王恂同学於紫金山荣使守敬从秉忠学中统三年文谦荐守敬习水利巧思絶人世祖召见面陈水利六事每奏一事帝辄嘉叹之授提举诸路河渠四年加授银符副河渠使至元元年从文谦行省西夏先是古渠在中兴者一名唐来长四百里一名汉延长二百五十里他州正渠十皆长二百里支渠大小六十八灌田九万余顷兵乱以来废坏淤浅守敬更立牐堰皆复其旧二年授都水少监守敬言金时自燕京之西麻峪村引芦沟一支东流穿西山而出是谓金口其水灌田若干顷利不可胜计兵兴以来典守者塞之今若开复故蹟上可以致西山之利下可广京畿之漕帝善之初秉忠以大明历辽金承用二百余年浸以後天未及修正而卒及江左既平帝思秉忠言遂命守敬与王恂率南北司官分掌测验推步而命文谦与枢密张易爲之主领左丞许衡参其事守敬谓历之本在於测验测验之器莫先仪表今司天浑仪乃宋皇佑中汴京所造不与此处天度相符比量南北二极约差四度於是尽考其失移置之既又以木爲重棚创简仪高表用相比覆又以天枢附极而动作候极仪极辰既位天体斯正作浑天象象虽形似莫适所用作玲珑仪以表之矩方测天之正圓莫若以圓求圓作仰仪古有经纬结而不动守敬易之作立运仪日有中道月有九行守敬一之作证理仪表高景虚罔象非真作景符月虽有明察景则难作闕几历法之验在於交会作日月食仪天有赤道轮以当之两极低昂标以指之作星晷定时仪又作正方案九表悬正仪座正仪爲四方行测者所用作仰规覆矩图异方浑盖图日出入永短图与诸仪互相参考十六年改局爲太史院以恂爲太史令守敬同知太史院事给印章立官府及奏进仪表式守敬当帝前指陈理致至於日晏帝不爲倦守敬因奏唐开元间一行令天下测景书中见者凡十三处今疆宇比唐尤大凡日月交食分数时刻不同昼夜长短不同日月星辰去天高下不同若非分方测验无以得其算帝可之遂设监候官一十四员分道而出东至高丽西极滇池南踰朱崖北尽铁勒四海测验凡二十七所十七年新历成守敬与诸臣同上奏曰臣闻帝王之事莫重於历自西汉造三统历百二十年而後是非始定东汉造四分历七十余年仪式方备又百二十一年刘洪造乾象历始悟月行有迟速又百八十年姜岌造三纪甲子历始悟以月食冲检日宿度所在又五十七年何承天造元嘉历始悟以朔望及弦皆定大小余又六十五年祖冲之造大明历始悟太阳有岁差之数极星去不动处一度余又五十二年张子信始悟日月交道有表里五星有迟疾留逆又三十三年刘焯造皇极历始悟日行有盈缩又三十五年傅仁均造戊寅元历颇采旧仪始

用定制又四十六年李淳风造麟德历以古历章部元首分度不齐始爲总法用进朔以避晦晨月见又六十三年一行造大衍历始以朔有四大三小定九服交食之异又九十四年徐昂造宣明历始悟日食有气刻时三差又百三十六年姚舜辅造纪元历始悟食甚泛余差数自是又百七十四年圣朝改治新历臣等创简仪高表凭其实测考正凡七事一曰冬至自丙子年立冬後每日测景逐日取对以冬至前後日差同者爲准得丁丑年冬至在戊戌日夜半後八刻半夏至在庚子日夜半後七十刻减大明历十八刻远近相符前後应准二曰岁余自大明历以来凡测景验气得冬至时刻真数者有六用以相距各得其时合用岁余今考验四年相符不差三曰日躔用至元丁丑四月癸酉望月食既推求日躔得冬至日躔赤道箕十度黄道箕九度有奇仍立术推算起自丁丑正月己卯十二月凡三年共得一百三十四事皆躔於箕与日食相符四曰月离自丁丑以来每日测得太阴行度前後凡十三转计五十一事又因考验交食加大明历三十刻与黄道合五曰入交自丁丑五月以来凭每日测得太阳去极度数比拟黄道去极度得月道交於黄道共得八事仍依日食法度推求皆有食分得入交时刻与大明历所差不多六曰二十八宿距度自太初历以来距度不同大明历则於度下余分附以太半少皆私意牵就今新仪细刻周天度分每度爲三十六分以距线代管窥宿度余分并依实测七曰日出入昼夜刻大明历日出入昼夜刻皆据汴京爲准与大都不同今更以本方北极出地高下黄道出入内外度立术推求爲定式所创法凡五事一曰太阳盈缩用四正定气立爲升降限二曰月行迟疾古历皆用二十八限今以万分日之八百二十分爲一限凡析爲三百三十六限三曰黄赤道差旧法以一百一度相减相乘今依算术勾股弧矢方圓斜直所容求到度率积差差率与天道脗合四曰黄赤道内外度据累年实测内外极度二十三度九十分以圓容方直矢接勾股爲法求每日去极与所测相符五曰白道交周旧法黄道变推白道以斜求斜今用立浑比量得月与赤道正交距春秋二正黄赤道正交一十四度六十六分拟以爲法推逐月每交二十八宿度分於理爲尽十九年恂卒时历虽颁然凡推步之式立成之数皆未有定稿守敬於是比次篇类整齐分秒裁爲推步七卷立成二卷历议拟稿三卷转神选择二卷上中下三历注式十二卷二十三年守敬继爲太史令遂上表奏进又有时候笈注二卷修改源流一卷其测验书有仪象法式二卷二至晷景考二十卷五星细行考五十卷古今交食考一卷新测二十八舍杂坐诸星入宿去极一卷新测无名诸星一卷月离考一卷并藏之官二十八年命守敬相视滦河泸沟诸水守敬因陈水利十有一事帝称善於是复置都水监俾守敬领之帝命丞相以下皆亲畚鍤倡工待守敬指授而後行事先是通州至大都陆运官粮方秋霖雨驴畜死者不可胜计至是皆罢之三十年帝还自上都过积水潭见舳舻蔽水大悦名曰通惠河命守敬以旧职兼提调通惠河漕运事三十一年拜昭文馆大学士知太史院事大德二年召守敬至上都议开铁幡竿渠守敬言山水频年暴下非大爲渠堰广五七十步不可执政吝於工费缩其广三分之一明年大雨渠不能容漂没人畜庐帐几犯行殿成宗谓宰臣曰郭太史神人也延佑三年卒年八十六

论曰守敬开物成务功施於千载所陈水利言未尽从然功烈赫赫若此历象之说自有专书可母録也守敬撮古今之要言约而义该故并载焉

卷四十三

钦定四库全书

史传三编卷四十三

大学士朱轼撰

名臣传三十五

元

陈天祥

陈天祥字吉甫本宁晋人兄祐仕河南遂徙洛阳少隶军籍善骑射中统三年李璘叛据济南结宋爲外援宣慰司承制以天祥爲千户屯三?口防遏南兵事平罢归居偃师南山有田百余亩躬耕读书从游者甚衆居近缙氏山因号曰缙山先生初天祥未知学祐未之奇也别数岁献所爲诗祐与语善谭乃大称异至元十一年起家从仕郎郢复州等处招讨经历十三年兴国军以籍兵器致乱行省命权知本军事天祥领军才十人入其境去城近百里止二日乃至城中父老来谒天祥谕之曰扞卫乡井诚不可无兵任事者籍之过当故致乱耳今令汝等权置兵仗以自卫何如民皆称便乃条陈其事於行省曰内无守御之资则外生窥觊之衅推此军变乱正由处置失宜凡在军中者寸铁尺杖不得在手遂使奸人得以窃发公私同被其害莫若推赤心於人与均祸福行省许之天祥凡所设施皆合衆望由是流移复业邻郡之民来归者相继天祥命以十家爲甲十甲有长弛兵禁以从民便人心既安军势稍振乃用土兵收李必聪山寨不戮一人他寨闻之各散去境内悉平时州县官吏未有俸禄天祥从便规措月给之以止其贪民用弗扰居岁余诏以本军爲路被代去天祥去未久而兴国复变邻境多应之天祥言於宣慰使贾居贞曰乌合之衆轻进易退若官军乘高据险不二三日遁逃必多然後出精兵以击之蔑不胜矣居贞从之果大败其衆初行省闻变尽执鄂州城中南人将杀之以防内应天祥曰是州之人与彼本不相接欲杀之者利其财耳力止之复遣天祥权知寿昌府事授兵二百余人爲乱者闻官军至皆依险自保天祥以衆寡不敌非可力服乃遣谕其徒使各归田里惟擒其长毛遇顺固监斩於鄂州市又擒其党十三人放令还家约三日来归狱皆如期而至爲白宣慰司纵之由是无复叛者二十一年拜监察御史时卢世荣以聚敛骤陞执政权倾一时臣僚震懾无敢言者天祥独上疏极言世荣奸恶畧曰世荣素无文艺亦无武功惟以商贩所获趋附权要由白身擢江西榷茶转运使专务贪饕所犯赃私动以万计今竟不悔前非狂悖愈甚以苛刻爲自安之策以诛求爲干进之门既怀无餍之心广蓄攘掇之计而又身当要路手握重权虽位在丞相之下朝省大政实得专之是犹以盗跖而掌阿衡之任不止流殃於当代亦恐取笑於将来夫财者土地所生民力所集天地之间岁有常数惟其取之有节是以用之不乏今世荣欲以一岁之期致十年之积危万民之命易一己之荣广邀增

美之功不恤顛连之患视民如讎爲国斂怨将见民间由此凋敝天下由此空虚若不早有更张须臾其自败正犹蠹虽除去木病亦深事至於此救将何及臣亦知阿附权要则荣宠可期违迕重臣则祸患难测正以事在国家关系不浅忧深虑切不得无言疏奏世祖召天祥与世荣至上都面质之世荣遂伏诛未几以功进秩五品擢吏部郎中迁治书侍御史命理算湖北湖南行省钱粮天祥至鄂即劾平章约苏穆尔凶暴不法时僧格窃国柄与约苏穆尔姻党相爲羽翼乃诬天祥以罪欲致之死遇赦得释二十八年擢行台侍御史未几以疾归三十年起爲燕南河北廉访使元贞元年改山东廉访使时盗贼羣起山东尤多天祥上弭盗方畧於是严督有司捕获甚衆其亡入他境者揣知所向选捕兵授方畧示以赏罚使追捕之南至汉江二千余里悉皆就擒由是东方羣盗屏息任满辞去大德三年迁河北河南廉访使以疾不起六年陞江南行台御史中丞时行省右丞刘深建议征八百媳妇内外骚动天祥上章论之以爲荒裔小邦取之不足爲利刘深欺上罔下帅兵伐之经过八番虐害居民中途变生所在皆叛深仓皇退走以致大败丧兵十八九弃地千余里朝廷发四省兵以图收复又大起丁夫运送军粮计二十余万正当农时兴此大役驱愁苦之人往回数千里军劳民扰未见休期宜上承天意下顺人心早正深罪续下明诏招彼一方自有归顺之日疏奏不报遂谢病去七年召拜集贤大学士商议中书省事八月地震河东尤甚诏问弭灾之道天祥上章极言阴阳不和天地不位皆人事失宜所致执政恶其切直抑不闻天祥被召一年未尝得见帝明年遂移疾去追之不还仁宗即位召之又不起延佑三年四月卒於家年八十追封赵国公谥文忠

论曰天祥居言路掉三寸之舌剪除大奸言听功立岂不伟哉党与相倾几?不测虽然当其抗疏殿陛之上指事陈词深切愤激惟知国事爲重岂自意其能褰旒缀披云雾折虎狼之?以苏黎元之困哉事变之流非其所虑也至於威制顽梗泽洽孤嫠军旅之事动中机宜古所谓有文武威风知大体可畏信者殆其人耶

哈喇哈逊

哈喇哈逊乌拉鼐尔氏自曾祖三世有大功哈逊爲人威重不妄言笑善骑射工国书雅重儒术至元九年世祖录功臣後命掌宿卫二十二年拜大宗正用法平允审录冤滞所活以百计二十八年拜湖广行省平章政事时江湖间盗贼出没剽掠商旅哈逊至发卒悉擒诛之水陆无梗初枢密置行院於各省分兵民爲二奸人植党自蔽後哈逊入覲极陈其不便帝因问曰风宪之职人多言其挠吏治信乎对曰朝廷设此以纠奸慝贪吏疾之妄爲谤耳帝然其言三十年从平章刘国杰征交趾戒将吏无扰民会有夺民鱼菜者杖其千户军中肃然俄有旨发湖湘富民万家屯田广西以图交趾哈逊密奏曰往年远征无功疮痍未复今又徙民瘴乡必将怨叛吏莫知其奏抱卷请署弗答再请则曰姑缓之未几报罢民皆感悦及广西元帅府请募南丹五千户屯田事上行省哈逊曰此土着之民诚爲至便内以实空地外以制交趾可不烦士卒而馈饷有余即命度地立爲五屯统以屯长给牛种农具湖南宣慰张国纪建言欲按唐宋末徵民间夏税哈逊曰亡国弊政失寬大之意圣朝其可行耶奏止之大德二年拜中书左丞相斥言利之徒以节用爱民爲务有大政事必引儒臣杂议京师久阙孔子庙国学寓他署乃奏建庙学选名儒爲学官采近臣子弟入学又集羣议建南郊爲一代定制五年云南行省左丞刘深请征八百媳妇朝议将从之哈逊曰山峽小国辽絶万里可谕之使来不足以烦

中国不听使深将以往道出湖广民疲於馈饷蛇节因民不堪举兵围深於穷谷事闻遣平章刘国杰往援乃擒蛇节斩之及至八百媳妇讫无成功士卒存者才十一二帝深以爲悔会赦有司欲贷深罪哈逊曰微名首衅丧师辱国非常罪比不诛无以谢天下深遂伏诛七年进中书右丞相尝言治道必先守令於是精加遴选定官吏赃罪十二章及丁忧婚聘盗贼等制禁献户及山泽之利每岁车驾幸上都哈逊必留守後帝弗豫制出中宫羣邪党附哈逊以身匡之天下晏然十年冬帝疾甚入侍医药出总宿卫藩王欲入者不听日理机务如故十一年春成宗崩时武宗抚军北边仁宗在怀庆诸奸谋断北道请成后垂帘听政立安西王阿南达哈逊密遣使北迎武宗南迎仁宗悉收京城百司符印封府库称疾卧阙下内旨日数至并不听文书皆不署衆欲害之未敢发及仁宗至京师有言安西王谋以三月三日僞贺仁宗千秋节因以举事者阿实克布哈言之哈逊曰先人者胜後人者败后一垂帘听政我等皆受制於人矣不若先事而起哈逊乃二日白仁宗诈称武宗遣使召安西王计事至则执送上都诛丞相阿固岱及诸同谋者仁宗以太子监国遣阿实克布哈北迎武宗武宗大悦夏五月武宗即皇帝位拜哈逊太傅录军国重事仍总百揆初仁宗之入也阿固岱有勇力人莫敢近诸王图喇实手缚之以功封越王哈逊力争之曰祖宗之制非亲王不得加一字封图喇疎属岂得以一日之功废万世之制哉不听至是图喇因譖於帝曰方安西王谋干大统哈逊亦尝署文书由是罢相出鎮北边至鎮斩爲盜者一人分遣使者賑降户出钞帛易牛羊以给之近水者教取鱼鳖爲食会大雪命诸部置传车相去各三百里凡十传转米数万石以饷饥民不足则益以牛羊又度地置仓廩积粟以待来者求古渠浚之溉田数千顷治滨海屯田教部落杂耕其间岁得米二十余万北边大治至大元年卒年五十二帝闻之惊悼曰丧我贤相赠太师顺德王谥忠献

论曰哈喇哈逊深谋鎮静以定内难古所称社稷臣也与阿实克布哈相时而动不失机会卒就大功逮武宗仁宗相继在位十数年之间疆宇清宁百度不扰定策之功也爲相数献说言斥言利之臣劝帝行寬大之政重儒臣之选一以恤民爲务可谓知大体矣

李孟

李孟字道复潞州上党人父唐历仕秦蜀因徙汉中孟敏悟倜傥有大志博学强记善论古今治乱开门授徒远近争从之至元中随父入蜀行省屡辟不就後以事至京师中书右丞杨吉丁荐於裕宗得召见东宫成宗立命访先朝圣政以备史官纪述陕西省使孟讨论编次乘驿以进时武宗仁宗皆未出阁徽仁裕圣皇后求名儒辅导或荐孟有宰相才因使爲师傅大德元年武宗抚军北方仁宗独留孟日陈善言正道多所进益仁宗侍昭献元皇后降居怀州又如官山孟常单骑以从在怀四年诚节如一左右化之皆有儒雅风由是益亲每进言曰尧舜之道孝悌而已矣今大兄在朔方大母有居外之忧殿下当迎奉意旨以娱乐之则孝悌之道皆得矣仁宗深纳其言日问安侍膳婉容愉色天下称孝焉有暇则就孟讲论古先帝王得失成败及君君臣臣父父子子之道孟特善论事忠爱恳惻深切明白厥後仁宗入清内难敬事武皇笃孝母后端拱以成太平之功文物典章号爲极盛尝握拳以示羣臣曰所重乎儒者爲其握持纲常如此其固也其讲学之功如此实孟啓之也当成宗崩安西王阿南达谋继大统成后爲之主丞相枢密同声附和与中书左丞相哈喇哈逊密使来告仁宗疑而未行孟曰支子

不嗣世祖典训也今宫车晏驾大太子远在万里宗庙社稷危疑之秋殿下当奉大母急还宫庭以折奸谋固人心不然国家安危未可保也仁宗犹未决孟复进曰若邪谋得成以一纸书召还则殿下母子且不自保矣仁宗悦曰先生之言宗庙社稷之福也乃奉太后还都时哈喇哈逊称病坚卧仁宗遣孟往问之适成后使人问疾络绎不绝孟入长揖而坐已而前诊其脉衆以爲医乃不疑之既知安西王即位有日还告曰事急矣先发制人後发者制於人不可不早图之左右皆曰皇后深居九重八玺在手四卫之士一呼而应者累万安西王府中从者如林殿下侍卫寡弱兵仗不备奋赤手而往事未必济不如静守以俟阿海至然後图之未晚也阿海者国语言兄也孟曰羣邪违弃祖训党附中宫欲立庶子天命人心必皆弗与殿下入造内庭以大义责之则知君臣之义者无不舍彼爲殿下用克清宫禁以迎大兄不亦可乎且安西王既正位号纵大太子至彼安肯退就藩国必将鬪於国中生民涂炭宗社危矣夫危身以及其亲非孝也遗祸难於大兄非悌也得时弗爲非智也临机不断无勇也仁宗曰当以卜决之命召卜人卜者至孟迎谓之曰大事待汝而决但当言其吉耳及筮遇乾三五皆九立而献卦曰是谓乾之睽乾刚也睽外也以刚处外乃定内也君子乾乾行事也飞龙在天上治也輿曳牛掣其人形且剝内兑废也厥宗噬肤往必济也大君外至明相丽也乾而不乾事乃睽也刚运善断无惑疑也孟曰筮不违人是谓大同时不可以失仁宗喜振袖而起乃上马孟及诸臣皆步从入自延春门哈喇哈逊自东掖来就之至殿廊收首谋及同恶者悉送都狱奉御玺北迎武宗中外遂定仁宗监国使孟参知政事孟久在民间备知闾阎幽隐损益庶务悉中利病远近无不悦服然以抑绝侥幸羣小多不乐孟不爲变事定乃言於仁宗曰执政大臣当自天子亲用今銮舆在道孟未见顔色诚不敢冒当重任固辞弗许遂逃去不知所之夏五月武宗即位有言於帝曰内难之初定也孟尝劝皇弟自取武宗虽察其诬弗听然仁宗亦自是不敢复言孟至大德二年仁宗爲皇太子侍内宴饮半仁宗深思戚然改容帝曰弟不乐何所思耶仁宗从容起谢曰赖天地祖宗神灵神器有归然成今日母子兄弟之欢者李道复之功爲多适有所思不自知其变於色也帝感其言即命搜访得之许昌隆山三年春正月入见武宗於玉德殿帝谓大臣曰此皇祖妣命爲朕宾师者宜速任之命入中书仁宗嗣位始眞拜平章政事谕之曰卿朕之旧学其尽心以辅朕之不及孟感知遇以国事爲已任节赐与重名爵核太官之滥费汰宿卫之冗员贵戚近臣恶其不便於已而心服其公无间言焉司空司徒太尉古之三公自大德以来封拜繁多释老二教设官统治权抗有司挠乱政事孟言人君之柄在赏与刑赏一善而天下劝罚一恶而天下惩柄乃不失所施失当不足劝惩何以爲治乃奏雪冤死者复其官荫滥冒名爵者悉夺之罢僧道官天下称快仁宗居怀时深见吏弊至是欲痛剷除之孟言曰吏亦有贤者在乎变化激厉之而已帝曰卿儒者宜与此曹气类不合而曲相护佑眞长者之言也孟在政府虽多所补益而自视常若不及尝因间请曰臣学圣人道遭遇陛下陛下尧舜之主也臣不能使天下爲尧舜之民上负陛下下负所学乞罢政权避贤路帝曰朕与卿相与终始自今其勿复言赐爵秦国公入见必赐坐语移时称其字而不名甚见尊礼令将作爲治第孟辞曰臣布衣际遇所望於陛下者非富贵之谓也悉辞不受皇庆元年请归葬其父母帝钱之曰事讫速还母久留孤朕所望及入朝帝大悦慰劳甚至每与孟论用人之方孟曰人才所出固非一途然汉唐宋金科举得人爲盛今欲兴贤能如以科举取之犹胜於多门而进惟先德行经术而後文词斯可得眞材也帝决意行之延佑二年春遂命孟知贡举及廷策进士又命爲监试官七月封韩国公已而以衰病乞解政柄归田里帝不得已改爲翰林学士承旨入侍宴闲礼遇尤厚仁宗崩英宗初立太师特们德尔以孟不附已尽收前後

封拜制命降授集贤侍讲学士度其必辞因中害之孟欣然拜命即日供职帝闻之愕然曰李道复乃俯就集贤耶顾谓特们德尔之子巴尔济苏曰尔辈谓彼不肯爲是官今定何如由是谗不得行至治九年卒赠太保进封魏国公谥文忠孟器宇闳廓材畧过人三入中书民间利害知无不言引古证今务归至当士无贵贱苟知其贤不进不已游其门者後皆知名爲文有奇气论必主於理所献纳多毁其稿皇庆延佑之世每一政之谬人必以爲特们德尔所爲一令之善必归之於孟焉

论曰元朝称治惟世祖与仁宗而世祖有廉希宪仁宗有李孟二人之出处亦同皆决策定谋於未即位之前而相与图治於既有天下之後孟之在位屡让而不居岂其有所畏避欤抑其自期者大而所规画不以自慊於心欤虽然元百年之中语治效者当以孟爲首

余阙

余阙字廷心一字天心唐古氏世家河西武威父实喇藏布官庐州遂爲庐州人少丧父授徒以养母与吴澄弟子张恒游文学日进元统元年赐进士及第授同知泗州事爲政严明宿吏皆惮之修宋辽金三史召入翰林爲修撰拜监察御史改中书吏部员外郎出爲湖广行省左右司郎中会莫徭蛮反右丞舒巴勒当帅师坚不往阙让之曰右丞受天子命爲方岳重臣不思执弓矢讨贼乃欲自逸耶舒巴勒曰如刍饷不足何阙曰右丞第往此不难致也阙下令趣之三日皆集舒巴勒行迁翰林待制金浙东廉访司事盗起河南陷郡县至正十三年授阙副使金都元帅府事分兵守安庆於是南北音问隔絶兵食俱乏抵官十日而寇至拒却之乃集有司与诸将议屯田战守计环境筑堡砦选精甲外扞而耕稼於中属县灊山八社土壤沃饶悉以爲屯明年春夏大饥人相食乃捐俸爲粥以食之所活甚衆民失业者数万咸安集之请於中书得钞三万锭以赈民陞同知副元帅又明年秋大旱爲文祭灊山神三日雨岁以不饥盗方据石荡湖出兵平之令民取湖鱼而收鱼租十五年夏大雨江涨屯田禾半没城下水涌有物吼声如雷阙祠以少牢水辄缩秋稼登得粮三万斛阙度军有余力乃浚隍增埤隍外环以人防深堑三重南引江水注之环植木爲栅城上四面起飞楼表里完固俄陞都元帅时羣盗环布四面阙居其中左提右挈屹爲江淮保障论功拜江淮行省参知政事仍守安庆通道於江右商旅四集池州赵普胜帅衆攻城连战三日败去未几又至相拒二旬始退十七年赵普胜同青军两道来攻拒战一月余竟败而走秋拜淮南行省右丞安庆倚小孤山爲藩蔽命义兵元帅胡巴延统水军戍焉十月沔阳陈友谅乘上游直捣小孤山巴延与战四日夜不胜急趣安庆贼追至山口鎮明日癸亥遂薄城下阙遣兵扼於观音桥俄饶州祝寇攻西门阙击却之乙巳贼乘东门红旗登城阙简死士力击贼复败去戊申贼并军攻东西二门又却之贼恚甚乃树栅起飞楼庚戌复来攻金鼓震地阙分诸将各以兵扞贼昼夜不得息癸卯贼益生兵攻东门丙午普胜军东门友谅军西门祝寇军南门羣盗四面蚁集外无一甲之援西门势尤急阙身当之徒步提戈爲士卒先士皆号哭止之挥戈愈力仍分麾下将督三门之兵自以孤军血战斩首无算阙亦被十余创日中城?城中火起阙知不可爲引刀自刳堕清水塘中阙妻耶布氏及子德生女福童皆赴井死同时死者守臣韩建一家城中官民相率登城楼自捐其梯曰宁俱死此誓不从贼焚死者以千计时至正十八年正月丙午也阙号令严信与下同甘苦尝疾不视事将士皆吁天求以身代当出战矢石下如雨士以盾蔽阙阙却之曰汝辈亦

有命何蔽我爲故人争用命暇时帅诸生谒郡学会讲立军士门外以听使知尊君亲上之义有古良将风烈卒时年五十六事闻赠荣禄大夫柱国追封豳国公谥忠宣阙留意经术五经皆有传注爲文有气魄能达所欲言亦工於诗篆隶皆可传初阙既死贼义之求屍塘中具棺敛葬於西门外

论曰以阙之忠勇上之不得战胜却敌收地扩土立不世之功次之不得阻扼江淮障蔽一面使贼不能咋其尺寸以固守疆宇历时经年外救不至至於身没塘水满城涂炭其时使之然也虽然阙之养民治兵皆有法度抚集流散因弱爲强向非友谅之凶锋余盗且折箠而答之矣

察罕特穆尔

察罕特穆尔字廷瑞系出北庭元初曾祖库克岱随大军收河南至祖柰曼岱父阿哩袞因家河南遂爲颍川沈丘人察罕幼笃学尝应进士举有时名身長七尺修眉覆目左颊有三毫怒则毫皆直指居常慨然有当世之志至正十一年盗发汝颍不数月江淮诸郡皆陷朝廷致讨卒无成功十二年察罕乃奋义起兵沈丘之子弟从者数百人与信阳人李思齐同设奇计袭破罗山事闻授察罕中顺大夫於是所在义士俱以兵来会得万人自成一军屯沈丘数与贼战辄克捷十五年贼势滋蔓由汴以南陷邓许嵩洛察罕兵日益盛转战而北遂戍虎牢以遏贼锋贼乃北渡盟津焚掠至覃怀河北震动察罕进战大败之余党栅河洲歼之无遗河北遂定朝廷奇其功除中书刑部侍郎苗军以荥阳叛察罕夜袭之获其衆几尽乃结营屯中牟已而淮右贼衆三十万掠汴以西来捣中牟营察罕结陈待之士卒贾勇决死战无不一当百会大风扬沙自率猛士鼓噪从中起奋击贼中坚贼遂披靡不能支弃旗鼓遁走军声大振十六年陞中书兵部尚书未几贼西陷陕州断穀函将趋秦晋知枢密院达实巴图尔方节制河南军调察罕攻之察罕即鼓行而西夜拔穀陵立栅爲城阻山带河险且固而贼转南山粟给食以坚守攻之猝不可拔察罕乃焚马矢营中如炊烟状以疑贼而夜提兵拔灵宝城守既备贼始觉不敢动即渡河平陆掠安邑蹂晋南鄙察罕追袭之以铁骑贼回扼下阳津赴水死者甚衆相持数月贼势穷皆溃以功加中奉大夫佾河北行枢密院事十七年贼出襄樊陷商州攻武关遂直趋长安至灞上分掠同华诸州三辅震恐陕西省台来告急察罕即领大衆入潼关长驱而前与贼遇战辄胜杀获以万计贼余党皆散溃走南山入兴元朝廷嘉其复关陇有大功授陕西行省左丞未几贼出自巴蜀陷秦陇据巩昌以窥凤翔察罕先分兵入守凤翔城乃遣谍者诱贼围凤翔贼果来围之数十重察罕自将铁骑驰赴昼夜行二百里去城里所分军张左右翼掩击之城中军亦开门鼓噪而出内外合击呼声动天地贼大溃自相蹂践斩首数万级伏屍百余里余寇皆遁关中悉定十八年山东贼分道犯京畿朝廷徵四方兵入卫诏察罕以兵屯涿州察罕即留兵戍清湫义谷屯潼关塞南山口以备他盗而自将锐卒赴召时曹濮贼方踰太行焚上党掠晋冀陷云中雁门代郡烽火数千里复大掠且南还察罕先遣兵伏南山阻隘而自勒重兵屯闻喜绛阳贼果走南山纵伏兵横击之贼皆弃輜重走山谷其得南还者无几乃分兵屯泽州塞碗子城屯上党塞吾儿谷屯并州塞井陘口以杜太行诸道贼屡至守将数血战击却之河东悉定於是帝乃诏察罕守御关陕晋冀抚镇汉沔荆襄便宜行事察罕益务练兵训农以平定四方爲己责是年安丰贼刘福通等陷汴梁造宫阙易正朔

号召羣盗巴蜀荆楚江淮齐鲁辽海甘肃所在兵起势相联结察罕乃北塞太行南守巩洛而自将中军军沔池会叛将周全弃覃怀入汴城合兵攻洛阳察罕下令严守备别以奇兵出宜阳而自将精骑发新安来援贼至城下见坚壁不可犯引去因追至虎牢塞成臯之险而还拜陕西行省平章政事仍兼同知枢密院事十九年察罕图复汴梁五月以大军次虎牢先发游骑南出汴南畧归亳陈蔡北出汴东战船浮於河水陆并下畧曹南据黄陵渡乃大发秦兵出函关过虎牢晋兵出太行踰黄河俱会汴城下首夺其外城察罕自将铁骑屯杏花营诸将环城而垒贼出战辄败遂婴城以守乃夜伏兵城南旦日遣苗军略城而东贼倾城出追伏兵鼓噪起邀击败之又令弱卒立栅外城以饵贼贼出争之弱卒佯走薄城西因突骑纵击悉擒其衆贼自是益不敢出八月贼计穷食且尽乃与诸将分门而攻至夜将士鼓勇登城斩关而入遂拔之刘福通奉其僞主遁去获僞后及贼妻子数万僞官五千符玺印章宝货无算全居民二十万军不敢私市不易肆不旬日河南悉定献捷京师欢声动中外以功拜河南行省平章政事兼知河南行枢密院事陕西行台御史中丞先是中原乱江南海漕不复通京师苦饥至是河南既定檄书达江浙海漕复至察罕於是以兵分鎮关陕荆襄河洛江淮而重兵屯太行营垒旌旗相望数千里乃日修车船缮兵甲务农积谷训练士卒谋大举以复山东二十一年谍知山东羣贼自相攻杀而济南田丰降於贼六月察罕遂輿疾自陕抵洛大会诸将与议师期发并州军出井陘辽沁军出邯郸泽潞军出磁州怀卫军出白马及汴洛军水陆俱下分道并进而自率铁骑建大将旗鼓渡孟津踰覃怀鼓行而东复冠州东昌八月师至盐河遣其子库库特穆尔及诸将等以精卒五万捣东平与贼兵遇两战皆败之直抵其城下察罕以田丰据山东久军民服之乃遣书諭以逆顺丰及王士诚皆降遂复东平济宁时大军犹未渡羣贼皆聚於济南出兵齐河禹城以相抗察罕分遣奇兵取间道出贼後南畧泰安迫益都北徇济阳章丘中循濒海郡邑乃自将大军渡河与贼战於分齐大败之进逼济南而齐河禹城俱降南道诸将亦报捷再败益都兵於好石桥东至海滨郡邑闻风皆送款攻围济南三月城乃下诏拜中书平章政事知河南山东行枢密院事陕西行台中丞如故察罕遂移兵围益都环城列营凡数十大治攻具百道并进贼悉力拒守复掘重堑筑长围遏南洋河以灌城中仍分守要害收辑流亡郡县户口再归职方号令焕然二十二年六月田丰王士诚阴结贼复图叛田丰之降也察罕推诚待之不疑数独入帐中及谋变乃请察罕行观营垒衆止之察罕曰吾推心待人安得人人而防之请以力士从又不许乃从轻骑行王信营及至丰营遂爲士诚所刺讞闻帝震悼朝廷公卿及四方之人不问男女老幼无不恸哭者先是有白气如索长五百余丈起危宿扫太微垣太史奏山东当大水帝曰不然山东必失一良将即驰诏戒察罕勿轻举未至已及於难诏赠左丞相封颍川王谥忠襄食邑沈丘县所在立祠岁时致祭封其父阿哩袞梁王於是复起库库特穆尔拜太尉中书平章政事知枢密院事袭总其父兵库库既领兵柄衔哀以讨贼攻城益急乃穴地通道以入十一月拔其城执其渠魁陈獠头等二百余人献阙下而取丰士诚之心以祭其父余党皆就诛即遣关保以取莒州於是山东悉平库库本察罕之甥自幼养以爲子当是时东至淄沂西踰关陕晏然无事察罕之力也

论曰是时元之疆宇西自川蜀南至交广东尽江淮羣雄争据无尺土矣独察罕特穆尔起於徒步提羣散之卒驱逐羣寇数年之间剪除殆尽举中原万里之地还之国家功岂有比哉夫非常盖世之材患不得用用矣患不得尽其才尽其才矣患不得久安以成其大功惟察罕异於是祸起於不疑身殁於竖子岂非天乎故曰枝叶未有害本实先拨当顺帝时元之本实拨

矣察罕之所治者未也如其本何哉

董抃霄

董抃霄字孟起磁州人由国子生辟陕西行台掾会大旱从侍御史郭贞谏华阴狱有李谋儿者累杀商贾至百余事狱已具有司以贿故五年不决抃霄言於贞即以尸诸市天乃大雨授四川肃政廉访司知事累官浙东宣慰副使所至理冤狱革弊政才誉懋着至正十一年除济宁路总管从江浙平章嘉珪征安丰至合肥遇贼大破之时朱臯固始之贼复猖獗军少不足以分讨有大山民砦及芍陂屯田军抃霄皆獎劳而约束之遂得障蔽朱臯官军屯朱家寺贼至追杀之乃遣谕贼中侶徠者千二百家因悉知其虚实夜缚浮桥於淝水既渡贼始觉贼衆数万据礪南官军渡者辄爲所败抃霄麾骑士别渡浅滩袭贼後贼回东南向迎敌抃霄忽跃马渡礪扬言曰贼已败矣诸军皆渡一鼓而击之贼大败遂复安丰十二年命抃霄援江南遂渡江至德清县徽饶贼已?杭州诸将问计抃霄曰贼见杭州子女玉帛必纵恣不暇爲备宜急攻之若退保湖州贼乘锐直趋京口则江南不可爲矣诸将难之抃霄正色曰江浙既陷於贼今可取而不可取谁任其咎因按剑曰诸君荷国厚恩敢有慢令者斩遂进兵贼迎敌至盐桥抃霄麾壮士突前诸军相继夹击之凡七战追至清河坊贼奔接待寺塞其门而焚之遂复杭州余杭诸县次第皆平徽饶贼复自昱岭关寇於潜行省乃假抃霄参知政事俾讨之抃霄曰必欲除残去暴所不敢辞若假以重爵则不敢受即日引兵至临安新溪是爲入杭要路既分兵守之始进至叫口及虎槛遇贼皆大破之追至於潜复其县治又复昌化县及昱岭关遂进兵复千秋关乘胜复安吉七战克之贼徒降者数百人既数日贼帅梅元亦降复有别帅十一人者欲降抃霄使偏将余思忠谕之贼入暗室潜议思忠以火投室内拔剑叱曰元帅命我来活汝汝复何议已而火起焚其砦叱贼党散去而引贼帅来降明日进兵广德克之蕲贼与饶池诸贼复犯徽州贼中有道士能作十二里雾抃霄以兵击之已而妖雾开豁伏兵起袭贼後贼大乱斩首数万擒千余人获道士焚其妖书而斩之遂平徽州十四年除水军都万户俄陞枢密院判官从丞相托克托征高邮分戍盐城平兴化贼巢十有二处即其地筑芙蓉砦贼入辄迷故道爲官军所杀自是不敢复犯贼恃习水渡淮北据安东州抃霄招善水者五百人与贼战於太湖大败之遂复安东十六年剿平北沙庙湾沙浦等砦朝廷嘉其功陞同佥淮南行枢密院事抃霄建议於朝曰淮安爲南北襟喉江淮要冲其地一失两淮皆未易复则救援淮安诚爲今日急务莫若於黄河上下并濒淮海之地南自沐阳北抵沂莒赣榆诸州县布连珠营每三十里设一总砦就三十里中又设一小砦使斥堠烽燧相望而巡逻往来遇贼则并力野战无事则屯种而食然後进有援退有守此善战者所以常爲不可胜以待敌之可胜也又海宁一境不通舟楫军粮惟可陆运凡濒淮海之地人民屡经盗贼宜加存抚权令军人搬运其陆运之方每人行十步三十六人可行一里三百六十人可行十里三千六百人可行百里每人负米四斗以夹布囊盛之用印封识人不息肩米不着地排列成行日行五百回计路二十八里轻行一十四里重行一十四里日可运米二百石每运给米一升可供二万人此百里一日运粮之术也又江淮流移之民并安东海宁沭阳赣榆等州县俱废其民牡者既爲军老弱无所依归者宜设置军民防御司择军官材堪牧守者使居其职而籍其民以屯故地於是练兵积谷且耕且战内全山东完固之邦外御淮海出没之寇而後恢复可图也十七年毛贵陷益都般阳等路命抃霄从知枢密院事布朗吉达讨之而济南又告急抃霄乃提兵援济南

贼衆自南山攻济南望之两山皆赤抔霄按兵城中先以数十骑挑之贼衆悉来鬪骑兵少却至礪上伏兵起遂合战城中兵又大出大破之而般阳贼复约泰安之党踰南山来袭济南抔霄列兵城上弗爲动贼夜攻南门独以矢石御之黎明乃默开东门放兵出贼後既旦城上兵皆下大开南门合击之贼败走复追杀之贼几无遗於是济南始宁诏就陞淮南行枢密院副使兼山东宣慰使都元帅有疾其功者潜於总兵太尉努都尔噶令抔霄依前诏从布朗吉达征益都抔霄即出济南请以弟昂霄代领其衆朝廷从之授昂霄淮南行枢密院判官未几命抔霄守河间之长芦十八年抔霄以兵北行乃曰我去济南必不可保既而济南果陷抔霄方驻兵魏家庄有诏拜抔霄河南行省右丞甫拜命毛贵兵至而营垒犹未完诸将曰贼至当如何抔霄曰我受命至此当以死报国耳因拔剑督兵以战贼衆突至抔霄前刺杀之无血惟见白气冲天是日昂霄亦死事闻赠荣禄大夫河南行省平章政事追封魏国公谥忠定昂霄赠嘉议大夫礼部尚书追封陇西郡侯谥忠毅抔霄早以儒生起家辄爲能吏会天下大乱乃复以武功自奋其才畧有大过人者当时用之不尽其才君子惜之论曰抔霄文足以修政养民武足以诘兵御寇而在朝者措置乖方使之进退失据不获有所施爲此与宋孟珙之末年何异是时元之臣子能保邦固圉者在北惟察罕特穆尔在南惟抔霄而皆变起仓卒没於非命可谓人之云亡邦国殄瘁者矣是以古之有国家者养材於无事之时而调护剂酌以用之有事之日不使有不虞之患以误大事其爲此也夫

史传三编卷四十三

卷四十四

<史部,传记类,总录之属,史传三编

钦定四库全书

史传三编卷四十四

大学士朱轼撰

名臣续传一

汉

鍾离意

鍾离意字子阿会稽山陰人也少为部督邮时部县亭长有受人酒礼者府下记案考之意封还记入言于太守曰政化由近及远宜先清府内且濶略远县细微之愆太守甚贤之遂任以县事建武十四年会稽大疫死者万数意独身自隐亲经给鑿药所部多蒙全济举孝廉再迁辟大司徒侯霸府诏部送徒诣河内时冬寒徒病不能行路过弘农意辄移属县使作徒衣县不得已与之而上书言状意亦具以闻光武得奏以见霸曰君所使掾何乃仁于用心诚良吏也意遂于道解徒桎梏恣所欲过与尅期俱至无或违者还以病免後除瑕丘令吏有檀建者盗窃县内意屏人问状建叩头服罪不忍加刑遣令长休建父闻之为建设酒谓曰吾闻无道之君则以刃残人有道之君以义行诛子罪命也遂令建进药而死二十五年迁堂邑令轻刑慎罚拊循百姓如赤子初到县市无屋意出俸钱帅人作屋人齎茅竹或持材木争起趋作决日而成工作既毕为解土祝曰兴工役者令百姓无事如有祸祟令自当之人皆悦服时县人防广为父报仇击狱其母病死广哭泣不食意怜伤之乃听广归家使得殡殓丞掾皆争意曰罪自我归义不累下广歛母讫果还入狱意密以状闻广竟得以减死论显宗即位徵为尚书时交趾太守张恢坐赃千金徵还伏法以资物簿入大司农诏班赐羣臣意得珠玕悉以委地而不拜帝怪问对曰臣闻孔子忍渴于盗泉曾参回车于胜母恶其名也此赃秽之宝诚不敢拜帝嗟叹曰清乎尚书之言乃更赐库钱三十万转尚书仆射车驾数幸广成苑意以为从禽废政常当车陈谏天子即时还宫永平三年夏旱而大起北宫意诣阙免冠上疏曰昔成汤遭旱以六事自责窃见北宫大作人失农时此所谓宫室崇也自古非苦宫室小狭但患民不安宁宜且罢止以应天心帝策诏报曰汤引六事咎在一人其冠履勿谢又敕大匠止作诸宫减省不急诏因谢公卿百僚遂应时澍雨焉时青州刺史琅邪王望行部见饥者裸行草食因以便宜出所在布粟赈之事毕上言帝以望不先表请为罪公卿皆言望专命法有常条意独曰望怀义忘罪当仁不让若绳之以法忽其本情将乖圣朝爱育之意帝嘉意见望得不罪望与楚国刘旷东莱王扶皆意前所荐诸朝者也时有诏赐降人缣尚书案事误以十为百帝见

司农上簿大怒召郎将答之意因入叩头曰过误人所时有若以懈慢为愆则臣位大罪重当先坐乃解衣就格帝使复冠而贯郎会连有变异意复上疏曰陛下畏敬鬼神忧恤黎元而天气不和咎在羣臣不能宣化理职而以苛刻为俗吏百官无相亲之心吏人无雍雍之志至于骨肉相残感逆和气以致天灾百姓可以德胜难以力服鹿鸣之诗必言燕乐者以人神之心洽然後天气和也愿垂圣德缓刑罚顺时气以调陰阳帝虽不能用然知其至诚亦以此故不得久留出为鲁相後德阳殿成百官大会帝思意言谓公卿曰鍾离尚书若在此殿不立意视事五年以爱利为化人多殷富以久病卒官遣言上书陈升平之世难以急化宜少寬假帝感伤其意下诏嗟叹赐钱三十万帝性褊察好以耳目隐发为明公卿数被诋毁尚书以下至见提拽常以事怒郎药崧自以杖撞之朝廷莫不悚栗争为严切以避诛责唯意独敢谏争数封还诏书臣下过失辄救解稟性峭直居心寬厚故为东京名臣云

论曰语有之水至清则无鱼人至察则无徒昔周公教成王明作有功而即继之以惇大成裕明作而不惇大朝野上下如束湿薪曾无尺寸有余之地以托命所谓和平之福者安在乎鍾离之于显宗敷陈正直随事补救可谓深切而着明者矣时有寒朗者亦能触威犯顏辨明无辜感悟帝意此皆所谓仁人之言其利溥者後汉书以朗与意合传有以哉

左雄 周举 黄琼

左雄字伯豪南郡涅阳人也安帝时举孝廉稍迁冀州刺史州部多豪族好请托雄常闭门不与交通奏案贪猾二千石无所回忌永建初徵拜议郎时顺帝新立大臣懈怠朝多缺政雄数上封事其词深切尚书仆射虞诩以雄有公忠节上疏荐之曰臣见方今公卿以下类皆拱默以树恩为贤尽节为愚至相戒曰白璧不可为容容多後福伏见议郎左雄数上封事至引陛下身遭难厄以为警戒实有王臣蹇蹇之节宜擢在?舌之官由是拜尚书再迁尚书令上疏陈事曰臣闻宁人之务莫重用贤用贤之道必存考黜大汉受命克慎庶官至于文景天下康乂宣帝知时所病刺史守相辄亲引见叹曰民所以安而无怨者政平吏良也与我共此者其惟良二千石乎以为吏叹变易则下不安业久于其事则民服教化其有政理者辄以玺书勉励增秩赐金或爵至关内侯公卿缺则以次用之是以吏称其职人安其业汉时良吏于兹为盛今典百里转动无常各怀一切莫虑长久谓聚歛整办为贤能以治已安民为劣弱监司项背相望与同疾疢观政于亭传责成于期月虚诞者获誉拘检者离毁或因罪戾引高求名州宰不覆竟共辟召又或因捕案亡命会赦行赂复见洗涤使奸猾枉濫轻忽去就乡官部吏职贱禄薄拜除如流送迎烦费损政伤民和气未协灾眚不消咎皆在此臣愚以为守相长吏有显效者可就增秩勿移徙非父母丧不得去官若被劾奏亡不就法者徙家边郡其乡部亲民之吏皆用儒生清白任从政者寬其负算增其秩禄吏职满岁乃得辟举如此虚伪之端絕迎送之役损率土之民各宁其所帝以雄言皆明达政体诏悉施行而宦竖擅权终不能用三年京师汉阳地震裂水泉涌出四年司冀复有大水雄推较灾异以为下人有逆上之徵疏言宜密备不虞寻而青冀扬州贼发海内扰乱後经赦贼虽稍解官犹无备流叛之余数月复起雄以为宜及其尚微开令改悔若告党与者除罪能诛斩者明加其赏书奏不省雄又上言自今孝廉年不满四十不得察举皆先诣公府诸生试家法文吏课牋奏副之端门练其虚实有不承科令者正其罪若有茂材异等自可不拘年齿诏从其奏雄亦公直精明能审覆真伪决志行

之自是牧守畏栗莫敢轻举迄于永熹察选清平多得其人又奏称海内名儒为博士使公卿子弟为诸生有志操者加其俸禄汝南谢廉河南赵建年十二能通经雄并奏拜童子郎于是负书来学云集京师初帝之复立乳母宋娥与孙程等与其谋诏封娥山阳君又封大将军梁商子冀为襄邑侯雄上言高皇帝约非有功不侯不宜追录小恩亏失大典帝不听雄复谏曰案尚书故事无乳母爵邑之制唯先帝时阿母王圣为野王君圣造生谗贼废立之祸生为天下所咀嚼死为海内所欢快今阿母躬蹈俭约以身率下而与王圣同爵号惧违本操梁冀之封事非机急宜过灾厄之运然後平议可否于是商让还冀封会复有地震之异雄复上疏曰先帝封野王君汉阳地震今封山阳君而京城复震专政在陰其灾尤大今冀已高让山阳君亦宜崇其本节雄言切至娥亦畏惧辞让而帝卒封之後阿母遂以交遭失爵是时大司农刘据以职事被谴召诣尚书传呼促步又加以捶扑雄上言九卿大臣行有佩玉之节动有庠序之仪孝明皇帝始有扑罚皆非古典帝从而改之自雄掌纳言多所肃迁司隶校尉初雄荐周举为尚书及在司隶又举故冀州刺史冯直任将帅而直尝坐赃受罪举以此劾奏雄雄言诏书使选武猛不使选清高举曰诏书使君选武猛不使君选贪污也雄悦而谢曰吾尝事冯直之父而又与直善今宣光以此奏吾乃是违厥之举也由是天下服焉永和三年卒周举字宣光汝南汝阳人祖父扬少孤微常修逆旅以供过客而不受其报父防以明经举孝廉撰尚书杂记补博士终陈留太守举姿貌短陋而博洽为儒者宗京师为之语曰五经纵横周宣光初辟司徒李合府宦者孙程等既立顺帝诛灭诸阎议者以为阎太后与帝无母子恩宜徙别馆絶朝见举谓合曰太后幽在离宫若悲愁生疾一旦不虞主上将何以令于天下公宜密表请率羣臣朝太后以答人望合即上疏帝从之太后意乃安後举茂才为平丘令上书言得失词甚切正尚书郭?应贺等见之太息共称举忠直欲帝置章御坐以为规诫稍迁并州刺史太原旧俗以介子推焚骸至其亡月神不乐举火由是每冬辄一月寒食老小不堪岁多死者举到州乃作书置子推庙言盛冬去火残损民命非贤者之意以宣示愚民使还温食俗乃渐革转冀州刺史阳嘉三年以左雄荐拜尚书与仆射黄琼同心辅政名重朝廷左右惮之是岁河南三辅大旱天子亲露坐德阳殿东厢请雨诏问举以消变之术举对曰臣闻陰阳闭隔则二气否塞风雨不时水旱成灾陛下废文帝光武之法而循亡秦奢侈之欲内积怨女外有旷夫自枯旱以来弥历年岁未闻陛下改过之效徒劳至尊露坐风尘诚无益也宜出後宫不御之女除太官重膳之费五品不训责在司徒有非其位急宜黜斥惟留神裁察因召见举及仆射黄琼等举等并对以为宜慎官人去斥贪污离远佞邪循文帝之俭遵孝明之教则时雨必应帝曰百官贪佞者为谁乎举独对曰臣从下州超备机密不足以别羣臣然公卿大臣数有直言者忠贞也阿谀苟容者佞邪也司徒视事六年未闻有忠言异谋愚心在此帝乃以事免司徒刘崎迁举司隶校尉永和元年灾异数见诏召公卿中二千石尚书诣显亲殿引金縢反风事谓北乡侯亲为天子葬以王礼故数有灾异宜加尊諡列于昭穆羣臣议者多谓宜如诏旨举独对曰昔周公有请命之应隆太平之功故皇天动威以章圣德北乡侯本非正统奸臣所立立不踰岁年号未改皇天不佑大命夭昏春秋王子猛不称崩鲁子野不书葬今北乡侯无他功德以王礼葬之于事已崇不宜称諡灾眚之来弗由此也于是司徒黄尚等七十人同举议帝从之出为蜀郡太守以事免大将军梁商表为从事中郎甚敬重焉六年三月上巳商讌宾客于洛水酒阑继以?露之歌坐中皆为掩涕举初称疾不往後闻之叹曰此所谓哀乐失时非其所也殃将及乎商至秋果卒病笃时帝问以遗言对曰臣从事中郎周举清高忠正可重任也由是拜举谏议大夫时屡有灾异帝召举于显亲殿问以灾眚举对曰陛下初立遵修旧典

兴化致政远近肃然顷年以来稍违于前朝多宠幸禄不序德观天察人诚可危惧书曰僭恒阳若夫僭差无度则言不从而下不正阳无以制则上扰下竭宜密严飭州郡察强宗大奸以时禽讨其後江淮猾贼并如举所陈时诏遣八使巡行风俗皆选素有威望者乃拜举为侍中与杜乔张纲等分行郡国天下号曰八俊举于是劾奏贪猾表荐公清朝廷称之迁河内太守徵为大鸿胪及梁太后临朝以殇帝幼崩庙次宜在顺帝下谏议大夫吕勃以为宜先殇帝诏下公卿举议曰春秋鲁闵公无子庶兄僖公代立其子文公遂跻僖于闵上孔子讥之书曰有事于太庙跻僖公传曰逆祀也及定公正其序经曰从祀先公为万世法也殇帝在先于秩为父顺帝在後于亲为子序不可乱诏从之迁光禄大夫建和三年卒朝廷方欲以为宰相深痛惜之诏汝南太守其令将大夫以下到丧发日会吊加赐钱十万子颺以举任为郎自免归时梁冀贵盛被其徵命者莫敢不应唯颺前後三辟竟不能屈

黄琼字世英江夏安陆人父香年九岁以至孝称尤博学能文京师号曰江夏黄童天下无双为尚书郎数陈得失常独止宿台上昼夜不离省闕累迁魏郡太守郡旧有园田岁收谷数千斛香曰食禄者不与民争利乃悉以赋人年饥分禄赐颁赡贫者由是富家争出谷助廩荒民获全琼初以父任为太子舍人辞病不就遭父忧服闕五府俱辟连年不应永建中公卿交荐公车徵至纶氏称疾不进有司劾不敬诏下县以礼慰遣遂不得已先是徵聘处士多不称望李固素慕琼乃遗书曰闻已度伊洛将顺王命自生民以来善政少而乱俗多必待尧舜之君此为志士终无时矣语曰嶢嶢者易缺皦皦者易污盛名之下其实难副近鲁阳樊君被徵初至朝廷设坛席犹待神明虽无大异而言行所守亦无所缺而毁谤布流应时折减者岂非观听望深声名太盛乎是故俗论皆言处士纯盗虚声愿先生宏此远谟一雪斯言耳琼至即拜议郎稍迁尚书仆射初琼随父在台阁习见故事及後居职达练官曹争议朝堂莫能抗夺时连有灾异琼疏请顺帝数见公卿察问得失使近臣儒者参考政事诸无功德者宜皆斥黜又荐处士黄错任棠等宜更引致助崇大化于是有诏公车徵错等三年大旱琼复疏言宜顾省闕政息除烦费勅近臣使遵法度又囚徒尚积多致死亡亦足以感伤和气书奏引见德阳殿使中常侍以属主者施行琼又请行畊籍礼帝从之迁尚书令琼以前左?所上孝廉之选专用儒学文吏于取士之义犹有所遗乃奏增孝弟及能从政者为四科事竟施行又雄前议举吏先试之于公府又覆之于端门後尚书奏除此科琼复上言覆试之作将以覆实虚滥不宜改革帝乃止出为魏郡太守稍迁太常和平中以选入侍讲禁中元嘉元年拜司空桓帝欲褒崇大将军梁冀使朝臣议其礼胡广等咸称冀勋德赏赉宜比周公琼独建议不可冀意以为恨会以地动策免永兴元年拜司徒迁太尉梁冀前後所托辟召一无所用延熹元年以日食免冀诛胡广等坐阿附免废复拜琼为太尉以师傅恩而不阿梁氏封为祁乡侯琼辞让至六七上言旨恳惻乃许之自梁冀诛後天下想望异政琼首居公位辟汝南范滂为掾举奏州郡贪污至死徙者十余人海内由是翕然寻以五侯擅权自度力不能匡遂称疾不起及疾笃上疏谏曰臣闻天者务刚其气君者务强其政陛下即位以来未有胜政诸梁秉权宦竖充朝卿校牧守皆出其门羽革珠金殷满其室塞陛下耳目之明更为聒瞽之主李固杜乔念国忘身遂见残灭李云杜衆以忠获罪天下尤痛朝野之人以忠为讳尚书周永素事梁冀又黄门羣辈自冀兴盛共构奸轨临冀当诛复记其恶以要爵赏陛下不审别真伪复与忠臣并时显封四方闻之莫不愤叹臣身轻位重勤不补过敢以垂絶之日陈不讳之言庶有万分无恨三泉其年卒时年七十九諡曰忠孙琬少而辩慧琼在魏郡上日食状诏问所食多少琼未知所对琬

在傍曰何不言日食之余如月之初琬大奇之即如言应诏琬初为五官中郎将与陈蕃同心显用志士权富子弟因中伤之废居二十载後出牧豫州政绩为天下冠献帝朝拜太尉与王允同谋诛董卓卓将李傕郭汜破长安收琬下狱死

论曰左雄请立孝廉限年课试之法既乖初意其诘徐淑曰顔回闻一知十孝廉闻一知几尤无理取办及後黄琬以雄专用文学儒吏复增孝悌从政为四科而孝廉之选终不及西京自古有治人无治法苟奉法非人则立法而弊旋生不清其源徒塞其流可乎举以顺帝远徙孙程等说朱伥急表留之或讥其谬然程等虽宦竖犹能纠张防之恶而白虞诩之忠且上殿诃叱左右未为大过以事体揆之但使册封十九人时力言其非制劝帝酬以金帛庶几上不亏国体下不负臣功惜当时公卿未有能持此议者耳要之举与雄其立朝謇谔固不愧古之遗直也琬素负盛名在左周上及位台辅梁冀凶暴不闻请诛李云杜衆谏死不见申救至五侯擅权又苦力不能?而称疾仲长统所讥汉至中世其三公皆取清慤谨慎循常习故者正谓此此果可以雪处士虚声之谤乎然冀盛而请托不行冀诛而封爵不拜临终一疏尤指斥无隐其所挟持固远出胡广赵戒上也琬就董卓徵及议迁都不合与杨彪惶恐谢罪不如乃祖已甚周颙守志不屈有光于父矣

种暠

种暠字景伯河南洛阳人仲山甫之後也父为定陶令有财三十万父卒暠悉以赈恤宗族及邑里之贫者其有进趣名利皆不与交通始为县门下乡吏时河南尹田歆外甥王湛名知人歆谓之曰今当举孝廉多得贵戚书命欲自用一名士报国家汝助我求之明日湛送客于大阳郭遥见暠异之还白歆曰为尹得孝廉矣近洛阳门下吏也歆笑曰当得山泽隐滞近洛阳吏耶湛曰山泽不必有异士异士不必在山泽歆即召暠于庭辩诘职事暠词对有序歆甚知之召署主簿遂举孝廉辟太尉府举高第顺帝末为侍御史时所遣八使光禄大夫杜乔周举等多所纠奏而大将军梁冀及诸宦官互为请赦事皆被寝遏暠自以职主刺举志案奸违乃复劾诸为八使所举蜀郡太守刘宣等罪恶章露宜伏欧刀又奏请敕四府条举近臣父兄及知亲为刺史二千石尤残秽不胜任者免遣案罪帝乃从之擢暠监太子于承光宫中常侍高梵从中单驾出迎太子时太傅杜乔等疑不欲从而未决暠乃手剑当车曰太子国之储副人命所系今常侍来无诏信何以知非奸耶今日有死而已梵辞屈不敢对驰还奏之诏报太子乃得去乔退而叹息愧暠临事不惑帝亦嘉其持重称善者良久出为益州刺史暠素慷慨好立功名在职三年宣恩远夷开晓殊俗岷山杂落皆怀服汉德其白狼盘木诸国自前刺史朱辅卒後遂絶暠至乃复举踵向化性刚介不媚权幸时蜀郡太守因计吏赂遗中常侍曹腾暠于斜谷关搜得其书上奏太守并劾腾又永昌太守冶铸黄金为文蛇以献梁冀暠纠发逮捕即驰传上言其後腾初不为纖介常称暠能吏而冀由是衔怒于暠会巴郡人服直聚党自称天王暠与太守应承讨捕不克吏人多被杀伤冀因此?之传逮暠承太尉李固疏救梁太后省奏赦其罪免官而已後梁州羌动以暠为梁州刺史甚得百姓欢心被徵当迁吏人诣阙请留之太后叹曰未闻刺史得人心若是乃许之暠复留一年迁汉阳太守戎夷男女送至汉阳界暠与相揖谢千里不得乘车及到郡化行诸羌禁止侵掠迁使匈奴中郎将时辽东乌桓反畔复转辽东太守乌桓望风率服迎拜于界上坐事免归徵拜议郎迁南郡太守入为尚书会匈奴

寇并凉二州桓帝擢嵩为度辽将军嵩到营所先宣恩信不服然後加讨诸羌先时有获质于郡县者悉遣还之诚心怀拊信赏分明由是诸羌龟兹莎车乌孙等皆来顺服嵩乃去烽燧除候望边方晏然无警入为大司农延熹四年迁司徒与太尉刘矩司空黄琼同心辅政推达名臣桥玄皇甫规等为称职在位三年年六十一卒并凉边人咸为发哀匈奴闻嵩卒举国伤惜单于每入朝贺望见坟墓辄哭泣祭祀子拂初平元年为司空李郭乱长安百官多避兵冲拂挥剑而出曰为国大臣不能止戈除暴致贼兵向宫去欲何之遂战死拂子劭时拜益凉二州刺史闻难竟不之职服阕徵辟皆不就曰吾父以身殉国吾为臣子不能除残复怨何面目朝覲明主哉遂与左中郎刘范谏议大夫马宇等共攻?汜以报其仇兵败见害

论曰求忠臣必于孝子之门嵩父为令至拥赀三十万其所从来殆未可知嵩积而能散周而不继可谓能弛其父之过矣筮仕後在言路则纠劾不避权贵在宫府则持重得大体在州郡边塞则恩使人怀义使人服及登台辅推贤进达以利国家为人臣子若此固宜子复死忠孙复死孝世济其无穷之休乎嵩威信尤着诸羌前接马援邓训後后张奂皇甫规使汉尽得嵩等以拊循异域岂至末年戎马蹂躪若彼哉夫国不患无可才之患有才而沉沦于无用当嵩为门下吏时逐队进退其交臂失之者不知凡几王湛遥见遂定为异士士伸于知己此盐车之驥所为向伯乐而涔涔泪下也

张嶷

张嶷字伯岐巴西郡南充国人弱冠有通壮之节为县功曹先主定蜀时山寇攻县县长捐家逃亡嶷冒白刃携负县长之家以免由是显名州召为从事建兴五年丞相亮北驻汉中山贼张慕等钞盗军资劫畧吏民嶷以都尉讨之嶷度贼鸟散难以战禽乃诈与和克期置酒酒酣嶷因斩慕等五十余级渠帅悉殄旬日清泰後得疾数年既愈拜牙门将属马忠北讨汶山叛羌南平四郡蛮夷辄有筹画战克之功初越嶲郡自丞相亮讨高定之後叟夷数反杀太守龚禄焦璜是後太守不敢之郡侨驻安定去郡八百余里郡徒有名而已时论欲复旧郡除嶷为越嶲太守嶷之郡诱以恩信蛮夷稍稍降附北徼捉马最骁劲不承节度嶷乃往讨生缚其帅魏狼又纵使招怀余类种落三千余户皆安土供职嶷表狼为邑侯诸种闻之多渐降服嶷以功赐爵关内侯苏祁邑君冬逢及弟隗渠等已降复反嶷诛逢逢妻旄牛王女嶷以计原之而渠逃入西徼渠刚猛捷悍为诸种深所畏惮遣所亲二人诈降嶷觉之许以重赏使为反间二人遂合谋杀渠渠死诸种皆安嶷始至时郡郭颓坏更筑小坞及在官三年徙还故郡缮治城郭夷种男女莫不致力定葭台登卑水三县去郡三百余里出盐铁及漆久为夷徼占据嶷又取之署置长吏定葭帅豪狼岑忿嶷见侵不来诣嶷使壮士数十直往收致搃而杀之持尸还种喻以狼岑之恶且曰无妄动动即殄矣种类咸面缚谢过嶷杀牛飧宴重申恩信遂获盐铁器用周贍旄牛种类四千余户其帅狼路欲为姑婿冬逢报怨遣叔父离将逢衆相度形势嶷遣亲近賁牛酒迎赐又令逢妻逆之逢妻离之姊也离既受赐并见其姊姊弟欢悦悉率所领诣嶷嶷厚加赏待遣还旄牛由是辄不为患郡有旧道经旄牛中至成都既平且近自旄牛絶道已百余年更由安上既险且远嶷遣左右賁货币赐路重令路姑喻意路乃率兄弟妻子悉诣嶷嶷与盟誓开通旧道千里肃清复古亭驿奏封路为旄牛?毗王遣使将路朝贡後主于是加嶷抚戎将军领郡如故嶷初见费禕为大将军恣性泛爱待信新附太过书戒之引岑彭来

歙以为鉴後禕果为魏降人郭修所害吴太傅诸葛恪既破魏军遂大兴兵衆以图攻取侍中诸葛瞻丞相亮之子恪从弟也嶷与书曰以周公之才犹有管蔡流言之变霍光受任亦有燕盖上官逆乱之谋今太傅离少主履敌庭恐非良计自非郎君进忠言于太傅谁复有尽言者旋军广农务行德惠数年之後东西并举实为不晚恪竟以此夷族其识见多此类在郡十五年乞还徵诣成都夷民恋慕扶穀涕泣过旄牛襁负来迎或追至蜀郡界其督帅随嶷朝贡者百余人嶷慷慨壮烈士人多贵之既至拜荡寇将军嶷故有风湿疾至是寝笃杖然後能起会魏狄道长李简密请降卫将军姜维将出陇西嶷力疾请行临发辞後主曰臣受恩过量加以疾病在身常恐一朝殒歿辜负荣遇天不违愿得预戎事若凉州克定臣为藩表如有未捷杀身以报後帝慨然为之流涕既到狄道与魏将徐质交锋临阵陨身然所杀伤亦过倍越禺民夷闻嶷死无不悲泣为立庙四时水旱辄祀之

论曰自诸葛武侯纳马谡攻心之言克定南中官其俊杰出所有畊牛战马金银犀革充继军资国以富强北伐遂无内顾固亮之诒谋使然然当时则李恢克奋战力吕凯王佐率属忠诚及亮身後马忠张嶷复相继懋着威信故能使诸蛮怀德畏刑历数十年朝贡如一日嶷服勤最久在季兴名将中其识断明果尤为杰出者也夫羌蛮诸种落风尚固殊而好善恶恶趋利避害之心则一惟在因势而利导之固不容执古御今亦非可推此例彼西汉赵充国当先零开之叛或攻或否于攻之中又或战或屯迄于灵帝羌戎内讧皇甫规张奂多用恩信招纳段熲一以兵力禽讨然并有成功何者因利乘便期于适吾事而已若乃当日南中事势不可同年而语前此但羁縻使不为寇今则欲署置郡县因其所出为军国储且幅一统虽沿边骚动未有肘腋腹心之虞今逼近内服一或生事国受其敝而外寇乘之是故网宜疎不宜密又不得托言大度使远近之情隔而莫通力宜缓不宜急又不得示弱使骄悍之族狡而观衅机宜静不宜动又不得蹈故偷安使功名之会一失而不复挽恩而济之以威信而通之以变求服其情不苛其礼亦享其贄不贪其财又时取彼中豪率之黠者示之赏罚使帖然服从则种落不令而应昔马援洞悉陇羌骆越之情形所至难消衅解今张嶷规画越禺十余年致为近之史称嶷慷慨壮烈殆亦闻援风而兴起者观其临发狄道一表即据鞍顾盼曾不是过可谓烈士暮年壮心不已矣援诫王磐吕冲霄料费禕诸葛恪识鉴尤相类彼胸负智略若此即柄国政不难而仅仅出其余力以绥靖蛮荒固宜树勋于生前遗爱于死後也由四相而下若嶷之于蜀顾可多得乎哉

卷四十五

钦定四库全书

史传三编卷四十五

大学士朱轼撰

名臣续传二

附魏

范粲

范粲字承明陈留外黄人为人高亮贞正博涉强记学皆可师远近请益者甚衆性不矜庄而见之皆肃如州府交辟不就久之乃应命为治中转别驾辟太尉掾尚书郎出为征西司马所历皆有声称迁武威太守到郡选良吏立学校劝农桑郡壤富实珍玩充积粲检制之息其华侈是时疆场多警粲明设防备敌不敢犯西域流通以母老去官郡既重镇而粲辄委去朝廷尤之左迁乐涑令顷之转太宰从事中郎遭母忧以至孝称服阙复为太宰中郎齐王芳被废迁于金墉城粲素服拜送哀动左右时司马师辅政召羣臣会议粲又不至师以其时望容之粲遂称疾阖门不出于是特诏为侍中持节使於雍州粲因阳狂不言寝所乘车足不履地子孙恒侍左右有婚宦大事辄密谘请合则色无变不合则眠寝不安妻子以此知其旨至晋泰始中粲同郡孙和表粲操行高洁请舆致京师赐医药若遂疗除必有益于政乃诏郡县给医药以二千石禄养病加赐帛百匹子乔以父疾笃辞不受诏不许太康六年卒年八十四不言三十六载终于所寝之车

论曰魏无名臣夫名臣以节为先当曹丕之际皆汉臣而忠于曹者也及髦奂之际则魏臣而心乎司马氏者也是故贤杰若荀彧而不免有附曹之讥孝友若王祥才智若卫瓘而不免有仕晋之失中间如陈泰辈颇号持平亦不免为司马氏所用其协规同力以平诸葛诞等犹韦孝寛之平尉迟迥不免成隋文之篡独范粲位不至大僚其吏道足称其臣节甚着至寝于所乘之车三十六载可谓严且苦矣粲本恶司马未尝仕晋史氏乃编为晋臣大违其素志故特表之以愧魏初魏末之忠於曹氏司马氏者

附吴

周瑜

周瑜字公瑾庐江舒人也从祖父景素着忠正为豫州刺史好士常恐不及辟陈蕃为别驾李

膺杜密为从事皆天下英俊延熹六年拜司空与杨秉举奏诸奸猾遂连及中常侍侯览贝瑗皆坐黜朝廷莫不称之进太尉父异洛阳令瑜长壮有姿貌初孙坚徙家于舒坚子策与瑜同年独相友善瑜推道南大宅以舍策升堂拜母有无通共瑜从父尚为丹阳太守瑜往省之会策将东渡驰书报瑜瑜将兵迎策策大喜曰吾得卿谐也遂从策策既定曲阿走刘繇因谓瑜曰吾以此衆取吴会已足卿还镇丹阳瑜还顷之袁术遣其从弟代尚而瑜从尚还壽春术欲以瑜为将瑜观术终无所成求为居巢长遂自居巢东归是岁建安三年也策亲自迎瑜授建威中郎将即盛给兵骑鼓吹爲治馆舍赠赐无比令曰周公瑾英雋异才与孤有总角之好骨肉之分如前在丹阳发衆舩粮以济大事论德酬功此未足以报也瑜时年二十四吴中皆呼为周郎以瑜恩信着于庐江出备牛渚顷之策欲取荆州以瑜为都护军领江夏太守从攻皖拔之得乔公两女皆国色也策自纳大乔瑜纳小乔五年策卒权统事瑜将兵赴丧遂留吴与长史张昭共掌衆事时曹操新破袁绍兵威日盛下书责权任子权召羣臣会议皆犹豫莫决乃独将瑜诣母前定议瑜曰昔楚国初封荆山之侧不满百里之地继嗣贤能广土开境立基于郢遂据荆阳至於南海传业延祚九百余年今将军承父兄余资兼六郡之衆兵精粮多将士用命铸山煮海境内富饶泛舟举帆朝发夕到士风劲勇所向无敌有何逼迫而欲送质质一入不得不与曹氏相首尾则命召不得不往便见制于人也极不过一侯印仆从十余人车数乘马数匹岂与南?称孤同哉不如勿遣徐观其变若曹氏能率义以正天下将军事之未晚若图为暴乱兵犹火也不戢将自焚将军韬勇抗威以待天命何送质之有权母曰公瑾议是也遂不送质十一年督兵讨麻保二屯梟其渠率俘得万余口还备官亭追讨黄祖将邓龙于柴桑生禽龙还吴十三年权讨江夏瑜为前部大督九月曹操入荆州刘琮举衆降操得其水军船步兵数十万将士闻之皆恐权延见羣臣问计张昭等曰曹公豺虎也然托名汉相挟天子以征四方今拒之事更不顺且将军大势可以拒操者长江也今操得荆州水军蒙冲鬪舰千数浮以沿江水陆俱下此为长江之险已与我共之矣而势力衆寡又不可论愚谓大计不如迎之瑜曰不然操虽托名汉相实汉贼也将军以神武雄才兼父兄之烈割据江东地方数千里兵精足用英雄乐业尚当横行天下为汉家除残去秽况操自送死而可迎之耶请为将军筹之今北土未平马超韩遂尚在关西为操後患且舍鞍马仗舟楫与吴越争衡本非中国所长又今盛寒马无藁草驱中国士衆远涉江湖之间不习水土必生疾病此数者用兵之患也而操皆冒行之将军禽操宜在今日瑜请得精兵三万人进住夏口保为将军破之权曰老贼欲废汉自立久矣徒忌二袁吕布刘表与孤耳今数雄已灭惟孤尚存孤与老贼势不两立因拔剑砍前奏案曰诸将更有复敢言当迎操者与此案同乃罢会是夜瑜复请见曰诸人徒见操书言水步八十万而各恐懾甚无谓也今以实校之彼所将中国人不过十五六万且已久疲所得表衆亦极七八万耳尚怀狐疑夫以疲病之卒御狐疑之衆衆数虽多甚不足畏瑜得精兵五万自足制之愿将军勿虑权拊背曰公瑾卿言至此甚合孤心诸人各顾妻子深失所望独卿与子敬与孤同耳此天以卿二人赞孤也时昭烈为操所追走屯夏口遣诸葛亮诣权权遂遣瑜及程平等将兵与昭烈併力逆操昭烈迎问瑜战卒有几瑜曰三万人昭烈曰恨少瑜曰此自足用豫州但观瑜破之昭烈深用愧喜进与操遇于赤壁操军先有疾疫初交战便败退引次江北瑜等在南岸瑜部将黄盖曰今寇衆我寡难与持久操军方连舩舰首尾相埒可烧而走也乃取轻利舟舰数十艘载燥荻枯柴灌膏油其中裹以帷幕上建牙旗又预备走舩系于其尾先书报操给以欲降操军士皆出营延颈观望时东南风急盖取十舰最着前中江举帆余舩以次俱进去北军二里余同时发火火烈风猛舩往如箭烧尽北舩延及?上

营落烟焰张天人马烧溺无算瑜等率轻锐继其後擂鼓大震操引军走遇泥泞道不通悉使羸兵负草填之昭烈与瑜水陆并进追至南郡操军自相蹈藉而死者大半乃留曹仁等守江?径自北归时瑜与仁相对隔江即遣甘宁前据夷陵仁分兵围之宁告急于瑜瑜用吕蒙计留?统以守其後自与蒙救宁宁围既解乃渡屯北岸与仁尅期大战瑜亲跨马突阵会流矢中右胁疮甚便还仁闻瑜卧未起勒兵就阵瑜乃自兴案行军营激扬吏士杀伤甚衆仁委城走权拜瑜偏将军领南郡太守据江?始操闻瑜年少有美才密遣辩士九江蒋干私行说之布衣葛巾自托私行诣瑜瑜出迎干谓曰子翼良苦远涉江湖为曹氏作说客耶干曰吾与足下州里中间隔别遥闻芳烈故来叙濶并观雅规而云说客无乃逆诈乎瑜曰吾虽不及夔旷闻弦赏音足知雅曲也因延入设食遣就館後复请干与周观营中行视仓库军资器仗讫还饮宴示之侍者服饰珍玩等物因谓干曰大丈夫处世遇知己之主外托君臣之义内怀骨肉之恩言行计从祸福共之假使苏张复生能移其意乎干但笑终无所言还白操称瑜雅量高致非言词所能间也时权以妹妻昭烈表为荆州牧治公安而刘表故吏士多来归者昭烈以地小不足容衆乃自诣权求都督荆州瑜上疏曰刘备以梟雄之姿而有关张熊虎之将必非久屈为人用者谓宜徙备置吴盛为筑宫室多其美女玩好以娛其耳目而分关张各置一方使如瑜者挟以攻战大事可定也今猥割土地以资业之聚此三人俱在疆场恐蛟龙得云雨终非池中物也权以曹操在北当广?英雄又恐昭烈难卒制故不从瑜言昭烈还闻之叹曰天下智谋之士所见畧同前时孔明谏孤莫行其意亦虑此也是时刘璋为益州牧外有张鲁寇侵瑜乃诣京见权曰今曹操新败忧在腹心未能与将军连兵相争也乞与奋威俱进取蜀而并张鲁因留奋威以守其地与马超结援瑜还与将军据襄阳以蹙操北方可图也奋威者权从弟瑜也权许之瑜还江陵治装道病困与权牋曰瑜以凡材昔受讨逆殊特之遇委以腹心遂荷荣任统驭兵马志执鞭弭自効戎行规定巴蜀次取襄阳凭藉威灵谓若在握至以不谨道遇暴疾人生有死修短命矣诚不足惜但恨微志未展不复受教命耳方今曹操在北疆场未静刘备寄寓有似养虎此朝土旰食之秋至尊垂虑之日也鲁肃忠烈临事不苟可以代瑜倘言可采瑜死不朽矣遂卒于巴丘时年三十六权素服举哀感动左右曰公瑾有王佐之姿今忽短命孤何赖哉自迎其丧于芜湖为子登娶其女而以女妻其子循初瑜见友于孙策太夫人又使权以兄事之时权位为将军诸将宾客为礼尚简而瑜独先尽敬便执臣节程普颇以年长数陵侮瑜瑜折节容下终不与校普後自敬服而亲重之乃告人曰与周公瑾交若饮醇醪不觉自醉其谦让服人如此昭烈之自京还也权与张昭等乘船追送之宴会叙别昭等先出权独留语昭烈言次叹瑜曰公瑾文武筹略万人之英顾其器量广大恐不久为人臣耳曹操亦尝与权书曰赤壁之役值有疾病孤烧船自退横使周瑜虚获此名瑜威声远着故曹刘咸欲疑潜之後权僭尊号谓公卿曰孤非周公瑾不帝矣瑜少精音乐虽三爵之後其有阙误瑜必知之为回顾焉故时人语曰曲有误周郎顾

论曰士之建功名于干戈抢攘之间者必先明于去就之分马伏波所谓非独君择臣臣亦择君其言最为有识建安末华歆王朗称名士皆臣附贼操俛仰苟活即贤如荀彧始则参赞密谋及议九锡不合乃饮药死其志非不可哀然识则鄙矣瑜初遇孙策孤身流离即推诚投分虽强大如袁术曾不与易後称昭烈比于龙虎向使早得从事鱼水之欢独让孔明有哉方操引兵东下衆志汹汹独瑜首倡大义目操汉贼正名声罪凜凜如出师二表而袭荆取益又与隆中所对意见畧同虽神明太儁未若亮之道器渊然然与人能让虑事惟谨亮临终举蒋琬

瑜亦荐鲁肃临事不苟可以代任则犹然小心谨慎之规也瑜亮并称名固不虚哉

鲁肃

鲁肃字子敬临淮东城人。生而失父，与祖母居。肃体貌魁奇，自少有壮节，家富于财，以天下已乱，遂大散财货，赈穷结士，甚得乡邑欢心。周瑜为居巢长，将数百人，故过候肃，并求货粮。肃有两困米，各三千斛，乃指一困与瑜。瑜益知其奇也，遂相亲，结定侨札之分。袁术闻其名，就署东城长。肃见术无纲纪，不足与立事，乃携老弱将轻侠百余人，就瑜居巢。瑜东渡，因与同行。会肃祖母亡，还葬东城。刘子杨与肃友善，遗书招肃共依郑宝，而瑜已徙。肃母到吴，瑜谓肃曰：「昔马援答光武云：『当今之世，非但君择臣，臣亦择君。』今主人亲贤贵士，纳奇录异，且吾闻先哲秘论，承运代刘氏者，必兴于东南，推步事势，当其历数，终构帝基，以协天符。是烈士攀龙附凤，驰骛之秋，吾方达此足下，不须以子杨之言介意也。」肃从其言。瑜因荐肃才宜佐时，当广求其比，以成功业，不可令去也。权即见肃，与语甚悦之。众宾罢退，独引肃还合榻对饮，因密议曰：「汉室倾危，四方云扰，孤承父兄余业，思有桓文之功，君何以佐之？」肃曰：「昔高帝欲区区尊事义帝而不获者，以项羽为害也。今之曹操犹昔项羽将军，何由得为桓文乎？」肃窃料汉室不可复兴，曹操不可卒除，为将军计，惟有鼎足江东，以观天下之衅。规模如此，亦自无嫌。何者？北方诚多务也。因其多务，剿除黄祖，进伐刘表，竟长江所极，据而有之，然後建号帝王，以图天下，此高帝之业也。时张昭颇訾肃年少粗疏，未可用。权不聽，益贵重之。赐肃母衣服帷帐，居处杂物，富拟其旧。及刘表卒，肃进说曰：「荆楚与国隣接，外带江汉，内阻山陵，有金城之固，沃野千里，士民殷富，若据而有之，此帝王之资也。今表新亡，二子素不辑睦，军中诸将各有彼此，加刘备天下枭雄，与操有隙，寄寓于表，表恶其能而不之用也。若备与彼协心，上下齐同，则宜抚安，以结盟好；如有离违，宜别图之，以济大事。」肃请得奉命吊表二子，并慰劳其军中用事者，及说备使抚表众，同心一意，共拒曹操。备必喜而从命，如其克谐，天下可定也。今不速往，恐为操所先。」权即遣肃行。到夏口，闻操兵向荆州，表子琮已降。操昭烈惶遽南走，肃径迎会于当阳长坂，宣腾权意，及陈江东强固，劝昭烈与权并力。时诸葛亮亦说昭烈求救於权，而肃适至，昭烈甚欢悦。肃见亮曰：「我子瑜友也。」即共定交。昭烈遂遣亮使权，肃亦反命。会权得操欲东之问，与诸将议，皆劝迎之，而肃独不言。权起更衣，肃追于宇下，权知肃意，执其手曰：「卿欲何言？」肃曰：「向察众人之议，专欲误将军，不足与图大事。今肃可迎操耳，如将军不可也。何以言之？今肃迎操，操当以肃还付乡里，品其名位，犹不失下曹从事，乘犢牛，从吏卒，交游士林，累官故不失州郡也。将军迎操，欲安所归？愿早定大计，权叹曰：「诸人甚失孤望。今卿廓开大计，正与孤同。」此天以卿赐孤也。时周瑜受使，鄱阳肃劝追召瑜还，遂任瑜以行事。肃为赞军校尉，助画方略。操军破走，肃即先还权，与诸将迎。肃入阁，将拜权起礼之，因谓曰：「孤持鞍下马相迎，可以显卿。」未肃趋进曰：「未也。」众闻愕然，及就坐，徐举鞭言曰：「愿至尊威德加乎四海，总括九州，克成帝业，更以安车软轮徵肃，始当显耳。」权拊掌欢笑。昭烈自诣京见权，求都督荆州。肃劝权借之，时吕范议欲留昭烈，勿遣。肃曰：「不可。将军虽神武命世，然曹操威力实重，初临荆州，恩信未洽，宜以借备，使抚安之。多操之敌，而自为树党计之上也。」权即从之。操闻权以土地业昭烈，方作书落笔于地，权用周瑜临终之言，拜肃奋武校尉，代领瑜众。肃初住江陵，後下屯陆口，威恩大行，增众万余人。拜汉昌太守，偏将军。十九年，从权破皖城，转横江将军。及昭烈既定益州，权求长沙、零、桂，昭烈不与。权率众进取，昭烈闻自还公安，遣关公争三郡。肃屯益阳，与公相拒，因邀公相见，数责之曰：「始豫州在长

坂衆不当一校计穷虑极图欲远窜主上矜愍豫州身无处所不爱土地人民之力以济其患而豫州私独饰情愆德隳好今已藉手西州又欲翦并荆土斯盖凡夫所不忍行而况整顿人物之主乎吾子属当重任曾不能以义辅时而负恃弱衆以图力争师曲为老将何获济关公不答後昭烈与权和割湘水为界于是罢兵肃年四十六建安二十二年卒权为举哀又临其葬诸葛亮亦为发哀肃为人方严寡于玩饰内外节俭不务俗好治军整顿禁令必行虽在战阵手不释书卷又善谈能属文词思度宏远周瑜之後肃为之冠及权僭尊号临坛顾谓公卿曰昔鲁子敬常道此可谓明于事势矣

论曰曹操挟天子以令诸侯于时羣士皆内震于其威外诎于其义独肃与周瑜正名为贼力主讨之可谓智畧絶人肃敬仰昭烈终始无二其劝权借以荆州非独明义理且识时势夫陈胜之败以不立楚後当是时荆土人士归昭烈者如流赴壑即不见借将招辑旧附以与权争权安得晏然已乎且非昭烈威名即何以息操耽耽逐逐之欲而权乃追论以为一短权固诈力之主故乐得智数之士若肃之持大体存远虑者反笑为迂濶也

顾雍

顾雍字元叹吴郡吴人蔡邕从朔方还尝避怨于吴雍从之学专一清静敏而易教邕贵异之谓曰今以吾名与卿其字元叹亦言为蔡邕所叹也弱冠历仕县长所在有治迹其後孙权以雍行会稽太守事讨除山寇郡界宁静吏民归服入为左司马权为吴王累迁领尚书令封阳遂乡侯拜侯还寺家人不知後闻乃惊雍为人不饮酒寡言语举动时当权常叹曰顾君不言言必有中至饮食宴乐之际左右恐有酒失而雍必见之是以不敢肆情权亦严惮之每曰顾公在坐使人不乐其见惮如此吴黄武四年拜丞相平尚书事进封醴陵侯其所选用文武将吏各随能所任心无适莫时访逮民间及政职所宜辄密以闻若见纳用则归之于上不用终不宣泄权以此益重之然于公朝有所陈及词色虽顺而所执者正权尝咨问得失张昭因陈法令太稠刑罚微重宜有所蠲损权默然顾问雍曰君以为何如雍曰臣之所闻亦如昭所陈于是权乃议狱轻刑权尝令中书郎诣雍有所咨访若合雍意事可施行即与相反覆究而论之为设酒食如不合意雍即正色改容嘿然不言无所施設郎退告权权曰顾公欢悦是事合宜也其不言者是事未平也孤当重思之其见敬信如此时江边诸将各欲立功自効多陈便宜有所掩袭权以访雍雍曰臣闻兵法戒于小利此等所陈欲徼功名而为其身非为国也陛下宜禁制苟不足以曜威损敌所不宜听也权从之军国得失行事可否自非?见口未尝言之中书典校吕壹擅作威福造作榷酤障管之利举罪纠奸纖介必闻文以深案毁短大臣排?无辜雍等皆见举白用被遣让後壹奸罪发露系廷尉雍往断狱和顔色问其词状临出又谓壹曰君意得毋欲有所道壹叩头无言时尚书郎怀叙面詈辱壹雍责叙曰官有正法何至于此权嫁从女女顾氏甥故请雍父子及孙谭宴谭时为选曹尚书见任贵重是日权极欢谭醉起舞不止雍内怒之翌日召谭诘责曰君王以含垢为德臣下以恭敬为节昔萧何吴汉并有大功何每见高帝似不能言汉奉光武亦信恪勤汝之于国宁有汗马之劳可书之事耶但偕门户之资遂见宠任耳何有舞不知止虽为酒後亦由恃恩忘敬谦虚不足损吾家者必汝也因背向壁卧谭立过一时乃见遣雍为相十九年年七十六卒权素服临吊諡曰肃长子邵字孝则为豫章太守有治行邵子谭有直谏名顾荣显于东晋亦雍之孙也

论曰陈壽之评曰张昭受遗辅佐忠谏方直动不为已而以严见惮以高见外既不处宰相又不登师保从容间巷养老而已以此明权之不及策也顾雍依仗素业而将之智局故能究极荣位斯言非笃论也考昭首议迎操几覆江东大事虽忠正有余颇负气?上雍正色弼亮而德器深远兼有闇闇侃侃之遗非徒一切恭谨取容如万石君家法也夫感人以言其本已浅故积诚以感正已以风古大人格君固有在未言之先者雍虽不逮此然犹不失为良显之臣岂昭所能望乎昭子奋威将军承壮毅忠谏能甄识人物堪与雍子邵并驱争先矣

陆凯

陆凯字敬风吴郡吴人丞相逊族子也吴黄武初为永兴诸暨长有治迹拜建武都尉领兵虽统军衆手不释书好太玄论演其意以箴辄验赤乌中除儋耳太守讨朱崖有功迁建武校尉五凤二年讨山贼陈毖于零陵斩之拜巴丘督偏将军封都乡侯累迁荡魏绥远将军孙休即位拜征北将军假节领豫州牧孙皓立迁镇西大将军领荆州牧进封嘉兴侯时皓与晋平而使丁忠自北还说皓弋阳可袭凯曰敌形势方强而欲徼幸求胜未见其利也乃止皓恶人视已羣下皆莫敢举目凯说皓曰夫君臣无不相识之道若猝有不虞不知所赴乃听凯自视时徙都武昌扬州之民泝流供给以为患苦又奢侈无度公私穷匮凯上疏曰臣闻有道之君以乐乐民无道之君以乐乐身乐民者其乐弥长乐身者不久而亡自顷年以来君威伤于桀纣君惠闭于羣孽辜无罪赏无功君有谬误之愆天为作妖而诸公卿媚上以求爱困民以求饶导君於不义败政于淫俗臣窃为痛心今邻国交好四边无事当息役养士实其廩库以待天时而更倾动天心骚扰万姓此非保国养民之术也臣闻吉凶在天犹影之在?响之在声昔秦所以亡天下者赏轻而罚重刑政错乱民力尽于奢侈贤哲隐藏汉所以强者躬行诚信听谏纳贤惠及负薪躬请岩穴此往事之明验也近者汉之衰末三家鼎立曹失纪纲晋有其政益州危险闭门固守可保万世而刘氏与夺乖错君恣意于奢侈民力竭于不急是以君臣见掳此目前之明验也臣闇于大理智慧浅劣无复冀望窃为陛下惜天下耳愿陛下息大功损百役务寛荡忽苛政又武昌地实危险而墉堦非王都且童谣言宁饮建业水不食武昌鱼宁还建业死不止武昌居翼星为变荧惑作妖是明天意知民所苦也臣闻国无三年之储谓之非国而今无一年之蓄此臣下之责也而诸公卿位处人上禄延子孙曾无致命之节匡救之术苟进小利于君以求容媚荼毒百姓不为君计也自从孙弘造义兵以来耕种既废一家父子异役廩食日张蓄积日耗民有离散之怨国有露根之渐而莫之恤也民力困穷鬻卖儿子调赋相仍日以疲极所在长吏不加隐括加有监官务行威势所在骚扰更为烦苛民苦二端财力再耗愿陛下一息此役矜哀孤弱以鎮抚百姓之心如此民可得保先王之国存焉臣闻五音令人耳不聪五色令人目不明先帝後宫数不满百先帝崩後在位奢侈乃有千数坐食官廩愿陛下料出赋嫁给与无妻者上应天心天下幸甚臣闻圣主取士以贤不拘卑贱故功德洋溢非求顔色而取好服捷口容悦者也臣伏见当今内宠之臣位非其人任非其量羣党相扶害忠隐贤愿陛下简文武之臣各勤其官州牧公卿务修仁化上助陛下下拯黎民各尽其忠则康哉之歌作刑措之理清愿陛下留神思臣愚言皓虽不悦以其宿望特优容之初何定尝为孙权给使自表旧人求为内侍皓以为都尉典知酷余遂专威福凯面责之曰卿见前後事主不忠倾乱国政宁有得以壽终者耶宜自改厉不然方见卿有不测之祸定大恨凯思中伤之凯终不以为意皓时大起宫室凯上表谏不听凯重表曰臣闻宫功当起夙夜反侧上

事留中不见省报昨被诏曰君所谏诚是然宫殿不利宜避之父之不安子亦何倚臣伏读一周不觉气结于胸而涕泣雨集也臣年已六十九荣位已重复何所冀所以勤勤数进苦言者伏念大皇帝创基立业劳苦勤至白发生于鬓肤黄耆被于甲冑天下始静今强敌当途西州倾覆宜畜养广力以备有虞且始徙都属有军征战士流离州郡骚扰而大功复起徵召四方斯非保国致治之渐也臣闻为人主者禳灾以德除咎以义故汤遭大旱身祷桑林荧惑守心宋景退殿是以旱魃消亡妖星移舍今宫室之不利陛下不务修德而务筑宫虽殷辛之瑶台秦皇之阿房何止而不丧身覆国宗庙作墟乎夫兴土功高台榭既致水旱民又多疾为父长安使子无倚此乃子离于父臣离于陛下之象也是以大皇帝居于南宫大臣以为宫室宜厚备卫非常当此之时寇钞慑威南州无事犹冲让未遑况陛下危侧之世又乏大皇帝之德可不虑哉皓所行弥暴凯知其将亡上表曰臣闻恶不可积过不可长积恶长过丧乱之源也是以古人惧不闻非故设进善之旂立敢谏之鼓臣察陛下无思警戒之义而有积恶之渐祸兆见矣故写尽愚怀陛下宜克己复礼不可捐弃臣言而放奢意意奢情至吏日欺民民离则上不信下下当疑上臣常忿亡国之人夏桀殷纣亦不可使後人复忿陛下也臣受国恩奉朝三世复以余年值遇陛下不能徇俗与衆浮沉若比干伍员以忠见戮以正见疑无所余恨灰身泉壤无负先帝愿陛下九思社稷存焉不听凯竭力公家忠恳内发表疏皆指事不饰皓尝诏报凯云孤动必遵先帝有何不平君所谏非也凯遂疏陈皓违先帝旧章二十事及疾病皓遣中书董朝问所欲言凯因以付之并陈何定不可用奚熙小吏建起浦里田亦不可听姚信楼玄贺邵张悌郭遑薛莹滕修及族弟喜抗或清白忠勤或姿才卓茂皆社稷之良辅愿访以时务使各尽其忠寻卒时年七十二子禧为太子中庶子华核表荐其才似鲁肃宜镇夏口皓尝衔凯数犯顔违旨加何定譖构非一既以重臣难绳以法又陆抗时为大将在疆場故以计容忍抗卒後竟徙凯家于建安

论曰江东多智谋勇略之士伯符仲谋以英雄迭起求贤若渴纳善如流于时倾心慕义者无不云集响应自周鲁顾陆而外如太史慈张紘吕范朱桓贺齐全琮吕岱朱然甘宁凌统周泰蒋钦陈表徐盛丁奉步骖严畯是仪薛综辈武烈扬于疆場文教修于廊庙争先济美指不胜屈而忠荃如凯则尤邦之司直也方皓时主昏臣嬖所剥丧贼虐者非一凯与抗仅以累世勋旧为独力之支一旦继陨皓益罔所忌憚坐是王蕃李勗楼玄贺邵韦昭熊陆张悌诸人或忠谏捐躯或战阵殉国长沙兄弟数十年艰难培植以求保我子孙黎民者曾不憚遗一老而金陵王气黯然而尽矣悲夫

陆抗

陆抗字幼节吴郡吴人长沙桓王策外孙丞相江陵昭侯逊之次子也逊少负智畧战胜攻取尤忠诚忧国初建议于孙权讨平诸山寇料得精卒数万所至肃清吴黄武元年大破昭烈于猊亭权东巡建业留逊辅子登董军国事正色率属贵戚歛避南阳谢景善刘廙先刑後礼之论逊呵景曰礼之长于刑久矣廙以细辨而诡先圣之教君今侍东宫宜遵仁义以彰德音若彼之谈不须讲也逊虽身在外乃心乎国每疏陈时事屡有谏诤吕壹擅威福逊与潘濬同心忧之言至流涕及权末年适庶不明将以谗构废子和逊陈书再四求诣都口论得失权既不听许又以甥顾谭等亲附于和累遣中使责让逊逊愤恚卒抗时年二十拜建武校尉代领父

衆送葬东还诣都谢权以杨竺所白逊二十事诘抗抗事事条答权意渐解赤乌九年迁立节中郎将与诸葛恪换屯柴桑抗临去皆更缮完城围葺其墙屋居庐桑果一无所败恪入屯俨然若新而恪柴桑故屯颇有毁坏深以为慙太元元年就都治病病差当还权泣与别曰吾前听用谗言与汝父大义不笃以此负汝前後所问一焚灭之莫令人见也太平二年魏将诸葛诞举壽春降拜抗为柴桑督破魏兵于壽春迁镇北将军孙皓即位加镇军大将军领益州牧旋都督西陵诸军事治乐乡抗闻都下政令多阙忧深虑远乃上疏曰臣闻德均则衆者胜寡力侔则安者胜危臣远惟战国存亡之符近览刘氏倾覆之衅考之典籍验之行事中夜抚枕临餐忘食昔匈奴未灭去病辞馆汉道未纯贾生哀泣况臣王室之出世荷光宠与国同戚夫事君之义犯而勿欺人臣之节匪躬是殉谨陈时事十七条如左时何定弄权阉宦预政抗上疏曰臣闻开国承家小人勿用靖譖庸回唐书所戒小人不明理道所见既浅虽使竭情尽节犹不足任况其奸心素笃而憎爱移易哉苟患失之无所不至今委以聪明之任假以专制之威而冀肃清之化不可得也方今见吏殊才虽少然或冠冕之胄少渐道教或清苦自立资能足用自可随才授职抑黜羣小然後俗化可清庶政无秽也凤皇元年西?督步阐叛降晋抗闻之日即部分诸军径赴西陵勅军营更立严围自赤溪至故市内以围阐外以御寇昼夜催切如敌已至衆甚苦之诸将谏曰今宜乘銳攻阐比晋救至阐必可拔何事于围而以敝士民之力抗曰此城处势既固粮谷又足且备御之具皆抗所夙规今反攻之不可卒拔而北救必至至而无备表里受难何以御之诸将请不已抗欲服衆心听令一攻果无利围备始合而晋车骑将军羊祜兵至江陵诸将咸以抗不宜上抗曰江陵城固兵足无可忧者假令敌得之必不能守所损者小若据西陵则羣夷扰动其患不可量也吾宁弃江陵而赴西陵况江陵牢固乎初抗于江陵北作大堰遏水以絶寇叛时祜欲因水运粮乃扬声将破堰以通步军抗闻使亟破之诸将皆惑屡谏不听祜至当阳闻堰败乃改从车运大费功力十一月晋荆州刺史杨肇至西陵抗自将凭围对之营都督俞赞亡诣肇抗曰赞军中旧吏知吾虚实吾常虑夷兵素不简练若敌攻围必先此处即夜易夷兵皆以旧将充之明日肇果攻故夷兵处衆败夜遁抗欲追之而虑阐伺间兵不足分于是但鸣鼓戒衆若将追者肇军忧惧悉解甲挺走抗使轻兵蹙之肇大破败祜等皆引还抗遂拔西陵诛阐及其同谋将吏数十人自余所请赦者数万口东还乐乡貌无矜色谦冲如常故得将士欢心加拜抗都护羊祜既归增修德信以怀吴人抗每告其边戍曰彼专为德我专为暴是不战而自服也各保分界而无求细益于是吴晋之间余粮栖亩而不犯牛马逸而入境可宣告而取也抗尝遗祜酒祜饮之不疑抗有疾祜馈之药抗亦推心服之人以谏抗抗曰岂有酖人羊叔子哉孙皓闻之以诘抗抗曰一邑一乡不可无信义之人况大国乎臣不如是正足以彰其德耳于祜无伤也时徵左部督薛莹下狱抗上疏曰夫俊乂者国家之良宝庶政所以伦叙四门所以穆清也故大司农楼玄散骑中常侍王蕃少府李勗皆一时显器既蒙初宠从容列位而并受诛殛投弃盖周礼有赦贤之辟春秋有宥善之义书曰与其杀不辜宁失不经而蕃等罪名未定大辟以加心经忠义身被极刑岂不痛哉蕃勗永已悔亦靡及诚望陛下赦召玄出而顷闻薛莹见逮莹父综纳言先帝傳弼文皇及莹承基内厉名行今之所坐罪在可原臣惧有司未详其事乞垂天恩原赦莹罪哀矜庶狱天下幸甚皓用诸将谋数侵晋边抗上疏曰臣闻易贵随时传美观衅今不务富国强兵力农畜谷使文武之才效展其用百揆之署无旷厥职明黜陟慎刑赏训诸司以德抚百姓以仁而听诸将徇名穷兵黷武动费万计士卒凋敝寇不为衰而我已大病夫争帝王之资而昧十百之利此人臣之奸便非国家之良策也诚宜暂息取进小规以畜士民之力观衅伺隙庶无悔吝二

年就拜大司马荆州牧三年夏疾笃上疏曰西陵建平国之藩表既处下流受敌二境若敌泛舟顺流星奔电迈非可恃援他部以救倒悬此乃社稷安危之机也臣父逊昔在西陲陈言西陵国之西门若有不守非但失一郡荆州非吴有也如其有虞当倾国争之臣前乞精兵三万而主者循常未肯差赴今臣所统千里受敌见兵才有数万羸敝日久难以待变臣以为诸王幼冲未统国事可且立傅相辅导贤姿无用兵马以妨要务又黄门宦官开立占募兵民怨役逋逃入占乞一切料出以补疆场受敌常处使臣所部足满八万省息衆务信其赏罚虽韩白复生无所展巧若兵不增此制不改而欲克谐大事此臣之所深戚也臣死之日乞以西方为属及卒皓使其子晏景玄机云五人分将其兵後晋军伐吴王濬顺流东下所至辄克果如抗虑抗子机云善属文名重于世仕晋至成都王颖官属为孟玖牵秀等所谮死非其罪竟以灭族天下惜之

论曰陆逊负智勇之姿秉公忠之概尝考其生平已事淳于式白逊扰民而称式佳吏祁奚之举仇也秭归之役诸将违节度忍不即启蔺相如之善下也毁孙虑鬪鸭栏髡孙松职吏张释之之执法也暨?诸葛恪杨竺当极盛时而料其必败马援之先见也其运筹决胜又其余伎然挟智任数首与吕蒙谋袭江陵败刘孙之盟长贼操之志汉鼎不延职此之由吴人多诈而逊复喜为纵横如托猎潜兵袭魏边郡使无辜自相戕杀及伪作答书以间魏将遼式得罪代去皆无益军国亏损洪仁正其子所谓穷兵黷武以徇名者耳抗之拔西陵视猊亭之捷功不相下而周旋三主罔有间言其仁心雅量自鲁肃顾雍而後一人而已陈壽以为抗有父风具体而微非笃论也

史传三编卷四十五

卷四十六

钦定四库全书

史传三编卷四十六

大学士朱轼撰

名臣续传三

晋

羊祜

羊祜字叔子泰山南城人九世皆二千石并以清德闻祖续汉南阳太守父衢上党太守祜蔡邕外孙景献皇后同产弟年十二丧父孝思过礼事叔父耽甚谨及长博学能属文身長七尺二寸美须眉善谭论郡将夏侯威异之妻以兄霸之子州府交辟皆不就太原郭奕见而心醉曰此今日之顔子也与王沈俱被曹?辟沈劝就徵祜曰委质事人复何容易及?败沈以故吏免因谓祜曰常识卿前语祜曰此非始虑所及其先识不伐如此寻遭母忧长兄发又卒毁慕寝顿十余年以道素自居恂恂若儒者仕魏至给事中黄门郎封钜平子武帝称帝进号中军将军加散骑常侍改封郡公固让不受乃进本爵为侯泰始初诏曰祜执德清劭忠亮纯茂经纬文武謇謇正直其以祜为尚书右仆射卫将军给本营兵祜每让不处旧臣之右帝将有灭吴之志乃以祜都督荊州诸军事祜出镇南夏开设庠序绥怀远近甚得江汉之心与吴人开布大信降者欲去皆听之时吴石城守去襄阳七百余里每为边害祜患之竟以计令吴罢守于是戍逻减半分以垦田八百余顷大获其利始至时军无百日粮季年乃有十年之积诏罢江北都督置南中郎将以所统诸军在汉东江夏者皆以益祜在军常轻裘缓带身不被甲铃阁之下侍卫才数十人而性颇好渔猎常欲夜出军司徐胤执檠当营门曰将军都督万里将军之安危亦国家之安危也胤今日若死此门乃开耳祜改容谢之後遂稀出诏加车骑将军开府如三司仪上表固让曰伏闻恩诏拔臣使同台司臣受任内外每极显荣之重夙夜战悚以荣为忧臣闻古人之言德未为人所服而受高爵则使才臣不进功未为人所归而荷厚禄则使劳臣不劝今臣身托外戚事连运会戒在过宠猥加非次之荣臣有何功可以堪之今天下自服化以来方渐八年虽侧席求贤不遗幽贱然臣不能推有德达有功使圣听知胜臣者多未达者不少假令有遗德于版筑之下有隐才于屠钓之间而朝议用臣不以为非臣处之不以为愧所失岂不大哉臣虽所见者狭据今光禄大夫李熹执节高亮在公正色光禄大夫鲁芝洁身寡欲和而不同光禄大夫李胤清亮简素立身在朝以礼终始虽历内外之宠不异寒贱之家未蒙此选臣更越之何以塞天下之望不听及还镇会吴步阐以西陵畔降吴将陆抗攻之甚急诏祜迎阐祜率兵五万出江陵遣荊州刺史杨肇攻抗不克阐竟为抗所禽祜坐贬平南将军而免杨肇为庶人祜还镇乃进据险要开建五城收膏腴之地夺吴人之资石城

以西尽为晋有自是以後降者不絶益修德信以怀柔初附慨然有并吞之心每与吴人交兵克日方战不为掩袭计将帅有欲进谲诈之策者辄饮以醇酒使不得言有畧吴二儿为俘者遣送还其家後吴将夏详邵顗等来降二儿之父亦率其属与俱吴将陈尚潘景等来侵祜追斩之美其死节而厚加殡敛景尚子弟来迎丧者以礼遣还又吴将邓香掠夏口祜募生缚香既至宥之香感恩率部曲降祜出军行吴境刈谷为粮皆计所侵送绢偿之每游猎常止晋地所得禽兽或先为吴人所伤者皆封还之于是吴人悦服称为羊公不之名也祜与陆抗对境使命交通时谓华元子反复见事详抗传祜贞愨无私不附结权贵荀勗冯紵之徒甚忌之从甥王衍诣祜陈事词甚俊辩祜不然之谓人曰王夷甫方以盛名处大位然败俗伤化必此人也步阐之役祜以军法将斩王戎故戎衍并憾之每言论多毁祜语曰二王当国羊公无德初祜以伐吴必藉上流之势又童謡曰阿童复阿童衔刀浮渡江不畏岸上虎但畏水中龙会益州刺史王濬徵为大司农祜知其可任濬又小字阿童因表留濬监益州诸军事加龙骧将军密令修舟楫为顺流计祜缮甲训卒广为戒备至是疏言江淮之险不过剑阁孙皓之暴侈于刘禅吴人之困甚于巴蜀而大晋兵粮器械盛于往时今若引梁益之兵水陆俱下荆楚之衆进临江陵平南豫州直指夏口徐扬青兗并向秣陵鼓旆以疑之多方以误之以一隅之吴当天下之衆所备皆急无有寧息皓与下多忌名臣重将不复自信平常犹怀去就兵临之际必有应者兼其俗急速不得持久弓弩戟楯不如中国惟水战是其所便一入其境则长江非其所固还保城池则去长入短军不踰时克可必矣帝深纳之会秦凉屡败祜复表曰吴平则余自定但当速济大功耳而议者多不同祜叹曰天下不如意恒十居七八天与不取岂非更事者恨于後时哉其後诏封祜南城侯统五县置相与郡公同祜让曰昔张良请受留万户汉祖不夺其志臣受钜平于先帝敢辱重爵以速官谤固执不拜祜每登进常守冲退而明德远播朝野僉议当居台辅帝方仗以东南之任故寝之然政事损益皆谘访焉祜于势利一无所关与性慎密谋议皆焚其草凡所进达人莫知其由或谓祜慎密太过者祜曰是何言欤夫入则造膝出则诡词君臣不密之诫吾惟惧其不及不能举贤取异岂得不愧知人之难哉且拜爵公朝谢恩私门吾所不取其女夫尝劝祜有所营置祜不答退告诸子曰人臣树私则背公此大惑也汝宜识吾此意尝与从弟琇书曰既定边事当角巾归故里为容棺之墟以白土而居重位能无忧盛满乎疏广吾师也祜乐山水每风景必造岷山置酒言咏终日不倦尝慨然太息顾谓从事中郎邹湛等曰自有宇宙便有此山由来贤达胜士登此远望如我与卿者多矣皆湮灭无闻使人悲伤如百岁後有知魂魄犹应登此也会吴人攻江夏略户口千余家诏遣侍臣移书诘祜不追讨之意并欲徙镇荆州祜曰江夏去襄阳八百里比知贼问去已经日步军方往安能救之哉劳师以免责恐非事宜也疆场之间一彼一此慎守而已若辄徙州贼出无常亦未知州之所宜据也使使者不能诘祜寝疾求入朝诏扶疾引见乘辇入殿无下拜及侍坐面陈伐吴之计帝以其病不宜数入遣中书令张华问策祜曰吴人虐政已甚可不战而克若孙皓不幸而没吴人更立令主虽百万之衆长江未可窥也帝欲使祜卧护诸将祜曰取吴不必臣行但既平之後当劳圣虑耳功名之际臣所不敢居若事了当有所付授愿审择其人疾渐笃乃举杜预自代寻卒时年五十八帝素服哭之是日大寒涕泪沾须鬓皆为冰焉及葬赐赉有加礼赠太傅谥曰成南州人闻祜丧皆罢市巷哭吴守边将士亦为垂泣其後襄阳百姓于祜平生所游岷山建碑立庙岁时飨祀望其碑者莫不泪下因名为堕泪碑荆州人为祜讳名屋室皆以门为称改户曹为词曹焉其仁德所感如此祜立身清俭被服率素俸禄所资皆以贍给九族赏赐军士家无余财遗令不得以南城侯入柩从弟琇等述祜素志求葬于先

人墓次帝于大司马门南临送焉初文帝之丧祜谓傅玄曰三年之丧虽贵遂服自天子达而汉文除之毁礼伤义常以太息今主上天性至孝有曾闵之性虽夺其服实行丧礼丧礼实行除服何为耶若因此革汉魏之薄而兴先王之法以敦风俗垂美百代不亦善乎玄曰汉文以末世浅薄不能行国君之丧故因而除之除之数百年一旦复古难行也祜曰不能使天下如礼且使主上遂服不犹善乎玄曰主不除而天下除此为但有父子而无君臣矣祜乃止然祜此论甚善恨此时不因此而并定天下臣民执丧之礼也祜所着文章及为老子传并行于世卒後二岁吴平羣臣上壽帝执爵流涕曰羊太傅功也因以克定之功策告祜庙依萧何故事封其夫人初祜少时有善相墓者言祜祖墓所有帝王气若凿之则无後祜遂凿之相者见曰犹出折臂三公而祜竟堕马折臂位至公而无子以兄子篇为嗣王濬者弘农湖人恢廓有大志祜深知之祜兄子暨曰濬奢侈不节不可专任祜曰濬有奇略当恣其所欲乃可用耳既表留濬益州濬乃依祜教作大舩连舫方百二十步受二千余人以木为城起楼櫓开四出门其上皆得驰马来往又画怪兽于舫首以惧江神及奉命伐吴吴人于江碛要害处并以铁锁横截之又作铁锥长丈余暗置江中逆拒舟舰先是祜获吴间谍具知情状濬乃预作大筏数十方百余步缚草为人被甲持仗令善水者以筏先行遇铁锥锥辄着筏而去又作火炬长十余丈大数十围灌以麻油在船前遇锁燃炬烧之须臾融液断絶船无所碍遂克西陵荆门夷道自武昌顺流而下初诏使濬受王浑节度濬舟过三山浑遣信要与论事濬举帆直指建业报曰风利不得泊也遂以是日入石头孙皓面缚舆櫓诣军门降濬解缚焚櫓收其图籍封其府库军无所私平吴之役濬功为钜焉

论曰孟子言可欲之谓善张子称善人者志于仁而无恶羊祜天姿醇厚使人疑于顔子其善人者乎是以德所感不独信于本朝且孚于敌国亦不独洽于当年且流于身後于以见秉彝好德人性皆然而谓至诚不能动物者皆未尝实修其德于己者也夫德非姑息之谓祜恂恂长者而抗议平吴毅然不少回惑盖取残救民正古王者以德行仁之事祜虽不逮此要异夫煦煦为仁者已其表留王濬专委以造舟伐吴之略可谓知人善任及对晋武则曰吴平之後当劳圣虑又与山涛外寧必有内忧之论同一深识远见呜呼彼岂仁而不足于智者哉

杜预

杜预字元凯京兆杜陵人祖畿魏尚书仆射父恕幽州刺史预博学多通常言德不可以企及立功立言可庶几也尚司马师妹高陆公主起家拜尚书郎袭祖爵丰乐亭侯转参相府军事锺会伐蜀以预为长史及会反寮佐并遇害惟预以智获免与贾充等定律令既成预为之注解乃奏曰法者绳墨之断例也故文约而例直听省而禁简例直易见则人知所避禁简难犯则几于刑措今所注皆网罗法意格之以名分使用之者执名例以审取舍也诏颁行天下泰始中守河南尹预以京师王化之始凡所施论务崇大体受诏为黜陟之课大畧谓上古之世虚已委诚而信顺之道应逮淳朴渐散彰美显恶设官分职皆畴咨博访敷纳以言及至末世不能纪远而专求密微疑心而信耳目疑耳目而信简书简书愈繁官方愈伪昔汉之刺史岁终奏事不制算课而清浊粗举魏氏考课即京房之遗意其文至密岂若申唐尧之旧去密就简委任达官各考所统在官一年以後每岁言优劣一人因计偕以名闻如此六载主者总集采案其六岁之优劣分别以定升降有枉徇者则监司弹之若令上下公相容过此为清议大

頽虽有考课之法亦无益已事不行会匈奴寇陇右除预秦州刺史领东羌校尉石鉴时为安西将军素憾预使预出兵擊之预以敌兵强马肥而官军悬乏须春进讨为陈五不可四不须鉴大怒奏预擅饰城门官舍稽乏军兴徵诣廷尉得以赎论其後陇右之事卒如预策是时朝廷皆以预明于筹畧会匈奴刘猛举兵反诏预以散侯定计省闕寻拜度支尚书乃奏立籍田建安边论处军国之要又兴常平仓定谷价较盐运制课调内以利国外以救边者五十余条帝皆纳焉时元皇后梓宫将迁于峻阳陵旧制既葬帝及羣臣即吉尚书奏皇太子亦宜释服预议皇太子宜复古典以谅闇终制从之预以时历差舛不应暑度奏上二元乾度历行于世孟津渡险数患覆溺预请建河桥于富平津衆咸谓殷周所都历圣贤而不作者必不可立故也预曰造舟为梁非河桥之谓乎及桥成帝从百僚临会举觴属预曰非君此桥不立也对曰非陛下之明臣亦不得施其巧周庙欹器至东汉犹在御坐汉末丧乱不存形制遂絶预翔意造成帝甚嘉叹焉咸寧四年秋大水螟预上疏以为宜敕兗豫等州留汉氏旧陂以蓄水余皆决令饥者得鱼菜螺蚌之饶此目下日给之益也水去之後填淤之田亩取数鍾此又明年之益也典牧种牛有四万五千余头可给民使耕种责其租税此又数年以後之益也帝皆从之民赖其利预在尚书七年损益庶政不可胜数朝野号为杜武库言其无所不有也时帝密有灭吴之计而朝议多违唯预及羊祜张华与帝意合祜病举预自代乃拜镇南大将军都督荊州诸军事预至镇简精銳袭吴西陵督张政大破之政吴之名将也耻败不以实告孙皓预欲间之乃表还其所获之衆于皓皓果召政还遣刘宪代之大军临至使其将帅移易以成倾荡之势预处分既定乃啓请伐吴之期帝报待明年预表陈至计旬月不报预复上表曰羊祜与朝臣不同密与陛下共施此计益令多异凡事当以利害相较今此举有利无害朝臣直以计不已出功不在身耻其前言故守之也自顷朝廷事无大小异意蜂起虽人心不同亦由恃恩不虑後难故也自秋以来讨贼之形颇露若今中止孙皓怖而生计徙都武昌更完修江南诸城远其居人城不可攻野无所掠则明年之计或无所及帝方与张华围碁预表适至华推枰斂手曰陛下圣明神武朝野清安号令如一吴主荒淫骄虐诛杀贤能当今讨之可不劳而定帝乃许之预以太康元年陈兵于江陵遣将樊显尹等率衆循江西上授以节度旬日间累克城邑又遣牙门周旨等率奇兵八百夜渡江袭乐乡多张旗帜起火巴山出于要害之地以夺贼心吴都督孙歆震恐与江陵督伍延书曰北来诸军乃飞渡江也吴之男女降者万余口旨等伏兵乐乡城外值歆军为王濬败归因随入歆不之觉遂直至帐下携歆而还军中謡曰以计代战一当万于是进逼江陵克之上流既平自湘南至交广州郡皆望风归命所斩获吴都督监军十四人牙门郡守百二十人又因兵威徙将士屯戍之家以实江北南郡故地各树长吏荆土肃然吴人赴者如归初诏王濬至建平当受预节度预以濬既得建平则顺流长驱威名已着不宜使受制于已遂与书曰足下既摧其西藩便当径取建业讨累世之逋寇释吴人于涂炭振旅还都亦旷世一事也时衆军会议以百年之寇未可尽克水潦方降疾疫或生宜更俟来冬大举预曰昔乐毅藉济西一战以并强齐今兵威已振譬如破竹数节之後皆迎刃而解无复着手处也遂径进秣陵所过城邑皆降孙皓既平振旅凯入进爵当阳侯还镇襄阳预以天下虽安不可忘战乃勤于讲武错置屯营分据要地又激用湓渚诸水以浸原田万余顷分疆定界公私同利衆庶赖之号曰杜父旧水道唯沔汉达江陵千数百里北无通路又巴丘湖沅湘之会表里山川实为险阻荆蛮之所恃也预乃开杨口起夏水达巴陵千余里内泻长江之险外通零桂之漕南土歌之曰後世无叛由杜翁孰识智名与勇功常自言高岸为谷深谷为陵乃刻二石碑纪其勋绩一沈万山之下一立岷山之上曰安知此後不为陵谷乎预

身不跨马射不穿札而用兵制胜辄出诸将右公家之事知无不为所兴造必考度始终鲜有败事接物以礼问无所隐既立功後乃耽思经籍为春秋左氏经传集解又参考衆家谱第谓之释例又作盟会图春秋长历备成一家之学比老乃成秘书监挚虞称之曰左丘明本为春秋作传而左传遂自孤行释例本为传说而所发明何但左传故亦孤行时时王济解相马又甚爱之而和峤颇聚敛预常言济有马癖峤有钱癖武帝闻之谓预曰卿有何癖对曰臣有左传癖预在镇数饷遗洛中贵要或问其故曰但恐为害不求益也其後徵为司隶校尉加特进行次邓县而卒时年六十三帝甚叹悼谥曰成预先为遗令处置葬事以俭自完子锡嗣

论曰自诸葛武侯以纶巾羽扇之风运筹决胜嗣後如羊祜之缓带轻裘杜预之身不跨马射不穿札并能御大衆有成功盖发纵指示智固在追杀者上韩卢虽鸷岂能争先于人哉叔子寬和恬让恂恂似儒者而元凯自谓庶几立功立言平吴之举释例之作不负平生期许矣虽然祜预皆魏臣以功名显于晋预又袭封祖爵者以是叹太上立德洵非功业文章之士所得企及也预可谓自知而不自欺者欤附燕

慕容恪

慕容恪字玄恭东胡鲜卑人燕王廆之孙皝之第四子僞庶弟也幼沈深有大度皝以其母高氏无宠未之奇也年十五身長八尺七寸雄毅严重每言皆经纶世务皝始异焉乃授之以兵从征伐临机数出奇策石虎以戎卒十万攻皝诸部叛应者三十六城左右劝皝降皝不听而遣恪率骑二千击之虎军惊遁恪乘胜追斩三万余级段辽遣使诈降于虎虎遣将麻秋率衆迎辽恪伏精骑于密云山大败之获其司马杨裕等拥辽及其部衆以归出为度辽将军镇平郭恪抚旧怀新屡破高丽兵高丽憚之不敢入寇常与僞俱伐夫余僞居中指授而已恪身当矢石所向辄溃皝将终谓僞曰今将建大事恪智勇俱济汝宜深委仗之僞嗣位弥加亲任遣讨冉闵闵趣常山恪追及于魏昌之廉台十战皆不胜闵素号骁勇又所将精锐燕将咸震憚之恪曰闵师老卒疲加以勇而无谋一夫敌耳可分军为三部闵性轻銳知吾军势不敌必致死于我我厚集中军之陈以待之俟其合战然後诸军犄角攻之蔑不克也乃择善射者五千人以铁锁连其马为方阵而前闵果直冲中军燕两军从旁夹击大破之禽闵斩于龙城已而闵部将王午复自号安国王午死吕护因袭其号保于鲁口恪进讨走之降其衆初段兰之子龁因乱拥衆东屯广固自号齐王与僞书抗中表之仪且数其称帝之罪僞怒遣恪讨之恪引兵济河龁率衆拒战恪击破之龁友辟闾蔚被创恪闻其贤遣使求之则已死矣恪大惋惜遂进围广固诸将请急攻之恪曰兵法有缓有急若彼我势均且有强援虑腹背受患者须急攻之如我强彼弱外无救应者当羈縻守之以待其毙龁虽凭阻坚城上下戮力若尽銳攻之则数旬可拔然杀吾士衆必多矣自有事中原兵不暂息吾每念之夜分忘寐何忍轻用其死乎军士闻之人人感悦遂筑室反畔严固围垒樵采路絶龁乃出降因悉定齐地留兵镇抚而归以累功拜大司马録尚书事封太原王及僞寢疾虑子暉不堪承嗣欲行宋宣之事以社稷付恪恪固辞僞怒曰兄弟间岂容虚饰恪曰陛下若以臣能荷天下之任者詎不能辅少主乎僞喜曰尔能为周公吾复何忧僞卒暉即位以恪为太宰专録朝政恪弟评为太傅慕輿根为太师副之时根自恃勋旧心内不服欲为乱乃言于恪曰主上幼冲母后干政俟毕山陵殿下宜自取之恪曰公醉耶何言之悖也吾与公受遗云何而遽有此议根愧谢而退恪以告吴王垂

垂劝恪诛之恪曰今新遭大丧二邻观衅而宰辅自相诛夷恐乖远近之望且可忍之根遂潜谋诛恪及评因以篡位恪知之乃密奏根罪状诛根并其党时内外汹惧恪举止如常人不见其忧色每出入一人步从或说以宜自严备恪曰人情扰扰正当安重以镇之奈何反自惊怖先是吕护复据野王潜通于晋闻僞丧谋引师袭邺恪率衆讨之护婴城自守将军傅颜请急攻之恪曰老贼经变多矣观其守备未易猝攻然内鲜宿粮外无强救我深沟高垒坐而守之休兵养士以离间其党不过十旬取之必矣何为多杀士卒以徼旦夕之功乎乃筑长围守之自三月至八月而野王溃护奔晋寻而来归恪虽综大任而在朝兢兢循礼进止有常每事必与评议之归第则尽心色养手不释卷虚襟待物谏纳善言量才授任人不踰位朝臣或有过失不显其状随宜他叙人以为大媿莫敢犯者至相责曰尔复欲望宰公迁官耶初晋君臣闻僞卒皆以为中原可图桓温曰慕容恪尚在忧方大耳恪将取晋洛阳先遣人招纳土民远近诸坞皆归之分遣其将攻陷河南诸垒遂进克洛城执晋将沈劲劲不屈而死恪因略地至崤崤关中大震苻坚自将屯陕城以备之及还邺谓僚属曰吾前平广固不能济辟闾蔚今定洛阳使沈劲为戮虽皆非本情实有愧于四海恪为将不尚威严专以恩信御物军士有犯法者密纵舍之捕斩其首者以徇营垒不求整齐而防御甚严终无丧败及有疾虑暉闇弱而评性复猜忌乃召暉兄乐安王臧谓之曰吾受先帝顾托之重不能扫平秦吴嗣成遗志歿有余恨大司马总统六军不可任非其人吴王智略超世吾死後当以此授之汝等虽才识明敏然未堪多难不可冒利忘害以致大悔也又以告评月余疾笃暉亲临问以後事对曰吴王垂文武兼才管萧之亚若任以政国家可安不然恐秦晋必有窥窬之计言讫而卒其後王猛入邺城令严无犯燕民安堵更相谓曰不图今日复见太原王猛闻之叹曰慕容玄恭可谓古之遗爱矣为设太牢以祀之

论曰自来偏安窃霸之主虽因乱乘衅亦必有非常命世之才借之羽翼如慕容恪于燕王猛于秦皆智深勇沉晓畅时务观其运筹决胜不啻指诸掌亦一时之瑜亮也恪生长深宫而器识远到才猷练达固远过其父兄当僞寝疾时恪威命已行于境恩信复结于民托先君之命抗弟及之礼宜不难取而有之然卒守臣节百折不变彼曹孟德司马仲达欺人孤儿寡妇以有天下者直当愧死入地矣

附秦

王猛

王猛字景略北海剧人也家于魏郡少贫贱以鬻畚为业瓌姿博学倜傥有大志不屑细务人皆轻之猛悠然自得隐居华陰闻桓温入关被褐诣之扪虱而谈当世之务旁若无人温大异之问曰吾奉天子命为民除残而三秦豪杰罕有至者何也猛曰公不远数千里深入敌境今长安咫尺而不渡灞水百姓未知公心所以不至温默然徐曰江东无卿比也乃署猛军谘祭酒欲与俱还猛还山见其师师曰君与桓温岂并世哉因辞不就时苻坚将图大事闻猛名遣吕婆楼招之一见如旧语及时事坚大悦自谓如昭烈之遇孔明也及坚僭位以为中书侍郎时始平多新附之衆刼盗充斥乃转猛始平令甫下车即澄察善恶约束强豪以鞭杀吏人为有司劾奏徵下狱坚亲诘之曰政以德化为先卿何酷刑乃尔猛曰臣闻宰平国以礼治乱国

以法臣不才忝任剧邑谨为陛下除凶慝以安善良始杀一奸余尚万数若以臣为不能肃清轨法者敢不甘心鼎鑊酷刑之罚臣实不敢冒受坚谓羣臣曰王景略固是夷吾子产一流也左仆射李威亦劝坚以国事委猛乃赦之迁尚书左丞猛遂举异才修废职课农桑恤困穷立学校旌节义秦民大悦由是日亲幸用事勲旧多疾之樊世本氏豪初随坚伯父健克定关中有功谓猛曰吾辈畊之君食之耶猛曰非徒使君畊之又将使君炊之世大怒曰要当悬汝头于长安城门猛以白坚坚曰必杀此老氏会世入言事与猛争论于坚前欲起擊猛坚怒杀之进猛侍中中书令领京兆尹时疆太后弟德酺酒豪横猛收德奏未及报已陈尸于市坚使驰赦之不及猛与御史中丞邓羌同志嫉恶纠案无所顾忌数旬之间权贵以罪诛者二十余人豪右屏息路不拾遗坚叹曰吾今始知天下之有法也更以猛兼司隶校尉居中宿卫猛荐阳平公融光禄任羣处士朱彤自代坚不许而皆擢用其所荐者猛时年三十六岁中五迁权倾内外宗戚旧臣皆害其宠尚书仇腾丞相长史席宝数譖毁之坚大怒黜二人自後上下咸服羣臣莫敢复言晋太和元年坚使猛率衆寇晋荆州掠万余户而还是岁苻双苻柳叛于坚苻庾苻武并应之坚遣使谕降不受猛与邓羌张蚝等奉命讨平之四年晋桓温伐燕燕遣使乞师于坚请割武牢以西之地朝臣皆不许猛曰燕虽强大慕容评非温敌也若温举山东进屯洛邑收雍冀之兵引并豫之粟观兵崤崤则陛下大事去矣不如与燕合兵退温温退燕亦病矣然後我乘其敝而取之不亦善乎坚从之遣苟池邓羌等率兵救燕败温于谯而还时燕慕容垂避害来奔坚郊迎之以以为冠军将军并其子令及楷皆厚礼之猛谓坚曰垂父子譬如龙非可驯之物若借以风云将不可复制不如早除之坚不纳桓温既退燕悔前割地之词坚大怒遣猛及邓羌等帅师取洛阳猛初发长安请慕容令参其军事以为乡导将行坐垂饮酒从容谓曰今当远别何以赠我垂脱佩刀赠之既至洛猛洛垂所亲使诈为垂使者谓令曰王猛疾人如仇秦王心亦难知闻东朝比来悔寤吾今还东汝可速发令踴蹶终日又不可审覆乃奔燕军猛遂表令叛状垂惧而出走为追骑所获坚劳之礼待如旧猛拔洛阳城留兵镇之乃归以功封平阳郡侯加司徒録尚书事猛固辞曰今戎车方驾始得一城即受三事之赏若克殄二寇将何以加之坚不得已乃寝司徒尚书之命五年六月遣猛督邓羌等十将率步骑六万伐燕坚亲送之灊上谓曰今委卿以关东之任吾当继卿星发相见于邺已敕漕运相继但忧贼不烦後虑也猛对曰臣仗威灵奉神算荡平残燕如风扫叶不烦銮輿亲犯尘雾但速敕所司部置鲜卑之所坚大悦猛于是进克壶关所过郡县皆望风降附燕人大震兵入晋阳进与慕容评相持于潞川遣邓羌郡将徐成觐燕军过期乃返猛将案军法斩之羌为固请愿以战赎罪猛弗许羌怒还营勒兵将攻猛猛乃赦之羌诣猛谢猛执其手曰吾试将军耳将军于郡将尚尔况国家乎猛闻评贪鄙士皆怨愤莫有鬪志叹曰慕容评奴才也虽衆何所用之乃陰遣骑五千夜从间道出评营後烧其輜重火见邺中燕主暉遣使让评且趣进兵评惧请战猛陈于渭源而誓衆曰王景略受国厚恩任兼内外今与诸君深入贼地当竭力致死有进无退共立大功以报国家受爵明君之朝称觴父母之室不亦美乎衆皆踊跃破釜弃粮大呼竞进猛望燕兵之衆也恶之谓邓羌曰今日非将军不能破此勍敌将军勉之羌曰若能以司隶见与者公勿以为忧猛曰此非吾所及也必以安定太守万户侯相处羌不悦而退俄而兵至猛召羌羌寝弗应猛驰就许之羌乃大饮帐中与张蚝徐成等跨马运矛驰赴燕阵出入数四旁若无人所杀伤数百及日中燕兵大败俘斩五万余人乘胜追击又降斩十万于是进师围邺坚闻捷乃自率精銳十万赴之猛潜出迎于安阳臣主相见甚懼遂入邺定燕令严政简秋毫无犯远近帖然安之军还进封清河郡侯赐以妾妓车马甚盛固辞不受留镇冀州听以便

宜从事简召英隽以补关东守宰居数月上疏曰臣前所以朝闻夕拜不避艰虞者正以方难未夷军机权速庶竭命戎行敷宣皇威今宏化已熙六合清泰敢披贡丹诚请避贤路设官分职各有司存岂应孤任愚臣以速倾败愿徙授亲贤济臣颠坠若以臣有微劳乞待罪一州効尽力命坚不许使尚书梁说诣邳谕旨视事如前俄入为丞相中书监尚书加都督中外诸军事猛表让久之坚曰卿昔螭蟠布衣朕龙潜弱冠属世事纷纭朕拟卿为卧龙卿亦异朕于一言精?神交千载之会自卿辅政几将二纪内厘百揆外荡羣凶天下向定彝伦始叙朕且欲从容于上望卿劳心于下遂不许後数年复授司徒猛复上疏曰臣闻乾象盈虚惟后则之位称以才官非则旷郑武翼周仍世再咏王叔昧宠政替身亡臣何庸狷而应斯举昔东野穷馭顔子知其将敝愿回日月之鉴矜臣後悔坚竟不从委任益笃常敕其诸子宏丕等曰汝事王公当如事我也时广平麻思流寓关右请归葬其母猛谓思曰便可速装是暮已符卿发遣及始出关郡县已被符管摄其下令如流水皆此类也猛宰政公平黜尸素拔幽滞官必当才刑必当罪外修兵革内务畊作崇儒兴学教以廉耻由是国富兵强战无不克秦国大治性刚明于善恶尤分微时一殮之惠睚眦之忿靡不报焉其年寝疾坚亲祈南北郊宗庙社稷分遣诸臣祷河岳诸祀殆遍疾少瘳为赦境内殊死以下及笃猛疏谢并言时政多所宏益坚览之悲动左右亲临其第问以後事猛曰晋虽僻处江南然正朔相承上下安和臣没後愿勿以晋为图鲜卑西羌我之仇敌终为人患宜渐除之以便社稷言终而卒时年五十一比敛坚三临哭谓太子宏曰天不欲使吾平一六合耶何夺吾景略之速也葬之如霍光故事谥曰武朝野巷哭三日

论曰王猛桓温并一时人豪而覲面遇之交臂失之弃雄才以资强敌固温之不能为国荐贤亦天不欲使海内混一也猛才气出温右而识又胜之固自知不为温容即温能下猛而典午诸君皆碌碌守文非可与大有为者观其在秦二十余年君臣鱼水终始勿间乃得展其夙抱揆文奋武拓境安民虽诸葛治蜀无以远过猛固可大用而坚实能尽其用也猛刚明有余寛厚不足其激杀樊氏诈叛慕容皆非君子长者之道盖管商杂霸余习视武侯之忠诚宏雅气象固殊焉然临终犹系心江南不忘正朔则知其用秦固有大不得已者而温跋扈朝廷睥睨天位一则流芳百世一则遗臭万年固宜相遇之差池矣南朝宋

沈庆之

沈庆之字弘先吴兴武康人也少有志力晋孙恩之乱使其衆寇武康庆之随乡族屡击却之遂以勇闻後以邑里流散躬耕作苦年四十省兄于襄阳竟陵太守赵伯符署为寧远中兵参军为设规略击破蛮寇伯符由此有将帅名永初二年除殿中员外将军又随伯符隶到彦之北伐伯符病归又隶檀道济道济以庆之忠谨晓兵称于文帝使领队防东掖门稍得出入禁省领军刘湛欲相引接谓曰卿在省岁久比当相论庆之正色曰下官在省十年自当有转不敢以此仰累寻转正员将军及湛被收之夕上开门召庆之庆之戎服履屨缚袴而见上惊曰卿何意乃尔急装对曰夜半唤队长诘容缓服遣收吴郡太守刘斌杀之元嘉十九年雍州羣蛮缘沔为寇以庆之为建威将军进讨大破之後为孝武帝抚军参军随征蛮寇屡有功前後降获五万余口还京师复为广陵王诞参军加建威将军南济陰太守率参军柳元景随郡太守宗慤等伐沔北诸蛮八道并进先是诸将讨蛮者皆营于山下蛮得据矢石官军以是失利

庆之乃谓诸军曰今若缘山列旆仍中蛮故智又去岁蛮田大稔积谷重岩不可与之旷日持久也若出其不意登山据险以冲其腹心蛮必震恐破之决矣於是皆鼓噪而登蛮大骇溃自冬至春因粮蛮谷顷之蛮复叛攻郡城遣柳元景救之未至而郡破元景追之为衆所围宗慤率衆先登衆军齐奋大破之威震羣蛮庆之素患头风好着狐皮帽羣蛮号曰苍头公每见庆之军辄奔散曰苍头公复来矣又讨犬羊诸山蛮蛮凭险筑城守御尤固庆之乃令诸军连营于山中开门相通朝夕不外汲蛮潜兵夜来烧营诸军辄以池水沃火多出弓弩夹射之蛮惊遁又置六戍以围之久之蛮食尽稍稍请降凡获七万余口悉迁建康以为营户二十七年迁步兵校尉时又议北伐庆之谏曰马步不敌为日久矣檀道济再行无功到彦之失利而还今料王玄谟未踰两将六军之盛不过往时恐重辱王师难以得志上曰道济养寇自资彦之中途疾动敌所恃惟马今河水疏通泛舟北指则碣磔必走滑台易拔虎牢洛阳自然不固庆之又极陈不可上使徐湛之江湛于坐中难之庆之曰畊当问奴织当访婢今伐国而与白面书生辈谋之事何由济上大笑及军行以庆之副王玄谟并受萧斌都督斌与庆之留守碣磔令玄谟攻滑台积旬不拔斌遣庆之将五千人助之庆之曰少军轻往无益也会玄谟遁还斌欲斩之庆之固谏乃止斌遂欲死固碣磔庆之以为不可会诏使至不聽退师斌复召与议庆之曰将军得专阃外诏从远来不知事势节下有一范增而不能用空议何施斌及坐者并笑曰沈公乃更学问庆之厉声曰衆人虽见古今不如下官耳学也斌乃以玄谟戍碣磔而自还历城庆之驰驿归上问曰斌欲斩玄谟卿何以谏止对曰诸军奔退莫不惧罪若自归者皆死终至逃散故止之二十九年复更北伐以庆之立议不同不使北出时亡命司马黑石等譟动羣蛮自淮至沔皆罹其患遣庆之督军讨之三十年又以孝武帝总统羣帅屯于五洲庆之自巴水来谄受方略会得元凶弑逆之问庆之密谓腹心曰萧斌妇人不足数东宫同恶不过三十人此外屈逼必不为用今辅顺讨逆蔑不济也时劭密与庆之书令杀孝武帝庆之入求见帝辞以疾庆之突前以书呈帝泣求入与母诀庆之曰下官受先帝厚恩今日之事唯力是视殿下何疑之深帝起再拜曰国家安危皆在将军庆之即命内外勒兵主簿颜竣驰见帝曰今四方未举义师而劭据有天府若首尾不相应此危道也宜待诸镇協谋乃行庆之怒曰今举大事而黄头小儿皆来参预何得不败宜斩以徇帝令竣拜谢庆之乃曰君但当知笔札事耳于是处分旬日内外整办时皆谓神兵军至寻阳劭遣庆之门生钱无忌齎书说以解兵庆之执无忌白之劭既伏诛孝武即位拜领军将军南兖州刺史封南昌郡公鲁爽反帝遣讨之临阵斩爽进镇北大将军开府仪同三司改封始兴郡公自以年方七十固请辞事表数十上至稽顙自陈言辄流涕乃诏听以公就第已而复使何尚之往起之庆之笑曰沈公不效何公往而复反也大明三年广陵王诞反复起庆之往讨诞遣人齎书饷以玉环刀庆之遣还数其罪恶比至城下诞登楼谓曰沈公白首之年何为来此庆之曰朝廷以君狂愚不足劳少壮故使仆来耳乃塞堑造攻道立行楼土山及诸攻具诞复饷庆之食提挈者百余人庆之不开悉焚之诞于城上投表令送帝庆之曰我奉诏讨贼不得为尔送表汝必欲归死朝廷自应开门遣死吾为汝护送每攻城庆之辄身先士卒上诫之曰卿但处分有方何乃亲受矢石自四月至七月乃屠城斩诞进司空固辞归第庆之家素富产业累万金一夕尽徙亲戚中表同居于娄湖以宅输官非朝贺不出门车马率素从者三五人遇之者不知其为三公也每从游幸及校猎据鞍凌厉不异盛年当讌饮羣臣帝强令赋诗庆之曰臣不知书请口授师伯书之乃吟曰微生遇多幸得逢时运昌朽老筋力尽徒步还南冈辞荣此圣世何愧张子房帝大悦衆坐并称其词意之美帝崩与柳元景等同受顾命及废帝子业立加几杖赐三望车庆之谓人曰我

每游田园有人时与马成三无人则与马成二今乘此车安所之乎并固让不受柳元景颜师伯尝诣之鸣驺满路会庆之独与一仆在田乃悄然改容曰吾侪素贫贱际会及此当共惟挹损之美老子八十之年目见成败多矣安用炫此车服为遂植杖而芸不顾元景等撤侍从徯之乃欢对竟日庆之既通贵里老素轻之者皆膝行而前庆之叹曰故是昔时沈公诸沈中为刳首者数十庆之诡为置酒大会并杀之合境肃清帝既狂悖衆劝之废立蔡兴宗尤反覆开谕其弟子文秀亦再三言之至泣下终执不可及柳元景等谋立义恭以告庆之庆之遽发其事皆伏诛进侍中太尉而帝凶暴日甚庆之犹强谏帝寢不悦及诛何迈虑庆之不同知其必谏乃闭清溪诸桥以絶之庆之果往不得渡而还帝乃遣其从子攸之齎药赐死诈言病卒时年八十諡曰忠武明帝即位追赠侍中司空諡曰襄

论曰沈庆之目不知书而审几决策往往闇与古合忠事三朝至老逾笃而功成身退不以宠利居之视霍光之盛满不戒者识量固殊焉然当子业时以纵欲败礼之君值衆畔亲离之会而违公议不定大计自谓竭股肱之力继以忠贞不知古人所谓计安社稷以康先帝之灵者殆有权焉使三祖之子孙臣庶几无遗育卒亦下不保其身上不济其君宋事自是不可为矣彼盖目见夫徐美之傅亮辈废义符立文帝卒以诛戮故徘徊隐忍甘以身殉悲夫

南朝梁

韦叡

韦叡字怀文京兆杜陵人汉丞相贤之後父祖归宋寧远长史叡少好学事继母以孝闻其从父祖征累为郡守每携叡之官视如己子时叡内兄王愷姨弟杜恽并负乡里盛名祖征谓叡曰汝视愷恽文章或小减学识当过之至于干国家成功业皆莫汝逮也外兄杜幼文为梁州刺史要与俱行梁土富饶往者多以贿败叡虽幼独以廉闻永元初为雍州刺史袁顓主簿顓与邓琬起兵叡因求出为义成郡遂免顓祸及齐末多故思还乡里乃求为上庸太守时陈显达崔慧景频逼建邺衆惶骇莫知所从叡曰臣非命世才崔亦懦而不武天下真人殆兴于吾州矣乃遣二子自结于梁武及兵起檄至叡率郡人倍道赴之帝抚几喜曰吾事就矣义师克郢鲁平茄湖叡多建策皆见用大军发郢即日以为江夏太守行郢州府事初郢城之拒守也男女垂十万闭垒经年疫死者十七八皆积尸牀下而生者寝处其上每屋盈满叡料简隐恤咸为营理百姓赖之帝即位累迁豫州刺史领历阳太守率州兵击走魏寇天监四年诏叡督军北伐叡遣冯道根等攻魏小岷城未拔叡巡行围栅魏城中忽出数百人陈于门外叡欲击之诸将请还授甲而後进战叡曰彼城中二千余人足以固守今无故出人于外必其骁勇者也若能挫之其城自拔衆犹迟疑叡指其节曰朝廷授此非以为饰韦叡法不可犯也乃皆殊死战魏兵败因急攻之中宿而拔遂进讨合肥先是右军司马胡景略等攻合肥久未能下叡夜堰肥水舟舰大通先攻其东西二小城会魏援军五万奄至衆惧请奏益兵叡笑曰贼至城下虽请何及且吾益兵彼亦能益兵兵贵用奇岂在衆也遂击破之时叡遣军主王怀静筑城以守堰魏人攻拔之遂乘胜至堤下兵势汹涌诸将欲还叡怒命取繖扇麾幢于堤下树之示无动志魏人来凿堤叡亲与争之兵少却因筑垒于堤以自固叡起鬪舰高比合肥城四面临之魏城中皆哭守将杜元伦中弩死城遂溃俘斩万余级叡体素羸未尝跨鞍马每战常乘板

輿督厉将士勇气无敌昼接宾旅夜算军书张灯达曙抚其衆常如不及故投募之士争归之所至顿舍馆宇藩墙皆应准绳进次东陵有诏班师诸将以去魏璧城甚近恐其追蹙叡悉遣輜重居前身乘小輿殿後魏人慑其威名望之不敢逼全军而还于是迁豫州治于合肥五年魏中山王元英与将军杨大眼等攻北徐州围刺史昌义之于锺离军于邵阳洲义之拒守六旬城几溃者数四帝命叡救之受曹景宗节度叡自合肥由陰陵大泽行值涧谷辄飞桥以济师时魏军甚盛多劝缓行叡曰锺离今凿穴而处负户而汲车驰卒奔犹恐其後而况缓乎敌已堕吾腹中卿曹勿忧也旬日而至邵阳初帝敕景宗曰韦叡卿乡望宜善敬之景宗见叡甚谨帝闻曰二将和师必济矣叡于景宗营前二十里夜掘长堑树鹿角截洲为城比晓而营立元英惊曰是何神也城中知有外援士气百倍时杨大眼勇冠三军将万骑来战所向皆靡叡结车为阵大眼聚骑围之叡以强弩二千一时俱发杀伤甚衆矢贯大眼右臂大眼退走明日英自率衆战叡乘素木輿执白角如意以麾军一日数合英憚而退至夜复攻城飞矢雨集叡子黯请下城避箭军中皆惊叡于城上厉声诃之乃定魏人先夹洲两岸为桥树栅数百步跨淮通道叡装大舰与桥等会三月淮水暴涨即遣鬪舰进临贼垒别以小船载草灌膏焚其桥风怒火炽募死士拔栅斫桥倏忽俱尽诸将皆身自搏战军人奋勇呼声动天地魏军大溃英单骑遁走大眼亦焚营去诸垒土崩渰死者十余万斩首亦如之缘淮百余里尸相枕籍生禽五万人收其资粮器械山积以功进爵永昌侯寻拜南郡太守会司州刺史马仙?自北还军为魏兵所蹙三关扰动诏叡督军援焉叡至安陆增筑城二文余更开大堑起高楼衆颇讥其怯叡曰为将当有怯时不可专勇时元英急追仙?将复邵阳之耻闻叡至乃退十四年拜雍州刺史初叡起兵乡中客陰僞光泣止叡及为州僞光道候叡笑曰若从公言乞食于路矣饷耕牛十头叡于故旧无所遗乡里皆怀其德明年表致仕不许寻徵为散骑常侍护军将军入直殿省居朝廷恂恂未尝忤视帝甚礼敬之性慈爱抚兄孤过于己子所得禄赐皆散之亲族暇日犹课诸儿以学第三子棱尤明经洽闻叡每坐使说书其所发摘棱犹弗之逮也时帝方銳意释氏士民从风而靡叡独不与衆俯仰所行略如平日普通元年迁侍中车骑将军未拜卒年七十九帝临哭甚恻諡曰严叡有雅度涖人以爱惠为本所居皆有政绩虽在军中被服必于儒者初邵阳之捷昌义之甚德叡与景宗设钱二十万官睹之景宗掷得雉叡徐掷得卢遽取一子反之曰异事遂作塞时羣帅争先告捷叡独居後世尤以此贤之

论曰太史公疑子房以为魁梧奇伟至考其状貌乃如妇人女子韦叡以羸瘠之躯指麾板輿之上出奇制胜威震敌国纶巾缓带之风流岂复远哉夫上有好下必有甚习俗移人贤者不免方梁武佞佛举国若狂明经如徐勉而言孔释之同行身如江革而受菩萨之戒独叡毅然不少回惑可谓笃信好学矣其遇敌不惧有功不伐皆定力使然非能强而致也北朝齐

斛律光

斛律光字明月朔州敕勒部人也祖那瓌魏光禄大夫父金齐咸阳郡王太师左丞相光少而雄杰寡言笑尤工骑射年十七从金西征宇文泰长史莫孝晖在行间光驰射中之因擒于阵擢都督尝从高澄猎洹桥见云表一大鸟引弓正中其颈形如车轮旋转而下乃鵬也时号落鵬都督齐受禅进爵钜鹿郡公以累战克捷官尚书令司空司徒河清二年诏光督步骑二万城軹关仍筑长城二百里置十二戍三年周遣齐公宪及尉迟迥王雄等来攻洛阳光率骑拒

战雄驰马冲阵光伪退雄追之按稍不及光者丈余欲生擒光光惟余一矢射雄中额杀之周师大败迴宪仅而获免遂筑京观于洛迁太尉初周人尝惧齐兵西渡每至冬月守河椎冰及是齐嬖幸用事军政渐弛反椎冰以备周兵之逼光每忧之曰国家常有吞关陇之志今日至此而惟翫声色乎武平元年春大败周师于宜阳进右丞相其冬又率骑兵于玉壁筑华谷龙门二城与周师相持周人憚不敢进二年率衆筑平陇等镇戍十三所周将韦孝寛等来逼光与战于汾水大破之又与周将纥干广略大战于宜阳城下取建安等四戍捕虏千余人而还未至邺後主敕令散兵光以军士有功未得慰劳乃密表请使宣慰而朝廷迟留不发军还将至紫陌光驻营待使帝闻心甚?之急追光入见然後宣劳散兵进光左丞相初後主弟琅邪王俨为中丞性明毅恶和士开陆令萱穆提婆等专权间构使冯子琮奏士开罪状执而斩之于台俨亲信因逼俨帅兵士三千人屯千秋门欲并诛提婆母子後主急召光入光闻俨杀士开拊掌大笑曰龙子所为固自不似凡人因入内见後主方帅宿卫授甲出战光曰小儿辈弄兵与交手即乱鄙谚云奴见大家心死至尊宜自至千秋门琅邪必不敢动後主从之光步道使人走出曰大家来俨徒骇散齐主遥呼之俨犹立不进光就谓曰天子弟杀一夫何所苦执其手强引以前请于後主曰琅邪王年少轻为举措稍长自不然後主拔刀环筑其辮头良久乃释後主又欲尽杀俨府吏光曰此皆勲贵子弟诛之恐人心不安于是罪之有差时祖珽媚于令萱势倾中外光谓诸将曰边境消息兵马处分盲人全不与吾辈语恐误国事珽觉之私赂光从奴问焉奴曰自公用事相王每夜抱膝叹曰盲人入国必破矣穆提婆又尝求娶光庶女不许後主赐提婆晋阳田光言于朝曰此田神武以来尝种禾伺马以备寇难今赐提婆母乃阙军务乎由是祖穆并怨之其女为皇后又无宠于後主珽因间之会周将韦孝寛警光威名作为谣言使谍宣之于邺曰百升飞上天明月照长安又曰高山不摧自崩櫟树不扶自举珽因续之曰盲老公背受大斧饶舌老母不得语使其妻兄郑道盖奏之珽与令萱因解之曰百升者斛也盲老公谓珽饶舌老母似谓陆氏也且斛律累世大将光声震关西光弟羨威行?厥女为皇后男尚公主谣言甚可畏也後主以问韩长鸾长鸾不可事遂寢既而丞相府佐封士让密启云光前西讨还逼帝城将行不轨家藏弩甲奴僮千数若不早图恐事不可测後主召珽问之珽请遣人赐以骏马光必入谢因而执之後主如其言光入至凉风堂刘桃枝自後扑之不仆光顾曰桃枝常作如此事我不负国家遂与三力士共拉杀之血流于地剗之迹终不灭于是下诏称其反并杀光二子珽使郎官邢祖信簿録光家仅得弓十五宴射箭百刀七赐稍二珽问更得何物祖信曰得枣杖二十束拟奴仆与人鬪者不问曲直即予杖一百珽大慙及出人尤其亢直祖信慨然曰贤宰相尚死我何惜余生光居家严肃性节俭简声色门无宾客杜絶馈饷每朝廷会议常独後言言辄合理行兵效其父金之法望尘知马步多少嗅地知军度远近营舍未定不先入幕或竟日不坐身不解甲常为士卒先有罪者惟大杖挝背终不妄杀士衆皆争为之死宜阳之役谓周人曰归我七年人不然取尔十倍周人即归之在西境筑诸城戍马上以鞭指画而成拓地五百里不伐其功结髮从军未尝败北深为敌人所憚周武闻其死为赦境内後入邺追赠上柱国崇国公指诏书曰此人若在朕岂得至此以其小子锤袭封焉

论曰北齐之先本以诈力逆取人国其子孙复不顺守当时诸将相非跋扈则倾邪其号称佼佼者仅杨愔斛律光二人而已愔聪明才力综机务典选举均不忝厥职然身为人臣而妻母后位极宰相而执厠筹败闲荡检莫斯为甚及当主少国疑进无御乱之勇退无保身之智其

召祸盖亦宜然明月之与遵彦虽皆不得其死然彼死于强臣则呼吸犹有可转之机此死于闇主则天壤更无可逃之义事固有不容例论者先儒胡氏以为光既不能明告于君正诸奸误国之罪又不能委权而退以免于满溢夫不仁不可与言亲如俨尊如叡业有明徵光以累世勲旧又无可去之道计惟一死报国耳光小心俭约忧国忘家邦以其存亡为安危敌以其死生为庆吊可谓世臣其人乃其歿也尚得邀异代之褒于仇讐其生也曾不得回一朝之听于君父万里长城顿自坏之岂独天之降罔哉

隋

牛弘

牛弘字里仁安定鹑?人也其先尝避难改姓辽氏祖炽本郡中正父允魏侍中工部尚书临泾公始复姓焉弘伟容貌好学博闻在周袭父爵隋开皇初授散骑常侍秘书监以典籍散佚表请开献书之路于是诏献书一卷赀缣一匹未三年篇帙大备进爵奇章公三年拜礼部尚书奉敕撰五礼百卷弘请依古制修立明堂上述黄帝尧舜殷周遗制又广引郑康成马宫刘向马融服?蔡邕卢植王肃诸大儒注解辨驳别白请以礼经为本形制依于周法度数取于月令遗阙之处参以余书庶使该详沿革之理上飡帝配祖下宏风布教时帝以草创未遑制作竟寢不行六年除太常卿寻诏定雅乐又作乐府歌词撰定圜丘五帝凯乐并议乐事弘博采扬雄刘歆蔡邕诸书进议且言律本十二今直为黄锺一均惟用七律此外五律竟复何施须依礼作旋相为宫之法又论六十律不可行引京房书反覆辨证上甚善其议又以华夏正声多在江左今得梁陈旧乐器请加修葺以备雅乐其後魏後周杂有边裔之器当悉停之乃诏弘与许善心姚察等参定帝终信何妥之言不聽用旋宫法及新乐成淫厉而哀识者叹其不久焉时杨素恃才贵倨惟见弘未尝不改容素将击突厥诣弘别弘送至中门而止素曰吾以远征来别何相送之近弘竟揖而退素笑曰奇章公可谓其知可及其愚不可及也献皇后崩王公以下莫能定其仪注素以属弘弘了不辞让斯须具备皆有故实素叹曰衣冠礼乐尽在此矣进吏部尚书每选举必先德行而後文才务在审慎虽致停缓而所进用多称职侍郎高孝基鉴赏机悟清慎絶伦然爽俊有余迹似轻薄时宰多以此疑之弘独推心任委得人为多时服其识度大业初进上大将军右光禄大夫从拜恒岳凡坛墠牲币皆弘所定又诏弘与旅骑尉刘炫等造新律十八篇时征役繁兴有司临时迫胁以求济事不复用律令弘尝从容谓炫曰周礼士多而府史少今令史百倍于前减则不济其故何也炫曰古人委任责成岁终考其殿最案不重校文不繁悉府史之任掌要目而已今之文簿恒虑覆治若锻链不密则百年之久万里之遥皆须追证前案事繁政弊职此之由故曰省官不如省事也弘咨叹称善六年从幸江都卒贈葬甚厚贈开府仪同三司文安侯謚曰宪弘荣宠当世而行已俭恭言常呐呐不能出性寬厚虽职务繁杂书不释手弟弼醉酒射杀弘驾车牛弘还其妻迎谓曰叔射杀牛弘闻无所怪问直答云作脯坐定其妻又言弘曰已知之矣顔色自若读书不辍其孝友弘缓皆此类也

论曰史言隋室旧臣始终信任悔吝不及者惟弘一人以隋文之猜隋炀之暴而周旋数十年不罹其难倘所谓默足以容者乎开皇以来土宇既一海内富强正礼乐可兴之日夫明堂者

礼之大也鍾律者乐之微也弘该洽典文言论皆则古称先非苟而已使得圣明之主探其本而敬用之礼行则不争既衆着于父子君臣之义乐达则无怨又陰消其放僻邪侈之心内和外顺揖让而治天下者莫善于此岂复有弑夺于上而寇攘于下者乎孔子曰人而不仁如礼何人而不仁如乐何观隋氏父子益信

史传三编卷四十六

卷四十七

钦定四库全书

史传三编卷四十七

大学士朱轼撰

名臣续传四

唐

李大亮

李大亮京兆泾阳人有文武才略高祖入关大亮自归授土门令方岁饥境多盗贼大亮招亡散抚贫?卖所乘马稍稍资业之劝垦田岁大熟间出击盗所至辄平秦王行北境下书獎劳赐马五乘帛五十段顷之贼大至大亮度不能拒乃单马诣营说豪帅为分别祸福贼衆感服遂相率降大亮杀所乘马与之食至步而返帝闻之悦擢金州总管府司马王弘烈据襄阳诏大亮安抚樊邓因图之进击下十余城迁安州刺史复使徇广州至九江会辅公祐反以计禽其将张善安公祐方围猷州刺史左难当固守大亮率兵击走之迁越州都督贞观初徙交州封武阳县男召授太府卿复出凉州都督尝有台使见名鹰讽大亮献之大亮密表曰陛下絶畋猎久矣而使者求鹰信陛下意邪乃乖昔旨如其擅求是使非其才太宗报书曰有臣如此朕何忧赐荀悦汉纪曰悦议论深博极为政之体公宜绎味之时突厥亡帝遂欲怀四裔诸部降者人赐袍一领帛五匹首领拜将军中郎将列五品者羸百员又置降裔于河南诏大亮为西北道安抚大使大亮上言臣闻绥远必自近诸称藩请附者宜羁縻受之使居塞外畏威怀德永为藩臣臣愚愿停招慰省劳役使边人得就农晦此中国利也帝纳其计八年为劔南道巡省大使会讨吐谷浑为河东道行军总管与李靖俱出北道涉青海观河源与贼遇蜀浑山大战破之俘其名王获杂畜数万进爵为公拜右卫大将军晋王为皇太子诏大亮兼右卫率又兼工部尚书身三职宿卫两宫每番直常假寐帝劳曰公在我得酣卧十八年幸洛阳诏副房玄龄居守玄龄称有王陵周勃节可倚大事俄寝疾帝亲和药驿赐之临终表请罢辽东役又言京师宗庙所在愿以关中为意就橐叹曰吾闻男子不死妇人手命屏左右言终卒年五十九将敛家无珠玉为含惟贮米五斛布三十端帝哭为恸赠兵部尚书秦州都督谥曰懿陪葬昭陵大亮性忠谨外若不能言而内刚烈不可干非其义对天子争是非无回挠至妻子未始见惰容事兄嫂以礼闻位通显居陋狭甚在越州写书数百卷及去留都督署初破公祐以功赐奴婢百口谓曰而曹皆衣冠子女不幸破亡吾何忍录而为隶乎纵遣之高祖闻咨美更赐俚婢二十後破吐谷浑复赐奴婢百五十口悉以遗亲戚葬宗族无後者三十余柩赙加焉尝以微时张弼脱其死及贵念有以报之时弼为将作丞匿不见大亮求之不能得一日识诸涂持弼泣悉推家财与之弼拒不受乃言于帝曰臣及事陛下弼力也愿悉臣官爵授之帝为

迁弼中郎将代州都督世皆贤大亮能报而多弼不自伐也歿後所育孤姓为大亮行服如所亲者十余人

论曰大亮位封疆居职守征伐平定之功不及英卫谟猷弼亮不及房杜王魏马褚诸公然观其随事指陈及临没辽东一疏抑亦可以知其概矣盖太宗用之有不尽其才也大亮读书识义理?韬略修门内行厚于天性徽烈尤堪仰企云

张玄素

张玄素蒲州人隋末以小吏任景城县户曹建德乱被执将杀邑人千余号泣请代曰此清白吏杀之是无天也大王即定天下无使善人解体因得释秦王世民平建德以为景州录事参军即位召问治道对曰隋主自专庶务不任羣臣以一人之智决天下之务借使得失参半乖谬已多下谏上蔽不亡何待陛下诚能择羣臣而分任以事高拱穆清而考其成败何忧不治帝称善拜侍御史迁给事中贞观四年诏修洛阳宫以备东幸上疏陈五不可大略言东都未有巡幸之期而预修宫室疲人失望陛下初平洛阳凡隋氏宫室宏侈者皆令毁之曾未数年复加营缮何前日恶之而今日效之也且以今日财力何如隋世陛下役疮痍之人袭亡隋之弊恐又甚于炀帝矣帝曰卿谓我不如炀帝何如桀纣对曰若此役不息亦同归于乱耳帝顾房玄龄曰吾思之不熟乃至於是後若必往虽露坐亦无伤也即诏罢役赐彩二百匹魏徵闻之叹曰张公论事有回天之力可谓仁人之言哉令傅太子承乾寻迁右庶子太子好游畋不悦学屡上书谏以苟违天道人神弃之古昔三驱非以教杀以除民害不宜反玩为娱有损盛德孔颖达奉诏劝讲宜数逮问恶小必去善小必为祸福之来皆根于初护终若始犹惧其替始之不护终将安归太子不纳复上书言心为万事主动而无节则乱须学古师训以表饰之雕虫小技止可间召以代博奕岂宜屡亲骑射?戏酣歌悦耳目移性灵以为常哉帝闻擢银青光禄大夫太子久不见宾友玄素曰宫中所见止妇人不知如樊姬等可益圣德者几何若无之即便諛艳嬖何足顾哉太子憚其过严夜遣人狙击几死又闻宫中击鼓声玄素叩合正言面出其鼓破之然卒不悛最後不得已复上书曰周武帝平山东卑宫陋食以安海内而太子贇有秽行乌丸轨以闻帝慈仁不忍废狂暴日炽宗祀以亡故隋文帝代之至杨勇为太子骄肆败度自谓有泰山之安詎知一旦致慈父之隙遂使炀帝失国今上以殿下父子至亲故所资用不为限节然诏未六旬用踰七万龙楼望苑悉为工匠之肆深宫禁门无异闐闐之区言孝敬则阙视膳问安之礼语恭顺则违君父慈训之方求风声复无悦道好学之资观举措又有因缘戮辱之罪外所瞻仰如此内之隐密可知右庶子赵弘智经明行修数宜召进以广徽美今反猜嫌饰非拒谏祸可既乎太子怒遣刺客伺之及废例坐除名顷之授潮州刺史徙邓州高宗时以老致仕

论曰魏徵称张公论事有回天之力玄素谏诤至为徵所许则其贤可知已太宗英主可以理夺承乾不令末如之何今观其孤忠恳恳正言谔谔滨于死而不悔虽承乾之天终不可回而玄素之心固已共谅于天下後世哉

苏頲

苏頲字廷硕武功人也少敏悟一览千言辄覆诵第进士调乌程尉举贤良异等吏部侍郎马载曰古称一日千里苏生是已再迁监察御史长安中诏覆来俊臣等冤狱頲验发其诬多所洗宥神龙间拜中书舍人时頲父瓌同中书门下三品父子同在禁苑朝廷荣之明皇平内难独頲在太极後合口所占授功状百绪轻重无所差书吏白曰丐公徐之不然手腕脱矣中书令李峤曰舍人思若泉涌吾所不及遭父丧起为工部侍郎辞不拜终制乃就职诏以为中书侍郎加知制诰给政事食给食自此遂为例由頲始也时李义对掌书命帝曰前世李峤苏味道文擅当时号苏李今朕得頲及义又何愧前人哉俄袭封许国公吐蕃盗边帝怒欲自将讨之頲恳切极谏不纳因言愿稍迁延以须西音会薛讷大破吐蕃俘获来献帝乃止诏立靖陵碑命頲为之词頲辞以前世帝后无之审当可者祖宗诸陵皆须营立开元四年进同平章事修国史与宋璟同当国璟刚正多所裁决頲能推其长在帝前敷奏璟或未及或少屈頲辄助成之有不会意頲更申璟所执故帝未尝不从二人相得甚欢璟尝曰吾与苏氏父子同为宰相仆射长厚自是国器若献可替否事至即断尽公不顾私则今丞相为过之八年罢为礼部尚书俄检校益州大都督长史按察节度剑南诸州时蜀方雕敝诏頲收剑南山泽盐铁自贍頲尚简静重兴力役即募戍人输雇直开井置罏量入计出分所赢市谷以广见粮时使蜀者檄取库钱市锦半臂琵琶杆拨玲珑鞭頲不予奏罢之或病其忤上意頲曰不然明主不以私爱夺至公我岂以远近废忠节耶嵩州蛮苴院与吐蕃共谋入寇获其间谍将吏请讨之頲不听移书还其谍曰毋得尔苴院愧悔谋遂寝从封泰山诏撰朝覲碑文还分主十铨事卒年五十八谥文宪頲性廉俭俸廩悉散亲族储无长货与张说文章称望略等故时号燕许大手笔帝爱其文诏令别录副本署臣某撰留中遂为故事其後李德裕着论曰近世诏诰惟頲叙事外自为文章云

论曰頲与父瓌相继称贤相可谓盛矣頲任职公忠实有过乃父者故能与宋璟同心辅政翼成开元之治则其贤非浅陋也在蜀能扶雕敝寝蛮谋秉道敷奏不以远近废忠节文词敏贍与张说齐名然说多权谲而頲终守正说与姚崇不免有猜頲与宋璟相得甚欢故削说而录頲云

王忠嗣

王忠嗣华州郑人也父海滨与吐蕃战没忠嗣时方九岁始名训入见明皇伏地号泣帝抚之曰此去病孤也须壮而将之更赐今名养禁中天宝元年为河东节度使忠嗣本负勇敢及为将乃能持重不生事尝曰太平之将但当抚循训练士卒不可疲中国之力以幸功名有漆弓百五十筋每 之示无所用军中士气盛日夜思战忠嗣纵诡间伺敌隙时出奇兵袭克之军每出召属长付以兵使授士卒虽一弓一矢亦志姓名其上军还遗弦亡镞皆按名第罪以是部下人人自劝器甲充牣自朔方至云中边陲数千里要害之地悉置城堡斥地甚远俄为河西陇右节度使权朔方河东节度佩四将印劲兵重地控制万里後数出战青海积石辄大破之又讨吐谷浑于墨离平其国帝方图石堡地诏问攻取计忠嗣上言石堡险固吐蕃举国守之非杀数万人不能克臣恐所得不如所亡不如厉兵秣马待衅取之帝意不决而李林甫忌其功曰钩摭过咎会董延光建言下石堡诏忠嗣分兵助之忠嗣不得已付兵而士无赏格兵马使李光弼曰大夫爱惜士卒有拒延光心然已付万衆而不立重赏何以鼓士勇彼无功必

归罪于大夫大夫何爱数万段帛不以杜谗口乎忠嗣曰吾固审得一城不足制敌不得亦无害于国故忠嗣不欲为之忠嗣受责天子不过以羽林将军归宿卫不者黔中上佐耳忠嗣岂忍以数万人之命易一官哉光弼曰大夫乃行古人事光弼复何言延光过期不克果诉忠嗣沮兵帝怒又安禄山城雄武请忠嗣助役欲留其兵忠嗣先期至不见禄山而还数上言禄山必反林甫益恶之阴使人诬告忠嗣尝养禁中云吾欲奉太子帝怒召入付三司讯验罪应死哥舒翰力陈其冤请以官爵赎忠嗣罪帝意乃解贬汉阳太守久之徙汉东郡卒年四十五後翰引兵攻石堡拔之死亡略尽卒如忠嗣言初忠嗣在朔方每互市辄高偿马值故诸蕃争来市而蕃马渐少及镇河陇又请徙朔方河东九千骑以实军故边兵益壮马以滋息

论曰忠嗣负勇敢善用兵而能持重不生事斯其所以为贤乎不以所得易所亡不以数万人之命易一官此仁人君子之言不意於将帅中见之从来为将皆利立功为相乃思全民忠嗣以名将之才兼有相臣之度虽不幸为林甫排挤弗得尽展所长然有唐大将控边镇重不扰威爱并行者必以忠嗣为称首

白居易

白居易字乐天其先太原人後徙韩城又徙下邳父季庚为彭城令李正己之叛说刺史李洧自归累擢襄州别驾居易敏悟絶人工文章未冠谒顾况况甚重之贞元中擢进士拔萃皆中补校书郎元和元年对制策一等调整屋尉为集贤校理月中召入翰林为学士迁左拾遗四年天子以旱甚下诏有所蠲贷振除灾沴居易见诏节未详建言乞尽免江淮两赋以救流瘠且多出宫人宪宗颇采纳于頔入朝悉以歌舞人纳禁中或言普寧公主取以献居易以为不如归之无令頔得归曲天子李师道上私钱六百万为魏徵孙赎故第居易言徵任宰相太宗用殿材成其正寝後嗣不能守陛下宜以贤者子孙赎而赐之师道人臣不宜掠美帝从之河东王锬献羨余将加平章事居易言锬求进奉不恤雕瘵若假以名器恐诸道闻之争袞割生人以求所欲殃民坏法不可复追李绹亦谏曰锬在河东虽颇着绩效今因献家财而命之若後世何乃止山南东道节度使裴均进银器千五百两居易又与李绹上言均欲以此尝陛下愿却之帝遽命出付度支是时孙璿以禁卫劳擢凤翔节度使张奉国定徐州平李錡有功迁金吾将军居易请罢璿进奉国以竦天下忠臣心度支有囚系闾乡狱更三赦不得原又奏言父死繫其子夫久系妻嫁债无偿期请一切免之奏凡十余上益知名会王承宗叛诏吐突承璀率师出讨居易谏唐家制度每征伐专委将帅责成功比年始以中人为都监韩全义讨淮西贾良国监之高崇文讨蜀刘贞亮监之且兴天下兵未有以中人专统领者神策既不置行营节度承璀为制将又充诸军招讨处置使是实都统恐四方闻之必轻朝廷後世且传中人为制将自陛下始陛下忍受此名哉又诸将耻受承璀节制心有不乐无以立功且陛下念承璀勤劳富之可也至于军国权柄动关理乱陛下宁忍徇彼之欲而自坠法制以损圣明乎帝不听既而师老不决居易又言亟宜罢兵毋貽後患会承宗请罪兵遂罢元微之以使外召还宿敷水驿有内侍後至破驿门入击微之伤面帝引前事贬江陵士曹居易言中使陵辱朝士中使不问而使臣先贬恐自今中使益横人无敢言者且其为御史举奏不避权贵切齿者衆恐自今无复为陛下言者矣不听後对殿中论执强鯁帝未谕辄进曰陛下误矣帝变色罢谓李绹曰是子我自拔擢乃敢尔必斥之绹曰陛下启言者路故羣臣敢论得失若黜之是箝其

口使自为谋非所以发扬盛德也帝悟待之如初岁满当迁帝以资浅且家素贫听自择官居易请如姜公辅以学士兼京兆户曹参军以便养诏可明年以母丧解还拜左赞善大夫盗杀武元衡京都震扰居易首上疏请亟捕贼刷朝廷耻以必得为期宰相嫌其出位不悦俄为流言所中出为苏州刺史中书舍人王涯上言不宜治郡追贬江州司马既失志能顺适所遇若忘形骸者久之徙忠州刺史入为司门员外郎以主客郎中知制诰穆宗好畋游献续虞人箴以讽俄转中书舍人田布拜魏博节度使命持节宣谕布遗五百缗诏使受之辞曰布父讎国耻未雪人当以物助之取其财谊不忍方谕问旁午若悉有所赠则贼未殄布赀竭矣诏听辞餉是时河朔复乱合诸道兵出讨迁延无功贼取弓高絶粮道深州围益急居易上言兵多则难用将衆则不一宜诏魏博泽潞定沧四节度令各守境以省度支赀餉每道各出鋭兵三千使李光顔将光顔故有凤翔徐滑河阳陈许军无虑四万可径薄贼开弓高粮路合下博解深州之围与牛元翼合还裴度招讨使使悉太原兵西压境见利乘隙夹攻之间令招谕以动其心未及诛夷必自生变且光顔久将有威名度为人忠勇可当一面无若二人者不听居易乃勾外迁为杭州刺史始筑堤扞钱塘湖锺泄其水溉田千顷复浚李泌六井民赖其汲久之以太子左庶子分司东都复拜苏州刺史文宗立迁刑部侍郎封晋阳县男太和初二李党事兴险利乘之更相夺移进退毁誉若旦暮然杨虞卿与居易姻家而善李宗闵居易恶缘党人斥乃移病还东都除太子宾客分司开成初起为同州刺史不拜以太子少傅进冯翊县侯会昌初李德裕当国素恶居易以刑部尚书致仕六年卒年七十五赠尚书右仆射宣宗以诗吊之遗命薄葬母请谥居易被遇宪宗时知无不言多见听可为当路者所忌遂摈斥不获施乃放意文酒与弟行简从祖弟敏中友爱东都所居疏沼种树构石楼香山凿八节滩自号醉吟先生为之传尝与胡杲吉旼郑据刘真卢真张浑狄兼谟卢贞燕集皆高年不仕者人慕之绘为九老图居易最工诗颇以规讽得失尤能谐俗好至数千篇士人争传鸡林行贾售其国相率篇易一金其伪者相辄能辨之初与元微之酬咏故号元白微之卒又与刘禹锡齐名号刘白及敏中为相请谥曰文东都江州人皆为立祠

新唐书赞曰居易与元微之以诗齐名然居易用直道奋在天子前争安危以立功虽被斥而志不衰当宗闵权势震赫终不附离为进取计完节自高而微之中道徼险得宰相名望濯然呜呼居易其贤哉

论曰宪宗未平蔡以前孳孳为治朝多直臣时裴埴为相居易及李绹为翰林学士屡进说言天子改容听纳及绹为相直臣之气益张居易其可谓乘时而奋者矣宋苏轼每作诗辄以居易自比盖平生遭遇有相似者由今观之二人之忠节直气不相上下而雄迈之才轼固不可及至于冲远和粹居易又自有以过人者雄峙二代振耀今古未知其孰先後也然皆弗获展布其能岂所谓以文章掩其政事者欤

柳公绰 公权

柳公绰字寬京兆华原人幼孝友性质严重起居皆有礼法属文典正不读非圣书举贤良方正直言极谏补校书郎累迁开州刺史边寇常迫城吏白兵力不能制愿以右职署渠帅公绰曰若同恶耶何可挠法立诛之寇亦引去迁侍御史吏部员外郎时武元衡节度剑南与裴度

俱为判官尤相引重召为吏部郎中宪宗喜武功数出游畋公绰奏太医箴以讽天子高其才且谓公绰爱朕深置之坐隅踰月拜御史中丞李吉甫复当国坐与裴垕厚出为湖南观察使乞便养求分司东都不听俄徙鄂岳时方讨元济诏发鄂岳卒隶安州刺史李昕公绰曰朝廷谓吾儒生不知兵耶即自请行引兵渡江抵安州昕以军礼迎谒悉以兵务属之戒诸校曰行营事一决都将昕感励尽力当时服其知权军出公绰数省问其家疾病生死厚给之军中感服曰中丞为我知家事敢不死战故鄂军每战辄克元和十一年除给事中李师道平遣宣谕郢州复命拜京兆尹以母丧去官长庆元年复为京兆尹时幽镇用兵补置诸将使驿旁午公绰奏馆通匱乏驿置多缺敕使衣绯紫者所乘至三四十骑黄绿者不下十数吏不得视券随口辄供驿马尽乃掠夺民马怨嗟惊扰行李殆絕请着定限以息其弊诏中书条检定数由是吏得纾罪宦官共恶疾之改吏部侍郎又改礼部尚书为山南东道节度使行部至邓县吏有纳贿舞文二人同系狱县令以公绰素持法必杀贪者公绰判曰赃吏犯法法在奸吏坏法法亡诛舞文者牛僧孺罢政事持节武昌公绰具军容伏谒左右谏止之答曰奇章始去台宰方镇重宰相所以尊朝廷也入为刑部尚书俄拜邠宁节度使先是神策诸镇列屯部中不听本道节制故寇得窥间公绰论所宜因诏屯营缓急悉受节度复为刑部尚书太和四年为河东节度遭岁恶撙节用度辍宴饮衣食与士卒钧北使李畅以马万匹来市所过皆厚劳至太原公绰独使牙将单骑劳问待以至意辟牙门令译官引谒宴不加常畅德之出涕徐驱道中不妄驰猎陞北有沙陁部为九姓六州所畏公绰抚之以恩沙陁悉力保障以病乞代授兵部尚书一日召故吏韦长至谓曰为我白宰相徐州专杀李昕亲吏非用高瑀不能安因瞑目不复语後二日卒年六十八谥元公绰所取士多知名性仁厚尝曰吾涖官未尝以私喜怒加于人子孙其昌乎在公卿间最有家法居丧毁慕三年不澡沐事後母薛谨甚虽姻属不知非薛所生中门东有小斋自非朝谒之日每平旦辄出至小斋诸子皆束带省于中门之北公绰决私事接宾客与羣弟再会食自旦至暮不离小斋烛至则命子弟执经史躬读一过讫乃讲议居官治家之法或论文或听琴至人定然後归寝诸子复昏定于中门之北凡二十余年未尝一日变易遇饥岁每饭不过一器曰四方病饥独能饱乎令诸子皆蔬食曰昔吾兄弟侍先君为丹州刺史以学业未成不听食肉吾不敢忘也姑姊妹侄有孤嫠者虽疏远必为择壻嫁之皆用刻木粧奁文绢为资装常言必待资装丰备何如嫁不失时居外藩其子每入境郡邑未尝知既至每出入必于戟门外下马呼幕宾为丈皆许纳拜妻韩氏相国休曾孙臯之女也家法严肃俭约为缙绅家模范归柳氏三年无少长未尝见其启齿常衣绢素不用绫罗锦绣每归輒不乘金碧輿祇乘竹兜子二青衣步屣以随常命粉苦参黄连熊胆和为丸赐诸子每永夜习学含之以资勤苦及公绰卒子仲郢一遵其法事公权如事公绰非甚病见公权未尝不束带为京兆尹盐铁使出遇公权于通街必下马端笏立候公权过乃上马公权暮归必束带迎候于马首公权屡止之终不小改律身以礼居家无事亦端坐拱手出内斋未尝不束带三为大镇廐无良马衣不薰香公退必读书手不释卷家法在官不奏祥瑞不度僧道不贷赃吏法凡理藩府急于济贫恤孤有水旱必先期假贷廩军实必精丰逋租必贯免馆传必增饰犒军必华盛交代之际食储帑藏必盈溢于始至境内有孤贫衣纓家女及笄者皆为选壻出俸金为资装嫁之官至天平节度使以廉直称仲郢子玘亦贤为御史大夫

公权字诚悬公绰弟也年十二工词赋元和初擢进士第李昕镇夏州表为掌书记因入奏穆宗曰朕尝见卿笔蹟思之久矣即拜右拾遗侍书学士再迁司封员外郎帝问公权用笔法对

日用笔在心心正则笔正帝改容悟其以笔谏也改右司郎中弘文馆学士文宗朝迁中书舍人充翰林书诏学士常与同僚六人对便殿帝称汉文帝恭俭因举袂曰此三澣矣学士皆贺独公权无言帝问之对曰人主当进贤退不肖纳谏诤明赏罚服澣濯之衣此小节耳异日与周墀同对论事不阿墀为惴恐公权益不夺帝徐曰卿有诤臣风可屈居谏议大夫乃自舍人下迁仍为学士知制诰开成三年转工部侍郎召问得失因言郭?领邠宁议者颇有臧否帝曰?尚父从子太皇太后季父居官无玷自大金吾位方镇何所更议对曰?诚勲旧然人谓献二女乃有是除信乎帝曰女自参承太后岂献哉公权曰嫌疑间不可户晓因引王珪谏庐江王妃事是日帝命中官送女还?家其忠益多类此武宗时累封河东郡公咸通初以太子太保致仕卒年八十八公权博贯经术通音律而不喜奏乐曰闻之令人骄怠其书法劲媚自成一家文宗尝与联句帝曰人皆苦炎热我爱夏日长公权属曰薰风自南来殿阁生微凉帝爱其情词皆足命题于殿壁曰锺王无以尚也

论曰公绰侃侃以忠智自将负文武之才公权诤而不阿亦其次也遭牛李相倾覆以好恶为盛衰公权中废其亦有不尽其才者乎自汉以来家法最着者东汉杨氏唐柳氏宋吕氏为首称杨氏世笃忠贞自震至秉及赐皆为名臣吕氏蒙正公着希哲祖谦俱以事功学术显柳氏虽不及杨吕然风节自持律身无过而孝友传家严整有法尤士大夫所宜矜式者以此立朝必能不负吾君以此传世庶其克昌乃後君子所以重门内之修也

李藩

李藩字叔翰赵州人也少沉静有检局姿仪闲美敏于学问家本饶父卒务施与不数年所积略尽年四十余困广陵间不自振妻子追咎晏如也杜亚守东都署为从事张建封辟为徐州从事建封卒濠州刺史杜兼阴图代之疾驱至藩曰丧难之秋君宜谨守土来欲何为须疾归否则以法劾君矣兼错愕而去恨之因诬奏藩摇动军情有非望德宗怒密诏杜佑杀之佑素重藩得诏不忍发召藩示之藩神色不变佑曰吾已以百口保君矣帝未信亟追藩入见望其仪度曰此岂作乱人耶释之授秘书郎朝臣慕其名争欲见之时尚书王绍得幸邀藩一造当即用终不往王仲舒韦成季吕洞强致之藩恶其朋党烜赫日会聚饮酒好为俳语相狎昵一见即谢絶後仲舒等果败累迁吏部郎中元和初左授著作郎再迁给事中制敕有不可者即于黄纸後批之吏惊请更连素纸藩曰如此乃文状也何名批敕裴垕荐藩有宰相器会郑絪罢因拜藩门下侍郎同平章事藩忠谨知无不言帝以为无隐甚重之问以前世帝王理天下或家给人足或国贫下困其故何也藩对曰古人云俭以足用人君不贵珠玉惟务耕桑则人无淫巧风俗敦本自然帑藏充美稼穡丰登若务竭民力好致异物上行下效风俗日奢去本务末衣食益乏自然国家贫困盗贼乘隙而作帝悦曰当与公等上下相勗以保此言又问祈祷之说藩对曰自古圣達不为妄祷昔楚昭王有疾卜者谓河为祟昭王以河不在楚非所获罪汉文帝每祭祀敕有司敬而不祈是皆达识远览超然盛德祸福之来感应行事苟为非道何福可求若使神明无知安能降福如其有知则私己求媚之事君子尚不取况神明乎後复问神仙长年事藩对曰秦始皇汉武帝学仙之效具载前史太宗服天竺僧长年药致疾此古今之明戒也陛下春秋鼎盛励志太平宜拒絶方士之说苟道盛德充人安国理何忧无尧舜之寿乎河东节度使王鐸赂权近求兼宰相有诏下中书门下藩遽取笔灭宰相字署其左曰

不可还奏之权德輿失色曰不可应别作奏可以笔涂诏耶藩曰日暮势迫出今日便不可止何暇作别奏耶事竟得寝李吉甫复相藩颇沮之後数日吉甫中藩以事罢为太子詹事明年为华州刺史兼御史大夫未行卒年五十八赠户部尚书谥贞简

论曰藩当时推为鲠挺观其挫杜兼絶朝贵请谒气槩固已凛然矣给事批敕宜为宰相所忌而裴垪以此荐之取笔涂诏亦太躁率宪宗听而不罪然则藩之鲠挺固亦其君与相共成之者乎祈禳之说神仙之对非闻道守正之君子其孰能与于斯

崔羣

崔羣字敦诗贝州武城人未冠举进士梁肃荐其有公辅才擢甲科举贤良方正授校书郎迁右补阙元和初历翰林学士中书舍人常持说言正论宪宗嘉纳因诏自今学士奏议待羣署乃得上羣以禁密之言人当自陈一为故事後或有恶直丑正则他学士不得上书矣坚不奉诏帝听之惠昭太子薨是时穆宗居嫡而澧王长多内助将建东宫帝命羣为澧王作让表羣不奉诏曰凡已当得则让不当得之乌用让今遂王嫡宜为太子帝从其议魏博田季安以五千缣助营开业佛寺羣以为无名之献不当受诏却之进户部侍郎十二年拜中书侍郎同平章事李师道既诛师古妻子没入掖廷帝疑以问羣羣请释之并还其奴婢货产帝又语羣以盐铁院官权长孺坐罪当死其母耄丐子以养羣曰陛下幸怜其老宜即遣使谕旨若待出敕无及矣于是免死其启奏平恕多此类帝尝语以听受之难比诏学士集前代事为辨谤略以自警鉴羣对无情曲直辨之至易有情欺伪审之至难故孔子有衆好衆恶浸润肤受之说其要在于择贤而任待之以诚绳之以法则人自归正而不敢有欺帝韪其言处州刺史苗积进羨余钱七百万羣以为受之失信天下请还赐其州以纾下户之赋时皇甫鎛以言利得幸陰结左右求宰相羣奏用人得失所系非小明皇用姚崇宋璟苏頲卢怀慎韩休张九龄则理用宇文融李林甫杨国忠则乱故人皆以天宝十四年安禄山反为乱之始臣独以为开元二十四年罢张九龄专任李林甫理乱自此分矣愿陛下以开元初为法以天宝末为戒乃社稷无疆之福左右皆为感动鎛深恨之会羣臣请上尊号与鎛议不合鎛奏之帝不乐鎛给边军不时又物多敝恶军士怨怒流言欲为变李光顔忧惧至引佩刀欲自决中外皆恐羣具以闻鎛密言边赐皆如旧制而人情忽如此者由羣鼓扇将以卖直归怨于上也于是罢羣为湖南观察使穆宗立徵拜吏部侍郎劳曰朕升储副卿力也羣曰先帝之意久属圣明臣何力之有焉且陛下为淮西节度使臣草制云能辨南阳之牒允符东海之贤若非知旨敢轻言哉俄拜御史中丞浹旬授兵部尚书武宁节度使副使王智兴得土心讨幽镇还藉兵胁羣去诏以智兴为节度使左迁羣秘书监分司东都历兵部尚书荆南节度使改检校吏部尚书左右仆射卒年六十一赠司空

论曰崔羣言用人得失所系匪轻非特为皇甫鎛言之也范氏谓圣人复起必不能易於戏信夫羣公忠平恕议论知大体羽翼穆宗归功先帝其贤更可嘉也武宁之逐不足为贤者累故纲目讳之

卷四十八

<史部,传记类,总录之属,史传三编

钦定四库全书

史传三编卷四十八

大学士朱轼撰

名臣续传五

宋

曹彬

曹彬字国华真定灵寿人周太祖贵妃张氏彬之从母也从世宗镇澶渊蒲帅王仁镐以彬帝戚加礼遇彬执礼益恭公府燕集端简终日未尝旁视仁镐谓从事曰老夫自谓夙夜匪懈及见监军矜严始觉已之散率也显德三年迁西上合门使五年使吴越致命即还私覲之礼一无所受吴越人以轻舟追遗之彬犹不受既而曰吾终拒之是近名也及归悉上送官世宗强还之彬始拜赐悉以分遗亲旧初太祖事世宗在澶州以彬掌茶酒尝从求酒彬曰官酒不敢相饮乃别沽以饮太祖及太祖典禁旅彬中立不倚非公事未尝造门太祖器重焉建隆二年彬自平阳归太祖谓曰我昔欲亲汝汝何疎我彬顿首曰臣为周室近亲复忝内职靖恭守位犹恐获过安敢妄有交结太祖然之尝语羣臣曰世宗旧吏不欺其主者独彬耳乾德二年冬大举伐蜀以彬为都监诸将皆多所屠杀惟彬申禁戢之令明劝赏之法由是所至悦服不血刃而峡中郡县悉下蜀降大将王全斌等纵酒不恤军士列校求取无厌蜀人苦之彬屡劝全斌振旅速旋全斌不从俄而全师雄等作乱郡县相应盗贼蠭起彬复与崔彦进悉力翦平之泊归阙太祖尽得全斌等不法状面诘王仁瞻仁瞻历言诸将奢纵事惟曰清慎廉恪独曹彬一人耳即日授彬宣徽南院使充义成节度使彬辞曰收蜀将校皆得罪臣无功独蒙厚赏恐无以劝天下太祖笑曰卿有茂功加以不伐设有微累仁瞻肯惜言哉初克成都时有获妇女者彬悉闭一第穹以度食泊事罢咸访其亲还之无则备礼嫁之师还輜重甚多或言悉奇货也太祖密令伺之图书也无铢金寸锦之附焉七年征江南累战辄克遂围之彬每缓师冀其归服後又使人谕之曰事势如此所惜者一城生聚若能归命策之上也城垂克彬忽称疾不视事诸将皆来问疾彬曰余之疾非药石所能愈惟诸公诚心自誓克城之日不妄杀一人则自愈矣诸将许诺共焚香为誓明日城陷江南主李煜与其臣百余人诣军门降彬礼之且谕以归朝俸赐有限当厚自齎装既归有司之籍则无及矣请煜入宫治装彬以数骑待宫门外左右曰煜入或不测奈何彬笑曰煜素懦无断既降必不能自引决煜果无他江南官吏亲属有为军士所掠者彬即时遣还因大搜军中无得匿人妻女振乏絶恤鰥寡吴人大悦及归舟

中无他物惟图籍衣被而已诣合门入见膀子称奉勅江南干当公事回其谦恭不伐如此以功拜枢密使在宥密常公服危坐如对君父归私第闭阁燕居不妄通宾客五鼓才动已待漏禁门虽霜雪不易其操如此者八年彬性仁敬和厚伐二国秋毫无所取位兼将相不以等威自异遇士夫于涂必引车避之不名下吏每白事必冠而後见居官奉入给宗族无余积知徐州日有吏犯罪既具案逾年而後杖之人问其故彬曰吾闻此人新娶妇若杖之其舅姑必以妇为不利朝夕答詈之使不能自存吾故缓其事然法亦未尝屈也尝曰自吾为将未尝以私怒戮一人所居堂室敝坏子弟请收葺彬曰时方大冬墙壁瓦石之间百虫所蛰不可伤其生其仁心爱物多此类咸平二年被疾真宗亲临问手为和药赐白金万两问以後事对曰臣二子材器皆堪为将问其优劣对曰璨不如玮卒年六十九帝哭之恻对辅臣语及必流涕赠中书令追封济阳郡王谥武惠配享太祖庙庭彬前後征讨凡降四国主江南西川广南湖南也七子玮琮璨继领旄钺其後少子玘追封王爵实生慈圣光献太后辅佐仁宗

论曰古称元首股肱明一体相待而成非独辅弼之臣也征伐爪牙之将亦有之艺祖初兴武惠着节抚攘军旅之间躬擐甲胄日不暇给乃能以仁恕恭让为本廉俭律身以礼进退可谓鞠躬君子也

钱若水

钱若水字淡成一字长卿河南新安人父文敏为官有风节若水幼聪悟十岁能属文雍熙中举进士授同州观察推官以辨小女奴狱平反得情知州欲奏论其功若水固辞曰若水但求人不冤耳论功非本心也淳化初寇准掌选荐五人文学高第召试翰林若水最优擢秘书丞累官翰林学士尝草赐赵保忠诏云不斩继迁存狡兔之三窟潜疑光嗣持首鼠之两端太宗览之甚悦至道初以右谏议大夫同知枢密院事李继隆与转运使卢之翰有隙欲陷之乃期八月出塞令办刍粟调发方集复言八月不利出师更待十月运司散刍粟复檄进军即日取办刍粟而仓卒不可复集继隆遂奏之太宗大怒立命中使驿取卢之翰窦玘等首两府皆不敢言惟若水争之帝拂衣起入禁中若水留廷中不去久之帝出诘曰朕所以擢用以尔为贤乃不才如是耶对曰陛下不知臣无状使待罪二府臣尝竭愚虑不避死亡补益陛下以报厚恩李继隆外戚贵重莫比陛下据其一幅奏书诛三转运使虽有罪天下何由知之鞠验明白加诛亦何晚焉献可替否死以守之臣之常分臣未获死固不敢退帝意解吕端等因请如若水议先令责状许之既而事皆虚诞继隆坐贬初吕蒙正罢相帝谓左右曰蒙正布衣朕擢至宰相今罢退想目穿望复位矣及刘昌言罢帝问赵熔等曰频见昌言否熔等曰见之帝曰涕泣否曰与臣等谈多至流涕若水曰昌言实未尝涕泣熔等迎合上意耳若水因念上待辅臣如此盖未有秉节高迈不贪名势能全进退之道以感动人主者遂将以满岁移疾会太宗晏驾不果上真宗即位数月即以母老上章求解机务诏不许若水请益坚遂以本官充集贤院学士判院事诏修太宗实录成八十卷判吏部流内铨从幸大名若水陈御敌安边之策其御敌策曰傅潜领雄师数万闭门不出坐视边寇俘掠生民上孤委注之恩下挫锐师之气盖朝廷未能用法使然也今若加法于潜然後擢如杨延朗杨嗣者五七人增其爵秩分授兵柄使将万人间以强弩分路讨除孰敢不用命哉其安边策曰太祖朝制置最得其宜其时郭进在邢州李汉超在关南何继筠在镇定贺惟忠在易州李谦溥在隰州姚内斌在庆州董遵诲在

通远军王彦昇在原州但授缘边巡检之名不加行营部署之号率皆十余年不易其任立边功者厚加赏赉位皆不至观察使盖位不高则朝廷易制任不易则边事尽知然後授以圣谋来则掩杀去则勿追所以十七年中北边西蕃不敢犯塞以至屡使乞和此皆陛下之所知也苟能遵太祖故事慎择名臣分理边郡罢部署之号使不相统辖置巡检之名俾递相救应如此则出必击寇入则守城不数年间边烽罢警矣知开封府陈备边五策一曰择郡守二曰募乡兵三曰积刍粟四曰革将帅五曰明赏罚改知天雄军时言事者请城绥州以备党项边城互言利害不能决诏若水驰往视之若水上言绥州顷为内地民赋登集尚须旁郡转饷自赐地赵保忠以来人户凋残若复城之即须增戍刍粮之给全仰河东其地隔越黄河铁碣二山无定河在其城下缓急用兵输送艰阻且其地险若修葺未完边寇奔冲难于固守况城邑焚毁片瓦不存所过山林材木匮乏城之甚劳未见其利上嘉纳之遂罢役初若水率衆过河分布军伍咸有节制深为戍将推服帝谓左右曰若水儒臣中知兵者也是秋遣巡抚陕西缘边诸郡令便宜制置还拜邓州观察使并代经畧使知并州事六年春以疾归京师卒年四十四赠户部尚书若水美风神有器识能断大事事继母以孝闻雅善谈论轻财好施所至推诚待物委任僚佐总其纲领无不称治汲引後进推贤重士襟度豁如也有集二十卷初若水为举子时见陈?于华山有一方外人熟视若水曰急流勇退人也後若水为枢密副使致仕年未四十云

论曰若水之才虽未究其用然其清劲正直终始无瑕疵是时宋初开国节义之风未振如若水者顾安可少也至于争卢之翰事尤关国体洞晓边务规画可施而行帝以为儒臣知兵信夫

曹玮

曹玮字宝臣武惠王彬之子也李继迁叛诸将数出无功太宗问彬谁可将者彬曰臣少子玮可任即召见以本官同知渭州时年十九真宗即位改内殿崇班知渭州驭军严明有部分赏罚立决犯令者无所贷善用间知敌动静举措如老将徙知镇戎军李继迁虐用国人玮知其下多怨即移书诸部谕以朝廷恩信抚养无所间以动诸羌由是康奴等族内附继迁略西蕃还玮邀击于石门川俘获甚衆以镇戎军据平地便于骑战非中国之利请自陇山以东循古长城堑以为限又以弓箭手皆土人习障塞蹊隧晓羌语耐寒暑官未尝与兵械资粮而每战辄使先拒贼恐无以责死力遂给以境内闲田春秋耕斂州为出兵护作而蠲其租继迁死德明立所属有数大族请拔帐自归诸将犹豫不敢应玮曰德明野心不急折其翮後必扬去即日将其兵薄天都山受降者内徙德明不敢拒帝以玮习知河北事乃以为真定路都钤辖领高州刺史玮尝上泾原环庆两道图至是帝以示左右曰南北山川城郭出入战守之要尽在此矣因令别绘二图一留枢密院一付本道复知渭州于是陇山诸族皆来献地玮筑堡山外为笼竿城募土兵守之曰异时秦渭有警此必争之地也徙知秦州初秦州置四门砦侵夺羌地羌人多叛去玮招出之令入马赎罪还故地至者数千人每送马六十匹给彩一端筑十砦浚濠三百八十里皆役属羌厢兵工费不出民其年嘉勒斯赉率衆数万大入寇玮迎战三都谷追奔三十里斩首千级获马牛杂畜器仗三万余自是嘉勒斯赉势蹙退保碛中不敢出丁谓逐宰相寇准恶玮不附已指为准党谪知莱州谓败复华州观察使知青州徙天雄军玮

用士得其死力平居甚闲暇及师出多奇计出入神速不可测一日张乐饮僚吏中坐失玮所在明日徐出视事而贼首已掷庭下矣尝称疾加砭艾卧阁内不出会贼至玮奋起被甲跨马贼望见皆遁去其在边蕃部有过恶者皆平定之每以饒将官为名出郊而兵马次序以食品为节若曰下某食即某队发比至水饭则捷报至矣玮在秦州有士卒十余人叛赴敌军吏来告玮方与客围棋不应吏亟言之玮怒叱之曰吾固遣之去汝再三显言耶谍闻之亟归告其将尽杀之塞上多废地玮募人耕之若干亩出一卒若干亩出一马至其种斂为发州兵戍守边储以实所募皆为精兵又募弓箭手使驰射校强弱胜者予田二顷再更秋课市一马马必胜甲然後官籍之则加田五十亩至三百人以上团为一指挥择要害处为筑堡使自墾其地为方田环之立马社一马死衆为出钱市马开边濠率令深广丈五尺山险不可墾者因其峭絶治之使足以限寇後皆为法降者既多因制属羌百帐以上其首领为本族军主次为指挥使又其次为副指挥使不及百帐为本族指挥使其蕃落将校止于本军叙进以其习知羌情与地利不可徙他军也旧例羌杀边民入羊马赎罪玮以如此非所以尊中国而爱吾人下令羌自相犯从其俗犯边民者论如律自是无敢犯玮为将几四十年未尝败衄自三都之战威震四海在天雄契丹使过魏地辄陰勒其从人无得高语疾驱天雄卒有犯法衆谓狱具必杀之玮乃处以常法或以为疑玮曰临边对敌斩不用命者所以令吾衆非喜杀也平时治内郡安事此乎初守边时邀山东知名士贾同与俱同问从兵安在曰已具既出就骑见甲士三千列立人音不彻舍同归语人曰玮果名将也真宗慎兵事凡边事必手诏诘难至十数反而玮守初议卒无以夺他将论边事者往往密付玮处之玮好读书所如必载书数两兼通春秋公谷左传而尤熟于左氏玮为将不如其父寛然自为一家云卒赠侍中谥武穆嘉佑八年配享仁宗庙庭宝元中王驥为枢密使赵元昊叛帝召问枢臣皆不能对明日枢府四人皆罢而王驥谪虢州语所善翰林学士苏公仪曰驥之此行十年前已有人言之驥为三司盐铁副使时以事至河北曹南院为定帅驥事毕将还玮谓驥曰愿少留一日欲有所言驥爱其雄才遂为之留明日食罢屏左右曰公满面权骨不十年必总枢柄此时西方当有警公宜预讲边备蒐阅人材不然无以应卒驥曰何以教之曹曰玮在陕西日赵德明尝使人以马易于中国怒其息微将杀之德明有一子方十余岁极諫不已曰以战马资邻国已为失计今更以货杀人谁肯为我用者玮闻其言私念之曰此子欲用其人矣是必有异志闻其尝往来牙市中屡使人诱致之不可得乃使善画者图其貌观之真英物也此子必为边患计其时正在公秉政之日公其勉之驥是时殊未以为然今知其所画乃元昊也

论曰玮之在边算无遗策其料元昊也于其为童子之时十年之後毫髮无爽何其神哉忠诚谋国所以思患而预为之防者无所不用其极也父子着节宜矣

孔道辅 邹浩

孔道辅字原鲁孔子四十五代孙也举进士为宁州军事推官数与州将争事有蛇出天庆观真武殿中一郡以为神州将以下皆奠拜之欲上其事道辅径前以笏击蛇碎其首观者初惊後莫不叹服迁大理寺丞知仙源县主孔子祠事孔氏有放纵者道辅一绳以法上言庙制卑陋请加修崇诏可再迁太常博士章献太后临朝召为左正言受命日论奏枢密使曹利用尚御药罗崇勲窃弄威福宜早斥去以清朝廷立对移刻太后可其言乃退奉使契丹道除右司

諫龙图阁待制契丹宴使者优人以文宣王为戏道辅艴然径出契丹使主客者邀还且令谢之道辅正色曰中国与北朝通好以礼文相接今俳优之徒侮慢先圣而不之禁北朝之过也道辅何谢契丹君臣默然又酌大卮谓曰天寒饮此可以致和气道辅曰不和固无害既还言者以为生事仁宗问其故对曰契丹比为黑水所破势甚蹙平时汉使至契丹辄为所侮若不较恐益慢中国帝然之明道二年除右谏议大夫权御史中丞会郭皇后废道辅率谏官孙祖德范仲淹宋郊刘涣御史蒋堂郭劝杨偕马绦段少连十人诣垂拱殿伏奏皇后天下之母不当废愿赐对尽所言帝使宰相吕夷简告以皇后当废状道辅曰大臣之于帝后犹子事父母也父母不和可以谏止奈何顺父出母乎夷简曰废后有汉唐故事道辅曰人臣当道君以尧舜岂得引汉唐失德为法耶夷简不答即奏言伏合请对非太平美事于是出道辅知泰州明日道辅等趋朝欲留百官揖宰相廷争至待漏院闻诏乃退亟驰出城顷之徙徐州又徙兖州复入为御史中丞道辅性鲠挺特達遇事弹劾无所避出入风采肃然及再登宪府权贵益忌之未几出知郢州时大寒上道行至韦城发病卒皇佑三年王素因对语及之仁宗思其忠特赠尚书工部侍郎子宗翰元佑初为鸿臚卿上言孔子之後自汉以来有褒成奉圣宗圣之号皆赐实封以奉先祀至于国朝益加崇礼真宗东封临幸赐子孙世袭公爵然兼领他官不在故郡于名为不正请自今袭封之人使终身在乡里诏改衍圣公为奉圣公不领他职给庙学田万亩遂为定制云

邹浩字志完常州晋陵人第进士调颍昌教授吕公着范纯仁为守皆礼遇之纯仁属撰乐语浩辞纯仁曰翰林学士亦为之浩曰翰林学士则可祭酒司业则不可纯仁敬谢元佑中上疏论事苏颂用为太常博士来之邵论罢久之哲宗亲擢为右正言有请以王安石三经义发题者浩论其不可而止陕西奏边功中外皆贺浩言兵未战以决胜为主既胜则以持盈为难苟为不然将弃前功而招後患愿申勅将帅毋徂屡胜图惟厥终京东大水浩言频年水异继作虽盈虚之数所不可逃而消复之方尤宜致谨是时章惇独相用事威虐震赫浩所言每触惇忌乃上章露劾数惇不忠侵上之罪未报而贤妃刘氏立浩言立后以配天子安得不审今为天下择母而所立乃贤妃一时公议莫不疑惑昔仁祖时郭后与尚美人争宠仁祖既废后并斥美人所以示公也及立后则不选于妃嫔而卜于贵族所以远嫌也陛下之废孟氏天下疑立贤妃为后及读诏书有别选贤族之语天下始释然不疑今竟立之岂不上累圣德臣观白麻所言不过称其有子及引永平祥符事以为证臣请论其所以然若曰有子可以为后则永平贵人未尝有子以德冠後宫故也祥符德妃亦未尝有子以鍾英甲族故也又况贵人实马援之女德妃无废后之嫌与今日事体不同顷年冬妃从享景灵宫是日雷变甚异今宣制之後霖雨飞雹自奏告天地宗庙以来陰淫不止上天之意岂不昭然考之人事既如彼求之天意又如此望不以一时改命为难而以万世公议为可畏追停册礼如初诏行之帝曰此亦祖宗故事岂独朕耶对曰祖宗大德可法者多矣陛下不之取而效其小疵臣恐後世之责人无已者纷纷也帝变色犹不怒持其章踌躇四顾凝然若有所思因付于外明日章惇诋其狂妄乃削官羈管新州徽宗立亟召还复为右正言累迁中书舍人又上言陛下善继神宗之志善述神宗之事孝德至矣尚有五朝圣政盛德愿稽考而继述之以扬七庙之光貽福万世迁吏兵二部侍郎以宝文阁待制知江宁府徙杭越州初浩还朝帝首及谏立后事獎叹再三询諫草安在对曰焚之矣既退陈瓘谓之曰祸其在此乎他日奸人妄出一鍼则不可辩矣蔡京用事素忌浩乃使其党为伪疏言刘后杀卓氏而夺其子遂再责衡州别驾寻窜昭州五年始

得归初浩除谏官恐贻亲忧欲固辞母张氏曰汝能报国无愧于公论吾复何忧及浩两谪岭表母不易初意稍复直龙图阁瘴疾作危甚繇然仅存余息犹眷眷以国事为念语不及私卒年五十二高宗即位赠宝文阁直学士谥曰忠浩之友田昼王回曾诞皆良士也昼素与浩以气节相激励及刘后立时昼居家谓人曰志完不言可以絶交矣浩既得罪昼迎诸途浩出涕昼正色责之曰使志完隐默官京师遇寒疾不汗五日死矣岂独岭海之外能死人哉愿君毋以此自满士所当为者未止此也浩茫然自失谢曰君赠我厚矣浩之将论事也王回劝之曰事孰有大于此者乎子虽有亲然移孝为忠亦太夫人素志也及浩南迁人莫敢相顾回敛交游钱与浩治装往来经理且慰安其母遇者以闻逮诣诏狱御史诘之回曰实尝与谋不敢欺也因诵浩所上章凡二千言狱上除名停废回即徒步出都门行数十里其子追及问以家事不答曾诞公亮之从孙也孟后之废诞三与浩书劝浩力请复后浩不报及浩以言南迁诞作玉山主人对客问以讥浩不能力谏孟后之废而俟朝廷过举乃言为不知几者然百世之下顽夫廉懦夫有立志尚不失为圣人之清也其书既出识者以比争臣论云论曰道辅高风峻节振动一世议者谓宋自范仲淹始振作士大夫之气道辅之举功亦伟矣邹浩言于孟后既废之後曾诞论之是也然道辅居吕夷简迎合之时浩当章惇专擅之日世有污隆祸有浅深故浩尤为难浩之三友所以处浩者不同而皆有理致可观亦仅见之美谈也

狄青

狄青字汉臣汾州西河人善骑射宝元初赵元昊反诏择卫士从边以青为延州指使时偏将屡为贼败士卒多畏怯青行常为先锋凡四年大小二十五战中流矢者八破金汤城畧宥州燔积聚数万收其帐二千三百生口五千七百又城桥子谷筑招安丰林新砦大郎等堡皆扼贼要害尝战安远被创甚闻寇至即挺起驰赴衆争前为用临敌被髮带铜面具出入贼中皆披靡莫敢当尝以寡击衆预戒军中尽舍弓弩皆执短兵密令闻钲一声则止再声则严阵而阳却钲声止则大呼而突之士卒如言才遇敌遽声钲士卒皆止再声皆却夏人大笑曰孰谓狄天使勇钲声止忽前突之夏兵乱遂大败之又尝战已大胜追奔数里敌兵忽壅遏山隅士卒欲奋击青遽鸣钲止之敌得引去後验其处临深涧将佐悔不击青曰奔亡之寇忽止而拒我安知非谋军已大胜残寇不足利万一落其术中存亡不可知宁悔不击不可悔不止尹洙为经畧判官荐于经畧使韩琦范仲淹二人一见奇之待遇甚厚仲淹以左氏春秋授之曰将不知古今匹夫勇耳青折节读书悉通秦汉以来将帅兵法由是益知名累迁泾原路副都总管经畧招讨副使仁宗以青数有战功欲召见问以方畧会贼寇渭州命图形以进元昊称臣累迁彰化军节度使知延州擢枢密副使皇佑中广源州蛮侬智高反陷邕州又破沿江九州围广州岭外骚动杨畧等师久无功又命孙沔余靖为安抚使讨贼仁宗犹以为忧青上表请行翌日入对自言臣起行伍非战伐无以报国愿得蕃落骑数百益以禁兵羈贼首致阙下帝壮其言遂除青宣抚使率衆击贼置酒垂拱殿以遣之曾公亮问方略青曰比者军制不立又自广川之败赏罚不明今当立军制明赏罚而巳有求从青行者青曰能击贼有功则朝廷有厚赏若不能击贼则军中法重青不敢私也由是所辟取皆素知可用者及行日不过一驿所至州辄休士一日至潭州遂立行伍明约束军行止皆成行列军人有夺逆旅菜一把者斩以徇于是一军肃然万余人行未尝闻声青每止邮驿四面严兵每门皆设司使二人无人得妄出入求见青者即时得通野宿皆成营栅所居陈兵彀弓弩皆数重精鋭列左右守卫甚严时

智高还据邕州青合孙沔余靖兵次宾州先是蒋偕张忠皆轻敌败死青戒诸将毋妄与贼鬪听吾所为广西钤辖陈曙乘青未至辄以步卒八千犯贼溃于崑仑关殿直袁用等皆遁青曰令之不齐兵所以败晨会诸将堂上揖曙起并召用等三十人按以败亡状驱出军门斩之沔靖相顾?眙诸将股栗已而顿甲令军中休十日贼谍知不为备是夜大风雨青率衆半夜时度崑仑关既度喜曰贼不知守此无能为也已近邕州贼方觉逆战于归仁铺青登高望之贼据坡上官军薄之裨将孙节中流矢死贼气鋭甚青急麾白旗人人皆殊死战先是青已纵蕃落马二千出贼後至是前後合击贼之标牌军为马军所冲突皆不能驻军士又纵马上铁连枷击之遂皆披靡相枕藉死贼大败智高夜焚城遁去迟明青入城获金帛钜万杂畜数千招复老壮七千二百常为贼所俘胁者慰遣之时贼屍有衣金龙衣者衆谓智高已死欲以上闻青曰安知其非诈宁失智高敢欺朝廷耶初青之至邕也会瘴雾昏塞或谓贼毒水上流士饮者多死青殊忧之一夕有泉涌砦下汲之甘衆遂以济还京师帝嘉其功拜枢密使始交趾愿出兵助讨智高余靖言其可信具万人粮以待之诏以缗钱三万为军赏青既至檄余靖勿与通即上奏曰李德政声言赴援非其情实以一智高横蹂二广力不能讨乃假外助万一蛮兵贪得忘义因而启乱何以御之诏从青议贼平人服其远畧青在枢密四年罢判陈州明年卒帝发哀赠中书令谥武襄青善用兵尤推功不伐与孙沔破贼谋一出青贼既平经制余事悉以诿沔退若不用意者沔始叹其勇既而服其为人自以为不如也尹洙以贬死青悉力賙其家事青为枢密使有狄仁杰之後持画像及告身十余通诣青献之以青之远祖青谢曰少出田家一时遭际敢自附梁公哉厚赠而还之青既贵每至韩家必拜于庙廷之下入拜夫人甚恭以郎君之礼待其子孙为真定副帅时尝于军中宴琦游士刘易在焉优人以儒为戏易勃然谓黥卒敢如此詈青不絶口青殊自若笑语益温次日首造刘易谢之琦于是时已知其有量青事亲孝遭父丧虽衽金革之事而哀戚过人养母尤笃征南之日戒内外勿以兵事闻第云奉使江表而已熙宁元年神宗考次近世将帅慨然思之命取青画像入禁中御制祭文遣使齎中牢祠其家

论曰青之讨智高也朝臣谓青武人不足独任宜以重臣统之独龔籍力言青可用且谓委任不专将致僨事帝用其言青以成功此与杜黄裳力保高崇文以破刘辟李廴力保曹玮以成三都之绩同所谓庙算者非耶青之将略盖一世而谦让不居其识度有过人者晚遭暧昧之谤非其素守孚于上下几于殆矣韩范之所摩厉其不为无助哉

常安民 任伯雨

常安民字希古邛州人年十四入太学有俊名熙宁中取士学者皆宗王氏安民独不变春试第一主司启封见其年少欲下之判监常秩不可曰糊名较艺岂容辄易具以白王安石安石称其文由是名益盛然安石欲见之终不肯往六年登进士授应天府军巡判官选成都府教授秩满还京师妻孙氏与蔡确之妻兄弟也确时为相安民恶其人絶不相闻确妻使招其妻亦不往调知长洲县治以诚信人不忍欺县故多盗安民籍常有犯者书其衣揭其门约能得他盗乃除盗为之息追科使民自输常先他邑办转运使许懋孙昌龄入境皆称为古良吏元佑初李常孙觉范百禄苏轼鲜于侁连章论荐擢大理鸿臚丞是时元丰用事之臣虽去然其党分布中外倡私说以摇时政安民窃忧之贻书吕公着曰善观天下之势犹良医之视疾方

安宁无事之时语人曰其後必有大忧则衆必骇笑惟识微见几之士然後能逆知其渐今日天下之势可为大忧虽登进贤良而不能搜致海内之英才使皆萃于朝以胜小人恐端人正士未得安枕而卧也故去小人为不难而胜小人为难陈蕃窦武协心同力选用名贤天下想望太平然卒死曹节之手张柬之五王中兴唐室以为庆流万世及武三思得志至于窜移沦没凡此者皆前世已然之祸也今用贤如倚孤栋拔士如转巨石虽有奇特瓌卓之才不得一行其志甚可叹也猛虎负嵎莫之敢撓而卒为人所胜者人衆而虎寡也若以数十人而制千虎必不胜矣今怨愤已积一发其害必大可不为大忧乎及章惇作相其言遂验历转宗正丞苏辙荐为御史宰相不乐除开封府推官绍圣初召对言今日之患莫大于士不知耻愿奨进廉洁有为之士以厉风俗元佑进言者以熙丰为非今则反是愿公听并观择其中而归于当及拜监察御史遂论章惇专国植党乞收主柄而抑其权反覆曲折言之不置惇遣所亲语之曰君本以文学闻于时奈何以言语自任与人为怨少安静当以左右相处安民正色斥之惇益怒中官裴彦臣与户部尚书蔡京相结强毁人居室以建慈云院事闻诏御史劾治安民言事有情重而法轻者中官豪横与侍从官相交结同为欺罔此之奸状非法所能尽愿重为降罚以肃百僚及狱具惇主之止坐罚金安民复论京奸足以惑衆辨足以饰非巧足以移夺人主之视听力足以颠倒天下之是非内结中官外连朝士一不附己则诬以党于元佑非先帝法必挤之而後已今在朝之臣京党过半陛下不可不早觉悟而逐去之他日羽翼成就悔无及矣是时京之奸始萌芽人多未测独安民首发之又言今大臣为绍述之说皆借此名以报复私怨朋附之流遂从而和之疏数十上度终不能回遂丐外帝慰勉而已及大享明堂刘贤妃从侍斋宫安民以为万衆观瞻亏损圣德语颇切直帝微怒曾布初以安民数撼章惇意其附已屡称之其後安民并论曾布布乃与惇比而排之取所贻吕公着书白于帝帝谓安民曰卿所上宰相书比朕为汉灵帝何也安民曰奸臣指摘臣言推其世以文致臣耳辨之何益董敦逸再为御史欲劾苏轼兄弟安民谓二苏负天下重望不当尔敦逸以为党于苏氏奏之诏与知军惇径拟监滁州酒税至滁日亲细务郡守曾肇约为山林之游曰谪官例不治事安民谢曰食焉而怠其事不可满三岁通判温州徽宗立朝论欲起为谏官曾布沮之以为提点永兴军路刑狱蔡京用事入党籍流落二十年政和末卒年七十建炎四年赠右谏议大夫

任伯雨字德翁眉山人邃经术文力雄健中进士第调清江主簿旋知雍邱县御史以法抚民以恩县枕汴流漕运不絶旧苦多盗未尝有获者人莫知其故伯雨下令维舟无得宿境内不从则命东下者斧断其?趣京师者护以出自是外户不闭使者上其状召为大宗正丞甫至擢右正言时徽宗初政纳用说论伯雨首击章惇曰惇久窃朝柄迷国罔上毒流缙绅乘先帝变故仓卒辄逞异意睥睨万乘不复有臣子之恭向使其计得行将置陛下与皇太后于何地若贷不诛则天下大义不明大法不立矣臣闻北使言去年辽主方食闻中国黜惇放箸而起称甚善者再谓南朝错用此人又问何为只若是行遣以此观之不独孟子所谓国人皆曰可杀虽外国之人莫不以为可杀也章八上贬惇雷州继论蔡卞六大罪曰诬罔宣仁保佑之功欲行追废一也凡绍圣以来窜逐臣僚皆卞启而後行二也宫中厌胜事作哲宗方疑章惇欲召礼法官通议卞云既犯法矣何用议皇后以是得罪三也编排元佑章牒萋菲语言被罪者数千人议自卞出四也邹浩以言忤旨卞激怒哲宗致之远谪又请治其亲故送别之人五也蹇序辰建看详诉理之议章惇迟疑未应卞即以二心之言迫之惇默不敢对即日置局士大夫得罪者八百三十家凡此皆卞谋之而惇行之六也愿亟正典刑以谢天下建中靖国改元当

国者欲和调元佑绍圣之人伯雨言人固不当分党与然自古未有君子小人杂然并进可以致治者盖君子易退小人难退二者并用终于君子尽去小人独留不可不戒已又上书皇太后乞暴蔡京之恶召还陈瓘以全定策之勲时以正月朔旦有赤气之异诣火星观以禳之伯雨疏言尝闻修德以弭灾未有禳祈以消变又言比日内降漉多或恐矫传制命汉之鸿都卖爵唐之墨敕斜封此近监也伯雨居谏省半岁所上一百八疏曾布畏其多言俾权给事中讽以少默即为真伯雨不听抗论愈力既而将劾曾布布觉之徙为度支员外郎寻知虢州崇宁党事作削籍编管通州为蔡卞所陷与陈瓘龚夬张庭坚等十三人皆南迁独伯雨徙昌化宣和初卒年七十三绍兴初诏赠直龙图阁加谏议大夫采其谏章追贬章惇蔡卞邢恕等淳熙中赐谥文敏

论曰徽宗之初诸贤章疏多论章蔡之奸非好排击也小人在位彼将植党树私以误国殃民于是善人不得进善政不得行犹冰炭之不相入也安民所与公着书大哉言也于时宣仁在上距绍圣之世尚四五年使搜罗俊贤继踵而进以承诸老成之後殆庶几乎及韩忠彦当国犹持杯水以沃燎原弗可为也已以时之难如彼以遇之难如此宋事所以不竞哉元

王磐

王磐字文炳广平永年人元兵破永年将屠城磐父禧罄家以助军资衆赖以免金人迁汴乃举家南渡河居汝之鲁山磐年方冠从麻九畴学于鄆城客居贫甚日作麋一器画为朝暮食至大四年擢经义进士第授归德府录事判官不赴自是大肆力于经史百氏文词宏放浩无涯涘後寓居河内东平总管严实兴学养士迎磐为师受业者常数百人後多为名士中统元年即拜益都等路宣抚副使顷之以疾免李璫素重磐以礼延致之及璫谋不轨磐觉之脱身驰入京师以闻世祖即日召见嘉其诚节抚劳甚厚从平李璫还拜翰林直学士出为真定顺德等路宣慰使邢水县達嚕噶齐蒙固岱贪暴不法有赵清者发其罪使家人夜杀清清逃获免乃尽杀其父母妻子清诉诸官权要蔽蒙固岱不为理磐竟奏置诸法籍其家赀以半给清真定蝗起朝廷遣使者督捕役夫四万人以为不足欲牒邻道助之磐曰四万人多矣何烦他郡使者怒责磐状期三日尽捕蝗磐不为动亲率役夫走田间设方法捕之三日而蝗尽灭使者惊以为神复入翰林为学士入谒宰相首言方今害民之吏转运司为甚宜罢去之以苏民力由是运司遂罢阿哈玛特讽大臣请合中书尚书两省为一拜右丞相安图为三公陰欲夺其政柄有诏会议磐言合两省为一而以右丞相总之实便不然则宜仍旧三公既不预政事则不宜虚设其议遂沮及将伐宋凡帷幄谋议有所未决即遣使问之磐所敷陈每称上意帝将用兵日本问以便宜磐言今方伐宋若分力东方恐旷日持久功卒难成徐图之未晚也江南既下磐上疏大畧言禁戢军士选择官吏赏功罚罪推广恩信所以抚安新附销弭寇盜其言要切皆见施行朝议汰冗官权近私以按察司不便欲并省之磐奏曰各路州郡去京师遥远贪官污吏侵害小民无所控告惟赖按察司为之申理若指为冗官一切罢去则小民冤死无所诉矣按察司得不废朝廷录平宋功迁至宰执者二十余人因议更定官制磐奏疏曰历代制度有官品有爵号有职位官爵所以示荣宠职位所以委事权臣下有功有劳随其大小酬以官爵有才有能称其所堪处以职位此人君御下之术也臣以为有功者宜加迁散官或赐五等爵号如汉唐封侯之制可也不宜任以职位日本之役师行有期磐入谏曰日本小国

海道险远胜之则不武不胜则损威臣以为勿伐便帝震怒曰汝岂有他心耶磐对曰臣赤心为国故敢以言苟有他心何为从叛乱之地冒万死而来归乎臣年已八十他心欲何为耶明日帝恐其忧惧遣侍臣慰抚之磐以年老累乞骸骨诏进资德大夫致仕仍给半俸终身磐资性刚方闲居不妄言笑每奏对必以正不肯阿意承顺帝尝以古直称之虽权幸侧目不顾也阿哈玛特方得权致重币求作碑文磐拒弗与所荐宋衙雷膺魏初徐琰胡祗遹孟祺李谦後皆为名臣年九十二卒之夕有大星陨正寝之东赠太傅追封洛国公諡文忠

论曰世祖之时集天下名儒列于侍从与之朝夕论议虽不尽见施行亦大畧有效焉磐儒者而长于吏干故建明为多当兵革财利之间因事度义以行其正晚争日本之役批逆鳞而不恤与窳默之独论王文统非立意较然不欺其志孰能与于斯

虞集

虞集字伯生宋丞相允文五世孙也父汲官翰林院编修母杨氏祭酒文仲女也集三岁知读书父挈家趋岭外干戈中无书册可携母口授论语孟子左氏传欧苏文闻辄成诵比还长沙就外傅始得刻本则已尽读诸经通大义矣文仲世以春秋名家而族弟参知政事栋明于性理之学杨氏在室即尽通其说故集与弟盘皆受业家庭出则从吴澄游授受具有源委大德初始至京师以大臣荐授大都路儒学教授升国子助教师道以立仁宗即位除太常博士丞相拜珠方为其院使间从集问礼器祭义集为言先王制作以及古今因革治乱之由拜珠叹息益信儒者有用迁集贤修撰因会议学校集上议谓师道立则善人多宜求经明行修者以德化之其次则操履近正确守先儒经义师说者日讽诵其书使学者习之其次则取乡贡至京师罢归者其议论文艺犹足耸动于人六年除翰林待制兼国史院编修官仁宗尝对左右叹曰儒者皆用矣惟虞伯生未显擢耳英宗即位拜珠为相超用贤俊时集以忧还江南拜珠不知也乃言于上遣使求之于蜀不见求之江西又不见及集省墓吴中使至受命趋朝则拜珠不及见矣泰定初考试礼部言于同列曰国家科目之法诸经传注各有所主者将以一道德同风俗非欲使学者专门擅业如近代五经学究之固陋也圣经深远非一人之见可尽试艺之文推其高者取之不必先有主意若先有主意则求贤之心狭而差自此始矣後再为考官率持是说故所取每称得人除国子司业迁秘书少监天子幸上都集与王结执经以从自是岁常在行拜翰林直学士兼国子祭酒尝因讲罢论京师恃东南运粮为资竭民力以航不测非所以宽远人而因地利也京师之东濒海数千里北极辽海南滨青齐萑苇之场也海潮日至淤为沃壤用浙人之法筑堤扞水为田听富民欲得官者合其众分授以地官定其畔以为限能以万夫耕者授以万夫之田为万夫之长千夫百夫亦如之察其惰者易之一二年勿征也三年视其成以地之高下定额于朝廷以次渐征之五年有积蓄命以官就所储给以禄十年佩之符印得以传子孙如军官之法则东面民兵数万可以近卫京师外御岛夷远宽东南海运以纾疲民遂富民得官之志而获其用江海游食盗贼之类皆有所归矣为议者所沮事竟寝其後海口万户之设大畧宗之文宗即位仍兼经筵集以先世坟墓在吴越者岁久湮没乞一郡自便帝惜其去除奎章阁侍书学士时关中大饥民枕藉死有方数里无子遗者帝问集何以救关中对曰宜遣一二有仁术知民事者稍宽其禁令使得有所为随郡县择可用之人因旧民所在定城郭修閭里治沟洫限畎亩薄征敛招其伤残老弱渐以其力治之则远

去而来归者渐至春耕秋敛皆有所助一二岁间勿征勿徭封域既正友望相济四面而至者均齐方一截然有法则三代之民将见出于空虚之野矣帝称善集因进曰幸假臣一郡必有以报或沮之曰集欲以此去耳遂罢其议有旨采辑本朝典故再阅岁书乃成凡八百帙既进以目疾丐去不许集弘才博识一时大典册咸出其手每承诏有所述作必以帝王之道治忽之故从容讽切冀有感悟承顾问及古今政治得失尤委曲尽言或随事规谏出不语人人亦莫之知也後谢病归至正八年五月卒年七十有七赠江西行中书省参知政事封仁寿郡公集孝友方二亲以故家令德中遭乱亡侨寓下邑左右承顺无违弟盘早卒教育其孤无异己子兄采以笥库输赋京师亏数千缗尽力营贷代偿之抚庶弟嫁孤妹具有恩意山林之士知古学者必折节下之接後进虽少且贱如敌已当权门赫奕未尝有所附丽集议中书正言说论多见容受屡以片言解疑误出人於死亦不以为德平生为文万篇稿存者十二三早岁与弟盘同辟书舍为二室左室书陶渊明诗于壁题曰陶庵右室书邵尧夫诗题曰邵庵故世称邵庵先生

论曰元之名人才士惟集于经济最优观其屡乞州郡岂亦有所抑而思奋者耶其所建筑堤垦田之议百世良规而当时之论至恐主其事者政以贿成遂以中止有治人无治法岂不信夫

史传三编卷四十八

卷四十九

钦定四库全书

史传三编卷四十九

大学士朱轼撰

循吏传一

汉

文翁

文翁庐江舒人少好学通春秋以郡县吏察举景帝末为蜀郡守仁爱好教化见蜀地僻陋有蛮夷风欲诱进之乃选郡县小吏开敏有材者张叔等十余人亲自飭厉遣诣京师受业博士或学律令减省少府用度买刀布蜀物齎计吏以遗博士数岁蜀生皆成就还归文翁以为右职用次察举官有至郡守刺史者又修学官於成都市中为石室祀孔子以顔曾以下高弟配享後世文庙从祀沿及诸儒其原皆自文翁发之招下县子弟除其更繇高者补郡县吏次为孝弟力田常选学官童子皆各使其在便坐受事故当每出行县益从学官诸生明经饬行者与俱使传教令出入闺阁县邑吏民见而荣之争欲为学官子弟富人至出钱求之由是大化蜀地学於京师者比齐鲁至武帝时乃令天下郡国皆立学校官自文翁为之始文翁终於蜀吏民为立祠堂岁时祭祀不絶至今巴蜀好文雅文翁之化也

论日记云古之王者建国君民教学为先若文翁可谓知所本矣蜀自秦始通中国素未耀於文明然文翁以一守移易风俗如转圜然况於为天子宰獎教兴学诘直风草之势已哉史又称文翁倡教相如实为之师夫相如华敷文胜不过雕篆之技故终西汉蜀儒仅以扬雄为称首使当其时得如古乐正者以师之其所乐育以赞助道化当不止此矣

龚遂

龚遂字少卿山阳南平阳人以明经为官至昌邑郎中令事王贺贺动作多不正遂为人忠厚刚毅有大节内諫争於王外责傅相引经义陈祸福至於涕泣蹇蹇亡已面刺王过王至掩耳起走曰郎中令善媿人国人皆畏憚焉王尝久与驸奴宰人游戏饮食赏赐亡度遂入见涕泣行左右侍御皆出涕王曰郎中令何为哭遂曰臣痛社稷危也愿请间竭愚王辟左右遂曰大王知胶西王所以为无道亡乎王曰不知也曰胶西王有谀臣侯得王所为拟於桀纣也得以为尧舜也王说其谄谀尝与寝处唯得所言以至於今大王亲近羣小渐渍邪恶所习存亡之机不可不慎也臣请选郎通经术有行义者与王起居坐则诵诗书立则习礼容宜有益王

许之遂乃选郎中张安等十人侍王居数日王皆逐去安等及昭帝崩亡子贺嗣立官属皆徵入王相安乐迁长乐卫尉遂见安乐流涕谓曰王立为天子日益骄溢谏之不复听古制寛大臣有隐退今去不得阳狂恐知身死为世戮奈何君陛下故相宜极谏争王即位二十七日卒以淫乱废昌邑羣臣坐?王於恶诛死者二百余人唯遂与中尉王阳以数谏争得减死髡为城旦後渤海左右郡岁饥盗贼并起宣帝选能治者以遂为渤海太守时遂年七十形貌短小上召见不副所闻心内轻焉谓遂曰渤海废乱朕甚忧之君何以息其盗贼遂曰海滨遥远不沾圣化民困於饥寒而吏不恤故使陛下赤子盗弄陛下之兵於潢池中耳今欲使臣胜之邪将安之也上闻遂对甚悦答曰固欲安之也遂曰臣闻治乱民犹治乱绳不可急也唯缓之然後可治臣愿丞相御史且无拘臣以文法得一切便宜从事上许之遂乘传至渤海界郡发兵迎遂皆遣还勅属县悉罢逐捕盗贼吏诸持鉏鉤田器者皆良民吏毋得问持兵者廼为盗贼单车独行至府郡中翕然盗贼闻教令即时解散弃兵弩而持钩鉏於是悉平民安土乐业遂廼开仓廩假贫民选用良吏尉安牧养焉遂见齐俗奢侈好末技不田作廼躬率以俭约劝民务农桑令口种一树榆百本?五十本葱一畦韭家二母彘五鸡民有带持刀劔者使卖劔买牛卖刀买犊曰何为带牛佩犊益课收敛畜果实菱芡劳来循行郡中皆有畜积吏民富实狱讼止息数年上遣使者徵遂议曹王生愿从王生素嗜酒亡节度遂不忍逆及至京师将入宫王生醉从後呼曰愿有白遂还问其故王生曰天子即问君何以治渤海君不可有所陈对宜曰皆圣主之德非小臣之力也遂受其言既至前上果问以治状遂对如王生言天子悦其有让笑曰君安得长者之言而称之遂因前曰臣非知此乃臣议曹教戒臣也上以遂年老不任公卿拜为水衡都尉议曹王生为水衡丞以褒显遂甚重之以官寿卒

论曰先王之世无旷土无游民食节事时民咸安其居以故奸宄不作五刑不试秦汉以後民业益薄俗益偷一遇水旱盗贼辄兴於是立重法以绳其後而民生愈蹙矣遂之议安渤海何其惻然动人也昔汲黯以謇直立朝孝武称为社稷臣其涖郡亦能以清静理遂之忠言似黯而吏绩抑又过之庶几重臣之选乃以年老不至公卿惜哉

黄霸

黄霸字次公淮阳阳夏人以豪杰役使徙云陵霸少学律令喜为吏武帝末以待诏补侍郎谒者後为河南太守丞霸为人明察内敏然温良有让足知善御衆为丞处议当於法合人心太守甚任之吏民爱敬焉自武帝末用法深昭帝立幼大将军霍光秉政上官桀等争权与燕王谋作乱光既诛之遂遵武帝法度以刑罰痛绳羣下繇是俗吏尚严酷而霸独用寛和为名宣帝在民间时知百姓苦吏急闻霸持法平及即位召为廷尉正数决疑狱庭中称平守丞相长史坐长信少府夏侯胜非议诏书霸阿纵不举劾皆下廷尉系当死霸因从胜受尚书狱中再逾冬积三岁乃出胜出复为谏大夫令左冯翊宋畸举霸贤良胜又荐之擢扬州刺史三岁调颍川太守时上垂意於治数下恩泽诏书吏不奉宣霸选择良吏分部宣布诏令令民咸知上意使邮亭乡官皆畜鸡豚以贍鰥寡贫穷者然後为条教置父老师帅伍长班行之於民间劝以为善防奸之意及务耕桑节用殖财种树畜养去食谷马米盐靡密初若烦碎然霸精力能推行之吏民见者语次寻绎问它陰伏以相参考尝欲有所司察择长年廉吏遣行属令周密吏出不敢舍邮亭食於道旁乌攫其肉民有欲谒府口言事者适见之霸与语道此後日吏还

谒霸霸迎劳之曰甚苦食於道旁乃为乌所盗肉吏大惊以霸具知其起居所问毫厘不敢有所隐其识事聪明如此吏民不知所出咸称神明奸人去入它郡盗贼日少霸力行教化而後诛罚务在成就全安长吏许丞老病聋督邮白欲逐之霸曰许丞廉吏虽老尚能拜起送迎正颇重听何伤且善助之母失贤者意或问其故霸曰数易长吏送故迎新之费及奸吏缘絶簿书盗财物公私费耗甚多皆当出於民所易新吏又未必贤或不如其故徒相益为乱凡治道去其太甚者耳霸以外宽内明得吏民心户口岁增治为天下第一徵守京兆尹坐事贬秩有诏归潁川治如其前前後八年郡中愈治是时凤凰神爵数集郡国潁川尤多天子以霸治行终长者下诏称扬曰潁川太守霸宣布诏令百姓乡化孝子悌弟贞妇顺孙日以衆多田者让畔道不拾遗养视鰥寡赡助贫穷狱或八年亡重罪囚吏民兴於行谊其赐爵关内侯黄金百斤秩中二千石而潁川孝弟有行义民三老力田皆以差赐爵及帛後数月徵为太子太傅迁御史大夫五凤三年代丙吉为丞相封建成侯食邑六百户霸材长於治民及为丞相总纲纪号令风采不及丙魏于定国功名损於治郡时京兆尹张敞舍鸚雀飞集丞相府霸以为神雀议欲以闻敞奏霸甚惭又以荐乐陵侯史高可太尉被诏诘责霸免冠谢罪自是不敢复有所请然自汉兴言治民吏以霸为首为丞相五岁甘露三年薨諡曰定侯子孙为吏二千石者五六人

论曰子贱为单父宰有贤於已者五人子贱师之而稟度焉用能鸣琴而治夫子称之曰昔尧舜听天下务求贤以自辅惜不齐所治者小也霸之治潁川不闻求一贤师一士而独任聪明以为理故处郡则优以宰天下而其才遂绌虽然树畜桑农王政先务以此殖民民可使富也如其礼乐则以俟夫君子

朱邑

朱邑字仲卿庐江舒人少时为舒桐乡啬夫廉平不苟以爱利为行未尝笞辱人存问耆老孤寡遇之有恩所部吏民无不爱戴迁补太守卒史举贤良为大司农丞迁北海太守以治行第一入为大司农为人醇厚笃於故旧然性公正不可交以私天子器之朝廷敬焉是时张敞为胶东相与邑书曰昔陈平虽贤须魏倩而後进韩信虽奇赖萧公而後信故事各达其时之英俊若必伊尹吕望然後荐之则此人不因足下而进矣邑感敞言贤士大夫多得其助者身为列卿居处俭节禄赐以共九族乡党家无余财神爵元年卒天子闵惜下诏曰大司农邑廉洁守节退食自公亡疆外之交束修之馈可谓淑人君子赐邑子黄金百斤以奉祭祀初邑病且死属其子曰我故为桐乡吏其民爱我必葬我桐乡後世子孙奉尝我不如桐乡民及死其子葬之桐乡西郭外民果然共为邑起塚立祠岁时祠祭不絶

论曰一命之士苟存心爱物於人必有所济当邑为啬夫时民视为父母久矣迨夫报最登朝輿望日重推其性情行事盖岂弟君子也昔子产死夫子以为古之遗爱若邑者足以当之

召信臣

召信臣字翁卿九江寿春人以明经甲科为郎出补阳谷长举高第迁上蔡长其治视民如子

所居见称超为零陵太守病归复徵为谏大夫迁南阳太守信臣为人勤力有方畧好为民兴利务在富之躬劝耕农出入阡陌止舍离乡亭稀有安居时行视郡中水泉开通沟渎起水门提阨凡数十处以广溉灌岁岁增加多至三万顷又为民作均水约束刻石立於田畔以防分争禁止嫁娶送终奢靡务出於俭约府县吏家子弟好游敖不以田作为事辄斥罢之甚者按其不法以视好恶其化大行郡中莫不力田百姓归之户口增倍盗贼狱讼衰止吏民亲爱号曰召父迁河南太守治行常为第一竟宁中徵为少府奏请上林诸离远宫馆勿复缮治共张又乐府黄门倡优诸戏及宫馆兵弩什器奏省太半太官园种冬生葱韭菜茹覆以屋庑昼夜?蘊火待温气乃生信臣以为此皆不时之物有伤於人不宜以奉供养及它非法食物悉奏罢省费岁数千万年老卒官元始四年诏祀百辟卿士有益於民者蜀郡以文翁九江以召父应诏岁时二千石率官属祠信臣塚而南阳亦为立祠

论曰古为沟洫以备旱潦至周益详自阡陌开井田废农之病也久矣惟水利足以救之至於礼秩无等俗尚繁奢尤宜亟为之制信臣於此二者法禁犹多未备也而已生获令名没享荣祀彼以古法为不宜於今者诚与於不仁之甚者已

尹翁归

尹翁归字子况河东平阳人为狱小吏晓习文法喜击剑人莫能当是时大将军霍光秉政诸霍在平阳奴客持刀兵入市斗变吏不能禁及翁归为市吏莫敢犯者公廉不受馈百贾畏之後去吏居家会田延年为河东太守行县至平阳悉召故吏五六十人亲临见令有文者东有武者西阅至翁归伏不起曰翁归文武兼备唯所施設延年召问甚奇其对除卒史从归府案事发奸穷竟事情延年自以能不及徙署督邮河东二十八县分为两部闾儒部汾北翁归部汾南所举应法得其罪辜属县长吏虽中伤莫有怨者举廉为缙氏尉历守郡中所居治理选补都内令举廉为宏农都尉徵拜东海太守过辞廷尉于定国定国家在东海欲属邑子两人及与翁归语终日不敢见其邑子既去定国乃谓邑子曰此贤将汝不任事也又不可干以私翁归治东海明察郡中贤不肖及奸邪罪名尽知之县县各有记籍收取黠吏豪民案致其罪以一警百吏民皆恐惧改行自新东海大豪 许仲孙为奸猾乱吏治前二千石莫能制翁归至论弃市一郡怖栗莫敢犯禁东海大治以高第入守右扶风选用廉平疾奸吏以为右职接待以礼好恶与同其负翁归罚亦必行奸邪罪名亦县县有籍盗贼发其比伍中翁归辄召其县长吏告晓以奸黠主名使用类推迹无有遗脱缓於小弱急於豪强扶风大治翁归为政虽任刑其在公卿间清洁自守语不及私温良谦退不以行能骄人甚得名誉於朝廷元康四年卒家无余财天子贤之赐黄金百斤以奉祭祀三子皆为郡守少子岑历位九卿至後将军而闾儒亦至广陵相有治名由是世称田延年为知人

论曰尚德缓刑先王所以致治也然水懦民玩威在鈇钺观翁归之置籍诘奸以一警百犹有刑赏忠厚之意焉至缓小弱而急豪强则诗所云不吐茹者意庶几乎

韩延壽

韩延壽字长公燕人也徙杜陵少为郡文学燕刺王之谋逆也延壽父义为燕郎中强谏而死及魏相对策以为言谓宜显赏其子以示天下大将军霍光纳其言因擢延壽为谏大夫迁淮阳太守治甚有名徙颍川颍川多豪强难治常为选良二千石先是赵广汉为太守患其俗多朋党故构吏民令相告讐颍川由是以为俗民多怨讐延壽欲改更之教以礼让乃历召郡中长老为乡里所信向者数十人设酒具食亲与相对接以礼意人人问以谣俗民所疾苦为陈和睦亲爱销除怨咎之路长老皆以为便可施行因与议定嫁娶丧祭仪品略依古礼不得过法於是令文学校官诸生皮弁执俎豆为吏民行丧嫁娶礼百姓遵用其教卖偶车马下里伪物者弃之市道数年徙为东郡太守黄霸代居颍川因其迹而大治延壽为吏上礼义好古教化所至必聘其贤士以礼待用广谋议纳谏争举行丧让财表孝弟有行修治学宫春秋乡射陈钟鼓管弦盛升降揖让及都试讲武设斧钺旌旗习射御之事治城郭收赋租先明布告其日以期会为大事吏民敬畏趋向之又置正伍长相率以孝弟不得舍奸人间里阡陌有非常吏辄闻知奸人莫敢入界其始若烦後吏无追捕之苦民无箠楚之忧皆便安之接待下吏恩施甚厚而约誓明或欺负之者延壽痛自刻责岂其负之何以至此吏闻者自伤悔其县尉至自刺死延壽尝出临上车骑吏一人後至敕功曹议爵白还至府门门卒当车愿有言延壽止车问之卒曰孝经曰资於事父以事君而敬同今日明府早驾久驻未出骑吏父来至府门不敢入骑吏闻之趋走出谒适会明府登车以敬父而见爵得无亏大化乎延壽举手舆中曰微子太守不自知过归舍召见门卒遂待用之其纳善听谏皆此类也在东郡三岁令行禁止断狱大减为天下最入守左冯翊满岁称职为真岁余不肯出行县丞掾数白延壽曰县皆有贤令长督邮分明善恶於外行县恐无所益重为烦扰丞掾固强之延壽不得已行县至高陵民有昆弟相与讼田自言延壽大伤之曰幸得备位为郡表率不能宣明教化至令民有骨肉争讼既伤风化重使贤长吏嗇夫三老孝弟受其耻咎在冯翊当先退是日移病不治事因入卧传舍闭阁思过一县莫知所为令丞嗇夫三老亦皆自系待罪於是讼者宗族传相责让此两昆弟深自悔皆自髡肉袒谢愿以田相移终死不敢争延壽大喜开阁延见内酒肉与相对饮食厉勉以意告乡部有以表劝悔过从善之民延壽乃起听事劳谢令丞以下引见尉荐郡中歛然传相敕厉不敢犯延壽恩信周徧二十四县莫复以辞讼自言者推其至诚吏民不忍欺给延壽代萧望之为左冯翊而望之迁御史大夫侍谒者福为望之道延壽在东郡时放散官钱千余万望之与丞相丙吉议吉以为更大赦不须考会御史当问事东郡望之令并问之延壽闻之即部吏案校望之在左冯翊时廩牺官钱放散百余万廩牺吏掠治急自引与望之为奸延壽劾奏移殿门禁止望之望之自奏职在总领天下闻事不敢不问而为延壽所拘持上由是不直延壽各令穷竟所考望之卒无事实而御史案东郡具得其事於是望之劾奏延壽事下公卿皆以延壽前既无状後复诬愬典法大臣欲以解罪狡猾不道天子恶之延壽竟坐弃市吏民数千人送至渭城老小扶持车毂争奏酒炙延壽不忍距逆人人为饮计饮酒石余使掾史分谢送者远苦吏民延壽死无所恨百姓莫不流涕延壽三子皆为郎吏且死属其子勿为吏以已为戒子皆以父言去官不仕

论曰三代以返教化衰息故汉兴良吏如龚黄辈其效止於富民即文翁於蜀亦不过猎其英而咀其华耳未有能以礼让为国者也延壽之教考行古礼与民为让彬彬乎三代之遗及至末路与望之相讐无论当时所案未必得实就使有之责过录长犹当使从议贤之条也丙吉以为更大赦不须考庶几休休之度古所谓一个臣者已

张敞

张敞字子高本河东平阳人祖父孺徙茂陵敞又徙杜陵初补太守卒史察廉为甘泉仓长稍迁太仆丞会昌邑王贺即位动作不由法度敞上书谏後十余日王贺废敞以切谏显名擢豫州刺史宣帝徵为太中大夫与于定国并平尚书事以正违忤大将军霍光使主兵车出军省减用度复出为函谷关都尉宣帝以废王贺在昌邑心憚之徙敞为山阳太守及霍光薨宣帝亲政事渐收霍氏权罢光兄孙山云以侯归第霍氏诸壻亲属颇出补吏敞闻之上封事陈计上甚善之然不徵也久之渤海胶东盗贼并起敞自请治之天子徵为胶东相敞谓治剧郡非赏罚无以劝善惩恶吏追捕有功者请得壹切比三辅尤异天子许之敞乃明设购赏开羣盗令相捕斩除罪吏追捕有功上名尚书调补县令者数十人由是盗贼解散吏民歛然居顷之入守京兆尹自赵广汉诛後比更守尹如黄霸等数人皆不称职京师寝废长安市偷盗尤多百贾苦之敞既视事廉得偷盗酋长数人召见责问因贯其罪免其宿负令致诸偷以自赎偷长曰今一旦召诣府恐诸偷惊骇愿一切受署敞皆以为吏遣归休置酒小偷悉来贺且饮醉偷长以赭污其衣裾吏坐里闾阅出者污赭辄收缚之一日捕得数百人穷治所犯尽行法罚由是枹鼓稀鸣市无偷盗敞为人敏疾赏罚分明见恶辄取时时越法纵舍有足大者其治京兆略循广汉之迹方略耳目发伏禁奸不如广汉然敞本治春秋以经术自辅其政颇杂儒雅往往表贤显善不醇用诛罚以此能自全竟免於刑戮京兆中浩穰於三辅尤为剧郡国二千石以高第入守久者不过三二年近者数月一岁辄以罪过罢惟广汉及敞为久任职敞为京兆朝廷每有大议引古今处便宜公卿皆服天子数从之然无威仪又为妇画眉故终不得大位为京兆九岁坐与光禄勳杨惲厚善惲坐大逆诛公卿奏敞不宜处位等比皆免而敞奏独寝不下敞使贼捕掾絮舜有所案验舜以敞劾奏当免不肯为竟事私归其家人或谏舜舜曰五日京兆耳安能复案事敞闻即部吏收舜系狱是时冬未尽数日敞昼夜验治舜竟致其死事舜当出死敞使主簿持教告舜曰五日京兆竟何如乃弃舜市会立春行冤狱使者出舜家载尸并编敞教自言使者使者奏敞贼杀不辜天子薄其罪欲令敞得自便利即先下敞前坐杨惲奏免为庶人敞诣阙上印绶便从阙下亡命数月京师吏民解弛枹鼓数起而冀州部中有大贼天子思敞功效使使者即家在所召敞敞妻子家室皆泣惶惧敞独笑曰吾身亡命郡吏当就捕今使者来此天子欲用我也即装随使者诣公车天子引见拜为冀州刺史敞到部以耳目发起贼主名区处诛其渠帅而广川王姬昆弟及王同族宗室刘调等通行为盗囊橐吏逐捕穷窘踪迹皆入王宫敞自将郡国吏车数百两围守王宫搜索调等果得之殿屋重轘中皆捕格断头县王宫门外因劾奏广川王天子不忍致法削其户敞居部岁余盗贼禁止守太原太守满岁为真太原郡清元帝初即位待诏郑明荐敞先帝名臣宜辅皇太子上以问前将军萧望之望之以为敞能吏任治烦乱材轻非师傅之器天子犹徵敞欲以为左冯翊会病卒

论曰敞为吏皆以善弭盗得名其治胶东之法三治京兆冀州之法各一夫盗之炽必有窝主以为逋数有酋魁以为指纵涤其藪制其魁而盗源斯塞至若悬以赏格使人尽捕吏优其迁调使吏尽争功下除罪之令使盗党相捕无以异於吏民则盗亦安所容哉敞负才智以经术自辅而弭盗之方实具足为後法也若赵广汉治京兆烛奸锄豪有赵张三王之称然多用鈎距之术少子谅易直之心言乎教化则不如文翁韩延寿言乎才能则较之敞与王尊独为刻

深非所以垂训也故削之

王尊

王尊字子赣涿郡高阳人少孤诸父使牧羊泽中尊窃学问能史书年十三为狱小吏数岁除补书佐署守属监狱久之称病去师事郡文学官治尚书论语略通大义复召署守属治狱为郡决曹史数岁举幽州刺史从事察廉补辽西盐官长数上书言便宜事初元中举直言迁虢令转守槐里兼行美阳令事美阳女子告假子不孝曰儿常以我为妻诟笞我尊收捕验问辞服尊曰律无妻母之法圣人所不忍书此经所谓造狱者也於是出坐庭上取不孝子县磔着树使骑吏五人射杀之吏民惊骇後擢为安定太守到官出教告属县曰太守以今日至府愿诸卿勉力正身以率下故行贪鄙能变更者与为治明慎所职毋以身试法又敕掾功曹各自砥砺助太守为治其不中用趣自避退毋久妨贤府丞悉署吏行能分别白之贤为上毋以富贾人百万不足与计事昔孔子治鲁七日诛少正卯今五官掾张辅怀虎狼之心贪污不轨一郡之钱尽入辅家然适足以葬矣今将辅送狱丞戒之戒之相随入狱矣辅系狱数日死尽得其狡猾不道百万奸臧威震郡中盗贼分散入傍郡界豪强多诛伤伏辜者坐残贼免起家复为护羌将军转校尉护送军粮委输而羌人反絶转道兵数万围尊尊以千余骑奔突羌贼功未列上坐擅离部署会赦免归家涿郡太守徐明荐尊上以为郿令迁益州刺史先是王阳为益州刺史行部至邛郯九折阪叹曰奉先人遗体奈何数乘此险後以病去及尊为刺史至其阪问曰此非王阳所畏道耶吏对曰是尊叱其驭曰驱之王阳为孝子王尊为忠臣居部二岁怀来徼外蛮夷归附博士郑宽中使行风俗举尊治状迁东平相是时东平王以至亲骄奢不奉法度傅相连坐及尊视事奉玺书至廷中王未及出受诏尊持玺书归舍食已乃还致诏後谒见王太傅在前说相鼠之诗尊曰毋持布鼓过雷门王怒起入後宫尊亦直趋出就舍先是王数私出入驱驰国中与后姬家交通尊召敕廐长大王当从官属鸣和鸾乃出自今有令驾小车叩头争之言相教不得後尊朝王王复延请登堂尊谓王曰尊来为相人皆吊尊以尊不容朝廷故免使相王耳天下皆言王勇顾但负贵安能勇如尊乃勇耳王变色视尊意欲格杀之即好谓尊曰愿观相君佩刀尊举掖顾傍侍郎前引佩刀视王王欲诬相拔刀向王邪王情得又雅闻尊高名大为尊屈酌酒具食相对极驩太后奏尊为相倨慢王血气未定不能忍诚恐母子俱死尊竟坐免为庶人大将军王凤奏尊补军中司马擢司隶校尉初中书谒者令石显贵幸专权为奸邪丞相匡衡御史大夫张谭皆阿附畏事显及元帝崩成帝即位显徙为中太仆不复典权衡谭乃奏显旧恶尊劾衡谭位三公典五常九德以总方略壹统类广教化美风俗为职知显专权擅势大作威福为海内患害不以时白奏行罚而阿谀曲从附下罔上怀邪迷国无大臣辅政之义衡惭惧免冠谢罪上丞相侯印绶天子以新即位重伤大臣乃下御史丞问状尊坐涂污宰相轻薄国家左迁为高陵令数月以病免会南山羣盗髡宗等数百人为吏民害拜故弘农太守傅刚为校尉将迹射士千人逐捕岁余不能禽或说大将军凤选用贤京兆尹於是凤荐尊徵为谏大夫守京辅都尉行京兆尹事旬月间盗贼清迁光禄大夫守京兆尹後为真凡三岁坐遇使者无礼长安系者三月间千人以上御史大夫奏免尊吏民多称惜之湖三老公乘舆等上书讼尊治京兆功效曰往者南山盗贼阻山横行道路不通暴师露衆不能擒制尊行京兆尹二旬之间大党震坏渠率效首贼乱蠲除民反农业拊循贫弱鉏耰豪强奸邪销释吏民悦服诚国家爪牙之吏折冲之臣今一旦无辜伤於诋欺之文上不得

以功除罪下不蒙棘木之听愿下公卿大夫博士议郎定尊素行书奏天子复以尊为徐州刺史迁东郡太守久之河浸瓠子金堤尊躬率吏民沈白马祀水神河伯亲执圭璧使巫策祝请以身填金堤因止宿堤上吏民数千万人尽叩头救止尊尊终不肯去及水盛堤坏吏民皆奔走惟一主簿泣在尊旁立不动而水波稍却回还吏民嘉壮尊之勇节白马三老朱英等奏其状下有司考皆如言於是秩尊中二千石加赐黄金二十斤数岁卒官吏民祀之

论曰推尊之劲气壮节虽刀锯在前鼎镬在後不啻甘饴曾无顾畏即自谓责育不能过之矣记曰孝子不登高然战阵无勇又为非孝者岂不以丈夫授命必得死所当尊疾驱度阪时万一马惊车殆身殒悬崖於孝固亏矣於忠亦不为得也是以古之养勇者必先明理理不明而浪擲其生不几於暴虎冯河者乎

薛宣

薛宣字贡君东海人少为廷尉书佐都船狱吏後补不其丞琅邪太守赵贡行县见宣甚说其能从贡还府贡令妻子与相见戒曰贡君至丞相我两子亦中丞相史察宣廉迁乐浪都尉丞举茂材为宛句令王凤荐为长安令以明习文法补御史中丞是时成帝初即位宣执法殿中数言政事便宜举奏部刺史郡国二千石所贬退称进白黑分明繇是知名出为临淮太守政教大行会陈留有大贼废乱徙为陈留太守盗贼禁止吏民敬其威信入守左冯翊满岁称职为真始高陵令杨湛栎阳令谢游皆贪猾不逊持郡短长前二千石数案不能竟及宣视事为设酒饭与相对接待甚备已而具得其罪臧然宣察湛有改节敬宣之效乃手自牒书封与湛曰吏民条言君如牒或议以为疑於主守盗冯翊敬重令又念十金法重不忍相暴章故密以手书相晓欲君自图进退可复伸眉於後即无其事复封还记得为君分明之湛自知罪臧皆应记而宣辞语温润无伤害意即解印绶付吏为记谢宣终无怨言而栎阳令游自以大儒有名轻宣宣独移书显责之曰吏民言令治行烦苛譴罰作使千人以上贼取钱财数十万给为非法卖买听任富吏贾数不可知证验以明白欲遣吏考案恐负举者耻辱儒士孔子曰陈力就列不能者止令详思之游得檄亦解印绶去又潁阳县北当上郡西河为数郡凑多盗贼其令平陵薛恭本县孝者功次稍迁未尝治民职不办而粟邑县小辟在山中民谨朴易治令钜鹿尹赏久郡用事吏为楼烦长举茂材迁在粟宣即奏赏与恭换县二人视事数月而两县皆治宣因移书劳勉之曰昔孟公绰优於赵魏而不宜滕薛故或以德显或以功举君子之道焉可诬也属县各有贤君冯翊垂拱蒙成愿勉所职卒功业宣得吏民罪名辄召告县长吏使自行罰晓曰府所以不自发举者不欲代县治夺贤令长名也长吏莫不喜惧免冠谢宣宣为吏赏罰明用法平而必行所居皆有条教可纪多仁恕爱利池阳令举廉吏狱掾王立府未及召闻立受囚家钱宣责让县县案验狱掾乃其妻独受系者钱狱掾实不知掾慚恐自杀宣闻之移书池阳曰立家私受赇而立不知杀身以自明立诚廉士其以府决曹掾书立之柩以显其魂府掾史素与立相知者皆予送葬及日至休吏贼曹掾张扶独坐曹治事宣出教曰盖礼贵和人道尚通日至吏以令休所繇来久曹虽有公职事家亦望私恩意掾宜从衆归对妻子设酒肴请邻里一笑相乐扶慚愧官属善之宣为人好威仪进止雍容甚可观也性密静有思思省吏职求其便安下至财用笔砚皆为设方略利用而省费郡中清静迁为少府月余御史大夫于永卒谷永上疏荐宣上遂以宣为御史大夫数月代张禹为丞相封高阳侯食邑千户

乃除赵贡两子为史宣为相官属议其烦碎无大体不称贤而天子好儒雅宣经术又浅上亦轻焉久之广汉郡盗贼羣起数月乃平会印成太后崩丧事仓卒吏赋敛以趣办上闻之以过丞相御史遂册免宣初宣为丞相翟方进为司直宣知方进名儒有宰相器深结厚焉後方进竟代为丞相思宣旧恩宣免後二岁荐宣明习文法练国制度上徵宣复爵高阳侯加宠特进给事中视尚书事宣复尊重任政数年後坐善定陵侯淳于长罢归卒于家

论曰贡识宣宣亦识方进二人皆卒至相位何见之明也宣为郡颇持大体及为相乃以烦碎见讥方宣之除中丞以明习文法故其後方进荐宣亦云然以知文法可以治郡而不可以相天子宰天下古之服古入官者其术业必异於是矣

史传三编卷四十九

卷五十

<史部,传记类,总录之属,史传三编

钦定四库全书

史传三编卷五十

大学士朱轼撰

循吏传二

汉

卓茂

卓茂字子康南阳宛人元帝时学於长安事博士江生习诗礼及历算究极师法称为通儒性宽仁恭爱乡党故旧虽行能与茂不同而皆爱慕欣欣焉初辟丞相府史尝出行有人悞认其马茂心知其谬然嘿解与之他日其人别得所亡马乃诣府归马叩头谢茂後以儒术举为侍郎给事黄门迁密令劳心谆谆视人如子举善而教口无恶言吏人亲爱而不忍欺之有言部亭长受其米肉遗者茂问曰亭长为从汝求乎为汝有事嘱之而受乎将平居自以恩意遗之乎人曰往遗之耳茂曰遗之而受何故言人曰窃闻贤明之君使人不畏吏吏不取人今我畏吏是以遗之吏既卒受故来言耳茂曰汝为敝人矣凡人所以贵於禽兽者以有仁爱知相敬事也今邻里长老尚致馈遗况吏与民乎吏顾不当乘威力强请求耳人之生羣居杂处故有经纪礼义以相交接汝独不欲修之寧能高飞远走不在人间邪人曰苟如此律何故禁之茂笑曰律设大法礼顺人情今我以礼教汝汝必无怨以律治汝何所措其手足乎一门之内小者可论大者可杀也且归念之於是人纳其训吏怀其恩初茂到县有所废置吏人笑之邻城闻者皆嗤其不能河南郡为置守令茂不为嫌理事自若数年教化大行道不拾遗平帝时王莽秉政天下大蝗河南二十余县皆被其灾独不入密县界及莽置大司农六部丞劝课农桑迁茂为京部丞密人老少皆涕泣随送後莽居摄以病免归常为门下掾祭酒不肯作职吏更始立以为侍中祭酒从至长安知更始政乱以年老乞骸骨光武即位先访求茂茂诣河南谒见乃以茂为太傅封褒德侯食邑二千户赐几杖车马衣絮复以长子戎为太中大夫次子崇为中郎给事黄门建武四年卒赐棺槨冢地比葬车驾素服亲临送之

论曰考茂行事无赫赫功而仁厚和平使人爱慕至於道不拾遗蝗不为灾及遯迹於新莽之世又何其乃心王室确然一节也光武龙兴当羣豪未靖战将角才之秋独首先礼茂俾居三公之首以厚德风天下可谓知所本矣论者以子陵归钓实开东海节义之风擢茂太傅遂使东京循吏辈出谅哉

卫飒

卫飒字子产河内修武人家贫好学问随师无资常佣以自给王莽时仕郡历州宰建武二年辟大司徒邓禹府举能案剧除侍御史襄城令政有名迹迁桂阳太守郡接交州颇染其俗不知礼则飒下车修庠序之教设婚姻之礼期年邦俗从化先是含沅阳曲江三县越之故地也民居深山滨溪谷不出田租去郡远者或且千里吏事往来辄发民乘船名曰传役每一吏出徭及数家百姓苦之飒乃凿山通道五百余里列亭传置邮驿於是役省劳息奸吏杜絶流民稍还渐成聚邑使输租赋同之平民来阳县出铁石他郡民庶常聚会私为冶铸因招亡命致奸盗飒起铁官斥私铸岁所增入五百余万飒理恤民事居官如家所施政莫不合於物宜视事十年郡内清理二十五年徵还光武欲以为少府会被疾不能拜起以桂阳太守归家须後诏居二岁载病诣阙自陈困笃乃收印绶赐钱十万後卒於家南阳茆充代飒守桂阳亦善其政教民殖桑柘麻紵之属劝令养蚕织屨民得利益

论曰康诰曰如保赤子古之治民者如是後世治不古若非尽智猷才分之不足也视官府为传舍则其诚意之不加也固宜飒居官如家用能於声教甫通之地立法兴化移易风俗而民咸宜之故知设诚致行者政之善经虽康叔所以靖顽民未有外此者也

任延

任延字长孙南阳宛人年十二为诸生学於长安明诗易春秋显名太学学中号为任圣童值乱避兵陇西隗嚣聘之不应更始元年以为大司马属拜会稽都尉时年方十九到官静泊无为唯先遣祠延陵季子已则省诸卒耕公田以周穷急掾吏贫者分俸赈给之每行县辄慰勉其孝子是时中土士人避乱江南故会稽多士延乃聘高行董子仪严子陵等敬待以师友之礼有龙丘苌者王莽时四辅三公连辟不到掾吏请召之延曰龙丘先生躬德履义有原宪伯夷之节都尉洒埽其门犹惧辱焉召之不可遣功曹奉谒修书记致医药相望於道积一岁苌乃自谒府门愿备録延辞让再三署为议曹祭酒苌寻卒延自临殡不朝三日是以郡中贤士大夫争往宦焉建武初徵为九真太守九真以射猎为业不知牛耕常告余交址每致困乏延令铸作田器教之垦辟岁岁开广百姓充给俗又无嫁娶礼法各因淫好不识父子之性夫妇之道延使男年二十至五十女年十五至四十皆以年齿相配其贫无礼聘者长吏以下各省奉禄赈助之同时相娶者二千余人是岁风雨顺节谷稼丰衍产子者始知种姓咸曰使我有是子者任君也多名子为任於是徼外蛮夷慕义保塞遂罢侦候戍卒初平帝时汉中锡光为交址太守教导民夷渐以礼义王莽末闭境拒守建武初遣使贡献封盐水侯岭南华风始於二守焉延视事四年徵诣洛阳九真吏人生为立祠以病稽留左转睢阳令擢武威太守帝戒之曰善事上官无失名誉延对曰臣闻忠臣不私私臣不忠履正奉公臣子之节上下雷同非陛下之福善事上官臣不敢奉诏帝叹息曰卿言是也武威大姓田绀为郡将兵长史子弟宾客多为暴害延收绀系之并其子弟宾客伏法者五六人绀少子尚乃聚轻薄数百人自号将军夜攻郡延即发兵破之自是威行境内吏民累息郡北当匈奴南接种羌多寇抄民废田业延选武略之士千人明其赏罚屯据要害有警急逆击追讨寇抄遂絶河西旧多苦旱延置水官吏修理沟渠人蒙其利又立校官自掾吏子孙皆令诣学受业复其徭役章句既通则显拔

荣进之郡遂有儒雅之士後坐擅诛羌不先上左转召陵令显宗即位拜颍川太守永平二年徵会辟雍因以为河内太守视事九年病卒少子恺官至太常

论曰子陵之清风峻节光武犹不能屈独应任延之聘虽韩起之与田苏游其义曷以加兹及後历官礼教行於种姓直声动乎大廷益以知延之学行诚加於人一等矣

刘昆

刘昆字桓公陈留东昏人梁孝王之裔也少习容礼又受施氏易於沛人戴宾能弹雅琴知清角之操王莽世教授弟子恒五百余人春秋飨射常备列典仪以素木瓠叶为俎豆桑弧蒿矢以射菟首每有行礼县宰辄率吏属而观之莽以昆宗室多聚徒衆私行大礼有僭上心系昆及家属於外黄狱寻莽败得免是时天下大乱昆避难河南负犊山中建武五年举孝廉不行教授於江陵光武即除为江陵令江陵连年火灾昆辄向火叩头多能降雨止风徵拜议郎稍迁侍中弘农太守先是崤崤驿道多虎行旅不通昆为政三年仁化大行虎皆负子渡河帝闻而异之二十二年徵代杜林为光禄勳诏问昆曰前在江陵反风灭火後守弘农虎北渡河行何德政而致是昆对曰偶然耳左右皆笑其质讷帝叹曰此乃长者之言也顾命书诸策令入授皇太子及诸王小侯五十余人二十七年拜骑都尉三十年以老乞骸骨诏赐洛阳第舍以千石禄终其身中元二年卒子轶字君文传昆业门徒亦盛永平中为太子中庶子建初中稍迁宗正卒於官遂世掌宗正焉

论曰中孚以格豚鱼精诚之至有感必通然先以感通为心而期必其应则诚之与存焉者寡矣故昆偶然之对非姑为谦退也理固如是耳汉家自光武再造以仁厚立国士多长者降及桓灵之世乃有以激昂议论见者岂事势之流相激使然欤

郭汲

郭汲字细侯扶风茂陵人少有志行哀平间辟大司空府三迁渔阳都尉王莽时为上谷大尹迁并州牧更始新立闻汲名徵拜左冯翊使镇抚百姓世祖即位拜雍州牧再转为尚书令数纳忠谏诤建武四年出为中山太守明年彭宠灭转为渔阳太守渔阳既罹王莽之乱重以彭宠之败民多猾恶寇贼充斥汲示以信赏纠戮渠帅盗贼销散时匈奴数侵抄边境苦之汲整顿士马设攻守之略匈奴畏惮远迹不敢复入塞民得安业户口增倍九年徵拜颍川太守时颍川盗贼羣起汲到郡招降赵宏召吴等数百人悉遣归农其党闻汲威信降者络绎不絶十一年调并州牧过京师见帝言曰选补衆职当简天下贤俊不宜专用南阳人帝纳之汲前在并州素结恩德至是入界老幼相携逢迎道路所过问民疾苦聘求耆德雄俊设几杖之礼朝夕与参政事行部至河西美稷有童儿数百各骑竹马道次迎拜汲问儿曹何来对曰问使君到喜故来迎耳比事讫诸儿送至郭外问使君何日当还汲谓别驾从事计日告之及还先期一日汲为违信於诸儿遂止野亭须期乃入是时朝廷多举汲可大司空者帝以新省朔方属并州而卢芳尚倚匈奴为边警欲汲久於其事故不召汲知卢芳夙贼难卒以力制常严烽候明购赏以结寇心芳将隋昱遂谋胁芳降汲芳乃亡入匈奴汲以老病乞骸骨二十二年徵为

大中大夫赐宅一区帷帐钱谷充其家汲悉散与宗亲无所遗明年卒年八十六帝亲临吊赐冢莹地

论曰汲所至以信为治夫信者五常之本也抚民不以信则仁不究也接人不以信则礼不行也整兵不以信则义不足以御乱也烛奸不以信则智不足以靖民也汲主於信以成其政至不欺竹马儿童庶几朴笃君子者已

杜诗

杜诗字公君河内汲人少有才能仕郡公曹有公平称更始辟大司马府建武元年一岁中三迁为侍御史安集洛阳时将军萧广纵兵暴横百姓惶扰诗敕晓不改遂格杀广还以状闻世祖召见赐棨戟复使之河东至大阳闻贼杨异等规欲北渡乃与长史急焚其船部勒郡兵将突骑趋击斩异等贼遂翦灭拜成臯令视事三岁举政尤异再迁为沛郡都尉转汝南都尉所在称治七年迁南阳太守性节俭政治清平诛暴立威善於计略省爱民役造作水排铸为农器用力少见功多百姓便之又修筑陂池广拓土田郡内比室殷足南阳人以方召信臣为之语曰前有召父後有杜母诗自以无劳久居大郡乃上疏愿受小职以降避功臣帝惜其能不许诗雅好推贤数进知名士身虽在外尽心朝廷说言善策随事献纳初禁网尚简但以玺书发兵未有虎符之信诗请立符以絶奸端从之十四年卒诏使治丧郡邸赠绢千匹

论曰诗之为治可谓所居民富所去民思召父杜母之称於今为烈当其格杀萧广一何壮也其才略诚有以过人者退而辞位以避功臣又何其恂恂礼让君子耶

孔奋

孔奋字君鱼扶风茂陵人少从刘歆受春秋左氏传歆称之遭王莽乱与母弟避兵河西建武五年河西大将军窦融署为议曹掾守姑臧长八年赐爵关内侯时所在扰乱唯河西独安而姑臧通货羌胡市日四合称为富邑每居县者不数月辄丰积奋在职四年财产无所增事母孝谨奉养极求珍膳而躬率妻子甘菜茹当天下未定士多不修节操而奋身处脂膏力行清洁为人所笑太守梁统深相敬礼常迎於大门引入见母不以官属待之陇蜀既平河西守令咸被徵召财货连轂弥竟川泽唯奋单车就道姑臧吏民及羌胡更相谓曰孔君清廉仁贤今去何以报德遂共斂牛马器物千万以上追送数百里奋谢之而已一无所受既至京师除武都郡丞时陇西余贼隗茂等夜攻府舍残杀郡守奋追之急贼乃执奋妻子以为质奋年已五十唯一子终不顾望穷力讨之吏民感义莫不倍为用命又率厉氏豪齐鍾留等令要遮贼氏人多便习山谷与奋表里贼益窘急乃推奋妻子置军前冀以却奋而奋击之愈厉卒禽灭茂等奋妻子亦为所杀世祖下诏褒美拜为武都太守奋自为丞已为河西所敬重及为守举郡莫不改操为政明断甄美疾非见有美德爱之如亲其无行者忿之若讐郡中清平後上病去官卒於家弟奇博通经典作春秋左氏删晚有子嘉官至城门校尉亦作左氏说云

论曰光武中兴隗嚣犹狡焉思为鼎立之计惟奋与窦融梁统等精白乃心以獎王室其後窦

梁皆藉椒房之宠累叶贵盛卒与祸亲奋独橐囊萧然一经授受终亦不罹世网所守为益高矣观其以廉律己而羌人献赀以义割恩而氐人效命则知为天子吏诚心格物亦何物之不格哉以此坊吏而吏犹有以求赇顾私败其治蹟者

张堪

张堪字君游南阳宛人早孤让父余财於兄子凡数百万年十六受业长安志美行厉诸儒号曰圣童世祖微时见堪志操常嘉焉及即位中郎将来歙荐堪召拜郎中三迁为谒者使送委输缣帛并骑七千诣大司马吴汉在道追拜蜀郡太守时汉伐公孙述军才余七日粮陰具船欲遁去堪闻之驰往说汉不宜退师汉从之乃示弱挑战述果自出战死城下成都既拔堪先入据其城检阅库藏收其珍宝丝毫不私慰抚吏民蜀人大悦在郡二年徵拜骑都尉後领骠骑将军杜茂营击破匈奴於高柳拜渔阳太守捕击奸猾赏罚必信吏民皆乐为用匈奴尝以万骑入渔阳堪率数千骑奔击大破之乃於狐奴开稻田八千余顷劝民耕种以致殷富百姓歌曰桑无附枝麦穗两岐张君为政乐不可支视事八年匈奴不敢犯塞帝尝召见诸郡计吏问其风土及前後守令能否蜀郡计掾樊显进曰渔阳太守张堪昔在蜀汉仁以惠下威能讨奸前公孙述破时珍宝山积卷握之物足富十世而堪去职之日乘折辕车布被囊而已帝闻良久叹息拜显为鱼复长方徵堪会病卒帝深悼惜之下诏褒扬赐帛百匹

论曰南国多稻田而北土惟旱种或以朔漠霜早又地高阜恐水泉不足以输灌也读堪传乃益知其不然直阡陌既废两汉之世斥其地为边壤不复更为经界耳堪以一守之力种植一郡民享乐利播之歌謡後之尹是邦者富民之术宜莫先於是矣

宋均

宋均字叔庠南阳安衆人年十五为郎好经书每休沐辄受业博士通诗礼善论难调辰阳长以俗信巫鬼为立学校禁絶淫祀人皆安之以祖母丧去官後为谒者会武陵蛮反围武威将军刘尚诏均乘传发江夏奔命三千人救之均至而尚已没因监伏波将军马援军与诸将俱进及援为贼所厄卒於师士多疾病死者大半个均虑军遂不反乃与诸将议曰今道远士病不可以战欲承制降之何如诸将皆莫敢应均曰忠臣出竟有可以安国家者专之可也乃矫制命吕种奉诏入蛮告以恩信而勒兵随其後蛮人震怖即共斩其大帅以降於是散其衆遣归本郡为置长吏及还自劾光武嘉其功迎赐以金帛令过家上冢其後每有四方异议数访问焉迁上蔡令九江太守中元元年山阳楚沛多蝗惟飞至九江界者辄东西散去由是名称远近浚县有唐后二山民共祠之巫遂每岁取百姓男女以为公姬既而莫敢嫁娶均下书曰自今以後为山娶者皆娶巫家勿扰良民於是遂絶迁东海相在郡五年坐法免东海吏民思均恩化诣阙讼均者数千人显宗以其能徵拜尚书令每有驳议多合上旨均尝删剪疑事帝以为有奸大怒诸尚书惶恐皆叩头谢均顾厉色曰忠臣执义无有二心均虽死不易志帝闻之善其不挠即贯郎迁均司隶校尉出为河南太守政化大行常寝病百姓耆老为走祷旦夕问起居其为民爱若此以疾乞免诏除子条为太子舍人均力疾诣阙谢帝使中黄门慰问因留之既而欲用为司徒召见均疾甚不任趋走两驂扶之流涕固辞帝甚伤之建初元年卒於

家均性寬和不喜文法常以为吏贵弘厚若苛察之人身虽廉法而巧黠刻削毒加百姓灾害流亡所由而作及在尚书以时方严切恒欲叩头争之而终未敢陈帝後闻其言而追悲之

论曰陈汤矫制以开边宰臣故抑其赏志士犹或讼之若均专命以全王师而剧盗随以宁贴其功浮於汤矣汤之末年每以边事被顾问均亦获参异议所遇又略相似至均之论吏治平情准理以此从政果且达已

王景

王景字仲通其先琅邪不其人八世祖仲好道术明天文诸吕作乱齐哀王襄谋发兵而数问於仲及济北王兴居反欲委兵於仲仲惧祸及乃浮海东奔乐浪山中因家焉景少学易遂广窥衆书又好天文术数之事沉深多伎艺辟司空伏恭府时有荐景能理水者显宗诏与将作谒者王吴共修作浚仪渠吴用景塲流法水乃不复为害初平帝时河汴决坏未及修建武十年以阳武令张汜言光武方为发卒而浚仪令乐俊复以新被兵革民不堪命宜须平静其事遂寝後汴渠东侵日月弥甚水门故处皆在河中兗豫百姓怨叹以为县官不先民急永平十二年议修汴渠乃引见景问以形便景陈其利害帝善之夏遂发卒数十万遣景与王吴修渠筑堤自荥阳东至千乘海口千余里景商度地势凿山阜破砥磧直截沟洫防遏冲要疎决壅积十里立一水门令更相洄注无复遗漏之患景虽简省役费然犹以百亿计明年夏渠成帝亲巡行诏滨河郡国置河堤员史如西京旧制景由是知名三迁为侍御史十五年从驾东巡狩至无盐帝美其功绩拜河堤谒者赐车马缣钱建初七年除徐州刺史先是杜陵杜笃奏论欲车驾迁还长安景以宫庙已立恐人情疑惑会有神雀诸瑞乃作金人论颂洛邑之美天人之符文有可采明年迁庐江太守庐江百姓不知牛耕地力有余食常不足郡界故有孙叔敖芍陂稻田景乃驱率吏民修起芜废教用犁耕由是垦辟倍多境内丰给又训令蚕织为作法制皆着於乡亭庐江传其文词卒於官

论曰太史公曰甚哉水之为利害也当神禹时九河底绩然自殷家已不常厥所至周定王而河遂改流历考後代治法虽不必同要惟疏濬开导以杀其势顺其性如孟子所谓水由地中行者方无恶於智矣汉世贾让之後独景以此见长云

廉范

廉范字叔度京兆杜陵人赵将廉颇之後也汉兴以廉氏豪宗自苦陁徙焉曾祖父哀成哀间为右将军祖父丹王莽时为大司马庸部牧皆有名范父遭乱客死於蜀范遂流寓西州西州平归乡里年十五辞母西迎父丧蜀郡太守张穆丹之故吏也重资送范范无所受与客步负丧道葭萌船触石没范抱棺俱沉衆伤其义钩求疗救仅免於死穆闻复驰使持前资追范范卒固辞归葬服竟诣京师受业事博士薛汉永平初陇西太守邓融备礼谒范为功曹及融为州所举案范知事谴难解欲以权相济托病求去融不达其意大恨之范於是东至洛阳变名姓求代廷尉狱卒居无几融果徵下狱范卫侍左右尽心勤劳融怪其貌类范而殊不意乃谓曰卿何似我故功曹范诃之曰君困辱瞽乱邪语遂絶融系出困病范随而养视及死竟不言

身自送丧至南阳葬毕乃去後辟公府会薛汉坐楚王事诛故人门生莫敢视范独往收敛之吏以闻显宗大怒召范入诘责曰薛汉与楚王同谋交乱天下范公府掾不与朝廷同心而反收敛罪人何也范叩头曰臣无状愚戇以为汉等皆已伏诛不胜师资之情罪当万坐帝怒稍解问范曰卿廉颇後耶与右将军褒大司马丹有亲属乎范对曰褒臣之曾祖丹臣之祖也帝曰怪卿志胆敢尔因贯之由是显名举茂才数月再迁为云中太守匈奴大入塞烽火日通故事匈奴过五千人移檄傍郡吏欲用故事求救范不听自率士卒拒之匈奴衆盛范兵不敌适日暮范令军士各交缚两炬三头熬火营中星列匈奴遥望谓汉兵救至大惊待旦将退范乃令军中蓐食往赴之斩首数百级匈奴自相蹂死者千余人由此不敢复向云中後历武威武都二郡太守随俗化导各得治宜建初中迁蜀郡太守其俗尚文辩好相持短长范每厉以淳厚不受偷薄之说成都民物丰盛邑宇逼侧旧制禁民夜作以防火灾然更相隐蔽烧者日属范乃毁削先令但严使储水百姓为便歌之曰廉叔度来何暮不禁火民安作昔无襦今五袴数年坐法免归范世在边广田地积财粟悉以赈宗族朋友肃宗崩范奔赴敬陵道遇庐江郡掾严麟奉章吊国所乘小车涂深马死不能自进范令从骑下马与之不告而去麟事毕不知马所归缘踪访之或谓麟曰故蜀郡太守廉叔度好周人穷急今奔国丧独当是耳麟亦素闻范名以为然即牵马造门谢而归之世服其好义卒於家

论曰范之孝义节烈赴人之险厄而忘其施可以廉顽立懦岂徒以吏治见哉昔李牧与廉颇相继为赵名将牧之御边以示弱制胜范乃以示强却敌故孙臆减竈而虞诩增竈赵奢增垒而赵云开垒虚实强弱之形兵事固倏忽而异变也若范之将略其犹有祖风者耶

鲁恭

鲁恭字仲康扶风平陵人建武初父为武陵太守卒官时恭年十二而弟丕方七岁昼夜号踊赙赠无所受既归服丧礼过成人卒丧与丕奉母居太学习鲁诗兄弟闭户讲诵絶人间事学士争归之太尉赵熹慕其志每岁时问以酒粮皆辞不受恭怜丕小欲先就其名郡数礼请托疾不肯应及建初初丕举方正恭乃始为郡吏肃宗集诸儒於白虎观恭以经明召与其议熹复举恭直言待诏公车拜中牟令专以德化为理不任刑罚许伯等争田累守令不能决恭为平理曲直皆退而自责辍耕相让有讼亭长借牛不还者恭召亭长勅归牛至再三犹不从恭叹曰是教化不行也欲解印绶去掾吏泣涕留之亭长乃慙悔还牛诣狱受罪恭贯不问於是吏人信服七年郡国螟伤稼犬牙缘界不入中牟河南尹袁安闻之疑其不实使仁恕掾肥亲往廉之恭随亲行阡陌坐桑下有雉止於儿傍儿不捕雉亲问儿儿曰雉方将雏亲瞿然而起与恭诀曰所以来者欲察君之政迹耳今虫不犯境一异也化及鸟兽二异也豎子有仁心三异也久留徒扰贤者遂还府具以白安是岁嘉禾生恭庭中安因上书言状帝异之会诏举贤良方正恭举中牟王方帝即徵方礼之与公卿所举同恭在事三年州举尤异遭母丧去後拜侍御史和帝立车骑将军窦宪建议欲击匈奴恭上疏谏略曰万民者天之所生天爱其所生犹父母爱其子一物不得其所则天气为之舛错况於人乎昔太王重人命而去邠故获上天之佑今边境无事宜修仁行义尚於无为陛下独奈何以一人之计弃万人之命乎不从恭每见政事有益於人辄言其便无所隐讳寻为鲁诗博士拜侍中数召问得失恩礼宠异迁乐安相是时东州多盗贼羣辈攻劫恭重购赏开恩信降其渠帅张汉等恭上汉补博昌尉其余遂

自相捕击尽破平之永元九年徵为议郎拜侍中其冬迁光禄勳选举清平十二年代吕盖为司徒十五年上除恭子抚为郎中而弟丕亦为侍中兄弟父子并列朝廷後坐事策免殇帝即位以恭为长乐卫尉永初元年复代梁鲭为司徒初和帝末令麦秋案验薄刑州郡因此遂盛夏断狱恭上疏畧曰旧制立秋乃行薄刑自永元来刺史太守以盛夏徵召农人拘对考验连滞无已上逆时气下伤农桑月令孟夏断薄刑者谓轻罪已正不欲久系故时断之也臣愚以为今孟夏可从此令其决狱案考皆以立秋为断是时断狱承用肃宗之制率以冬至前吏入十一月得死罪贼即格杀不复讞正及邓太后诏公卿以下会议恭复奏曰王者之作因时为法一夫吁嗟王道为亏可令疑罪使详其法大辟之科尽冬月乃断其立春在十二月中者勿以报囚如故事後卒施行恭再在公位选辟高第至列卿郡守者数十人而耆旧大姓不蒙荐举至生怨望恭闻之曰学之不讲是吾忧也诸生不有乡举乎终无所言性谦退奏议依经潜有补益终不自显故不以刚直为称三年以老病策罢六年年八十一卒於家以两子为郎长子谦为陇西太守有名绩谦子旭官至太仆从献帝西入关与司徒王允同谋共诛董卓及李傕入长安旭与允俱遇害

论曰恭以德化人世传三异至其两论断刑上若天时下便民事与申商惨核少恩者迴若河汉矣当西汉时惟董仲舒知求端於天以为王者任德而不任刑恭之治郡立朝率由是道可谓寛仁之长慈惠之师者已

秦彭

秦彭字伯平扶风茂陵人自汉兴世位相承六世祖袭为颍川太守与羣从同时为二千石者五人故三辅号曰万石秦氏彭同产女弟显宗时入掖庭为贵人有宠永平七年以彭贵人兄随四姓小侯擢为开阳城门候十五年拜骑都尉副驸马都尉耿秉北征匈奴建初元年迁山阳太守以礼训人不任刑罚崇好儒雅敦明庠序每春秋飨射辄修升降揖让之仪为人设四诫以定六亲长幼之礼有遵奉教化者擢为乡三老常以八月致酒肉以劝勉之吏有过咎罢遣而已不加耻辱百姓怀爱莫有欺犯兴起稻田数千顷每於农月亲度顷亩分别肥瘠差为三品各立文簿藏之乡县於是奸吏局踣无所容诈彭乃上言宜令天下齐同其制诏令三府以所立条式班下州郡在职六年转颍川太守有凤凰麒麟嘉禾甘露之瑞肃宗巡行再幸颍川辄赏赐钱谷恩宠甚异章和二年卒弟惇袭并为射声校尉

论曰彭之以礼训人事同韩延壽然延壽以罪死而彭以恩遇终以此知明章之驭吏光於前烈矣至其差田为三品实仿周官不易一易再易之旧法然古者受田於公故田瘠者所受多田饶者所受少後世民自营田彭亦差之而已岂能尽如周制哉但因所差等以定赋税之高下庶几犹有禹贡之遗意焉是则酌古准今者所可变通其法而行之者已

第五访

第五访字仲谋京兆长陵人司空伦之族孙也少孤贫常佣耕以养兄嫂有闲暇则以学文仕郡为功曹察孝廉补新都令政平化行三年之间邻县归之户口十倍迁张掖太守岁饥粟石

数千钱访未及上言即开仓赈给以救其敝吏惧谴争之访曰若上须报是弃民也太守乐以一身救百姓顺帝闻之玺书褒嘉焉由是一郡得全岁余官民并丰界无奸盗迁南阳太守去官拜护羌校尉边境服其威信卒於官

论曰岁之有灾歉天之行也当鸿雁之哀鸣求刍牧而难企坐视赤子之颠连於沟壑而惟一身之罪谴是恤岂为民父母之心哉汲黯而後谓访实追踪其美岂其远而

王涣

王涣字稚子广汉郾人少好侠尚气力数通剽轻少年已而改节敦儒学习尚书读律令略举大义为太守陈宠功曹当职割断不避豪右宠风声大行入为大司农和帝问曰在郡何以为理宠顿首谢曰臣任功曹王涣以简贤选能主簿饯显拾遗补阙臣奉宣诏书而已帝大悦涣由此显名州举茂才除温令县多奸猾积为人患涣以方略讨击悉诛之境内清平商旅露宿於道迁兖州刺史绳正部郡风威大行後坐考妖言不实论罢岁余徵拜侍御史永元十五年从南巡还为洛阳令以平正居身得寛猛之宜其冤嫌久讼历政所不断法理所难平者莫不曲尽情诈压塞羣疑又能发擿奸伏京师称叹以为神元兴元年病卒百姓市道莫不咨嗟相与赋敛致奠醢以千数及丧西归道经弘农农民皆设盘案於路问其故咸言往时持米入洛为卒司所钞恒亡其半自王君在事絶无侵枉故报之其政化怀物如此民思其德为立祠安阳亭西每祀辄弦歌而荐之饯显後亦知名仕至长乐卫尉自涣後连选洛阳令皆不称职永和中以任峻补之峻擢用文武吏皆尽其能纠剔奸盗不得旋踵威风猛於涣而文理不及

论曰朱子作纲目县令书卒者陈寔王涣二人而已所以励天下後世亲民之官也涣非独以发擿奸伏见长其诚厚之德实有感人者洛阳之民俎豆弦歌没世而不忘也宜哉

孟尝

孟尝字伯周会稽上虞人少修操行仕郡为户曹吏上虞有寡妇养姑至孝及姑老壽终夫女弟以宿嫌诬妇厌苦供养鸩其母郡辄结竟其罪尝知枉状备言於守守不为理尝哀泣谢病去妇竟冤死自是郡中连旱二年祷祈无所应後守殷丹到官尝辄诣府具陈寡妇冤诬事因曰昔东海孝妇感天致旱于公一言甘泽时降宜戮讼者以谢冤魂丹从之即刑讼女祭妇墓天应澍雨谷稼以登後策孝廉举茂才拜徐令州郡表其能迁合浦太守郡不产谷而海出珠与交址比境通商常以珠贸谷先时宰守多贪秽珠渐徙於交址界於是行旅不至人物无资贫者死饿於道尝到官革易前弊求民病利曾未踰岁去珠复还百姓皆反其业商货流通称为神明以病自上被徵当还吏民攀车留之尝既不得进乃载乡民船夜遁隐处穷泽身自耕佣邻县士民慕其德就居止者百余家桓帝时尚书杨乔七表荐尝竟不见用年七十卒於家

论曰书称非佞折狱惟良折狱况於振幽释滞尤贵设诚者哉夫惻怛着则私意捐是非别而刑罚中悉其聪明致其忠爱虚中以治鬼神将通斯于公所以无冤民也尝能雪寡妇之冤至守合浦而有还珠之异昔宋子罕有言尔以得玉为宝我以不贪为宝夫不贪诚足宝尝乃以

不贪之故而还宝斯诚无价之至宝也已

王堂

王堂字敬伯广汉郫人初举光禄茂才迁谷城令治有名迹永初中西羌寇巴郡为民患遣中郎将尹就攻讨连年不克三府举堂治剧拜巴郡太守堂驰兵赴贼斩掳千余级巴庸清静吏民生为立祠刺史张乔表其治能迁右扶风安帝西巡阿母王圣中常侍江京等并请属於堂堂不为用掾吏固谏堂曰吾蒙国恩岂可为权宠阿意以死守之即日遣家属归闭阁上病果有诬奏堂者会帝崩京等悉诛堂以守正见称永建二年徵入为将作大匠四年坐公事左转议郎复拜鲁相政存简一至数年无词讼迁汝南太守搜才礼士不苟自专乃教掾吏曰古人劳於求贤逸於任使故能化清於上事缉於下其宪章朝右简核才职委功曹陈蕃匡政理务拾遗补阙任主簿应嗣庶循名责实察言观效焉自是委诚求当不复妄有词教郡内称治时大将军梁商及尚书令袁汤以求属不行并恨之後庐江贼进入弋阳界堂勒兵追讨即便奔散而商汤犹因此风州奏堂在任无警免归家年八十六卒遗令薄敛瓦棺以葬子穉清行不仕曾孙商为蜀郡太守有治声

论曰任贤为理政之本也其用弘其利溥善兼天下何况郡邑於是坐啸画诺之後堂又着焉虽然非陈蕃其人则不可

史传三编卷五十

卷五十一

钦定四库全书

史传三编卷五十一

大学士朱轼撰

循吏传三

汉

苏章

苏章字孺文扶风平陵人祖父纯字桓公有高名性强切而持毁誉士友咸惮之至乃相谓曰见苏桓公患其教责人不见又思之三辅号为大人永平中封中陵乡侯官至南阳太守章少博学能属文安帝时举贤良方正对策高第为议郎数陈得夫其言甚直出为武原令时岁饥辄开仓廩活三千余户顺帝时迁冀州刺史故人为清河太守章行部案其奸臧乃请太守为设酒殽陈平生之好甚欢太守喜曰人皆有一天我独有二天章曰今夕苏孺文与故人饮者私恩也明日冀州刺史案事者公法也遂举正其罪州境知章无私望风畏肃调为并州刺史以摧折权豪忤旨坐免隐归乡里不交当世後徵为河南尹不就时天下日敝论者举章有干国才朝廷不能复用卒於家

说曰内举不避祁奚所以见称也进贤如是绌恶亦然况故人乎然意当时清河贪污之迹必不容姑贷故章以公义案之若有藉此立名之心是鬼神之所恶也罪又甚於徇庇矣

羊续

羊续字兴祖太山平阳人其先七世为二千石卿校续初拜郎中去官後辟大将军窦武府及武败坐党事禁锢十余年党禁解复辟大尉府四迁为庐江太守及扬州黄巾贼攻舒焚烧城郭续发县中男子二十以上皆持兵勒陈其小弱者负水灌火集数万人并势力战大破之郡界平复安风贼戴风等作乱复击破之斩首三千余级生获渠帅其余党辈原为平民赋与佃器使就农业中平三年江夏兵赵慈反杀南阳太守秦颉攻没六县拜续为南阳太守当入郡界羸服间行侍童子一人观历县邑采问风謡然後乃进其令长贪洁吏民良猾悉逆知其状郡内惊竦莫不震慑乃发兵与荆州刺史王敏共击慈斩之获首五千余级属县余贼并诣续降续复上言宥其枝附贼既清平乃班宣政令候民病利百姓欢服时权豪之家多尚奢丽续深疾之常敝衣薄食车马羸败府丞尝献生鱼续受而悬於庭丞後又进之续乃出前所悬者以杜其意其妻与子秘往造续续闭门不纳其妻惟将秘行其资藏仅有布衾敝褐盐麦数斛

而已顾敕秘曰吾自奉若此何以资尔母乎使与母俱归六年灵帝欲以为太尉时拜三公者皆输东园礼钱千万令中使督之名为左骑左骑所至辄迎致礼敬厚加赠赂续独坐之单席举緼袍示之曰臣之所资唯斯而已左骑白之帝不悦以此不登公位而徵为太常未及行会病卒时年四十八遗言薄敛不受赠遗旧典二千石卒官赉百万府丞焦俭遵续先意一无所受诏书褒美敕太山太守以府赉钱赐续家云

论曰续之清贫絶世守原宪之节以终其身皜皜乎不可尚已至於数平剧贼率皆原其枝附仁以济勇用成厥功岂特民牧之良法抑亦军政之善经也夫

陈寔

陈寔字仲弓颍川许人出於单微自儿童时虽在戏弄已为等辈所归常作县吏及都亭刺佐有志好学坐立读诵县令邓邵试与语奇之听受业太学後令复召为吏乃避隐於阳城山中时有杀人者扬吏意疑为寔县遂逮系考掠无实而後得出及寔为督邮反囑许令礼召扬吏闻者咸叹服之家贫复为郡西门亭长其时功曹锺皓为司徒府所辟太守问谁可代者皓曰明府欲必得其人西门亭长陈寔可寔闻之曰锺君似不察人不知何独识我由是寔代皓为功曹中常侍侯览托太守高伦用吏伦敦署为文学掾寔怀教请见言曰此人不宜用而侯常侍不可违寔乞从外署不足以尘明德伦从之於是乡论怪其非举寔终无所言及伦徵为尚书郡中士大夫送至轮氏传舍伦乃言其故且曰此咎由故人畏憚强御陈君可谓善则称君过则称已者也闻者方叹息天下由此服其德司空黄琼辟之选理剧补闻喜长旬月以期丧去官复再迁除太丘长修德清静百姓以安邻县人户归附者寔辄训导譬解遣还故县本司官行部吏虑有讼者白欲禁之寔曰讼以求直禁之理将何申其勿有所拘司官闻而太息曰陈君所言若是岂有怨於人乎亦竟无讼者以沛相赋歛违法解印绶去吏民追思之先是荀淑韩韶及锺皓皆颍川人也淑字季和有高行善知人尝为当涂长韶字仲黄为赢长贼闻其贤戒不入境邻县民流入界韶开仓赈禀所贍万余户主者争之韶曰长活沟壑之人以此伏罪含笑入地矣皓字季明既辟司徒府顷之自劾去後连九辟又徵为廷尉正博士林虑长皆不就诸儒颂之曰林虑懿德非礼不处悦此诗书弦琴乐古五就州招九应台辅逡巡王命卒岁容与三人者及寔皆以名德为当时所尊号为颍川四长及党锢祸起诸人多逃避寔曰吾不就狱衆无所恃遂请囚遇赦得出灵帝初太将军窦武辟为掾属时中常侍张让权倾天下让父死归葬颍川一郡毕至而名士无往者让甚耻之惟寔独吊焉及後复诛党人让感寔故多所全宥寔在乡间平心率物有争讼辄求判正晓譬曲直退无怨者至乃叹曰寧为刑罚所加不为陈君所短有盜夜入寔室止梁上寔陰见之乃起自整拂呼子孙训之曰夫人不可不自勉不善之人未必本恶习以性成遂至於此梁上君子者是矣盜大惊自投於地稽顙归罪寔徐譬之曰视君状貌不似恶人宜深尅己反善然此当由贫困令遗绢二匹自是一县无复盜窃太尉杨赐司徒陈耽每拜公卿常叹寔大位未登媿於先之及党禁解大将军何进司徒袁隗欲表寔以不次之位遣人劝寔寔谢曰寔久絶人事饰巾待终而已遂不起中平四年卒年八十四海内赴者三万余人制衰麻者以百数共刊石立碑諡为文范先生有六子纪湛最贤纪字元方湛字季方齐德同行父子并着高名时号三君每宰府辟召常同时旌命羔鴈成羣当世靡不荣之纪仕至大鸿胪纪子羣仕魏至司空然天下以为公慚卿卿慚长云

後汉书论曰汉自中世以下阉竖擅恣故俗遂以遁身矫洁放言为高士有不谈此者则芸夫牧豎已叫呼之矣故时政弥惛而其风愈往惟陈先生进退之节必可度也据於德故物不犯安於仁故不离羣行成乎身而道训天下故凶邪不能以权夺王公不能以贵骄所以声教废於上而风俗清乎下也

论曰四长之名艳於当时传於奕代自後之为循吏者莫敢竝焉至迹其行事则以慈良之风薰乎頽俗未尝子子於为民兴利而除害也夫赵张之治具烦於卓鲁而卓鲁为优者以道济法也况於四长之德成而上者乎故知声色之为大化民之末夫子之言嫩矣

贾琮

贾琮字孟坚东郡聊城人举孝廉再迁为京兆令有政迹中平元年交址屯兵反执刺史及合浦太守自称柱天将军灵帝敕选能吏有司举琮为刺史初交址土多珍产明玕翠羽犀象瑇瑁异香美木之属莫不自出前後刺史率无清行上承权贵下积私赂赋敛过重百姓空单故卒致怨叛琮至招抚荒散蠲复徭役诛斩渠帅为大害者简选良吏试守诸县岁间荡定巷路为之歌曰贾父来晚使我先反今见清平吏不敢饭在事三年为十三州最徵拜议郎时黄巾新破兵凶之後郡县重敛因缘生奸诏汰刺史二千石更选清能吏乃以琮为冀州刺史旧典传车驂驾垂赤帷裳迎於州界及琮之部升车言曰刺史当远视广听纠察美恶何有反垂帷裳以自掩塞乎命褰之百城闻风竦震诸有臧过者悉解印绶去惟瘞陶长济陰董昭观津长梁国黄就当官待琮於是州界翕然灵帝崩大将军何进表琮为度辽将军卒於官

论曰郑子太叔尽杀萑苻之盗而民以安若张纲之守广陵贾琮之治交址其用不同要归戡乱顾弄兵潢池本属赤子谁生厉阶乃在於明玕翠羽犀象瑇瑁也噫

陆康

陆康字季宁吴郡吴人少仕郡以义烈称举茂才除高成令县在边垂旧制令户一人具弓弩以备不虞不得行来长吏新到辄发民缮修城郭康悉皆罢遣以恩信为治百姓大悦寇盗亦息光和元年迁武陵太守转守桂阳乐安二郡所在称之时灵帝欲铸铜人而国用不足乃诏调民田亩敛十钱而比水旱伤稼百姓贫苦康上疏谏略言鲁宣税亩而蠲灾自生哀公增赋而孔子非之岂有聚夺民物以营无用之铜人捐舍圣戒自蹈亡王之法书奏内幸谗康援引亡国以譬圣明大不敬檻车徵诣廷尉侍御史刘岱为表陈解释免归田里复徵拜议郎会庐江贼黄穰等与江夏蛮连结十余万人攻没四县拜康庐江太守康申明赏罚击破穰等余党悉降帝嘉其功拜康孙尚为郎中献帝即位天下大乱康蒙险遣孝廉计吏奉贡诏书策劳加忠义将军秩中二千石时袁术屯兵壽春部曲饥饿遣使求委输兵甲康以术叛逆闭门不通而内修战备以御之术大怒遣其将孙策攻康围城数重康固守吏士有先受休假者皆遁伏还赴暮夜缘城而入受敌二年城陷月余发病卒年七十宗族百余人遭乱饥乏死者将半朝廷愍其守节拜子携为郎中少子绩仕吴为郁林太守博学善政幼年曾谒袁术怀橘堕地者也有名称

论曰读李贺金铜仙人歌知汉德之将衰也况当桓灵之世欲聚敛以为之哉陆康乃有格非之言恢恢大节岂待殉城日始着耶夫忠其君者爱其民故康之政亦多可称云

吴佑

吴佑字季英陈留长垣人父恢为南海太守欲杀青简以写经书时佑年十二谏曰大人踰越五岭远在海滨其俗诚陋然旧多珍怪上为国家所疑下为权威所望此书若成载之兼两昔马援以薏苡兴谤王阳以衣囊微名嫌疑之间诚先贤所慎也恢乃止抚其首曰吴氏世不乏季子矣及年二十丧父居无担石而不受贍遗常牧豕於长垣泽中行吟经书遇父故人谓曰卿二千石子而自业贱事纵子无耻奈先君何佑辞谢而已守志如初後举孝廉将行郡中为祖道佑越坛与小吏雍丘黄真欢语结友而别功曹以佑倨请黜之太守曰吴季英有知人之明卿且勿言真後亦举孝廉除新蔡长有清节时公沙穆来游太学无资粮变服客佣为佑赁舂佑与语大惊遂共定交於杵臼之间佑以光禄四行迁胶东侯相济北戴宏父为县丞宏年十六从在丞舍佑每行园闻讽诵之音奇而厚之亦与为友卒成儒宗知名东夏官至酒泉太守佑政惟仁简以身率物民有争讼者辄闭合自责然後断讼以道譬之或身到闾里重相和解自是之後争隙省息吏人怀而不欺嗇夫孙性私赋民钱市衣以进其父父怒曰有君如是何忍欺之促归伏罪性慙惧诣合持衣自首佑屏左右问其故性具谈父言佑曰掾以亲故受污秽之名所谓观过斯知仁矣使归谢其父还以衣遗之安丘男子母丘长从母行市遇醉客辱其母长杀之而亡追踪於胶东得之佑呼长谓曰子母见辱人情所耻然孝子忿必虑难动不累亲今若背亲逞怒白日杀人赦若非义刑若不忍将如之何长以械自系曰国家制法囚身犯之明府虽加哀矜恩无所施佑问长有妻子乎对曰有妻未有子也即移安丘逮长妻妻到解其桎梏使同宿狱中妻遂怀孕至冬尽行刑长泣谓母曰负母应死当何以报吴君乎乃啗指吞之含血言曰妻若生子名之吴生言我临死吞指为誓属儿以报吴君因投缯而死佑在胶东九年迁齐相大将军梁冀表为长史及冀诬奏太尉李固佑闻而请见争之不听扶风马融在坐为冀草佑责融曰李公之罪成於卿手李公即诛卿何面目见天下之人乎冀怒而起入室佑亦径去冀遂出佑为河间相因自免归家不复仕躬灌园蔬以经书教授年九十八卒长子凤官至乐浪太守少子愷新息令凤子冯鯛阳侯相皆有名於世

後汉书论曰夫刚烈表性鲜能优寛仁柔用情多乏贞直吴季英视人畏伤发言烝烝似夫懦者而怀愤激扬折让权枉又何壮也仁以矜物义以退身君子哉论曰佑佐父以廉择交以智抚民以仁纳争以勇诚东汉之完人也夫孙性胶东嗇夫也母丘长安丘男子也感佑之训犹能伏罪甘死马融以当代经师党冀诛固既受责而曾不知悔有膺面目是诗人之所恶也

童恢

童恢字汉宗琅邪姑幕人少为吏执法廉平司徒杨赐闻而辟之及赐被劾当免掾属悉投刺去恢独诣阙争之及得理掾属归府恢杖策而逝由是论者归美得辟公府除不其令吏人有犯随方晓示若吏称其职人行善事辄礼之酒馔以劝励之耕织种牧皆有条章一境清静牢狱连年无囚比县归化者二万余户民尝为虎所害设槛捕获二虎恢闻出咒虎曰天生万物

唯人为贵王法杀人者死伤人则论法汝若杀人当垂头服罪自知非者号呼称冤一虎垂头震惧即时杀之其一视恢鸣吼遂令放释吏人为之歌颂举尤异迁丹阳太守暴疾卒弟翊字汉文名高於恢宰府先辟之翊阳喑不肯仕及恢被命乃就孝廉除须昌长有异政闻举将丧弃官归举茂才不就卒於家

论曰夫子有言苛政猛於虎然虎杀人犹知甘罪苛政杀人而或恬不自怪是将谓杀人以挺与刃为果有以相异也则诚虎而冠者也恢与刘昆皆德格异类异哉

刘宠

刘宠字祖荣东莱牟平人父丕博学号为通儒宠少受父业以明经举孝廉除东平陵令以仁惠为吏民所爱母疾弃官去百姓送者塞道车不得进至轻服遁归後四迁豫章太守又三迁会稽太守山民愿朴有白首不入市井者颇为官吏所扰宠简除烦苛禁察非法郡中大化徵为将作大匠山陰县有五六老叟龐眉皓髮自若邪山谷间出人齎百钱以送宠宠劳之曰父老何自苦对曰山谷鄙生未尝识郡朝它守时吏发求民间至夜不絕或狗吠竟夕民不得安自明府下车以来狗不夜吠民不见吏年老遭值贤明今闻当见弃去故自扶奉送宠曰吾政何能及公言邪勤苦父老为人选一大钱受之转为宗正大鸿胪延熹四年代黄琼为司空以陰雾愆阳免顷之拜将作大匠复为宗正建寧元年代王畅为司空频迁司徒太尉二年以日食策免归乡里宠前後历宰二郡累登卿相而廉约省素家无货积尝出京师欲息亭舍亭吏止之曰整顿洒埽以待刘公不可得也宠无言而去时人称其长者以老病卒於家论曰萧何滌秦烦苛与民休息而画一之歌兴宠率是道以牧会稽亦使犬鸡鸣吠各得其情焉然宠既登台辅遂不能振衰起铤者何继秦之余酷而宠值汉之积媮也在易之需曰君子以饮食宴乐於蛊则曰先甲後甲当高祖时方拨乱世反之正其道宜需至延熹建寧之间上下狃於恬嬉亦已久矣势不可以无事故曰蛊者事也其後诸葛亮与法正论治蜀深明汉初可以弘济而已之不得然者以此

仇览

仇览字季智一名香陈留考城人少为书生淳默乡里无知者年四十县召补吏选为蒲亭长劝人生业为制科令至於果菜为限鸡豕有数农事既毕乃令子弟羣居还就黉学其剽轻游恣者皆役以田桑严设科罚躬助丧事赈恤穷寡期年大化民有陈元者独与母居而母告元不孝览惊曰吾近日过舍庐落整顿耕耘以时此非恶人当是教化未至耳母守寡养孤苦身投老奈何肆忿一朝欲致子以不义乎母感悔涕泣而去览乃亲到元家与其母子饮为陈人伦孝行譬以祸福元卒成孝子乡邑为之谚曰父母何在在我庭化我鳴臬哺所生考城令河内王涣政尚严猛闻览以德化人署为主簿谓览曰闻陈元之过不罪而化之得无少鷹鷂之志邪览曰以为鷹鷂不若鸾凤涣谢遣曰枳棘非鸾凤所栖百里岂大贤之路今日太学曳长裾飞名誉皆主簿後耳以一月奉为资勉卒景行览入太学时诸生同郡符融有高名与览比宇宾客盈室览常自守不与融言融观其容止心独奇之乃谓曰与先生同郡壤邻房牖今京师英才四集志士交结之秋虽务经学守之何固览正色曰天子修设太学岂但使人游谈其

中高揖而去融後以告郭泰泰因与融齎刺谒之遂留宿泰嗟叹下牀为拜览学毕归乡里州郡并请皆以疾辞虽在宴居必以礼自整妻子有过辄免冠自责妻子庭谢候览冠乃敢升堂家人莫见喜怒声色之异後徵方正遇疾卒

论曰孝弟天性也览之化陈元无他焉动以至性而已鸾凤之瑞世犹不若斯人淑世之功多也况鹰鸇乎及游太学穷经自守视范滂诸人好臧否议论者加一等矣淑德所关非徒全身远祸也

刘矩

刘矩字叔方沛国萧人少有高节以叔父辽未得仕遂絶州郡之命诸公嘉其志义辟辽拜议郎矩乃举孝廉稍迁雍丘令以礼让化其无孝义者皆感悟自革於路得遗辄推求其主民有争讼矩常引之於前提耳训告以为忿恚可忍县官不可入使归更寻思之讼者感其言往往罢去在县六年以母忧去官後太尉胡广举矩贤良方正四迁为尚书令性亮直不能谐附贵势以是失大将军梁冀意出为常山相以疾去官适冀妻兄孙祉为沛相矩惧为所害不敢还乡里乃投彭城友人家岁余冀意少悟乃补从事中郎复为尚书令迁宗正太常延熹四年太尉黄琼复为司空以矩代琼为太尉矩与琼及司徒种暠同心辅政号为贤相时连有灾异司隶校尉以劾三公尚书朱穆上言矩等良辅及引殷汤高宗不罪臣下之义帝不省竟以蛮夷反叛免後复拜太中大夫灵帝初代周景为太尉矩再为上公所辟召皆名儒宿德不与诸郡交通顺词默谏多见省用复以日食免因乞骸骨卒於家

论曰吴佑以身率物而矩以礼化人夫德礼者导齐之本也惟佑及矩其犹有三代之风乎佑忤冀遂不仕矩既去复用则佑之节为尤高然矩之顺词默谏以济时事度其所以拯弊维衰者为益当不少矣

刘寛

刘寛字文饶弘农华陰人有失牛者误认寛牛寛无所言下车以牛与之已而其人别得所失牛乃归寛牛谢曰慙负长者寛曰物有相类事容脱误何为谢之州里服其不校桓帝时大将军辟之累官南阳太守历典三郡温仁多恕虽在仓卒未尝疾言遽色常以为齐之以刑民免而无耻吏人有过但用蒲鞭罚之示辱而已终不加苦事有功善推之自下灾异则引躬克责每行县止息亭传辄引学官祭酒及处士诸生执经对讲见父老慰以农里之言少年勉以孝弟之训人感德兴行日有所化灵帝初徵拜太中大夫其後两拜太尉皆以日变免复拜永乐少府迁光禄勳封逮乡侯中平二年卒年六十六諡昭烈寛尝坐客遣苍头市酒迂久大醉而还客怒骂曰畜产须叟寛令视奴疑必自杀顾左右曰此人也骂言畜产辱孰甚焉故吾惧其死也夫人欲试寛令恚伺当朝会装严已讫使婢故覆肉羹污朝衣寛神色不异徐言曰羹烂汝手其性度如此海内称为长者

论曰汉世以牧守入为三公者至衆而寛尤为和厚之宗古者夏楚二物以收其威学宫之罚

也寬以蒲鞭馭吏其化亦行牧守之官誠視吏如手足愛民如子弟至心所感不怒而人威何事嚴刑以逞哉至治臧獲亦以度勝号称長者不虛矣

任峻

任峻字伯達河南中牟人漢末扰乱關東皆震中牟令楊原欲棄官走峻說原曰董卓首亂天下莫不側目然而未有先發者非無其心也勢未敢耳明府如能唱之必有和者今關東十余縣能勝兵者不減萬人若權行河南尹事總而用之無不濟矣原從其計以峻為主簿峻乃表原行尹事使諸縣堅守遂發兵會曹操起關東入中牟界峻建議舉郡歸操操表峻為騎都尉妻以從妹甚見親信操每征伐峻常居守以給軍是時歲饑旱軍食不足羽林監潁川臧只建置屯田乃以峻為典農中郎將只為屯田都尉募百姓屯田許下得谷數百萬斛郡國別置田官數年中所在積粟倉廩皆實官渡之役峻典軍器糧運賊數鈔絕糧道峻乃使千乘為一部十道方行為復陣以營備之賊不敢近軍國之饒起於臧只而成於峻以功封都亭侯邑三百戶遷長水校尉峻寬厚有度而見事理於飢荒之際收恤朋友孤遺中外貧宗周急繼乏信義見稱建安九年卒

論曰峻之說楊原討董卓義形於色可謂忠於漢而有特識矣而不免為操所用何耶然峻終身事於孝獻之朝其沒時操之逆迹猶未著則安得以與操同事而遽斥為魏臣哉操之行軍多致克捷實資屯田之利故知時平則勤墾軍興則開屯者政之善經也

董和

董和字幼宰南郡枝江人也先本巴郡江州人漢末和率宗族西遷劉璋以為牛鞞江原長成都令蜀土富實時俗奢侈貨殖之家侯服玉食婚姻葬送傾家竭產和躬率以儉惡衣蔬食防遏踰僭為之軌制所在皆移風變善畏而不犯縣界豪強憚和嚴法說璋轉和為巴東屬國都尉吏民老弱相携乞留和者數千人璋听留二年遷益州太守守其清約與蠻夷從事務推誠心南土愛而信之昭烈定蜀徵為掌軍中郎將與軍師將軍諸葛亮并署左將軍大司馬府事獻可替否共為歡交自和居官外收殊域內干機衡二十余年死之日家無儋石之財亮後為丞相教與羣下曰夫參署者集眾思廣忠益也若遠小嫌難相違覆闕損矣違覆而得中猶棄敝蹻而獲珠玉然人心苦不能盡惟徐元直處茲不惑又董幼宰參署七年事有不至至於十反苟能慕元直之十一幼宰之殷勤有忠於國則亮可少過矣又曰昔初交州平屢聞得失後交元直勤見啟誨前參事於幼宰每言則盡後從事於偉度數有諫止雖姿性鄙暗不能悉納然與此四子終始好合亦足以明其不疑於直言也其追思和如此和子允與費禕齊名及許靖喪子允與禕欲會其葬允請車和遣開後鹿車給之禕直上乘允有難色至喪所諸葛亮及諸貴人悉集車乘甚鮮允猶神色未泰而禕晏然自若和聞之乃謂允曰吾嘗疑汝於文偉優劣未別也而今而後吾意了矣然允秉心公亮丞相亮出駐漢中時任以宮省之事其後歷官至侍中守尚書令為大將軍費禕副

論曰惟仁者為能好善惟智者為能納益仁智合斯天德備而王道行矣觀和所以贊亮亮所

以思和其用心一何至耶然则与人共事而匿其情不肯毕智竭虑者诚和之罪人顾使柄政者讳疾护短加之以褊迫如宋王安石之伦则虽有和安得而用诸故书称断断亮实以之语赞谔谔和也有焉

附魏

杜畿

杜畿字伯侯京兆杜陵人少孤继母苦之以孝闻年二十为郡功曹守郑县令县内系囚数百畿亲临狱裁其轻重尽决遣之郡中奇其年少而有大意举孝廉除汉中府丞会天下乱弃官去建安中至许见侍中耿纪语终夜尚书令荀彧与纪比屋闻畿言异之使谓纪曰有国士而不进何也既见畿知之如旧识遂进於朝以为司空司直迁护羌校尉使持节领西平太守及高干举并州反张晟寇殽渑间河东人卫固范先与干通谋而河东太守王邑被徵固等乃以请邑为名使兵数千人绝陕津曹操谓彧曰河东被山带河四邻多变当今天下之要地也君为我举萧何寇恂以镇之彧曰杜畿其人也於是拜畿为河东太守时操已遣夏侯惇讨固等未至畿至陕津不得渡或谓畿宜须兵乃进畿曰河东有三万户非皆欲为乱也今兵迫之急欲为善者无主必惧而听於固固等势专必以死战讨之不胜四邻应之天下之变未息也讨之而胜是残一郡之民也且固等以请故君为名必不害新君吾单车直往出其不意固多计而无断必伪受吾吾得居郡一月以计縻之足矣遂诡道从郿津渡范先欲杀畿以威众且观畿去就於门下杀主簿已下三十余人畿举动自若於是固曰杀之无损徒有恶名且制之在我遂奉之畿谓固先曰卫范河东之望也吾仰成而已以固为都督行丞事领功曹将校吏兵三千余人皆先督之固等喜虽阳事畿不以为意固欲大发兵畿患之乃说固曰夫欲为非常之事不可动众心今大发兵众必扰不如徐以货募之固以为然为货调发然诸将贪所募数虽多而兵实少畿又喻固等曰人情顾家诸将掾史可分遣休息缓急召之不难固等恶逆众心又从之於是善人在外阴为已援恶人分散各还其家贼众离矣及白骑攻东垣【龔德传云张白骑叛於弘农白骑当即上张晟】高干入潞泽上党诸县杀长吏弘农执留守固等密调兵未至畿知诸县附已因单将数十骑赴张辟拒守吏民多举城助畿者比数十日得四千人固等与干晟共攻畿不下略诸县无所得会大兵至干晟败固等伏诛其余党与皆赦之使复其居业是时天下郡县皆残破河东最先定少耗减畿治之崇宽惠与民无为民有讼者畿为陈大义遣归谛思之若意有所不尽更来诣府父老自相责怒曰有君如此奈何不从其教自是少有词讼班下属县举孝子贞妇顺孙复其繇役随时慰勉之渐课民畜牝牛草马下逮鸡豚犬豕皆有章程百姓劝农家家丰实畿乃曰民富矣不可不教也於是冬月修戎讲武又开学宫亲自执经教授郡中化之韩遂马超之叛弘农冯翊多举县邑以应之惟河东民无异心大军征遂等夹渭为阵军食一仰河东及贼破余蓄尚二十余万斛乃增畿秩中二千石大将征汉中畿遣五千人运运者率自勉曰人生有一死不可负我府君终无一人逃亡其得人心如此魏国既建以畿为尚书然犹镇河东畿在河东十六年常为天下最曹丕嗣王位赐爵关内侯乃徵为尚书既称帝进封丰乐亭侯邑百户守司隶校尉及南征吴以畿为尚书仆射统留事後幸许昌畿复居守受诏作御楼船於陶河试船遇风没年六十二赠太仆諡曰戴侯论曰光武之敕冯异以平定安集为要图若畿之逢乱世守雄藩而才足定难德足集民迹

其易乱而治既富而教駸駸乎吏道备矣然仕於操当汉献之朝犹可言也仕於丕不可言也魏晋五代之间濡迹两朝代鲜完人如畿輦者何限故备论之以明其臣节之不足称而犹不忍没其吏治者严而恕德而彰也

郑浑

郑浑字文公河南开封人遭乱避地淮南袁术厚相宾礼然浑知术必败乃渡江就华歆曹操闻其笃行召为掾迁下蔡长邵陵令天下未定俗皆剽轻不念产殖生子无以相活辄不举浑所在夺其渔猎具课使耕桑又开稻田重去子之法民初畏罪後稍丰给无不举赡所育男女多以郑为字辟丞相掾属迁左冯翊时梁兴等略吏民为寇钞诸县不能御皆恐惧寄治郡下议者劝浑保险浑曰兴等破散窜在山阻其徒党率多胁从今当广开降路宣喻恩信若保险自守是示弱也乃敛吏民治城郭为守御备遂发民逐贼明赏罚与要誓得贼妇女财物十以七赏百姓大悦争捕贼贼之失妻子者皆求降浑责其得他妇女以赎妻子於是转相寇盗党与离散别遣吏民分布告喻出者相继因敕诸县长吏各还本治安集之及夏侯渊击兴浑为前登遂斩兴後又破斩靳富赵青龙诸贼由是山贼皆平民安产业转上党太守迁京兆尹浑以百姓新集为制移居之法使兼复者与单轻相伍温信者与孤老为比勤稼穡明禁令民劝於农而盗贼止息复入为丞相掾及魏称帝为侍御史加驸马都尉迁阳平沛郡二太守沛下湿患水涝百姓饥乏浑於萧相二县界兴陂遏开稻田郡人以为不便浑曰地势洿下宜溉灌终有鱼稻经久之利此丰民之本也一冬功成比年大收顷亩岁增租入倍常民赖其利号曰郑陂转山阳魏郡太守郡苦乏材浑课民树榆为篱兼植五果榆皆成藩五果丰实入魏郡界村落齐整如一财足用饶迁将作大匠浑清素在公妻子不免饥寒及卒以子崇为郎中

论曰子以郑字陂以郑名惠爱之在民亦孔多矣若其破散梁兴胆略又诚有过人者昔郑衆及兴为汉名儒於浑为高曾祖儒者之裔固宜其达於政事耶附吴

顾邵

顾邵字孝则吴郡吴人雍之子也博览书传好乐人伦少与舅陆绩齐名而陆逊张敦卜静等皆亚焉自四方人士往来相见或言议而去或结厚而别风声流闻远近称之权妻以策女年二十七起家为豫章太守下车祀先贤徐孺子之墓优待其家禁其淫祀及非礼之祭小吏姿佳者辄令就学择其先进擢置右职举善以敦风化大行初钱塘丁謂出於役伍阳羨张秉生於庶民乌程吾粲云阳殷礼起乎微贱邵皆拔而友之为立声誉秉遭丧亲为制服结經当之豫章发在近路值秉疾病时送者百数邵辞曰张仲节有疾苦不能来恨不见暂远与诀诸君少时相待其留心下士惟善所在皆此类在郡五年卒其後謂至典军中郎秉云阳太守礼零陵太守粲太子少傅世以邵为知人

论曰顾雍之相吴也史称其选用文武将吏各随能所任心无适莫以此克成吴业邵之雅好人伦殆尚有父风耶方是时三国瓜分雅道陵迟苟欲兴风俗长道术自非举善以教其为弃材多矣由邵斯志以为吏牧其犹为牛刀之割者欤

史传三编卷五十一

卷五十二

<史部,传记类,总录之属,史传三编

钦定四库全书

史传三编卷五十二

大学士朱轼撰

循吏传四

晋

王恂

王恂字良夫东海剡人文义通博在朝忠正累迁河南尹建立二学崇明五经鬲令袁毅尝馈以骏马恂不受及毅败诸受货者悉被废黜恂独无所污自魏给公卿已下租牛客户数各有差其後小人惮役多乐为之贵势之门动以百数太原诸部亦以匈奴为佃客多者数千武帝践位诏禁募客恂明峻其防所部莫敢犯咸宁四年卒赠车骑将军

论曰弦歌雅化类非俗吏之所优为也然其教必本於经乃足以察乎人伦而协於天则当魏晋间崇尚庄老王何倡之诸名流靡然和之七贤八达之类何可胜讥恂於是时独能建学尊经尤足珍也

胡威

胡威字伯武淮南壽春人父质少与蒋济朱绩知名江淮间以忠清仕魏至征东将军荊州刺史威早厉志尚质为荊州时威自都往省贫无仆从身自驱驴每至客舍皆亲樵爨既至见质停廨中十余日辞归质赐绢一疋为装威曰大人清高不审於何得此质曰俸禄之余以为汝粮耳威受之质帐下都督思结威好乃先威未发请假实陰为资装於道要威既与威同行数百里每事资威威疑之诱问知为都督即与以父所赐绢谢而遣之後以闻於质质杖都督除其名父子清慎如此於是名誉流闻拜侍御史历南乡侯安丰太守迁徐州刺史勤於政术风化大行後入朝武帝语及平生因叹质之清谓威曰卿孰与父清对曰臣不如也帝曰卿父以何为胜对曰臣父清恐人知臣清恐人不知是臣不及远也帝以威言直而婉谦而顺累迁监豫州诸军事右将军豫州刺史入为尚书加奉车都尉威尝谏时政之寬帝曰尚书郎以下吾无所假借威曰臣之所陈岂在丞郎令史正谓如臣等輩始可以肃化明法耳拜前将军监青州诸军事青州刺史以功封平春侯大康元年卒諡曰烈

论曰史称晋武寬厚足以君人明威未能厉俗结綬者以放浊为通弹冠者以苟得为贵此威所为发愤而以过寬为諫者也帝既失之寬而时方以清谈相尚耻言实效故循良之绩邈焉鲜闻若威克着清慎而又勤於政术可不谓吏道之良者乎抑观威之传而有感焉威父质赐绢一疋犹必问所从来以为俸余而後受之以此防民後世犹有子随父任欺以成贪以至坏父名戾民事而不顾者诗曰教海尔子式谷似之

范晷

范晷字彥长南阳顺阳人少游学清河遂侨居焉郡命为五官掾历河内郡丞太守裴楷雅知之荐为侍御史补上谷太守遭丧不之官後为司徒左长史转冯翊太守甚有政能善於绥抚百姓爱悦徵拜少府出为凉州刺史转雍州于时西土荒毁氏羌蹈藉田桑失收比屋困敝晷倾心化导劝以农桑所部甚赖之元康中加左将军卒子广字仲将举孝廉除灵壽令不之官天下方乱广姊适孙氏早亡有孙名迈广负以南奔虽盗贼艰急终不弃之元帝承制以为堂邑令丞刘荣者堂邑人坐事当死而家有老母郡以荣付县每至节广辄听荣还荣亦如期而反县堂为野火所及荣脱械救火事毕还自着械後大旱米贵广散私谷振饥人远近流寓归投之户口十倍卒於官

论曰晷苏雍州之困广振堂邑之饥非有奇能异绩也劝其农桑散其储积而已故大田多稼而民有仓困之赢者风之所以盛也田卒污莱而野有鸿鴈之哀者世之所以衰也君子仁心为质惠抚其下善政之基莫先於是矣

曹摅

曹摅字顔远谯国谯人少有孝行好学善属文补临淄令县有寡妇养姑甚谨姑以其年少劝令改适妇守节不移姑愍之密自杀亲党告妇杀姑妇不胜考鞫自诬服狱当决矣适摅至知其有冤更加辨究具得情实时称其明岁夕摅行狱见衆囚愍之谓曰卿等不幸到此非所新岁人情所重岂不欲暂见家耶囚皆涕泣曰若得暂归死无恨也摅悉开狱出之剋日令还掾吏固争摅曰此虽小人义不见负保为诸君任之至日果相率还并无违者一县叹服号曰圣君入为尚书郎转洛阳令仁惠明断百姓怀之时大雨雪宫门夜失行马检察莫知所在摅使收门士羣官咸谓不然摅曰宫掖禁严非外人所至必门士以燎寒耳诘之果服以病去官复为洛阳令及齐王冏辅政摅与左思俱为记室冏尝从容问摅曰天子为贼臣所迫吾率义兵兴复王室今入辅朝廷或有劝吾还国者於卿意何如摅曰大王荡平国贼匡复帝祚然道无隆而不杀物无盛而不衰非惟人事抑亦天理愿大王居高虑危在盈思冲精选百官存公屏欲举贤进善务得其才然後脂车秣马高揖归藩则上下同庆矣冏不纳寻转中书侍郎长沙王乂以为骠骑司马乂败免官起为襄城太守襄城屡经寇难摅绥怀振理旬月渐复永嘉二年高密王简镇襄阳以摅为征南司马使督参军崔旷讨流人王逌旷奸凶人也谪摅前战期为後继既而不至摅独与逌战于郾县军败死之故吏及百姓并奔丧会葬号哭即路如赴父母焉

论曰寡妇非尝有他志而为其姑所制也则何为而遽杀姑汉孟尝传所载上虞寡妇被诬鸩母事鸩与非鸩尤易辨耳乃彼必待尝白冤於身後而此乃得摭雪枉於生存所遇异也至摭受譎战没与宋杨业事正相类潘美为翊运功臣乃与奸凶之崔旷同类而并轍哀哉

丁绍

丁绍字叔伦谯国人为人开朗公正历官广平太守政平讼理道化大行於时河北骚扰靡有完邑惟广平四境乂安是以皆悦其法而从其令及临漳被围南阳王模窘急绍率郡兵赴之模赖以全迁徐州刺史士庶恋慕攀附如归未之官转荆州南渡河至许而南阳王模为都督感绍留之启为冀州以破汲桑有功加宁北将军假节监冀州诸军事时羯贼为患绍捕而诛之号为严肃河北人畏而爱之绍自以才足为物雄当官蒞政每事尅举视天下事若运於掌握遂慨然有董正四海之志若王浚苟曦辈绍意蔑如也永嘉三年暴疾卒临没叹曰此乃天亡冀州岂吾命哉

论曰绍既公正而善得民其用兵所向辄克使究其才用当与祖逖陶侃为辈浚曦琐琐何足齿数临没犹慷慨自负绍固人豪矣哉

顏含

顏含字弘都琅邪莘人少有操行以孝弟闻州辟不就东海王越以为大傅参军出补闾阳令元帝渡江为上虞令累迁东阳太守後以大司农豫讨苏峻有功封西平县侯拜侍中除吴郡太守王导问曰今蒞名郡政将何先含曰王师岁动编户虚耗南北权豪竞招游食国敝家丰执事之忧且当徵之势门使反田桑数年之後欲令户给人足如其礼乐俟之明宰含所历简而有恩明而能断然以威御下导叹曰顏公在事吴人斂手矣未之官复为侍中寻除国子祭酒加散骑常侍迁光禄勳以年老逊位成帝美其素行就加右光禄大夫于时论者以王导帝之师傅名位隆重百僚宜为降礼太常冯怀以问含含曰王公虽重理无偏敬降礼或是诸君事宜鄙人老矣不识时务既而告人曰吾闻伐国不问仁人向者冯祖思问佞於我我岂有邪德邪郭璞尝欲为含筮含辞曰年在天位在人修已而天不与者命也守道而人不知者性也自有性命无劳蓍龟桓温求婚於含含以其盛满不许惟与邓攸深交或问江左羣士优劣含曰周伯仁之正邓伯道之清卞望之之节余则吾不知也其雅重行实抑絕浮伪如此致仕二十余年年九十三卒遗命素棺薄敛谥曰靖

论曰含所历以威恩为治其与王导论治吴郡又何适於事宜邪驱游食使反田桑平世犹当以为首务况军兴国敝之日乎若其委命于天不媚权贵崇行实而抑浮伪於东晋风声波靡之时尤鲜其匹云

王蘊

王蘊字叔仁太原晋阳人孝武定皇后父也起家佐著作郎累迁尚书吏部郎性平和不抑寒

素补吴兴太守甚有德政属郡荒人饥开仓廩恤主簿请表上待报蘊曰今百姓嗷然路有饥馑若须报何以救将死之命乎专辄之愆罪在太守且行仁义而败无所恨於是大振贷之赖蘊全者十七八焉以违科免官士庶诣阙讼之诏特左降晋陵太守复有惠化百姓歌之定后立迁光禄大夫领五兵尚书本州大中正封建昌县侯蘊以恩泽赐爵非三代令典固辞不受乃授都督京口诸军事左将军徐州刺史假节复固让谢安劝之乃受命顷之徵拜尚书左仆射将军如故迁丹阳尹即本军号加散骑常侍蘊以姻戚不欲在内苦求外出复以为都督浙江东五郡镇军将军会稽内史常侍如故蘊素嗜酒末年尤甚然在会稽犹以和简为百姓所悦太元九年卒年五十五赠左光禄大夫开府仪同三司

论曰蘊不须报而廩饥民与汉第五访相类然访见褒而蘊左降君子因是有以论其世矣其援三代令典以辞恩泽卓哉高概伟识尤非可求於俗吏中者也

吴隐之

吴隐之字处默濮阳甄城人性至孝年十余丧父每号泣行人为之流涕及执母丧哀毁过礼哭临之时双鹤警叫及祥练复有羣鴈俱集时人以为孝感尝食馘菹以其味旨掇而弃之与太常韩伯邻居伯母殷浩之姊贤明妇人也每闻隐之哭声辄辍飧投筯为悲泣既而谓伯曰汝若居铨衡者当举此辈人故伯为吏部尚书隐之遂阶清级隐之美姿容善谈论博涉文史以儒雅标名自弱冠介立有清操虽日晏歆菽不飧非其粟儋石无储不取非其道兄坦之坐袁真事将被祸隐之时参桓温军事乞代兄命温矜而释之遂为温所知赏拜奉朝请再迁晋陵太守在郡清俭妻自负薪累擢左卫将军虽居清显禄赐皆班亲族冬月无被勤苦同於贫庶隆安中为广州刺史广州包带山海珍异所出前後刺史多黷货距州二十里地名石门有水曰贪泉俗谓饮者辄怀无厌之欲隐之至谓所亲曰不见可欲使心不乱越岭丧清吾知之矣乃至泉所酌而饮之赋诗曰古人云此水一饮怀千金试使夷齐饮终当不易心於是清操愈厉及卢循寇南海隐之率厉将士固守长子旷之战歿城陷出走为循所得久方得还装无余资家仅小宅数亩篱垣仄陋不容妻子刘裕欲为起宅固辞寻拜度支尚书迁中领军常以竹篷为屏风坐无氍席每月得禄裁留身粮余悉分赈亲族时有困絶或并日而食身恒布衣不完妻子不沾寸禄义熙八年请老优诏许之九年卒隐之清操不渝屡被赠赐廉士以为荣初奉朝请时将嫁女谢石知其贫令移厨帐以助其经营使至方见婢牵犬卖之此外萧然无办後归自番禺妻齎沈香一斤隐之见之遂投於湖亭之水其介如此子延之为鄱阳太守延之弟及子为郡县者皆以廉慎为门法虽才学不逮隐之而孝弟洁清不替

论曰唐柳宗元尝哀螾蚘谓其以土自负致殃其生而不悟因以兴夫世之以赃败者若隐之之清操自厉虽若过於苦节要於吾身以内曷尝有所亡哉贪世利以为身图实贾世祸以为身殃是诚螾蚘之技闻隐之风可以兴矣

南朝宋

杜慧庆

杜慧庆交址朱?人父瑗历日南九德交址交州太守有功义熙六年卒明年乃除慧庆继瑗为交州刺史卢循之袭破合浦也径向交州慧庆率文武六千人拒破之循复招余党结俚獠以进慧庆悉出私财以充劝赏自登高舰与循合战放火箭焚循舰循舰俱然一时散溃遂斩循及循父嘏并其二子传首建邺以功封龙编县侯武帝践阼进号辅国将军其年又南破林邑遣使献捷慧庆布衣蔬食俭约质素能弹琴颇好庄老禁断淫祀崇修学校岁荒人饥则以私禄赈给为政纖密有如居家由是威惠沾洽奸盗不起乃至城门不夜闭道不拾遗卒赠左将军以长子弘文为振远将军袭爵复继父为交州刺史弘文亦以寬和得衆元嘉四年弘文已得疾被徵将行或劝以少待病愈弘文曰吾荷皇恩杖节三世常欲投躯帝庭况被徵命而可晏然乎即舆疾就路行至广州卒朝廷甚哀之

论曰古之治天下至纖至悉也彼实推保赤之诚以行其政故经理筹画非极於周详而不容已也慧庆之为政其有古人之心乎弘文守藩峽外三世树德一旦闻命舆疾赴召忠诚见於辞色尤可録已

刘秀之

刘秀之字道宝东莞莒人少时尝与诸儿遇大虵虵来势猛儿尽惊号秀之独不动东海何承天雅相器异以女妻之景平二年除驸马都尉元嘉中再为建康令有政绩孝武镇襄阳以为抚军録事参军襄阳令襄阳有六门堰良田数千顷堰久坏公私废业秀之修复之雍部由是大丰复除西戎校尉梁南秦二州刺史加都督躬为俭约以救饥饉先是汉川以绢为货秀之令用钱百姓利之二十七年大举北侵遣辅国将军杨文德巴西梓潼二郡太守刘弘宗受秀之节度震荡沔陇元凶邵弑逆秀之即日起兵来赴襄阳孝武入定难迁为益州刺史梁益丰富前後刺史莫不营聚多者致万金秀之心力坚正独清洁家无余财去梁之日折留奉禄二百八十万付镇库此外萧然其为政整肃远近悦焉孝建元年南譙王义宣据荆州为逆徵兵於秀之秀之斩其使以起义功封康乐县侯徙丹阳尹时县官买物多不予直秀之极言其非宜不纳迁尚书右仆射议定隶人杀长吏科或谓遭赦宜以徙论秀之曰人敬官长比之父母杀官长而遇赦以徙论与悠悠杀人者何异为宜长付远方穷其天命家口补兵从之後为宁蛮校尉雍州刺史加都督将徵为左仆射会卒赠司空諡忠成论曰秀之处富饶之郡而能以清着可谓廉吏其赴国难拒逆谋义形於色抑亦忠矣夫吏民於官长亦有君臣之分焉峻为之防乃所以益严堂廉之辨秀之之议法其即鷹鷂逐雀之意也夫

南朝齐

傅琰

傅琰字季珪北地灵州人美姿仪仕宋为武康令迁山陰令并着能名二县皆谓之傅圣赐爵新亭侯元徽中迁尚书左丞齐高帝辅政以山陰狱讼烦积复以为山陰令有二姥争团丝姥各别业其一卖针其一卖糖琰令挂团丝鞭之有铁屑乃罚卖糖者又二野父争鸡琰问何以食鸡一云粟一云豆乃破鸡得粟罪言豆者县内称神明无敢为偷先是琰父僧佑尝令山陰

有能名至琰复再任着绩时言诸傅有理县谱子孙相传不以示人昇明中自县擢为益州刺史齐建元四年徵为骠骑将军黄门郎永明中为庐陵王安西长史南郡内史行荆州事卒时长沙太守王沈新蔡太守刘闻慰晋平太守丘仲起长城县令何敬叔故鄣县令丘寂之皆有能名而不及琰琰子翮复自吴令历山陰令有能名建康令孙廉尝问翮曰闻丈人发奸擿伏如神何以至此翮曰无他也惟勤而清耳清则宪纲自行勤则事无不理宪纲行则吏不能欺事自理则物无凝滞欲不治得乎翮天监中位至骠骑谥议

论曰君子不能使民无讼而至於听讼化之衰也然情伪微暖其变千状非中正明达果断则亦不能听也琰之擿伏不过以情理推求而遽得神明之誉翮本清勤以论其理呜呼斯其为诸傅之理县谱欤

范述曾

范述曾字穎彦吴郡钱塘人好学尝从余杭吕道惠受五经齐初为南郡王国郎中令迁太子步兵校尉带开阳令述曾为人謇谤多所諫争太子虽不能尽用亦弗之罪也竟陵王深相器重号为周舍太子左卫率沈约亦以述曾方汲黯焉明帝即位迁永嘉太守为政清平不尚威猛毗俗便之所部横阳县山谷嶮峻为逋逃所聚前後二千石讨捕莫能息述曾下车开示恩信诸凶党襁负而出编户属籍者二百余家自是商旅流通居人安业励志清白不受馈遗及徵为游擊将军郡送钱二十余万卒无所受东昏时拜中散大夫还乡里入梁以为大中大夫述曾平生所得禄皆以分施及老遂壁立无资天监八年卒所注有易文言後吴兴丘师施为临安令亦以廉洁称当时以比述曾

论曰述曾之经术直气皆有足称匪独吏治也恩信所感至化凶党为编户亦岂硜硜廉介自好者所可庶几当时论者以述曾方汲黯复以师施比述曾有以也然濡迹齐梁随波逐流而不知怪君子不免有遗憾焉

南朝梁

夏侯夔

夏侯夔字季龙谯郡谯人由大匠卿累迁司州刺史领安陆太守尝帅二将军出义阳道攻平静穆陵阴山三关克之时谯州刺史湛僧智围东豫州刺史元庆和於广陵入其郛魏将元显伯率军赴援夔乃自武阳出会僧智断魏军归路庆和遂降显伯闻之夜遁由是义阳北道与魏絕及郢州刺史元显达降诏改为北司州以夔为刺史兼督司州封保城县侯大通六年转豫州刺史加督豫州积岁连兵人颇失业夔率军人军人於苍陵立堰溉田千余顷岁收谷百余万石以充储备兼赡贫人境内赖之初夔兄亶亦任豫州有恩惠於是百姓歌曰我之有州频得夏侯前兄後弟布政优优夔在州七年远近多附之有部曲万人马二千匹并服习精强为当时最盛性好人士不以贵位自高文武宾客常满坐时尤以此多之卒於州謚曰桓

论曰卫文公当破散之余再立社稷无他道也其在诗曰星言夙驾税於桑田斯駉牝所以三千也夔备屏藩於南北分疆之时武略既振复能留心民事用克怀柔远近保固边圉庶几卫文之遗烈焉

张缅

张缅字元长范阳方城人弘策之子也自幼即为外祖刘仲德所器异谓方有海内令名甫十岁弘策从梁武帝举兵向都缅留襄阳每闻军胜负辄忧喜形於颜色及弘策遇害居丧过礼服阕袭封洮阳县侯起家秘书郎出为淮南太守武帝疑其年少未闲吏事取文案试令断决见其允惬甚称赏之再迁云麾外兵参军缅少勤学手不辍卷有质疑者随问辄对略无遗失会武帝令徐勉择可充殿中郎者勉举缅顷之为武陵太守还拜太子洗马中舍人缅母刘氏以父歿家贫葬礼有阙遂终身不居正室不随子入官府缅在郡所得俸禄不敢用至乃妻子不易衣裳及还并以供母振遗亲属累载所蓄一朝随尽私室常閤然如贫素累迁豫章内史为政任恩惠不设鈎距吏人化其德亦不敢欺後为御史中丞推绳无所顾望号为劲直武帝图其形於台省以励当官坐事左降黄门俄复旧任迁侍中未拜卒论曰鈎距之设吏道之衰也夫贤者不逆不亿鈎距之为逆亿也大矣上任术以御下下必狡而相遁是官民相率而为伪也岂曰能贤君子开诚以平其政故厥心日休而毗俗亦返於醇矣其风顾不尚耶南朝陈

褚玠

褚玠字温理河南阳翟人美风仪博学能属文词义典实不好艳靡先达多以才器许之起家王府法曹累迁太子庶子中书侍郎太建中山阴县多豪猾前後吏皆以赃污免高宗患之嗾良宰於中书舍人蔡景历景历言玠廉俭有干用乃除玠戎昭将军山阴令时舍人曹义达为高宗所宠县富人陈信谄事义达信父显文恃势横暴玠乃执显文鞭之一百於是吏民股票莫敢犯者信卒因义达潜玠免官玠在任岁余守俸禄而已去官之日不堪自致因留县境种蔬菜自给或以嗤玠玠曰吾委输课最不後列城除残去暴奸吏局蹐若谓不能自润脂膏者则如来命时人以为信然太子知玠无还装赐粟米二百斛於是还都太子爱其文辞令入直殿省十年除电威将军淮南王长史顷之掌东宫管记十二年迁御史中丞卒年五十二玠刚毅有胆决善骑射尝从侯安都於徐州出猎遇虎玠引弓射之再发皆中口入腹其虎遂毙及为御史中丞甚有直绳之称自梁末丧乱朝章废弛玠方欲改张大为条例纲维略举而编次未讫所制章奏杂文二百余篇皆切事理见重於时

论曰高宗患山阴多豪故简而用玠玠试政逾期竟以锄豪败以此任之复以此罪之安得展其力用哉当陈之时循良之风益衰惟玠治县有干用之才立朝有绳直之称故録焉

史传三编卷五十二

卷五十三

钦定四库全书

史传三编卷五十三

大学士朱轼撰

循吏传五

北朝魏

韩麒麟

韩麒麟昌黎棘城人好学美姿容善骑射参征南慕容白曜军事进攻升城师人多伤及城溃白曜将坑之麒麟谏曰今方进趣宜示宽厚勅敌在前而便坑其衆恐三齐未易图也白曜从之皆令复业齐人大悦白曜表为冀州刺史白曜攻东阳麒麟上义租六十万斛及攻战具军资无乏孝文时拜齐州刺史在官寡於刑罚从事刘普庆说曰明公仗节方夏无所斩戮何以示威麒麟曰人不犯法何所戮乎若必须斩断以立威名当以卿应之普庆慙惧而退麒麟以新附之人未阶台宦士人沈抑乃请守宰有阙推用豪望增置吏员广延贤哲庶华族蒙荣良才获叙因以怀德安土朝议从之太和十一年京都大饥麒麟表陈时务略曰古先哲王经国立政积储九稔谓之太平今京师人庶不田者多游食之口三分居二故顷年山东遭水而人馁今秋京都遇旱而谷贵实由农人不劝素无储积故也自承平日久丰穰积年竞相矜夸浸成侈俗故令耕者日少田者日荒谷帛罄於府库宝货盈於市里衣食匱於室丽服溢於路饥寒之本实在於斯愚谓凡珍玩之物皆宜禁断吉凶之礼备为格式令贵贱有别人归朴素制天下男女计口受田宰司四时巡行台使岁一案检勤相劝课严加赏罚数年之中必有盈贍往年校比户贯租赋轻少请减绢布增益谷租年丰多积岁俭出振所谓私人之谷寄积於官官有宿积则人无荒年矣麒麟立性恭慎恒置律令於坐傍临终惟有俸绢数十匹其清贫如此卒諡曰康

论曰善夫麒麟之论时务也人情莫不贵贵而恶贱苟华衣繁饰即可袭为士大夫之容则氓隶虑无不竭貲倾家以求所谓华衣繁饰者矣虽欲率俭其道无由惟立之格式辨为等威则章服之贵不系於丝衣韦布之贱不因乎草服是贵者不必以奢而成贵贱则虽奢亦无改乎其贱也此民志所以定不期俭而自俭之善术也至课农积谷皆三代盛时所倦倦为民早虑者实理物之常轨为政之所先北魏名臣经济如麒麟比者希矣岂直良吏云尔哉

李平

李平字云定顿丘人涉猎羣书好礼易有太度太和初拜通直散骑侍郎孝文礼之累迁太子庶子请郡自效拜长乐太守政务清静徵行河南尹为豪右亲戚所憚及宣武将幸邙平表諫以为洛邑俶营根基未就实宜安静劝其稼穡令国有九载之粮家有水旱之备不从寻为相州刺史劝课农桑修饰太学简试通儒以充博士选郡中聪敏者教之图孔子及七十二子於讲堂亲为立赞先是台使多好侵渔平乃画履虎尾践薄冰於客馆注颂其下以示诫徵拜度支尚书领御史中尉会京兆王愉反於信都以平为持节都督北讨诸军事行冀州讨之宣武临遣平曰何图今日言及斯事因歔歔流涕平曰愉天迷其心构此梟悖陛下不以臣不武委以总师之任如其稽顙军门则送之大理若不悛待戮则鸣鼓衅钲非陛下之事平进诸军大集夜有蛮兵数千斫前垒矢及平帐平坚卧不动俄而遂定进破愉於冀州城南遂围城愉夺门走追禽之乃使平以本官领相州大中正加散骑常侍为高肇王显所陷除名延昌初复除定冀二州刺史先是良贱之讼频年繁积平请不问真伪一以景明年前为限於是狱讼衰少武川饥镇将任款擅开仓赈恤为有司所绳当免官平奏救款特见原平高明强济所在有声但颇以性急为累迁中书令孝明初转吏部尚书及任城王澄为理定冀之勲乃封武邑郡公时梁将赵祖悦逼壽春诸将乖贰攻之未克乃以平使持节镇军大将军兼尚书右仆射为行台节度诸军平严勒水陆尅期齐举诸军憚之无敢乖互遂破梁军竟斩祖悦送首洛阳以功迁尚书右仆射加散骑常侍平自在度支至於端副夙夜在公孜孜匪懈凡处机密十有余年有献替之称卒諡文烈

论曰平处机密则为国腹心临军旅则为时干城岂独以吏绩见哉当其时南北纷纷竞尚西方之教而平独能修学立师诱诲其民又知宗孔氏以定其统遂使丹青之所画卒为学宫祀典之所因詎非以孝文稽古礼文风声日正故承流者耳目渐染其所崇好亦为之翻然一变耶

张华原

张华原字国满代郡人为骠骑府法曹参军迁大丞相府属寻除散骑常侍奉使入关宇文泰爱之有拘留之意谓曰若能屈骥足当共享富贵不尔命悬今日华原曰殒首而已不敢闻命泰嘉其亮正乃使东还高欢以华原久不返每叹惜之及闻其来喜见於色後累迁兖州刺史华原有干略达政体至州广布耳目境内大贼及邻州亡命三百余人皆诣华原归款咸抚以恩信放归田里於是人怀感附寇盗寝息州狱繫囚千余华原料简轻重随事决遣至年暮惟余重罪数十人华原各给五日假曰期尽速返也囚等皆曰有君如是何忍背之依期毕至先是州境数有猛兽为暴至是甌山中忽有六駮出食猛兽咸以为化感所致卒官州人大小莫不号慕为立祠四时祭焉

论曰当东西魏时兵革日兴生民之隘狭甚矣於是散为盗贼岂不乐生聊以缓死焉耳君子哀矜之不暇若一切草薶而禽猕之伤於仁矣华原怀附新降化盗为民仁心所全不已大乎

北朝齐

崔伯谦

崔伯谦字士逊博陵人高欢召补相府功曹称曰清直奉公真良佐也迁瀛州别驾高澄辅政以为京畿司马时族弟暹方居宠要伯谦以雅道自居非吉凶未尝造暹齐天保初除济北太守恩信大行富者禁其奢侈贫者劝课周给改用熟皮鞭鞭人不忍见血示耻而已朝贵行过郡境问人以太守治政人曰府君恩化古者所无诵人为歌曰崔府君能临政易鞭鞭布威德人无争客曰既以德化何更任威对曰长吏惮其威严人庶蒙其恩惠及徵赴邺百姓号泣遮道数日不得前以弟仲让仕於关中不复居内任除南钜鹿太守下车道以礼让豪族皆改心整肃事无巨细必自亲览民有贫弱未理者皆曰我自告白须公不虑不决在郡七年狱无停囚每有大使巡察恒处上第徵拜银青光禄大夫伯谦少读经史平生容止俨然未尝有愠色亲朋至置酒相娱清言不及俗事士大夫以为仪表卒諡曰懿

论曰班固有言刑罚不可废於国鞭笞不可废於家为顽梗者言之也伯谦之用熟皮鞭与汉刘宽之用蒲鞭意正相类然长吏反以此惮其威严故威行而人知恩者亦恩行而人知威也刑罚鞭笞聊以济威可耳若夫不怒之威当不关此

苏琼

苏琼字珍之长乐武强人尝谒东荆州刺史曹芝芝戏曰卿欲官否对曰设官求人非人求官芝异其对署为府长流参军高澄以仪同开府引为刑狱参军府僚有推并州盗事者所疑贼已拷伏惟未得赃澄更以付琼琼乃别推得贼尽获赃验澄大笑乐迁南清河太守琼性清慎至部盗贼止息或外境奸非从界行过者无不捉获零陵人魏双成失牛疑为村人魏子宾所窃琼一问知子宾见枉即释之双成哀诉曰苟释子宾则民何从得牛琼不应已乃别访得盗郡人皆服自是畜牧不收邻郡富家多捋财物寄琼界内以避盗平原妖贼刘黑狗事发徒党牵连琼所部与平原接壤无一人染其辞者时尤服其德绩郡民乙普明兄弟争田积年不断所援证至百人琼召谕之曰天下难得者兄弟易求者田地假令得地失兄弟心何如因而泪下诸证人莫不洒泣普明兄弟叩头引咎二人分异已十年及是感悟还复同居焉常以春日集大儒卫觐隆田元凤等讲於郡学诸吏文案之暇辄令受书又禁断淫祠婚姻丧祭皆教以俭而衷之礼其兵赋次第竝立明式至於调役事必先办当时州郡无不遣人至境访其政术齐天保中郡界大水琼贷粟於富家以给饥者咸抚其子曰府君生汝在郡六年常为天下尤最遭忧解职寻起为司直廷尉正时宋世轨为少卿亦有名侍中为之语曰决定嫌疑苏珍之视表见里宋世轨号为寺中二絕及赵州清河连有反狱前後皆以付琼事多申雪尚书崔昂谓曰欲立功名当思余理数雪反逆身命何轻琼正色曰所雪者冤枉不放反逆昂大慙京师为之语曰断决无疑苏珍之皇建中赐爵安定县男徐州行台左丞行徐州事旧制以淮禁商贩不听辄度时淮南岁俭琼请听采淮北及淮北饥复请通采淮南自是商贩往还彼此兼济水陆之利通於河北後为大理卿而齐亡入周为博陵太守隋开皇初卒

论曰琼之济饥所具二法当在清河贷诸富者所以酌剂其盈虚也及在徐州采诸邻界所以懋迁其有无也朱子之賑南康荒政无不举其大端亦惟通商劝分而已通商故邻无遏采而

客米云集劝分故境无居奇而旧谷益出殆权輿於琼法而行之者欤

裴延儁

裴延儁字平子河东闻喜人涉猎坟史举秀才除著作佐郎累迁太子洗马齐宣武即位为中书侍郎值帝专心释典延儁上疏谏及诏立明堂羣官博议儁独着一堂之论明帝时拜幽州刺史范阳郡故有督亢渠渔阳燕郡有戾陵诸竭久废莫修时水旱不调延儁乃表求营造遂躬自履行相度形势随力分督未几而就溉田百余万亩为利十倍百姓赖之又命主簿郗恽修起学校礼教大行人歌谣之在州五年考绩为天下最後历官至吏部尚书庄帝初於河陰遇害其子元直敬猷并有学尚与同死

论曰昔曹操军出无终阻於泞滯田畴曰此道秋夏每常有水浅不通车马深不载舟船可知幽壤水潦之多自古已然当周召公之国於是也其时沟洫盖详焉後世阙而不讲乃倭於北土高燥水不足用观延儁之所修复为利十倍可以关其口矣

北朝周

裴侠

裴侠字嵩和河东解人解褐奉朝请累迁东郡太守及孝武疑高欢徵兵河南侠率所部赴洛阳授左中郎将俄而孝武西迁侠将从行而妻子犹在东郡郑伟谓曰天下方乱未知乌之所集何如东就妻子徐择木焉侠曰吾既食人之禄宁以妻子易曷忠义之道庸可忽乎既入关除丞相府士曹参军从战沙苑有功拜行台郎中王思政镇玉壁以为长史後除河北郡守侠躬履俭素爱民如子所食惟菽麦盐菜吏民怀之旧制有渔猎夫三十人以供守侠曰以口腹役人吾不为也悉罢之因并罢供役丁夫亦三十人但量收其庸直以市马岁月既积马遂成羣去职之日一无所取民歌之曰肥鲜不食丁庸不取裴公贞惠为世规矩侠尝与诸牧守俱谒宇文泰泰命侠别立谓诸牧守曰侠清慎奉公为天下最今衆有如侠者可与俱立衆皆默然无敢应乃厚赐侠朝野叹服号为独立君侠又撰九世伯祖贞侯传以为裴氏清公自此始欲後生奉而行之从弟伯凤世彦时并为丞相府佐笑曰人生仕进当身名并裕清苦若此竟欲何为侠曰夫清者莅职之本俭者持身之基况我大宗世济其美故能存见称於朝廷歿流芳於典策今我幸以凡庸滥蒙殊遇固其穷困非慕名也志在自修惧辱先也伯凤等慙而退九年入为大行台郎中居数载连拜郢郢二州刺史徵为雍州别驾周孝闵帝践阼除司邑下大夫迁民部中大夫主仓吏多隐没积年至千万侠励精发摘数旬之内奸盗略尽转工部司空钱物所隐费数亦至五百万其吏李贵知侠清严惧罪责乃於府中悲泣侠闻之听其自首其肃遏奸伏皆此类侠所居屋风霜不蔽帝知之矜其清苦为起宅并赐良田奴隶耕牛粮粟莫不备足缙绅咸以为荣武成元年卒諡曰贞河北吏民感侠遗爱乃作颂纪其清德焉

论曰侠从魏帝西迁不顾妻子忠矣及为牧守又能以清自律於是苏绰尝为六条诏书奏施行之其论吏治曰身不能自治而欲望治百姓是曲表而求直影也行不能自修而欲百姓修

行是无的而责射中也故必心如清水行如白玉若侠之操庶能充斯语者耶

薛慎

薛慎字伯护河东汾陰人好学能属文善草书起家丞相府墨曹参军宇文泰於行台省置学取丞郎及府佐德行明敏者充之令旦理公务晚就讲习先六经後子史又於诸生中简德行淳懿者侍读书慎与李灿等十二人实应其选复使慎为学师以知诸生课业累迁礼部郎中六官建拜膳部下大夫是时慎兄善亦任工部并居清显时人荣之周孝闵帝践阼除御正下大夫封淮南县子历师氏御伯中大夫保定初出为湖州刺史界杂诸蛮常苦刼掠慎乃集蛮豪宣朝旨令首领每月一参或须言事不时辄见见必殷勤劝诫及赐酒食期年翕然从化诸蛮乃相谓曰今日始知刺史真人父母也莫不欣悦自是襁负而至者千余户蛮俗子娶妻虽父母在即别居慎谓守令曰牧守令长化人者也此非惟氓俗之失亦牧守之罪乃亲自诱导示以孝慈并遣守令各谕所部有数户蛮还侍养及行得果膳归奉父母者慎以其从善之速具以状闻有诏蠲其赋役於是风化大行尽革旧俗寻为蕃部中大夫以疾去职卒於家

论曰语云以言感人其感已浅慎劝诫诸蛮而诸蛮景从者诚心为之质也父子之爱得之最先虽虎狼犹不泯况诸蛮乎慎先之以诱导加之以激劝靡然向风革俗而从化何其易耶

隋

梁彦光

梁彦光字修芝安定乌氏人涉经史有规检造次必以礼仕周至柱国青州刺史及隋受禅为岐州刺史兼领宫监後转相州彦光之治岐也岐俗淳质以静镇之所部大安嘉禾连理出於州境奏课连最为天下第一及居相如故治以政不理坐免岁余起拜赵州刺史彦光曰臣前待罪相州百姓呼为戴帽饬臣自分废黜无复衣冠之望不谓天恩复垂收采请复为相州改弦易调庶以变其风俗上从之复以为相州刺史豪猾闻彦光自请来莫不嗤笑彦光下车发擿奸隐有若神明豪猾皆潜窜合境大骇初齐亡後衣冠士人多迁关内惟技巧商贩及乐户之家移实州郭由是人情险陂妄起风谣诉讼官人万端千变彦光欲革其弊乃用秩俸招致大儒每乡立学非圣贤之书不得教授常以季月召集临试有勤学异等聪令有闻者升堂设饌其余并坐廊下若好诤讼惰业无成者则坐之庭中设以草具及大成又为举行宾贡之礼祖之郊外资以财物於是人皆剋励风俗大改滏阳人焦通性酗酒事亲礼阙彦光弗之罪惟将至州学使观韩伯瑜像为说伯瑜母杖不痛哀母年衰对母悲泣之事通感悟悲媿若无容者改过励行卒为善士吏人感悦略无诤讼卒官諡曰襄论曰夫子论政曰齐一变至於鲁鲁一变至於道以至圣治齐必待再变者习染深锢非先革其俗不能行其化也譬疔病而遇厉疾不投以猛擊祛邪之方而遽养以中和必不疗矣洪范曰强弗友刚克此三代之治法也

刘旷

刘旷不知何许人性谨厚每以诚恕应物开皇初为平乡令单骑之官有诤讼者辄丁宁晓以义理不加绳劾各引咎去所得禄用赈穷乏百姓感其德更相劝曰有君如此何得为非在职七年风教大洽诤讼衰息狱无繫囚囹圄皆生草庭可张罗及去官吏人无少长号泣送之数百里不絕迁为临颖令清明善政为天下第一高颖言状上召见劳之曰天下县令多矣卿独能异於衆顾侍臣曰若不殊獎何以劝人於是优诏拜莒州刺史

论曰诚者体恕者用慎斯术也以往虽以天下之广兆民之衆尚当不疑於所行况郡县乎旷之里居史犹不具故治迹亦多阙要为吏者法其诚恕焉斯即旷矣

王伽

王伽河间章武人开皇末为齐州参军州使送流囚李参等七十余人诣京师流人法加枷锁援卒传送伽行次荥阳悯其辛苦呼囚谓曰若辈既犯国刑亏损名教身婴縲紲此其宜也今复重劳援卒岂独不媿於心耶参等辞谢伽复曰若等虽犯法枷锁亦大苦辛吾为若脱去各行诣京能不违期乎囚皆拜曰必不敢违伽於是悉脱枷锁停援卒与期曰某日当至京师如致前却吾即为汝受死舍之而去流人感悦依期悉至一无离叛上闻而惊异召见与语称善久之悉召流人并令携负妻子入宴殿庭而赦之乃下诏曰凡在有生含灵稟性咸知好恶并识是非若临以至诚明加劝导则贼必从化人皆迁善往以海内乱离德教废絶官人无慈爱之心兆庶怀奸诈之意所以狱讼不息浇薄难理朕安养万姓思导圣法以德化人伽深识朕意诚心宣导参等感悟自赴宪司明率土之人非为难教良是官人不加示晓致令陷罪无由自新若使官尽王伽之俦人皆李参之辈刑措不用其何远哉於是擢伽为雍令有能名

论曰开皇之治简核吏职故其时户口大蕃民得休息东汉以还於斯为盛伽之脱囚固不可为常格要其诚心所感不可诬也帝缘是下深厚之诏以课吏而导民虽汉文之训词何以加焉

长孙平

长孙平字处均代人也美容仪有器干颇览书记为周卫王侍读武帝逼於宇文护与卫王谋诛之王常使平通意於帝护诛拜开府仪同三司宣帝时迁少司寇平与隋文帝情好欵洽及文帝为丞相恩礼弥厚贺若弼镇壽阳文帝恐其怀贰遣平代之弼果不从平麾壮士执弼送京师隋开皇三年徵拜度支尚书平见天下州县多罹水旱百姓不给奏令民间每秋家出粟麦一石以下各以贫富为差储之闾里以备凶年名曰义仓帝深嘉纳自是州里丰衍後转工部尚书有人告大都督邴绍非毁朝廷愤愤者上怒将斩之平諫乃止因勅羣臣诽谤之罪勿复以闻未几遇谴以尚书检校汴州事寻除汴州刺史历许员二州俱有善政邴都俗薄前後刺史多不称职乃迁平为相州甚有能名在州数年坐事免俄复进位大将军拜太常卿吏部尚书卒官謚曰康

论曰历代建仓以备歉者惟汉之常平隋之义仓最着常平积之自官义仓敛之自民校其利

弊各有短长焉义仓则惧有司之勒民出粟或因以多科也然民储粟而还散之民则於散时为便常平则惧有司之拘守公令或赈给後事也然官有粟而还储之官则於储时为便要是二策皆所以为国养民政之善者也得良吏以行善政斯皆无弊矣平悯民生多艰建为是策其历州郡有声称也宜哉

辛公义

辛公义陇西狄道人仕周至内史上士开皇元年除主客侍郎後转驾部侍郎勾检诸马牧所获十余万匹从军平陈以功除岷州刺史土俗畏病一人有疾举家逃避父子夫妻不相视养孝义道絶由是病者多死公义欲变其俗因遣人分检部内有疾者举置听事暑月疫时病人或至数百公义亲设一榻坐其间终日连夕对之理事所得俸尽用市药迎医疗之躬劝其饮食病者悉瘥於是召其亲戚喻之曰死生有命不关相染前汝弃之所以死耳今我聚病者坐卧其间若言相染安得生耶诸病家子孙皆慙谢後遇疾者争欲就使君亲属固留养之始相慈爱合境呼为慈母迁并州刺史下车先至狱中露坐验问十余日决断咸尽方还受领新讼皆不立文案惟遣当直佐寮一人侧坐讯问或问未得情应暂入禁者公义即宿听事不还阁曰刺史无德导人尚令百姓繫於囹圄敢自安乎罪人闻之咸自款服有相讼者闾里父老遽相晓曰此小事何忍勤劳使君讼者往往两让而止时山东霖雨自陈汝至海皆苦水灾境内犬牙独无所损仁壽元年充扬州道黜陟大使豫章王暕恐其官寮犯法使人迎嘱公义公义惟曰不敢以有私及至皆无所纵舍暕衔之炀帝即位扬州长史王弘入为黄门郎因言公义之短竟去官吏人守阙诉冤相继不絶其後帝悟除为内史侍郎丁母忧未几起为司隸大夫检校右御卫武贲郎将从征至柳城郡卒

论曰俗吏之於刑狱虽雀角鼠牙辄亦托辞审慎淹留囹圄久者或至经年一人淹狱佐证皆不遑息便使耕桑者失其时工贾者失其业岂独受繫者幽忧於牢犴已哉公义下车百务未逮独皇皇於断遣滞狱仁心为质可以风矣

魏德深

魏德深弘农人为文帝挽郎累迁贵乡长为政清静不严而肃炀帝兴辽东之役徵税百端责成郡县於时王纲弛紊吏多赃贿所在徵敛人不堪命惟德深一县有无相通不竭其力所求皆给而百姓不扰及盗贼羣起武阳诸城多陷惟贵乡独全郡丞元宝藏受诏逐捕盗贼每战不利辄复徵发器械动以军法从事如是者数矣邻城营造皆聚工役於听事吏人督责昼夜喧嚣犹不能辨德深各问羣工以所欲任随便修营官府寂然恒若无事惟约束长吏所修不须过胜余县使百姓劳苦然百姓益自竭心常为诸县之最寻转馆陶长贵乡吏人闻之歔歔流涕语不成声及赴馆陶倾城送之号泣之声道路不絶既至馆陶阖境老幼皆如见其父母有猾人赵君实与元宝藏深相结前後令长无不受其指麾者自德深至君实屏处未尝辄敢出门逃窜之徒归来如市贵乡父老冒艰难诣阙请留德深诏许之馆陶父老复诣郡相讼以贵乡文书为诈郡不能决会持节使者至乃断从贵乡贵乡吏人歌呼满道馆陶衆庶合境悲泣因从而之贵乡者数百家宝藏深害其能及越王侗徵兵宝藏遂令德深率兵赴东都俄而

宝藏以武阳归李密德深所领皆武阳人每念亲戚辄出都门东向恸哭或谓之曰李密兵马近在金墉归易耳何自苦其人皆垂泣曰从魏明府来何忍弃去岂以道路艰阻哉其得人心如此後与贼战歿於阵贵乡馆陶人怀之不忘

论曰其政察察其人缺缺盖言苛切之政行则人益懈而事多隳观德深所以修办器械不绳督而功多其语益信德深所居见慕所去见思至使馆陶轻违其乡武阳忍弃其戚诗曰恺悌君子民之父母德深有焉

史传三编卷五十三

卷五十四

钦定四库全书

史传三编卷五十四

大学士朱轼撰

循吏传六

唐

李素立

李素立赵州高邑人仕武德初擢监察御史民犯法不及死高祖欲杀之素立谏曰三尺法天下所共有一动摇则人无所措手足方大业经始奈何輶轂下先弃刑书乎上嘉纳由是恩顾特异以亲丧解官起授七品清要有司拟雍州司户参军上曰要而不清复拟秘书郎上曰清而不要乃授侍御史贞观中转扬州大都督府司马初突厥铁勒部内附即其地为瀚海都护府诏素立领之於是阨泥熟别部数梗边素立以不足用兵遣使谕降夷人感其惠竞献马牛素立又不受乃开屯田立署次边人益畏威历太仆鸿胪卿累封高邑县侯出为绵州刺史永徽初徙蒲州将行还所余储乾於州齎家书就道会卒諡曰平

论曰刑书之铸道之衰也况复弃而不用是徒任一时之喜怒以制万姓之生死也素立諤諤一言高祖既嘉异之又从而优擢之唐室之兴不亦宜乎其御边戢兵以招携开屯以益备威恩并树瀚海为池厥功懋矣

薛大鼎

薛大鼎字重臣蒲州汾陰人隋时以父粹坐汉王谅党被诛大鼎亦流辰州用战功得还唐高祖入关大鼎谒见於龙门因说高祖军永丰仓就食传檄远近据天府示豪杰形势为拊背扼喉计高祖奇之授大将军府察非掾出为山南道副大使开屯田以实仓廩赵郡王孝恭讨辅公祐引为饶州道军师以功迁浩州刺史贞观初徙沧州无棣渠久厥塞大鼎浚治属之海商贾流行沧人歌曰新沟通舟楫利属沧海鱼盐至昔徒行今骋驷美哉薛公德滂被又疏长芦漳衡三渠泄污潦水不为害初唐兴承隋乱离剗祓荒荼始择用州刺史县令及太宗立下诏曰朕思天下事丙夜不安枕永惟治人之本莫重刺史故録姓名於屏风卧兴对之得才否状辄疏於下方以拟废置又诏内外官五品以上举任县令者以故官得其人民去愁叹是时郑德本在瀛州贾敦颐为冀州暨大鼎皆有治名河北号为铛脚刺史永徽中迁行荆州大都督长史卒諡曰恭

论曰守令之官虽古者都邑下土之职然所受寄实与邦君等重一吏失人辄一方受害是以愿治之主必以遴择守令为兢兢昔汉宣兴而龚黄辈出唐宗作而薛贾有声岂不以表端者无曲影源澄者无污流吏治清浊宁不由於上心哉宁不由於上心哉

贾敦颐

贾敦颐曹州冤句人性廉洁贞观中数历州刺史尝尽室入朝车马羸敝道上不知为刺史也久之为洛州司马以公累下狱太宗曰人孰无过吾去太甚者若悉绳以法虽子不得於父况臣得事其君乎遂原之徙瀛州刺史州濒滹沱滹二水岁溢溢坏室庐浸洳数百里敦颐为立堰水不能暴百姓利之时弟敦实为饶阳令与瀛接壤政清静吏民称美旧制大功之亲不连官独敦颐兄弟治行相高以故不徙永徽中迁洛州洛多豪右占田踰制敦颐举没三千余顷以赋贫民发奸擿伏下无能欺卒於官咸亨初敦实又为洛州长史以宽惠得人心洛阳令杨德干尚酷烈常杖杀人敦实喻之曰政在养人伤生过多虽能不足贵也德干为稍衰减始洛人为敦颐刻碑大市旁及敦实入为太子右庶子人复立碑其侧故号棠棣碑历怀州刺史有美迹永淳初致仕病笃子孙迎医敦实不肯见曰未闻良医能治老也卒年九十余

论曰富连阡陌而贫无立锥政之不均莫甚於此然自国不侯封地不井授而欲为计口赋田势必不行故自汉以来少知治体者无不以限田占田均田之制为急若仿古遗意定为之限更经界其田间水道以渐复沟洫之利庶国无甚贫之民而礼乐可兴矣

陈元光 珣

陈元光字廷炬光州固始人生而颖异博通经史年十三领乡荐第一总章二年父政为岭南行军总管镇绥安元光随入闽父卒代领其众会广寇陈谦连结诸蛮攻陷潮阳守帅不能制元光以轻骑讨平之永隆二年盗起攻南海边郡元光提兵入潮伐山开道潜袭寇垒俘获万计岭表悉平还军於漳事闻进正议大夫岭南行军总管垂拱二年上疏言七闽宜增为八请建一州漳潮间以控岭表驻刺史领其事朝议以元光父子久牧兹土蛮畏民怀令其兼秩领州遂建漳州漳浦郡邑於绥安地进怀化大将军世守刺史自别驾以下得自辟置元光复疏山林无贤而部曲子弟马仁等多干略请授为司马等职诏从之乃率仁等剪荆棘开邨落收散亡营农积粟兴建陶冶通商惠工奏立行台於四境不时巡理由是北距泉建南踰潮广东接岛屿西抵?抚方数千里无桴鼓之声先是葬父政於云霄山望气者指其莹域有王气元光亟徙之大溪峯後葬祖父母承重结庐守制三年帅事一付别驾许天正已而蛮寇复起於潮潜抵岳山元光帅轻骑讨之援兵後至为贼将蓝奉高所刃而卒时景云二年也百姓哀悼相与制服哭之事闻赠镇军大将军世有褒祀子珣

珣字朝佩自幼不羣从许天正受学万岁通天元年举明经及第授翰林承旨直学士及武后称制上疏乞归养使主漳州文学龙溪尹席宏聘主乡校乃辟书院於松洲与士民论说典礼是时州治初建俗固陋珣开引古义於风教多所裨益元光战没珣哀毁频絶庐於大峙原墓左每泣见血朝命以岭南多故令夺情代州事珣恳辞终丧先天元年释吉乃视州事开元三

年率武勇銜枚缘阻夜袭巢峒斩蓝奉高首级并俘余党迁州治於李灣川即今漳浦县治也为刺史十余年剪除顽梗训诲士民泽洽化行十九年登王维榜进士表辞封爵不允二十五年乞休复寻松洲别业聚徒教授天宝元年卒子酆孙谟世为刺史皆有贤名谟复徙州治於龙溪云

论曰元光承父政之後披荆棘剪草莱削平羣盗首辟漳州方数千里间始则无伏戎之警终则政教大行将略吏治可谓兼之矣珣当武后之朝疏请终养其高尚之志上薄云霄迨父死於贼诏代父任而必待终丧既终丧而即复父仇守漳二十年威惠懋着盖其生平所得於讲学者深矣

裴怀古

裴怀古壽州壽春人仪凤中上书阙下补下邳主簿频迁监察御史姚嵩反命怀古往辑之怀古申明诛赏归者日千计俄缚首恶遂定南方恒州浮屠为其徒所诬告坐祝诅不道武后命诛之怀古为申析后不听怀古曰法与天下画一臣岂得杀无辜以希盛旨哉即其人有不臣状臣何情寬之后意解得不诛阎知微之使突厥怀古实监其军突厥欲官之怀古不肯拜将杀之辞曰毁节以生母宁守节以死请就斩不避也遂囚军中既而得亡然素羸弱不能骑宛转山谷间仅达并州既还迁祠部员外郎姚嵩诸酋叩阙下愿得怀古镇安远夷拜姚州都督以疾辞始安贼欧阳倩衆数万剽没州县以怀古为桂州都督招慰讨擊使未踰岭逆以书谕祸福贼迎降自诉为吏所侵故反怀古知其诚欲示不疑以破其谋乃轻骑赴之或曰獠夷虽亲备之且不信奈何易之怀古曰忠信可通神明况裔人耶身至壁抚谕倩等大喜悉归所掠出降虽诸洞素翻覆者亦牵连根附岭外尽平徙相州刺史并州大都督长史吏民怀爱神龙中召为左羽林大将军未至官还为并州刺史而崔宣道代为长史并人知怀古还携扶老稚出迎而宣道亦野次怀古不欲厚媿宣道使人驱迎者而来者愈衆其得人心类如此俄转幽州都督善於绥怀两番将举落内属会以左威卫大将军召而孙佺伐之佺不知兵遂败其师未几卒官怀古清介审慎在幽州时韩琬以监察御史监军称其驭士信临财廉国名将云论曰怀古忠以抗北庭之招信以抚南獠之叛迹其守节定乱固慷慨英多人也而史乃称其羸弱不任骑其宛转山谷仅而获免也事同盛彦师及造壁纳降则与曹王皋相类彦师义士而皋才臣怀古实兼之矣

韦景骏

韦景骏京兆万年人中明经神龙中历肥乡令县北滨漳连年泛滥旧防虽峭以迫漕渠随决坏人苦之景骏相地势益南千步别筑鄣水至堤址辄去其北燥为腴田又废长桥维艚以梁其上功少费约後遂为法方河北饥身巡闾里劝人通有无教导抚循县民独免流散徙贵乡令有母子相讼者景骏曰令少不天常自痛尔幸有亲而忘孝耶教之不孚令之罪也因呜咽流涕付以孝经使习大义於是母子感悟请自新遂为孝子当时治有名者景骏与清漳令冯元淑临洺令杨茂谦三人景骏後数年为赵州长史道出肥乡民喜争奉酒食迎犒虽小儿亦与焉景骏曰方儿曹未生而吾去邑非有旧恩何故来对曰耆老为我言学庐馆舍桥鄣皆公

所治意公为古人今幸亲见所以来景骏为留终日後迁房州刺史州穷险有蛮风无学校好祀淫鬼景骏为诸生贡举通隘道作传舍罢祠房无名者景骏之治民求所以便之类如此转奉天令未行卒

论曰禹贡一篇无鄣水之法惟曰九泽既陂陂乃鄣也夫泽为止水鄣之可引为灌溉而不貽後灾若江河洪流未有鄣之而得资为永利者也然河水所经泛溢为害势又不得不出於鄣鄣之之方惟有远水为堤使骇涛之至绰有容纳之区庶堤防可保不至朝鄣而夕溃当七国时梁实滨河业已有堤而前志载其堤距河且数十里以知即不得已而为鄣亦断不宜与水争地也北之鄣水其性略似大河景骏鄣之益南千步其有见也夫

尹思贞

尹思贞京兆长安人以明经调隆州参军事属邑豪蒲氏骛肆不法州檄思贞按之撻其奸赃万计卒论死部人称庆迁明堂令以善政闻擢殿中少监检校洛州刺史会契丹孙万荣乱朔方震惊思贞循抚境内独无扰迁秋官侍郎忤张昌宗出为定州刺史召授司府少卿为侯知一副知一亦厉威严吏为语曰不畏侯卿杖祇畏尹卿笔神龙初擢大理卿雍人韦月将告武三思大逆中宗命斩之思贞固争乃决杖流岭南御史大夫李承嘉助三思以他事劾思贞思贞谓曰公为天子执法乃擅威福慢宪度谀附奸臣图不轨今将除忠良以自恣耶承嘉慙怒思贞竟出为青州刺史黜陟使路敬潜至部见绩蚕至岁四熟叹曰斯非善政致祥乎表言之睿宗立召授将作大匠仆射窦怀贞护作金仙玉真二观广调夫匠思贞数有损节怀贞让之答曰公辅臣也不能宣赞王化而土木是兴以媚上害下又听小人譖以廷辱士今不可事公矣乃拂衣去阖门待罪帝知之特诏视事怀贞诛拜御史大夫累迁工部尚书致仕开元四年卒年七十七諡曰简思贞前後为刺史十三郡其政皆以清最闻

论曰思贞责怀贞以媚上害下夫媚上未有不害下者也思贞正直不阿权宠故历试郡部所至有声洪范曰无虐?独而畏高明古之有猷有为有守者如是

倪若水

倪若水字子泉恒州藁城人擢进士第累迁右台监察御史黜陟剑南道绳举严允课第一开元初为中书舍人尚书右丞出为汴州刺史政清浄修孔子庙兴州县学庠劝生徒身为教诲风化兴行上遣中人捕鵒鵒溪 於南方若水上言农方田妇方蚕以此时捕奇禽怪羽为园籞之玩自江岭达京师水舟陆齎饲以鱼虫?稻道路之言不以贱人贵鸟望陛下耶上手诏褒答赐帛四十段悉放所玩撻中人罪时天下久平朝廷尊荣人重内任虽以冗官擢方面皆自谓下迁班景倩自扬州采访使入为大理少卿过州若水钱於郊顾左右曰班公是行若登仙吾恨不得为驺仆未几入为户部侍郎复拜右丞卒

论曰若水直言格非使百姓不被徵发之扰人主不招怨讟之声所全至大然君子循分输忠内外之任宁有择哉以若水之謇謇而犹云尔岂诚未能免俗抑愿出入禁闥拾遗左右与汲

黯之用心其致一耶

元结

元结字次山瀘州人父延祖再调春陵丞辄弃官去及安祿山反召结戒曰而曹逢世多故不得自安山林勉树名节无近羞辱及卒門人私謚曰太先生结少不羈稍长折节向学事元德秀成进士复举制科肃宗问天下士於国子司业苏源明源明荐结可用召詣京师问所欲言结上时议三篇授右金吾兵曹参军摄监察御史为山南西道节度参谋募义士於唐邓汝蔡降剧贼五千瘞战死露骸於泌南名曰哀丘帝将亲征史思明结言贼銳不可与争宜折以谋帝善之因命发宛叶军挫贼南锋结屯泌阳守险全十五城以功迁监察御史里行俄参山南东道来瑱府时有父母随子在军者结说瑱曰孝而仁者可与言忠信而勇者可以全义詎有责其忠信义勇而不劝之孝慈乎将士父母宜结以衣食瑱纳之瑱诛摄领府事会代宗立固辞侍亲归樊上授著作郎久之拜道州刺史初西原蛮掠居人数万去遗户裁四千结到官未五旬诸使调发符牒二百余函结以民困甚不忍加赋即上言臣州为贼焚破粮储屋宅男女牛马几尽今百姓十不一在耄孺骚离未有所安岭南诸州尚多寇盗守捉候望四十余屯一有不靖湖南且乱请免百姓所负租税及租庸使和市杂物十三万缗帝许之明年租庸使索上供十万缗结又奏岁正供外所率宜以时增减诏可结为民营舍给田免徭役流亡归者万余进容管经略使身谕蛮豪绥定八州民乐其教加左金吾卫将军罢还京师年五十卒论曰结有诗云去冬山贼来杀夺几无遗所愿见王官抚养以惠慈奈何重驱逐不使存活为安人天子命符节我所持州县忽乱亡得罪复是谁逋缓违诏令蒙责固其宜前贤重守分恶以祸福移亦云贵守官不爱能适时此结自叙在道时事也至心悬到惻然动人韩愈所谓作者非今士相去时已千其言有感触使我复辛酸者是诗之类也要结平生行事可谓仁心为质者矣

吴凑

吴凑濮州濮阳人章敬皇后弟也以后族赐官封凑固执谦畏辞尊就卑为检校宾客兼家令累进左金吾卫大将军甚见委信是时令狐彰田神功等继歿其下乘丧摇乱凑持节慰安汴滑裁所欲为奏各尽其情亦度朝廷可行者故军中驩附及上将诛元载顾左右无可与计召凑图之卒收载赐死於是王缙杨炎等皆当从坐凑言法有首从从不应死缙等由是得减死德宗初出为福建观察使以清勤称宰相窦参憾之数加毁短帝召验参言不实帝以此不直参改凑陕虢观察使擢领宣武节度使犹以为参所阻还为右金吾卫大将军贞元十四年夏大旱谷贵人流亡帝以过京兆尹韩皋罢之而以凑代皋凑为人强力劬俭未尝扰民上下爱向京师苦宫市强估取物有司附媚中官无敢争凑见便殿独陈其非便又言诸禁兵资课太繁宜有触省帝皆可之初府中以凑贵戚子疑其不谙簿领每伺其将出遮凑取决幸仓卒得容欺凑叩鞍一视指撚尽中其弊衆乃惊服不意凑精於裁遣如此僚史非大过不榜责召至廷诘服原之其下传相训勗举无稽事文敬太子义章公主之丧帝悼念命厚葬之凑乘间极争或劝止凑凑曰上明睿忧劳四海不以所鍾爱而疲民以逞也顾左右钳噤不言耳吾反复启寤幸一听之则民受赐不少矣进兵部尚书及属病不内医巫不尝药家人泣请凑曰吾以

庸谨起田亩位三品显仕四十年年七十一尚何求自古外戚令终者可数吾得以天年归侍先人足矣遂卒諡曰成先是街衢多蒔榆湊以榆非人所?玩令易以槐及槐成而湊已亡行人指树怀之其任中外未尝以罪罢为世外戚表云

论曰湊之为京兆上则革朝政之非下则化羣吏之黠至使後之人追思其德几与甘棠等烈可谓救时良牧矣其鉴古外戚之祸顺化以尽靡惑於生死之际卓识定力蔚为世表岂但铮铮於铁中已哉

崔衍

崔衍字着深州安平人父伦有孝行安禄山反伦陷於贼不污伪官间使子弟表贼事宝应中以右庶子使吐蕃为吐蕃所留阏八岁终不屈乃听还代宗见之为感动呜咽衍天宝末擢明经调富平尉继母李氏不慈伦自吐蕃归李故敝衣以见伦问故曰衍不吾给伦怒将鞭衍衍涕泣无所陈伦弟殷趋白其实伦乃悟由是譖无所入调清源令劝民力田怀附流亡观察使马燧表其能徙美原历苏虢二州虢居陕华间赋数倍入衍以为太重将白之时裴延龄领度支方务聚敛私止衍衍不聽遂奏州部多岩田又当邮传剧道属岁无秋民举流亡不蠲减租额人无生理臣见长吏之患在因循不以闻不患陛下不忧恤也陛下拔臣大州宁欲使视民困而顾望不言哉德宗公其言为诏度支减赋迁宣歙池观察使简静为百姓所怀幕府奏聘皆有名士後多显於时年六十九卒衍俭约畏法室无妾媵禄入周於亲族葬埋嫁娶倚以济者数十家及卒不能藏丧朝赐赙帛三百段米粟称之先是天下以进奉结主恩州藏耗竭韦臯刘赞裴肃为之倡赞旧贡金锡凡十八品皆倍直市於州民匱多逃去及赞死衍代悉蠲革之居十年嗇用度府库充衍路应为观察使以衍有惠在民言状元和元年诏书褒美赐一子官諡曰懿

论曰延龄以聚敛逢主之欲虽忠贤如陆贄加以托契於艰难一与之忤贬黜以死衍乃能正言悟主为虢人轻倍入之赋而延龄不得沮焉其蠲革例贡金锡不以进奉结主恩所自位置为益高矣

吕元膺

吕元膺字景夫郢州东平人姿仪瓌秀有器识始游京师谒齐映映叹曰吾不及识娄【师德】郝【处俊】殆斯人类乎策贤良高第累官右司员外郎出为蕲州刺史尝録囚囚或自白父母在以岁旦不得省为恨因而泣下元膺恻然为戒还期悉释械归之吏白不可元膺曰吾以信待人人岂我违果如期而反自是羣盜感媿率避境去元和中累擢给事中俄为同州刺史既谢上问政事所对详明上谓宰相曰元膺直气谠言宜留左右奈何出之李藩裴垪皆谢曰陛下及此实宗社无疆之休乃留元膺给事左右未几进御史中丞拜鄂岳观察使尝夜登城守者不听左右曰中丞也对曰夜不可辨乃还明日擢守者为大将入拜尚书左丞时度支使潘孟阳太府卿王遂交恶有诏各予别除元膺上其诏请明枉直以显褒贬又江西观察使裴堪按?州刺史李将顺受赇不覆讯而贬元膺请遣御史按问宰相不能夺其执法坚正皆此

类选拜东都留守东都有李师道留邸邸兵与山棚谋窃发事觉元膺禽破之始盗发都人震恐守兵弱不足恃元膺坐城门指纵部分意气闲舒人赖以安东都西南通邓虢川谷旷深人业射猎不事农迁徙无常率趯悍善鬪号曰山棚元膺始募为山河子弟使卫宫城以羈縻之改河中节度使时方镇多姑息独元膺秉政自监军及中人往来者无不严惮入拜吏部侍郎正色立朝有台宰望处事裁宜人服其有体以疾改太子宾客居官始终无訾年七十二卒

论曰元膺临事识定而才优庶几古之重臣其入为执法出当保厘大抵以直受知然守者一言之正辄擢大将以此知元膺之能受言也惟能受言者能献言元膺之为人其高概略可想见云

韦丹

韦丹字文明京兆万年人早孤从外祖顏真卿学擢明经调安县令复举五经高第历咸阳尉顺宗为太子召为舍人新罗国君死诏拜司封郎中往吊故事使外国赐州县十官卖以取货号私覲官丹曰使外国不足於货宜上请安有贸官受钱耶即具疏所宜费上命有司与之因着令未行而新罗立君死还为容州刺史教民耕织止惰游兴学校民贫自鬻者赎归之禁吏不得掠为隶始筑州城屯田二十四所教种茶麦仁化大行迁河南少尹未至徙义成军司马以谏议大夫召有直名刘辟反议者欲释不诛丹以为法废人慢当济以威今不诛辟则可使者惟两京耳宪宗褒美之会辟围梓州乃授丹剑南东川节度使代李康丹至汉中上言康守方尽力不可易召还议蜀事及辟去梓丹卒以让高崇文已而拜晋慈隰观察使阅岁复自陈所治非要害地不足张职为国家费不如属之河东帝从之徙为江南西道观察使丹计口受俸委余於官罢八州冗食者收其财始民不知为瓦屋皆草茨竹椽久燥则戛而焚丹召工教为陶聚材於塲度其费为估不取赢利人能为屋者受材瓦於官免半赋徐取其偿逃未复者官为为之贫不能者畀以财身往劝督置南北市为营以舍军岁中旱募人就功厚与直给其食为衢南北夹两营东西七里以废仓为亲廨马息不死筑堤扞江长十二里窰以疏涨凡为陂塘五百九十八所灌田万二千顷有吏主仓十年丹覆其粮亡三千斛丹曰吏岂自费耶籍其家尽得文记乃权吏所夺丹召诸吏曰若恃权取於仓罪也与若期一月还之皆顿首谢及期无敢违有卒违令当死丹释不诛卒去乃上书告丹不法诏丹解官待辨会卒年五十八及验卒所告皆不实丹治状愈明後宣宗读元和实録见丹政绩他日问宰相元和时治民孰第一周墀曰臣尝守江西韦丹有大功德歿四十年老幼思之乃诏观察使上丹功状命刻功於碑顷之上复问墀丹有子否墀以宙对上拜为侍御史累官为太原节度卢均副是时回鹘已破诸部剽杀塞下钩欲得重吏视边宙请往乃自定襄鴈门五原絶武州塞略云中徧见酋豪视亭障守卒增其廩约吏不得擅侵诸戎犯者死於是三部六蕃诸种皆信悦召拜吏部郎中出为永州刺史州方灾歉宙斥刺史供用钱九十余万为市粮饷书制律并种植为生之宜户给之使民知避法自殖州负岭转饷艰险每饥人辄莩死宙始筑常平仓收羨余谷以待乏罢冗役九百四十四员县旧置吏督赋宙听民自输家十相保赋入常先期农民贫多无牛宙为置社二十家月会钱若干探名得者先市牛以是为準久之牛不乏立学官取仕家子弟十五人充之又为俚民具条约使略知昏礼俚俗大改还为大理少卿历迁加检校尚书左仆射同中书门下平章事咸通中卒

论曰昔公刘彻田为粮涉渭取锻凡所以使民宅尔宅畋尔田故其在诗曰于时言言于时语语言其一时民气康乐安居作业而暇豫也丹之为政其勤几与公刘等子宙继之政绩亦殊有足多者再世善治伟矣

崔戎

崔戎字可大博陵安平人举明经补不学校书郎宪宗称其才累官谏议大夫会成都有蛮乱诏戎持节为剑南宣抚使戎奏罢税外姜芋钱绥招流亡凡废若置公私莫不便之还拜给事中出为华州刺史吏以故事置钱万缗为刺史用戎不取及徙兗海沂密观察使乃召吏籍所置钱享军曰吾重矫激以夸後人也将行吏民拥留塞道至遮诏使请勾戎於天子戎乃以夜单骑遁去民犹追之不及乃止既至兗鉏灭奸吏十余辈民大悦岁余卒年五十五赠礼部尚书

论曰书称有猷有为有守猷生於智为生於才而守则其本行也本行不坚而舞才用智以愚其下君子讥焉为其所猷为非古之所谓猷为也然或务赫赫之声而姑托皎皎之节则容以矫激一时者留貽後弊此其为守母亦异於古者所云耶戎既不苟得又不苟廉为善不近名以此得吏民心其贤於俗吏远矣

卢坦

卢坦字保衡河南洛阳人性劲直郑滑节度使李复表为判官有善笛者为诸将所悦请於复将任以重职坦笑曰大将积劳乃得右职奈何自薄欲与吹笛年少同列耶诸将皆慙谢复病甚监军薛盈珍内甲士五百於牙中封府库举军大恐坦劝止之军乃安及复卒姚南仲代之南仲书生盈珍易之坦私谓人曰姚大夫外柔中刚监军若侵之必不受我留恐及祸遂从复丧归东都为壽安令盈珍果与南仲不相中幕僚多黜死者河南机织未就而赋已及限坦请少展赋期府不听坦乃敕县人曰第输勿顾限违限不过罚令俸耳由是知名入为刑部郎中兼侍御史迁中丞上尝因赦令禁诸道毋进奉而山南节度使柳晟浙西观察使阎济美复有所献坦劾奏之上曰二人所献皆家财朕已原之不可失信坦曰布大信者赦令也今二臣违诏陛下奈何以小信失大信乎上曰朕既受之奈何坦曰出归有司以明陛下之德上从之以忤裴均罢为左庶子数月出为宣歙池观察使初刘辟壻苏强坐诛强兄弘宦於晋州亦自免去坦以弘有才行强从辟时相距三千里宜不通谋奏署判官上曰使强不诛尚録其才况其兄耶时江淮旱谷踊贵或请抑其价坦曰所部地狭谷来它州若直贱谷不至矣不如任之既而商米至市估遂平再迁户部侍郎判度支表韩重华为代北水运使列屯益兵广开废田岁收粟二十万石河毁西受降城宰相李吉甫议徙天德坦以为城当磧口美水丰草边鄣所利若避河流不过退数里足矣天德地壤瘠瘠烽候无所统接若果徙是无故蹙地二百里也陛下奈何省一时费坠万世策耶吉甫不悦出坦为东川节度使卒徙天德师人怨杀城使燕重旰覆其家坦治东川尽蠲山泽盐井榷率之籍及吴少诚诛诏坦使兵二千屯安州坦每朔望辄使人问屯兵家属有疾病予医药屯兵皆感慰无逃还者元和十二年卒年六十九

论曰重华之屯政募人为十五屯屯置百三十人而种百顷各就高为堡东起振武西极中受降城出入河山之际六百余里屯堡相望寇来不能为暴人得肆耕其中岁果倍收省度支钱千三百万後复请益开田合五千顷法用人七千欲令吏於无事时督习弓矢为战守备庶几兵农兼事务一两得韩愈以为输边之费不可胜计中国坐耗而边吏恒苦食不继若尽从重华之策利难可一二遽数诚哉是言也後世谋所以实塞下计莫便於此者矣是以中唐以还陆贄建议於前韩愈深筹於後可不谓知政务者乎重华之用坦实举之坦吏绩有声立朝侃侃又表重华以兴大利其人良有足多者故特録焉

崔郾

崔郾字广略贝州武城人姿仪伟秀人望而慕之然不可狎也中进士第补集贤校书郎累迁吏部员外郎每拟吏亲挟格褒黜必当寒远无留才三迁谏议大夫穆宗立荒於游畋内酣荡昕曙不能朝郾进曰十一圣之功德四海之大万国之衆其治其乱系於陛下自山以东百城地千里昨日得之今日失之西望戎垒距宗庙十舍百姓憔悴畜积无有愿陛下亲政事以幸天下上动容慰谢迁给事中敬宗初拜翰林侍讲学士旋进中书舍人谢曰陛下使臣侍讲历半载不一问经义臣无功不足副厚恩帝慙曰少间当亲益郾乃与高仲类六经要言为十篇上之以便观省迁礼部侍郎出为虢州观察使先是上供财乏则夺吏俸助输郾曰吏不能贍私安暇恤民以府常费代之改鄂岳等州观察使自蔡人叛鄂岳常苦兵江湖盗贼显行郾修治铠仗造蒙冲驶追穷蹶上下千里岁中悉捕平复观察濶西迁检校礼部尚书卒於官謚曰德郾不藏貲有余辄周给亲旧为治其昏丧居家怡然子弟自化室处庠陋无步庑至霖淖则盖而履以就外位治虢以寛经月不笞一人及涖鄂则严法峻诛一不贷或问其故曰虢土瘠而民劳吾抚之不暇犹苦其扰鄂土沃民剽杂以夷俗非用威莫能治政所以贵知变者也闻者服焉

论曰周礼之论刑典平国乱国其轻重顿殊郾以儒臣出试外任宜其明於政术知所通变也唐自穆敬以後时事益非矣郾独款款效忠婉而有直体龟勉从政不敢告劳可谓靖共尔位君子者欵

史传三编卷五十四

卷五十五

<史部,传记类,总录之属,史传三编

钦定四库全书

史传三编卷五十五

大学士朱 轼撰

循吏传七

宋

乔维岳

乔维岳字伯周陈州南顿人治三传仕周为平舆令入宋历知州军陈洪进纳土朝廷议择能臣关掌泉州郡事而维岳以选为通判会仙游莆田盗起衆至十余万攻城城守兵裁三千势甚急监军何承矩等欲屠其民燔府库以遁维岳独抗议不可承矩乃复坚守既而救至围解竟活泉人诏褒之擢淮南转运使淮流水湍运舟多覆或时值涸重载皆卸粮而过纲卒缘此为奸维岳始刵二斗门於西河第三堰门为设悬以积水水平乃起悬泄之建横桥岸上筑土累石以牢其址自是弊尽革运舟往来无滞泗州狱掾悞断囚至死维岳按部至泗将抵掾罪掾有母年八十余自诉伏法即母不能活维岳悯之乃曰它日朝制按问前事者可委罪於转运使掾如其言获免而维岳坐赎金百二十斤罢使职权知楚州及真宗以寿王尹京精择府僚以维岳为推官或言维岳在淮南决狱不平有知其事者白其实太宗尤加赏异京府事繁维岳评处详敏真宗称其明干及践祚命与毕士安权知开封府拜给事中知审官院维岳明习吏事有治剧才故所至着绩其後以年衰乞外特授海州刺史历苏寿二州咸平四年卒年七十六论曰冯异之入关中光武敕以平定安集曹彬之下江南艺祖戒勿妄杀兴王之所以覆天下其用心固如此洪进率泉之民而纳土泉之民非尝有贰心也以它警而遽议屠戮虽秦政项籍之暴不及此倘非维岳一言所伤於宋室仁厚之气岂少哉

周渭

周渭字得臣昭州恭城人幼孤力学值刘鋹据五岭赋重政繁渭率乡人避地零陵阻贼复还则庐舍皆烬矣遂弃妻子奔道州又为盗所袭乃脱身北走建隆初至京师上书言时务召试赐同进士补白马主簿县大吏犯法渭即斩之上奇其才擢右赞善大夫时魏帅符彦卿专恣朝廷选常参官强干者涖其属邑由是以渭知永济县彦卿郊迎渭揖於马上就馆始与相见略不降屈乾德中通判兴州置口砦监军敖狠纵下为暴渭驰谕以祸福斩其军校衆皆慑服

迁知棣州殿直傅延翰为监军谋作乱走契丹渭闻即擒之械送阙下鞫得实斩於西市渭在郡以简肃称及太平兴国二年擢广南转运副使吏民送者遮道初渭走中原时其妻莫荃及二子皆留恭城荃年尚少父母欲嫁之荃泣誓曰渭非久困者今违难必能自奋於是亲蚕绩以给朝夕及开宝三年广南平至是而渭始归则二子皆已毕娶矣凡历二十六年时人以为美谈渭到官即奏除刘鋹时税算之繁者重定田赋兴学校属有事交址主将无功败卒二人先逸至邕夺民钱渭捕斩之後至者悉令解甲以入讫无敢犯复移书交址谕以威信交址应时入贡在岭南六年徙知扬州累迁益州转运使坐从子累黜为彰信军节度副使咸平二年真宗闻其清节将复召用诏下而卒年七十七贫不能葬上悯之赙钱十万以其子建平为承氏主簿

论曰汉孝武时罔密文峻吏道杂而多端故太史称非武健严酷不能胜任有激乎其言之也渭数用斩击可谓武健然严而不酷者以生道杀之也宋以宽大开国而除鋹苛赋必待於渭诗曰维桑与梓必共敬止渭之芘厥桑梓者大矣

张纶

张纶字公信颍州汝陰人倜傥任气以殿直从讨王均於蜀寇数百已降复叛使纶击之纶报曰此穷寇急之则生患不如谕以向背从之果降辰州洞蛮常内寇以纶知辰州纶筑蓬山驿路贼不得通乃遁及纶去州曹玮表留之不可蛮复扰乃复徙为辰澧等州安抚使蛮则复定久之除江淮制置发运副使时盐课大亏纶奏除通泰楚三州盐户宿负官助其器用盐入优与之直由是岁增课数十万复置场於杭秀海三州岁入课百余万居二岁增上供米八十万疏五渠道太湖入於海复租米六十万开长芦西河以避覆舟之患又於高邮北筑漕河堤旁镗巨石为十?以泄横流凡二百里泰州扞海堰延袤百五十里久废不治海涛冒民田纶议修复论者难之恐涛患息而潦患兴纶曰涛之患十九潦之患十一获多而亡少不亦可乎凡三表请自临役卒成堰复逋户二千六百居淮南六年累迁文思使昭州刺史历秦瀛沧乾颍川刺史卒纶有材略所至兴利除害为人怨喜施子在江淮见漕卒冻馁多道死叹曰此有司之过非所以体上仁也推奉钱市絮襦千数衣其不能自存者

论曰淮徐地洼而泰尤居下游海口宜使深通故修海堰论者虑以致潦然潦之为害水消即田复海潮所冒田数岁废故纶以为潦患小而涛患大也自大河南徙淮既挟黄而多淤淮黄出海之处复有海堰则洪泽常苦水泛是以明潘季驯为四十里天然减水坝以杀洪泽之涨今之六坝是也坝所减水实漫高邮兴化以达於海势不能无淹浸若於六坝之下出海之上各为广疏川渠以走漫流斯潦患亦减矣

李允则

李允则字垂范并州孟人太平兴国间始置榷塲於静戎军以允则典其事其後累迁知潭州真宗谓曰朕在南衙毕士安尝道卿家世今以湖南属卿初马氏敛人出绢谓之地税潘美定湖南计屋输绢谓之屋税营田户给牛岁输米四斛牛死犹输谓之枯骨税而民输茶始以九

斤为一大斤後益至三十五斤允则请除三税而定茶以十三斤半为制民大便之湖湘多山田可艺粟民惰不耕允则令月所给马刍皆输本色由是山田尽垦值饥发廩贱糶又募饥民隸军籍得万人顷之转运使欲发所募御邵州蛮允则曰今蛮不扰无因益戍是啓边患也且兵皆新募未任出戍不听陈尧叟上其治状上召对叹曰毕士安不谬知人者迁知沧州允则濬浮阳湖葺营垒官舍问又穿井未几契丹来攻老幼皆入保而水不乏且斲冰以代炮契丹解去上复召劳曰顷有言濬井葺屋为劳民者及契丹至始知善为备也转镇定高阳三路行营兵马都监自陈短於武艺不足以当边剧上曰卿第为我运筹策不必当矢石也久之擢河北安抚知雄州时河北既罢兵而允则治垒不辍契丹主以为嫌其相曰李安抚长者不足疑既而有诏诘之允则曰甫通好不即完治恐它日颓圯因废边守患不可测上以为然始筑关城以护瓮城属之大城又取材西山大为仓廩营舍教民陶瓦甃标里閤置廊市邸舍水磴城悉累甃环以沟塹广阎承翰所修屯田架石桥构亭榭列堤道以通安肃广信顺安军岁修禊事召界河战棹为竞渡以潜寓水战州北旧多设陷马坑起楼城上为斥堠望可十里允则曰南北已讲安用此命彻楼夷坑而为诸军园圃浚井疏洫列畦陇筑短垣纵横其中植之荆棘地以益阻复因治坊巷徙浮图於北原上登望乃三十里命境有隙地悉种榆已而榆满塞下顾谓僚佐曰此步兵之地不利骑战岂独资屋材耶州有椎塲禁通异物而逻获契丹人所易珉玉带允则曰此以我无用易彼有用也纵不治云翼卒亡入契丹允则移文督还契丹报以不知所在允则曰在某所契丹骇即归卒允则遂斩以徇天禧间徙知镇潞二州仁宗立领康州防御使天圣六年卒允则不事威仪间或步出遇民有可语者延坐咨询以是洞知人情讼事无大小一讯立断善抚士卒皆得其用盗发辄获人莫知所由身无兼衣食无重羞不畜资财在河北二十余年方略施設後人莫之敢隳至与契丹国信往来费用仪式多允则所裁定云

论曰允则之为治颇以智术济其才用当在雄时所兴举率以便民也而边防益固其器干筹略几为张咏之亚矣古所称折冲御侮之才爪牙干城之选若允则者足以当之

凌策

凌策字子奇宣州涇人世给事州县策独厉志好学雍熙二年举进士累官通判定州李顺之乱选官多不乐川陕惟策自陈常涖蜀境谙其俗即命知蜀州先是岭南输香药邮置万人负担抵京师甚以烦役为患及策入为户部都官乃请陆运至南安汎舟而北役卒止八百人大省转送之费策为人强干後以选代卢之翰任广州广英路自吉河至板步二百里盛夏常苦瘴行旅死者十八九策由英州大源洞伐山开道直抵曲江人以为便代还知青州荐历内任复出知扬州属江淮岁饥盗起使策领淮西路安抚使洪州水复转为江南转运使饶州产金旧时禁商市鬻犯者逮繫满狱策请纵民贩市官责其算人甚赖之寻知益州策勤吏职处事精审所至有治迹久之代还真宗尝谓王旦曰策有才用治蜀敏而能断旦曰策性淳质和临事强济上深然之方加向用会病命知通进银台司兼门下拜给事中权御史中丞逾年疾甚复求知益州迁工部侍郎从其请天禧二年卒年六十二

论曰盘根别利者功名之士也险易一心者纯臣之节也李顺小蠹而选官已缩颈曳踵而不

欲前况事变有十百於是者又安望其能负大重为国分忧哉策之自请涖蜀志节已见其才绩验白也宜哉

陈贯

陈贯字仲通先相州人徙河阳早岁倜傥数上疏言边事及举进士真宗识其名擢高第累官知卫州涇州督察盗贼禁戢不肖子弟簿书筦库赋租出入皆亲检核尝谓僚属曰视县官物如已物容有奸乎州人惮其严擢利州路转运使出职田粟且帅富民计口占粟而发其余以赈岁饥及为三司盐铁判官领河北转运使请疏徐鲍曹易四水以兴屯田後迁刑部郎中直昭文馆知相州还朝卒贯喜谈兵咸平中大将杨琼王荣丧师贯上言曰前日不斩傅潜张昭允使琼辈畏死不畏法请自今合战而奔者主校皆斩大将战死裨校无伤而还与奔军同军?城围别部力足救而不至者以逗留论上嘉纳之又尝上形势选将练兵三论其论选将略谓昔李汉超守瀛州契丹不敢窥关南尺寸地今将帅大抵用恩泽进卒与敌遇方略何从而出论练兵略谓禁旅恬於休息久不识战请募土人隸本军籍丁民为府兵使北扞契丹西扞夏人敌之情伪地之险易彼皆素知可不战而屈人之兵又尝着兵略世多称之论曰宋鉴藩镇之祸万里遣戍虽无尾大不掉之患而国势遂弱古之为兵者同伍之士无非同井之人故夜战声相闻昼战目相识而情足以相死後世兵制非古至唐府兵法弛遂以大弊故韩愈与柳公绰论用土兵其利有三饷馈不烦运挽一也乡里自相爱护二也形势素属谙委三也贯议练兵意与愈同苏轼之定军制於历代利病略备矣至措置之规所见犹未及此

陈希亮

陈希亮字公弼眉州人幼孤好学年十六兄使治息钱希亮召诸贷者悉焚其券而去从师卒成进士天圣中知长沙县僧海印者出入章献皇后家与诸贵人交通恃势横恣民莫敢正视希亮捕置诸法一县大耸徙鄆县老吏曹腆侮法以希亮年少易之希亮视事首得其罪腆叩头愿自新乃戒而舍之卒为善吏有巫岁敛民财以祭诡言不祭即有火灾希亮禁之民不敢犯火亦不作毁淫祠数百区勒巫为农者七十余家及迁太常博士父老送之无不泣下後除开封府司録司事福胜?火官欲更造时陕西方用兵希亮请以其费馈军诏罢其役久之上欲以为御史会外戚沈元吉以奸盗杀人希亮一问得实元吉自惊仆死坐是为御史所劾辞连诸掾吏希亮乃曰杀此贼者独我耳遂引罪坐废期年京西盗起富弼荐希亮可用起知房州州素无备希亮以牢城卒杂山河户合数百人日夜部勒声振山南殿侍雷甲不能戢士所至为暴将入境希亮勒兵拒之命持满无得发士皆植立如偶人甲射之不动乃下马拜请死吏皆欲斩甲希亮独治为暴者十余人而使甲捕盗自赎初有言华陰张元走夏州为元昊谋臣者诏徙元族百余口於房饥寒且死希亮曰元事虚实不可知使诚有之元终不顾家也况此其疎属乎密奏释之其後代还复请郡自效出为宿州希亮为人清劲寡欲不假人以色自王公贵人皆严惮之见义勇为不计祸福所至奸民猾吏易心改行不改者必诛然出於仁恕严而不残皇佑元年移滑州入对仁宗劳之曰知卿疾恶无愆沈氏子事及滑河溢希亮发禁兵扞之自庀於当决处吏民更谏坚卧不动水亦竟去人比之王尊云是岁宛句盗起仁宗以为忧?吏才於执政执政未及对仁宗遽曰朕得之矣即以希亮为曹州不逾月悉擒其党淮南饥

复以希亮为安抚转运使先是转运使调里胥米而蠲其役凡三十万石号折役米米以故翔贵希亮至除之且表其弊旁郡遂得竝除久之徙庐州虎翼军士屯寿春者尝以谋叛诛余不反者数百人悉迁於庐常自疑一日有窃入府舍将不利於希亮者希亮获之笑曰此必醉耳贷而流之尽以其余给左右使令或以守仓库人为之惧希亮益加亲信皆感德指心誓为希亮死累迁判三司户部勾院三司簿书自天禧以来积滞者以百万计希亮日夜课吏凡九月勾决殆尽复以请外出为京西转运使石塘役兵周元叛希亮闻即轻骑出按吏请以兵从不许贼二十四人道遇希亮见其轻出意色闲和不能测遂相与列诉道周希亮徐问所苦顾命一老兵押付叶县需後令既而令曰诸已自首皆无罪顾首谋者谁也衆不敢隐因得元遂斩以徇余遣赴役如初转京东转运使上章请老移知凤翔凤翔仓粟支十二年主者以腐败为忧适岁俭希亮发十二万石以贷贫民及秋熟以新易旧官民皆便于闾使者入朝过秦州经畧使享以客礼使者骄甚纵其徒坏传舍入市掠饮食民户皆昼闭始希亮判三司时尝接伴契丹使知使者暴皆译教之痛绳译以法使者不敢动至是复使持符告译曰入吾境有秋毫不如法吾即斩若使者至罗拜庭下命坐於廊饮食之护出其境无一人譁者英宗立迁太常少卿求去不已出分司西京未几致仕年六十四卒

论曰语云见义不为无勇也希亮之奋扬猛起遇事风生可谓勇矣迹其折奸靖乱智略闲整故当时以比王尊然至於机决密理希亮殆犹过之

赵尚宽

赵尚宽字济之河南人为政兴利除害整有条理知平阳县时邻邑有逸囚将犯境尚宽趣尉出捕曰彼不意我至易败也亟往毋使散漫且为害尉既出复遣徼巡兵踵其後悉获之徙知忠州穷治畜蛊大革其俗以考课第一知唐州唐素沃壤经乱土旷民稀议者欲废为邑尚宽曰土旷可益垦辟民稀可益招徠何废郡之有乃按图记得汉召信臣陂渠故迹益发卒疏三陂一渠溉田万余顷又教民自为支渠转相浸灌四方之民来者云布尚宽复为计口授田贷钱使买耕牛比三年榛莽复为膏腴增户累万尚宽勤於农政治有异等之效三司使包拯言状仁宗褒焉後徙同宿二州河中神勇卒苦大校贪虐匿名告变尚宽焚之曰妄言耳已而奏黜大校分诸卒隸他营晏若无事尚宽去唐後中山高赋继之益作陂堰募两河流民使耕作田日加辟户日益衆朝廷推功尚宽以为直龙图阁知梓州积官至司农卿卒

论曰冉子以政事之才称於孔门所自程效亦曰三年足民而已尚宽之治唐劝课惟勤遂等烈於召父其处告匿事尤为善持大体云

仇愈

仇愈字泰然益都人大观初成进士授邠州司法历邓城武陟令属燕山之役调兵数十万诸将往往纵卒掠物愈於军需率先期趣备申严约束故馈饷毕给而民不扰调高密丞摄县事剖决如流事无淹夕有杨盖者县猾吏也暴其罪黥之民大悦服及州召摄司录民万余遮邀於道拥以归靡天方寒燃火警守达旦愈由它道乃得去既而民数千人经向州牙复夺以归

其得民如此莱密间盗起羣党戒毋犯忿高密以安久之擢考功员外时仕者宛转兵间多失告牒铨部亡案籍愬丐者真伪相错忿既为考核复责保识遂用为例及刘豫子麟以金兵至民情汹汹忿适以淮西宣抚知庐州统制张琦乘危将驱民南走拥甲士数千突入胁忿左右皆惊溃忿徐谓曰若辈无守土责吾当以死殉国寇未至而逃人何赖焉坚不为动琦等错愕遽散人心遂定已而金兵出没近境忿求援於宣抚司又遣子赴朝告急救皆不至宣抚司既不能进援遂令焚积聚弃兵退保於是淮甸喧言朝廷将弃淮士志衰沮适亲征诏至忿乃揭示诏语读者皆霑涕思奋监押阎仅死於贼余卒归忿忿帑竭无以充赏惟引班坐饮食慰劳之然衆感励倍於厚犒因募庐寿兵数百以益乡兵出奇直抵寿春三战皆捷敌走渡淮进复寿春俄而麟复至合肥谍言乌珠为殿人心怖骇会牛皐救至皐素勇所向披靡敌散复集者三皐副徐庆坠马皐手刺数人免胄大呼曰我牛皐也尝四败乌珠可来决死寇畏其名遂自溃皐竟掖庆以免初金人围濠不下乃悉衆向淮东是时张浚视师金陵亦檄忿度宜为弃守计忿以为帅臣任一路之责虽残破之余兵食不给然义当死守若委城去使金人遂有淮西治兵舰於巢湖必为朝廷忧力陈不可且以策说浚曰金重兵在淮东师老食匮若以精兵二万一自寿春一自汉上径趋旧京当不战而退继以大军尾击蔑有不济浚虽不用其计然忿竟全数州以功加徽猷阁待制逾年宣抚司始遣王德来救德谓其伍曰方事急吾属无一人渡江者今何面目见仇公耶德麾下见忿无不以手加额顷之改濠东宣抚使知明州挫豪强獎良善按治狱吏不少贷岁饥发官储损其直民无死徙寻进直学士安抚湖南至则禁盗铸趣使归农作物价既平商贾遂通数月加宝文阁学士为陕西转运使时秦桧倡和金人归疆忿力陈非策固辞不行桧恶其异已落职全州居住及金人复陷所归郡邑如忿言复起知平江府忿言於上曰我军已习战非复昔比故刘琦能以少击衆若乘已振之势鼓行而前中原可传檄定上嘉之以言奉祠去积官至左朝散大夫卒忿性至孝母没时方崎岖转徙居丧尽礼朝议起之不就平生居官无所附丽初令邓城邑子范宗尹以文谒忿许为公辅器及宗尹为相当国忿未尝私见在明州欲荐一幕官问曰君日费几何对曰二千忿惊曰吾为郡守费不至此所费既多安得不贪遂止其端方介特多此类

论曰忿在庐以进为守卒完淮甸复寿春以为长江外障其陈兵计亦皆中肯要其所长则以厚得民心衆共欣戴故张琦不敢贼刘麟不能破不然以千百之卒保弹丸之地浮寄孤悬虬蟄无援亦安能战胜守固为国长城哉

李璆

李璆字西美汴人登政和进士时房州榷茶输逾旧额贫民被系者以百计及璆知州事即日尽释之宣和三年朝议取燕璆闻之曰百辟卿士一倡羣和国家安危其几在是遂上疏切諫不省及燕平责监英州清溪镇逾年赦还为郎寻试中书舍人元佑名臣子孙久被废锢宰相方倡绍述之议莫敢以为言璆独建言请宽之而宦者谭桢坐丧师废俄将复用璆不肯书行会山东盗起河北无粮军士汹汹璆复条上十事卒忤大臣意免官至绍兴间乃起知吉州江西兵素剽悍璆始视事即有相挺为乱者璆捕诛首谋抚循其余大布恩信境内遂安累迁四州安抚制置使三江旧有堰灌田百万顷久废弗修璆率都刺史合力修复大获其利岁饥发仓赈活无虑百万家治蜀之政多可纪蜀人感之论曰宋宣和间政蛊於上而兵兴於下乱象

已成徒以一时善类斥逐几尽故正言不得亟闻璆以小臣独慨然欲为国家寢兵止乱雪羣正之枉以开大来之渐忠矣绍兴嗣运不复收召羣策以此弃璆於外不使补阙殿陛之间而仅以吏绩显惜哉

陈规

陈规字元则密州安邱人靖康末为安陆令金人入围京师规以兵勤王道梗乃还时镇海节度刘延庆为金人所杀所部祝进王在去为寇攻德安府守弃城遁父老请规摄守事再拒却之建炎初事闻即以规知德安府又连破李孝义张世杨进董平诸贼卒完德安擢镇抚使其後李横来攻造天桥填壕鼓噪临城规帅军民御之炮伤足神色不变围急粮尽出家财劳军士气益振横遣使求得妓女即罢军规不许诸将皆曰围城七十日矣以一妇活一城不亦可乎规竟不予会濠桥陷规以六十人持火枪出焚天桥助以火牛须臾皆尽横拔砮去迁沿江安抚使知池州寻改庐州辞疾丐祠复起知德安府及金人归河南地改知顺昌府时金人随即败盟而规到官辄葺城壁招流亡立保伍未数旬聚粟数万斛比都城留守刘錡行过顺昌金人已南下规即迎錡入同为死守计与錡登城区画布设粗毕而金游骑已薄城矣既而金龙虎大王提重兵踵至规躬擐甲胄与錡督战金稍引退复以步兵蹙之於河死者甚衆规曰敌锋屡挫必思出奇困我不若潜兵斫营使彼昼夜不得休可养吾鋭也及乌珠至錡用其策果劫中其砮寻加安抚使年七十卒规好赈施家无赢财尝为女求婢得一婢甚闲雅询之则云梦旧家女也即辍女奁嫁之闻者感泣守德安时条上屯田事宜仿古之制合射士民兵分地耕垦诏下其法於诸镇又尝着有攻守方略自绍兴来文臣有威声者惟规而已功名与诸将等而位不酬劳时共惜之

论曰顺昌战捷时朱弁犹羁使馆其後南归乃曰於时金人辄见加礼可知是役金人实受大创矣史氏归功於錡然非规先事绸繆錡亦安恃以守况夜劫之谋实出於规乎昔天宝之乱许远尝请张巡同守睢阳双忠之名耀於古今规请刘錡同守顺昌卒破大敌声绩当不在许远下矣

程迥

程迥字可久宁陵人家於沙随靖康之乱徙余姚年十五丁内外艰孤贫飘泊二十余始知读书时高宗南渡西北士大夫多在钱塘迥因以考德问业焉隆兴初成进士唐肃宗时德兴县有程氏女其父兄为盗所杀因掠女去女隐忍十余年卒能刃盗尽诛其党刳肝心以祭其父兄迥为县丞乃取春秋复讐之义颂之曰大得其正者也表为英孝程烈女擢知进贤县有子愬母辄私卖田者母年七十犹坐狱吏断需母死服阙理为已分迥驳之曰谷梁传注曰臣无讼君之道为卫侯郑与元咺发也诸侯於命大夫犹若此况子於母乃使坐狱对吏爱其亲者闻之不觉泣涕之横集也在律别籍者有禁异财者有禁然则母在子孙不得有私财借使其母一朝费尽子孙亦不得违教令也何至预期母死又开它日争讼之端抑知不令之子孙不死於母之前乎守令者民之师帅诚宜正守令不职之愆与子孙不孝之罪以敬天下之为人母者民饥或愬於府云有私与商贾为贩者以故谷贵府檄禁之迥即报曰力田之人逼於

税赋是以出赧非上户也县境不出货宝苟不与商贾交易输官之钱何由而得申论再三得请乃已县既苦水而郡蠲赋至薄迴力论之曰是驱民流徙耳赋不可得徒存欠籍唐人损七则租庸调俱免今损十矣乃悉蠲之有妇人佣身以养姑姑感妇孝每受食辄以手加额仰天祝之其子为人牧牛亦裹饭以饷祖母迴廉知之白於郡给以钱粟调上饶县减倍赋革斛面米尝曰令与吏服食者皆此邦膏血也曾不是思而横敛虐民鬼神其无知乎郡督经制钱急迴曰斯乃古除陌之类其数又三倍正赋民何以堪反复言之当路顷之奉祠寓番阳之萧寺有程祥者客亡妻度氏质奩具以育子久而资竭或劝之醮度氏曰子幼若事他人不得抚是子岂不负良人乎不听迴闻之走告於守月给以钱粟迴居官临之以庄政宽而明令简而信绥强抚弱导以恩义积年讐讼一语解去猾吏奸民无不感激悛悔暇则宾礼贤士或进子弟之秀者为之陈说诗书质问疑难祠庙非典祀不谒隐德潜善皆表之以励风俗听决狱讼期於明允凡上官所未悉者必再三抗辨不为苟止官至朝奉郎卒所著述极富朱子称之以为博闻至行追配古人释经订史开悟後学当世之务又所通该非独章句之儒而已

论曰迴以儒者试政仁心宣露要其大端则薄敛以厚生慎刑以弼教树风声以廉顽陈诗书以劝善而尤於天理民彝之所关者峻为之防古之所以风俗还淳道不出此不知治术者或反目此为迂远其蔽乃生於学术心术匪独政事之失也

顏师鲁

顏师鲁字几圣漳州龙溪人绍兴十二年进士调番禺兴化簿怀安丞历知宁德莆田福清县兴水利平市余常平使郑伯熊以治行荐於朝陈俊卿尤器重之荐可大用累迁国子丞淳熙四年除江东提举时天雨土日青无光师鲁陛辞极论之谓田里未安犴狱未清政令未当忠邪未辨天不示变人主何由省悟上韪其言除浙西常平使岁盐百钜万本钱多不给师鲁出帑缗尽偿宿负区画悉当盐政清肃七年除直秘阁召赴行在上疏论浙西围筑之弊语及权幸复奏民有垦田未授租者但当正其租不宜治以盗种法失邵农本意着为令由监察御史为司成规约甚肃治已立诚率以身教诸生除吏部侍郎会太上皇升遐洪迈请号世祖师鲁率礼官上议谓太上中兴与光武不同迈议遂屈遣使金不辱命而归在铨曹守法惟谨请托不行寻除吏部尚书兼东宫侍读师鲁感激知遇谓生平读书今得豫讲席当不负所学光宗即位首陈正始之说上嘉纳之上疏乞休除龙图阁直学士知泉州泉大郡舶货所通官吏巡城搯税无虚日师鲁至首戢之行平易之政以诚率下水旱斋祷必应永春上供银例预借於民安溪县职官田及逃亡产税皆责民补纳师鲁悉停免之振兴学校葺洛阳桥去之日泉人如失慈母卒年七十有五师鲁自幼庄重若成人孝友天至尝曰穷通自有定分柱道希世徙丧所守故其大节确如金石爵漳浦郡侯谥定肃孙耆仲颐仲俱贤而有宦绩颐仲官至吏部尚书与师鲁享年又同时人异之

论曰师鲁端重直方在朝多昌言非徒以吏绩见也然观其历官所至子谅公诚而出之以坦易便民之政无不修举尤可为涖民者之法汉黄霸鲁恭刘矩卓茂诸人皆位至三公而列之循吏者纪其优也师鲁之道未大行於朝而循声懋着故列於鲁卓之後云

刘清之

刘清之字子澄临江人甘贫力学博极书传绍兴中成进士再调建德主簿使民自实其户而赋役平争讼息万安县大祲清之以县丞奉檄视旱徒步阡陌亲与民接所蠲除具得其实州议减常平米直清之曰此惠不过三十里以内耳外乡之民势难远来受米老幼必有馁死者今大户闭籴意欲窥利我若有政则大户得钱细民得米两适其便乃请均境内之地为八俾有粟者分赈其乡官为主之规画防闲民甚利赖发运使史正志按部至境将拘畸零之赋清之不可正志心敬之欲荐诸朝清之贻以书曰畸零之赋皆州县侵削於民法所当禁所谓羨余也始者献之自下而诏止之今则求之乃自上焉不夺不餽弊有不可胜言者愿侍郎善筹经费以佐国家则士孰不愿出侍郎之门不然清之不敢以玷知人之鉴寻擢宜黄令龚茂良周必大荐之孝宗召对首论民困兵骄大臣退托小臣苟媮愿陛下广览兼听并谋合智提要挈纲而力行之古今未有俗不可变弊不可革者变而通之亦在陛下方寸之间耳改太常主簿丁内艰阍除通判鄂州鄂大军所驻军籍多伪清之使各自实而正之其俗计利而尚鬼家贫子壮则出赘尤谨奉大洪山之祠病者不药而听於巫死则不葬而畀诸火清之皆谕止之差权发遣常州改衡州至则戒诸邑董常赋缓杂征阁旧逋戒预折新簿籍谨推收督勾销明逋负防带钞治顽梗梏吏奸扰户长费用有节渗漏有防稽考有政补置有渐先是郡饰?传以事常平刑狱二使月一会集互致折馈清之叹曰此何时也与其取诸民孰若裁诸公吾所以事上官惟究心所职无负吾民足矣岂以酒食货财为勤哉身自常禄外悉归之公帑以佐经用至之日兵无粮官无奉已而郡计渐裕民力稍纾尝作谕民书一篇首言畏天积善勤力务本农工商贾莫不有劝勉以事亲睦族教子祀先谨身节用利物济人?嫺以时丧葬以礼词义质直简而易从邦人家有其书非理之讼日为衰息又以士风未振每因月朔具酒肴与诸生输情论学设疑问以观所向然後从容示以先後本末之序学者日衆则增筑临蒸精舍以居之所讲先正经次训诂音释次疏先儒议论次述今所紬绎之说然後各指其所宜用确然有可举而措之之实部使者恶其不能媚已囑所厚台臣论罢之光宗立起知袁州而清之疾作犹贻书执政论国事诸生往问疾不废讲论语及时艰孜孜叹息若任其责者取高氏送终礼以授二子曰自敛至葬视此遂卒初清之既举进士复欲应博学宏词科及见朱子尽取所习焚之慨然志於义理之学张栻吕伯恭皆与神交心契汪应辰李焘亦敬慕之母不逮养每展閱手泽潸然交颐厚於族衆尝序范仲淹义庄规矩劝大族随力行之高安李好古与族人争财於豫章见清之清之为说讼家人二卦好古惕然遽舍所讼市程氏易以归卒为善士

论曰清之之政委折周详牧民者仿其条理而施設之何忧不治虽然非心乎国心乎民诚意有所不至则徙法未有能自行者也且其所与诸生讲论者非常磋切於师友间确有所心得亦安能遽祝之曰类我类我哉学优登仕圣有明训有心於辅世理民者恶可以无素业耶

廖德明

廖德明字子晦南剑人少学释氏及得杨时书读之大悟遂受业朱子乾道中成进士知莆田县民有奉淫祠者罪之沈像於江有显者欲得邑地广其居德明不可守会僚属谕意德明曰太守为天子守土未闻以地与人者守为慙服累官知浚州有声诸司且交荐之德明曰吾老

矣可以道徇人乎固辞後选广东提举刑狱弹劾不避权要岁当荐士朝贵多以书见囑者德明曰此国家公器也悉不啓封还之有乡人为主簿德明闻其能荐之簿以为至感会德明行县簿为置酒觴豆甚设德明怒曰一簿耳而侈若是必贪也追还荐章其公严类此时盗陷桂阳迫韶韶人惧德明燕笑自若遣将驰击亲持小麾督战大败之乃分戍守远斥堠明审赏罚宣布威信所部晏然徙知广州迁吏部左选郎官奉祠卒德明初为浚州教授为学者讲明圣贤心学之要尝手植三柏浚士爱敬之如甘棠在南粤时立师悟堂刻朱子及程氏诸书暇即延僚属及诸生亲为讲说远近化之尝语人以仕学之要曰吾自始仕至为郡惟用三代直道而行一句而已

论曰直道而行夫子之治法也三代之盛以此而已乾之动也直故人之生也亦直本无偏曲後世乃以巧智凿之斯治所以不古若也德明受业朱子其为政而知所执要也固宜

许应龙

许应龙字恭甫福州闽县人嘉定初成进士累官太学博士时李全时青等来附应龙入对有莽蜂是惩养虎遗害之说後果如所言三迁宗学博士理宗立应龙首劝正心以为治平本迁着作郎出知潮州盗陈三抢起赣州而鍾全亦挺乱出没闽广间势炽甚应龙亟调禁卒水军扼要害明间谍断桥开堑斩木塞涂复激谕民兵以各保乡庐全妻子由是乡保相继以捷闻及统领官齐敏帅师至潮应龙为策曰兵法攻瑕今鍾寇将穷陈寇猖獗若先破鍾则陈不战擒矣敏从之未几诸寇皆平始人疑应龙儒者不谙军事及见其区画详练雍容莫不叹服僚属请上功应龙曰扞城保民职也何功之云州獠与禁兵鬪应龙平决之皆感悦至相率鸣缶击铜踊跃诣谢及端平初召为礼部郎官闕郡攀送入对上劳之应龙顿首曰臣治州幸免旷职皆陛下德化所暨民无不可化顾牧民者何如耳累迁权右侍郎直学士院是日罢郑清之乔行简制应龙所革也上称善应龙谢因曰昔人有言进人若将加诸膝退人若将坠诸渊今二相乞罢机政而陛下体貌大臣要当两尽其美上纳之其後官至端明殿学士签书枢密院事奉祠卒年八十一应龙不躁不竞不激不随潮州之治最可纪

论曰应龙之谈兵具中机宜及至功成不居庶几劳谦君子者矣其论进退大臣而能推广上心以全终始之谊所裨於国体者尤多云

张治

张治字元德清江人嘉定初中第授松滋尉请行推排法以捄经界不正之弊令以委治治令民自实土地疆界产业之数投於匱乃筹核而次第之吏奸无所匿改袁州司理参军狱有盗黠甚累讯莫能折会有兄弟争财者治论之曰讼於官只为胥吏之地且冒法以求胜孰与守分以全手足之爱乎词气恳恻讼者感悟黠盗闻之亦自款服守以廩虚籍仓吏二十余家命治鞫之治廉其情乃为都吏所卖都吏者州巨蠹也尝干於仓吏不获故以此诬之治度守意鋭未可婴乃密计廩所入以白守曰君之籍二十余家者以廩虚也今校廩入已丰於昔是都吏之言诳也君必不忍受都吏之诳以籍无罪之家守悟为罢都吏而释仓吏调知永新县尝

闻狱中榜声廉之则狱吏受赇乘间讯囚使自诬服也洽大怒亟执付狱明日以上於郡黥之湖南□寇作乱与县接壤民大恐洽闻即单车出邑佐寓士交谏勿听遂按行境上遍见隅官土豪访利害而约结之咸得其懽心未几南安舒寇将犯境闻有备乃去其後通判池州有张德修者误蹴人致死狱吏诬以故杀洽疑之请再鞫守不听会旱洽乃言於提点常平袁甫曰史册以来往往滥刑而致旱伸冤而得雨今旱安知非由德修事乎甫为閱疑状德修遂得减死洽复请蠲征税缓催科以召和气三日果大雨民甚悦顷之丐祠及袁甫提点江东刑狱以白鹿书院寝废招洽为长洽尝事朱子曰嘻是先师之迹也安可辞至则选好学之士日与讲说而汰其不率教者凡养士之田没於豪右者复之学兴即谢病去端平初以大臣荐召赴都堂辞上将以为说书复固辞嘉熙元年致仕卒年七十七洽学博而皆究其指归平居不异常人至义所当为勇不可夺居闲不言朝廷事或有灾异变故辄颦蹙不乐及闻一君子进用士大夫直言得失则喜见顔色一时名流皆敬慕之

论曰昔季路以折狱闻非惟明决过人亦要本於忠信洽之听理诚意恳到至使手足全恩而无情者遂不得尽其辞岂但长於听断已哉其为人勇於从义亦有季路之风可谓朱门政事之选者已

杨简

杨简字敬仲慈溪人乾道中举进士授富阳主簿陆九渊道过富阳简谒之遂师事焉富阳多贾民不知学自简至士风丕振改绍兴司理狱事必亲端默以听务得其平帅府怒一吏命鞫之简白吏无罪帅命追鞫其平日事简曰吏过诟能免今日无罪必撻往事寘之法简不敢奉命帅大怒简取告身纳之争愈力会朱子为浙东常平使者乃荐诸朝其後知乐平县兴学训士诸生闻其言至有泣下者二少年为民害简闭诸狱徐谕以祸福皆感悟愿自赎由是邑人化之以讼为耻夜无盗警路不拾遗呼曰杨父绍熙五年召为国子博士赵汝愚败简上书讼其忠遭斥予祠嘉定九年宁宗更化简以著作佐郎转对所言经国之要弭灾厉消祸变之道北境传诵为之涕泣累迁将作少监入对与上往复漏过八刻上目送之顷以所陈不行丐外出知温州前罢妓籍尊敬贤士有私憾数百为羣过境内者分司不白郡辄檄巡尉捕之简闻惊曰是可轻动乎万一召乱貽朝廷忧兵之节制在郡将违节制是不严天子命也应斩乃建旗巡尉庭下劒手两行夹立守盛服升西序数其罪命斩之僚吏交进为致悔罪意久乃得释而奏罢分司其纪律如此简在郡廉俭自将奉养菲薄常曰吾敢以赤子膏血自肥乎闾巷雍睦无忿争声民爱之如父母画像事之及迁驾部员外郎倾城老稚扶拥出祖简入见上言尽扫喜顺恶逆之私情斯善政尽举弊政尽除民怨自销祸乱不作改工部员外郎转对又以择贤久任为言再迁将作监是时金大饥中原民来归者日以千万计边吏临淮射之简蹙然曰得土地易得人心难薄海内外皆吾赤子中土故民出涂炭归慈父顾靳斗升而逆杀之岂相上帝绥四方之道哉即日上奏哀痛言之不报会有疾请去予祠及宝庆中诏入见辞简虽家居朝廷敬其名德官阶屡进至宝谟阁学士太中大夫致仕卒简之论治尝以为最急者五其次八一日谨择左右大臣二曰择贤以久任中外之职三曰罢科举而行乡举里选四曰罢设法道淫五曰治伍法修诸葛武侯之正兵以备不虞其次急者一日募兵屯田以省养兵之费二曰限民田以渐复井田三曰罢妓籍从良四曰渐罢和买折帛诸无名之赋而禁羣饮五曰

择贤士教之太学教成使分掌诸州之学各择邑里之士教之教成使分掌其邑里之学六曰取周礼及古经熟议其可行於今者行之七曰禁淫乐八曰修书以削邪说简之志如此

论曰白鹿洞之讲诸生无不悚然垂涕者简与诸生言亦至洒涕其师生间诚意之感人者多矣简门人钱时史亦称其论议宏伟指撝痛决云简之惻惻中土遗民与诸葛亮所谓国家威力未振使赤子困於豺狼之吻者同一用心其区画治道亦已详矣不究所施徒使其绩效之验白者限於郡县惜哉

黄震

黄震字东发慈谿人宝佑中登进士调吴县尉不受豪势寻摄县及摄长洲华亭二县皆有声改提领官田所抗言不便不听累擢史馆检阅轮对言当时之大弊曰民穷曰兵弱曰财匮曰士大夫无耻时宫中建内道塲震又请勿度僧道使其徒老死即收其田入可以富军国纾民力上怒降三秩逐之用谏官言得寝出通判广德军初孝宗班朱子社仓法於天下而广德官置此仓行之既久民困於纳息人皆以朱子故不敢议震曰朱子本法设之自民非官置也且法出於尧舜三代圣人犹有变通安有先儒为法不思掇其弊耶乃别买田六百亩以其租入代社仓息约非凶年不贷而贷者不出息郡多淫祠至祀以太牢震以为非法言诸司禁绝之俗有向神自婴桎梏或自拷掠以徼福者震见即召使自状其罪其人曰本无罪震曰尔罪多不敢对人言故告神以免罪耳杖之郡守贾蕃世者似道从子也骄纵不法震数与争是非蕃世积不堪劾之解官抚州饥起震知其州单车疾驰中道即檄富人耆老集城中毋过某日至则大书闭籴者籍强籴者斩揭於市坐驿舍署文书不入州治不抑米价价日损亲煮粥食饿者而後入视州事既乃修朱子祠制社稷祭器复风雷祀教种麦禁竞渡剽军营五百架善政毕举擢提举常平先是常平有慈幼局为贫而弃子者设久而名存实亡震谓收哺於既弃之後不若先其未弃保全之乃损益旧法凡当免而贫者里胥请於官贍之弃者许人收养官出粟给所收家全活至衆又平役法先令县核民产业不使下户受抑於上户大兴水利废陂坏堰及为豪右所占者复之改提点刑狱决滞囚清民讼赫然如神明有贵家害民震按之贵家怨又强发富人粟富人亦怨为御史中丞陈坚所劾遂奉祠去及贾似道罢相以宗正寺簿召将以为监察御史内戚畏其直沮之移浙东提举常平兼福王府长史震曰朝制外任虽蕃王得言之今为其属岂敢察其非奈何法坏自臣始坚不拜长史命进宗正少卿亦不拜震尝告人曰非圣人之书不可观无益之诗文不作可也居官恒未明视事事至立决自奉俭薄人有急难则周之不少吝所着日抄一百卷卒门人私谥曰文洁先生

论曰社仓之法朱子行之至便也而广德乃受其弊以为置之自官与朱子本法异者固亦致弊之一端要之掌司不得其人则公廩之实未有不渐入於私橐者也故知人存政举虽文武之道亦不能以自行於朱子之社仓又何讥焉

史传三编卷五十五

卷五十六

钦定四库全书

史传三编卷五十六

大学士朱 轼撰

循吏传八

金

王政

王政辰州熊岳人也其先仕渤海及辽皆有显者政当辽季乱浮沈州里高永昌据辽东知政材略欲用之政度其无成辞谢不就永昌败渤海人争缚永昌以为功政独逡巡引退吴王栋摩闻而异之言於太祖使赞军事及金兵伐宋滑州降留政为安抚使前此数州既降复杀守将反为宋守及是人以为政忧政曰苟利国家虽死何避宋王宗望壮之曰身歿王事利及子孙汝言是也政从数骑入州是时民多以饥为盗坐系政皆释之发仓廩以赈贫乏於是州民皆悦不复叛傍郡闻之亦多降者宋王召政至辕门抚其背曰吾以汝为死矣乃复成功耶慰谕者久之天会四年为燕京都麴院同监未几除同知金胜军节度使事改权侍卫亲军都指挥使兼掌军赏是时军旅始定筦库纪纲未立掌吏皆因缘为奸政独明会计严扃鐻金帛山积而出纳无锱铢之失吴王栋摩戏之曰汝为官久矣而贫不加富何也对曰政以杨震四知自守安得不贫吴王笑曰前言戏之耳以黄金百两银伍百两及所乘马遗之六年授左监门将军历安州刺史檀州军州事户吏房主事天眷元年迁保静军节度使致仕卒年六十六政本名南萨里尝使高丽因改名政子遵仁遵义遵古遵古有传论曰饥民夺食为盗与真盗异急之则乱耳政之赈饥抚叛皆得其方本之以仁心行之以良法又能惓惓焉以四知自凜可以为民父母矣

刘焕

刘焕字德文中山人宋末兵起城中久乏食焕尚幼煮糠核而食之自饮其清者以醴厚者供其母乡里异之稍长就学天寒拥粪火读书不怠登天德元年进士调任丘尉县令贪污焕每规正之秩满令持盃酒谢曰尉廉慎使我获考调中都市令枢密使布萨呼图克家有条给工牟利於市不肯从市籍役焕系之呼图克召焕焕不往暴工罪而笞之焕初除市令过谢乡人吏部侍郎石琚琚不悦曰京师浩穰不与外郡同弃简就烦吾所不晓也至是始重之以廉升京兆推官再迁北京警巡使捕二恶少杖於庭中戒之曰孝弟敬慎则为君子暴戾隐贼则为小人自今以往毋狃於故习国有明罚吾不得私也自是衆皆畏惮毋敢犯者召为监察御史

父老数百人或卧车下或挽其靴箠曰我欲复留使君期年不可得也以本官摄户部员外郎代州钱监杂青铜铸钱钱色恶类铁钱民间盗铸抵罪者衆朝廷患之下尚书省议煥奏曰钱宝纯用黄铜精治之中濡以锡若青铜可铸历代何缘不用自代州取青与黄四六杂揉务省铜而功易就由是民间盗铸陷罪者衆非朝廷意也必欲为天下利宜纯用黄铜得数少而利远其新钱已流行者宜验数输纳准换从之再迁管州刺史耆老数百人疏其着蹟十一事诣节镇请留曰刺史守职奉法乞留之以廉升郑州防御使迁官一阶转同知北京留守事世宗幸上京所过州郡大发民夫治桥梁驰道以希恩赏煥所部惟平治端好而已上嘉其意迁辽东路转运使卒

论曰明儒薛文清有言立法贵在必行法立而不行则法为虚文适足以啓下人之玩至哉言乎盖居心以寛仁为本而法则必严使民有所畏而不敢玩煥用法不避贵势而其诲民则又谆谆焉相动以天民之畏而爱之也有自来矣抑观其治事之才又何其刚明而知体要也

元

李德辉

李德辉字仲实通州潞人天性孝弟操履清慎少嗜学苦贫无资年十六乃监酒丰州禄食有余辄市笔札録书夜诵已乃叹曰志士顾安此耶事不足以匡君福民隐不足以悦亲善身人寿几何恶可以无闻同腐草木遂谢去讲学以卒其业及世祖在潜藩刘秉忠荐之与窦默并辟使侍裕宗讲读後宪宗封宗亲割京兆隸世祖时汪世显宿兵利州以规蜀世祖乃立从宜府以德辉为使俾调军食德辉募民入粟散钱币给盐券为直陆挽兴元水漕嘉陵未期年军储充羨其後卒资以取蜀中统元年为燕京宣抚使燕多剧贼结死党造伪钞德辉悉捕诛之令行禁止以忤王文统罢去及文统诛复起为山西宣慰使势家籍民为奴者皆按免之且千人至元元年世祖以太原难治改德辉为总管至则崇学校表孝节劝耕桑立社仓一权度阜民之政无不修举入为右三部尚书皇子安西王镇关中以为王相德辉视濒涇营牧故地可得数千顷乃起庐舍疏沟浚募贫民二千家假以牛种田具屯田其中岁得粟麦刍藁万计十二年诏以王相抚蜀重庆城守久不下朝廷於东西川各置行枢密院合兵万人围之德辉至成都两府争咨方略德辉曰宋已亡矣重庆弹丸地不降何归政以公辈利剽杀故惧不来耳公等既玩寇又复东西相观望军政不一败在朝夕岂能成功哉未几泸州叛而重庆围果溃十四年以德辉为西川行枢密院副使仍兼王相是年遂复泸州明年再围重庆踰月拔之绍兴南平夔施思播所在皆下是时东川枢府犹故将也德辉惩前败乃请独军进围合州先释合俘使语州将张珩早自归又以礼义祸福貽书解譬珩未及报而德辉还邸既而珩死牙校王立代将遣人調事成都德辉获之复纵归使谕立如谕珩旨立即使人间至成都请降德辉赴之东川枢府害其来为说以疑之德辉曰昔合以重庆存故力可同恶今已孤絶穷而来归亦其势然耳且吾所以来非欲攘公之功吾惧公等愤其後服利其剽夺而快心於屠城也遂单舸薄城呼立出降安集其民而罢置其吏合人自立以下皆家绘祀之十七年以为安西行省左丞是年罗施鬼国既降复叛诏云南湖广四川合兵三万讨之兵且压境德辉驰使止之而遣人谕降其酋阿察熟德辉名曰是活合州者耶其人明信即诣德辉降上以其地为顺元

路後有譖德辉受鬼国马千数者上曰德辉吾所素知安有是耶年六十三卒蛮夷闻之哭之如私亲王立亲为衰絰率吏民拜哭声震山谷而播州民亦立庙祠之

论曰德辉之机权干理於事无不办者岂彼降才实多哉当其愤发学业时所以增益其不能者殆不可诬至全合州一城之命其见事明赴机勇而积虑处心一出於仁元史称巴延平宋不妄屠戮以比曹彬若德辉之遏乱略固当不在巴延下矣

程思廉

程思廉字介甫东胜州人性刚正疾恶用太保刘秉忠荐给事裕宗潜邸以谨愿闻平章哈坦行省河南署为都事丞相史天泽尤器之天泽规取襄樊使任转饷多露积一夕暴雨思廉安卧不起省中召诘之思廉曰此去敌近中夜骚动衆必惊疑或致它变纵有漂湿不过军中一日粮耳闻者黠之累迁监察御史以劾权臣阿哈玛特系狱阿哈玛特之党巧为机穽思廉处之泰然卒不能害其後迁河北河南道按察副使行至彰德闻两河饥而吏徵租益急欲蠲之有司请需奏报思廉曰若然民不堪命矣即驰檄罢徵已果得请至元二十年河北复大饥流民渡河求食朝廷遣使絶河止之思廉曰民急就食岂得已哉天下一家河北河南皆吾民也亟令纵之且曰虽得罪死不恨章上上亦不之罪也卫辉怀孟大水城不没者数板思廉露宿督修堤防水不为害所赈贷全活者尤衆卫人德之二十六年初立云南行御史台以思廉为之思廉奉宣上意绥怀远人明示以祸福毋使自外蛮酋皆慑服云南旧虽有校而礼教不兴思廉力振起之由是有向学问礼者成宗立除河东山西廉访使亦多惠政思廉数任风宪言事剴切尝请早建储贰访求贤俊辨车服议封谥养军力定律令皆急务也与人交有终始或有疾病死丧问遗赙恤往返数百里不憚劳於家族尤尽恩意好獎拔人物或讥为好名思廉曰若避好名之讥人不复为善矣卒年六十二谥敬肃

论曰君道之大莫先於尚贤人心之公莫良於好善得贤而用之大有所以元亨也见善而资之不齐所以成德也思廉之獎拔人物其设心与龔统正相类然统绌於百里而思廉所至皆有治蹟干理虽殊要为贤者若其亮直之概尤不媿古人风节云

乌克逊泽

乌克逊泽字润甫临潢人其先女真乌尔古部因以为氏泽性刚毅读书举大略一切求诸已不事章句才干过人元帅索多将下兵闽越与语奇之辟元帅府提控及收福州进拔兴化索多怒其民从陈瓚应张世杰将屠之泽独屡谏不听乃复前说曰世杰方急攻泉州比我定兴化整兵而南泉州且失守莫若纵兴化遗民使南走扇动之世杰将胆落而遁是不战而完泉州也索多喜从之民得脱者甚衆世杰闻兴化破果解围去明年攻潮州潮备御甚固泽独曰潮不时下以外垒为援故也剪其外垒潮必覆矣乃分兵破一大垒余垒皆溃二旬而潮拔未几宋亡福建立行省以索多行参知政事而以泽为都事从入朝乃命知兴化军赏其善谋也俄改兴化为路即命以泽行总管府事民争歌舞迎候曰使君实生我吾父母也喜极而继以泣兴化新残於兵革泽下令掩其髑骼收其流离有弃子者置慈幼曹籍而抚育之郡中恶

少甯名卒伍多为暴官吏虐激变莫敢诘问泽悉除其名按诛其尤无良者贪暴始戢先是郡民之从陈瓚战死者吏将籍其产业泽曰国家至仁诛止陈瓚奈何累及平民乃为令曰民不幸诖误从陈瓚诛及鬪死无後者其田庐赀产竝给其族姻有司无所与吏不能逆事得已当江南未定时所在民相什伍自保卫及时平行省议籍为兵民志汹汹泽独曰国兵非少今籍民以示少非所以安反侧也且当籍者衆民或有他心议遂格泽又兴建学校召长老及诸生讲肄经义行乡饮酒礼旁郡闻而慕之後调永州路判官湖广平章约苏穆尔贪纵诛求无厌使者旁午随处置狱民以考掠死者载道其使至永州泽戒吏善供帐丰酒食顺适其意间以利害晓之使者感愧不敢发其毒一郡获安是岁宝庆武冈盗起泽辄讨平之所俘获简出其诖误者百余人上书止诛首恶余悉减死丞相僧格建议考校钱谷天下骚动泽叹息曰民不堪命矣即自上计无毫厘羡约苏穆尔怒系之且寘之死明年僧格败约苏穆尔伏诛乃得释其後从征海南有功授广西两江道宣慰副使两江荒远不知礼法泽作司规三十有二章以渐为教民遵守之又省廩置二十二所以纾民力徼外蛮数为寇缘徼厄塞布十屯列营堡以守之陂水垦田筑八埭以节瀦泄田熟谷稔边民利赖擢海北海南廉访使视事三月民输租五百石泽叹曰事君者先事後食吾蒞政日浅而受禄四倍非情所安量食而入余悉委学官给诸生以劝业常曰士非俭无以养廉非廉无以养德身数年一布袍妻子朴素无华其所守如此潮啮雷州陂塘农以为病泽因行视见其西北广衍平袤乃曰三溪走海而不以灌溉此史起所以薄西门豹也於是浚故湖筑大堤埭三溪瀦之为斗门七堤埭六以节其赢耗酺渠二十有四别为牐设守视者以时啓闭计得良田数千顷滨海广舄竝为膏土民歌之曰舄卤为田兮宣慰之教渠之泱泱兮长我秔稻自今有年兮无旱无涝至大元年改福建廉访使泽平日有德於闽人安之以母老求归养岁余母歿泽哀恻不自胜以毁卒

论曰唐褒君素宋獎韩通岂不以其忠於所事乎陈瓚之节固兴王所当録之以为人臣劝者况於从瓚之民亦复何罪耶泽之谏索多陈义当必出此及其不听乃干以军策全其民命委曲以行吾仁设心一何挚耶其论以俭养廉以廉养德尤牧民者所当科律奉之者已

卜天璋

卜天璋字君璋洛阳人天资颖悟读书史识成败大体尤负直气至元中为南京府使河北饥民数万集河上欲南徙有诏令民复业勿渡衆皆汹汹天璋虑生变白总管听其渡遂以无事後为中台掾主文奏有侍御史负赃罪御史将发之未及奏先为所譖御史与天璋俱出系内廷御史对食悲哽天璋问故御史曰吾老惟一女心怜之闻吾系不食数日矣是以悲耳天璋怒曰死职义也奈何为儿女子泣耶御史惭谢顷之见原丞相顺德王当国擢中书掾事有可否必力辨王常从其议且曰掾能如是吾复何忧大德四年迁工部主事蔚州刘帅豪夺民田天璋承机往讯归田於民而帅亦屈服武宗立尚书省以为刑部郎中是时盗贼充斥廷议犯者并家属咸衣之青衣以别民伍天璋曰赭衣塞路秦弊也尚足法耶乃止後被命治反狱帝顾左右曰君璋廉慎人也必得其情狱果不冤皇庆初出为归德知府课农兴学修弭河患擒缉盗贼商旅流通迁濶西廉访副使閱月以更田制改饶州路总管听民自实事无苛扰版籍为清时省臣董田事妄作威福郡县争赂之天璋独无有省臣衔之将中以危法求其罪卒无所得所属以饥告天璋即令发廩吏持不可天璋曰待请而後賑民且死矣我任其罪不以累

诸君也遂发之其临事无所顾虑多此类以治行第一擢广东廉访使寻乞致事天历二年蜀兵起荆楚大震复拜山南廉访使将行人见其老止之天璋曰国步方艰吾年八十常恐弗获死所敢避难乎至则厉风纪清吏治州郡肃然值谷踊贵下令勿损其直听民自便未几舟车争集米价顿减会诏三品官言时政得失天璋列二十事凡万余言目曰中兴济治策皆中时病因自引去既归以余禄施族党家无甌储处之晏如至顺二年卒諡正献

论曰史称天璋读书史识成败大体宜乎比老列事而皆中於时病也当其叱御史时身不过掾吏已奋不顾命义形於色及至矍铄老翁犹然强起以济艰难庶几蹇蹇匪躬之节者已

段直

段直字正卿泽州晋城人至元十二年北方盗贼充斥直聚乡党结垒自保世祖命将略地过晋城直以衆归之幕府承制署为潞州元帅府右监军其後论功行赏分土世守命直为泽州长官泽民多避兵未还者直籍其田庐寄顿於亲戚邻户约曰本主至析而归之逃民闻即来还归其田庐如约民得安业素无产者则出粟赈之为它郡所俘掠者出财购之以兵死暴露者收而瘞之未几泽为乐土大修孔子庙割田千亩置书万卷迎儒士李俊民为师以招延四方学者不数年学之士子以通经被选者百二十有二人在官二十年朝命提举本州学校事未拜而卒

论曰为政本无它奇不富不教则民卒流亡而邻於禽兽反是以行吾政小而试之一州一邑蒙其泽而充其道虽尧舜犹病之矣直之招亡兴教立法颇具以此揅时乱离福厥桑梓有足多焉

杨景行

杨景行字贤可吉安太和人延佑二年成进士授会昌判官会昌民汲於河不知井饮多致疾病覆屋率用茅茨常有火灾景行始教民穿井陶瓦二患俱息百姓德之又按治其豪之干政害民者乃创学舍礼师儒斥腴田以膳士弦诵之声遂盛调永新判官奉檄核租除剗宿弊奸欺不容细民赖焉再迁为宜黄令理冤狱之久滯者数十事擢抚州推官金溪民陶甲家厚积而性凶险尝持县短长陷其长吏由是官吏畏之莫敢举法陶益横横於一郡景行至痛绳以法徙之五百里有豪僧发塚取财为奸事觉景行急按之动以贿不听赂当道撼以危语不顾卒治如法由是豪猾屏迹良民获安转归安令治蹟如判永新时景行所历皆有惠政所去民为立石颂之後以翰林待制朝列大夫致仕年七十四卒

论曰下泉之诗盖为恩泽及於莠民而反遗乎善类而作也故冽泉以浸萧是周之衰也若陰雨而膏苗则郇伯之政也夫萑稗不芟则嘉禾不茂莠民不去则善类不安景行之治抚正取诸此

林兴祖

林兴祖字宗起福州罗源人至治二年成进士稍迁知铅山州铅山多造伪钞者而吴友文为之魁友文奸黠悍鸷既致富乃分遣恶少四五十辈为吏於有司伺有欲告之者辄先事戕之前後杀人甚衆民罹其害莫敢诉兴祖至则曰此害不除何以牧民即榜禁伪造而立格募民首告俄有获伪造二人并贓以告者兴祖鞠之急友文自至官为营救遂并执之须臾诉友文者百有余人择其重罪一二事研之狱立具因捕其党二百余人悉寘之法民害既去政声籍甚至正八年迁道州路总管行方及城而撞贼已尾其後相去仅二十里时湖南副使哈喇特穆尔屯兵城外闻贼至以乏军需欲退去兴祖即夜往留之哈喇特穆尔曰翼日得钞五千錠桐盾五百具者乃可破贼兴祖许之还入视事即以恩信贷商钞而取郡楼旧桐版为盾日中皆具哈喇特穆尔大喜遂留为御贼计然贼闻新总管一夕具五百盾以为大军且至已中夜遁去矣永明县峒獠屡窃发兴祖手榜谕之皆曰林总管廉而爱民不可犯也三年不入境春旱虫食麦苗兴祖祷之大雨三日虫死而麦稔已而罢兴作赈贫乏轻徭薄敛郡中大治考课为天下最以年老致仕终於家

论曰兴祖以明法锄奸以敏事退贼以廉声服峒獠所至皆治其才操两有足称者彼告讐以为能战胜以为勇计取术馭以为智者成效反有所不逮故知治道之长不在彼而在此

周自强

周自强字刚善新喻人好学能文练於吏事以文法推择为吏泰定间广西獠反自强往说以祸福中其要害獠酋立罢兵贡方物纳款请命超宣慰司都事後知义乌县周知民情而性度寬厚不为刻深凡讼诉一见即能知其曲直然未遽加以刑责必为援经典反复开譬悔悟则原其罪惟迷谬怙恶然後绳之以法民畏且爱狱讼顿息民间税籍多失实自强履亩核之民不能欺文簿井井田是赋役平均贫富乐业部使者举廉能选知金溪县政绩愈着以江州路总管致仕卒於家论曰虞廷命刑归於钦恤孔门论狱要於哀矜岂不以无知之民陷於罪辟良由教化不明故耶自强姑惟教之勿庸杀之有矜恤之心焉其引譬必本於经又何恻恻儒者气象耶

王艮

王艮字止善绍兴诸暨人尚气节读书务明理以致用不苟事言说初辟为吏值朝制复立诸市舶司行省买旧船以付舶商费省而易集且絶官吏侵欺掊克之弊实用良策也後为两浙都转运盐使经历时盐使王克敬以计口食盐不便欲稍损其额以纾民力衆咸沮之艮独毅然曰民实寡而强赋多今死徙已衆矣顾重改民籍而轻弃民命耶且浙右商贾辐辏未尝以口计也移其所赋散於商贾之所聚实为良法於是议岁减绍兴食盐五千六百引寻复有排前议者艮固争之至欲谢职去丞相闻乃留艮而议遂定迁海道漕运都万户府经历绍兴官粮之入海运者十万石自城至海岁拘民船以备短送吏胥缘是为虐及至海次主运者又不即受有折缺之患艮言曰运户既受官直何复为是纷纷也乃责运户自载入运其弊遂除运船败於风者法当核实乃除其数文移咨勘动经数岁运户往往破家艮閱牒即除之所除粮凡五万二千八百石钞二百五十万缗後迁浙江行省检校官有诉松江富民包隐田土请立

官糾追者中書省行下行省遣良驗視良乃條陳曲折以破其誑且曰彼欲竦朝廷之听以報宿怨耳萬一民心动搖患生不測豈培養根本之策哉事以得寢復擢江西行省左右司員外郎有惠政歲余以中憲大夫淮東道宣慰副使致仕年七十一卒

論曰鹽之為利管氏資以富齊故自漢武權之世遂沿為永制其產於解池者水自凝結是為顆鹽若山東兩淮浙閩之產則煮而後成是為末鹽惟四川出於井深者數百尺汲而煮之地產雖殊要為國利雖然竭澤者無魚赭山者無獸留余於民然後國得取盈焉至於海運之行蓋因元時河漕不能直抵京師又不得不挽東南之粟以實輦下故世祖從巴延之請而行是策較諸河漕利害相半萬頃汪洋無淺滯之患揚帆破浪無擗擗之煩南風發運而北風歸舟無銜尾相壅經冬阻凍之弊然而波濤之險什伯於河渠一有淪溺則舵師水工百不全一此又不若河漕之為安至若押運監臨之官出納收支之吏弊竇多端難可究詰則河與海一也良之治鹽漕概以厚下為心實得為國生財之要道史稱其讀書務致用豈虛哉

按達拉

按達拉字瑞之阿爾斯蘭之孫也通經史能習諸國語累官集賢直學士至順元年遷襄陽路值山西大飢河南行省慮流民入境為變檄按達拉守武關按達拉驗為良民輒听度關關吏曰得無非上官意乎按達拉曰吾防奸耳非讐良民也可不開其生路乎既又為粥以食之所活萬計襄陽城臨漢水歲有水患筑堤護之遂以無虞元統二年除益都總管益俗頗悍黠而按達拉務興學校以平易治之有劫人賊久捕不獲按達拉生擒之賊黨布賄反誣按達拉以枉勘而縱其賊已而賊劫河間復被獲乃盡輸其情而按達拉之誣始白是時親王瑪努鎮益都府屬病民按達拉每裁抑之民以無扰至正六年年七十卒

論曰古者諸侯雖有分土而無分民故齊桓以伯主猶申遏籩之禁誠以天地之大德曰生所為建侯樹長皆以為民也秦漢以下司牧之官初非世守而反過生畛域東鄰苦荒西鄰遏籩甚至拒關以絕其生路如元河南行省之為彼越境求生者獨非有元之赤子欤何忍而能舍之至於此極也嚴讞察而听度關按達拉於是為能仁矣

盧琦

盧琦字希韓惠安人至正二年成進士稍遷知永春縣始至賑飢饉止橫斂均賦役減口鹽蠲權鐵之無徵者已而訟息民安乃新學宮延師儒課子弟月書季考文風翕然鄰邑仙游盜發琦適入邑境盜望見迎拜曰此永春大夫耶為大夫民者何幸之大吾邑長乃以暴毒驅我琦因立馬諭以禍福皆投刃請縛酋以自贖琦許之酋至琦械送帥府自是威惠行於境外十三年泉郡大飢死者相枕藉稍能行者皆老幼扶携就食永春琦勸諸浮屠及大家分食食之存活不可勝計十四年安溪山賊數萬將襲永春琦召民諭曰若等能戰則與之戰不能則我獨死之衆皆曰使君父母也吾侪赤子安忍以君畀賊耶今日之事有進無退琦率以攻賊无不踴躍爭奮遂大破之翌日賊傾巢至又連破之大小三十餘戰斬獲以千計而邑民竟無一人傷者賊遂遁去時兵革四起列郡皆汹汹惟永春晏然若承平後改知寧德縣以去

论曰孟子有言率其子弟攻其父母自生民以来未有能济者也琦之得民如此所谓以衆志为城郭虽折箠而威於戈矛制挺而鋤於鋒刃矣此实百战百胜之术孙吴之所未及讲者也

史传三编卷五十六